



BIBLIOTECA NAZ.
Vittorio Emanuele III

XLIX

C

15

NAPOLI





François Xavier



P. Gaspar Barzoe



du P. Ant. Criminal



du P. Alph. de Castré

SECONDE PARTIE DE L'HISTOIRE

DES CHOSSES PLUS
MEMORABLES ADVENUES

tant ez Indes Orientales, que
autres pais de la decouverte
des Portugais,

*En l'establissement & progres de la foy
Chrestienne & Catholique:*

Et principalement de ce que les Religieux de la
Compagnie de IESVS y ont faict, &
enduré pour la mesme fin,

Depuis qu'ils y sont entrez
usqu'à l'an 1600.

DEDIE'E AV ROY TRES-CHRESTIEN
de France & de Navarre
LOUIS XIII.

Par le P. PIERRE DV HARRIC, Tolosain,
de la mesme Compagnie.



A BOVRDEAVS,

Par SIMON MILLANGES Imprimeur
ordinaire du Roy. 1610.



Mart. de Pierre Corneille



Mart. du P. Ignace Azegbe



Martyre du Parc Apollite Aquilina







AV ROY TRES
CHRESTIEN DE
FRANCE ET DE NAVARRE
Louis XIII.



I R E,

PV IS que, suivant les loix diuines
& humaines, les enfans heritent aux
biens, & droicts de leurs peres, & que
V. M. a succedé aux Sceptres & Cou-
ronnes du feu Roy HENRT IIII.
d'immortelle memoire, vostre tres-hon-

noré Pere, que Dieu absolue; elle a par mesme moyen acquis sur
nous les infinies obligations, dont nous luy estions redevables, non
seulement comme à nostre Prince naturel, mais aussi comme au
tres-insigne bien-facteur, & tres-affectionné pere de nostre Com-
pagnie. C'est pourquoy luy ayant voué cest histoire de le com-
mencement, que ie delibray de luy faire voir le iour, pour les cau-
ses deduites au premier volume, qui luy fust dédié il y a quel-
ques années, & que de sa grace il receut avec vn bon visage, com-
me ce deuxiesme n'en est qu'une partie, faisant vn corps avec le
premier, ie le luy auois aussi consacré: & desia (le liure acheué
d'imprimer) i'estois sur le point de mettre sous la presse la de-
dicace d'iceluy. quand les tristes & funestes nouvelles de sa mort

EPISTRE

de sa streuse nous vindrent. Lors me voyant repoussé de cet haur, (auquel ie pretendois surgir) par vn fortunal si contraire & inopiné, ie pris soudain resolution de me retirer au port plus proche, afin d'estre à l'abry de l'orage. C'est à V. M. SIRE, sur laquelle apres le coucher de ce luyssant Soleil, qui espädoit les rayôs de sa renommée par l'Uniuers, toute la France tient les yeux fichez, cōme sur son Soleil Leuant, pour se gouuerner par ses influences, & luy rendre très humble seruite : mais nous particulièrement, SIRE, comme tant obligez à V. M. Que si toute la Noblesse Françoisse, qui s'est trouuée en Cour à vostre aduenement à la Couronne, s'est allée ietter à vos pieds, pour vous offrir son cœur & son espée; n'est-il pas raisonnable, que nous, qui faisons profession de la pieté Chrestienne, & des lettres, outre les prieres & sacrifices, que nous offrons à Dieu iournellement pour la santé & prosperité de V. M. & de vostre tres honorée mere la Royne, & Regente de ce Royaume, luy consacrons aussi nostre plume, & nostre aux sedentaires? Le deuoir de subiects nous y semōd, mais l'affection singuliere que sa Majesté defuncte nous portoit, & les innombrables bien-faicts, que nous en auons receu, nous y obligent; ains exigeroient de nous d'auantage, si la portée de nos forces se pouuoit estendre plus loing. Car qu'est ce que nous pourrions rendre d'esgal à tant de faueurs, dont vn si haut, & si puissant Monarque nous a comblez, & principalement de l'honneur, qu'il nous a fait, voulant que son cœur (le plus beau, & riche don qu'il eust peu laisser ça bas) fust cōsigné entre nos mains, pour estre porté, comm'il a esté, à son Collège Royal de la Fleche.

Puis donc que nous ne pouuons recognoistre en sa personne de si grandes & signalées graces, ny luy tesmoigner autrement nostre affection reciproque, sinon en priant Dieu pour son ame, comm'il se fait & se fera, nō seulement en France, mais encore en tous les quartiers du monde, ou ceux de ceste Compagnie sont esbandus;

il n'y a autre, à qui nous deuions à plus iuste tiltre ceste recognoissance qu'à V. M. comme estant son successeur legitime. L'esperance aussi que nous auõs conceuë tant de vostre pieté, vertu, prouesse, & autres belles qualitez dignes d'un tel Prince; que de la continuation de ceste bien-ueillance Royale en nostre endroit, à l'exemple de vostre feu tres-clement, & tres-debonnaire Pere, nous incite au mesme deuoir. Car si c'est le propre des enfans bien-nez d'imiter & ensuiure les vertus, & louables actions de leurs peres & deuanciers, nous deuõs esperer, SIRE, que V. M. estant si bien oſleuée, comm' elle est, voudra prendre à point d'honneur deuant Dieu, & deuant les hommes, de poursuiure les saintes entreprises de son tres-sage, & tres-adiusé pere, & de faire reluire en sa vie, & en ses actions les heroïques vertus & perfections de ses ancestres: particulierement de celuy, qui apres Dieu l'a mis en ce monde. Je dy de ce grand HENRY IIII. Grand vrayement en guerre, Grand en paix, Grand en courage, Grand en clemence, Grand finalement en plusieurs autres qualitez recommandables en vn Prince. Mais si V. M. veut vn autre parfait exemplaire de toutes les Grandeurs qui doiuent estre en vn Roy tres-Chrestien, vous pouuez, SIRE, ietter aussi les yeux de l'esprit sur celuy duquel vous portez le nom, & tirez vostre extraction. Je parle de ce tant renommé S. Louis, non seulement pour sa sainteté, mais aussi pour sa vaillance, & grandeur de courage: duquel mesme les Roys estrangers ont voulu faire leur patron, & former à ses vertus le modele de leur vie & de leur mort.

V. Majesté, SIRE, trouuera encore en ceste histoire, si elle daigne se la faire lire, des motifs pour s'anchrer dauantage en l'amour & crainte de Dieu, y remarquant cõme il assiste de son ayde, & secours les Princes, qui le seruent & se confient en luy, leur donnant des victoires cõtre leurs eunemis du tout miraculeuses. Elle y verra pareillemẽt les mœurs, & constumes, les loix, & la police

de diuerses nations & Royaumes. Chose qui luy pourra seruir vn iour au manient des affaires, & que sa Majesté desuëte desiroit scauoir pour la mesme fin : principalement ce qui appartient au Royaume de la Chine, l'un des mieulx policez Estats, qui soyent au monde, dont il est amplement traitté en ceste partie.

Estant donc, SIRE, esguilloné par tant d'exemples, & domestiques, & estrangers, nous auons grande occasion d'esperer que V. M. fera, durant son regne, refleurir la France autant, ou plus que iamais elle fleurist en pieté & religion, en paix & en iustice, en richesses, & en puissance, brieu en toutes les perfections d'un estat tres-Christien; de maniere que non contente de ses bornes, elle ira porter la cognoissance du vray Dieu, avec ses loix & Terres-neufues, & autres pays des Barbares, & Idolatres; ains qui plus est replâtera l'estêdard de la croix avec ses fleurs de Lys, sur les murs de la S. Cité, & reconquerra l'Empire de l'Orient, apres y auoir esteint la puissance & le nom des Othomans.

Ce ne sont pas, SIRE, des souhaits bastis sur le sable, mais fondés sur de grâds prognostiques du Ciel, & sur tât de merueilles que Dieu a fait desia paroistre en vostre Royale personne. Car qui n'aduouera que ceste diuine bôté vous a donné à la France, voire à toute la Chrestienté, par vne faueur speciale, & pour luy faire quelque notable service, s'il considere la naissance si heureuse, & quasi miraculeuse de V. M. En outre le temps auquel vous nasquistes, SIRE, qui fust le premier an d'un nouueau siecle, & ce du siecle dixseptiesme, & le vingt & septiesme de Septembre, n'estoit-ce pas, ce semble, pour nous presager un aage d'or à venir, nous en donnant comme les arres tout au commencement, par la bien uenue de V. M. tant desirée des gens de bien? Car selon les lettres humaines & diuines, le septenaire est un nombre mystereux, & marque de bon-heur & prosperité. Mais vostre education, SIRE, & nourriture si vertueuse, vós com-

plexions si nobles, vostre courage si genereux, vostre esprit si prompt, vostre iugement si solide pour l'aage, s'enforcent d'autant plus nos esperances. Et sur tout la singuliere prouidence, que Dieu à monstre, pouruoiant en ce temps-cy à V. M. d'une si vertueuse, si prudente, & courageuse mere; & ce Royaume d'une telle Royne Regente. Car les graces & faueurs que le Ciel luy a desparty si prodigusement nous promettent, qu'elle sera à l'un, & à l'autre une seconde Royne Blanche, qui gouuernerá si sagement ceste Monarchie Françoisé, pendant vostre bas aage, que rien ne desmentira en vn si beau, & si riche bastimēt; & esleuera si heureusement V. M. qu'elle le rendra pareil en vertu, en sagesse, en iustice, & en valeur, à ceste glorieuse tige de vostre Royale maison, le Bien-heureux S. Louis. Or tandis, SIRE, que vous vous aduancerez en aage, en pieté, & en toute autre perfection digne d'un si grand Monarque, comme tout le monde l'attend, nous chargerons de vœux & sacrifices, les autels du Dieu viuant, à celle fin qu'il luy plaise seconder nos esperances, & souhaits de sa faueur celeste, & cependant qu'il veuille maintenir V. M. en sa sainte garde, & vous donner vn sage Conseil, vn peuple fidele, & des puissantes armées, pour entretenir tousiours vos subiects en paix, & en concorde, vnis sous vostre sceptre Royal en vne mesme foy, & Religion: & qu'après auoir heureusement vescu les ans de Nestor, & laissé vne belle & fleurissante posterité, pour succéder à vos couronnes temporelles, il vous en donne là hault vne de gloire immortelle, ainsi que luy soubaitte de tout son cœur.

DE V. MAIESTE.

Le tres-humble, & tres-obeissant
seruiteur & subiect.

De vostre ville de Bour-
deaus, ce 15. Iuin 1610.

PIERRE DV IARRIC.

VOIEY en fin (Amy Lecteur) les deux liures qui re-
stoyent de l'Histoire des Indes Orientales, combien
qu'un peu plus tard que ie n'eusse pensé, & que (peut-
estre) tu n'eusses désiré: mais, en contr'eschange du
retardement, ie donne plus que ie n'auois promis. Car n'ayant en-
core trouué tout ce, qui estoit de besoing pour dresser l'histoire des
Royaumes de Congo & Angóla, ie n'estois point en deliberation
d'en parler; toutesfois en ayât depuis recouuré quelques memoires,
& récontré en diuers auteurs, ce qui me māquoit, ie resolu d'y ad-
iouster ces deux pieces. Voyant donc qu'il se pouuoit faire vn liure
des choses de l'Afrique, y comprenant celles du Brasil; & vn autre
presque esgal des Royaumes de l'Asie, dont il est icy traité, ie reso-
lus de suiure plustost cest ordre, que celuy que i'auois proposé au
commécement du premier liure. Car ce faisant ie m'accommodois
dauantage, à la Cosmographie, & donnois moyen aux Lecteurs de
trouuer plus aisément és mappe-mondes les regions, desquelles il
est icy fait mention. Je t'ay voulu aduertir de cecy (Amy Lecteur)
afin qu'on ne trouue estrange ce changement: & ensemble te prier
d'auoir souuenance, de ce que j'ay dit en l'aduertissement de la pre-
miere partié; car ie n'ay usé de moins de diligence & fidelité en ce-
ste-cy qu'en l'autre, & n'ay rien escrit dont ie n'eusse des bonnes
memoires, ou des auteurs graues & dignes de foy. A Dieu.

Sommaire de ce qui est contenu en ces deux liures derniers.

Au troisiésme est contenuë l'histoire	6. De l'Ethiopie, qui est sous l'E-
1. Du Royaume de Congo. p.3.	gypte, ou commande le Roy
2. Du Royaume d'Angóla. 76.	des Abyssins. 169.
3. Du Royaume de Monomotapa. 103.	7. De la Region du Brasil. 248.
4. D'un naufrage notable aduenü	Au 4 ^{me} . liure est comprise l'histoire
és bancs de la Iuifue. 126.	1. Du Royaume d'Ormuz. 362.
5. D'une expedition de guerre re-	2. De l'Empire du grand Mogor: 429.
marquable, faite par les Por-	3. Du Royaume de la Chine. 498.
tugais contre les Turcs. 155.	

APPROBATION DES DOCTEURS.

NOus soubz-signez Docteurs en Theologie, certifions auoir leu le present liure intitulé, *Seconde partie de l'Histoire des choses plus memorables aduenües tant ex Indes Orientales, que autres païs de la descouuerte des Portugais, en l'establissement & progres de la foy Chrestienne & Catholique, &c.* Composé par le P. Pierre Du Iarric de la Compagnie de Iesus, & n'y auoir trouué chose aucune contraire à la foy Catholique, Apostolique, & Romaine, ny aux bonnes mœurs; ains auons iugé deuoir estre imprimé, pour contenir vne Histoire digne d'estre sçeuë à la plus grande gloire de Dieu, & à l'edification des ames. En foy de quoy nous nous sommes soubzsignés à Bourdeaus ce 8. Sept. 1609.

DANIEL MARTIN.

GABRIEL DE LA PORTE.

IOACHIM LE VENIER Prestre, Chanoine, & Maistr^e Eschole en l'Eglise Metropolitaine de Bourdeaus, & Vicair^e General de Monseigneur l'Illustrissime & Reuerendissime Cardinal de Sourdis, Archeuesque de Bourdeaus, & Primat d'Aquitaine: Veul l'attestation des Docteurs sus nommés, auons permis & permettos d'imprimer le present liure intitulé, *Seconde partie de l'histoire des choses plus memorables aduenües tant es Indes Orientales. que autres païs de la descouuerte des Portugais, en l'establissement & progres de la foy Chrestienne, & Catholique, &c.* Composé par le R. P. Pierre Du Iarric de la Compagnie de Iesus. Fait à Bourdeaus le 9. Sept. 1609.

LE VENIER Vicair^e general.

EXTRAICT DV PRIVILEGE DV ROY.

Par grace & privilege du Roy, il est permis à Simon Millanges Imprimeur ordinaire du Roy à Bourdeaux, d'imprimer ou faire imprimer vn livre intitulé *Histoire des choses plus remarquables, aduenues tant es Indes Orientales, que autres pays de la destouuerte des Portugais, &c.* & ce iusques au temps & terme de six ans, à compter du iour de la premiere impression, & sont faictes deffences à tous autres Imprimeurs, Libraires, & autres subiects de sa Majesté, de les imprimer ou faire imprimer durant ledit temps, sur peine de deux mille liures d'amande, voulant ledit Seigneur, que ledit privilege soit suffisamment signifié à toutes personnes, pourueu qu'il en soit imprimé vn extraict sommaire à la fin, ou au commencement des exemplaires, qui s'imprimeront, ainsi qu'il est plus amplement contenu ez lettres de sa Majesté, données à Paris le 27. iour de Septembre 1607.

Signé

DE LA FON.

Permission du R. P. Prouincial de la Compagnie de IESVS en Guienne.

Claude Champ-bon, Prouincial de la Compagnie de IESVS, en la Prouince de Guyenne, suyuant le privilege octroyé à ladicte Compagnie par les Roys très-Chrétiens HENRY III. le 10. May 1583. & HENRY IIII. à present regnant, le 10. Decembre 1606. par lequel il est deffendu à tous Imprimeurs & Libraires, d'imprimer ou faire imprimer, vendre ou debiter aucuns Liures composez par ceux de ladicte Compagnie, sans permission & consentement des Superieurs d'icelle; donne permission à Simon Millanges, Imprimeur ordinaire du Roy, d'imprimer ou faire imprimer vn livre intitulé, *Seconde partie de l'Histoire des choses plus memorables, &c.* composé par le Pere PIERRE DV IARRIC de la mesme Compagnie, & ce pour l'espace de six ans, commençant dès le iour qu'il sera acheué d'imprimer: & iceluy pouuoir vendre & debiter librement. Fait à Lymoges, ce 22. iuin 1609.

C. CHAMP-BON.



LIVRE TROISIÈME
DE L'HISTOIRE

DES CHOSES PLUS MEMORABLES,
aduenües tant és Indes Orientales, que autres
païs de la descouuerte des Portugais ;
en l'establissement, & progrez
de la foy Chrestienne
& Catholique:

*Et principalement de ce que les Religieux de la Compagnie
de IESVS y ont fait, & enduré
pour la mesme fin.*

AVANT-PROPOS.



Es œuvres de Dieu sont parfaites,
(disoit ce grand Legislateur Moÿse *Denter.*
estant sur les dernières marches de sa ^{32.}
vie.) Les hommes sont le plus souuent
si inconstans, mesmes au bien, que
s'ils rencontrent des grandes difficul-
tez à poursuiure leurs hautes entre-
prises, ils se lassent, & quittent avec
lascheté, ce qu'ils ont commencé

d'un grand courage : mais Dieu, qui est de sa nature immuable,
continue tousiours à bien faire, & mettre en execution ce qu'il
a vne fois arresté en son diuin entendement : de maniere que dis-
posant toutes choses avec douceur & suauité, il arriue, par son

Matth.
28.

infinie puissance & sagesse, à la fin, qu'il s'estoit proposée. Nous voyons cecy non seulement en la creation de cet vniuers, lequel il a rendu parfait, & accomply de tout poinct en six jours, mais aussi en l'œuvre de nostre rachapt, qu'il n'a point delaisé jusqu'à tant que tout a esté consommé. Le mesme pouuons nous remarquer en la conduite, & gouuernement de son Eglise. Car il ne l'a jamais abandonnée depuis qu'il l'a establie & fondée par le sang precieux de son cher fils *IESVS-CHRIST* nostre Sauueur, suiuant la promesse qu'il luy en a faicte, l'asseurât de son assistance continuelle jusques à la fin du monde. Or ayant (cōme il semble) en ces derniers siecles deliberé d'esclairer le reste des nations de la terre auant le jour du grand jugement, de la lumiere de sa foy, pour donner à cognoistre à tout le monde les richesses de sa bonté immense, il ne s'est pas contenté de faire retentir la trompette de son saint Euangile ez Indes Orientales, où principalement les Portugais pretendoient arriuer, pour l'affluence des richesses que l'on trouue en ce pais là, mais à l'occasion de ceste recherche il l'a voulu encore installer en plusieurs autres endroits tant de l'Asie que de l'Afrique, & outre ce au nouveau monde, qu'on appelle l'Amerique, continuant tousiours à faire descourir aux Chrestiens des nouuelles terres; à fin de les arrouser de sa celeste doctrine, & leur faire porter les fruiçts des vertus & bonnes œuvres, qui sont ceux que sa diuine Majesté requiert des hommes, pour leur en donner vn loyer eternal.

Ayant donc entrepris, moyennant sa sainte grace, de coucher par escrit, ce qui est aduenü de plus remarquable en l'establissement & progrez de la Religion Catholique és contrées du Levant; puis que ce qui appartenoit à l'Inde tant de çà que de là le Ganges a esté mis à chef, il reste maintenant quelques autres regions, esquelles à l'occasion des voyages que les Portugais ont faict, soit pour descouvrir les Indes, soit pour y establir & accroistre leur puissance, la foy Chrestienne a esté plantée. Et pour ce nous traiçterons en ce troisieme Liure de ce qui est aduenü és Royaumes de Congo, d'Angola, de Monomotapa, du Preste-Ian, & de quelques autres d'Afrique: y adioustant encor la region du Bresil; & pour le quatriesme, nous lairrons ce qui appartient aux Royaumes d'Ormuz, du grand Mogor, & de la Chine, qui sont en l'Asie. Commençans donc par le Royaume de Congo, qui fut descouuert le premier, & receut auant tous les autres

la foy de IESVS-CHRIST par le moyen des Portugais, nous dirons au prealable quelque chose des qualitez du pais, & habitans d'iceluy.

DU ROYAVME DE CONGO,
de ses limites, des raretés qu'il y a, & des
mœurs des habitans.

CHAPITRE I.



Le pais, que les Portugais, & les originaires mesmes, ap- ^{Royaume de Congo, & sa situation} pellent Congo, est en l'Afrique par de là la ligne Equinoctiale, vers le Sud, cōmençant du costé d'Occidēt (où il est arrousé de la mer Oceane) au cap qu'on nōme S. Catherine, qui est à vn degré & demy de latitude Australe, & finissant au treziesme, si l'on y cōprend aussi le Royaume d'Angola, qui estoit jadis de ses appartenāces. Sur ceste coste de mer il y a beaucoup de ports, & riuieres, qui se deschargent dans l'Ocean. Car apres le cap S. Catherine suit le port d'Aluaro Gonzales, ainsi appellé du nom de son premier inuenteur. Là mesme il y a vne petite riuiere, que les Portugais nomment de *las borreras roxas*, c'est à dire, des sables rouges: à cause que l'eau passant par ceste arene rouge, semble estre de mesme couleur. Suiuent apres des montagnes de grande estenduë, dont les Portugais les appellent *serra comprida*, qui signifie montaigne longue. Apres on rencontre vn fleuue, qui faict en entrant dans la mer vn petit sein appellé *das almadias*, c'est à dire, des nacelles: par ce qu'on en faict beaucoup en ce port là. Puis tirant vers le Sud, on trouue l'emboucheure du grand fleuue Zaïre, qui prend son origine du mesme lac, que le Nil; & entre dans la mer avec telle roideur, que les navigateurs puissent de son eau douce quelque fois vingt lieues loing de sa bouche. Mais on ne peut nauiger ceste riuiere que six ou sept lieues en montant vers sa source, par ce que au delà l'eau tombe de certains hauts rochers, & ce avec telle violence & impetuositè, qu'elle emporte non seulement force sable, mais encore des grosses pierres, d'où sont sorties (comme lon pense) plusieurs Isles qu'il y a au milieu de ceste riuiere: lesquelles sont bien peuplées d'habitans, à cause que le terroir y est tres-fertile. En chascune d'icelles il y a des Seigneurs particuliers, qui les gouvernent, tous subiects du Roy de Congo, mais fort differents

entre eux. Car ils se font d'ordinaire la guerre : tellement qu'on voit icy plusieurs batailles nauales, esquelles ils se seruent de barques faictes d'un seul tronç d'arbre caué, nommé *Licondo* : qui vient si gros, qu'à peine le peuuent embrasser six hommes les bras estendus : & ces barques sont quelquefois si grandes, qu'elles tiendront deux cens hommes avec leurs armes & auirons dedans. La plus grande de ces Isles, qui toute-fois est assés petite, est appellée l'Isle des cheuaux, à cause qu'on y voit quantité de ces cheuaux marins, que les Grecs ont appellé Hippopotames, c'est à dire, cheuaux de riuere : lesquels sont icy si farouches & si puissans, qu'ils enfoncent les barques à coups de pied, ou les prenant à belles dents : mais quand ils sautent à terre, ils sont bien plus de degast & carnage d'hômes, & d'animaux par tout, où ils passent. Or en ceste riuere il y a plusieurs de ces cheuaux là, & encore des Crocodiles d'estrange grandeur, que les habitans appellent Caymans. On y trouue pareillement vn autre animal, qui a comme deux mains d'homme, & vne queue faicte à guise de bouclier, nommé *Ambizé angulo*, c'est à dire, porc d'eau : par ce qu'il est si gras qu'un porc engraisé. Les habitans sont endurcir sa chair à la fumée, comme nous celle du porceau : & la gardent pour se festoyer par ensemble, car ils l'estiment fort delicate. Iamais il ne laisse l'eau douce, & se nourrist d'herbes, qu'il trouue sur le riuage. Il a la face semblable à vn bœuf, & s'en trouuent par fois de telle grandeur, qu'ils poisent plus de cinq quintaux. On les prend de ceste sorte. Les pescheurs s'estans pris garde du lieu, auquel il a accoustumé d'aller paistre, le vont attendre au pas avec leurs barques, & lors qu'il veut s'entrer dans l'eau, ils l'attaquent, & luy donnent tant de coups d'auiron ou de barre, qu'ils l'assomment. Mais il faut qu'ils l'apportent au Palais du Roy ; autrement il y va de la vie, si on sçait, qu'ils ayent celé la prise de tels poissons, ou bien d'autres qu'on appelle Royaux, à cause qu'ils sont reserues au Roy. Or apres qu'on a passé le Zaïre, continuant la mesme route sur la coste de la mer, on trouue le cap du Patron : & vn peu apres le fleuve Lelunda, qui vâ battre tout contre le pied de la montaigne, où la ville Royale de Congo est située. De là on vient au fleuve Ambrizze, qui est fort grand, & a vn port tres-commode. S'ensuit apres la riuere d'Onzo, puis celle de Lemba, d'où l'on vient au fleuve Danda, lequel auât qu'entrer dans la mer, se diuise en deux bran-

Licondo
arbre &
sa gros-
seur.

Isle des
cheuaux.
Hippo-
potames
cheuaux
de ruiere.

Caymā
Crocodi-
les.
Ambi-
zé angu-
lo porc
d'eau.

Lelunda
fleuve.

ches ; la plus Septentrionale s'appelle Danda ; & la plus Australe Bengo : & ceste cy avec vne autre riuere nommée Coanza, fait l'Isle, que les habitans appellent *Loanda*, c'est à dire, terre *Loanda* *Isle*. plane: car elle est sans montaignes, & à de long cinq lieues des nostres, ou vingt milles d'Italie, donant quatre milles à chascunne, selon la supputation, que nous suiuous. Mais elle est fort estroicte, n'ayant pas en quelques lieux le jet d'un arc de large. Que si lon fouist quatre ou cinq pieds dans terre, on y trouue de l'eau tres-bonne à boire, quand il y a pleine mer : mais au descendant elle est salée & amere. En ceste Isle se fait la principale pesche des coquilles, qui seruent par tout le Royaume de Congo, au lieu de monnoye: & se trouuent icy fort aisement. Car on ne fait que se mettre dans l'eau jusques au genouil, ou un peu dauantage, & lors on en remplist des paniers, qu'on porte tout expres: puis sortant de l'eau on les nettoye, & separe du grauois. Elles sont fort petites, & en y a de diuerses especes, bien qu'on ne les distingue qu'en deux: les vnes sont appellées masses, & les autres femelles: & celles cy sont estimées dauantage, pour estre plus luisantes, & plus agreables à veoir. Or jasoit qu'en plusieurs endroits de Congo on trouue de ces coquilles: neantmoins celles qu'on pesche à Loanda sont estimées dauantage, d'autant qu'elles ont un plus beau lustre, & sont de couleur de cendre, qui est la plus prisee en ce fait. Avec ces coquilles on achepre toutes choses, & meisme l'or & l'argent; bref, tout ce qui appartient à la nourriture & aux commoditez de la vie humaine. Le Roy tient en l'Isle de Loanda un Gouverneur, lequel a soing de ceste pesche, & de faire apporter ces coquilles dans ses thresors: de façon que ce sont comme ses minieres. D'où il appert, que le monde se gouerne plutost par opinion, que par raison, meisme en l'estime des choses; veu que les metaux, principalement l'or & l'argent, ne sont pas si prisés par tout, qu'en l'Europe: là où l'on propose bien souuent à iceux non seulement l'honneur, mais aussi le salut de l'ame. Lon trouue encor en ceste Isle un arbre, appelé Enfanda, qui est tousiours verdoyant: & croist fort haut, jettant en bas comme des cheueux, qui pendent de ses rameaux, lesquels prennent racine, si tost qu'ils touchent à terre, & viennent aussi grâds que leur mere: tellemēt que tout un grand païs se peuplera d'un seul arbre, si on le laisse croistre. Sous la premiere escorce il y a comme vne espece de linge, lequel estant battu & nettoyé,

Coquilles de mer sont la monnoye de Congo.

Le monde se gouerne plutost par opinion, que par raison.

Enfanda arbre.

*Baleines
qui se
battent.*

*L'ambre
gris ne
vient de
la semē-
ce des
Balei-
nes.*

*Coanza
riviēre.*

*Angola
Royaume.*

*Sein des
vaches.*

*Bornes
du Royau-
me de
Congo.*

sert au menu peuple pour faire des acoustremēs. Aupres de ceste Isle du costé de la mer on void d'ordinaire force Baleines, qui bien souuent s'entrechoquent & s'entrebattent, avec vn bruit espouuentable, & l'on en trouue par fois sur le bord de la mer plusieurs de mortes, à raison de ces cruels combats, qu'elles se donnent. Les originaires les retirent, & font de la graisse vn certain huile, qui leur sert pour brayer les vaisseaux au lieu de poix. Or jaçoit qu'il y ait icy presque tousiours force Baleines, si n'y trouue l'on point d'ambre-gris, ny blanc, ny noir; d'où quelques vns tirent que ce n'est pas la semence de la Baleine, comme d'autres pensent: puis qu'en ce lieu, où ce poisson est si frequent, l'on ne sçait que c'est. Le principal port de l'Isle est au Septentrion, où il y a vn beau bourg, appellé le bourg de S. Paul: auquel lieu habitent plusieurs Portugais avec leurs familles. De l'autre costé de l'Isle vers le Sud, est la riviēre Coanza, laquelle vient d'un petit lac, qui prend aussi sa source de celuy, duquel sort le Nil. Certuy cy est nommé des naturels Zēbe, ou Zaire: & quelques vns pensent, que les anciens l'appelloient le lac des Tritons, à cause qu'ils croyoient y auoir force Tritons, ou hommes-poissons. Iusques icy arriuent les bornes du Royaume de Congo, selon qu'il est à present: mais jadis il comprenoit aussi le país, qu'on appelle maintenant Angóla. Et d'autant qu'il nous faut encore parler de ce Royaume, nous poursuiurons la description de ceste coste de mer, jusques aux limites d'iceluy. Apres donc qu'on a passé le fleuue Coanza (où commence le Royaume d'Angola) on rencontre le cap Ledo, & puis quelques autres riviēres, dont la premiere s'appelle Sunga, ou Senga: la secōde Benglebi, là où à present commande vn vassal du Roy d'Angola. Finalement, on vient à vn petit port, mais fort assésuré, qu'on nōme le sein des vaches, à cause du grand nombré de vaches, qui y paissent autour. Et voilà les bornes anciēnes du Royaume de Congo du costé d'Occident. Pour celles du Midy, il faut tirer vne ligne depuis le port des vaches, jusques aux montaignes d'argent; ainsi appellées des Portugais, à cause des mines d'argent qu'on y trouue, laissant du costé de Midy le Royaume de Mataman. Ceste ligne contiendra pres de cent treze lieuës des nostres. Du costé d'Orient il est borné par vne ligne, qu'on se peut imaginer, depuis les montaignes d'argent, jusques au lieu où le fleuue Zaire, & vn autre appellé Vniba s'assemblent, passant par les montaignes, que les Portu-

gais nomment de Salpêtre, pour y en auoir quantité; & par d'autres, qu'ils appellent du Soleil, à cause que pour leur excessiue hauteur, elles semblent toucher le Soleil: & ensemble par d'autres, qu'ils nomment de Christal, à raison qu'il y en a force veines, aboutissant en fin à l'assemblage de ces deux riuieres. Ceste ligne aura de longueur quelques cent cinquante lieues. Finalement, du costé de Septentrion il s'estend depuis l'assemblage de ces mesmes riuieres, jusques au cap S. Catherine, où il y aura pareillement pres de cent cinquante lieues. De ce costé les Congians confrontent avec certains peuples, que jadis on appelloit Bramas; mais à present ils se disent Loangas, & vsent de la Circocision, à la mode des Iuifs, comme aussi presque tous les autres peuples d'alentour. Vn peu plus auant vers l'Orient, on trouue la nation des Anziques, ou Anzicains, gens fort cruels; car ils se mangent les vns les autres: & en leurs boucheries on expose en vente la chair humaine, de mesme qu'icy celle du bœuf, ou du mouton. Ils tuent pour cet effect, non seulement leurs ennemis pris en guerre, mais encore leurs esclaves, quand ils ne les peuuent vendre tous vifs à si haut prix, que vaudroit leur chair au marché. Voire il en y a, qui s'exposent de gayeté de cœur à ceste cruelle boucherie; & se font tuer eux mesmes, ou pour acquerir de l'honneur (car ils estiment que c'est vn signe de grand courage, que de mespriser la vie) ou bien pour tesmoigner l'affection, qu'ils portent à leurs Seigneurs & Maistres, les voulant repaistre de leur propre chair, ou autrement ennuyez de viure. Nous auons parlé de ces gens, par ce qu'ils font bien souuent la guerre aux Congians, comme nous dirons cy apres. Or ce que possede maintenant le Roy de Congo, est diuisé en six Prouinces, dont la plus grande, & la plus riche de toutes s'appelle Bemba, qui aboutit à l'orée de la mer, & comprend depuis le fleue Ambrizze, jusques à celuy de Coanza. Elle est diuisée en plusieurs Seigneuries: & ceux qui les gouuernent s'appellent *Mani*, qui veut dire Seigneur en leur langue: tellement que *Manibamba*, signifie Seigneur de Bamba; *Manicoanza*, Seigneur de Coanza; & ainsi du reste. D'où l'on entendra, que ceux, qui appellent ce Royaume *Manicongo*, se trompent: car le nom propre est *Congo*, & *Manicongo* veut dire Seigneur de Congo, qui est le tiltre appartenant au Roy seul. La capitale ville de ceste Prouince, s'appelle Panfa. Elle est située en vne belle plaine,

Antzicains peuples, & leur barbare.

Royaume de Cōgo diuisé en six Prouinces. Bemba Prouince. Mani signifie Seigneur.

*Richesse
de ceste
Prouin-
ce.*

entré les fleuves Onzo & Ambrizze, loing de la mer quelques vingt-cinq lieues. Et vn peu apres tirant vers l'Orient, commencent les montaignes d'argent, qui s'estendent jusques au pais d'Angola. Ceste Prouince est la plus riche de toutes, tant à raison des coquilles, qui seruent de monnoye, & s'amassent à l'Isle de Loanda, qui appartient à icelle : que pour cause du trafic, qui se fait avec le Portugais en tous les haures d'icelle. Car en vn seul marché ils vendent quelque fois plus de cinq mille esclaves. La ville capitale est comme le rempart de tout le Royaume de Congo, à cause que les habitans de ce pais là sont les plus vail-lans soldats, & les mieux exercez à la guerre, que tous les autres.

*Les hom-
mes sont
puissans.*

Ils sont si forts, & si puissans, qu'il en y a, qui trancheront vn homme par le milieu d'un coup d'espée : & bien souuent ils aualent la teste à vn taureau mediocre d'un seul coup. Pour armes defensiuës, ils vsent d'une targe longue & estroicte, qui leur couure quasi tout le corps. Le Roy peut tirer d'icy au besoing plus de quarante mille soldats armez à leur mode ; à sçauoir, d'espée, d'arc, & de bouclier. Les plus communs animaux qu'on

*Elephäs
à centai-
nes.*

trouue en ce pais, sont premierement les Elephans, qui y sont d'une enorme grandeur, & en telle quantité, qu'on les void aller par les champs à centaines. Aussi depuis que les Portugais ont commencé de trafiquer en ce pais là, l'Yuoire, qui n'est autre chose que les dents de ceste beste, n'est pas en Europe de si grand prix, que jadis, à cause de la quantité, qu'on y en porte de là.

*Tygres
farou-
ches.*

Lon y trouue pareillement force Tigres, qui sont merueilleuse-ment farouches, mesmes contre les Negres, lesquels ils deschi- rent incontinent, qu'ils en peuuent attrapper quelqu'un : mais on dict, qu'ils ne font point de mal aux hommes blancs. Il y a

*Zebre a-
nimal,
et sa fi-
gure.*

encore vn animal, que les habitans appellent Zebre, fort sembla- ble, quant à la figure, à nos Mules, combien qu'il n'est pas steri- le, comme celles-cy ; mais engendre quasi tous les ans son sem- blable, de mesme que nos cheuaux : au lieu desquels les habi- tans s'en pourroient bien seruir, s'ils auoient l'industrie de les ap- priuoiriser & dompter. Faute de quoy, ils se seruent des hom- mes, pour faire porter les fardeaux, & eux mesmes, comme nous nous seruons icy des montures. Ils sont d'une si merueilleuse vi- stesse, que les Portugais, qui demeurent là, voulans signifier vn homme prompt & agile, disent qu'il va plus viste, que le Zebre ; comme nous difons, Plus viste qu'un Cerf. Il est de couleur dif-
ferente

ferent de tout autre animal: car il a des lignes blanches, noires, & rouges, larges de trois doigts, qui l'environnent en forme de demy cercle, depuis l'espine du dos, iusques au ventre, & par tout le reste du corps. Ils ont aussi des animaux, qui ressemblent du tout à noz bœufs, horsmis qu'ils ne sont pas si grands, & ont les cornes semblables à celles des cheures, & quelques vns de mesme que celles des cerfs, excepté qu'il n'y a point de nœuds. Les brebis & les cheures, qu'ils ont, ressemblent aux nostres: mais elles sont si secondes de leur ventre, que iamais elles ne portent vn seul petit, ains deux, trois ou quatre d'vne ventrée. On trouue encore en ce pais des Zibettes, que les habitans, mesme deuant la Zibette
 venue des Portugais, nourrissoient & appruiuoisoient, pour en tirer ceste graisse appellée aussi ciuette, l'odeur de laquelle est tant estimée, pour estre si agreable. L'on void icy des serpens d'vne
 grandeur inroyable: car si on doit adiouster foy à ce, qu'en ont
 escrit des auteurs, par le rapport de ceux, qui ont esté sur le lieu,
 il en y a, qui ont vingt cinq espas de long, & cinq de large. Ils sont
 leur demeure partie en l'eau, & partie sur terre: & pour attrapper
 leur proye, montent quelquefois sur des arbres, d'où ils s'essan-
 cent avec grande vistesse, sur quelque beste, qui paistra là aupres:
 & l'ayant tuée, l'emportent dans vne forest, pour la deuorer. Or
 quand ils ont beaucoup mangé, ils viennent si stupides, qu'un pe-
 tit enfant les peut tuer: & ceste stupidité leur dure quelques cinq
 ou six iours. Quand les originaires en peuuent auoir quelqu'un,
 ils le mangent fort volontiers, & trouuent leur chair aussi bonne,
 que nous celle des poules. Ils ont vn autre espeece de Serpent si
 venimeux, que s'il a mordu quelqu'un, dās 24. heures il est trou-
 sé, s'ils n'y appliquent à temps certain remede & antidote qu'ils
 ont. Mais la diuine prouidence a voulu, qu'il se fait entendre de
 loing: afin qu'on s'en gardast: car il a sur le bout de la queue vne
 petite bouteille ronde, qui mene bruit, quand il se remue: & ceste
 bouteille, à ce que l'on dit, est fort souueraine pour guerir les
 douleurs du cœur, & les sieures, comme aussi la teste du mesme
 Serpent. Quant aux oyseaux, ils ont force Austruches, des plu-
 mes desquelles ioinctes avec celles de Paon (dont ils sont vn grā
 cas) les naturels se seruent, pour faire leurs pennaches. Ils ont en-
 core force phaisans, poules d'inde, pigeons, tourterelles, & au-
 tres espees de volaille, rares pour leur beauté, & de bon goust.
 Les Portugais appellent Pellicans certains oyseaux blancs, qui

Oiselets
d'un
doux
chant.

nagent sous l'eau, & mangent les poissons : leurs peaux seruent pour les maladies froides de l'estomach. L'on y void encore force Papegais de diuerses couleurs, & vne infinité de petits oiselets, vn peu plus grands que les Canarins, qui chantent merueilleusement bien : & pour ce les gens de moyens en nourrissent dans des cages, pour iouir de la douceur de leur chant. Mais cest assés arresté en ceste Prouince : parcourons maintenant les autres, puis que ce qui a esté dit de ceste cy, se doit aussi entendre quasi de tout le reste.

Sogno
Prouin-
ce.

La seconde donc s'appelle Sogno, qui s'estend depuis le fleuve Ambrizze, iusques à celuy de *las borreras roxas*, & confronte avec le Royaume de Loanga vers le Nort, & avec les Anzicains vers l'Orient. Au mitan de la Prouince il y a vne ville appelée aussi Sogno, là où demeure d'ordinaire le Lieutenant du Roy, qui est communément de la maison royalle, & a sous soy plusieurs autres Gouverneurs moindres. Il y a icy grande quantité d'Elephans, & pource l'yuoire y est à si bon marché, que souuent les naturels bailleront vne dent d'Elephant pour vn clou de fer : car ils n'ont point de fer en ce pais, ou ne sçauent pas le tirer des mines, ny le preparer, comme il faut, pour seruir à faire des couteaux, des espées, & autres vtenfilles de maison.

Sundo
Prouin-
ce.

La troisieme Prouince s'appelle Sundo, qui commence à dix lieues loing de la cité Royale de Congo vers le Nort, & s'estend iusques au fleuve Zaïre pardelà ses cataractes, comprenant les deux riuages du fleuve, iusques aux Anzicains, vers le Septentrion : & vers l'Orient il va iusques à l'assemblage des riuieres Brancaris & Zaïre, & de là aux montaignes de Christal. La ville eapitalle de ceste Prouince est aupres des cataractes, d'où le Zaïre descend, & s'appelle aussi Sundo. C'est la principale de tout le Royaume, & comme le patrimoine du Roy, de laquelle son aîné, ou celuy qui est destiné pour succeder à la Couronne, est Gouverneur ordinairement, ayant sous soy plusieurs autres particuliers Gouverneurs. Il y a en ce pais grande abondance de Christal, & d'autres mineraux, combien que les habitans n'en font pas tant de cas, comme du fer, veu qu'ils n'en peuuent pas faire d'armes ny d'aches, ou autres choses profitables à leur vſage, ainsi que du fer.

Pango
Prouin-
ce.

La quatrieme est appelée Pango, confrontant avec le territoire de la ville Royale de Congo vers l'Occident, & vers le

Nort ell' a les mesmes bornes que celle de Sundo. Du costé d'Orient elle va iusques aux montaignes du Soleil ; & du Midy elle confronte avec la Prouince de Batta, dont nous parlerons maintenant. La ville capitale jadis s'appelloit Pangelungos, & maintenant Pango, de mesme que la Prouince. Elle est coupée par le milieu de la riuere Barbela, qui prend sa source du mesme Lac, que le Nil, & d'une autre appelée Aquelonda, qui se pert dans le Zaïre.

La cinquiesme est Batta, qui confronté du costé du Nort avec celle de Pango, d'Orient avec les montaignes du Soleil & du Salpetre : du Midy avec d'autres montaignes, que les Portugais appellent *Queymados*, c'est à dire Brulées ; Et c'est, comme disent quelques vns, le país que Ptolomée & les autres anciens Geographes appelloient Agezymba, qui estoit le dernier, à leur aduis, de la terre habitable vers le Midy, à raison des chaleurs, qu'ils estimoient empescher l'habitatiō des hommes pardelà ces peuples. La ville capitale de ceste Prouince s'appelle aussi Batta, l'a où demeure d'ordinaire le Gouverneur, auquel il est permis entre tous les autres, d'auoir à sa soulde des arquebuziers du país ; Ce qui n'est pas octroyé mesme au fils du Roy. Car s'il en a besoin, le Roy luy en baille d'estrangers, & communément de Portugais. La raison, pour laquelle cestuy-cy a ce priuilege, est, par ce qu'il y a certains peuples du costé d'Orient, par delà les montaignes du Soleil & du Salpetre, que les Congians appellent Giachas, combien qu'ils se nomment Agag, lesquels ne viuent que de voleries, & larcins, molestant fort les habitans de ceste Prouince. Lesquels pour ceste cause doibuent estre tousiours en armes, pour se deffendre contre ces gens là, & ont besoin d'arquebuziers ; car ces barbares craignent sur tout les arquebuzades. L'on peut amasser en ceste seule Prouince, iusques à septante ou quatre vingts mille combattans.

La sixiesme & la dernière de toutes les Prouinces nommée Pemba, est située au milieu des autres, & comme au cœur du Royaume. Le Roy fait icy sa demeure ordinaire, en vne ville maintenant appelée Congo, & jadis Banza ; combien que les Portugais luy ont donné le nom de S. Sauueur. Elle est au septiesme degré, & vn quart de latitude Australe, sur vne haute montaigne de pierre fort dure, esloignée de la mer quelques 38. lieüs. La ville avec le país d'alentour, qui contient cinq lieüs

à la ronde, n'a autre Gouverneur que le Roy : mais pour tout le reste de la Prouince, il en y a vn autre, qui se tient en vne ville appelée Pemba, de mesme que la Prouince, située au pied des montaignes Queymados, ou Brulsées; pres de laquelle passe vn fleuve appelé Onzon ou Onzo, lequel sortant du Lac Aquelunda, apres auoir arrousé vne partie de la Prouince, se va finalement rendre dans la mer.

*Ville
Royale
de Con-
go, & sa
situatiō.*

Or la ville de Congo, ou le Roy tient sa Cour, est au sommet d'une montaigne, sur laquelle il y a vne belle plaine, qui contient deux lieues & demye de circuit, ou dix milles d'Italie. L'air y est fort sain & temperé, bien que ce soit sous la Zone torride. En ceste plaine il y a force maisons; combien qu'en deux quartiers seulement il y a enceinte de murailles, à sçauoir la où est le Palais du Roy, & à la ville ou demureront les Portugais. Chascun desquels contiendra vn quart de lieue de circuit, & cela encor a esté basti despuis que les Portugais ont commencé d'habiter en Congo: car auparauant ils ne bastissoient pas de ceste sorte, jàçoit qu'ils eussent force pierre & tres-propre pour cela: mais ils n'auoient pas l'industrie de la tailler, ny de s'en seruir pour leurs edifices, sinon despuis que les Portugais le leur ont appris. Entre le Palais Royal & la ville des Portugais, il y a vne grâde place, & au milieu d'icelle est l'Eglise Metropolitaine avec son Cemetiere. En tout le reste de ceste plaine, qui est au sommet de la montaigne, il y a force maisons, tant pour les Gentils-hommes & Courtisâns, que pour les autres habitans, qui pourront estre en tout enuiron dix mille. Il y a aussi des jardinages, des champs ensemencés, voire des preeries, & force arbres fructifiers. Les Roys de Congo ont choisi ce lieu, pour leur demeure, tant à cause qu'il est comme au cœur du Royaume, d'où ils peuuent plus aisément secourir tous les autres quartiers, s'il est de besoing, que pour estre vn lieu fort, & bien muni de la nature. Car pour monter au sommet de la montaigne, ou est la ville, il n'y a qu'une aduenuee assez difficile à gaigner, & fort aisée à deffendre. Au pied de la montaigne passe vne riuierre appelée Lelunda, & tout à l'entour il y a des valées tres-fertilles, & bien cultiuées, qui portent force fructs, & diuerses sortes de grains. Le principal est celuy que les habitans appellent Luco, fort semblable à la semence de chanure, sinon qu'il est vn peu plus gros. Ils en font du pain, qui est aussi blanc & aussi bon, que le nostre de froment. Ils ont encore

*Grains
de Con-
go.*

du millet blanc, qu'ils nomment bled de Congo. Le riz qu'ils appellent grain de Manputo, c'est à dire de Portugal (peut estre à cause qu'il y a esté apporté de là) n'y vient pas guere bien : mais il y a grande quantité & variété d'arbres fructiers, nommément des citrons, limons, & oranges, fort agreables au goust : car ils ne sont ny trop doux, ny trop aigres. Ils ont aussi plusieurs sortes de palmes : car ils comprennent sous ce nom tant celles, qui portent les dattes, (comme les nostres) que d'autres fort semblables à celles des Indes, dont a esté parlé au 2. liure. Ils tirent de celles cy, comme les Indiens des leurs, l'huyle, le vin, le vinaigre, le fruit, & le pain. L'huyle, qui ressemble au beurre, & quant à la solidité, & quant à la couleur, sinon qu'il est vn peu plus verd, se fait de la chair du fruit, & leur sert au lieu de beurre & d'huyle tout ensemble, tant aux viandes qu'aux lampes & vnguens. Mais pour tirer du vin de cest arbre, ils le percent au bout, & de ce trou distille vne liqueur, qu'ils recoiuent dās des bouteilles y attachées. Ceste liqueur est au commencement aussi douce & blanche que le lait ; mais quelques iours apres, elle se rend vn peu picquante, & lors elle leur sert de vin, duquel bien souuent ils s'enyurent : toutesfois peu de iours apres il deuient aigre ; de sorte qu'on s'en sert aux salades, de mesme qu'icy du vinaigre ; & pource ils le boient lors qu'il est nouveau, non seulement avec plaisir, mais aussi avec profit, moyennant qu'il n'y ait pas de l'exces, d'autant qu'il est souverain contre la grauelle & difficulté d'vriner, brisant mesmes les pierres dans les reins. Tellement qu'il n'y a nul en ce pais là, qui soit subiect à ceste maladie. Ils donnent aussi le nom de palme à vn autre arbre, le fruit duquel ils appellent Cola, qui est semblable à nos pignes, pourueu qu'elles soient des plus grandes, ayant la chair du dedans distinguée en quatre quartiers, mais de la façon d'vne chastaigne, & de couleur rouge. Ce fruit est bon pour faire venir l'appetit de manger ; car il purge l'estomach de mauuaises humeurs, & le fortifie. Il est aussi excellent, pour les maladies du foye ; & couste fort peu ; parce qu'il y en a grande foison. Ils ont finalement vne autre espece de palmes sauages, desquelles outre le fruit, qui est fort bon à manger, ils se seruent pour faire des nattes à couvrir les maisons, des corbeilles, & vne infinité d'autres choses propres à l'vsage humain. Car ils en font des couuertures de liêt, des draps, dont ils se vestent si proprement, & si artificieusement, que cest merueilles. Ils prennent à

Palmas de diuerse sorte.

Vin de palme bon contre la grauelle.

Cola fruit tres profitable.

Draps qu'on fait des feuilles de palme.

ceste fin les seules fueilles ; & à ce qu'ils en ayent plus grande quantité, & qu'elles soient plus tendres, pour en tirer le filet plus delié, ils les esmondent chascue année, ne les laissant pas croistre gueres haut. Ces fueilles estans préparées & nettoyyées comme il faut, ils les filent, comme on faiët icy le lin, & en tirent du filet, qui ressemble à nostre soye, duquel ils font diuerses sortes de draps : & mesmes d'aucuns, qui sont semblables à nostre velours, tant du droit que de l'enuers, ouragez de mille & mille fleurs, & diuerses figures : d'autres aussi, qui sont quasi de mesme que nostre damas ondoyé ; voire qui plus est, certaine espee d'estoffe, qui respond à nostre brocatel, duquel pour estre le plus precieux de tous, personne ne se peut vestir hormis le Roy, & ceux, ausquels specialement il le permet. Ils en font aussi d'autres de moindre prix & estoffe que ceux-cy, & d'aucuns fort grossiers pour le menu peuple. Brief vn chacun vse de ceux, qui sont conuenables à son estat & condition, ou selon les moyens qu'il a. Nous parlerons cy apres de la façon de leurs accoustremens. Quant aux Portugais, ils se seruent de ces nattes, principalement pour faire des tentes ou pauillons, & des voiles de nauire : car elles resistent merueilleusement à la pluye & aux vents. Et encore ils ont commencé de s'en vestir. Mais reuenant aux plantes, il y a en Congo vne autre espee d'arbres, appellés par les originaires Ogegha, qui porte vne sorte de fruit semblable à nos prunes, de couleur iaune, & de bon goust. Ils en bastissent leurs maisons de ceste sorte. Ayans couppé force branches de cest arbre, ils les plantent dans terre, si pres l'une de l'autre, qu'elles se touchent presque ; & comme ces branches prennent racine fort aisément, ces arbres croissent en peu de temps, & estans venus vn peu gros, se joignent si bien l'un avec l'autre, qu'ils font comme vne forte muraille ; & cela leur sert de parois, faisans mesmes les entredeux & separations avec ces arbres, qu'ils ont disposé à leur fantasie, & selon qu'ils ont designé leur maison. Apres cela ils mettent au trauers des bois legers, lesquels ils couurent premierement de fougare, & puis de belles nattes faiëtes de diuerses couleurs, qui seruent tout ensemble & d'ornement & d'abry. Voila comment ils font leurs maisons, & toutes à vn seul estage, & de bois. Ils ont bien force pierre, voire de marbre, de porphyre, & de jaspe, mais ils ne s'en seruent pas pour ne la sçauoir mettre en oeuvre, ainsi qu'a esté dit.

*Diuer-
sité de
draps
de mes-
me ma-
niere.*

*Ogegha
arbre
d'ou on
fait les
maisons.*

*Façon de
bastyir les
maisons
au Congo.*

Au demeurant ce païs, encore qu'il soit sous la Zone torride, n'est pas si chaud, que les anciens cuydoient. Il est bien vray, qu'il n'y faict pas plus grand froid, qu'est celuy, que nous experimen-<sup>Tépera-
ture du
païs.</sup> tons icy en Automne, de façon qu'on ne se sert iamais de feu pour se chauffer, ny de vestemens de peaux, ou autres, pour se garder du froid, y ayant fort peu de difference entre leur Hyuer & Esté, sinon qu'en Hyuer, à cause des pluyes continuelles, l'air y est vn peu plus froid : mais apres qu'elles sont passées, la chaleur, tant en Hyuer qu'en Esté, est presque insupportable deux heures avant Midy, & autant apres. Ils ont quasi vn perpetuel Equinoxe, c'est à dire autant d'heures de iour que de nuict, excepté d'vn quart d'heure ou enuiron. Leur Hyuer commence à nostre Prin-<sup>L'hyuer
& Esté
de ce
païs.</sup> temps, lors que le Soleil vient à parcourir les signes Septentrionaux, & dure depuis le mois d'Auril, iusques en Septembre. Or pendant ce temps là, ils n'ont quasi aucun iour, qui ne soit ou pluuieux, ou nuageux. Les pluyes sont si grandes, qu'encore que la terre soit fort seiche, n'ayant point pleu durant tout l'Esté, (qu'ils ont depuis Septembre iusques en Auril) neantmoins elle est bien tost abbreuée; & apres les riuieres croissent si fort, qu'elles se desbordent presque par tout. Et de là vient l'inondation du Nil, & de quelques autres riuieres de l'Affrique. Laquelle ne semble pas estrange aux Congians, parce qu'ils en voyent la cause, à sçauoir les pluyes continuelles qui tombent chasque année à vn temps certain. Mais aux autres nations, & principalement aux Egyptiens, qui ne sçauent que c'est de pluye, n'en ayant iamais en leur païs, cela semble fort admirable, qu'une si grande abondance d'eaux se respande sur leurs terres, despuis la fin de Iuin, iusqu'au 20. Septembre ou enuiron, à leur grand contentement & profit. Car sans cela, ils n'auroient moyen de viure, la terre n'estant point arrousee d'enhaut; mais ceste inondation la fertilize tellement, que c'est vn des meilleurs païs du monde. Or les anciens habitans d'Egypte, ne sçachans point d'où venoit ceste crue du Nil, & attribuans à vne creature sans raison le bien qu'ils receuoient de la diuine prouidence, estoient si fols que d'offrir sacrifice à ce fleuve, comme si c'eust esté vn Dieu, & pour mesme raison luy donnoient le nom d'*ἀγαθὸς δαίμων*, c'est à dire de bon genie, ainsi que dit Ptolomée : lequel bien que fort expérimenté Geographe, s'est neantmoins trompé en la source & origine de ceste riuere : pensant qu'elle sort de deux lacs qui sont

D'où
viēt l'in-
ondatiō
du Nil.

Ptol.
lib. 4.
Geogr.
6. 5.

*De la
source
du Nil.*

(à ce qu'il dit) tous deux au pied des montaignes qu'on appelle de la Lune enuiron le douzielme degré & demy de latitude Australe en mesme parallele, l'un esloigné de l'autre, quelques 112. lieues. Il y a des Portugais qui ont voyagé quelques années en ces pais là, & ont trouué qu'il y auoit bien deux lacs desquels le Nil prend sa source, mais qu'ils estoient autrement situez. Car l'un d'iceux est au 12. degré de latitude Australe, & l'autre est sous l'Equateur, quasi sous un mesme meridien que le premier. Il en y a encore qui disent, que le Nil ne sort que du second, par ce qu'ils ne pensent pas que les eaux du premier s'aillent rendre dans iceluy : mais croient qu'elles se perdent parmy des grandes sablonnières qu'il y a entre deux : toutesfois d'autres assurent le contraire, bien qu'il semble qu'elles se perdent à cause que passant par des vastes solitudes elles n'ont pas un liest certain. Telle donc est l'opinion des plus recens auteurs, touchant la source du Nil ; de laquelle il y a eu tant de variété d'opinions, parmy les anciens. Mais c'est prou de cela ; disons maintenant quelque chose des mœurs & coustumes des Congians. Quant à leur Religion ils estoient tous Idolâtres, auant l'arriuée des Portugais en ce pais là : tellement qu'ils adoroient plusieurs sortes de bestes monstrueuses & fort horribles à voir. Entre autres vne qu'on trouue audit pais d'une estrange façon. Elle est semblable en quelque maniere à un dragon ailé, ayant seulement deux pieds, & une longue queue. La teste aussi est longue, & la gueule garnie de plusieurs râgées de dents fort aiguës d'un costé & d'autre. Elle est de la grandeur d'une brebis, & n'a point de poil : mais une peau escaillée de couleur tirant sur le verd. Plusieurs grands Seigneurs de Congo, du temps qu'ils estoient Payens, nourrissoient quelqu'une de ces bestes avec grands fraiz & despens : car elle s'entretient de chair creüe : mais ils en retiroient aussi un grand profit : parce que le peuple faisoit beaucoup d'offrandes à cett'Idole, laquelle ils leur monstroyent par fois, afin qu'ils l'adorassent, & tout cela venoit à eux. Ils reueroient encore & adoroient comme Dieux des coleuures, & serpens vifs d'une grandeur & grosseur espouuentable : pareillement des boucs, des tygres, des hybous, & tels autres animaux effroyables à voir : estimans que tant plus ils estoient horribles, & hydeux ; tant plus grand honneur leur deuoit estre deféré. Mais non contents de ce, ils transféroient le culte deu à un seul Dieu, aux arbres, herbes,

*Voyez
Pigafetta
en la
description
de
Congo.
lib. 2.
c. 10.
Vne be-
ste d'e-
strange
façon a-
dorée
pour
Dieu.*

*Les Con-
gians a-
dorēt les
bestes ri-
ues les
plus ef-
froya-
bles à
voir.*

bes, & autres plantes sans cognoissance, voire mesme aux pierres, aux bois, & choses inanimées, y taillans diuerſes figures & caracteres; ou ils pensoient auoir quelque diuinité. Et qui plus est, les peaux des bestes mortes, remplies de foin ou de paille, estoient tenuës de ces pauvres aueugles & incensez en lieu de Dieux. Or les ceremonies dont ils vſoyent au culte de ces Idoles estoient diuerſes; neantmoins toutes se rapportoyent à faire quelque demonstration de recognoissance ou submission ausdites Idoles, ou pluſtoſt au Diable, qui estoit adoré en icelles. Les plus ordinaires estoient flechir les genoux deuant ces choses qu'ils adoroient, ou se ietter la face contre terre, se couvrir le visage de poussiere, & tels autres actes d'humiliation: brief ils leur offroyent tout le meilleur & le plus precieux qu'ils euſſent. Leurs Prestres ou Sacrificateurs persuadoient au simple peuple, que ces faux Dieux auoyent toute puissance, qu'ils entendoient leurs prieres, & leur departoyent tout le bien qu'ils receuoient. Tellement que si quelqu'un d'eux guerissoit de maladie, ayant inuoké quelque Idole, ils luy faisoient à croire, que c'estoit par son ayde & secours; & au contraire si la maladie se rengregeoit, ils disoient que l'Idole estoit courroucé, & partant qu'il le falloit appaiser avec des offrandes. C'est tout ce qu'on a peu ſçauoir de la Religion des Congians.

Les ceremonies dont on vſoit.

Leurs Sacrificateurs.

Quant à leur police, il en y a qui diſent, que le Roy est Seigneur propriétaire de tous les biens, que possèdent ses ſubjets; tellement qu'aucun particulier n'a rien de propre; & ne peut laisser ses biens à ses enfans, sans congé du Roy, lequel en peut disposer comme il luy plaist, ostant à ceux, qu'il veut, les Seigneuries & les possessions qu'ils auoient, & les donnant ou transferant à tel que bon luy ſemble, sans autre occasion; sinon par ce qu'il luy plaist ainsi. Toutesfois il ne fait pas cela pour l'ordinaire, sans qu'il y aye quelque ſubject. Il donne audience deux fois chasque ſemaine, à ceux qui luy demandent justice: combien qu'il ne parle pas, sinon aux grands Seigneurs, qui ſont ordinairement apres de luy; & par leur entremise il reſpond aux parties. Les procès ne durent pas beaucoup, parce que ils ne ſe ſeruent point d'eſcritures, n'ayant l'industrie d'eſcrire. Les cauſes criminelles ſont auſſi bien toſt vuidées; car il n'y a point tant d'appels: & rarement condamne-on vn mal-faïcteur à mourir: mais ou il est fait eſclaue, ou enuoyé en exil: parce qu'ils eſtiment eſtre plus

De la police des Congians.

Procès civils & criminels biē toſt vuidés.

*Juge des
Portu-
gais.*

*N'ont
point
d'escrit-
ture.*

*Instru-
mens de
Musique.*

*Plurali-
té de fê-
mes.*

*Commēt
ils gue-
rissent
leurs
malad-
ies.*

raisonnable de ramener les hommes à leur debuoir, & à la reco-
gnissance de leur faute par les miseres, qu'ils endurent en cest
estat, que de les oster du monde, sans qu'ils ayent repentance de
leur mesfait. Quand quelque Portugais a procès ou debat avec
vn Congian, il l'accuse deuant vn Iuge du pais: mais au contrai-
re, si vn originaite veut accuser ou demander quelque chose à vn
Portugais, il s'adresse à vn Iuge Portugais, que le Roy permet,
qu'ils ayent en son Royaume: le quel iuge les causes suyuant les
loix de Portugal. Ils n'ont aucune Histoire des choses passées,
pour faute d'écriture, & ne distinguent point les iours, ny les
nuicts par heures, ny les autres temps, sinon par lunaisons. Que
s'ils racontent quelque chose aduenü du temps passé, ils ne
sçauent dire, sinon que cela est arriué durant le regne d'un tel
Roy. Ils ont diuers instrumens de Musique, dont ils se seruēt pour
se resjouir en leurs festes; & mesmes vne certaine façon de Luc,
combien que fort different du nostre. Les fleustes y sont aussi en
vsage, & au son d'icelles ils dansent fort gentiment leur Moref-
que, principalement les Courtisans. Ils pouuoient estans Payens
tenir autant de femmes, qu'il leur plaisoit, ou qu'ils auoient le
moyen de nourrir: mais se faisans Chrestiens, on les leur fit quit-
ter toutes, horsmis vne, avec laquelle ils se mariēt legitiment.
En leurs maladies ils se seruent seulement de simples, dont la na-
ture leur a enseigné l'vsage. Ils ont entre autres l'escorce d'un
certain arbre, laquelle reduite en poudre, & prise par la bouche
avec du bouillon, purge si doucement, qu'on peut ce mesme
iour faire ses offices fort aisément, & sans aucun destourbier. Ils
guerissent les fieures (qui est la plus cōmune maladie de ce pais,
& sur tout en Hyuer, durant les grandes pluyes) avec du sandal
rouge, lequel reduit en poudre, ils meslent avec de l'huyle de
palme, en y mettant autant d'un que d'autre, dont ils font vn vn-
guent, & en frottent tout le corps du malade, depuis la teste ius-
ques aux pieds: & par ce moyen il reuiet souuentefois en san-
té. De mesme façon guerissent ils du mal qu'on appelle Neapo-
htain, qui est aussi là fort frequent. Pour oster la douleur de teste,
ils ouurent les veines du temple, & avec des petits cornets, qu'ils
appliquent sur l'ouuerture, ils succent le sang, iusques à ce que la
douleur est passée. De mesme en vsent ils es autres parties du
corps, qui leur font mal. Pour les blessures, ils ont certaines her-
bes, lesquelles, ou bien le suc d'icelles, ils appliquent dessus, &

dans fort peu de temps les guerissent. Il y a en ce pais là grande abondance de Casse fistulaire, dont les droguistes font prouision, pareillement du Tamarin, & encore force Cedres, lesquels croissent tellement en mont, & en rond, principalement sur le bord de la riuere de Lelunda, qu'on en pourroit bastir plusieurs nauires: mais les originaires ne s'en seruent pas d'ordinaire, que pour le feu. Leur habit est maintenant autre, que celuy qu'ils souloient porter jadis, auant que frequenter les Portugais: car le Roy & les plus grands Seigneurs alloient accoustrés de ceste sorte. Ils se couuroient depuis la ceinture en bas des plus fines pieces, qu'on faisoit des fueilles de palme, comme a esté dict: & sur la poitrine ils portoient des peaux delicates, ou de ieunes Tygres, ou de Ciuettes, ou d'autres animaux, qu'ils ont là fort douces. Et à ce qu'elles eussent plus de grace, ils faisoient venir la teste de ces animaux sur les espaules, puis se couuroient d'un manteau tissü de petits filers de palme, en façon de ret ou resueil fort large, qui leur alloit iusques au genouil: ayant tout à l'entour au lieu de franges, des floes de la mesme matiere, mais diuersifiés en couleur & tissure. Ils replioient d'ordinaire leur manteau sur l'espaule droicte, à fin d'auoir la main plus libre; & d'icelle pendoit la queue d'une Zebre, semblable à celle d'un cheual: toutesfois il en y a qui disent, que c'estoit l'ornement propre du Roy. Sur la teste ils portoient un bonnet jaune ou rouge, quarré au bout, mais si petit, qu'à peine en pouuoient ils couvrir le sommet de la teste. La plus part mesmes des Gentils-hommes alloient pieds nuds, mais le Roy & les grands Seigneurs portoient des brodequins, semblables à ceux, qu'on void es statues des anciens Romains. Les gens de basse condition se couuroient seulement depuis le nombril iusques à demy jambe, avec des nattes de palme; combien que de moindre prix & valeur, que celles des Courtisans. Les femmes portoient jadis trois cottes ou robes depuis la ceinture, l'une plus longue, que l'autre: celle de dessous leur alloit iusqu'aux talons, la seconde iusques au genouil, & la troisieme un peu plus haut. Chascune d'icelles estoit ioincte au corps avec sa propre ceinture, & au bas pendoient des floes à guise de franges. La poitrine estoit couuerte d'un voile, & les espaules d'un petit manteau court, le tout fait de fueilles de palme. A la teste elles portoient une coiffe ou un bonnet, comme celuy des hommes. Tel estoit l'accoustrement des femmes plus riches.

Casse fistulaire & Tamarin abondent en Cochin.

L'habit ancien du Roy & des grands Seigneurs.

Des gens de moindre qualité.

*L'habit
nouveau
du Roy
et au-
tres.*

Celles de medioere condition alloient bien vestues de la mesme façon, mais de moindre estoffe : les pauvres se couvroient seulement depuis la ceinture iusques à demie jambe, & de plus vil drap. C'estoit donc jadis l'habit & commune porture tant des hommes, que des femmes de Congo: mais à present le Roy & les plus grands Seigneurs vont vestus à la mode des Portugais, ayâs des manteaux de soye, ou de pourpre, & des meilleurs draps qu'il y aye en nostre Europe, à cause qu'on les y apporte d'icy. Ils portent aux pieds des souliers ou des pantoufles, tant de cuir que de velours, ou autre estoffe, & au costé ils ont des grands malchus, ou espées larges. Toutesfois les hommes de basse condition retiennent encore leur ancien habit, comme aussi les femmes: jaçoit que les plus riches vont aussi accoustrees à la mode des Portugaises, horsmis qu'elles ne sont pas couuertes d'un voile, quand elles sortent de la maison, comme celles cy, & portent encore de petits bonnets sur la teste, reluisans en or & en pierreries. Il en y a aussi qui ont au col des chaines d'or de fort grand prix. Voila comme les Chrestiens enseignent la vanité des accoustremens aux barbares, au lieu de leur enseigner la modestie Chrestienne. Le Roy pareillement tasche d'imiter la magnificence du Roy de Portugal, tant es habits qu'au service de sa table. Il prend son repas en public sur un eschaffaut couuert d'un tapis d'Inde, & a son throsne enrichy de pierres precieuses enchassées en or, avec son marchepied couuert de velours rouge cramoisi. Quand il mange il est seul assis à table, & cependant les Seigneurs de sa Cour sont debout tous descouverts. On le sert en vaisselle d'or & d'argent, & ses Escuyers tranchans goustent les viandes, deuant qu'il en prenne. Il a ses gardes composées de diuerfes nations. Les Anzicains sont continuellement à l'entour du Palais avec leurs armes, & l'accompagnent quand il sort dehors avec ses Courtisans. Les Portugais aussi, qu'il tient encore pour cest effect, l'accompagnent par tout ou il va : car il se fie fort d'eux, & les estime plus que tous les autres, depuis qu'il a eu leur cognoissance. Mais voyons maintenant comm' ils y sont entrés, & ce qu'ils ont fait audit país.

*Vanité
des ac-
coustre-
mens en-
seignée
par les
Chre-
stiens aux
Barba-
res.*

Comme les Portugais descouvrirent le Royaume de Congo, & gagnèrent à la foy Chrestienne le Roy, son fils aîné, & plusieurs autres grands Seigneurs.

CHAPITRE II.



L'AN 1484. le Roy de Portugal, qui estoit lors Jean 2. *Jean 2. Roy de Portugal.* du nom, ayant deliberé de faire descouvrir toute la coste d'Æthiopie, qui regarde l'Ocean Occidéal, pour voir si l'on pourroit trouver quelque passage, qui conduisist aux Indes Orientales, il bailla pour c'est effect vne flotte de navires, à vn vaillant & sage Capitaine, Chevalier de noble race, nommé Jacques Cane. Cestuy-cy ayant passé au dela du Cap de S. Ca- *Jacques Cane, Chevalier.* therine, va trouver l'emboucheure d'une grande & impetueuse rivièrè, qui avoit de large huit lieuës (c'estoit le fleuve Zaïre, duquel a esté parlé cy dessus) & considerant la qualité des eaux, il jugea probablement parlant, que le riuage d'iceluy devoit estre habitè d'un costé ou d'autre, au moyen dequoy il resolut d'en- *Descou- ure le* trer dedans. Et apres avoir faict quelque peu de chemin à la fa- *Zaïre.* veur de la marée, il va appercevoir plusieurs hommes & femmes quasi de mesme couleur & poil, que le reste des Æthiopiens, qu'il avoit veu au paravant, c'est à dire fort noirs, & le poil frisé, combien qu'ils n'auoyent pas les leures si grosses, que les autres: & quant au reste des lineamens du visage, ils n'estoient pas si laids, ny si difformes, que ceux de la Guinée haute, qui est le país au deça de celuy de Congo, depuis le 9. degré de latitude Septentrionale, iusques au 2. de l'Australe. Car ainsi appellent maintenant les Portugais ceste cōtrée pour la distinguer des Royaumes de Congo, & d'Angola, qu'ils nomment la Guinée d'embas, ou la Guinée basse. Ces barbares donc voyans des hommes blancs en leur país (chose qui leur sembloit fort estrange) furent grandement esmerueillez, combien qu'ils s'approchoyent des navires des Portugais sans aucune crainte, ny soupçon, voire estās inuitez d'eux, & allechez par quelques presens, qu'on leur faisoit, ils entroyent librement & sans aucune difficulté ou contrainte dans leurs navires. On eust dit, que c'estoyent des anciens amis ou parens des Portugais, si le langage eust esté semblable: mais il falloit traicter ensemble par signes. Car encore bien que Jacques Cane eust amené quant & soy quelques truchemens

qui ſçauoyent pluſieurs langages Africains, ſi eſt-ce qu'il n'y eut moyen d'entendre ceſtuy-cy: & partant il fallut deuiner ce qu'ils vouloyent dire, par les geſtes qu'ils faiſoyent, deſquels en fin ils colligerent qu'il y auoit vn grand & puiſſant Roy à quelques iournées de là, qui commandoit en toute ceſte contrée au long

*Cane
enuoye
quel-
ques vns
des ſiens
au Roy
de Con-
go.*

& au large. Cane entendant cela les prie de vouloir conduire quelques vns de ſes gens vers ce grand Prince: ce qu'il obtint aiſément d'eux, moyennant quelques dons & promeſſes qu'il leur fiſt. Partant furent deputez quatre Portugais reſolus & hardis: auſquels Cane bailla des preſents, pour porter au Roy, leur commandant de reuenir dâs le temps, qu'il leur preſcriuit ſur l'heure, avec charge de remarquer le païs, & les mœurs des habitans. Mais parce qu'ils tarderent à venir deux fois plus qu'il ne leur auoit dit, il leua l'anchre, & en amena quant & ſoy quatre originaires, qui eſtoyent, venus voir les nauires, choiſiſſant ceux qu'il iugeoit eſtre de meilleur eſprit & naturel; auſquels il promit & iura que dans la quinziefme Lune (ainſi comptent ils le temps) il les rameneroit (Dieu aydant) ſains & ſauues en leur païs. En chemin on ſe familiarifa tellement avec eux, qu'ils apprirent le langage Portugais, de ſorte qu'eſtans preſentez au Roy de Portugal, ils luy declarerent aſſez intelligiblement avec fidelité, & par ordre tout ce qu'eſtoit du Royaume de Congo (car ainſi trouua-on que s'appelloit ceſte region-là) & luy donnerent à entendre non ſeulement ſes richesses, mais auſſi la police & Religion qu'ils gardoyent. Ce qui pleuſt merueilleuſemēt au Roy, & aux Seigneurs Portugais, qui accouroyent de toutes parts pour voir & ouïr diſcourir ces eſtrangers de choſes ſi eſloignées de leur cognoiſſance. Le Roy apres auoir haut loué la prudence de Cane, commâda que ces nouueaux hoſtes fuſſent bien traittez, & que rien ne leur manquaſt. Or apres s'eſtre ſoigneuſement enquis d'iceux touchant pluſieurs choſes, qu'il deſiroit ſçauoir de leur païs, craignant que leur trop long ſejour en Portugal n'apportâſt du dommage à ceux qui eſtoyent demeurez en leur place, comme pour oſtages, il ordonne au Capitaine Cane de ſ'en retourner au pluſtoſt en Congo, & ramener ces Aethiopiens en leur païs, les careſſant par le chemin, au mieux qu'il luy ſeroit poſſible, afin d'en retirer les ſiens: & qu'apres auoir remarqué ce qui eſtoit au delà de ce ſieuue du coſté de l'Aethiopie, & reueu au meſme lieu, ou il auoit pris ces quatre, il allaſt luy meſme

*Le plai-
ſir que
le Roy
en re-
ſent.*

vers le Roy de Congo, pour (apres s'estre vn peu insinué en sa familiarité) l'induire, s'il estoit possible, à recognoistre le vray Dieu Createur & souuerain Seigneur de toutes choses, & d'embrasser sa foy & Religion, qui seule estoit iuste. Cane donc si tost que le temps propre pour la nauigation fust venu, monte sur mer, & fait voile avec ses Æthiopiens vers le Royaume de Congo, & apres auoir surmonté beaucoup de difficultés sur mer, il paruint finalement au mesme endroit du fleuue, d'ou il auoit tiré ces hommes, l'vn desquels il enuoya vers le Roy, pour le prier de permettre aux Portugais, qui estoient en son Royaume, de retourner vers leurs compagnons, luy promettant que sans delay il luy enuoyeroit ses trois subjects, qui restoyent és nauires. Il luy feit aussi dire, comm' il auoit charge de son Prince de luy aller parler, & qu'ayant executé quelque autre commission qu'il auoit, il retourneroit tout incontinent vers sa Majesté, pour luy faire entendre les mandemens de Iean Roy de Portugal. Ce messager eüst paruenü au Roy fut quant & quāt expedie de luy. Car soudain qu'il eut ouy ce que demādoit Cane, il luy enuoye vn de ses Capitaines, qui en ramena les quatre Portugais, & Cane luy rendit aussi les Æthiopiens avec les presens, que le Roy de Portugal leur auoit baillé, pour porter à leur Roy. Ces presens & le rapport que firēt ces gēs là de la magnificēce & vertu du Roy Iean, qu'ils exaltoient à merueilles, esmeust tellement le Roy, qu'il cōmença deslors à porter vne tres-grande affection à celuy de Portugal, quoy qu'incognu. Cepēdāt Cane à fin de ne perdre la saison propre, reprend sa route: & descouure deux eens lieux de pais par delà le Zaïre, puis s'en reuiet au mesme lieu, d'ou il alla incontinent trouuer le Roy de Congo, qui le receust fort honorablement, & avec beaucoup de courtoysie. Quelque temps apres Cane commence (selon qu'il luy auoit esté commandé) de mettre en auant quelques propos des choses diuines, exhortāt le Roy quand l'occasion s'en presentoit à mespriser le culte des Idoles, & recognoistre le seul vray Dieu, Createur du Ciel & de la tetre. Il se cogneust bien là, combien importe plus pour la conuersion des ames, vne vraye & parfaicte charité, qu'vn discours bien enfilé, ou vn curieux apparat d'vne suite de parolles triées, qui battent l'aureille, & ne touchent pas au cœur. Cane estoit vn homme de guerre, nourry & esleué parmy les armes, & peu ou point versé és lettres; ce neantmoins avec sa prudence, sa pieté &

Sont ramenez en Congo.

Le rapport qu'il firent au Roy de Congo du Roy Jean.

Combien importe pour la conuersion des ames d'y proceder avec grā de charité.

*Le Roy
de Cogo
desire se
rendre
Chrestien.*

*Enuoye
des Amba-
sadors au
Roy de
Portu-
gal avec
des pre-
sents.*

vertu, il profita plus à l'endroit du Roy, pour luy persuader la foy de IESVS-CHRIST, que n'eust, peut estre, faict vn docte & bien-disant Theologien. Le Roy donc esmeu en partie des bons offices, que Cane luy faisoit, partie aussi des propos, qu'il luy tenoit, auxquels il prenoit vn singulier plaisir; mais poussé principalement de cest esprit diuin, sans lequel l'homme ne peut ny penser ny faire rien de bon & salutaire pour son ame, il se sentit tellement espris du desir de cognoistre plus amplement les mysteres de nostre foy, qu'il apportoit tousiours son oreille alterée aux discours de Cane, & luy mesme s'enquestoit encore de son propre mouuement de plusieurs choses touchant nostre Religion. Si qu'en fin il conçeut vne grande opinion d'icelle, iointe avec vn desir ardent de la suyure, & si taschoit encore ouuertement d'attirer à la mesme volonté ses subjets, ses familiers & amis, mesme les plus grands de sa Cour. Lesquels aussi se laissoient aisément gagner aux remonstrances du Roy, poussés interieurement par vne particuliere inspiration de Dieu, qui vouloit, ce semble, esclaire l'entendement de ces Ethiopiens auueuglez, pour cognoistre le sentier de salut. Le champ donc estant si bien cultiué & préparé, pour receuoir la semence de l'Euangile, voila que le temps du retour de Cane s'approche. Le Roy ne l'en laissoit pas aller volontiers, à cause de sa douce familiarité, & de l'affection qu'il luy portoit; toutesfois voyant qu'il luy seruiroit beaucoup plus en Portugal, esperant aussi que luy ou quelque autre retourneroit vers luy delà à quelque temps, il le congedia fort humainement, & luy bailla pour compagnie quelques vns de ses Pages ieunes enfans de noble race, auxquels il donna pour gouuernant Zacute, l'un de ceux qui vn peu au parauant auoyent esté en Portugal, luy commandant expressement de remercier de sa part avec parolles fort affectueuses le Roy Iean, pour tant de faueurs, dont il l'auoit obligé; & le supplier humblement de le vouloir faire instruire en la foy Chrestienne, luy & les Pages qu'il menoit, pour estre premierement baptisez, & puis renuoyés en Congo avec quelques Prestres du Dieu Souuerain. Car il ne souhaittoit rien tant en ce monde, que de se rendre Chrestien, & par mesme moyen que sa femme, ses enfans, ses plus proches parens & amis, brief tout le Royaume se conuertit à la foy de nostre Seigneur. Avec ce il luy bailla des presens, pour donner au Roy Iean de sa part, tant en reuenche de ceux qu'il luy auoit

auoit

auoit enuoyez que pour tesmoignage de son affection, & de l'amitié qu'il desiroit contracter avec luy. C'estoit vne grande quantité d'yuoire, & diuers habits & couuertures de liêt bien & proprement tissues de fueilles de palmes, & faites avec grand artifice. Car l'on estimoit pour lors telles denrées la chose la plus precieuse qu'il y eust en ce pais là. Ainsi Cane arriue en Portugal, & presente au Roy l'Ambassadeur Zacute avec les Pages, & tous ensemble luy firent entendre le contenu de l'Ambassade: dont le Roy qui estoit naturellement enclin à la pieté, receut vn merueilleux contentement, voyant qu'une si grande porte s'ouuroit à l'Euangile de ce costé là. Il fist donc instruire Zacute, & ces ieunes Pages en la doctrine Chrestienne, autant qu'il estoit necessaire pour estre baptisez; & aussi tost qu'ils furent prests, le Roy Iean & Eleonor sa femme, presenterent aux sacrez sons de Baptesine, avec vn magnifique appareil Zacute, auquel fust imposé le nō de Iean, à cause que le Roy fust son parrain: & d'autres Princes presenterent les Pages qui prindrent les nōs d'iceux. Le Baptesine paracheué, ils furent donnez à des precepteurs & maistres idoines, pour estre plus particulièrement informez & instruits és mysteres de nostre sainte foy, & dressez aux mœurs qu'elle enseigne. Ils furent l'espace de deux ans entiers en ceste eschole, ou ils apprirent aussi le langage Portugais. Finalement apres qu'on iugea, qu'ils auoyent vne cognoissance suffisante de ce qu'on leur enseignoit, le Roy Iean fit equiper trois nauires, desquelles il donna charge à Gonzale Soufa, Gentilhomme de bon lieu: lequel il constitua son Ambassadeur, & l'enuoya au Roy de Congo avec des presens du tout royaux (car c'estoit vn magnifique appareil d'ornemens sacrez, pour le seruice diuin) luy donnant charge non seulement d'en ramener les neophytes susdits en leur pays, mais encore de presenter au Roy de sa part trois Religieux de l'ordre de S. Dominique, tous personnages signalez tant en vertu cōme en doctrine, desquels il auoit fait le choix: afin qu'ils luy enseignassent, & à tous les subjects, les mysteres de la Religion Chrestienne, & leur conferassent le saint Sacrement de Baptesine avec les autres, qu'ils auoyent puissance d'administrer. Or d'autant qu'en ce mesme temps, il y auoit vne grande peste à Lisbonne, aucuns des nauires emporterent quant & eux la contagion, dont Gonzale Soufa mourut en chemin, au lieu duquel fust esleu du consentement de tous Roderic Soufa, fils

L'Ambassadeur Zacute & quelques Pages du Roy de Congo sont baptisez en Portugal.

Le Roy de Portugal enuoya vn autre Ambassade à celuy de Congo.

*Le beau-
pere ou
oncle du
Roy se
fait ba-
ptiser le
premier
avec son
fils puis-
né.*

du frere du defunct. Apres que les nauires furent arriuees au port, comme desia presque tous les habitans de Congo, tant grands que petis, attendoient le retour de leurs Ambassadeurs, avec vn merueilleux desir; si tost que le beau pere du Roy, ou, comme disent quelques vns, son oncle du costé du pere, qui estoit lors Gouverneur de la Prouince de Sogno, laquelle aboutit à la mer en eust ouy les nouuelles, il s'achemine vers eux accôpagné d'une grande multitude de ses subjects, lesquels chantans, & sonnans des cymbales, & autres instruments, dont ils se seruent en leurs festes, receurent avec vne extreme joye & lieesse Zacute, avec les ieunes Pages, & les Portugais qui deuoient aller trouuer le Roy, comme ils descendirent à terre. Mais sur tous l'oncle du Roy, qui estoit vn fort prudent & venerable vieillard, tressailloit de ioye en son cœur, se voyant quasi à la veille de renaistre par le moyen du S. Baptisme en IESVS-CHRIST, comme il desiroit ardemment. Car estant sur le declin de son aage, afin de ne laisser perdre ceste occasion d'estre lauë de ses pechez au sang de nostre Seigneur, auant que passer de ce monde, il voulut incontinent estre baptizé, avec l'un de ses enfans fort ieune, à cause qu'il ne pouuoit encore pour son bas aage pouruoir à soy. Quant à l'autre sien fils plus aagé, bien qu'il desirast merueilleusement suiure son pere en vne si sainte œuure, & qu'il le priaist instamment de ne le priuer point d'un si grand benefice; toutesfois le pere ne voulut pas, qu'en ce diuin mystere il deuançast le Roy & ses enfans. Ayant donc à la haste fait bastir vn temple, pour c'est effect seulement, de branches & fueilles d'arbres, on y fist dresser trois autels selon la coustume de l'Eglise, là où la sainte Messe fust celebrée par les Peres de l'ordre de saint Dominique, & apres cela le premier Baptisme (qu'on sçache) qui ait esté oncques veu en ces terres barbares, fust conferé audit Gouverneur, avec l'applaudissement de tous ceux du pais, & vne ioye incroyable des Portugais. Ce fust l'an de la Natiuité nostre Seigneur, mil quatre cens nonante vn. Il voulut estre appellé Emmanuel, sçachant que le Roy de Portugal auoit vn cousin orné de grandes vertus, qui s'appelloit ainsi: & son fils eust à nom

35 *grād* Antoine. Ce Prince embrassa la Religion Chrestienne d'un si *zele &* grand zeile, qu'il apparoissoit tant en sa face qu'en ses actions, que *serueur.* son entendement estoit esclairé d'une nouuelle lumiere celeste, & sa volonte merueilleusement eschauffée au seruice diuin: car

non content d'auoir receu vn si grand bien , il en vouloit faire participans tous les autres ; de façon qu'il n'eust pas plustost receu la foy de IESVS-CHRIST, qu'il deuint predicateur d'icelle: si que montât sur vn lieu haut esleué, il commence deuant vne grande multitude de peuple, à detester les Idoles, & le culte impie d'icelles, duquel au parauant il faisoit profession, & se mit avec vne telle vehemence d'esprit, & de parolles à deplorer les erreurs & meschancetez de sa vie passée, qu'on pouuoit aisémēt cognoistre la douleur, qu'il en auoit cōceüe, & comme son ame estoit du tout changée & remplie de l'esprit de Dieu. Le Roy ayāt oüy ces nouuelles, en fust si aise, qu'outre la cōgratulation, qu'il en fit à sondit oncle, il luy accreut encor son domaine, ou gouuernement de l'estenduë de trente lieues de pais en long, & de dix en large. Luy se voyant ainsi fauory & honoré du Roy, pour auoir embrassé le premier la Religion Chrestienne, estoit de plus en plus encouragé à donner d'autres preuues de sa pieté. Si bien qu'il fist vn Ediēt, par lequel il commanda à tous ses subiects, sous griesues peines d'apporter au plustost toutes leurs Idoles en vn lieu qu'il designa, & en ayant fait vn grand monceau, il y fist mettre le feu, qui les redigea toutes en cendre, à son grand plaisir & contentement, mais contre le gré de plusieurs autres. Or tandis que les Religieux seiournerent chez luy, il les caressoit & honnoroit, comme si c'eussent esté quelques Anges descendus du Ciel, les interrogeant avec grand respect de diuerses choses appartenantes à la foy, & des vertus qu'un Chrestien doit auoir. Il demandoit à Dieu instamment, entre'autres choses, que puis qu'il auoit prodigé la plus part de son aage au culte des Idoles, il peust au moins ce peu de temps qui luy restoit de vie, l'employer du tout au seruice de IESVS-CHRIST, & en bones œuvres: conformément à ce que la foy qu'il auoit receüe enseignoit. Mais c'estoit vne chose admirable de voir avec quelle reuerence, ou plustost avec quelle crainte & terreur, il assistoit au sainct sacrifice de la Messe, & comment il vouloit que les autres s'y comportassent. Vn iour entendant la sainte Messe, il y auoit quelques vns de ses Pages, enfans de Princes, qui foulaistrent pendant iceluy, & menoient du bruiēt à l'entrée de la chappelle: luy estimant estre vn tresgrand crime de n'apporter telle attention & reuerence qu'il estoit conuenable à vn si auguste sacrifice, auquel le Fils de Dieu est immolé pour le salut des

*Fait
bruster
force
Idoles.*

*La reue-
rēce avec
laquelle
il enten-
doit la
Messe.*

hommes, commanda que ces enfans fussent sur le champ mis à mort. Et de fait ils eussent esté executez pour vne faute, qui n'est que trop ordinaire parmy nous, & estimée legere, (ce qui nous deuroit faire rougir de honte) n'eust esté que les Portugais ayās compassion du bas aage de ces ieunes Gentils-hommes, l'en destournerent, luy remonstrans, comme Dieu, bien que tres-juste, est neautmoins tres-clement en nostre endroiçt, ne punissant pas nos pechez si rigoureusement qu'ils meritent; & qu'en cela il vouloit que les hommes l'imitassent.

*Le Roy
de Congo
mande
venir au
plusost
l'Ambas
sadeur.*

*Commēt
il le re-
gout,*

Pendant ces choses arriuerent des messagers de la part du Roy de Congo, prians l'Ambassadeur de ne differer plus longuement d'aller trouuer le Roy, qui l'attendoit en sa ville Royale, estant si aise du Baptisme de son oncle, qu'il en faisoit grande feste, & luy tardoit beaucoup de se veoir, avec plusieurs autres, associé en la compagnie des Chrestiens. Sousa ayant reçu ce message, estima qu'il ne deuoit plus dilayer son depart. Il laisse donc vne petite garnison dans ses nauires, & s'en va avec son equipage trouuer le Roy. Mais le Gouverneur de Sogno Emmanuel desia Chrestien, outre plusieurs autres courtoisies, qu'il leur fit, enuoya quant & eux deux cents soldats pour leur faire escorte: & pour apporter leur bagage & hardes, vn grand nombre de gens, lesquels marchoiēt avec vne telle gayeté de cœur, qu'ils se debattoient entre eux, qui porteroit les ornemens sacrés, & autres meubles de l'Eglise. Arriués qu'ils furent environ le milieu du chemin, voicy vn des Gouverneurs du Royaume, qui vient au deuant d'eux, pour les bien-veigner de la part du Roy; & vn peu apres en vint vn autre, suiuy d'vne belle compagnie de gens de marque, qui leur faisoient force caresses, montrant par plusieurs signes, l'ayse qu'ils receuoient de leur venue. Mais quand ils furent pres de la ville Royale, les citoyens diuisés en trois bandes, armés à leur guise, sortirent à la file pour leur aller au deuant, chātans en rithme les loüanges des Portugais, & rememorans les bien-faiçts, qu'ils auoient reçu d'eux. Ils estoient tellement rangés par ordre, & marchoiēt d'vn tel pas, avec la musique de leurs instrumens, qu'ils representoient aucunement l'ordre & la magnificence de noz processions. Quelques vns d'iceux entonnoient leurs chants, & les autres suyuoient l'air entonné avec certaines mesures, & tous ensemble, faisant vn plain son & harmonie, remplissoient l'air de voix d'allegresse. Le rencontre fait, ils mirent les

Portugais au milieu de la multitude, qui y estoit accouruë, & en tel ordre les conduisirent iusques au Palais Royal : ou il y eust vn si grand cōcours de monde, qu'ils ne pouuoient, qu'avec grandissime peine, s'édre la presse, pour se presenter au Roy: lequel estoit esleué sur vn eschaffaut, pour pouuoir estre veu de toutes parts. Il estoit assis sur vne chaire d'uyoire, ayant à la teste vne mitre faicte de fueilles de palme fort artistement, & subtilement elaborée; le reste du corps depuis la teste iusques au nombril estoit tout nud, excepté qu'il auoit au bras gauche des brasselets de leton, & de l'espaule droicte luy pendoit vne queue de Zebre ou de cheual par derriere; le demeurant depuis le nombril iusques aux pieds, estoit couuert d'vne robbe de coton. L'Ambassadeur Soufa ayant esté conduit deuant le Roy, luy feit la reuerence, comme il estoit conuenable; le Roy d'autre part le recueillit fort honorablement à sa mode. S'estans ainsi entresalués, Soufa luy explique le contenu de son ambassade en peu de mots; & sa Majesté remercia avec parolles & signes de grande recognoissance, le Roy de Portugal, pour tant de faueurs qu'il luy faisoit. Apres ce l'Ambassadeur estant requis du Roy, feit desployer aux Prestres, en la presence de tous, les ornemens sacrés, les Calices, & autres vases d'or & d'argent, les tableaux & images: bref tout l'appareil du seruice diuin, que le Roy de Portugal luy enuoyoit. Sa Majesté consideroit & regardoit attentiuement chascune chose à part, s'enquestant à quel vsage elle seruoit, ou qu'est-ce qu'elle signifioit. Or entre ces presens estoit vne banniere de la Croix, tresriche & tres-belle, que le Pape Innocent huitiesme auoit consacrée, avec les prieres & benedictions solempnelles de l'Eglise, l'ayant enuoyée de Rome au Roy de Portugal. Et parce que Soufa en la desployât se mit à genoux, avec tous les autres de sa suite, pour adorer ce sacré signe de nostre Redemption, le Roy aussi s'agenouilla, avec la multitude là presente. Car pendant l'exposition desdictes choses, ou de l'vsage d'icelles, les Ethiopiens auoient tousiours l'œil sur les Portugais, & obseruoient tous les gestes & mouuemens, qu'ils leur voyoient faire: de sorte qu'ils s'enclinoient, joignoient les mains, & s'agenouilloient à l'instar des Portugais. Cela fait, l'on mene Soufa & ses compagnons aux logis, qui leur auoient esté préparés, ou ils furent festoyés & traictés somptueusement à leur façon. Tost apres on commence à traicter du Baptisme du Roy & de la Royne; mais à fin que la chose

*Posture
& ornement du
Roy de
Congo.*

*Presens
du Roy
de Portugal
enuoyez
à celuy
de Congo.*

*On com-
mence à
bâtir v-
ne Eglise
de pierre
en Congo.* se fist avec plus d'appareil & de solemnité, il feut trouué bon de
à bastir au prealable vne Eglise, à la mode des Chrestiens. Car le
Roy de Portugal auoit enuoyé tout expres des maistres massons,
& autres ouuriers experts en l'Architectüre. La plus grande dif-
ficulté qu'on trouuoit à cela, estoit la distance du lieu, d'où il fal-
loit tirer la pierre à massonner : toutesfois l'affection, dont le
Roy embrassa cest affaire, & le grand nombre de manœuures,
qu'il y mit apres, feit que les materiaux furent bien tost prepa-
rés, & l'œuure encommencée. L'Eglise se debuioit dedier à Dieu,
sous le titre de la sainte Croix: & à ceste cause la premiere pier-
re fondamentale y feut mise le troisieme iour du mois de May,
auquel on celebre l'Inuention de la Sainte Croix.

*Reuolte
de quel-
ques peu-
ples sub-
jets au
Roy de
Congo.*

Pendant que le Roy estoit attentif & occupé à ce bastiment,
voicy qu'on luy apporte nouuelles, qu'un certain peuple de son
obeyssance, habitant sur les frôtières du Royaume, s'estoit reuol-
té contre luy, & qu'estant sorti de ses limites, il rauageoit & ga-
stoit tout le plat país, bruslant les maisons, pillant tout ce qu'il
trouuoit, & en amenant grande quantité de troupeaux de toute
espece de bestail, & encore autant d'hommes, qu'il pouuoit ar-
traper. Pour entendre qu'elles gens c'estoient, il faut sçauoir qu'il
y'a vn Lac en l'Æthiopie interieure, qui ressemble vne mer : &
diët on, qu'il a cent lieües de longueur. C'est celuy duquel nous
auons diët, que sortent les plus fameuses riuieres de l'Afrique,
nommément le Nil, le Zaïre, & autres. Or dans ce Lac on trou-
ue plusieurs Isles, & entre icelles il en y a de si grande estenduë,
& si peuplées, qu'elles peuuent fournir trête mille combattans.
De ces peuples là les plus renommés sont ceux, qu'on appelle
Mundequets: lesquels ayans cité auparauant subjuguiez, & dom-
ptez par le Roy de Congo, s'estoient en ceste saison là reuoltés
contre luy, & avec grosse puissance faisoient mille rauages sur
les confins du Royaume. Le Roy iugeant que l'affaire estoit pres-
sé, & auoit besoing de sa presence & prompt secours, se delibera
d'aller luy mesme reprimer l'audace de ce peuple mutin. Mais

*Le Roy
de Congo
est bap-
tizé avec
la Roy-
ne.*

auant que partir, il voulut pouruoir au salut de son ame, par la
reception du saint Baptisme, qui luy fut conféré, ensemble à la
Royne, & à quelques vns des plus grands de son Royaume. Il
voulut en recognoissance des grandes faueurs, que le Roy de
Portugal luy auoit faictes, prendre le nom de Iean, & feit
que sa femme portast celuy de Eleonor, qui estoit le nom de la

Royne de Portugal. Le Roy auoit bien deux enfans, mais l'aîné, qui estoit fort enclin à la vertu & honnesteté, auoit esté enuoyé deuant par son pere, pour avec diligence deffendre la frontiere du Royaume. L'autre plus ieune, nommé Panse Aquitime (à fin qu'il n'y eust faute à l'aduenir de quelqu'un qui exerceast à la vertu les gens de bien, par la tollerance des maux & afflictions qu'il leur causeroit) ne voulut iamais quitter son ancienne superstition. Apres dōc que le Baptisme feut paracheué, le Roy ayant assemblé à la haste vn' armée, entremessant quelques Portugais parmy ses Ethiopiens, il s'en va contre l'ennemy. Mais l'Ambassadeur Soufa sçachant que les victoires sont en la main de Dieu, & qu'il les donne à ceux, qui le reclament, & l'appellent à leur secours, s'aduifa de luy bailler la banniere de la Saincte Croix, l'assurant que par la vertu de ce signe, ou plustost de celuy, qui auoit esté mis en Croix, pour nostre Redemption (pourueu qu'il eust vne bonne confiance en luy) il obtiendrait sans doubte la victoire sur ses ennemis. Ces promesses ne furent pas vaines; car le Roy appuyé sur ceste esperance, inuouquant le nom de IESVS-CHRIST, & faisant marcher la Croix deuant, ainsi qu'il auoit esté enseigné, mit en route les rebelles au premier rencontre, & vit la fin de ceste guerre, plustost qu'il n'eust pensé. Brief il s'en retourna en sa ville Royale victorieux, sans perte des siens, accompagné de son fils aîné, qui le suiuit au triomphe. Ce ieune Prince, apres qu'il eust soigneusement appris la doctrine Chrestienne, & que l'Eglise fut paracheuée, reçeut le Baptisme dans icelle, avec grande solemnité, & resjouissance. Il voulut estre nommé Alphonse, à cause qu'on luy auoit dit, que le fils du Roy de Portugal portoit ce nom. Avec luy furent encor baptisez plusieurs Seigneurs de marque, & autres Gentils-hommes, avec vne grande multitude de peuple, qui accouroit à ce diuin Sacremēt, ainsi qu'un Cerf tout effardé de soif à vne fontaine d'eau viue. Bien tost apres qu'Alphonse eut esté baptisé, il se retire en son Gouvernement: car desia auparauant il commandoit en la place de son pere, à certains peuples nommés Ifondes, ou bien Sondes. (ie croy que ce sont les habitans de la Prouince de Sundo, dont a esté parlé cy dessus) & là commence à faire luy mesme l'office d'Apostre, preschant à ses vassaux la foy & croyance du vray Dieu, qu'il ne faisoit que venir d'apprendre: si bien il l'auoit penetrée, que de disciple il y deuint en brief maistre. L'Ambassa-

*Le Roy
s'en va
soudain
à la guer-
re.*

*Emporte
la victoi-
re contre
ces rebel-
les avec
l'ayde de
Dieu.*

*Le fils
aîné du
Roy est
baptisé,
& se nom-
me Al-
phonse.*

deur Soufa voyant vn si heureux commencement du Christia-
nisme en ce Royaume, resolut de s'en retourner au plustost en
Portugal, pour en porter les nouuelles à son Prince, laissant en
Congo les Religieux, qu'il y auoit menés, pour arrouser ces nou-
uelles plantes de leur sainte doctrine, & les faire croistre en tou-
te vertu, continuant tousiours à pourchasser la conuersion des
autres. Mais voyons ce qui aduint apres.

*Le Roy de Congo Iean I. estant mort, son fils aisné Alphonse luy suc-
cede à la Couronne, lequel apres auoir gagné vne victoire
miraculeuse contre son frere puisné, regne paisiblement
l'espace de 50. ans : & des grandes faueurs
qu'il receut du Roy de Portugal.*

CHAPITRE III.

L'ENNEMY de nostre bien & felicité, enragé de voir les
fondemens de la Religion Chrestienne, si bien jettez au
Royaume de Congo, & que l'Euangile de IESVS-CHRIST
s'espendoit de iour en iour d'auantage en ce pais, qu'il tenoit au-
parauant asseruy sous ses loix impies, & detestables, se resoult
d'empescher par toutes les voyes, qui luy seroient possibles, &
permises de Dieu, le cours & progresz d'iceluy. Pour ce faire il se
sert premierement de l'impieté & malice du second fils du Roy
nommé Panse Aquitime, lequel estant plus addonné au vice, &
aux voluptés, qu'à la vertu & honnesteté, bien qu'il eut veu l'af-
fection, avec laquelle ses pere & mere, son frere & autres Sei-
gneurs, mesmes des plus grands du Royaume, auoient embrassé
nostre sainte foy, tant s'en faut qu'il fut esmeu à l'ensuyure, que
plustost il conçeut vne haine mortelle contre icelle; & ce princi-
palement à cause qu'elle deffendoit les voluptés desordonnées,
& entre autres la pluralité des femmes. A raison de quoy il ne
faisoit que crier, & tempester contre ceste loy, qu'il disoit trop
seuere, protestant qu'elle seroit cause de la ruine du Royaume:
parce qu'il n'y abonderoit pas desormais tant de peuple, qu'il y
souloit auoir. Il disoit aussi, que c'estoit vne trop grande honte
& iadignité aux Congians, de quitter si legerement la Religion
de leurs ancestres, pour en prendre vne nouuelle si differente &
contraire à leurs loix & coustumes. Brief il portoit fort impa-
tientemente toutes ces nouuelletés, qu'on faisoit : & se plaignoit
ouuertement

*Panse
Aquiti-
me, se-
cond fils
du Roy,
abhorre
la foy
Chre-
stienne.*

ouuertement de ce, qu'on abbattoit les Idoles, qu'on mettoit leurs Temples par terre, qu'on prohiboit de leur faire honneur & seruice, & qu'on ne se soucioit plus de consulter leurs Prestres, ou deuins, comm'on faisoit auparauant, pour sçauoir les euenemens heureux ou sinistres des choses, deuant que les entreprendre. Ces plaintes & doléances estoient escoutées volontiers de plusieurs, *Attire plusieurs* non seulement du peuple, mais encore des grands Seigneurs, *mesmes* mesmes de ceux, qui auoient desia reçu le baptesme. Car bien qu'au commencement, lors qu'on leur déclaroit les mysteres de la foy, quoy qu'ils surpassent tout entendement humain, neantmoins d'autant que pour leur profondeur & obscurité, ils sem- *des grands à sa cor- delle.* blent plus diuins, ils ne s'en formalisoient point, & ne monstroient pas grande difficulté à les croire. Toutesfois quand il fut question de venir aux mœurs, & leur faire entendre comme il faillloit garder la justice, la temperance & sobriété, refrener la cholere, rejeter les augures & superstitions, restituer ce qui estoit mal acquis, pardonner les injures, quitter les voluptés, & se contenter d'une seule femme: brief de viure selon que la Loy diuine commande; ce fut lors que l'on veit le bon grain separé de la paille. Car les vns, soit pour l'amour de la vertu, soit pour la crainte des supplices eternels, s'uyuoient le sentier, qu'on leur mōstroit, pour conduire leurs ames à la gloire celeste, rejettans l'iniquité, & embrassans la justice avec les autres vertus Chrestiennes, honorans & cherissans les Prestres, qui leur remonstroient ce, qui estoit de leur deuoir: Ou les autres au contraire, semblables à ceste terre espineuse de l'Euangile, ne voulant donner lieu à la diuine semance (tant grande est la force des mauuaises habitudes) retournoient comme des chiens à leur vomissement, reprenans leurs vieieuses accoustumances, l'yurognerie, l'impudicité, les enchantemens, & semblables turpitudes, qui regnent parmy les Idolatres: & si haïssoient à mort tous ceux, qui leur descouuroient leurs fautes, & reprenoient leurs vices. De façon qu'ils ne fuyoiēt pas seulement la conuersation des gens d'Eglise, mais aussi leur faisoient endurer beaucoup de miseres, & incommoditez. Or ce *Le Roy aussi con- soit un grand desgoust des choses diui- nes.* desgoust des choses diuines & celestes, s'estant peu à peu glissé parmy les principaux de la Cour, le Roy, qui au commencement auoit montré vn si grand desir à se vouloir entierement ranger à l'observation des commandemens diuins, se rendit si languissant à les pratiquer, alleché par les delices & amorces de peché,

qu'on ne recognoissoit en luy quasi aucune marque de pieté, & affection enuers la foy Chrestienne. Car se resouenant de ses anciens plaisirs & passetemps, & s'en voyant priué par l'integrité de la Loy diuine, qui deffend toute impureté, il fut tellement esbranlé par telles & semblables secousses (le Diable poussant d'autant plus à la rouë, qu'il le voyoit touché du desir de reprendre sa vieille peau) que le voyla descheu de son bon estat, & a-heurté au mal avec opiniastrise: de sorte que non seulement il rejettoit toutes les bonnes inspiratiōs, que Dieu luy enuoyoit pour se raffermir en la foy, mais mesmes ne prestoit plus l'oreille aux bonnes remonstrances & enseignemens de ses Pasteurs, ou Peres spirituels. La verité est, que les plus fortes attaques, qu'il eust, vindrent du costé des femmes, qui sont les armes les plus acérées, que Sathan aye, pour destruire la grace, que Dieu communique aux ames Chrestiennes. Car ses concubines se voyant desfaourites & desgradées de l'honneur & rang, qu'elles auoient auparavant, & les autres aussi extremement fâchées, de se voir ainsi chassées d'aupres des hommes, en vertu des loix introduictes de nouveau avec nostre Religion, comme c'est vn sexe, qui porte impatiemment telles choses, & ne sçait reprimer sa cholere, elles font des assemblées secretes, & des complots, ou il est resolu, que d'un commun consentement elles mesmes s'en iroient plaindre au Roy, & luy remonstrer l'injure & le tort, qu'on leur faisoit, le priant pour conclusion avec toute l'instance, qu'il leur seroit possible, de vouloir quitter ceste Religion nouuellement apportée en son Royaume par des estrangers: laquelle commâdoit vne vie si austere, & si desagreable: brieuf l'exhorter à reprendre son ancienne façon de viure, & de iouir des biens & commodités presentes, tandis qu'il luy estoit loisible, sans se soucier tant de l'acquisition incertaine d'une vie heureuse, que ceste loy luy promettoit apres la mort. Or comme le Roy escoutoit volontiers ces plaintes, & que plusieurs infectés de mesme venin, luy souffloient tous les iours aux oreilles, nommément son fils Panse Aquitime, dans peu de temps les affaires de la Religion furent en grandissime danger d'estre fort reculés, voire du tout desesperés. Il y en auoit bien quelques vns, qui tenoient bon, & se mon-

Son plus grand mal viēt du costé des femmes.

Les gens de bien, & sur tous Athanase

stroient fermes & constans en la Foy, s'opposans tant qu'ils pouuoient aux menées & efforts des melchans: toutesfois comme ils estoient en petit nombre, ils n'auoient pas le pouuoir & cre-

dit, que les autres. Bien est il vray, que l'équité de leur cause, & ^{filz aîné} l'esperance, qu'ils auoient du secours diuin, leur donnoit vn grād ^{du Roy,} courage. Sur tous le Prince Alphonse, fils aîné du Roy se mon- ^{s'oppo-}stroit fort magnanime & zelé à maintenir la foy, qu'il auoit re- ^{sens aux}çeuë au baptesme; & portoit grande compassion à son pere, de ^{desseins}ce qu'il se faisoit ainsi porter à ses sensualités, & prestoit l'oreille ^{des mes-}aux persuasions de ceux, qu'il recognoissoit gens peruers & ini- ^{chans.}ques: si bien que sans rien entreprendre sur l'Estat, il contenoit les neophytes en leur debuoir, tant de faict que de parolle & par exemple. Quelques vns des plus grands desirans s'oster ceste espine du pied, à fin qu'il n'y eust personne, qui s'opposast à leur mauuais dessein, commencerent à prester les espaulles, & donner toute faueur à Panse Aquitime, lequel assés incité de sa propre ambition, estoit encores enflammé d'auantage par les propos de ces flateurs, au desir de regner. Or à fin de paruenir à ce but, il ^{Aquiti-}commence à calomnier Alphonse, qui estoit lors absent de la ^{me calō-}cour, taschant de le rendre, non seulement odieux, mais encor ^{nie Al-}suspect à son pere, par des fausses accusations, qu'il luy faisoit a- ^{phonse}croire, disant qu'il auoit tellement degeneré des mœurs de ses ^{aupres}ancestres, mesmes depuis la venuë des estrangers, qu'il mespri- ^{du Roy.}soit les naturels, voire les plus affectionnés au seruice de sa Majesté. Et quant aux coustumes & ceremonies si religieusement obseruées par leurs deuanciers, il n'en tenoit aucun compte, ains passoit par dessus tout, pour auctoriser les Portugais, & leurs loix. Il disoit d'auantage, qu'Alphonse mesprouisoit le Roy son pere, ou plustost le haïssoit à mort; & qu'il faisoit par le moyen des arts magiques, que les Chrestiens luy auoient appris, seicher les riuieres, gastoit les fruiets de la terre, & faisoit vne infinité d'autres maux. Brief que non contét de tout cela, il taschoit d'attirer à soy les concubines du Roy son pere. Avec ces faux rapports & calomnies si monstrueuses, Panse Aquitime & ses complices ou adherans battent tant, & si souuent les oreilles du Roy, qu'ils in- ^{Alphonse}duisent ce vieillard, desja destitué des forces, tant du corps, que ^{tombe en}de l'esprit, & qui avec ce, estoit de sa nature extrememēt jaloux, ^{la dis-}de despouiller son fils aîné Alphonse de son rang & grade, luy ^{grate du}ostant tous les honneurs, dignités, & reuenus, qu'il luy auoit au- ^{Roy son}parauant donnés, & que la nature luy auoit acquis par son droit ^{pere.}d'aisnesse. En fin ils firent tant que le voyla en la mauuaise grace de son pere, lequel en estant venu là, que de croire que ce sien fils

Est re- auoit machiné sa mort, il le relegue en vn coing du Royaume:
gué à vn & si Dieu ne l'eust particulièrement assisté de son secours, il
coing du feust demeuré à jamais pauvre, miserable, & abandonné de tout
Roya- le monde. Mais quelques grands Seigneurs, qui auoient l'ame
me, mieux faicte, voyans comme le Roy auoit esté si lourdement
reduit trompé, & que ce ieune Prince estoit ainsi trahy, poussés (com-
à grande m' il est croyable) d'un particulier instinct du S. Esprit, s'en vont
misere. Son in- trouuer le Roy, & apres force propos respectueux luy remon-
nocence strent, qu'il auoit vn peu mal procedé de condamner ainsi son
est de- fils aîné sans cognoissance de cause, attendu qu'il estoit destiné
sendu pour heritier de ses Estats & Royaume, & que nul hōme d'ēten-
par quel- dement ne pouuoit nier, que ce ieune Prince ne fust doüé d'une
ques rare vertu, & prouïesse, ainsi qu'auoyent bien monstré les beaux
grands faicts d'armes par luy exploictés contre les ennemis de son Estat.
Sei- Ils l'admonnestent encore de se souuenir du soing, qu'il auoit eu
gneurs. tousiours à maintenir le Royaume en paix, & comme ll ne l'auoit
 jamais recogneu, que fort fidelle à son seruice, & au bien
 du public: en somme ils le prierent de considerer attentiuement
 si les calomnies, qu'on luy auoit faict entendre de son Fils (qui
 l'auoit tant honoré depuis sa cognoissance, & beaucoup plus
 sans comparaisō, que ceux qui l'accusoyent) pouuoient s'ac-
 corder avec tant de belles parties, qui estoient en ce ieune Prince:
 afin de ne donner pas si promptement creance à ses ennemis.
 Que la raison requeroit qu'il fist faire enquerre, par quelques
 gens non suspects, de ce qu'on mettoit sus à son fils; & qu'ayant
 reconnu la verité, il luy seroit loisible d'ordonner ou cōtre l'ac-
 cusé s'il auoit mesfaict, ou contre les accusateurs, si leurs rap-
 ports estoient faux & calomnieux, ce qui seroit de raison.

Est au- Le Roy s'estant comme esueillé d'un profond sommeil par
uée par l'equité de ces remonstrances, fist enquerir secrettement de la
le Roy, vie, que menoit Alphonse, & de ses actions, & ayant trouué tout-
en luy te l'accusation malicieusement forgée, il accuse sa legereté à
sestats. croire les plaintes prétendues de certain tas de meschāz flatteurs,
 qui l'auoyent comme enforcélé, & esbloui la serenité de son en-
 tendement. Tellement qu'apres auoit le tout bien examiné, il
 rappella son fils de son exil, le remettāt en tous ses premiers gra-
 des & honneurs, avec vne singuliere consolation de tous les gens
 de biē: & si marqua les calomniateurs d'iceluy d'une notte d'in-
 famie perpetuelle, leur faisant ignominieusement trancher la

reste. Alphonse recognoissant, que le Dieu qu'il adoroit, auoit esté le principal auteur d'un si grand & inespéré benefice, s'eschauffa de plus en plus en son seruice, & print plus de courage que jamais à deffendre & dilater la foy Chrestienne, y employant toutes ses forces & moyens. De maniere qu'encore qu'il eust fait tout ce qu'il auoit peu au parauant, pour abolir & exterminer les superstitions des Gentils, neantmoins se voyant lors en plus grand credit que jamais, il fit de nouveau vne ordonnance, qui fust publiée par tout le Royaume, ou (comme quelques vns disent) és pais seulement que son pere luy auoit donnez: par laquelle il deffendoit sur peine de la vie, qu'il n'y eust aucun, qui osast adorer ou tenir chez soy, ny en priué, ny en public, aucune Idole, ou autre chose dediée à la superstition des mescreyans & infidelles. La publication de cest Edict fust cause d'une grande esmeute: car ses ennemis, deuenus comme enragez de cholere, s'assemblerent à grosses troupes au Palais du Roy: & ayans par l'entremise de quelques meschans garnemēs excité vn tumulte, persuadent aisément au Roy, que si l'on ne faisoit promptement reuoquer ceste ordonnance à son fils, il en arriueroit de grands troubles au Royaume. Ce vieillard craintif, & leger à croire tout ce qu'on luy rapportoit, avec le moindre masque de vray semblance, faict aduiser Alphonse en grande diligence, qu'il eust à se deporter de cest Edict, & pensast bien à ce qu'il faisoit, se iettant en de si grands dangers & perils, non seulement de sa vie & Estat, mais encor de ceux qui luy appartenoient, & ce pour vouloir aduancer opiniaistrement vne Religion nouuelle & estrangere. Mais Alphonse nonobstant ces aduertissemens, continue de tenir la main roide à l'exécution de son ordonnance, estimant qu'il valloit mieux obeïr à Dieu qu'aux hommes, mesmement ou il s'agissoit de son culte & honneur: dont le Roy son pere fâché à oultrance le mande prôprement venir deuers soy. Mais Alphonse considerant que tout le soustien & aduancement de ceste nouuelle Eglise dependoit apres Dieu, de la conseruation de sa vie, se resolut de differer ce voyage pour encores, s'excusant sur les affaires qu'il auoit sur les bras; & par ses excuses dilaya tant, que son pere se trouua non seulement chargé d'ans & de vieillesse, mais aussi accablé d'une griesue maladie. Et combien que par le moyen de certains medicamens on luy eust prolôgé la vie pour quelque temps, neantmoins en fin la force du mal surmontant

Alphonse plus feruent que jamais à dilater la foy.

Fais vn Edict contre les Idoles & ceux qui les adoroient.

Est re- pris de son pere pour cela.

Le Roy le mande venir vers soy.

Alphonse dilaye son depart iusques à la mort du Roy.

*Panse
Aquitime
se
veut fai-
re Roy.*

les remedes, il paya le commun tribut deu à la nature. Son fils puisné Panse Aquitime, qui auoit desia deuoré par esperance la succession de la couronne, commençoit mesme durant la maladie de son pere (qu'il cognoissoit estre mortelle) à solliciter les courtisans, afin qu'ils l'assistassent en ses pretensions de faire Roy, taschât d'attirer à son party les vns par promesses, les autres par presens, ou par amadouemens, & donnant esperance à vn chascun d'une vie licenticuse, & du tout à leur gré ou souhait. Apres cela il assembla vne bien grosse armée, pour debouter son frere à guerre ouuerte du droict qu'il auoit à la couronne. Alphonse d'ailleurs, iagoit qu'il fust aduerty d'heure à autre, de ce qui se passoit, & que plusieurs le priaissent de s'en venir promptement à la cour, afin de dissiper les mauuais conseils & peruers desseins de son frere, & mettre en fuite les troupes qu'il assembloit, pour se cuider faire Roy: toutesfois il ne voulut y aller, sinõ apres qu'il eust entendu la mort de son pere, qu'il regretta fort, doubtant de l'estat de sa conscience. La Royne sa mere soudain l'aduertist du decés de son mary, l'ayant neantmoins celé pour quelques iours, afin que son fils Alphonse (qu'elle affectionnoit mieux sans comparaison que l'autre) eust inoyen de se trouuer à la cour, auant que le bruiet de la mort du Roy fust diuulgué. Alphonse ayant receu ces nouuelles part incontinent, & marchant à grandes iournées, arriue en brier à la ville capitale, dans laquelle il entra de nuict fort secrettement, & le lendemain il assembla les principaux Seigneurs, ausquels il se fioit le plus, ensemble le commun peuple de la ville, en la place de deuant le Palais Royal: ou il fist vne harangue, donnant à entēdre le droict, qu'il auoit naturellement au Royaume, & la douceur dont il estoit deliberé d'vser enuers ses vassaux, le desir qu'il auoit de leur repos temporel, & du salut eternel de leurs ames, les exhortant en peu de mots à luy estre obeissans & fidelles. Apres qu'il eust remonstré ce qu'il iugea estre necessaire pour lors, avec vn grand courage, & autant d'eloquence, que ceste langue barbare luy pouuoit fournir, tous les assistans tant bons que mauuais, d'un commun consentement le saluerent pour leur Prince souuerain, & commencerent à crier: viue le Roy. Panse Aquitime, qui estoit lors avec son armée aux faux-bourgs de la ville, entendant ces nouuelles, afin de ne donner loisir à son frere d'amasser plus de troupes, delibera de l'aller assaillir avec ses soldats, qu'il departit

*Alphonse
aduerty
par sa
mere de
la mort
du Roy
vient
soudain
à la vil-
le.*

*Fait
vne ha-
rangue
aux
grands
Sei-
gneurs
& au
peuple.*

*Est de-
claré
Roy.*

en deux bandes, d'autant qu'ils estoient en grand nombre, & les fist marcher droict à la ville. Alphonse estoit accompagné de fort peu de gens, & comme il a attesté luy mesme en vn Edict que par apres il fist, comme nous dirons cy apres, il n'auoit iustement; que trente six hommes d'armes avec soy, outre la populace foible & craintifue, qui s'estoit jettée dedàs le Palais Royal toute effrayée. Mais comme il estoit homme prudēt, & magnanime, voyant qu'il falloit en telle saison r'asseurer le courage des plus foibles, il leur remonstre, que ce n'estoit pas en la multitude des combattans, qu'il se falloit fier, ains plustost en l'equité de la cause, & au secours du vray Dieu, lequel infalliblement batailleroit pour eux, puis qu'ils estoient resolu de l'adorer, mesprisant les faux Dieux. Et sa prophetie se trouua veritable: car les ennemis estans venus de grande furie luy donner la bataille, avec vn si grand nombre d'archers, que les fleches descochées volant en l'air faisoient ombre, comme si ceust esté vne espesse nuée, Alphonse avec les siens commencerent auant toute autre chose à inuoyer le nom de **I E S V S - C H R I S T** à haute voix, & à crier **S. Iacques, S. Iacques**, suyuant l'enseignemēt & la coustume des Portugais. Or c'est à la verité vne chose merueilleuse, mais neautmoins tres-veritable, qu'aussi tost qu'ils eurent jetté ces cris, & se furent aduancez avec leurs armes, pour resister à l'effort des ennemis, l'auant-garde d'iceux, comme si elle eust esté frappée d'vn esclat de tonnerre, ayant branlé quelque temps, saisie d'vne grande frayeur, tourne le dos, & s'en fuyt à vau-deroute. Alphonse voyant l'auant-garde rompuë, donne dedans la bataille des ennemis: laquelle toute estonnée de la fuytte des siens, & du plus fort de son host, se mist en desordre; & en fin les enseignes tournées, suit la mesme route, chascun tache à se sauuer de vifesse, & se iettant dans les bois & forests plus proches, qu'ils rencontroient. Ceste victoire tant signalée & frere.

merueilleuse fut suyvie d'vn autre succès non moins admirable, & qui establist du tout le Royaume d'Alphonse. Car son fiere Aquitime tout esperdu de crainte s'en estant fuiy avec les autres, s'alla cacher dās des vastes forests, ou il cuydoit estre mieux à couuert: mais comme il est mal-aisé d'euitier la vengeance diuine (si ce n'est par vn repentir d'auoir mesfaict, ce qu'il ne vouloit pas recognoistre) il arriua, que cest estourdy tōba inopinémēt, dans certains pieges, que les veneurs auoient rendu en celle part

Gaigne la victoire miraculeusement contre son frere.

Passe Aquitime prisonnier & sa mort.

pour attrapper des bestes sauvages, ou il se print & fut cōstrainct de demeurer, quelque effort qu'il fist d'en sortir. Il fut trouué par les gens d'Alphonse, empestre dans ces lacqs tout vis, mais fort blessé en toutes les parties presque de son corps, & fut mis en seure garde par le commandement du Roy Alphonse, qui desiroit luy faire recognoistre sa faute, & se rendant Chrestien luy eust volontiers pardonné, ainsi qu'il le fist aduertir: mais en vain, car Aquitime pressé de la douleur des playes, qu'il auoit receües, & violanté du regret de sa condition presente, mourut en peu de iours opiniastre en son impieté & auement. Beaucoup plus heureuse fust la fortune de celuy qui conduisoit son armée, ou luy plus aduisé que son maistre. C'estoit vn homme fort experimenté au faict de la guerre, lequel voyant que ses troupes auoyent esté mises en fuite, comme a esté dict, tache aussi de se sauuer de vistesse, mais il fut attrapé & mené en prison. Or comme il desespéroit de pouuoir garâtir la vie du corps, il voulut à tout le moins pouruoir au salut de son ame. Si enuoya dire au Roy, qu'il estoit content de mourir, selon qu'il auoit merité: mais qu'il le supplioit au nom de ce grand Dieu, qu'il adoroit, de ne l'enuoyer point au supplice, que premiere-
 ment il n'eust esté baptisé. Qu'il ne faisoit plus estat de ceste vie perissable pleine de tant de miseres, mais qu'il craignoit d'estre forclos de l'Eternelle. Et partant qu'il desiroit sur toutes les choses du monde, auant finir ses iours, estre enroollé au nôbre des Chrestiens: car il confessoit ouuertemēt, que le seul Dieu d'iceux meritoit d'estre adoré, & non ceux, qu'il auoit eu en estime iusqu'alors. Ce qu'il disoit plus hardiment, à cause de ce qui s'estoit passé en ceste bataille, pendant laquelle il asseuroit auoir veu de ses yeux propres, certains personages pleins d'une merueilleuse majesté, & beaucoup plus grands que la condition humaine ne sembloit porter, lesquels enuironnoyent sa royale personne de tous costez; adioustant encore qu'il en auoit veu d'autres en quantité parmy son armée montés à cheual, & portés de croix en leurs armes, telles que celles des Portugais, lesquels estoient si luisans & combattoyent avec vn visage si ardent, qu'il n'estoit pas possible de les regarder fixement. Ce qui l'auoit tellement effrayé, que se trouuant despourueu de conseil & de forces, il n'auoit eu autre aduisement que de se mettre en fuite avec le reste de son armée. Aussi n'estoit-il nullement vray-semblable qu'une

Prise de son maistre de camp.

Demande d'estre baptisé auant qu'il l'exécute.

Vision merueilleuse qu'il eut durant la bataille.

qu'une si petite poignée de gens comme sa Majesté auoit, eussent defait les troupes d'Aquitime qui estoient si grandes, s'il n'eust esté assisté du secours diuin, contre lequel il cognoissoit bien que les forces humaines sont de nul effect. Alphonse tout ravy d'aïse au seul recit des choses rapportées par son prisonnier, apres auoir loué & remercié Dieu de ce qu'il l'auoit si fauorablement secouru en ceste victoire si merueilleuse, octroya à ce Capitaine non seulement ce qu'il demandoit, le faisant baptiser, apres auoir esté deuëment instruiet en la foy, mais encore luy donna la vie, avec condition neantmoins que durant le reste de ses iours il auroit charge avec les siens de balayer l'Eglise de S. Croix, & d'apporter de l'eau fresche, pour conferer le Baptême à ceux qui s'y presenteroient. Par le moyen de ceste victoire, Alphonse estât demeuré paisible possesseur du Royaume, continua de regner vn fort long temps avec tres-grande felicité: & obtint moyennant l'aide de Dieu, plusieurs autres victoires sur les barbares, qui se voulurent opposer au cours de l'Euangile; sans qu'il se refroidit iamais en son zele & affection à la manutention, ou progrès de la foy Chrestienne: ains pendant les cinquante ans, qu'il regna apres son pere, il eut aussi particulierement soing que ses subiects rendissent à Dieu le culte & le seruice qu'ils luy deuoyent, comme à soy mesme la fidelité de bons vassaux. De façon qu'il faisoit souuent des longues exhortations à son peuple, quelque fois de la iustice & fidelité qu'ils deuoyent garder les vns enuers les autres, d'autres de la seuerité des iugemens diuins contre les meschans, ou bien du loyer de la vie eternelle préparé aux bons: brief de la doctrine & vie de IESVS-CHRIST, & des exemples de tant de Saints, qui l'ont fuiuy. Au moyen dequoy il fit durant son regne fleurir merueilleusement la Religion Chrestienne en Congo, & si contint ses subiects en grande paix. A quoy seruoient de beaucoup les nouvelles faueurs, & bien-faits qu'il receuoit tousiours des Roys de Portugal. Entre autres le Roy Emmanuel I. du nom, quelque temps apres son aduenemēt à la couronne, comm' il eust entēdu le zele & la pieté du Roy de Congo Alphonse, & de ses subiects, estant de nature, d'affection & d'instruction desirieux des choses saintes, & fort porté à tout ce qui concerne le culte diuin, il s'employa avec vn grand soing, & estude à poursuiure & paracheuer ce, qui auoit esté avec tant d'heur encommencé par ses

*Le Roy,
Alphonse,
luy dōne
la vie.*

*Regne
paisible-
ment &
avec grā
de pieté
durant
ses ans.*

predecesseurs.

Le Roy de Portugal Emma-nuel enuoya à Alphäse des gens d'Eglise & des presens. Pour cest effet l'an mil cinq cens quatre, il enuoya au Roy Alphonse quelques gens d'Eglise, bien versés és Sainctes lettres, & de vertu tres-solide: ensemble des maistres d'eschole pour enseigner la ieunesse, & encore des ouuriers de diners mestiers, à fin de faire instruire ce peuple non seulement ez choses diuines, mais encore ez sciences humaines & arts mechaniques. En outre il y feit apporter grand nombre de chappes, dont on se sert en la celebration des diuins offices, le tout d'estoffe la plus riche & pretieuse, qu'il peut trouuer, ensemble des Calices, des Croix, & Encensoirs d'or & d'argent. Pareillement des Breuiaries, Missels, Bibles, Legendes ou Histoires de la vie de nostre Seigneur & des Saincts: bref tout ce qu'il estima pouuoir seruir à façonner ce peuple pour viure Chrestienement. Il fit encore donner vne bonne somme d'argent, & tout plein de viures, pour l'entretien & nourriture des Prestres, & des autres, auxquels il bailla charge d'instruire & d'endoctriner ce peuple en tout ce qu'auons dit. Et combien que les frais & despens, qu'il faisoit en ces choses, fussent grands, & de consideration; li est-ce qu'il n'auoit point esgard au profit & vtilité, qui luy en pourroit reuenir; ains seulement à l'honneur & gloire de Dieu, se proposant pour toute recompense le loyer de la vie eternelle. Or quand les Prestres, que le Roy Emmanuel enuoyoit, furent arriués en Congo, avec les presents, qu'ils apportoint, il y accourut vne si grande foule de monde, pour iceux conduire vers leur Roy, qu'ils se debattoient, contestans à l'enuy, qui auroit l'honneur de les charger sur ses espaules. Mais c'estoit encore plus grande merueille, de veoir quel respect ils portoient aux Prestres & personnes Ecclesiastiques: mesme le Roy, qui leur fit vn accueil fort honorable, & humain. Et pour declarer mieux la recognoissance de tant de benefices, qu'il receuoit du Roy de Portugal, il ordonna, qu'on fit des prieres publiques pour iceluy, à ce qu'il pleut à Dieu le benir de toute prosperité en ce monde, & en l'autre le recompenser d'vne tres-riche couronne de gloire, comme il luy souhaitoit. Mais au doux bruiet de la venue des Ecclesiastiques, plusieurs, qui couuoient encore dans leur poitrine le venin de l'infidelité, vindrent de toutes parts, pour estre enroollés sous l'estendart de IESVS-CHRIST, avec vne ferme resolution de mener vne nouvelle vie, dez qu'ils seroient regenerés par les eaux du S. Baptes-

Comme ils y furent reueus.

e. Et par ce que les Portugais n'entendoient pas bien la langue du païs, ny ceux du païs la leur, le Roy, qui l'auoit cy deuant tres-bien apprise, seruoit de truchement aux vns & aux autres, à fin que son peuple fut edifié par les bõs propos des Ecclesiastiques, qu'il receut avec plus de goust leur doctrine, qui leur estoit si luy declarée.

Mais le Roy Emmanuel non content de tout ce que dessus, *Ambassadeur* comme il vit le grand bien, qui s'estoit ensuiuy de sa liberalité, & *que le Roy Emmanuel enuoya au Roy Alphonse.* desirant aduancer de plus en plus les affaires de la Religion en Congo, enuoya de rechef enuiron l'an 1511. vn noble Cheualier, Gentil-homme de sa maison, en tiltre d'Ambassadeur vers le Roy, avec vn nouueau renfort de plusieurs Prestres, qui portoient encore force ornemens sacrez, pour dire la Sainte Messe tous decemment, & inciter d'auantage à la pieté & deuotion le Roy de Congo: lequel esmeu d'une si grande bien-veillance d'Emmanuel enuers soy, enuoya en Portugal vn sien fils nommé Henry, & son frere propre, avec quelques ieunes Gentils-hommes, *Le Roy Alphonse enuoya en Portugal son fils Henry & son frere.* pour appréndre les langues Portugaise & Latine: & estre instruits tous auant es mysteres de la foy Chrestienne. Avec eux vint aussi vn autre Gentil-homme, qu'il destina pour son Ambassadeur nommé Pierre, homme de grande prudence, & avec lequel le Roy Emmanuel deuisoit fort volontiers. Iceuluy voulant séjourner plus long temps en Portugal, y amena aussi sa femme, à laquelle la Royne Marie fit beaucoup de presens. Emmanuel desirant affermir d'auantage, & avec toute douceur la Religion Chrestienne en ce Royaume, bailla le fils & le frere du Roy de Congo, avec les autres ieunes Gentils-hommes, entre les mains de quelques Religieux fort vertueux & sçauans, pour leur enseigner le Latin, avec les bonnes mœurs & les mysteres de nostre sainte foy. Puis il deputa vn Gentil-homme de fort noble race nommé Simon de Sylues, pour aller vers le Roy de Congo avec une autre Ambassade, & des presens du tout Royaux. C'estoient des cheuaux brauement harnachez, & caparassonez, avec des harnais pareillement ornés. Item des vases sacrez, des tableaux de peinture, des Messels, & tout ce, qui estoit de besoin, pour rendre deuëment le seruice diuin. Il enuoya encore des artisans, pour bastir des Eglises & le Palais du Roy: donnant toute puissance & auctorité à Sylues, pour contenir en leur debuoir les Portugais, qui estoient en ce quartier, & si besoin estoit, punir

leurs malefices. Outre plus il luy recommanda d'ayder le Roy à administrer iustice à tous les peuples de son domaine. Pour faire cela plus commodément, Sylues mena quant & soy vn Iurisconsulte, suyuant la requeste que le Roy de Congo en auoit faicte à celuy de Portugal, duquel ledit Sylues eut aussi charge, Que si pendant son séjour en Ethiopie, il suruenoit quelque tumulte de guerre, il assistast le Roy de moyens, de conseil, & de forces. Mais sur tout il luy recommanda d'admonester le Roy de Congo d'enuoyer des Ambassadeurs à Rome, pour recognoistre l'autorité & puissance de N.S.Pere, & de la Sainte Eglise, en toutes les choses qui concernent la Religion. Et d'autant que l'Ambassadeur Pierre, qui sejournoit en Portugal, sembloit estre homme fort prudent, le Roy Emmanuel estoit d'aduis que ledit Pierre, accompagné de quelques Gentils-hommes, eust ceste charge, promettant de l'enuoyer à Rome à ses propres cousts & despés. Il prioit aussi le Roy de Congo, d'enuoyer en Portugal quelques autres ieunes enfans des meilleures maisons de son Royaume, pour estre instruiets avec ceux qui desia y estoient.

L'Ambassadeur Sylues mourut auant que voir le Roy de Congo.

Aluare Lopez luy succede & presente au Roy les presens.

Reco- gnouissance du Roy Alphonse

Sylues s'estant embarqué avec ces memoires & commissions, eut le vent à souhait, & arriua bien tost au Royaume de Congo. Le Roy monstra par beaucoup de signes, d'estre fort ioyeux de son arriuee, & despecha promptement vn sien parent des principaux Seigneurs de sa Cour, pour bien-veigner de sa part l'Ambassadeur, & le conduire à la ville Royale, qui estoit assés esloignée du port ou il estoit abordé. Mais Sylues estant tombé malade de fieures mourut, auant que voir le Roy, qui en fut extrêmement marry. Aluare Lopez, Admiral de ceste flotte, succeda à la place de Sylues, ainsi qu'Emmanuel l'auoit ordonné, auant qu'ils s'embarquassent, au cas que Sylues vint à deceder. Lopez donc alla trouuer le Roy, & luy presenta les lettres d'Emmanuel, qui ne contenoient autre chose qu'une declaration de sa rare pieté, & vn tesmoignage de l'affection singuliere, qu'il luy portoit, avec creance en tout ce qu'il luy diroit de sa part. La lecture des lettres ayant esté faicte, Lopez adiousta quelque chose de bouche pour plus ample declaration d'icelles, & fit desployer en presence du Roy les presens, qu'il auoit charge de luy offrir. Le Roy prenoit en main chascune piece, l'une apres l'autre, les louant toutes, & s'esmerueillant de les voir: puis leuoit les mains au Ciel, remerciant Dieu de ce, qu'il l'auoit tiré des tenebres de

en fidelité, pour luy faire voir la lumiere celeste de sa sainte foy *enuers le*
 ar le moyen de deux Roys si accomplis en toutes vertus, & si *Roy Em-*
 eris de sa diuine Majesté, à sçauoir le Roy Iean, & le Roy Em- *manuel.*
 anuel. Mais enuers Emmanuel il se sentoît tres-estroitement
 obligé, non seulement pour les benefices passez, mais encore de
 qu'il adioustoit de nouveau celuy, que maintenant il luy fai-
 it. Or d'autant qu'Emmanuel luy enuoyoit des armoiries, qu'il
 buoit porter de là en auant, pour tesmoignage de sa vertu, &
 our l'ornement de toute sa posterité, il fit vn Edi& là dessus,
 our faire sçauoir à tous la raison de l'institutio de ces armoiries,
 le singulier benefice, du Roy de Portugal en cela. Il racontoit *Le Roy*
 cest Edi&, comment par l'entremise du Roy Iean ce pais auoit *Alphon-*
 é esclairé de la lumiere de la foy Chrestienne, & deliuré de la *se fait*
 rannie de Sathan, pareillement avec quels artifices vn si grand *vn Edi&*
 si saint œuure, auoit esté retardé par les ruses de ce vieil Ser- *le cō-*
 int, qui auoit esté cause de faire chasser nos premiers Peres hors *tenu d'i-*
 l'heureux sejour, ou ils estoient. Il declaroit aussi avec quel *celuy.*
 n & vigilance le Roy Emmanuel s'estoit estudié de paracheuer
 , que son predecesseur auoit encommencé. Puis il faisoit vn
 ief recit ou sommaire de la doctrine Chrestienne, racontant
 me son feu pere ayant esté vn peu auant sa mort miserable-
 ent seduit par quelques meschans garnemens, il auoit quitté &
 andonné avec grande impieté la foy Chrestienne, dont il auoit
 t profession pour quelque temps: & à ceste occasion s'estoit
 onstré fort aspre & rigoureux à l'endroit de son fils aisné Al-
 onse (qui estoit luy mesme parlant en cest Edi&) parce qu'il
 auoit pas voulu suyure son impieté. Il faisoit apres mention de
 n exil & bannissement, auquel il auoit esté relegué par son pe-
 ; & les afflictions, qu'il auoit avec vne tres-grande allegresse
 duré en cest exil, pour l'amour de IESVS-CHRIST. Et com- *Racont*
 e apres que son pere fut mort, il estoit entré au combat contre *ses aduē-*
 n frere, qui taschoit de s'emparer du Royaume contre tout *tures.*
 roit, & luy accompagné seulement de trente six hommes, ayât
 uoqué l'ayde & le nom de IESVS-CHRIST, auoit gagné la
 étoire contre sondit frere, qui auoit vne puissante armée, non
 ar les forces humaines, mais avec le bras de Dieu tout-puissant,
 nsi que ses ennemis mesmes auoient tesmoigné. Brief comme
 a bataille ayant esté gagnée, son frere fut pris prisonnier quasi
 ar miracle, & iustement puny de sa meschanceté & opiniastrise.

Apres cela il declaroit pourquoy son cousin Pierre l'un des tren-
 te six, qui auoient bataillé pour luy, auoit esté enuoyé pour son
 Ambassadeur en Portugal, & comme il auoit sçeu de luy que par
 le commandement du Roy Emmanuel on faisoit prieres en Por-
 tugal pour le salut du Roy & du Royaume de Congo. Ce qu'il
 tenoit pour l'une des plus grandes marques d'amitié, & bien-
 ueillance du Roy Emmanuel en son endroict. Et pource consi-
 derant toutes ces choses, qu'il estoit prest, & appareillé non seu-
 lement d'endurer toute sorte de tourmens, & la mort mesme, si
 besoin estoit, pour la tuition & deffence de la Religion Chre-
 tienne, pour les saints lieux, & pour l'observation des com-
 mandemens de l'Eglise, mais aussi d'exposer sa vie à tous hazards
 & perils, pour le seruice du Roy Emmanuel. Puis il adioustoit ces
 paroles. Mais afin que ce bon Roy digne d'éternelle louange
 nous obligeast à foy dauantage, il nous a enuoyé vn personnage
 de tres-noble race avec des presens & ornemens sacrez, qui mō-
 strent bien la grande affection qu'il nous porte. Et d'autant que
 c'est la coustume des Roys Chrestiens de porter des armoiries,
 pour faire cognoistre à la posterité eux & leur race, & rendre
 d'autant plus illustre la Royale Majesté, le mesme Roy nous a
 voulu gratifier, & honorer encore en cela, nous enuoyant vn es-
 cussion marqué en premier lieu du signe de la Croix, afin que
 nous ayons souuenance de la victoire obtenüe, par l'Empereur
 Constantin apres auoir veu le signe de la croix au Ciel; & que
 nous ne mettions jamais en oubly la victoire, que nous auons
 pareillement rapportée. Et parce que l'Apostre S. Jacques, l'ayde
 duquel nous auons souuēt imploré en la bataille à l'imitatiō des
 Espagnols, s'estant apparu aux ennemis les a tous mis en effroy,
 le Roy Emmanuel a voulu que son image fust grauée és mesmes
 armoiries. Dauantage pour sceller avec vn signalé tesmoignage,
 l'amitié mutuelle, qui est entre luy & nous, il a adiousté aux cho-
 ses susdites, les armoiries des Rois de Portugal, qui sont cinq pe-
 tis escussions disposez en forme de croix. Or ces cinq escussions
 representent les cinq playes, dont N. Sauueur IESVS-CHRIST
 a esté nauré en la croix pour le salut du genre humain. Car lors
 que le Roy Alphonse premier du nom fust prest à donner la ba-
 taille en Portugal contre cinq Roys Sarrazins, qui menoyent vne
 grosse puissance, il vid des yeux de l'esprit, & du corps la figure
 de IESVS-CHRIST embellie de ses cinq playes au Ciel, d'où il

demandoit & attendoit son secours. Ce qui l'encouragea de tel-
 le sorte, qu'il tua sur le champ vn nombre infiny de ses ennemis;
 & pour laisser à la posterité la souuenance d'vn tel benefice, il
 prit ces armoiries, lesquelles Emmanuel nous a enuoyées: afin
 d'admonester nos successeurs de mettre leur appuy en toutes
 leurs guerres, non pas sur la puissance humaine, mais sur l'aide &
 assistance de **IESVS-CRIST**. Pour tant & de si grands & signa-
 lez benefices, nous remercions infiniment nostre trescher frere,
 le Roy Emmanuel, & non seulement le recognoissons pour no-
 stre frere & protecteur, mais aussi sommes prests d'employer
 tous nos moyens, voire mesme la vie pour son seruice. Mais quād
 bien nous aurions fait tout ce qui nous est possible, encore ne
 pourrions nous recognoistre ainsi qu'il appartient, le moindre
 des bien-faits, dont nous luy sommes redevables. Il reste donc
 puis que nous ne pouuons luy rendre la pareille, qu'il plaise à
 l'Eternel Roy des Roys, à l'honneur duquel Emmanuel entre-
 prend des choses si louables, luy en donner vne recompēse eter-
 nelle. Si adiurons & admonestons nos enfans & toute nostre po-
 sterité, voire selon nostre pouuoir & auctorité leur commātons
 de porter ces armoiries, d'en orner leurs boucliers, d'en faire les
 seaux de leurs lettres, & de les porter en guerre en leurs esten-
 dards: brief d'auoir tousiours deuant les yeux de l'esprit ce qui est
 signifié par icelles; afin que ramenteuant ces choses, ils s'excitēt
 à la vertu & pieté, & avec l'ayde de nostre Sauueur, ils r'em-
 portent la victoire de leurs ennemis. Mais d'autant que c'est la
 coustume, que les hauts faicts d'armes soyent recompensez, &
 que les hommes, qui par leurs merites sont montez à vn plus
 haut degré d'honneur, monstrent à leur posterité les marques de
 leur valeur, le mesme Roy Emmanuel nous a enuoyez d'autres
 escussions & marques de noblesse, pour en honorer la race des
 trente-six, qui se sont vaillamment portez en la bataille, ou avec
 l'ayde de Dieu nous auons brisé l'effort de nostre frere. Ce que
 nous faisons aussi esmeus par ses aduertissemens, afin que plu-
 sieurs soyent incitez d'auantage à l'estude de la vertu par vne
 telle recōpençe, & que par ce moyen nō seulement en ceste vie
 nous soyons munis contre l'effort de nos aduersaires, mais aussi
 nous puissions en l'autre iouir des biens eternels. Par ces lettres, qui
 furent affichées par tout, & dont coppie fust enuoyée à tous les
 grands Seigneurs du Royaume, Alphonse voulut tesmoigner

Alpbō
 se cō-
 mande
 à ses
 succes-
 seurs
 de por-
 ter ces
 armoi-
 ries.

*Enuoye
vne Am-
bassade
à N. S.
Pere,
pour luy
presser
obeyssā-
ce & luy
offrir sa
Royaume.*

combien il se sentoit obligé au Roy Emmanuel ; & suyuant son conseil il deputa Pierre avec douze Gentils-hommes , pour aller en Ambassade vers nostre S. Pere le Pape, enuoyant quant & eux au Roy Emmanuel des presens , c'est à sçauoir grande quantité d'yvoire, & autres choses, dont le pais de Congo abonde. Il fist aussi embarquer avec Pierre douze enfans de noble race, pour estre esleuez & instruiets comme les autres. Pierre estant de retour en Portugal, Emmanuel commanda qu'on luyournist avec grande largesse tout ce, qui seroit de besoin pour ce voyage, & pareillement au fils du Roy de Congo Henry, & autres Gentils-hommes Congians, qui les deuoyent accompagner. Ils furent tres-bien venus à Rome, & receus fort humainement de N. S. Pere, auquel ils presenterent les lettres du Roy Alphonse, qui contenoient en somme. Premièrement comme par le moyen du Roy de Portugal Iean 2. luy & son Royaume auoient esté deliurez de la puissance de Sathā, & des espesses tenebres d'erreur, puis aduancez en la cognoissance de la Religion Chrestienne, par la singuliere affection du Roy Emmanuel, qui n'y auoit rien espargné ; tellement qu'il cognoissoit mieux, que jamais la laideur & difformité de la laderie, dont il auoit esté infecté par cy deuant, & detestoit plus que jamais sa superstition & folie passée. Que pour vn si grād benefice, que Dieu luy auoit faict, l'amenant à la lumiere de la vraye foy & pieté, avec tant de merueilles, il luy rendroit graces à iamais, & qu'il ne lairoit onques escouler de sa memoire ceste diuine faueur. Mais ayant ouy dire, que IESVS-CHRIST auoit vn grand Vicaire en terre, à qui tous les Princes Chrestiens faisoient hommage, & aux commandemens duquel comme celestes & diuins ils s'assubjettissoient volontiers, luy ne voulāt s'esloigner de la coustume des autres Princes Chrestiens, ny se fouruoyer en aucune chose du chemin battu par tant de grāds & saincts Princes, & Monarques, il auoit resolu d'enuoyer à Rome son fils Henry desia instruiet en Portugal es Sainctes lettres, & son cousin Pierre, sur la prudence & vertu duquel il se repositoit : à fin qu'en son nom ils luy baissent les pieds, & luy offrisent tout son Royaume, pour en disposer à sa volonté : car il ne permettroit jamais qu'aucun Prince Chrestien le deuançast en l'obeissance & deuotion enuers le sainct siege de l'Eglise de Rome. Apres cela il adioustoit ce qui estoit necessaire, pour donner creance à ce que diroyent ses Ambassadeurs,

deurs, & pour impetrer plus aisément quelques choses qu'il demandoit, appartenantes au fait de la Religion. Ceste Ambassade fut tres-bien reçeuë, & il fut accordé aux Ambassadeurs tout ce, qu'ils demandoient. Car N. S. Pere & les Cardinaux consideroient, que ceste nation barbare esloignée de toute ciuilité & humanité, n'auoit peu quitter son ancienne superstition, pour embrasser la foy Chrestienne, que par vne particuliere grace & assistance de Dieu. Partant qu'il falloit receuoir avec actions de graces ces nouuelles premiçes d'Ethiopie, qu'on venoit apres vn si grãd laps de temps presenter à l'Eglise. Les Ambassadeurs estans retournés en Portugal, & de là en Congo, rapporterent au Roy le bon accueil, que N. S. Pere & les Cardinaux leur auoient fait, dont le Roy de Congo & tout le Royaume furent grandement resiouys & bien edifiez. Cependant le Roy Emmanuel fit instruire soigneusement ces Gentils-hommes Ethiopiens, non seulement ez langues Latine & Portugaise, mais encore és sciences plus importantes de la Philosophie & Theologie. D'ou s'ensuyuit que quelques vns d'iceux, qui auoient profité des mieux en l'estude des sainctes lettres, reçurent les ordres sacrez, & estans de retour en leur païs, gaignerent par leur predication & bon exemple à la foy de IESVS-CHRIST plusieurs de leur nation, qui n'auoient pas encore esté conuertis. Et mesmes il en y eust vn de ceux-là, qui fut fait Euesque de ce païs, comme nous dirons cy apres. Mais voyons ce qui s'ensuyuit depuis.

*Est bien
reçeuë
du Pape
& des
Cardi-
naux.*

Après le décès du Roy Alphonse, son fils Pierre regnant, l'Isle de S. Thomas fut peuplée & erigée en Euesché, d'ou les Euesques, qui l'estoient aussi de Congo, passoient audit Royaume: & ce qui est aduenü en iceluy depuis Alphonse I. iusques à Aluare I.

CHAPITRE III.

LE Roy Alphonse s'estudiant tousiours de plus en plus à faire croistre en son Royaume ceste diuine plante de la Religion Chrestienne, & l'y faire fleurir d'auantage, iectant de si profondes racines, qu'elle n'en peut estre iamais arrachée, il pleut à Dieu l'appeller à foy, pour luy donner (comme il est à croire) la recompense du soin, qu'il auoit eu, d'attirer à sa cognoissance & à son culte tous ses subjets. Mais afin qu'il eust

plus de loisir pour se preparer à ce passage de la mort, si redoutable à vn chacun, mais principalement aux grands Princes & Monarques, pour le compte estroit qu'ils doibuent rendre à Dieu, il luy enuoya vne maladie lente, qui l'alla consommant peu à peu. Mais tandis qu'il fut au liét malade, il ne faisoit que penser aux moyens d'estendre de plus en plus les bornes du Royaume de IESVS-CHRIST, & en parloit bien souuent à ceux, qui luy assistoient, avec vne telle ferueur, qu'on pouuoit aisément cognoistre qu'il auoit bien auant empreint ce desir en son ame. Car entre autres choses, qu'il recommanda à son fils sur ses derniers iours, comme celles qu'il estimoit tres-necessaires pour la bonne & heureuse conduite de son Royaume, la principale fut, qu'il eust sur tout à cœur de maintenir & accroistre, autant qu'il luy seroit possible, l'heritage qu'il luy laissoit de la Religion Chrestienne. Finalement il trespassa sainctement, & laissa pour successeur de la couronne son fils Pierre, vray imitateur de ses vertus, & principalement de sa foy & pieté.

*Trespas
du Roy
Alphöse
& successeur
de son fils
Pierre.*

Du regne de cestui-cuy, la nauigation des Portugais fut plus frequente au Royaume de Congo, que iamais, mesmement pour le traffic. A raison de ce les Portugais par le commandement de leur Roy, commencerent à peupler l'Isle de S. Thomas, qui est située sous la ligne Equinoxiale, esloignée de la terre ferme d'Afrique, quelques 50. lieuës ou enuiron. La cause de cecy fut, par ce que de là on aborde plus aisément à la coste de Congo. Mais d'autant qu'il nous faudra souuent parler de ceste Isle, il est besoin d'en donner icy quelque cognoissance, auant que passer outre. Ell' a esté nommée de ceste sorte, à cause qu'elle fut decouuerte par les Portugais au commencement de leurs nauigations en l'Inde, le iour de l'Apostre S. Thomas. Sa longueur est de quelques 60. milles d'Italie, qui font 15. lieuës des nostres, & sa largeur est de mesme. Car l'Isle est presque ronde, comprenant de circuit 45. de nos lieuës. Le terroir est tres-bon, & fort propre à porter les cannes ou rouseaux de sucre. Car la terre est humide, & tous les matins il y tombe vne rosée, qui d'humecté, de façon que sans estre autrement arrosée, elle fait multiplier infiniment ceste plante, bien qu'auant la venue des Portugais, il n'en y eut point. Mais y ayant esté portée par ceux qui s'y habiterent du commencement, elle y a tellement profité, que l'on y chargeoit de sucre tous les ans, quelques quarante nauires, mais

*Isle de
Saint
Thomas
quand
trouuée,
& pour
quoy ain-
si nom-
mée.
Son esté-
duë & sa
fertilité.
Propre à
porter le
sucre.*

depuis quelque temps en ça, certains vers ont rongé la racine de ces cannes, d'ou est venu qu'on n'en peut pas charger maintenāt plus de cinq ou six. Or jaçoit qu'auparauant il y eut quelques pescheurs, qui demeuroient sur le riuage de la mer, neautmoins au dedans elle estoit du tout deserte : mais depuis que le Roy de Portugal la feit peupler, on y bastist force bourgs, & vne bonne ville, ou il y a pour le moins sept cens feux, & maintenant est erigée en Euesché ; de façon qu'il y a vn Chapitre & vn Euesque, lequel a charge, non seulement des Portugais & autres habitans de l'Isle de S. Thomas, mais encore des Chrestiens de Congo. Et pour ceste cause le premier Euesque de l'Isle de S. Thomas, apres auoir esté receu en ladiète Isle, & y auoir rangé les affaires de l'Eglise, se transporta au Royaume de Congo, pour y faire sa visite. Estant arriué au port de Prazza, esloigné de la ville capitale pres de 40. lieuës, il fut acceuilly des Chrestiens avec vne extreme liesse. Le Roy aussi luy feit vn grand honneur : car il com-
*Est peu-
plée des
Portu-
gais, &
erigée en
Euesché.*
*L' Eues-
que de
ceste Is-
le l'est
aussi de
Congo.*
*Commēt
fut receu
le pre-
mier E-
uesque
en Con-
go.*

manda, que tous les chemins, par lesquels il passeroit, fussent netto-
 yés & applanis, voire couuers de nattes; de façon qu'il ne tou-
 chast point des pieds en terre. Le peuple accouroit de toutes
 parts, pour voir son Pasteur, à si grande foule, que presque par
 tout le chemin, les hommes, femmes, & petits enfans, faisoient
 comme vne haye d'vn costé & d'autre : & en y auoit encore, qui
 montoient sur les arbres, ou autres lieux plus eiminens, à fin de le
 pouuoir voir. Brief tout le monde le reueroit, comme si c'eust
 esté vn Ange descendu du Ciel. Et vn chascun luy offroit des
 presens, les vns vn aigneau, les autres vn cheureau, qui des pou-
 lets, des perdrix, des poissons, ou choses semblables, s'estimans
 bien heureux, s'il daiguoit les receuoir. Beaucoup de gens de l'vn
 & l'autre sexe, venoient se presenter à luy en chemin, pour estre
 baptisez, & entre ceux-là il y en auoit de l'aage de quatre vingts
 ans ou d'auantage. Plusieurs d'iceux insistoient tellement en leur
 demande, qu'il n'y auoit moyen de s'en despetrer, sans qu'on leur
 eut octroyé ce qu'ils desiroient. Et à ceste cause l'Euesque auoit
 tousiours en main de l'eau, du sel, & autres choses semblables, re-
 quises à l'administration d'ice Sacrement, suyuant son institu-
 tion, & les sacrées ceremonies, que l'Eglise y obserue. Ce qui re-
 tarda beaucoup son voyage. Commenceant d'entrer au terri-
 toire de la ville capitale, le Clergé luy vint au deuant, & le Roy
 aussi avec son train. Il fut de ce pas mené dans l'Eglise de Sainte

*Son zele
à s'afes-
neur.*

Croix, là ou apres auoir rendu graces à Dieu, de l'auoir conduit iusqu'à là si heureusement, il se retire au logis, que le Roy luy auoit fait preparer. Mais il n'y sejourna pas longuement, au si n'y estoit il pas venu, pour se reposer. Il commence donc aussi tost à trauailler & exercer le deu de sa charge, rangeant premierement les choses de l'Eglise, administrant le S. Sacrement de Confirmation, admonestant les gens d'Eglise, tant Religieux que seculiers, de faire leur deuoir, & les autres Chrestiens aussi, soit Portugais, soit originaires. Il ordonna que l'Eglise de S. Croix, ou il y auoit 28. Chanoines, avec leurs prebendiers, fut de là en auant la Cathedrale. Bref tādīs qu'il vesquust, il fit l'office d'un vray Pasteur, ne s'espargnant en rien, lors qu'il estoit questiō du seruice diuin, & ne faisant compte d'aucun peril ou danger. Il alloit deçà & delà, visitant les lieux & bourgades des Chrestiens, constituant des Curez ou des Vicaires, & faisant tout ce, qui estoit requis, pour le salut de son troupeau. En fin apres auoir bien trauaillé &

*Sont ref-
pés.*

cultiuē ce nouueau champ de nostre Seigneur, il pleut à sa diuine bonté l'appeller de ce monde, pour luy rendre (comme il est croyable) la couronne de gloire: & son corps fut enterré en l'Isle de S. Thomas. A cestuy-cy succeda le fils du Roy Alphonse, qui auoit esté enuoyé (comme nous auons dit) en Portugal, & depuis à Rome, là ou ayant esté bien instruit és bonnes lettres, mesmement en Philosophie & Theologie, comme il fut de retour en Portugal, on le fit Euesque de l'Isle de S. Thomas & de Congo: mais en allant prendre possession de son Euesché, il mourut en chemin, auant qu'y arriuer. Apres le decés de cestuy-cy le Siege demeura vacquant quelques années. Et en ces entrefaites le Roy Pierre deceda sans hoirs, tellement que la couronne vint

*2. Eues-
que de
Congo.*

*Murt
en che-
min.*

(comme disent quelques vns) à un sien frere nommé François, lequel mourut aussi bien tost apres, & en sa place fut couronné un nepueu du Roy Pierre appelé Iacques, combien que suyuant les memoires, que i'ay reçu de Portugal, cestuy-cy est nommé immediatement apres Pierre, sans faire mention de François.

*Decés
du Roy
Pierre
& de sō
succes-
seur.*

Quoy qu'il en soit, Iacques estoit un homme d'un grand courage, & bien experimenté au fait de la guerre. Il affectionnoit singulierement les Portugais; de façon que pour l'amour d'eux, il se vestit à leur mode, laissant l'habit de sa nation. Pareillement en la conduite de sa maison & de son train, il taseoit d'imiter la magnificence des Roys de Portugal, & se monstrois fort liberal

enuers tous. Ce qui le rendoit aymable à vn chascun. Quand il s'estoit seruy d'un accoustrement deux ou trois fois, il ne le portoit plus; mais le donnoit à quelqu'un de ses fauorys, encore qu'il se vestist de draps fort precieux, sans faire estat d'aucune despence, estimant que les choses de haut prix estoient conuenables aux grands. Cela fust cause que l'on apportoit de Portugal en Cogo force draps de soye, d'or & d'argent, qui jamais plus n'auoyent esté veus en ce pais là. Soubs ce Roy fust créé le troisieme Euesque de l'Isle de S. Thomas & de Congo, qui estoit Portugais de natiõ, lequel ayant esté receu des Congiãs avec pareille reioüissance, que le premier, commença d'exercer sa charge.

*Iacques
5. Roy
Chrestien
de Cogo.*

*3. Eues-
que de
Congo.*

Or le diable ne pouuant endurer l'heureux succès des affaires du Christianisme en ce Royaume, commence d'y sursemer de l'yuraye, allumant le feu de discorde entre les Chanoines & les Religieux, d'une part, & l'Euesque nouveau de l'autre. Mais au prealable il fist couuer des malueillances & inimitiez occultes, lesquelles vindrent en fin à s'esclorre & causer vne dissension ouverte. Car les Chanoines & Religieux ayans esté si long temps sans Pasteur, qui eust l'œil sur eux, s'estoyent accoustumez à faire tout ce qu'il leur plaisoit, sans crainte d'estre reprins de personne, de façon que l'Euesque nouveau les voulant admonester de leur deuoir, ils ne le pouuoient supporter, & en vindrent iusqu'à là qu'un chascun d'eux s'estimât & soy disant esgal en puissance & autorité à son Euesque, ils ne faisoient aucun compte de ses comandemens, au grand scandale de ces nouueaux Chrestiens, & notable dommage de ceste Eglise. Au contraire l'Euesque voulant maintenir sa dignité & faire le deu de sa charge, les vouloit contraindre à obeyr par censures, & autres voyes semblables. Le Roy soustenoit le party de l'Euesque, priant le Clergé d'obeir à son Prelat, & quand il en y auoit des refractaires, il les enuoyoit prisonniers en Portugal. De là vint que les gens d'Eglise se diminuerent fort, partie à cause de ceux qui estoient renuoyez, comme a esté dict, en leur pais, partie pour la malice des autres. Car ils estoient si endurcys en leur obstination & opiniastreté, qu'ils aymoyent mieus s'en retourner en Portugal, avec ce qu'ils auoyent gagné en Congo, que d'obeir à l'Euesque. Et à ceste occasion la foy Chrestienne qui auoit eu de si heureux commencemens en ce Royaume cuida y estre presque du tout esteinte. Le Roy de Portugal, qui estoit lors Iean troisieme, entendant

*Dissen-
sion en-
tre l'E-
uesque
& le
clergé.*

Le Roy de Portugal
Jean 3.
enuoie en Cōgo
4. Peres de la cō-
pagnie de I E-
S V S.

ces choses, comme il auoit fort à cœur, que la religion Chrestienne se conseruast & fist progrès principalement, és regions des infideles, lesquelles elle auoit esté plantée par son moyen ou celuy de ses deuanciers, demanda quatre Peres de la Compagnie de I E S V S, de ceux qui estoient lors à son College de Coimbre qu'il auoit luy mesme fondé, pour les enuoier en Congo, afin d'y maintenir & accroistre la pieté. A ces fins luy furent baillés ceux qui s'ensuiuent, à sçauoir. Le P. George Vas superieur de ceste Mission, le P. Christofle Ribere, le P. Iacques Diaz, & le P. Diego Soueral, tous gens triez & fort propres, pour vne telle entreprise. Ils partent donc de Lisbonne enuiron l'an 1549. & font voile premierement droit à l'Isle de S. Thomas, d'où le traject au riuage de Congo est fort aisé. Arriués qu'ils y furent ils tomberent tous malades, & l'espace de quelque mois furent griefuement affligés tant de fieures que d'autres infirmités: toutesfois cela n'empescha pas qu'ils ne poursuiussent leur dessein: de maniere qu'auant qu'ils eussent du tout recouuré leur santé ils s'embarquent & passent de l'Isle susdite, à vn port de mer du Royaume de Congo nommé Pinda. Le Roy ayant receu nouuelles de leur arriuée, leur enuoie au deuant cinquante lieues loing, deux des plus grands Seigneurs qu'il eust auprès de soy, lesquels conduisirent les Peres iusques au Palais Royal, avec beaucoup d'honneur & de courtoisie, les faisant porter sur des cheuaux de bois à la mode du pais. L'Inuention en est telle. Sur vn cheuron ou quelque grosse piece de bois, espesse d'environ douze poudres, & longue de huit pieds, ils estendent vn cuyr de bœuf de la grandeur d'une selle, & là dessus celuy qui voyage estant monté comme à cheual est porté par deux hommes, auxquels si le chemin est long en succedent d'autres. Sur tels cheuaux furent portez les Peres (qui estoient encore fort debiles) iusques à la ville ou estoit le Roy. Lequel aduertý de leur venue s'en va au deuant d'eux les accueillir avec ses enfans, & force gens de la ville, à vne croix qui est hors les murailles d'icelle, là où il les receut fort honorablement & avec grands signes de bien-ueillance, mesmes en consideration du Roy de Portugal qui les luy recommandoit fort. Apres cela on leur baille vn logis, tel que sont les maisons des Cōgiens, à vne seule estage couuert de chaume ou de paille. Or comme ils n'estoient pas venus là pour se reposer, ils commencent incontinent à mettre la main

che-
uaux de
bois en
Congo.

L'œuvre. Le P. Soueral ouurist dans ceste maison vne eschole, *ce que les Peres de la Compagnie firent en Congo.* pour enseigner à la jeunesse les lettres & la doctrine Chrestienne, & eust dans peu de jours jusques à six cens enfans; lesquels il instruïsoit avec grande peine & travail, leur apprenant à lire & à escrire; mais principalement les Rudimens de la foy Chrestienne. Les autres Peres apres auoir communiqué leur dessein au Roy (qui leur faisoit vn tres grand honneur) taschent principalement de reformier par leurs predications & remonstrances les mœurs deprauez du peuple, voir mesme des plus grands, puis prescher l'Euangile à ceux, qui estoyent encore Idolâtres, envers lesquels ils profiterent de telle sorte, que le Pere Ribere dans cinq mois baptisa mil sept cens originaires, les ayant au prealable tous bien instruits es choses de la foy: le Pere Diaz quatre cens, le Pere Vaz trois cens, & cestuy-cy encore s'estant acheuiné vers certains villages proches de la ville, avec vn truchement sans aucun viatique, conuertit à la foy & baptisa autres deux mille sept cens personnes. Le mesme Pere outre les Eglises, & le Roy Alphonse I. auoit jadis faict bastir dans la ville, en fist edifier trois autres es faux-bourgs; dont l'une fust dediee à S. Iouueur, l'autre à nostre Dame de l'Ayde, & la troisieme à S. Iuan Baptiste. Mais estant tombé malade comm' il alloit tousiours en empirant, il fust contrainct & forcé de se retirer pour quelque temps à la maison, & les autres aussi pour la mesme cause. Car soit à raison de l'air qui est là plus grossier que celuy de Portugal, soit pour vser de viandes mauuaises, ou non accoustumées, vindrent tous quatre malades. Au moyen dequoy ils furent contraincts, à leur grand regret, de se diuertir des exercices spirituels, pour vacquer au recouurement de leur santé. Mais le plus grand destourbier, qu'ils eurent à poursuiure le bien encomencé vint du costé du Roy, lequel ne se monstroït gueres enclin à ce qui concerhoit le faict de la Religion, & ne se soucioit beaucoup de pouruoir à ce, qui auoit besoin de son auctorité & liberalité. Dauantage comme il estoit fort addonné à plusieurs vices, & particulièrement au peché de la chair, abusant de plusieurs femmes ou concubines, dont il n'y auoit moyen de le detourtir; cela, & les pechez des autres grands Seigneurs & Courtisans, qui estoyent aupres de luy, fist perdre toute esperance aux Peres de pouuoir faire là quelque profit: tellement qu'ils resolu-
rent de s'en retourner en Portugal, ayant eu comme il est à

S'en retourner en Portugal.

croire, sur ce l'aduis, ou commâdement de leurs Superieurs, qui en auoyent, peut estre besoin ailleurs, pour les employer és choses du diuin seruice.

*Grands
tumultes
en Congo.*

Quelque temps apres le Roy Iacques estant mort, il y eust de grands tumultes & seditions au Royaume, pour la succession de la couronne: si que dans peu de iours on en vid trois, qui furent esleuez à la Royauté, & aussi tost tuez. Le premier estoit le fils aîné du Roy Iacques, auquel de droict appartenoit la couronne, comme vray heritier & legitime successeur de son pere; mais il n'estoit guere agreable aux Congians: de façon qu'en vn mesme iour il fust salué Roy, & meurtry. Celuy-là estant despesché, il en restoit deux autres, qui pretendoyent à la Couronne. L'vn d'iceux auoit de son costé la plus part de la noblesse, & du peuple, mais il n'estoit pas bien voulu des Portugais, ny de quelques autres Gentils-hommes Congians: lesquels desiroient esleuer à la Royauté vn autre sien frere. Ayant donc conspiré ensemble la mort de celuy-là, ils entrent dans l'Eglise, où on le couronnoit à l'accoustumée: & comme l'on croit viuë le Roy parmy vn tumulte, qu'ils exciterent à l'impourueu, ils coupent la gorge au nouveau Roy: s'asseurans que cestuy cy estant mort, & n'en y ayant point d'autre, qui fust plus proche de la courône, que celuy qu'ils pretendoyent esleuer, il seroit fait Roy sans difficulté. Mais (ô iustes iugemens de Dieu!) il aduint tout au rebours de ce qu'ils auoyent proiecté. Car ceux qui fauorisoyent à cestuy-cy, qui auoit esté esleu par les voix quasi de tous, ayant secu, deuant qu'il fust tué, que les Portugais & quelques autres de la noblesse du païs auoyent volonté de faire venir la courône à son frere, delibererent de s'opposer à leur dessein: & afin de leur oster toute esperance enuoyerent quelques vns tout exprez, pour mettre à mort celuy, que les Portugais vouloyent faire Roy. De

*Trois
Rois de
Congo
tuez
quasi en
mesme
temps.*

maniere qu'au mesme temps que les vns massacroyent cestuy-cy, les autres meurtrissoient celuy-là dans vne autre Eglise. Le peuple se voyant priué en vn mesme instant de toute la race Royale, fust tellemēt espris de cholere cōtre les Portugais (qu'il estimoit estre cause de tout cela) qu'on en mettoit à mort autant qu'on en trouuoit, horsmis les Prestres & gens d'Eglise, ausquels on pardonoit, pour le respect qu'on portoit à leur dignité & office.

Le Royaume estant en ce trouble, afin qu'il ne tombast en quelque inconuenient plus grand, s'il demeueroit long temps sans

sans Roy, les Gentils-hômes, avec le peuple esleuë à la Royauté *Henry*
 le frere du feu Roy Iacques, qui s'appelloit Henry. Or d'autant *frere de*
 qu'en ces tumultes les Anzicains pensans secoüer aisément le *Iacques*
 ioug des Congians s'estoyent reuoltez, il s'en va avec vne armée *est esleuë*
 contre eux, pour les remettre en son obeïssance, & cependant *à la cour-*
 laisse pour Regent du Royaume, vn ieune homme de vingt cinq *ronne.*
 ans, appellé Aluare, qui estoit fils de sa femme, mais d'un autre
 mary. Le Roy Henry estant mort bien tost apres en ceste guerre, *Estant*
 & en luy tous les Princes du sang esteints, les Congians d'un *mort en*
 commun consentement eslisent Aluare pour leur Roy. C'estoit *guerre*
 un homme d'un bon sens, mais sur tout fort debonnaire; au moyen *Aluare*
 de quoy si tost qu'il fut esleuë à la Royauté, il tacha d'appaiser *1. luy*
 toutes les dissensions passées. A ceste fin il appelle tous les Por- *succede.*
 tugais tant Ecclesiastiques que Laiz, qui s'estoyent escartez deçà
 & delà en diuerses Prouinces, de peur qu'on ne les traitast de la
 mesme façon, que leurs compatriots. En ce rappel il les ex-
 cuse des tumultes passez declarant qu'ils n'en auoyent point
 esté cause: & le mesme escriuit il au Roy de Portugal, & à l'E- *Appaise*
 uesque de l'Isle de S. Thomas, le priant de vouloir venir en son *les tu-*
 Royaume sans aucune crainte ny soupçon, ains de la mesme sor- *multes*
 te qu'il faisoit auparauant. Cela resiouïst fort non seulement *passé.*
 les Portugais, mais aussi les Congians: car ils estoient priuez de
 beaucoup de commoditez, qu'ils auoyent par le moyen du tra-
 fic & commeree avec les Portugais. Mais apres cela ils comman-
 cent à trafiquer & communiquer par ensemble, comme si rien
 ne fust aduenü, mettât soubs les pieds d'une part & d'autre tou-
 tes les malueillâces & inimitiez passées. L'Euesque aussi, qui n'a-
 uoit osé passer en Congo, pour les causes susdites, apres auoir re-
 ceu ces lettres du Roy, s'y transporta pour mettre quelque ordre *L'Eues-*
 és choses de l'Eglise, s'estudiant sur tout à ce, qu'il ne demeurast *que de*
 aucun desir de vengeance en l'esprit des vns, ny des autres, s'il e- *l'Isle S.*
 stoit possible. Dauantage il remist par ses bons aduis, & saintes *Thomas*
 ordonnances l'estat Ecclesiastique, qui estoit desia fort detraqué, *s'en va*
 tant à cause des esmeutes passées, que par la longue absence de *en Congo,*
 leur Pasteur. Finalement apres auoir heureusement paracheuë *& ce*
 tout ce qu'il souhaittoit, il s'en retourna à l'Isle de S. Thomas, *qu'il y*
 ou il tombe en maladie, dont il mourut, laissant le siege Episco-
 pal vacquant pour la troisieme fois.

Or comme le Roy Aluare estoit encore ieune, & non gueres

Le Roy bien instruit és choses de la foy, il laschoit facilement la bride
Aluare à ses appetis desordonnez, n'ayant personne qui l'aduifast de son
1. pense deuoir. Car l'Euesque estant mort, & le Clergé retourné à son
quitter premier train, il n'y auoit aucun, qui osast le reprendre, pour le
la foy destourner de ses vices; de façon qu'il luy vint vn tel desgoust des
ebre- choses diuines, & par mesme moyen à tous ses courtisans, voire
sienne. à tout le peuple (qui suit d'ordinaire l'exemple de son Prince)
 qu'on traictoit desia de quitter publiquement la foy Chrestienne.
 Et de faict il s'en fallust bien peu, que le Roy n'en vint là, induict
 à ce par les propos, que certains ieunes solastres & esuentez luy
 en tenoyent d'ordinaire: mais principalement par la suasion d'un
 sien parent appellé François Bullamater, qui auoit plus de cre-
 dit enuers luy, que tout autre, tant à cause de la parété, qui estoit
 entre eux deux, que pour les dignitez, qu'il luy donnoit de iour
 à autre. Cestuy-cy donc comme plus audacieux que le reste, ne
 faisoit que parler, & crier non seulement en priué deuant le Roy,
 mais aussi en public, en presence du peuple, contre la foy Chre-
 stienne, disant que ceste loy estoit tres-pernicieuse à l'estat:
 mesmes à raison qu'elle deffendoit la pluralité des femmes.
 Partant qu'il valoit mieux reprendre l'ancienne, sous laquelle
 ils estoient si florissans, qu'ils deuançoient & en richesses, & en
 puissance toutes les autres nations. Avec ces propos il esmeut
 tellement la Cour, & les citoyens de la ville Royale, voire quasi
 tout le Royaume, qu'il s'en fallust de bien peu, que tous d'un
 commun accord, n'abandonnassent la foy de IESVS-CHRIST,
 qu'ils auoyent embrassée avec tant de zele & de ferueur, la con-
 damnans comme inutile, ou mauuaise. Mais Dieu par son infinie
 bonté & puissance, empescha vn si grand malheur, chastiant
 griefuement, & miraculeusement celuy, qui estoit le principal
 autheur d'un conseil si pernicieux. Car ainsi que ce François Bul-
 lamater enorgueilly de sa parenté & des honneurs, qu'il rece-
 uoit du Roy, se monstroient de iour en iour plus outrecuidé, ne
 faisant que blasphemer contre la Loy diuine, voila qu'il vient à

Mourt
miser-
ablement.

mourir miserablement en ses pechez & blasphemés.
 Et bien qu'il fust mort apostat public, le Roy neantmoins par
 ce qu'il estoit son parent, fist enseuelir son corps honorablement
 dans l'Eglise de sainte Croix: mais il aduint vne chose merueil-
 leuse, laquelle retint ceux, qui s'en alloient choir en l'abyssme
 d'apostasie: & cōfirma en la vraye foy les autres, qui chanceloient.

ar la nuit apres que le corps fust enseuely, les malins esprits *Les Diab-*
 trent dans l'Eglise avec vn si grand bruiet & tintamarre, *bles em-*
 ion l'entendoit de bien loing, rompent le toiet, brisent & met- *portent*
 nt en pieces les nattes, dont il estoit couuert, & apres auoir ti- *son corps*
 la charoigne de cest impie du tombeau, l'emportent quant & *qui estoit*
 x, pour estre bruslée avec son ame eternellement au feu d'en- *enseuely*
 r, comme il est croyable. Or le lendemain beaucoup de mon- *dans l'E-*
 s'estant assemblé, pour voir ce qu'auoit esté fait, l'on trouue *glise.*
 couuerture de l'Eglise tout fracassée, le tombeau ou l'on auoit
 is le corps de cet apostat vuide, sans qu'on peust sçauoir ce
 estoit deuenü sa charoigne, dont tous conçurent vne si
 ande frayeur, que le Roy & les autres, qui estoient en branle
 apostater de la foy, se repentirēt de leur meschante resolution:
 tant eux, que les autres conçurent vne plus grande opinion
 celle, qu'ils n'auoyent encores eüe. Toutesfois le Roy estant
 core jeune homme à marier, & n'ayāt personne qui l'incitast à
 vertu, & le destournast du vice, il cōtinua de demeurer dans le
 urbier de ses voluptez, iusqu'à tant que nostre Seigneur luy
 uoya vn plus seuer chastiment, selon que nous verrons au
 apitre qui s'ensuit.

Les Giachas peuples cruels & farouches, pillēt & rauagent le Royau-
me de Congo; d'ou en fin les Portugais les chassent: & comme
le Roy a tasché de recouurer des Prestres Catholiques, &
ce que quelques Peres de la Compagnie de IESVS
y ont fait; & d'une victoire signalée que le
Roy Aluare 2. gaigna contre vn sien
frere qui luy contesloit la
couronne.

CHAPITRE V.

AVRES du premier Lac le plus Meridional des deux, *Giachas*
 d'ou le Nil prend sa source, il y a certains peuples, qu'on *peuples*
 appelle Giachas, fort cruels & barbares, qui ne vivent *& leurs*
 ordinaire que de voleries & larcins à la façon des Arabes, ou *mours.*
 es Numides. Ils sont Antropophages, c'est à dire mangent la
 chair humaine, & quant au reste de leurs mœurs, ils sont du tout
 barbares. Car ils ne recognoissent aucun Roy ny Seigneur; ils
 ont aucune certaine demeure; mais à guise de Pasteurs, ils vont

tantost d'un costé tantost d'un autre, & logent en des cabannes, qu'ils se font de branches d'arbres, ou en des tentes qu'ils portent quant & eux. Leurs armes offensives sont un poignard ou une massue, l'arc & les fleches, ou bien un javalot; les defensives un long bouclier, aussi large au milieu, qu'il est besoin pour couvrir un homme: mais de là jusqu'aux extremités, il va s'estressissant, & au bout d'en bas il y a une pointe, laquelle ils plantent dans terre, & de ceste sorte leur sert comme de rempar. Ces peuples donc estans en ce temps là sortis de leurs limites, alloient pillant & ravageant tout le plat pays à l'entour: si qu'ils vont en fin entrer dans le Royaume de Congo, par la Prouince de Bata-

*[Pillent
et ravau-
gent le
Royaume de
Congo.]*

ta, qui leur est voisine, tuans & massacrans tout ce, qu'ils rencontroient en vie. Le Roy estant adverty de cela, enuoye promptement quelques compagnies de soldats pour les rembarrer, & reserrer dans leur pays: mais ils furent soudain mis en route par ces barbares. Lesquels ne trouuans aucune resistance, s'en vont tout droit à la cité Royale de Congo, laissant par tout, ou ils passoiert, les marques de leur cruauté & barbarie; & une telle frayeur aux habitans, que tout le monde se mettoit en fuite, si tost qu'on entendoit leur venue. Le Roy mesme fut tellement intimidé, entendant la cruauté de ces gens là, qu'il n'osa leur aller au devant, pour les combattre & chasser de ses terres; ains resolut de les attendre en sa ville Royale, qu'il estimoit assez forte, pour leur resister. Voylà donc en peu de temps les Giachas arriuer au pied de la montaigne, sur laquelle est bastie la ville de Congo. Le Roy voyant l'ennemy si pres, assisté de quelques uns, qui estoient demeurés avec luy (car plusieurs entendans la venue d'un peuple si cruel & si farouche, s'en estoient enfuy) sort de la ville, cuydant empescher aux barbares la montée, qui est assez difficile, afin qu'ils ne gagnassent ceste plaine, en laquelle le Roy Alphonse auoit jadis si heureusement combattu les rebelles. Mais ce ne fut pas avec pareil succès, que cestuy-cy y batailla: Aussi n'y alloit il pas avec une telle confiance en Dieu, comme l'autre, son ame estant toute ulcerée de playes de peché, & bourrellée des remords de sa meschante conscience, qui luy ostoiert l'esperoir d'estre secouru de Dieu en telle necessité, ne l'ayant seruy & honoré comm' il appartenoit. L'ennemy donc sans beaucoup de resistance gaigne la plaine, & le Roy avec ses troupes se met en fuite, & se retire dans la ville: là ou c'estoit une grande pitié de

*[Descent
le Roy en
fuite.]*

voir & entendre les pleurs & crieries, tant des femmes, que des petits enfâs, qui se lamentoiët, comme si desia ils eussent esté entre les mains des Giachas. Le Roy apres auoir balancé en diuers conseils, voyant en fin qu'il n'y auoit moyen de garantir & defendre la ville, se resoult de prédre la fuytte, & se retirer en quelque lieu d'assurance. Ayant donc plié bagage, & empacqueté tous les plus precieux meubles qu'il eust, il desloge avec ses soldats, laissant la ville sans aucune deffence ou garnison de gens de guerre: car il n'y restoit que la simple populace, qui n'auoit moyë de resister à vne si grande multitude de barbares. L'ennemy donc s'estant saisy de la ville sans aucune difficulté, mit à feu & à sang tout ce qu'il y trouua, ne pardonnant pas mesmes aux Eglises, ny aux bastimens du Roy, Dieu voulant, ce semble, chastier de la sorte non seulement le Roy, qui fut despoillé presque de tout son Estat; mais encores les habitans, soit originaires, soit estrangers, tant lais, que gens d'Eglise. Car les barbares ne faisoient aucune distinction des choses sacrées, ou profanes: & pilloient, saccageoient, & brusloient aussi bien les saincts lieux, que les maisons priuées. Mais non contens d'auoir butiné tout ce qu'il y auoit de beau dans la ville, & mis en cendres la plus part d'icelle, ils s'espandent par tout le Royaume: & mettent tout ce qu'ils rencontrent de viuant au fil de l'espée, bruslent les maisons, rauagent tous les champs, & font par tout vn grand degast, sans que personne leur fit teste. Car les habitans du païs entendans que le Roy s'en estoit enfuy, & que les Giachas auoient saccagé & destruiët la ville Royale, se retirerent és montaignes, pour se sauuer, laissant tout leur bien à l'abandon & à la mercy des ennemis, qui ne pardonnoient à chose du monde. Or plusieurs de ceux, qui s'en estoient fuyz aux montaignes, ne trouuans là des viures, perirent miserablement de faim, si que les chemins estoient tous couuerts de charognes de ceux, qui defailloient à chasque pas de foiblesse. Le Roy s'estoit retiré en l'Isle des Cheuaux, dont a esté parlé cy deuant: mais comme ils estoient là force gens avec luy, les viures venans à manquer, la famine s'y print de telle sorte, que plusieurs en mouroient chasque iour. Et comme c'est l'ordinaire, suruint quant & quant la peste, & beaucoup d'autres maladies contagieuses; si que la plus grand part de ceux, qui s'estoient là retirés, y mourut de pauureté & de misere. Car vne bouchée de pain estoit troquée avec vn esclau, qui en autre temps eut

*Baignoit
& sacca-
gent la
ville
Royale.*

*Grande
desola-
tion du
païs.*

*Pauvre-
té & mi-
sere de
ceux qui
s'estoient
retirez
avec le
Roy.*

esté vendu plus de dix escus, & encore ceux là s'estimoient heureux, qui en pouuoient auoir à ce prix. Les Portugais qui demeuroient en l'Isle de S. Thomas, sçachans la disette des viures, à laquelle estoient reduicts ceux, qui s'estoient là retirez, leur en apportèrent quelque peu, les permutant avec des esclaués, comme a esté dit. Mais c'estoit vne chose digne de grande compassion, de voir le pere pressé de la faim vendre son fils à si vil prix : afin de prolonger vn peu d'auantage sa vie, le frere pour vn morceau de pain troquer son frere ; & ce qui est encore pis, les enfans mesmes vendre leurs propres peres & meres, ostans, pour vn peu de pain, la liberté à ceux, qui leur auoient donné la vie. Brief il y eust plusieurs grands Seigneurs, qui se soubsmirent eux mesmes à vne seruitude volontaire, esperans pour le moins que ceux, qui les achetteroient, ne leur refuseroient pas la nourriture necessaire. De là vint que l'Isle de S. Thomas, & le Portugal encore, se remplit d'esclaués Congians : entre lesquels il en y auoit plusieurs, qui estoient yssus de noble race, & de grande maison. Le Roy aussi, bien qu'il ne fut pas si pressé de la faim, que les autres, endura neantmoins beaucoup de paureté, estant contrainct de se nourrir de viandes mal saines, d'ou s'ensuyuit qu'il tomba en vne griefue hydropisie, qui luy dura iusques à la fin de ses iours. Dieu voulant ainsi chastier ce Roy, pour le faire recognoistre, puis que admonesté par le miracle que dessus, il n'auoit pas tenu compte de s'amender de ses pechés. Or se voyant reduict à vne telle misere, il commence à ouuir les yeux, & à recognoistre, que Dieu luy enuoyoit ces fleaux pour punitiõ de ses mesfaits ;

*Punitiõ
diuine
du Roy.*

*Sa con-
uersion.*

de maniere que se conuertissant à luy avec vne infinité de larmes, il implore sa misericorde en toute humilité. Et cõme Dieu ne desire pas la mort du pecheur, mais qu'il retourne vers luy, & viue eternellement ; il eut en fin pitié de ce pauvre Prince, & de son peuple, le restituant en son siege Royal, & deliurant ses subiects d'vne telle affliction, en la maniere qui s'ensuit. Les Portugais, qui demeuroient en l'Isle de S. Thomas, voyans l'estat miserable de ce Roy, & de son Royaume, luy cõseillerent d'enuoyer promptement vn Ambassadeur au Roy de Portugal, pour luy declarer sa calamité, & luy faire sçauoir, que sa ruïne totale estoit proche, s'il n'estoit secouru bien tost. Cecy aduint au commencement du regne de Sebastien Roy de Portugal : lequel y enuoya soudain vn Capitaine nommé Gouea, duquel il s'estoit seruy,

*Secours
que le
Roy de*

tant és Indes Orientales, comm'en Affrique: & luy bailla six
 cens soldats, outre plusieurs autres Gentils-hommes Portugais,
 qui auoiēt enuie d'aller en ce païs esprouuer leur fortune. Estant
 donc ce Capitaine avec toutes ses gens arriué à l'Isle de S. Tho-
 mas, le Gouverneur d'icelle, selon la charge qu'il auoit du Roy
 de Portugal, pourueut l'armée de viures, & autres choses neces-
 saires, pour vne telle expedition, avec si grande diligence, que le-
 dit Capitaine, suyui de ses troupes, fit bien tost voile en Congo:
 & aborda au port de Prazza, d'ou il tira droit à l'Isle des Che-
 uaux, en laquelle il trouua le Roy, qui le reçeut avec vne ioye in-
 croyable. Et sans aucun delay, apres auoir joint à son armée tous
 ceux, qu'il trouua là propres à porter les armes, tant originaires
 que Portugais, il marche à grandes iournées, & le plus hastiue-
 ment qu'il peut, contre les Giachas, qui estoient deuenus inso-
 lens à merueilles à cause des choses passées. Si leur donna plu-
 sieurs attaques, escarmouches, & batailles, esquelles il auoit touf-
 jours le dessus: & dans vn an & demy les chassa entierement de
 tout le Royaume, en ayant fait mourir la plus grand part. Le
 bruiet de l'artillerie que les Giachas (comme ny estans pas ac-
 coustumés) redoutoiēt merueilleusement, apres le diuin secours
 luy seruit de beaucoup. Ayant donc remis le Roy en son thros-
 ne, & tout le Royaume en paix, il s'en retourne en Portugal, por-
 tant des lettres du Roy de Congo, par lesquelles il remercioit in-
 finiment celuy de Portugal, de luy auoir, non seulement sauué la
 vie, mais encore rendu le Royaume, le priant instamment de luy
 vouloir enuoyer des Prestres, pour instruire son peuple en la Re-
 ligion Chrestienne. Mais il y eut plusieurs des Portugais, qui
 estoient allés en ce païs là avec le Capitaine Gouea, lesquels s'y
 arresterent, voyans la bonté du païs, & les caresses, que le Roy
 leur faisoit, les comblans de iour en iour d'une infinité d'honneurs
 & de richesses. Au demourant le Roy de Congo ayant esté fait
 sage par tant de miseres & calamités, se conuertit à Dieu à bon
 escient, & se maria avec vne grande Dame nommée Catherine:
 de laquelle il eut quatre filles: mais des esclaves, qu'il entretenoit
 auparauant, il auoit eu deux enfans masles, & vne fille. Or d'au-
 tant qu'en ce païs là les filles ne succedent pas à la couronne, le
 fils aîné d'une des esclaves appellé Aluare, comme son pere, fut
 déclaré legitime heritier & successeur de la couronne; & depuis
 a esté Roy, comme nous dirons cy apres. Mais estant encore le

*Portu-
gal Se-
bastien
luy en-
uoye.*

*chasse
les Gia-
chas, &
remet le
Roya-
me en
paix.*

*Le Roy
de Portu
gal fait
recher-
cher les
minieres
de Con-
go.*

Capitaine Gouea avec son armée dans le Royaume de Congo, le Roy de Portugal entendit qu'en ce pais là y auoit des mines d'or, d'argent, & d'autres metaux, & pource il y enuoya deux maistres fort experts en cest affaire, desquels les Espagnols s'estoient seruis autresfois à recognoistre les mines des Indes Occidentales: leur ordonnant qu'avec la permission du Roy de Congo, ils recherchassent eelles de son Royaume, pour voir si on en pouuoit tirer quelque profit & vtilité. Le Roy de Congo s'estant conseillé avec vn Prestre Portugais, appelle François Barbut, fist mener ces Maistres là en d'autres lieux, où il sçauoit ny auoir point de mines, craignant que si l'on descouuroit celles, qui estoient en ses terres, cela ne fust cause de sa ruine, & de la perte de son estat. Mais combien que ce conseil semblast estre vtile de ce costé là, afin d'empescher que les estrangers n'empietassent sur son Royaume, toutesfois le succès n'en fust pas si heureux. Car les Portugais n'ayant point esperance de trouuer en Congo de ces metaux tant souhaittez en Europe, n'y trafiquoyent pas de la en auant si volontiers, & pour ce peu de gens d'Eglise s'y transportoyent aussi, d'où s'ensuiuit que la Religion Chrestienne

*Deca-
dence de
la Reli-
giō Chre-
stienne
en Cōgo,
pour fau-
te de
Prestres.*

y alloit peu à peu en decadance. Le Roy de Congo voyant cela prie celuy de Portugal avec grande instâce, de luy enuoyer quelques Prestres, afin que la foy Chrestienne, laquelle ses deuâciers auoyent embrassée avec si grande affection, ne fust du tout abolie en son Royaume, non tant pour faute des habitans, qui y estoient assez enclins, que pour manque de Prestres, qui les enseignassent, ce qui estoit de leur deuoir, & leur administrassent les Sacremens. Le Capitaine Gouea estant de retour en Portugal, bailla les lettres, ou ceste requeste estoit contenuë, au Roy Sebastien, lequel ne fist autre responce, sinon qu'il donneroit ordre de satisfaire au desir du Roy, pour le regard des gens d'Eglise, qu'il demandoit. Mais rien ne s'en feit pour cela. Tellement que le Roy de Congo desireux que la pieté refleurist en son Royaume, enuoya vn Ambassadeur à celuy de Portugal, le priant en premier lieu de permettre, qu'on rachepst plusieurs esclaves de ses vassaux, qui auoyent esté vendus aux Portugais, durant les guerres passées: & de luy enuoyer des gēs d'Eglise, pour instruire son peuple. L'Ambassadeur estant arriué en Portugal, racheptra plusieurs esclaves, combien qu'il en y eust beaucoup, qui aymèrent mieux demeurer en Portugal serfs & esclaves, afin de pou-
voir

voir plus commodement seruir Dieu, & faire le salut de leur ame, perseuerans en la Religion Chrestienne, que de retourner en leur pais destitué de tels aydes spirituels, bien que viuans en liberté. Quant à l'autre chef de sa legation, il n'en rapporta que des bonnes parolles & promesses, de façon qu'il partit sans en emmener aucun Prestre. Combien que trois ans apres le mesme Roy Sebastien enuoya pour Euesque de l'Isle de S. Thomas, vn Espagnol nommé Antoine Glioua, avec charge de passer de là en Congo, pour consoler & instruire les habitans, & voir comme les affaires de la Religion y alloient: puis que ce peuple aussi estoit de son troupeau. L'Euesque estant arriué en ladite Isle, ne fust pas bien venu du Gouverneur d'icelle, à cause d'une dent de laict qu'il luy portoit, tellement qu'il passa bien tost de là en Congo, là où il fust calomnié aupres du Roy par l'entremise du Gouverneur susdit, lequel donna fausement à entendre au Roy, que l'Euesque estoit homme arrogant & ambitieux, qui vouloit s'esleuer par dessus sa Majesté mesme. Brief il fist en sorte, que le Roy luy deffendist au commencement l'entrée de son Royaume: mais par apres estant mieux informé il cogneut que ce n'estoyent que calomnies, & pource il le receut fort humainement, luy enuoyant au deuant vn de ses enfans, qui le conduisist avec grandes caresses, iusques à son palais Royal. L'Euesque ayant demeuré là quelques huit mois, s'en retourne en Portugal, vn peu auant que le Roy Sebastien ne passast en Affrique, laissant en Congo six Prestres seulement, deux Religieux, & quatre autres Seculiers, qui n'estoyent pas bastans pour la centiesme partie du Royaume. Apres que le Roy Sebastien eust esté deslaict en Affrique, celuy de Congo enuoya derechef vn Ambassadeur au Cardinal Henry, qui auoit succédé à la couronne de Portugal, luy demandant avec grande instance quelques gens d'Eglise. Mais le Roy Henry venant à deceder peu de temps apres, n'eust moyen de satisfaire à sa requeste. Le Roy d'Espagne Philippe second, ayant succédé au Cardinal Henry, si tost qu'il eust entendu ces nouuelles, escriuist au Gouverneur de l'Isle de S. Thomas, qu'il enuoyast de sa part vn Ambassadeur à celuy de Congo, auquel il escriuist des lettres fort amiables, luy promettant, que l'affection & bien-ueillance que ses deuäciers les Roys de Portugal luy auoyent monstrée, ne luy manqueroit pas de son costé. Le Gouverneur bailla ces lettres à vn nommé Sebastien de Costa,

4. Euesque de l'Isle de S. Thomas & de Congo.

Instance du Roy de Congo, pour recouurer des Prestres.

*Ambassadeur
du Roy
d'Espa-
gne, Phi-
lippe 2.
estant
Roy de
Portu-
gal à ce-
luy de
Congo.*

*Renvoy
du mes-
me Am-
bassa-
deur par
le Roy de
Congo,
vers ce-
luy de
Portu-
gal.*

*Edouard
Lopez
Portu-
gais Am-
bassa-
deur du
Roy de
Congo.*

*Est en-
voyé au
Roy d'E-
spagne.*

pour les porter en tiltre d'Ambassadeur au Roy de Congo : lequel en receut vne joye incroyable, & renuoya le mesme Sebastien au Roy Philippe avec des lettres, par lesquelles outre les autres chefs, ou il respondoit aux siennes, il luy offroit pour assurance d'une plus ferme & plus stable amitié, les mines d'or & d'argent qu'il auoit en son Royaume. Et afin de faire paroistre quelque effect de ses promesses, il luy feit present de plusieurs lingots ou monstres de diuers metaux tirez de ses mines, ne pretendait, comme il disoit, auoir autre faueur en recompense du Roy d'Espagne, sinon qu'il luy pleust le pouruoir de quelques Prestres, pour instruire son peuple, lequel estoit en grand danger de quitter la foy Chrestienne, si au plustost il n'estoit secouru & confirmé en icelle. Or il aduint que cest Ambassadeur perist sur mer, ayant fait naufrage près de Portugal : mais on cogneut quelle estoit sa commission, par le moyen des lettres du Roy, qui estoient enserrees dans vn coffret, lequel fust trouué sur le riuage de la mer, apres le naufrage. Le Roy de Congo aduertiy de cela, fut grandement marry de cest accident ; mais il ne desista pas pour cela de pourchasser le mesme qu'au parauant, à sçauoir de recouurer des Prestres, pour remettre sus les choses de la Religion Chrestienne en son Royaume ; tellement qu'il resolut d'enuoyer vn autre Ambassadeur au Roy d'Espagne pour ceste mesme fin. Il y auoit plusieurs grands Seigneurs Congians, qui se presentoyent à cela ; mais le Roy iugea qu'il seroit plus à propos d'y enuoyer vn estranger. Il choisit donc à cest effect vn Portugais nommé Edoüard Lopes, des memoires duquel Pigafetta Italien a tiré tout cecy, & nous de luy. Cest Edoüard estoit allé en Congo, lors que le Roy Sebastien passa en Afrique, & ayant depuis ce temps là demeuré en ce pais, traffiquant en diuerses marchandises, il y auoit si bien appris la langue, les mœurs, & l'estat de ce Royaume, que le Roy de Congo l'estima plus propre qu'aucun de ses subiects, pour l'enuoyer en tiltre d'Ambassadeur au Roy Philippe, l'enchargeant de faire entendre à sa Majesté l'estat miserable des affaires de la Religion Chrestienne en ce pais là ; & le prier instamment de sa part, de vouloir auoir pitié de tant d'ames, qui perissoyent pour faure de gens, qui leur monstrassent le chemin de salut. Et pource qu'il luy pleust y enuoyer quelques Prestres, pour instruire son peuple, qui languissoit de fâim spirituelle, pour n'auoir personne, qui luy coupast & distri-

buast le pain de la parolle de Dieu, ny des Sacremens. Or afin
 de l'inciter encores d'auantage à cela par l'esperance du profit,
 il luy bailla quelques Lingots d'or & d'autres metaux, qui se
 trouuent en ses minieres, pour les presenter au Roy d'Espaigne,
 luy offrant lesdites minieres, & luy donnant deslors plein pou-
 uoir, & à ceux qu'il commettrait d'en faire la recherche, & d'en
 tirer tout ce qu'il voudroit. Outre ce il donna charge au mesme
 Ambassadeur d'aller en son nom baiser les pieds de nostre S.
 Pere, & luy prester l'obeissance, que les autres Princes Chrestiens
 ont accoustumé de luy rendre, l'aduissant aussi de la necessité,
 qu'il y auoit en Congo de Prestres, afin que sa Saincteté y pour-
 ueust auec plus d'affection, comme estant selon sa charge plus
 portée à ce qui touche le seruice de Dieu, & le salut des ames.
 Cest Ambassadeur ayant demeuré huit mois encore en Cōgo,
 pour expedier quelques affaires qu'il auoit, s'embarque finale-
 ment au mois de Ianuier. Mais il eust vne nauigation si defa-
 streuse, qu'apres auoir eschappé plusieurs estranges tempestes,
 & orages, dont il fust battu sur mer, courant de grands hazards
 de sa vie, finalement il vint surgir à vne Isle proche de la nouuel-
 le Espaigne, appelée Cubazoa, vis-à-vis de l'Isle Margarite, là ou
 on pesche les perles. Estant là il tombe malade, & y demeure vn
 an entier: tellement que le Roy de Congo pensant qu'il fust pery
 comme le premier, enuoya vn autre Ambassadeur auec les mes-
 mes commissions & memoires. C'estoit vn nommé Pierre An-
 toine naturel de Congo, des plus grands Seigneurs du Royaume.
 Le Roy luy bailla pour l'accompagner vn Portugais, nommé
 Gaspar Diaz, homme tres-riche & fort deuot, esperant qu'auec
 l'ayde dudit Gaspar, qui scauoit la langue, & les mœurs des
 Espagnols, il obtiendrait plus aysément ce qu'il demandoit. Il
 leur ordonna encore, que s'ils trouuoient par cas fortuit Edoiard
 Lopes, qu'ils se ioignissent à luy, & fissent tous ensemble les dili-
 gences qu'il seroit de besoing, pour venir à bout de ce qu'il pre-
 tendoit. Mais il aduint vn autre grand malheur à ces Ambassa-
 deurs: car la nauire, dans laquelle ils s'estoyent embarquez, tomba
 entre les mains des Anglois, qui estoient lors ennemis mortels
 des Espagnols & Portugais, & comme on la menoit en Angle-
 terre, elle se froissa contre certains bancs ou escueils, là où l'Ambas-
 sadeur Pierre Antoine & son fils, auec quelques autres Con-
 gians se noyerent, mais Gaspar Diaz se sauua, & en fin se rendit

*Et va à
 N.S. Pe-
 re pour
 luy ren-
 dre obeis-
 sance au
 nom du
 Roy.*

*Nauiga-
 tion long-
 ue &
 perilleu-
 se de
 l'Ambas-
 sadeur.*

*Autre
 Ambas-
 sade du
 Roy de
 Congo
 sort de-
 fastreux*

*Mort
du Roy
de Cōgo
Aluare
L*

en Espagne, ou il trouua Edoüard Lopes, qui y estoit arriué vn peu deuant, pour solliciter le mesme affaire. Toutesfois Gaspar Diaz, ayant aduertý Edoüard de tout ce qui luy estoit arriué, s'en retourne en Congo sans luy dire mot. Edoüard se voyant seul, presente les lettres du Roy de Congo à celuy d'Espagne, qui estoit lors à Madrid, duquel il fust bien receu & oüy volontiers sur le fait de son Ambassade. Mais comme les affaires & la resolution tiroient en longueur, l'on va entendre que le Roy de Congo, qui l'auoit enuoyé estoit mort: de sorte qu'il n'eust autre responce, sinon que sa Majesté ne pouuoit pas lors vacquer à cest affaire, estant empeschée à la guerre, qu'il pretendoit faire en ce temps-là contre la Royne d'Angleterre. Edoüard voyant qu'il n'y auoit point d'esperance de ce costé là, s'en va à Rome presenter à nostre S. Pere, qui estoit lors Sixte 5. les articles de sa legation. Il fust receu fort humainement du S. Pere, auquel ayant faict entendre la misere des habitans de Congo, quant au faict de la Religion, & le danger ou ils estoient du salut de leurs ames, pour faute de Pasteurs, & de gens idoines qui les repeussent de la parolle de Dieu, & des Sacremens; il le pria instamment au nom du Roy de Congo, de vouloir pouruoir selon sa charité paternelle à ceste nouuelle Eglise de Prelat, de Curez, & autres Prestres qui fussent gens capables pour l'instruction d'icelle, s'offrant d'y ayder de ses moyens particuliers, autant qu'il luy seroit possible. Et à ces fins il promettoit de bastir à ces propres cousts,

*L'issue
de l'Am
bassade
d'E-
douard
Lopes.*

& despens (car il auoit de grands moyens en Congo) vne maison pour seruir d'eschole, en laquelle la jeunesse fust esleuée & instruite tant aux lettres qu'en la pieté. Mais sa Sainteté fist responce qu'il remettoit cest affaire au Roy d'Espagne, auquel cela appartenoit; toutesfois il n'aduansa rien de ce costé là. Il est bien vray, que quelques Peres de la Compagnie de IESVS, sont allez plusieurs fois en ce Royaume, depuis qu'ils ont vne maison de residée en l'Isle de Loanda. Entre autres, l'an mil cinq cés huitante vn, estant vn d'iceux allé pour quelques affaires d'importance en ce país là, vid bien la necessité de ceste vigne de nostre Seigneur, laquelle à faute d'ouuriers, s'en alloit toute en friche.

*Mission
d'un Pe-
re de la
Comp. en
Congo.*

Car pour trente mille villes ou villages que l'on compte en ce Royaume, il n'y auoit selon qu'il escriuist que dix Prestres, ou douze, pour le plus: d'où s'ensuiuoit vne si grande ignorance parmy ces peuples des choses de leur salut,

estans interrogés ce qu'ils croyoient, ou qu'elle Religion ils auoient, ces pauvres gens ne sçauoient respondre autre chose, sinon qu'ils auoient mangé du sel, voulâs dire par là, qu'ils auoient été baptisés, d'autant que selon l'usage de l'Eglise, l'on met du sel en la bouche de ceux, que l'on baptise. Il commence donc à fricher ceste terre enseignant à ceux, qui auoient plus de besoin d'instruction, les choses necessaires à salut, & outre ce ennuertit de nouueau à la foy 1557. Vn autre Pere de la mesme Compagnie y alla pareillement l'an 1585. & y trouua bien vne grande moisson, mais peu d'ouuriers. Car il y a plusieurs villages (ainsi qu'il escriit) là ou tous se disent Chrestiens, & toutesfois on n'y void que fort rarement des Prestres, voire il en y a, qui n'ont n'en ont yeu aucun. Ce Pere donc par tout ou il passoit, estoit reçu des habitans avec vne merueilleuse cōsolation d'un chascun. Plusieurs luy venoient au deuant, & luy faisoient grandes caresses. Il taschoit aussi de les acheminer à la voye de leur salut, confirmant en la foy ceux, qui estoient desia Chrestiens, baptisant les petits enfans avec le congé de leurs pere ou mere, & ceux aussi, qu'il trouuoit plus aduancés en aage, s'ils estoient suffisamment instruits, quand ils luy en faisoient instance. En ce voyage il baptisa plus de mille personnes, comptant ceux, qui furent aussi baptisés au Royaume d'Angola. Car estant sur les confins des deux Royaumes, il alloit tantost deçà, tantost delà. Mais enuiron deux ans apres, vn autre Pere de la mesme Compagnie s'y achemina, pour vn affaire de plus grande importance, estant mandé du Roy mesme, à l'occasion qui s'ensuit.

Autre mission d'un autre Pere au mesme país.

Le Roy Aluare I. du nom, duquel a esté cy deuant parlé, venant à deceder, laissa vn fils de mesme nom, pour heritier, non seulement de son Royaume, mais encore de sa foy. Cestuy-cy au commencement de son regne, escriuit à vn Pere de la Compagnie, qui se trouua lors en l'estat d'un certain Seigneur d'Angola, s'employant au bien & profit spirituel, tant des Portugais, qui estoient là, que des originaires du país. Si luy fit aussi entendre qu'il desiroit fort communiquer avec luy quelques choses importantes à son salut. Le mesme luy escriuit le Capitaine des Portugais, qui demeurent en Congo, & quelques autres Gentils-hommes de la mesme nation, qui estoient à la suite du Roy. Le Pere s'apprestant pour y aller, reçeut encore des lettres du Gouverneur, ou Lieutenant pour la couronne de Portugal

Troisieme mission d'un autre Pere que le Roy appelle à soy.

en l'estat d'Angola, esquelles il le prioit de faire ce voyage, luy enuoyant d'autres siennes lettres, pour bailler de sa part au Roy Aluare. Or es missiues, qu'il escriuoit au Roy, il se conioüyssoit avec luy de la succession du Royaume, qui luy estoit escheuë par le decés de son pere, & luy promettoit au nom du Roy de Portugal tout ayde & secours, pour la deffence d'iceluy, si quelqu'un le luy vouloit contester. Ce qui donna vn grãd courage au Roy, & aduança merueilleusement ses affaires. Parce que comme il n'estoit pas yssu d'un legitime mariage, il n'y manquoit pas, qui luy rendist douteux le droit de la succession. Le Pere donc s'estant acheminé avec son compagnon vers le Roy, fut accueilly de luy fort honorablement, comme l'on apperceut en ce, que n'ayant accoustumé de se môstrer à ceux, qui le venoient saluer, sinon quelques iours apres leur arriuée, afin que le respect creust avec le temps; neantmoins si tost qu'il entendit la venue du Pere, il l'enuoya bien-veigner de sa part, & le manda incontinent venir à soy. Le Pere luy presente les lettres du Gouverneur, & quelques presens de choses de deuotion, comme quelques reliques ou Images des Saints, des grains benists, & autres choses semblables, qui furent tres-agreables au Roy, ainsi qu'il faisoit paroistre. Mais la venue ne luy fut pas moins profitable, car ayant depuis la mort de son pere iusqu'à lors, esté delaisé quasi de tous ses subjets, & comme mesprisé de ses propres parens, il s'estoit tenu renfermé dans sa maison, tant pour ne donner occasion aux meschans d'attenter sur sa vie, que pour se reseruer à vn temps plus propre, auquel avec le commun consentement des gens de bien, il fut couronné Roy. Mais incontinent qu'on eust sçeu que le Gouverneur d'Angola luy auoit escrit des lettres, par lesquelles il se conioüyssoit avec luy de son esleuement à la couronne, & luy offroit son secours contre ses ennemis, il y eust vn si grãd changement de volontés, que plusieurs des grands Seigneurs du Royaume vindrent de leur plein gré se conjoür aussi avec luy de la succession, & luy faire l'hommage, que iusqu'à lors ils ne luy auoient voulu rendre. Cependant la sœur du costé du pere, luy brassoit par dessoubz main quelque trahison: car elle fauorisoit plus à son autre frere, qui estoit lors absent, bien loing de là, & desiroit luy faire venir la couronne. Or elle auoit tellement aduancé les affaires d'iceluy par son autorité, & par ses remonstrances, que l'autre pensant ne trouuer aucun, qui luy resistast,

*Est non
moins
agreable
que pro-
fitable
au Roy.*

*Son frere
vient
contre
luy avec
grosse
puissance.*

s'en vint droit à la ville avec peu de gens, & arriva si soudain, qu'on entendit plustost sa venuë, que les nouvelles, qu'il deust venir. Ayant donc sçeu comme le Gouverneur d'Angola auoit escrit à son frere, il feit defençe à tous les Portugais, qui estoient en Congo, de ne prester aucun ayde ny secours à sondit frere Aluare : les menaçant, s'ils faisoient autrement, qu'apres qu'il auroit emporté la victoire (laquelle il se promettoit comme toute assurée & avec grande raison parlant humainement, veu le peu de gens & apprests de guerre qu'auoit Aluare) de les mettre tous au fil de l'espee, & de ruyner leurs Temples & Autels. Mais au contraire, le Roy Aluare sçachant, que Dieu est le Seigneur des armées, & en la main duquel gist toute la puissance & le droit des Royaumes, il s'adresse à luy par prieres, & rasehe au prealable de se reconcilier avec sa diuine Majesté, si par aduenture il n'estoit en sa grace, faisant vne bonne confession de ses pechés, puis il se munist de ce diuin bouclier & armure celeste du precieux corps de IESVS-CHRIST, qu'il reçeut avec grande deuotion. Cela fait il prie le Pere de la Compagnie, qu'il auoit aupres de soy, & tous les autres Prestres qui estoient en la ville, que le lendemain, auquel il falloit hazarder la bataille (c'estoit le premier iour du mois d'Aoust) ils offrissent à Dieu leurs Saerifices & Oraisons, pour impetrer la victoire de sa diuine Majesté en sa faueur. Puis il met entre les mains du mesme Pere tous les thresors, qu'il auoit en son Palais Royal, pour les garder, ou s'il arriuoit qu'il fut deffait & mis à mort, pour les employer en oeuvres pies. Apres cela il commence à pouruoir aux affaires de la guerre, & par ce qu'il sçauoit y auoir plusieurs en la ville mesme, qui fauorisoient à son frere, & luy tramoient quelque mal'heur (estant vne chose bien difficile, de tenir si secret le feu de tels attentats, sans que la fumée n'en sorte par quelque trou) & d'ailleurs ayant soupçon de quelques autres, qui estoient gens ruzés & malicieux, ausquels il ne se fioit pas beaucoup, il les mande venir tous en son Palais, & commence à leur parler en ceste sorte. Vous voyés comme mon frere foulant aux pieds, & renuersant, non seulement les loix du Royaume, mais encore le droit de nature, s'en vient en armes contre moy, son Roy, & son frere. Mais bien qu'il soit assés bouillant de soy, tant à cause de son aage, que pour l'enuie qu'il a de regner, si n'eust-il pas esté si audacieux, que d'attenter cela, s'il n'y eust eu en ceste mesme ville, quelques vns qui fomentent sa

Preparatiſi du Roy Aluare pour la guerre.

Haran-gue qu'il fait à ses vauſſaux.

*Traï-
sives
descon-
uerts,*

32 fureur. C'est icy, c'est icy dedans, & peut estre en ceste assemblée
 32 mesme, que sont ceux, qui combattent pour luy. Tellement que
 32 i'auray plus d'affaire à guerroyer contre mes citoyens propres,
 32 (si toutesfois ie dois ainsi appeller ceux, qui ne visent qu'à la rui-
 32 ne de leur Cité) que non pas contre mon ennemy (ainsi fait il
 32 que i'appelle mô frere, puis qu'il veut estre nommé de la sorte.)
 32 Vous sçaués bien qu'avec le consentement de mon feu pere, le-
 32 quel en mourant me laissa la Royauté avec tant de fatigues, vous
 32 me prestastes le serment de fidelité, comme à vostre Prince & le-
 32 gitime successeur de mon pere en la couronne. C'est vous mes-
 32 mes, qui m'avez iugé digne de la Royauté, biē que ie ne la pour-
 32 chassasse point, ny ne là desirasse; mais ie l'acceptay seulement
 32 me fiant en vos promesses, & aux choses presentes, ne sçachant
 32 ce qui deuoit aduenir: soit que vous fissiez cela, ou pour la crain-
 32 te que vous auies de moy, ou pour cōseruer la memoire de mon
 32 feu pere. Maintenant il en y a plusieurs, lesquels ou pour l'haïne,
 32 qu'ils me portent, ou pour le desir, qu'ils ont de quelque nouuel-
 32 leté, & changement es affaires, ou bien pour quelques autres re-
 32 spects de plus grande consideration, s'oublians de leur serment
 32 de fidelité, bien que selon le corps ils demeurent avec nous dans
 32 la ville, sont neautmoins dehors; & bataillent contre nous d'affec-
 32 tion. Or afin qu'ils soient du tout avec les ennemis, & d'esprit
 32 & de corps, esloignés de la compagnie de ceux, qui me sont fi-
 32 delles & bons seruiteurs, de peur aussi qu'ils ne les gastent, ie leur
 32 donne entier pouuoir de se retirer, ou ils voudront. Quant à moy
 32 i'ay resolu, non point appuyé sur les forces humaines, mais sur
 32 le diuin secours, & sur la justice de ma cause (biē que ie sçay aus-
 32 si, que la prouesse inuincible des Portugais ne me manquera pas)
 32 ou de regner justement en ce lieu, apres auoir deffait l'ennemy,
 32 & mis en fuytte les rebelles, ou de mourir pour la deffence de
 32 mon droit, si Dieu le veut ainsi. Mais i'ay plus d'esperance, que
 32 i'emporteray la victoire, & qu'aussi tost que i'auray fait voir
 32 mon armée à l'ennemy (ores qu'il soit bien assorty de toutes pie-
 32 ces) il tremblera de peur, & s'enfuyra à vauderoute. Car c'est la
 32 coustume des plus audacieux, que lors qu'ils ont le vent de la
 32 prosperité en poupe, ils ne tiennent compte de ceux qu'ils esti-
 32 ment plus foibles; & pour ce bien souuent ils demeurent vain-
 32 cus d'iceux. Mais au contraire ceux là, qui durant l'aduersité sou-
 32 stiennent l'effort des afflictions, & ne perdent point courage en
 icelles,

*Belle
resol-
ution
d'un
Prin-
ce.*

icelles, appuyés sur l'esperance de quelque bon-heur, viennent au dessus de leurs entreprises, & font admirer leur vertu. Celuy-là combat avec prou d'assurance, qui a la justice de son costé. Ceste harangue ayant esté proferée avec grande majesté & auctorité, esmeut tellemēt tous les assistans, que plusieurs de ceux, qui estoient de la conjuration, se jetterent aux pieds du Roy, & luy demanderent pardon, promettans de reparer la faute qu'ils auoient faicte, au peu de loyauté qu'ils luy auoient gardée, & de l'effacer avec vne ferme & resoluë deliberation de bien combattre, & de mourir à ses pieds, plustost que de luy estre vne autrefois contraires. Leur promesse ne fut pas vaine; car il n'y eut personne, qui sortist de la bataille (laquelle se dôna le lendemain apres) sans estre blessé. Combien que ce ne fut pas tant par la vaillance des ennemis, que par la desloyauté de ceux, qui se disoient amis. Car ils estoient encore demeurez plusieurs dans la ville, qui tenoient le party contraire: & lors qu'on combattoit, bien qu'ils fussent du costé du Roy, ils se tenoient neantmoins derriere, & tiroient force coups de fiesche à luy & à ses gens: tellement que le Roy & ceux qui estoient avec luy, sentoient visiblement leurs forces s'affoiblir, & le courage accroistre aux ennemis, sans se prédre garde d'ou leur venoit le mal. Par deux fois les troupes du Roy furēt mises en fuytte, & autant de fois elles se r'allierent, tournant visage à l'ennemy, soit que la honte ou le desespoir les contraignit à ce faire. Finalement ils en vindrent à telle extremité, qu'ils ne sçauoient à quoy se resoudre. Car d'un costé ils se sentoient avec vn bon courage, mais de l'autre ils se voyoient presque accablez, à raison des blessures que tous quasi auoient reçu. Là dessus le frere du Roy, chef du contraire party, ennuyé d'vne si longue bataille, & ne pouuant endurer que ses esperances fussent tant retardées, cherchoit des yeux & de la voix le Roy Aluaro, l'appellant au combat seul à seul. Il ne fut pas long tēps en ceste peine. Car il le trouue aux premiers rangs de son armée, combattant vaillamment, & se donnant bien à cognoistre, tant par son habit Royal, que par le sang qui decouloit de ses playes, ayant esté desia blessé en plusieurs endroiçts de son corps, combien que pour cela il ne quittoit pas la place. L'ayant donc apperceu de loing, il tire droit à luy avec son espée traicte, sans faire cas ny des coups de fiesche, ny des arquebuzades que luy tiroient ceux, qui estoient aupres du Roy; lequel ne refuse

*Efficace
de l'harangue.*

*Traistres
couverts
plus d'au-
gers
qu'ennemis
ouverts.*

*Duel des
deux
chefs
d'armes.*

pas le duel, bien qu'il semblaſt fort ineſgal; parce que l'autre eſtoit plus grand & plus robuste de corps, & n'auoit aucune bleſſure ſur iceluy, ains venoit avec ſes forces entieres, tout enflammé de cholere, & enſlé de la proſperité de ſes affaires, penſant mettre bien toſt fin à la vie de ſon frere, & par ce moyen arriuer à ce qu'il pretendoit. Mais le Roy Aluaro appuyé ſur le diuin ſecours, plus que ſur ſes forces, ayant neantmoins vne grande eſperance de la victoire, & armé d'un merueilleux courage, ne reſuſe pas le duel. S'eſtans enuiſagez & approchez l'un de l'autre, voicy que le frere du Roy tout forcené de rage hauſſé le bras, pour donner vn grand coup d'eſpée à ſon ennemy, penſant avec ce le jeter par terre tout roide mort. Mais tandis qu'il leuoit le bras, il deſcouure le coſté au Roy, lequel parant le coup que l'autre luy tira avec ſon bouclier (qui fut mis en deux pieces, & ſa main vn peu bleſſée) il luy paſſe l'eſpée à trauers le corps, & le porte par terre, ou il finit toſt apres la vie. Les ennemis ayant ſçeu la mort de leur chef, ſe mettent ſoudain en fuytte. Mais cela ne leur ſeruit de rien. Car on auoit deſia faiſi toutes les aduenues, par ou ils pouuoient paſſer, ſi qu'il en y eut bien peu, qui ſe ſauuaſſent. Le Roy rentrant victorieux dans la ville, le Pere de la Compagnie, qui auoit eſté durant la bataille touſiours en oraiſon dedans l'Egliſe, entendant ces nouuelles, luy va au deuant, pour ſe conjoindre avec luy d'une ſi heureuſe victoire. Le Roy l'embraſſe fort humainement, & s'en va de ce pas avec luy premierement à l'Egliſe de S. Iacques, puis à celle de S. Antoine, pour rendre graces à Dieu d'un ſi grand benefice; & apres cela il ſe retire en ſon Palais pour ſe faire penſer. Mais auant ce il ordonna qu'on baſtit vne Eglife au lieu ou ſon frere auoit eſté tué. Et non content de ce, ſoudain qu'il fut guery de ſes playes, afin que l'Egliſe ſe commençast au pluſtoſt, il alla luy meſme avec ſa fuytte au lieu, ou l'on railloit les pierres: & n'eſtima pas indigne de la Maieſté Royale, d'en charger ſur ſes eſpaules, & les porter là ou on debuoit baſtir l'Egliſe: imitant en cela pluſieurs autres Roys & Princes Chreſtiens, & incitant par ſon exemple ſes ſubjets à faire le meſme. Et de fait le lendemain la Royne avec toutes ſes Dames en firent autant, & pareillement tous les Gentils-hommes Portugais de ſa Cour. Telle donc fut l'iſſuë d'une guerre ſi perilleuſe, & de laquelle depédoit beaucoup la manutentiõ de la foy en ce Royaume. Quelque temps apres le Pere de la Compagnie, qui eſtoit

*Le Roy
Aluare
ſue ſon
frere.*

*Puit ba-
ſtir vne
Egliſe
au lieu
ou il l'a-
uoit tué.*

avec le Roy, voulut s'en retourner à Loanda, estant appelé par son Supérieur, mais le Roy ne le luy vouloit pas permettre, desirant fort l'auoir tousiours auprès de soy : toutesfois voyant qu'il ne le pouuoit retenir par force, il le congédia fort humainement; moyennant l'esperance que le Pere luy donna, ou de retourner en brief luy mesme, ou de faire en sorte que quelqu'autre de la mesme Compagnie y fut enuoyé à sa place. Or quand il s'en alla le Roy le pourueut fort liberallement de viatique, & si donna encore la valeur de mille escus d'aumosne pour la maison de Loanda. Mais le plus important fut vn Edi&ct, qu'il fit en faueur des Peres, de la teneur qui s'ensuyt. Dom Aluaro par la grace de Dieu, Roy de Congo, &c. Je fay sçauoir à tous ceux, qui verront ces presentes, qu'ayant esgard au grand seruice, que les Peres de la Compagnie de Iesus, residans à Loanda, font à Dieu, & aux amies de mes vassaux, qu'ils ont conuertty à nostre S. Foy, tant en ladi&cte Isle de Loanda, que en Corimba, & autres endroits de mon Royaume; considerant aussi la bonne doctrine, qu'ils enseignent au peuple, & qu'ils ont esté enuoyés à cest effect par le Roy de Portugal, i'entens, que sans autre mien congé, ou d'autre personne quelconque, ils ayent pouuoir de prescher, dresser des Croix, & des Eglises, par tout mon Royaume, sans que personne les en empesche. Et en outre ie veux, que tous les passages des riuieres leur soient francs & libres; afin que ny eux ny les gens de leur seruice, ne payent aucuns droits : & qu'ils ne soient point empeschez, quand ils voudront couper du bois, pour leurs Eglises ou maisons, en quelle part que ce soit. Ains i'ordonne à tous mes vassaux, & particulierement aux Mocolutes, auxquels appartient le soin desdictes riuieres, & païs, qu'ils fauorisent en tout & par tout lesdits Peres. Et lors qu'ils voyageront, preschât, confessant, & enseignant la doctrine, qu'on les pouruoie de ce qui sera necessaire, pour leur entretien & de leurs gens : puis que pour l'exercice desdits ministeres, ils ne recoiuent aucune recompence temporelle. Fait en ceste mienne cité du Sauueur le 7. Iuillet 1587. Voyla l'Edi&ct du Roy de Congo, & ce que nous auons peu trouuer de ce Royaume iusqu'à present: parlons maintenant de celuy d'Angola.

Edi&ct du Roy en faueur des Peres de la Compagnie.

*Du Royaume d'Angola, comme les Portugais s'y sont installez,
& la foy Chrestienne y a esté plantée.*

CHAPITRE VI.

*Le Roy-
aume
d'Ango-
la pour-
quoy
ainsi
nommé.*



*Bornes
du Roy-
aume
d'Ango-
la.*

*La chair
de chien
y est fort
estimée.*

LE Royaume que les Portugais appellent maintenant Angola, est situé par delà celui de Congo, vers le Sud. Les habitans de ce pais se nommoient jadis Ambôds, & la contrée Ambonde : laquelle estoit diuisée en plusieurs Prouinces, qu'ils appelloient Mirindes, gouvernées par diuers Seigneurs, qui se nommoient Sobas, lesquels estoient propriétaires, & comme Souuerains chascun de sa Prouince, combien qu'ils recognoissoient tous le Roy de Congo. Mais depuis cent ou six vingts ans, l'un de ces Sobas appelé Angola, qui fust depuis surnommé Inéne, c'est à dire grand, estant assisté de quelques Portugais, qui estoient allez trafiquer en sa Mirinde, se mit à faire la guerre aux autres Sobas ses voisins, & les ayant surmontez l'un apres l'autre, leur imposa certain tribut, moyennant lequel il leur laissa la iouissance de leurs Mirindes ; & de ceste sorte il dilata merueilleusement son domaine. De là est venu que les Portugais ont, depuis ce temps là, appelé ce pais ou il commande, le Royaume d'Angola. Il confronte du costé de Septentrion, avec celui de Congo, auquel jadis il appartenoit ; d'Occident à la mer Oceane ; du Midy au Royaume de Mataman, qui est plein de minieres de cristal, & de diuers metaux ; finalement du costé d'Orient, il aboutit au Royaume de Malemba. Le Pais d'Angola est tres-riche en minieres d'argent, & tres-fertile en viures & animaux. Il y a sur tout grande quantité de bœufs & de vaches. Mais la plus delicate viande que les naturels estiment c'est la chair du chien : tellement qu'ils en nourrissent tout exprés grãde quantité, & les font engraisser comme l'on fait icy les chappons, pour s'en seruir és banquets & festins, comme d'une viande la plus delicate du monde. On y a veu vendre un chien de la grandeur des dogues d'Angleterre deux cens vingt escus : car il fust troqué avec 22. esclaves, dont chascun valloit pour le moins dix escus. Leur langage est fort semblable à celui des Congians, combien qu'en la prononciation il soit un peu different, tout ainsi que celui des Portugais & des Espagnols : neantmoins ils ne s'entendent gueres bien les uns les autres. Ce Royaume est fort

peuple, à cause qu'un chacun selon la coustume du pais, peut tenir autant de femmes qu'il luy plaist. Le Roy assemble en peu de temps iusques à cent mille hommes de guerre. Les armes, dont les habitans se seruent, sont quasi les mesmes, que celles des Cōgians; à sçauoir vn arc, des fleches, & vn poignard. Ils sont tous pietons, à cause qu'ils n'ont pas l'industrie de dompter les cheuaux, ou autres bestes semblables. Quand ils combattent, ils s'eslargissent autant qu'ils peuuent, afin de tirer mieux de l'arc, & se garantir des fleches des ennemys, courans çà & là. Quand ceux qui tiennent les premiers rāgs sont las, on sonne la retraicte pour ceux-là: & en leur place succedent d'autres tous fraiz. Ce qu'ils continuent de faire iusqu'à ce que toute l'armée est prestē à choquer. Ils ont des enseignes ou estendars, comme nous; non pas des trompettes ny de tambours de nostre façon: combien qu'ils font des tambours de l'escorce d'un arbre caué, y mettant par dessus vn cuir, lequel ils battent avec des maillets d'yuoire. Mais en guerre ils se seruēt de plusieurs autres sortes d'instrumēts, pour encourager les soldats au combat. L'un est de certains cymbales de bois, qu'on sonne à la façon de nos trompettes, rendans vn son fort horrible. L'autre est faict en forme de Pyramide renuersée: & tout autour il y a force petits cercles ou anneaux de fer, qu'ils frappent à certaines mesures avec des bastons de bois. Ils ont en fin vn grand nombre de cornets tant petits que grands, lesquels ils font de dens d'elephant caües, & perçees d'un costé, à guise de nos fleutes, lesquelles rendent par ce moyen vn son harmonieux & belliqueux. Tout chef d'armée doit auoir grande quantité de ces instrumens militaires: car s'il faut donner le signal de la bataille à toute l'armée, il faict sonner avec les plus gros; si à vne partie seulement avec les moindres, ou plus grāds, ou plus petits, selon que la troupe est grande, ou petite: de maniere que chascue bande de soldats a son signal propre, & le General de l'armée en a autant pres de soy, qu'il y a de bandes. Or quand il en veut faire marcher quelqu'une, il fait sonner le signal propre à icellē: & soudain ceste bande luy respond avec le sien, pour monstrier qu'elle est prestē à marcher. A la premiere pointe ils mettent les plus lestes & agiles, & ceux-cy portent de petites clochettes attachées à la ceinture, avec lesquelles ils donnent courage à eux mesmes, & aux autres encore. Les Capitaines portent des petits bonnets avec des pennaches de plumes de diuers

*Le grād
nombre
de peu-
ple qu'il
y a.*

*Instru-
mens
qu'ils
ont pour
donner
le signal
de la ba-
taille.*

*Accou-
sirement
& ar-
meure
des Ca-
pitaines.*

oyseaux, comme d'austruches, de paon, & de coq. Ils couvrent la poitrine avec des chaînes de fer, qui leur pendent des espaulles, & les vont prendre par dessous les aisselles, d'un costé & d'autre, tellement qu'elles se croisent au milieu de la poitrine. Et tant plus que ces chaînes sont grosses, tant plus braues s'estiment-ils. Les anneaux d'icelles sont d'ordinaire de la grosseur du petit doigt de la main d'un homme mediocre. Ils portent des hauts de chausse, qui leur vont iusques au genouil, & par dessus ils ont vne casaque qui leur arrive au gras de la jambe. Mais ils attachent les deux bouts de deuant à la ceinture. Tous les autres soldats ne sont couverts, que depuis le nôbril iusqu'au genouil, le reste demeurant tout nud. Le Roy n'entre jamais en bataille: mais il donne la charge de conduire l'armée à quelqu'un de ses Capitaines. Si le General vient à estre tué, ils se mettent tous en

*Le Roy
fait al-
ler à la
guerre
sous
eux qui
peuvent
porter les
armes.*

fuite. Quand le Roy leue vne armée, il fait aller à la guerre ou de gré, ou par force tous ceux, qui peuvent porter les armes. Or comm' ils sont en si grand nombre, & n'ont point des bestes de voiture, ils ne peuvent porter de viures qui soyent suffisans pour long temps: d'où s'ensuit, qu'ils ne peuvent faire la guerre loing de leur maison, & s'ils font autrement, apres auoir despêdu toute leur prouision, ils sont contraincts de s'en retourner à leurs logis, à demy morts de faim, & bien souuent plusieurs demeurent par les chemins, accablés de pauvreté & de misere. Ils ont grande croyance aux augures, comme jadis les Romains: car s'ils voyent des oyseaux voler du costé gauche, ou faire des crys espouventables, ils s'en retournent à leur maison sans rien faire, encore qu'ils eussent bonne enuie de combattre, tenans cela pour mauvais augure.

Iadis le Roy de Congo estoit Seigneur de ce païs, & tous les Sobas le recognoissoient pour leur Prince Souuerain; mais depuis que c'est Angola Inéne, duquel nous auons parlé au commencement, eust subiugué tous les Seigneurs de ces quartiers, il s'y surpa l'auctorité souueraine, & est maintenant quasi aussi puissant, que celui de Congo. Auquel neantmoins il paye quelque fois certain tribut: mais c'est à sa volonté, de façon que quand bon luy semble, il ne le paye pas, ne se souciant guere d'estre son amy ou ennemy. Les Portugais trafiquent en ce païs d'Angola seulement en esclaués, qu'ils emportent par apres au Bresil, pour ayder à faire le succte, ou en Portugal, ou bien en d'autres lieux, es-

*Trafic
des Por-
tugais à
Angola
est en es-
claués.*

quels ils ont des minieres d'or ou d'argent, pour les y employer. Mais bien que tous les ans on en tire vn grand nombre, si est-ce qu'il en y reste tousiours autant ou plus, encore qu'il en meure beaucoup és guerres, qu'ils se font les vns aux autres, ou contre les Portugais: car ils multiplient merueilleusement, tant à cause de la pluralité des femmes, que pour estre en pais chaud & humide. Ce trafic des Portugais n'est gueres assuré pour la conscience, car bien souuent ceux qu'on leur vend, ne sont pas serfs, ains de condition libre: mais ils ont esté ou desrobbez, ou iniustement redigez en seruitude. Et pour entendre mieux cecy, il faut sçauoir, qu'en chasque Mirinde ou Prouince d'Angola, il y a quatre sortes de gens. La premiere est de ceux qu'on appelle Mocotas, qui sont les Gentils-hommes du pais, & par conséquent de condition libre. La seconde est de ceux, qui sont yssus des naturels & originaires de ceste Mirinde, lesquels pour ceste cause on appelle les enfans de la Mirinde, & ceux-cy sont ou artisans, ou laboureurs, mais tous de condition libre. La troisieme est d'autres qu'on nomme Quisicos, lesquels à proprement parler sont les serfs & esclaves de la Mirinde, qui sont comme annexez au patrimoine du Seigneur d'icelle, & partant viennent au successeur de l'estat, comme les autres biens patrimoniaux: Ceste façon d'esclaves est fort ancienne parmy eux, de façon qu'il n'y a point de memoire de son origine. La quatrieme sorte est d'autres esclaves qu'ils appellent Mobicas: & ce sont ceux, que les Sobas ou Seigneurs, & les autres particuliers acquierent ou par droit de guerre, ou par achapt, ou d'autre façon. Ceste espece aussi est fort ancienne parmy eux, dont mesme ils se seruoient auant que les Portugais allassent trafiquer en ce pais là. Or ceux qui ont plus d'esclaves, sont estimez plus riches, à cause qu'ils s'en seruent, tant pour le labourage de leurs terres, que pour les autres menageries, voire mesmes pour achepter ce qui leur fait de besoin, troquans ces esclaves avec les choses qu'ils desirent auoir. Les peres mesmes ont accoustumé de vendre leurs enfans, encore qu'ils soyent grands Seigneurs, principalement s'ils les ont engédrez des esclaves: d'ou vient que les Portugais ont bien souuent des serfs qui sont fils ou parens des Sobas. L'on vend aussi les filles, quand on les marie, à celuy qui les espouse, lequel baille au lieu d'icelles ou des esclaves, ou des boeufs, ou autres telles choses, de façon qu'en ce pais là les hommes acheptent les

*Quatre
sortes ou
conditions
de gens
entre les
Angolais.*

La servi- tude de plusieurs Angoläs inuiste. femmes qu'ils veulent espouser. Ceux qu'on prend en guerre sont redigez en seruitude, & bien souuent contre tout droict & raison : car ces Sobas ne se font la guerre d'ordinaire, que pour aggrandir leur estat. Plusieurs aussi de la premiere & seconde sorte sont faits esclaves, maintes fois pour des fautes bien legeres, ou bien pour celles, que commettent leurs parens. Car si le Soba conçoit le moindre soupçon du monde, que quelqu'un de ses vassaux luy veut faire du tort, ou qu'il vueille ayder son ennemy en guerre, non seulement il fait tuer ou rend esclave celuy là, mais encore tous les parens d'iceluy, & ceux qui luy appartiennent en quelque façon que ce soit. Mais la plus grande iniquité de toutes est, qu'on ne fait aucune information, si le delict est vray ou faux, mais on croit à ce que le Soba en dict, ou à vn seul tesson qui l'asseure. Que s'il y a aucun, qui descouure la verité du fait, contre le tesmoignage du Soba, il est incontinent tué, ou rendu esclave, avec tous ceux qui le touchent de parenté.

Loix & coustumes des Angoläs fort iniques. Outre ce ils ont des loix qui sont fort iniques, & iniustes : car le Roy seul ayant pouuoir de nourrir des Paons, & en tenant grand nombre a fait vne loy, que quicunque en osteroit vne seule plume, seroit tué ou rendu esclave avec tous ses parens, & ses biens confisque. D'auantage il a ordonné, que quiconque touchera à certaines courges, qu'il tient pendues à ses Palmes, pour recueillir le vin qui en decoule, soit puny de la mesme peine, avec tous les siens. Brief il y a en ce pays plusieurs coustumes aussi cruelles & iniques, que les loix qu'auons dit : car si quelqu'un venant à deceder, laisse le moindre debte que ce soit au Soba; soudain il fait saisir tous ses enfans, & les prend pour esclaves; encore qu'ils valent beaucoup plus, que ce qui luy est deu. On dict aussi, qu'il y a vne certaine contrée, ou l'on vend publiquement la chair humaine, comme icy celle de bœuf ou de mouton; que si l'on ne peut vendre vn esclave aussi cher qu'on le vendroit à la boucherie, ils ayment mieux le tuer & mettre en pieces, pour seruir de viande, que le bailler tout vif à plus vil prix : si que bien souuent pour peu de chose l'on massaere les hommes; Cruauté & inhumanité du tout barbare. Ces choses & plusieurs autres, que nous dirons cy apres, ont esté sceues par le rapport des Portugais, qui trafiquent là ordinairement, & des Peres de la Compagnie de Iesvs, qui y sont enuoyez pour procurer le salut des ames de ces barbares, desquels l'ayant appris le P. Louys de Molina de la
mesme

mesme Compagnie, l'un des plus doctes & graues autheurs de nostre siecle, les rapporte en son œuvre de *Iustitia & iure*. Mais cest assez parlé de cecy : voyons maintenant en quelle façon les Portugais ont estably leur puissance en ce Royaume.

Après que le Roy de Congo se fut rendu Chrestien, les Portugais desirans trafiquer en son estat, alloient terrir à divers ports d'iceluy. Entre autres il en y eut quelques vns, qui aborderent à

l'Isle de Loanda, qui est à 9. degrés & demy de latitude Australe, près du riuage de Congo, sur l'emboucheure de deux riuieres qui en sortent, dont la plus Septentrionale s'appelle Bengo, & la plus Meridionale Coanza. Et ceste-cy diuise maintenant les terres du Congo avec celles d'Angola. L'Isle de Loanda, bien que assés petite, est neantmoins fort riche & bien peuplée, tant à cause des coquilles, qui seruent en lieu de monnoye par tout le Royaume de Congo, lesquelles se peschent icy, comme a esté dit cy dessus, que pour l'abondance des viures, & mesmemēt de bestail, qu'il y a. Car on y trouue de grands troupeaux de cheures, de brebis, & de sangliers, qui se nourrissent dans les bois. Et par toute la coste grande abondance de poisson, principalement de sardines, lesquelles sautent de l'eau, & couurent quasi tout le riuage, mesmes en hyuer. L'on y compte sept villages ou bourgs, que les habitans appellent Libatas, dont le principal est à present nommé par les Portugais du S. Esprit, & icy demeure le Gouverneur ou Lieutenant du Roy de Congo. Le principal port de ceste Isle est au Septentrion, large d'un demy quart de lieuë, & fort profond. Près d'iceluy estoit jadis vn bourg ou les Portugais habitoient avec leurs familles : mais à present ie pense que c'est la ville de S. Paul : en laquelle il y a maintenant vne maison de Residence, pour les Religieux de la Compagnie de IESVS, qui y sont depuis l'an 1578. comme nous dirons cy apres.

Or quand les Portugais commencerent à trafiquer en ceste Isle de Loanda, s'estans pris garde que la riuere de Coanza estoit nauigable avec des petites barques, biē loin de son emboucheure, ils alloient souuent contre mont, pour negocier avec les peuples qui habitent sur l'une & l'autre riuē, & quelquefois pénétroient plus auant dans la terre ferme, pour aller vendre leurs dērées, & acheter des esclaves : tellement qu'ils furent à la Cour d'un de ces Sobas, qui s'appelloit Angola, & luy firent beaucoup

Molina de Iustitia & iure tract. 2. disp.

Isle de Loanda & sa fertilité & richesse.

Comment les Portugais commencent d'auoir alliance avec le Roy d'Angola.

de seruices. Car avec leur ayde & secours il subiuga plusieurs autres Sobas ses voisins, & se rendit maistre absolu de ceste cōtrée, qui se dit maintenāt Angola du nom de cestuy-cy. Mais comme apres cela les Portugais, qui l'auoient secouru en ses conquestes, se fussent retirez, partie en leur païs, partie en l'Isle de Loanda, luy voyant qu'il ne pouuoit les retenir en son Royaume, sans

*Le Roy
d'Ango-
la dem-
de des
Prestres
de pour-
quoy.*

qu'ils eussent des Prestres pour l'exercice de leur Religion, en-
uoya demander au Roy de Portugal quelques gens d'Eglise, luy
faisant entendre, qu'il desiroit grandement se rendre Chrestien.
Le Roy pensant que ce Prince y marchast de bon pied, y fait al-
ler quelques Prestres, tant de Portugal, que de l'Isle de S. Tho-
mas : & entre autres vn Pere de l'ordre de S. Bernard. Mais parce
que ce barbare ne pretendoit autre chose par ceste voye, que
maintenir le trafic des Portugais en ses terres, & se preualoir de
leur secours en ses guerres, ne se souciant pas beaucoup du salut
de son ame, il ne s'ensuyuit aucun profit de cela. Tellement que
les Prestres, qui y estoient allez, ou moururent là, ou s'en retour-
nerent en Portugal, sans auoir rien aduancé en la conuersion, ny
de luy, ny de ses vassaux. Combien qu'ils y laisserent les Calices,
& ornemens sacrez, dont on se sert en celebrant la Messe, peut
estre par le commandement du Roy barbare, pensant qu'il en re-
couvreroit plus aisément d'autres par ce moyen, ou pour sa con-
uoitise, & le desir qu'il auoit de ces choses. Quoy qu'il en soit, on
les trouua apres chez luy. Mais voyant avec le temps, que les
Portugais ne venoient plus en ses terres, & qu'il ne pouuoit plus
s'ayder d'eux, ny s'agrandir d'auantage par leur moyen, il destine
de rechef quelques autres Ambassadeurs vers le Roy de Portu-
gal, qui estoit lors Iean III. enuiron l'an 1560. pour le prier avec
toute l'instance qui se pouuoit faire de l'obliger tant que de luy
faire venir en son Royaume quelques Prestres, pour l'instruire
luy & ses vassaux en la loy du vray Dieu, l'assurant qu'il estoit
resolu d'embrasser la foy de IESVS-CHRIST, & de faire en sorte
que tous ses subjets la suyussent. Et pensant l'esinouuoir encore
d'auantage à luy oſtroyer ce qu'il demandoit par l'esperance du
profit temporel, il luy fait offre des minieres d'argent qu'il y a
en son Royaume, & qu'on dit estre tres-riches, luy donnant tout
pouuoir d'en tirer ce qu'il luy plairoit : & avec ce d'achepter en
son Estat tous les esclaves que luy ou les Portugais voudroient.
Le Roy Iean ayant receu ces Ambassadeurs avec grand honneur

& courtoisie, les despecha bien tost & à leur gré. Car il leur bailla quatre Peres de la Compagnie de Iesus, pour satisfaire au desir que le Roy disoit auoir d'estre instruit en la foy Chrestienne. Outre ce il luy enuoya vn Ambassadeur de sa part, qui fut vn fort honnestes & braue Gentil-homme nommé Paul Diaz Nouais, nepueu ou petit fils de ce tant fameux Capitaine Barthelemy Diaz, qui descouurit le premier (il y a plus de cent & dix ans) le cap de bonne esperance.

Le Roy de Portugal Jean 3. luy enuoya 4. Peres de la Compagnie. Paul

Les Peres estans arriuez avec les Ambassadeurs audit pais, trouuerent que celuy, qui auoit enuoyé ceste Ambassade, à scauoir Angola Inene estoit mort: mais son fils nommé Dambi Angola regnoit en sa place; & pource ils s'acheminèrent vers luy, comme successeur, & tenant le lieu de son pere. Il reçeut l'Ambassadeur du Roy de Portugal, & les Peres, en sa ville Royale nommée Cabaça, avec grand honneur, & beaucoup d'affection, à ce qu'il sembloit. Toutesfois quelque temps après poulsé & incité de son inconstance & auarice, comme il sceut que l'Ambassadeur & les autres Portugais de sa suytte, auoient apporté force marchandises, pour troquer avec des esclaués, qu'ils en vouloient ramener en Portugal, il s'vsurpe & s'approprie tout cela, disant qu'il le leur vouloit payer en esclaués. Comme il fist aussi, mais cauteleusement. Car il les leur osta depuis, non tant pour desir, qu'il eust de r'auoir ses esclaués, que pour empeschier leur retour en Portugal. Brief il les despouilla de tous leurs moyens, dont plusieurs moururent là de tristesse & d'ennuy, mais quelques autres estant eschappez de ses mains, se retirèrent aux nauires qui estoient au port de Loanda, cōbien qu'il retint l'Ambassadeur & deux Peres de la Compagnie contre leur gré, esperant qu'à ceste occasion les Portugais viendroient plus volōtiés trafiquer en son Royaume. Les autres deux Peres moururent bien tost apres qu'ils furent arriuez en ce pais, à cause de l'interperature de l'air, & plusieurs autres incommoditez, qu'ils enduroient, & beaucoup de Portugais encore: si que fort peu de ceux, qui estoient allez là, s'en retournerent à leur pais. L'Ambassadeur & ces deux Peres avec quelques autres Portugais, qui estoient là arrestés, tascherent biē par tous moyes, & mesmes par l'entremise du Roy de Portugal, de sortir hors de là. Mais ce fut tout vn long temps sans aucun effect. Neantmoins ils firent tant en fin, que ce Roy barbare permit à l'Ambassadeur, & à l'vn des

Diaz Nouais Ambassadeur du Roy de Portugal, vers celuy d'Angola.

Est retenu par force à Angola avec les Peres de la Compagnie.

Est deliuré de captiuité.

Peres, de s'en retourner en Portugal, laissant là comme pour ostage l'autre Pere. Car ils luy firent entendre, que s'ils alloient en Portugal, ils playderoient si bien sa cause deuant le Roy, qu'ils obtiendroient de luy tout ce qu'il souhaittoit. Ce qui fut cause que le barbare emmiellé de ces douces parolles les en laissa aller. Mais en ces entrefaictes, l'autre Pere, qui estoit demeuré là pour ostage, nommé François Gouea, ennuyé d'un si long & si fascheux exil ou iniuste detention, trespassa.

A charge du Roy de Portugal D. Sebastien d'aller venger l'iniure faite aux Portugais par l'Angolain.

Quand il y procede.

Depuis Paul Diaz ayant commission du Roy Sebastien l'an 1578. d'aller venger l'iniure, que ce Roy barbare auoit fait à la couronne de Portugal, il amassa beaucoup de soldats, qui le suivirent volontiers, à cause du bruit, qui couroit pour lors, & accouru depuis encore d'avantage, qu'en ce Royaume là y auoit force mines d'argent. L'on donna vne instruction à Paul Diaz, dressée par ceux, qui auoient charge d'examiner les choses qui concernoient la conscience du Roy: laquelle il deuoit suivre, auant que faire la guerre au Roy d'Angola; & si elle a esté suivie, l'on ne scauroit demander vne plus iuste cause de le guerroyer. Avec Paul Diaz furent aussi enuoyés quelques autres Peres de la Compagnie, pour entendre les confessions, tant du chef de l'armée, que des soldats. Et depuis tousiours iusqu'à present, il en y a eu quelques vns, pour mesme effect, qui ont aussi conuertie à la foy Chrestienne beaucoup d'originaires du pais, comme nous dirons cy apres. Or estant ledit General avec son armée arriué en l'Isle de Loanda, il s'arresta là pour quelque temps, & entendant que Dambi Angola, celuy qui auoit fait ceste iniure estoit mort, & qu'un sien nepueu ou petit fils appelé Quilonge Angola regnoit en sa place, il luy enuoya vn magnifique present, & luy feit scauoir, qu'il auoit eu charge de le donner au nom du Roy de Portugal, à son ayeul Dambi Angola, avec la responce des lettres, qu'il luy auoit escrites: mais qu'ayant entendu qu'il regnoit en sa place, il les luy enuoyoit comme à son successeur. Avec ce present & autres plaisirs, que Paul Diaz feit à ce Roy, il renoia derechef l'ancienne amitié & alliance avec luy, & tous ses vassaux: tellement qu'il aydoit & secouroit le Roy, quand il faisoit la guerre à quelqu'un de ses Sobas. Cecy dura plus de quatre ans, sans qu'il y eust aucune iniure receuë ny donnée d'un costé ou d'autre, ains se faisoient mutuellement plusieurs bons offices. Mais au bout de ce temps-là, le Roy d'Angola ayant esté

aduerty, qu'on apportoit à la ville de Cabaça (ou il tiét sa Cour) grande quantité de marchandise venue de Portugal en treize ou quatorze nauires, & que tant seulement vne trentaine ou quarantaine de Portugais la conduisoient, comme ces barbares sont merueilleusement auides & conuoiteux de telles denrées, il fust si espris d'auarice qu'il feist massacrer par les chemins, comme quelques vns escriuent, tous les Portugais, qui menoyent la marchandise, & se l'appropriâ à soy mesme. Toutesfois il en y a qui disent que pensant ne pouuoir pas venir à bout de tous ces Portugais estans ensemble, apres qu'ils furent arriuez à sa ville avec leurs denrées, il seignit auoir guerre en diuers endroiets, les priât de luy vouloir assister, & de ceste sorte il en enuoya dix de ça, quinze de là, & ainsi du reste, iusqu'à ce qu'il les eut tous separez: & lors il commanda à ses gens de les mettre tous à mort, comm' ils firent. Quoy qu'il en soit le Roy estoit autheur de ce massacre, & pour coulourer sa meschanceté, il dit que c'estoient des espions, & que sous pretexte de vendre leur marchandise, ils estoient venus tout exprés, pour le meurtrir; afin que le Royaume estant en trouble, les autres Portugais, qui estoient à Loanda, & n'attendoient que l'occasion, enuahissent son Estat. Mais ce n'estoient que des bayes. Car il estoit aisé à voir, qu'une poignée de gens, comme ils estoient, n'eust sceu mettre en effect vne telle entreprise, mesmes estans au milieu du Royaume, enuironnez de toutes parts des vassaux du Roy. Doncques la vraye cause fut l'insatiable auarice de ce barbare. Lequel non content d'auoir fait tuer ces pauures Portugais, & enuahy leurs marchandises, commence à faire la guerre au Capitaine Paul Diaz. Luy voyant vne si grande desloyauté & meschanceté, delibera de se deffendre, & de venger l'iniure faicte à toute sa nation. Si qu'il amasse promptement tous les Portugais, qu'il peut trouuer en ces quartiers, & les met dans deux galeres, qui estoient siennes, & dans quelques autres vaisseaux, qu'il y auoit au port de Loanda. Avec ceste armée il s'en va contre-mont la riuere de Coanza, & rendit amis ou tributaires à la couronne de Portugal tous les Sobas, & peuples, qu'il trouua sur le riuage du fleuve, du costé d'Angola. Le Roy estonné d'une si soudaine & inopinée conqueste, & craignant que tous ses vassaux ne se rendissent volontairement au Capitaine Paul Diaz, qui estoit homme riche & liberal, il assemble vistement vne grande armée, pour luy resister.

*Auarice
& mes-
chanceté
du Roy
d'Angola.*

*Paul
Diaz
luy saillit
la gac-
re, & cō-
queste
sur luy.
force
pays.*

Paul Diaz estant aduertý de la grosse puissance que le Roy menoit, demande secours au Roy de Congo, lequel luy enuoye soixante mille combattans, sous la charge de son cousin Sebastien Manibamba, & encore six vingts Portugais, de ceux qu'il auoit aupres de soy avec leur chef, payant à tous la solde auant main. Ceste armée se deuoit ioincre à celle de Paul Diaz, mais il aduint qu'estant arriuée à la mer, comme il fallust passer le fleuve Bengo, esloigné quelques trois lieues de Loanda, les grosses barques, qui deuoient passer l'armée, ne se trouuerent pas là, & d'ailleurs les Capitaines voyans que la chose iroit en longueur, s'il falloit passer avec ces petites barques, qu'ils auoyent, vne si grande armée, resolurent de prendre vne autre voye, & d'aller trouuer le Capitaine Diaz par terre. Montans donc le lög du riuage du fleuve Bengo, ils vont rencontrer l'armée des en-

*Armée
du Roy
de Cōgo
pour se-
courir
Paul
Diaz
empe-
schée.*

nemys, avec lesquels ils eurent beaucoup d'escarmouches, la victoire demeurant tousiours du costé des Congians, bien que ce ne fust pas sans perte & dommage, tant d'un costé que d'autre. Mais comme les prouisions de bouche vindrent à manquer aux Congians, ils furent contraincts tant à cause de la faim, que des maladies, qui se glisserent parmy leur camp de se retirer à leurs maisons. Paul Diaz voyant qu'il ne s'estoit peu preualoir de ce secours, passe le fleuve Coanza, & se fortifie en vn lieu ou s'assemblent deux riuieres, à sçauoir Coanza & Luyola faisant toutes deux vne petite Isle, tres-biē munie de sa nature: car apres s'estre ioinctes ensemble, elles se separent derechef le long d'un iect d'arc, & puis se tournent ioincre. En ce lieu donc il y a vne petite colline, tout contre l'assemblage de ces deux fleuves,

*Ville de
Massa-
gan en
Angola
bastie
par les
Portu-
gais.
Mūtai-
gues de
Cambā-
bes ou il
y a des
minieres
d'argēt.*

sur laquelle Paul Diaz bastit vne forteresse. Ceste Isle n'estoit pour lors habitée de personne, mais à present il y a vne ville, que les Portugais y ont bastie appelée Massagan, & leur est fort cōmode: car ils peuuent aller de là iusqu'à la mer avec des barques, & par terre encore quelques quarante ou cinquante lieues loing sans aucun danger. Outre que les montaignes de Cambambes, ou il y a force minieres d'argent, sont assés pres de là vers l'Oriēt, desquelles les Portugais pretendent se rendre maistres: combien que les Angolans s'efforcent de les en empeschier: afin de ne donner moyen à leurs ennemys de s'enrichir à leur desauantage. Mais quand le Roy d'Angola vid, que les Portugais s'estoyent là fortifiez, & qu'il ne leur pouuoit point nuire, il congedie ses

ouppes iufques à vne autre faifon.

Or l'an 1580. le Capitaine Paul Diaz voulant aller aux fuf-
 tes montaignes de Cambâbes, les habitans du païs qui eft en-
 e-deux, en feurent aduertis : & s'affemblerent en tres-grand
 bre, pour leur fermer le paffage: neantmoins ils furent repouf-
 z en quelques batailles, & mis en fuytte par les Portugais; les-
 quels pourfuiuirent leur chemin fans aucun autre empeschemēt
 s ennemys: mais non pas fans encourir de grands dangers,
 pertes tant à caufe des tempeftes qu'ils eurent, qu'à raifon des
 maladies, qui fe gliffèrent parmy le camp, durant l'Automne:
 lement qu'ils furent contraincts de s'arrefter, & fe fortifier fur
 rée de la riuiera de Coanza. Il y auoit vn Pere de la Compa-
 ie, que le Capitaine auoit mené quant & foy, pour ouyr les
 confeffions des foldats, & leur dire la Mefse. Ce Pere ayant eſté
 eint de la meſme maladie que les autres, ne laiſſoit pas pour-
 at de ſecourir les malades: & quand il ne pouuoit marcher à
 ed, il ſe faiſoit porter par quelques eſclaués Ethiopiens, aux
 ites des foldats, pour ouyr leurs confeſſions, ou exhorter ceux,
 i ſ'en alloient mourir. Mais la principale choſe qu'il ſeit en
 temps-là, fut, qu'il appaiſa vne grande querelle qui ſ'eſmeut
 re les foldats, leſquels eſtoient ſi animez les vns contre les
 es, qu'ils penſerent venir aux mains: & de faiēt ils auoyent
 plu ſe donner la bataille le lendemain. Le Pere ſçachant cela,
 i va la nuit de deuant parler aux principaux Chefs des deux
 tys, & aſſiſté du diuin ſecours, il les accorda tellement, qu'ils
 ent delà en auant bons amys. Cela faiēt, & ayant encore de-
 uré en ce meſme lieu quelques quinze iours, à caufe des
 yes continuelles, qui tomboyent, ils pourſuyuirent par apres
 voyage tirans droit aſdites montaignes. Comme ils furent
 s d'icelles enuiron quatre lieües, voicy venir contre eux quaſi
 s les peuples d'Angola, en nombre preſque infiny. Les Portu-
 voyans cela ſe fortifierent promptement en vn lieu, qu'ils
 auerent aſſez commode, pour l'allée & venuē de leurs bar-
 es, appellé Mocumba, deuant lequel les Angolans ſe campe-
 es, les tenans aſſiegez de fort prez. Or iaçoit que le nombre des
 tugais fut fort diminué à caufe des maladies paſſées, & de
 es encore qui leur ſuruindrent en ce meſme lieu: tellement
 en moins de trente iours cent Portugais, & quarante de leurs
 aues, furent deſpeſchez; & que la plus part de ceux qui re-

*Expedi-
 tion des
 Portu-
 gais pour
 aller à
 ces mon-
 taignes.*

*Sedition
 entre
 eux ap-
 paifée.*

*Sont aſ-
 ſiegez
 des An-
 golans.*

*Sôt fort
presséz
en ce
siegé.*

stoyent, fussent si accablez des maux qu'ils enduroyent, qu'à grande peine se pouuoient ils traîner. Neantmoins faisant de necessité vertu, & renforçant de leur courage la foiblesse du corps, ils resisterent vaillamment aux ennemys, & en quelques sorties qu'ils firent, ils en tuerent vn grand nombre. Toutesfois comme le siege tiroit en longueur, & se rendoit plus fascheux de iour à autre, parce que la plus part des soldats auoyent esté emportés, ou par les maladies, ou par les combats, n'en estant resté que cent propres à porter les armes, de trois cens qu'ils estoient, quand ils partirent de Loanda, ils estoient fort descouragez. Combien qu'ils soustenoyent tousiours le siege, attendâs le secours du Roy de Congo, qui leur enuoyoit soixâte dix mille combattans, avec lesquels ils esperoyent non seulement estre deliurez de ce danger, ains encore passer sur le ventre des ennemys : mais ils vont entendre là dessus, que ce secours auoit esté surpris & mis en pieces par l'ennemy. Se voyans ainsi frustrez de ceste esperance, & leurs affaires quasi du tout deplorées, chascun commence de penser à se sauuer. Plusieurs donc s'en estans fuys du camp, se retirent à l'Isle de Loanda, là où ils feirēt sçauoir le danger, auquel estoient leurs compaignons à Mocüba. Vn des Peres de la Compagnie, qui estoit là, considerant qu'il y alloit non seulement de la perte de l'estat temporel des Portugais, mais encore de la Religion Chrestienne en ce pais là, se met à exhorter les Portugais, qui estoient lors à l'Isle de Loanda, d'aller secourir leurs compatriots, promettant de leur tenir compaignie, & subir les mesmes hazards qu'eux : brief il les prescha si bien qu'ils le suiuirent volontiers. L'arriüée de ceux-cy enfla tellement le courage aux assiegés, qu'ils firent incontinent vne sortie, & mirent en fuyte les ennemys, en faisant mourir vn grand nombre. C'estoit le iour de la Natiuité de saint Iean Baptiste, que les Portugais celebrent avec grande solemnité, pour estre le patron des Cheualiers qu'ils ont : & partant ils attribuerēt ceste victoire à ses prieres & merites, qui fust la cause, pour laquelle ils appellerent ce lieu du nom de Saint Iean. Ils estoient aussi durant le siege si deuotieux, que jamais ils n'alloyent combattre, qu'au prealable ils ne se fussent tous cōfessez au Pere, qui estoit là avec eux, receuâs encore de sa main la S. Eucharistie : de façon qu'il n'est pas de merueille si Dieu les fauorisa tant, que de leur donner vne victoire si merueilleuse. Laquelle causa vne si grande

*Reçoi-
uent du
secours
en chas-
sent les
ennemis.*

frayeur

rumeur ez Angolans, que la moytié du Royaume se rendit aux
 Portugais, avec plusieurs Sobas, dont il en y eut quelques vns
 qui furent par ce moyen induicts à embrasser la foy de IESVS-
 CHRIST. Entre autres le Soba de Banzan, qui estoit gendre du *Conversion du*
 Roy, lequel enuoya deuant son frere & son fils aisné au Pere, qui *Soba de*
 estoit avec les Portugais, pour estre tous deux baptisez, le priant *Banzan*
 aussi de s'en vouloir venir vers luy pour l'instruire, & apres le *gendre du*
 baptiser. Le Pere ayât receu ce message, s'achemine vers luy. Mais *Roy.*
 y allât, par tout ou il passoit, il faisoit mettre par terre les Ido-
 les, qu'il trouuoit, & au lieu d'icelles dressoit force Croix, exhor-
 t tous ces peuples là d'embrasser la loy Chrestienne. En ce voya-
 ge il baptisa quelques 65. personnes: mais ce fut vne chose plai- *Sorcier*
 sante d'un Sorcier, qu'il trouua en vn village. Cestuy-cy, bien *des An-*
 il fut homme, alloit neantmoins vestu en femme, portant les *goläs te-*
 cheveux longs & frisés à guise d'une toison. Les barbares en *nu pour*
 avoient telle opinion, qu'ils l'estimoient estre le Dieu de la pluye *Dieu de*
 de la santé: parce qu'ils croyoient, qu'il donnoit l'un & l'autre, *la pluye*
 and & à qui bon luy sembloit. Le Pere donc l'ayant attaqué, *& santé.*
 demanda pourquoy il alloit vestu en femme, puis qu'il estoit
 homme? L'autre respond, que l'esprit, qui souloit declarer la de-
 votion d'un chascun, auoit dit à sa mere, que s'il ne changeoit de
 sexe, il mourroit bien tost, & pour ce qu'il alloit vestu de la
 robe. Alors le Pere luy coupe les cheveux, & luy oste toutes
 autres marques & instrumens de sa superstition. Là dessus
 luy arriuer la pluye qui fit retirer tous les autres sous le roict:
 le Pere fit arrester ce Sorcier tout lié & garrotté au descou-
 uert, exposé à la pluye & à la risée du peuple, luy disant, qu'il se
 convertit de la pluye, s'il pouuoit, puis qu'il estoit, à son dire, le
 Dieu d'icelle. De là ils vont à un autre village, le Seigneur duquel
 est desia Chrestien depuis quelques années. Icy ils planterent
 des Croix, & commencerent à faire bastir une Eglise, à laquelle
 on trauailla avec telle ferueur & diligence des Chrestiens,
 qu'auant le depart du Pere il y dit la Messe. Or ce Seigneur là *La foy*
 faisoit merueilleusement à rompre les Idoles, & raconta au *de N. Sei-*
 gneur là dessus deux choses remarquables, qu'il estimoit luy estre *gneur*
 enuées pour ceste bonne œuvre. L'une est qu'auant qu'il fut *cause de*
 Chrestien, tous ses champs souloient estre brulés par la seche- *prospe-*
 rité: mais depuis qu'il auoit receu le baptême, & mis par terre *rité tem-*
 les idoles, qu'il n'auoit iamais eu faute de pluye, au temps qu'il *porcelle.*

falloit : bien que ses voyfins, qui n'auoient pas encore rompu les Idoles, ny démolý leurs temples, ne iouýssent pas du mefine benefice. L'autre estoit, qu'un de ces hippopotames, sou cheuaux marins, dont a esté parlé cy dessus, qui ont accoustumé sortans à terre, de faire vn grand desgast & carnage tant d'hommes, que de bestes, estant venu en son village, depuis que ses subjets estoient Chrestiens, auoit esté tué fort aisément, & sans dommage de personne, ce qu'il tenoit comme pour vn miracle. Le Pere estant arriué près du village, ou se tenoit le Soba de Banzan, qui l'auoit enuoyé querir, il le rencontre en chemin, qui luy venoit au deuant, & chantoit à haute voix, & avec vne grande allegresse, l'oraison Dominicale, & les autres de la doctrine Chrestienne. Ce qui apporta vn singulier contentement au Pere : lequel fut aussi receu de ce bon catechumene avec vne ioye incroyable, & vn tres-grand honneur, luy faisant l'espace de plusieurs iours, qu'il le retint chez luy, toutes les caresses, dont il se peut aduiser. Or pendant le temps que le Pere y sejourna, il fit brusler plusieurs Idoles, qu'il y auoit en son bourg : & l'ayant instruiét suffisammēt es choses de la foy, il l'amena quant & soy au camp des Portugais, pour estre là baptisé avec plus de solemnité & magnificence. Le General de l'armée des Portugais & tous ses soldats le reçurent avec grande feste & resiouýssance, faisans iouer l'artillerie, & sonner toutes les trompettes, fifres & tambours, en signe d'allegresse. Le lendemain apres son arriué il fut baptisé, & eut à nom Paul, à cause que le General de l'armée, qui le tint sur le fonts, & fut son parrain, estoit ce Paul Diaz, duquel nous auons parlé si souuent. Et à celle fin que les autres Sobas fussent esmeus d'auantage à suyure son exemple, le mefine General au nom du Roy de Portugal, luy oëtroya cest honneur, que de porter l'arc Royal, au moyen de quoy il estoit créé (suyuant la coustume du pais) Duc des Ethiopiens : & outre ce luy fut donné ce priuilege, que de s'asseoir sur vne chaire couuerte d'un tapis, en presence des Lieutenans du Roy de Portugal. Ce qui n'auoit esté iusqu'à lors concedé à aucun des Ethiopiens ; mais par ce qu'il auoit esté le premier de tous les Sobas d'Angola, qui auoit embrassé la foy Chrestienne, on le voulut gratifier de cela par dessus le reste. Voyla ce que fit l'un des Peres.

*Après-
me du
Soba de
Banzan.*

Quant à l'autre, qui auoit esté au camp avec les Portugais l'espace de quatorze mois, apres qu'il fut de retour à l'Isle de Loan-

da, il fit aussi vn baptême solennel, auquel il baptisa deux cens dixsept personnes. Or ces bons Catechumenes monstroient auoir vn tel desir d'estre lauez & regenez par les eaux du S. Baptême, que debuans traueser vn bras de mer, pour venir à l'Isle de Loanda, & n'ayans assés de vaisseaux, pour passer tous ensemble, ils mirent dedans ceux qu'ils auoient, les femmes avec les petits enfans: & les hommes traueserent à la nage, vn bras de mer assés grand, non sans danger des Tuberons, qui sont certains gros poissos fort frequens en ce lieu, lesquels ont les dents si acérées, qu'ils tranchent tout court la cuyssse d'un homme, & le deschirent en pieces pour le manger, quand ils en trouuent quelqu'un dans l'eau: mais ces bonnes gens furent deliurez de ce danger par la grace de Dieu. Le mesme Pere fit aussi des voyages vers certains peuples qui habitent sur la riuie du fleuue Coanza, & font leur demeure dans le creux des arbres, avec telle priuauté des Chancres, qu'ils les laissent promener sur leur visage & sur les viandes qu'ils mangent, sans aucun desdain ny horreur. En ceste fallie il gaigna de ce peuple barbare à la foy Chrestienne, quatre cens personnes, sans compter les enfans, qu'il baptisa. Et en plusieurs lieux ayant ruyné les temples des Idoles, il y arbora l'estendard de la Croix de nostre Seigneur. Mais la conuersion du Soba de Bāzan, desilla les yeux à plusieurs autres Seigneurs d'Angola, qui commencerent à desirer d'estre faits participans du mesme benefice que luy: toutesfois encore que plusieurs semblassent estre prests, & auoir vn grand desir du baptême, si est-ce qu'on ne le leur osoit pas conferer: de peur que n'ayans personne, pour les maintenir en la foy, ils ne retournassent à leurs anciennes coustumes & superstitions. Car il n'y auoit en tout ce pais là autres Prestres, que trois Peres de la Compagnie de Iesvs, lesquels à grand peyne pouuoient satisfaire aux Portugais, & beaucoup moins aux Ethiopiens. Mais nonobstant cela ils en baptiserent l'an 1584. quelques mille: combien que c'estoient de ceux, qu'ils pouuoient commodément ayder, pour estre habitans des lieux circonuoyfins. Or voicy vn baptême bien plus remarquable, soit pour regard de la personne, soit pour l'occasiō qui l'esmeut. Vn grand Seigneur d'Angola, es terres du quel estoit la fortresse, que les Portugais auoient bastie à Mocumba, ayant appris vn an ou deux aupara uant, ce qui estoit necessaire pour le baptême, auant qu'estre baptisé, fut surpris d'une si grierue maladie,

Baptême de 217. personnes.

Autre de 400.

Autre de 1000.

*Guerri-
son mi-
raculeu-
se d'un
Soba &
son bap-
tesme.*

que l'on pensoit qu'il fut proche de sa fin. Ce qu'ayant esté rapporté au Lieutenant du Roy & au Pere de la Compagnie, qui l'auoit instruit, ils luy enuoyerent promptement vn messager, pour luy demander s'il ne vouloit pas recevoir le baptême, auant que partir de ce monde. Ceste nouuelle luy apporta vne telle consolation, qu'il commença des lors à se trouuer mieux : & fut guery bien tost apres. Ayant donc recouuré du tout la santé, il brisa & mit par terre ses Idoles; puis reçeut le baptême avec ses femmes, ses enfans, & ses amis. Mais apres cela il quitta toutes les femmes qu'il tenoit auparauant, s'uyant la coustume du pais, hors-mis vne, avec laquelle il se maria legitimement, selon les loix & ordonnances de l'Eglise. Le baptême luy fut conféré le iour de la Natiuité de nostre Dame l'an 1584. avec grâde pompe & solemnité. Car tous les Cathecumenes marchioient par ordre vestus de blanc, avec leurs accoustremens de soye, & portoient en main des branches de Palme. La ioye aussi & allegresse des Portugais n'estoit pas moindre; laquelle fut accreue par l'arriuee inopinée de quelques troupes des leurs, qui s'é estoient allés il y auoit desia trois mois, en certaine expedition de guerre, & rapportoient vne Image de nostre Dame, qu'ils auoient retirée comme par miracle, des mains des ennemis. Le Gouverneur afin de faire entendre tant aux Neophytes, qu'aux Payens, qui estoient presens, quel honneur & respect on deuoit porter à la Mere de Dieu, voulut qu'on allast au deuant de ladiete Image, & qu'on la reçeut avec la plus grande magnificence, qu'il seroit possible. Le mesme iour il donna à disner à tous les nouveaux Chrestiens, en la maison des Peres de la Compagnie. Or le bruit d'un baptême si solemnel ayant couru par tout, les autres Princes & Seigneurs esmeus d'une sainte enuie, se plaignoyent de ce qu'ils n'auoient encore esté enroollez au nombre des Chrestiens, ny reçeu le baptême, bien qu'ils le souhaitassent grandement, & le demandassent avec continuelles prieres. Les Peres afin de ne les mescontéter, & neantmoins esprouuer cependant leur constance, enuoyerent vn des leurs aux villages d'iceux, afin qu'au prealable il bruslast toutes les Idoles qu'ils auoient en leurs bourgs, & qu'il enseignast la doctrine Chrestienne à leurs vassaux: leur promettans qu'apres cela ils les iroyent baptiser. Comme ils firent aussi, au grand contentement d'iceux, & des Portugais encore, mais principalement des mesmes Peres, lesquels taschoient

*Sainte
enuie &
emula-
tio d'au-
tres Sei-
gneurs.*

de les entretenir en leur se'ueur, les visitant souuent ; & en gaignoyent tousiours d'autres: ainsi que nous verrons bien tost. Mais il nous faut traicter au parauant de quelques braues exploicts de guerre, que les Portugais ont faict en ce pais là, seruans beaucoup à la propagation de la foy.

Des victoires miraculeuses que les Portugais ont gaigné contre les naturels d'Angola, & du progrez que la foy Chrestienne a faict audit pais.

CHAPITRE VII.



La esté dit cy dessus, que les Portugais s'acheminans aux môtaignes de Cambambes, ou sont les mines d'argent, qu'ils desirerent tant auoir, s'estoyent campez à Mocumba, 4. lieues loing d'icelles, là où ils furent assiegez par vne infinité d'Angolans, qui taschoyent leur empescher ce voyage. Or apres auoir demeuré là quelques deux ans, le Capitaine General de l'armée Paul Diaz resolu de continuer son entreprise, fait marcher son camp vers lesdites minieres, qui luy auoyent esté liberalement offertes par le Seigneur mesme du pais, ou elles sont. Le Roy d'Angola estant aduertty, qu'ils y estoyent desia arriuez, & en auoyent pris possession, assemble vne armée de douze cens mille hommes (car autant en furent ils comptez en la monstre qu'il fit, au rapport des siens mesmes) & avec ceste grosse puissance s'en vient les attaquer. Les Portugais n'estoyent pas plus de cent cinquante soldats, & fort peu d'Æthiopiens, qui estoyêt demeurez avec leur Seigneur, le Soba de Banzan, celuy qui s'e'loit rendu Chrestien vn peu auparauât. Car tous les autres estonnez d'vne si grande multitude d'ennemys, s'estoyent retirez vers eux, quittans le party des Portugais. Mais la diuine bonté, qui a accoustumé de secourir les siens, aux plus vrgentes necessités, & lors qu'il semble, que les choses sont plus desesperées, monstra bien sa toute puissance en telle saison. car ces cent cinquante Portugais avec ce peu d'Æthiopiens, que le Soba de Banzan menoit en l'auant-garde, mirêt en route toute ceste multitude innombrable de gens, que l'ennemy menoit, & en firent vn grand carnage, n'ayans perdu que sept Portugais, lesquels furent tuez lors, que le Pere de la Compagnie qui estoit avec eux, cessa de faire priere à Dieu pour la victoire. Car s'estant

*Armée
de douze
cens mille
Angolans*

*Est mise
en route
par 150.
Portu-
gaïs, &
peu d'Æ-
thiopiens.*

*Effet
meruei-
leux de
l'oraison*

dés le commencement de la bataille mis en oraison pour c'est effect, tandis qu'il esleuoit les mains au Ciel, comme vn autre Moysé, les Portugais estoient victorieux sans perdre aucun des leurs: mais lors qu'il desista de son oraison, pensant que tout fust acheué, soudain les ennemys tournent visage, & seruans sur les Portugais en tuent sept, côme a esté dit. Le Pere voyant cela, retourne incontinct à la priere, & persiste en icelle, iusqu'à ce que les Portugais eurent mis fin à la victoire: d'où ils cogneurent clairement, que ce n'estoit par les forces humaines, mais par le diuin pouuoir, que ceste bataille auoit esté gaignée, & de ce les ennemys mesmes donnoient bon tesmoignage. Car ils disoient que le Ciel auoit cōbattu contre eux, & qu'ils auoyēt reçu plus de dommage d'en haut, que de l'espée des Portugais. Au moins il est assuré, qu'une si grande frayeur les s'ysist, que se mettās tous à fuir à vau de route, la plus part d'iceux tomba dans vn gouffre profond, qui fust eomblé de leurs corps, tellement que les Portugais, qui les talonnoient de prez, passoyent par dessus, comme si ceust esté vn chemin plainier. Cecy à la verité semblera incroyable à celuy qui considerera tant seulement les forces humaines: mais si on jette les yeux sur la puissance de Dieu, lequel avec vne petite poignée d'Hebrieux, a mis tant de fois en fuytte, vn nombre presque infiny de mescredoyans, il n'y aura point occasion d'en doubter: veu que la chose a esté attestée & escrete par ceux mesmes qui s'y trouuerent presens, comme il appert des lettres qu'on en enuoya l'an 1584. auquel cecy aduint. Les Portugais, recognoissans auoir receu vne si speciale faueur de la main de Dieu, luy en rendirent humblement graces, & feirent vne procession generale à ceste occasion. Or ce qui leur feit encore croire, que N. Seigneur leur auoit dōné ceste victoire, pour l'exaltation de son nom, fust vn prodige merueilleux, que quelques vns d'iceux virent au Ciel: car neuf soldats Portugais asseuererent qu'estans assez loing du camp, ils auoyent veu au coucher du Soleil vne grande croix fort luyfante, & d'une singuliere beauté, qui sembloit se reposer sur le païs d'Angola, & le mesme tesmoignerent auoir veu au mesme temps, quelques autres estās fort esloignez des premiers. A ceste cause, le General de l'armée feit dresser vne grande Croix, pour seruir comme de trophée & de memoire perpetuelle à la posterité, tāt de la victoire gaignée, que de ce grand & merueilleux prodige.

*Vne
croix
veüe en
l'air sur
le pays
d'Angola.*

Au demourant ce qui sembloit de buoir allecher les Angolans à se rendre aux Portugais, les en destourna d'auantage : car ceux qui auoyent quité leur party au temps du danger, voyans que la victoire leur estoit demeurée, n'oserent retourner à eux, craignans d'estre chastiez de leur perfidie ; si qu'ils aymerent mieux demeurer du costé des vaincus, que des vainqueurs. A raison de quoy le Capitaine Paul Diaz fust d'aduis de se retirer en quelque lieu fort, & bien muni de la nature, comme il fit, s'en retournant à ce fort qu'il auoit basti entre deux riuieres : là où il attendist les forces, qu'il enuoya querir en Portugal, pour mettre fin à ceste guerre. Mais les Barbares ayans senty le vent de cela, afin de ne donner loysir à leurs ennemis de se rendre plus forts, assemblent promptement vne grosse armée : avec laquelle il les vont assieger en ce lieu là : & afin qu'ils n'eussent moyen d'aller & venir de l'Isle de Loanda, pour en auoir du secours, & des viures, ils se vont aduiser d'vne ruse, c'est que de leur boucher toutes les aduenues. En ce temps-là il n'y auoit au pais d'Angola, que deux Prestres, tous deux de la Compagnie de Iesvs, l'un desquels estoit avec les assiegez, & l'autre à l'Isle de Loanda. Cestuy-cy ayant secu le grand danger auquel estoient les assiegez, voulut aller à l'Isle de S. Thomas, pour halter le secours de Portugal, s'il estoit venu : mais en chemin il rencontra la flotte qui venoit de Lisbonne pour cet effect; tellement qu'il s'en retourne quant icelle à Loanda, là où soudain qu'elle fust arriuée, plusieurs tomberent malades. Il y auoit quatre de ladite Compagnie, qui estoient arriuez avec la flotte, mais l'un d'iceux mourut bié tost apres qu'il fust à Loanda: car les maladies se glisserent incontînēt parmy ceux, qui estoient fraichement venus, soit à cause de l'intemperature de l'air, soit à raison des viandes de ce pais, qu'ils n'auoyent pas accoustumées, ou bien encore pour la faim, & autres incommoditez, que plusieurs d'iceux enduroyent, mesmement les malades: d'autant qu'il n'y auoit personne qui eust soing d'eux; de maniere qu'ils gisoyent miserablement par terre, sans aucun secours: bien que ceux de la Cōpagnie voyans cela, les emportoïēt en leur maison, & les traictōïēt le mieux qu'il leur estoit possible, iusqu'à tāt qu'ō eust dressé vn hospital public, auquel ils fussent pēsez & nourris. Mais en ces entrefaites le Capitaine Paul Diaz assiegé, comme a esté dict, avec deux cens Portugais, & quelques originaires, se trouuoit en grande destresse, n'ayant ny

Les Portugais assiegez par les Angolans:

Arriuée d'une flotte de Portugal.

*Vient
au se-
cours des
assiégez
fort à
propos.*

prouisions de bouche, ny munitiōs de guerre, si qu'il ne pouuoit plus longuement soustenir le siege. Là dessus voicy arriuer la flotte, qui estoit venuë de Portugal pour le secourir, laquelle s'estant refaite vn peu à Loanda, & les malades remis, tira droit contre mont la riuere de Coanza, au fort ou estoient les assiegez. Lesquels avec ce secours, prindrent vn tel courage, qu'ils mirent en fuytte leurs ennemys: & d'abondant gaignerēt en quelques sail- lies & courses, qu'ils firēt sur les peuples d'alentour, dix ou douze Sobas, avec toutes leurs terres à la couronne de Portugal: & le Roy mesme eust belle peur. Cecy arriua l'an 1585. Mais comme en ce pais il y a si grande multitude de gens, que pour tant qu'on en tuë, ou qu'on en vende, il ne s'y cognoit aucune diminution, l'année suyuant le Roy repara ses forces, si bien qu'il dōna beau- coup d'affaire aux Portugais, leur liurant deux batailles, com- bien qu'en toutes deux il resta vaincu, & en l'vne d'icelles deux

*600000
Angolās
mis en
route
par 200.
Portu-
gais, &
10000.
origi-
naires.*

*Image
de nostre
Dame
garantie
diuine-
ment des
mains
des bar-
bares.*

cens Portugais avec dix mille Æthiopiens de leurs alliez, rompi- rent vne armée de six cens mille combattans de leurs ennemys, sans qu'aucun des Portugais y demeurast. Ce qu'ils tindrent à vne faueur speciale receuë de nostre Seigneur, par l'intercession de la glorieuse vierge Marie sa sainte mere. D'autant que le Ca- pitaine Paul Diaz, & ses soldats, luy portoyent vne particuliere deuotion: de sorte qu'il auoit tousiours en son camp vne image de ladite Vierge, & chasque iour à la veuë de tous, luy faisoit la reuerence, priant Dieu à genoux deuant icelle, pour l'heureux succès de son entreprise. Or ceste mesme image vn peu auant ce combat, fut, comme par miracle, garantie des mains des barba- res, de la façon qui s'ensuyt. Vne grosse troupe d'ennemys s'e- stant jettée avec grande furie sur les tranchées du camp des Por- tugais, que les Æthiopiens leurs alliez deffendoyent, comme ceux-cy, n'ayans peu resister à vne si visue attaque, se fussent re- tirez vers le gros de l'armée, on estoit le General & les autres Portugais, laissant là tout le bagage, les ennemys, ayans gaigné la place, recueillirent auidement tout ce qu'ils y trouuerent: car ces gens là sont extremement auides & conuoiteux d'auoir les cho- ses des Portugais, pour l'estime qu'ils en font. Entre ces hardes là, il y auoit vn paquet, dans lequel estoit enueloppé ce pourtraict de la Vierge, lequel fust trouué auprès du chemin sans aucun dōmage, bien que les ennemys eussent esté campez en ce mesme lieu, & eussent pillé & emporté tout le reste, Dieu ayant, ce

semble

semble, esblouyſt la veüe de ces impies, afin qu'ils ne viſſent de leurs yeux, ce qu'ils euſſent, peut eſtre, profané de leurs mains ſacrileges. Le Capitaine ſçachant cela, en fut ſi aiſe, qu'il fit rapporter ladiſte Image en ſon camp, avec grand pompe & magnificence; & la reçut, enſemble tous les autres Portugais & originaires Chreſtiens, avec vne deuotion ſinguliere, conceuans tous de là en auant vne plus grande confiance en ſon ayde & ſecours, & qu'ils ſeroient garantis des embuſches, & efforts de leurs ennemis, puis qu'ils eſtoient ſoubs la proteſtion & ſauuegarde d'une ſi puiffante Dame. Mais voicy vne autre choſe qui accreuſt encore dauantage leur cōfiance & deuotion enuers icelle. Quelque temps apres, qu'ils eurent emporté ceſte victoire tant merueilleuſe, en laquelle peu des leurs mirent en route douze cens mille des ennemis, vn Portugais eſtant allé pour quelque affaire à la ville de Cabaça, & ſe rencontrant avec le General de l'armée des ennemis, il luy demāde pourquoy s'eſtoit il laiſſé vaincre à vne poignée de gens, ayant vne ſi grande multitude de ſoldats? L'autre luy reſpond, Nous n'auions pas grande peur des armes des Portugais, leſquels en vn petit ſouffle nous euſſions peu deſfaire: mais ce qui nous donna l'effroy, ce fut la veüe d'une femme d'admirable beauré, qui eſtoit enuironnée d'une grande lumiere, & d'un vieillard, qui l'accompagnoit, tenāt en main vne eſpée flamboyante, leſquels marchotent en l'air deuant vos troupes: & ce furent ceux là, qui nous mirent la peur dans l'ame, tellement qu'eſtans hors de nous, pour raiſon de la crainte, qui nous auoit faiſys, nous nous miſmes tous en fuitte. Que s'il faut adiouſter foy au dire de ce barbare, ou à celui, qui l'a rapporté, les Portugais ont grande occaſion de recognoiſtre ce benefice reçu de Dieu, par l'interceſſion de la ſacrée Vierge, qu'ils croient probablement eſtre ceſte Dame reluyſante à metucilles, & le vieillard l'Apoſtre S. Iacques, qu'ils reclament en leurs batailles.

Au reſte quant aux affaires du Chriſtianisme, il y auoit bien pluſieurs, qui deſiroient receuoir le baptême; mais on ne le donnoit pas à tous ceux qui le demandoient. Car il eſtoit expedient d'eſtre retenu en cela, iuſqu'à ce que les Chreſtiens fuſſent du tout maiſtres de ce païs, veu que l'eſtabliſſement de la foy depend d'ordinaire de ceux, qui regnent. Et c'eſt l'vnique remede contre l'inſolence des Preſtres ou deuins d'Angola, qui s'appellent Gangas: leſquels ſont tellemēt honnorez de ce peuple, qu'on

Aſſiſtence de la Vierge en ſauueur des Portugais contre les barbares.

Sorciers ou deuins d'Angola appellés Gangas.

les tient comme des Dieux: car ces barbares estiment, que la santé & la vie des hommes, voyre la conseruation de toutes choses, depēd de ces gens là. Ce sont eux (à l'opinion de ces pauvres aueugles) qui arrestent les pluyes en l'air, ou les font tomber ça bas, & par mesme moyē sont cause de la sterilité ou fertilité des années. Ce qu'ils font avec leurs sorceries & enchantemens: car ils y sont grands maistres. On a opinion aussi qu'ils ostent, ou rendent la santé aux hommes, comme il leur plaît, brief qu'ils sont les Dieux de la vie & de la mort. Et c'est à cause des malefices, dont ils vsent, ou bien parce qu'eux seuls sçauent ce qui est, ou dommageable à la santé des hommes, ou profitable pour leur guérison, & appliquent l'un & l'autre à ceux, à qui ils veulent, se gardans bien de declarer tels secrets à autres, qui ne soyent de leur profession: afin qu'on les tienne tousiours en honneur & en respect, comme si c'estoient des Dieux. Ils se meslent aussi de dire la bonne ou mauuaise aduenture, & de predire les choses à venir. Et d'autant que par le moyen de la familiarité, qu'ils ont avec le diable, ils en disent quelques vnes de vrayes, on leur adiouste foy comme à des oracles. Combien que la diuine prouidence descouure quelque fois la vanité & impiété de ces imposteurs, & les chastie selon qu'ils meritent, pour oster le bandeau d'ignorance à ces pauvres gens, ainsi qu'il aduint à l'un d'iceux l'an 1587. en la façon que ie m'en vay dire. Les Portugais faisans la guerre contre vn des Sobas de ce pais là, s'estoient campés es terres d'un autre, qui leur estoit amy, & confederé. Or en ce tēps là il suruint vne si grande secheresse, que les champs ensemençés estoient à demy brullés, n'ayant point eu depuis long temps de pluye, laquelle vn quidam de ces Gangas, à qui le Ciel (suyuant son dire) obeïssoit, promit de leur en donner abondamment. Beaucoup de gens s'estoient assemblés, pour le desir qu'ils auoient de ce, qu'il promettoit. Il vient donc en vn beau iour au milieu d'une grande plaine, qui n'estoit pas gueres loing du camp des Portugais: & pour ce quelques vns d'iceux voulurent estre spectateurs de ce beau miracle, quel'autre se ventoit debuoir faire. Comme il se fust jetté au milieu de la troupe portant force clochettes, & autres instrumens de sa superstition, il se met à danser & à chanter à leur mode, marmottant quelques mots incogneus entre les dents. Ceste ceremonie execrable & inuocation des Demons, dura enuiron vne demie heure: apres laquelle

*La grā-
de opi-
niō qu'o
a d'eux.*

*Promes-
se d'un
Ganga,
de don-
ner de la
pluye.*

le voyla qu'une grosse nuée s'esleue avec beaucoup d'esclairs & tonnerres. On pensoit que la pluye deust tomber aussi tost. Cependant les Portugais ne disoient mot, attendans l'ysuë de la chose : mais au contraire les barbares ne faisoient que trepigner de ioya, & avec leurs crys & hurlemens confus, mettoient le Ganga iusqu'aux nuées. Luy aussi enorgueilly de ces signes, parloit si hautainement de foy, & avec vn si grãd mespris des Chrestiens (ne sçachant pas ce qui luy pendoit sur la teste) que les Portugais ne le pouuoient supporter, mais bien tost apres la chance se tourna. Car ainsi que les esclairs & tonnerres alloient tousiours en croissant, il en vint vn si terrible, qu'il sembloit que ciel & terre se deust abyfiner; & lors le foudre avec vn esclat espouuentable, qui fit trembler tous les assistans, tomba sur ce miserable, & luy emporta la teste de dessus les espaulles, à guise d'une espée foudroyante, laissant le reste du corps, couché roide mort par terre. D'ou l'on cogneut estre veritable ce que les Chrestiens disoient aux barbares, que ce n'estoit point en la puissance des hommes, d'ouirir ou fermer le Ciel, pour les pluyes; mais en la main de Dieu seul : auquel il falloit recourir, pour demander ayde en telles necessités. On vid pareillement la superbe & outrecuidance de ce Ganga iustement punie. D'ou l'on peut vilement apprendre que ceux, qui se veulent esleuer par dessus leur portée, sont d'autant plus abaissés & humiliés par celuy, qui resiste aux superbes, & despart ses graces aux humbles. Mais retournons à nostre propos de l'acroissement de la foy en ce país là. Il y auoit desia l'an 1590. quelques vingt mille Chrestiens naturels d'Angola, qui auoient esté tous conuertis à la foy par les Peres de la Compagnie de IESVS : & ceste année là ils en baptiserent 1500. Ils en eussent encore baptisé d'auantage, s'ils eussent eu plus de Catechistes : & d'ailleurs ils craignoient que s'ils donnoient le baptisme à ceux, qui demeuroient loing des forteresses ou garnisons des Portugais es país mediteranées, ils ne vinssent à apostater de la foy, & retourner à leurs anciennes superstitions; comme il aduiant souuentefois à telles gens. Mais ce peu qu'il y en auoit, recompensoit vne multitude plus grande par leur ferueur & pieté. Car ils estoient fort soigneux d'assister à la Messe, de frequenter les Sacremens, estoient assidus à la priere, & portoient si grand respect aux Peres, qu'il estoit besoin de les attirer par courtoisie & signes de bien-veillance, afin qu'ils

*Enuoyé
les De-
mons, &
fait es-
leuer v-
ne tem-
peste.*

*Vn coup
de ton-
nerreluy
emporte
la teste.*

*Vingt
mille
Chre-
tiens
en An-
gola.*

*Deuotio
des Chr-
stiens ori-
gina-
res.*

*Trespas
du Ca-
pitaine
Paul
Diaz, &
ce qu'il
ordonna
en son te-
stament.*

s'accostassent plus librement d'eux. L'année auparavant le Capitaine Paul Diaz mourut de maladie, & comme il auoit tousiours porté grande affection ausdits Peres, en faisant son testament il leur legua autant de terre, qu'on eust peu, avec les fruiçts d'icelle, nourrir cinq cens personnes: ordonnant à ses heritiers, qu'en toutes leurs entreprises, tant de paix que de guerre, ils s'aydassent de leur conseil. Il mit aussi vne clause en son testament, par laquelle il prioit le Roy d'Espagne, entant que Roy de Portugal, qu'il luy pleust maintenir en ce païs là lesdits Peres, comme gens tres-vtiles en ces quartiers. Et non seulement luy, mais encore les autres Portugais habitans d'Angola, leur sont si affectionnez, qu'il est besoin souuét de les empescher de faire des laiz en leur faueur, quand ils font leurs testamens: afin qu'ils ne semblent rechercher les choses de la terre, en les incitant aux celestes. Ils ont en ce païs deux maisons de Residence, l'une est en l'Isle de

*Deux
maisons
en An-
gola des
Reli-
gieux de
la Com-
pagnie
de I E-
S V S.*

*Deuotio
grande
des Por-
tugais
habitans
d'Ango-
la à N.
Dame.*

Loanda, qui appartient au Roy de Congo, là ou maintenant tous les habitans sont Chrestiens par la grace de Dieu, & avec l'industrie desdits Peres. L'autre est à la ville de Massagan, ou est ceste forteresse, que nous auons dit estre enuironnée de deux riuieres. Mais par ce que les Portugais vont d'ordinaire faire la guerre au dedans du païs, il en y a tousiours quelques vns d'eux qui suyent le camp, pour entendre les confessions des soldats, & les exhorter à bien viure, & à mourir en bons Chrestiens. Les Portugais portent aussi d'ordinaire vne singuliere deuotion à la glorieuse Vierge Marie, & ont vne Confrairie d'icelle en l'Eglise des Peres de la mesme Societé en Loanda, qu'ils appellent la Confrairie de nostre Dame de la victoire: car ils ont remarqué comme toutes les plus insignes victoires qu'ils ont eu en ce païs là, ont esté gagnées es festes de nostre Dame. Et pour ce, ils ont accoustumé de ne donner point bataille, tant que faire se peut, sinon en quelque iour de nostre Dame. Tout ce qui leur aduient de bon, soit en paix, soit en guerre, ils l'attribuent, apres Dieu, à la glorieuse Vierge. Quand ils veulent aller à la guerre, ils font au prealable leurs vœux & prieres en son Eglise, apres s'y estre confessés & communiés. Au retour aussi ils rendent là mesmes leurs vœux, remerciens nostre Seigneur & sa sainte Mere, des graces qu'ils ont receuës. Ils portent aussi tousiours en leur camp l'Image de la mesme Vierge, & l'honnoient fort deuotement. Or il aduient vne fois, que s'estans campés en vn certain lieu, pour s'arrester

là quelque temps, ils dresserent vn petit Oratoire pour tenir ladiète Image, durant le temps qu'ils seiourneroyent en ce lieu: mais partans de là, ils ruinerent ou brusserent c'est Oratoire, à fin qu'il ne fust prophané par les Idolatres, y laissant tant seulement vne Croix, pour seruir comme de memoire, qu'en ce lieu l'Oratoire auoit esté dressé. Le Soba de ce pays, voyant que les Portugais s'en estoient allés, rompant l'alliance qu'il auoit faicte avec eux, alla encore faire le pis qu'il sceut contre la reuerence de ce lieu. Mais ce ne fut pas sans en porter la peine: car il tomba bié tost apres malade, & demeura au liét l'espace d'un an entier, sans que les medecins ou les enchanteurs eussent peu rien aduançer en sa guerison. Luy voyant qu'iceux auoyent desespéré de de sa santé, recognust en fin que Dieu luy enuoyoit ce fleau pour son peché, tellement qu'il enuoya vn sien manteau pour présent à la Croix, que les Portugais auoyent laissée en ce lieu, & fit vœu de se rendre Chrestien, s'il reuenoit en santé. Chose admirable, mais neantmoins tres-veritable ! Aussi tost que ses seruiteurs eurent apporté à ladiète Croix le manteau, la santé fut renduë au malade, & incontinent apres, il enuoya des Ambassadeurs au Gouverneur ou Lieutenant pour la couronne de Portugal au pays d'Angola, le suppliant de luy vouloir pardonner la faute passée, & le receuoir non seulement pour vassal du Roy de Portugal (comme il estoit auparauant) mais encore pour frere. Car il souhaitoit grandement se rendre Chrestien, & estre baptisé au plustost, comme il fut aussi apres auoir esté deuëment instruit en la foy par vn des Peres. Mais voicy vn traité signalé de la diuine prouidence, & de l'assistance de la vierge sacrée, enuers vne certaine esclaue de quelque Portugais. Elle auoit esté griefue-ment battuë de son maistre pour vne faute assez legere, dont elle conceut vne si grande fâcherie & despit, qu'elle resolut de finir sa vie par vne mort violente, se defaisant elle mesme. Estant donc sur la minuiët sortie de la maison tout expres pour cela, elle attache vne corde à vn arbre, ou elle se vouloit pendre: & commence à faire vn amas de pierres, pour monter dessus: à fin que quand elle auroit mis le col dans le lacet, elle iettast avec les pieds ce monceau, & demeurast penduë en l'air. Mais toutes-fois & quantes qu'elle vouloit monter sur lediët monceau, vne Dame d'une singuliere beauté le luy desmolissoit: nonobstant cela elle continuë toute la nuit, autât de fois que ceste Dame les luy esparpil-

*Puni-
tion di-
uine
d'on
Soba,
pour a-
uoir pro-
phané
vn lieu
ou auoit
esté dres-
sé vn
Oratoi-
re.*

*Est de-
liuré de
maladie
miracu-
leusemēt
& se
faist
Chrestien.*

*Vne es-
claue
Chre-
stienne se
voulant
pendre
est em-
pêchée
par N.
Dame.*

loit: mais c'estoit tousiours à recommencer. En fin le iour estant venu, elle eust peur, & s'en retourne à la maison: là où toute estonnée & esmerueillée, de ce qui s'estoit passé, parlant à son
 „maistre; Vous eussiez, dict-elle, ceste nuit perduë vostre esclau,
 „si ceste Dame, que nous adorons à l'Eglise de la Compagnie, ne
 „l'eust empeschée. Là dessus elle luy raconte toute l'histoire. Son
 maistre ne fist aucun semblant pour lors de la croire: mais il feit
 appeller quelque Pere de la Compagnie, & leur raconta tout ce
 que dessus, les priant d'aller voir, ce qui auoit esté fait. Iceux
 s'en vont au lieu, & trouuēt encore le licol attaché à l'arbre avec
 l'amas des pierres, dont ils iugerent probablement, que le dire
 de l'esclau estoit vray. Voyla comment la mere de misericorde
 assista ceste pauvre miserable; la deliurant de la mort & du corps
 & de l'ame tout ensemble. Dieu aussi monstre bien souuent son
 infinie bonté, à l'endroiēt de quelques vns, qu'il appelle à sa foy
 sur la dernière periode de leur vie; cōme il aduint à trois ieunes
 hommes, que deux Peres de ladite Societé, qui voyageoyent
 tout contre l'orée de la mer, trouuerent quasi sur le poinēt de
 rendre l'ame, & les ayans interrogez s'ils ne vouloyent pas estre
 Chrestiens, ils respondirent qu'ouy. C'est pourquoy ils les
 baptiserent sur le champ, & soudain apres leurs ames s'enuolerēt
 au Ciel, freschemēt lauées au sang de IESVS-CHRIST. Grād signe
 de leur predestination. Vn autre Pere passant par vn lieu ou vne
 fēme accouchée estoit sur le poinēt de se perdre avec son fruiēt,
 comme il sceut cela par le rapport d'une autre femme qui ve-
 noit de la voir, il s'y en va, & ayant baptisé la mere & l'enfant,
 tout aussi tost l'un & l'autre, comme il est à croire, gaigna le haut,
 montant en Paradis. Mais voicy comme Dieu par la mort tem-
 porelle, donne à quelques vns la vie eternelle. L'an 1589. certains
 Sobas vassaux de la Couronne de Portugal, machinoyent des-
 sous main quelque trahison contre les Portugais: & ayans esté
 descouverts, on les condamna à mourir; mais l'un d'iceux avec
 lequel les Peres auoyent parlé d'autres fois de la foy de IESVS-
 CHRIST, voulut estre baptisé deuant l'exécution, & persuada le
 mesme à vn autre des coniuerez: tellement qu'ils moururent tous
 deux avec grande esperance de renaistre plus heureusement au
 Ciel, qu'ils ne mouroyent en terre. Sept ans apres deux autres
 Sobas, apres auoir fait beaucoup de maux aux Portugais,
 tomberent entre leurs mains, & furent aussi condamnēz à

*Trois
 ieunes
 hommes
 à demy
 morts
 sont ba-
 ptisez,*

*Couuer-
 sion de
 deux So-
 bas qu'o
 menoit
 au sup-
 plice.*

*D^o...N-
 tres
 deux de
 mesme.*

la mort ; toutesfois auant qu'estre executez ils voulurent pareillement se rendre Chrestiens , & furent baptisez , apres qu'on leur eust enseigné , ce qui estoit necessaire pour ce temps-là. L'execution estant faicte l'on enseuelit leurs corps , suruant les ceremonies de l'Eglise , mais avec grand honneur , pour s'estre conuertys à la foy auant leur mort. Car les Capitaines mesmes les porterent à la sepulture avec l'admiration des originaires, lesquels estoient bien marrys, qu'on enfoüyst dans terre le plus friand morceau qu'ils ayent : d'autant que sur les frontieres des deux Royaumes de Congo & d'Angola (ou ils estoient) on trouue des hommes si barbares , qui estiment n'y auoir meilleur sepulchre pour les corps morts des hommes, que les corps viuans de ceux qui les mangent ; & quand ils se veulent festoyer entre eux , s'ils n'ont moyen d'auoir de leurs ennemys, ils ne font pas scrupule de tuer leurs propres parens & amys, pour en faire feste à leurs conuiés. Au reste le Roy d'Angola soit qu'il se repentist des pertes qu'il faisoit ordinairement es guerres contre les Portugais, soit qu'il estimast la paix preferable à la guerre, enuoya l'an 1599. des Ambassadeurs au Lieutenant du Roy de Portugal, pour demander la paix ; adioustant encore qu'il vouloit embrasser la foy de IESVS-CRIST. Et afin d'en donner quelque preuue , il enuoya pour ostages des enfans des Princes , afin qu'on les retint es garnisons, tandis que les Peres qu'il demandoit pour estre instruit avec son peuple , seroyent au pays mediterrannée. L'on escriuit en Espagne pour sçauoir ce qui estoit de faire en cela , & tandis qu'on attendoit la responce, on enseignoit aux ostages la foy & les mœurs Chrestiennes. C'est tout ce que nous auons peu sçauoir de ce pays iusques à l'an 1600.

Ces barbares qui mangent la chair humaine.

Le Roy d'Angola dema la paix aux Portugais, & d'estre instruit en la foy.

Description de la coste de la Mer, depuis Angola iusques au Cap de bonne esperance, & delà iusques à Soffala : ensemble du Royaume de Monomotapa, & de l'Isle du Mosambique.

CHAPITRE VIII.



PRES les Royaumes de Congo & d'Angola, tirant vers le Sud, on en trouue sur la coste de la Mer, vn autre appelé Mataman, qui comprend quelques Prouinces, ap-

Monta-
gues de
la Lune.

pellées des origenaires Chimbebas. Il est borné du costé de Septentrion par le Royaume d'Angola, du Midy par le fleuve Brauaghul, qui sort des montagnes de la Lune; du Leuât par vn autre appellé Magnice, qui se deriue du plus Meridional lac des deux, d'où sort le Nil: & du Ponant, il est arrousé de la mer, depuis le sein des vaches, iusques au Tropique du Capricorne, qui separe de ce Royaume les montaignes de la Lune, les laissant du costé de Midy. Et au dela d'icelles, vers le Sud est toute ceste region, qui est proche du Cap de bonne esperance: en laquelle commandent plusieurs Princes ou Royetelets. Le païs mediterrannée qui est situé au pied des montaignes de la Lune, n'est gueres habité, à cause du grand froid qu'il y faict. Mais ce peu qui l'habitent, viuêt à la façon des Arabes en des petites cahuettes, vestus de peaux d'animaux, & se nourrissent de legumages, ou autres fruiets de la terre, & de chair cruë, tant des bestes, que des hommes. En somme ils menent vne vie fort brutale. Au pied desdites montaignes vers l'Occident, il y a vn petit lac, d'où sort vn fleuve appellé des naturels Camissa, & des Portugais *Rio dolce*, qui veut dire Riuere douce. Il se rend dans la Mer près du Cap de bonne esperance, & en son emboucheure il y a vn petit sein ou golfe, dont le bout Occidental est appellé *Cabo falso*, c'est à dire le cap faux: parce que (à mon aduis) les Portugais allans aux Indes, comme ils rencontrent ce promontoire, pensent que c'est le vray Cap de bonne esperance, & se trompent parce qu'il en y a vn autre plus Oriental, qui fait l'autre bout du sein, appellé communement le Cap des aiguilles. Je croy que c'est à raison que l'aiguille marine regarde en ce lieu là tout droict le Nort, sans forligner ny d'vn costé n'y d'autre: ce qui n'aduient gueres ailleurs. Entre ces deux Caps il y a 25. lieues: & c'est ce qu'on nomme ordinairement le Cap de bonne esperance, parce que c'est la terre la plus aduancée dans la mer de toute l'Afrique; car apres ces deux Caps, elle se retire bien auant d'vn costé & d'autre. Le nom de bonne esperance luy a esté donné, comme nous auons dict au premier liure, par le Roy de Portugal Iean 2. & luy conuient tres-bien: car ceux qui font le voyage de Portugal aux Indes, ou au contraire, conçoient bonne esperance de parfaire leur navigation heureusement, apres auoir doublé ce Cap: qui est le plus dangereux passage de tous, à cause des vents, qui descendent avec grande impetuosité, des montaignes d'alentour, & regnent estrangement

Cap de
bonne
esperance.

gement en ceste mer, y excitans de si furieuses tempestes, que plusieurs nauires y sont abyssés. C'est pourquoy on l'appelle aussi le Lyon de mer, parce qu'il deuore & engloutit dās ses flots plusieurs vaisseaux avec les personnes, & richesses qu'ils portent. A ceste cause ceux qui sont voile de Portugal aux Indes, pour le passer plus seurement, s'esloignent d'iceluy quelques deux ou trois degrés vers le Sud, & ne le voyent pas. Mais ils cognoissent, quand ils l'ont passé à deux signes tres-certains; l'un est celuy de l'aiguille, que nous auons dit; laquelle s'arrestant iustement sur le Nort, monstre qu'ils sont vis à vis du cap des aiguilles; l'autre est de certains grands oyseaux blancs, comme des Cygnes, hormis qu'ils ont le bout des aïles noir, & pour ce en Portugais on les nomme *mangas de velludo*, c'est à dire, mèches de velours. *Oyseaux appellez mangas de velludo.* Car ces oyseaux sont fort frequens en ceste contrée, & ne manquent iamais à saluër les passans. Vous diriez que ce sont des eschauguettes, que Dieu a posé en ce lieu, pour aduertir les nauigeans en quel lieu ils sont.

Après qu'on a doublé ce eap, l'on rencontre (tirant vers l'Orient) plusieurs haures. Le principal de tous est celuy, que les Portugais pour sa beauté appellent *Fermoso*: puis on trouue vn sein, qu'on appelle Lac, pour ce qu'il ressemble à vn Lac: & auprès d'iceluy est le fleuve de S. Christofle, faisant en son enbouchure trois petites Isles. Suyt apres ceste contrée, qu'on appelle la Terre de Noël, pour auoir esté trouuée au commencement par les Portugais és festes de Noël: & parce aussi qu'il y fait vn froid continuel. Elle est fort descrite à raison des furieuses tempestes, que plusieurs vaisseaux y ont expérimenté à leur grand dommage, tellement qu'elle n'est pas, selon le dire de quelques vns, moins redoutée pour ceste cause, que le cap de bonne esperance. Elle finist au promontoire qu'on nomme de la Pescherie, & de là poursuyuant la mesme route iusques au fleuve Magnice, est le Royaume de Buttua, qui arriue du costé de la terre ferme *Terre de Noël descrite pour les tempestes.* aux montagnes de la Lune, & au fleuve Brauaghul. Depuis le fleuve Magnice iusques à celuy de Cuama, est la coste de Soffala. Mais auant que venir à la description d'icelle, il faut dire vn mot des habitans des contrées qui ont esté maintenant descrites: lesquels sont tous aussi noirs, que les Ethiopiens qui demeurent sous la Zone torride: bien que ceux du cap de bonne esperance soient au 35. degré de latitude Australe: tellement qu'il est *Buttua Royaume.* *Ethiopiens noirs pour quoy?*

clair, que ceste noirceur ne vient point de la chaleur du Soleil, veu que les Brasiliens & autres du Peru, qui sont aussi sous la Zone torride, ne sont pas de telle couleur: & ceux qui sont subjects au Preste-jan, ont le teint comme l'aunastre: partant il semble plus croyable, que cela vient de race, plustost que de la terre. Et pour preuue de ce, il y a en ceste mesme coste des peuples, qui sont blancs de couleur: lesquels toutesfois s'approchent plus de l'Æquateur, que ceux-cy, comme nous verrons cy apres.

Magnice fleuve. Mais poursuyuons nostre route. Le fleuve Magnice, ou commence du costé d'Occident la coste de Soffala, est vn des plus grands & plus renommez de toute l'Affrique. Il se deriue du premier Lac, duquel nous auons dit que le Nil prend sa source, qui est à douze degrés de latitude Australe: & passant par le Royaume de Monomotapa, & les montagnes de la Lune, se discharge finalement dans la mer du costé du Sud, à 23. degrés & demy. Apres cela vient le cap des courantes, & puis ceste autre riuiera tant fameuse de Cuama, laquelle se desgorge dans la mer avec sept bouches, qui sont cinq petites Isles, tout de mesme que le Nil: aussi prend elle sa source du mesme Lac; combien que le Nil ait son cours vers le Septentrion, se deschargeant dans la mer Mediteranée, & celle-cy quasi tout au contraire entre le Midy & l'Orient. Mais la coste de Soffala, qui est entre ces deux riuieres Magnice & Cuama, ne s'estend pas guere auant, dans la terre ferme, à cause que le Royaume ou l'Empyre de Monomotapa occupe tout le pais au dedàs. Ceste coste de Soffala depuis l'emboucheure de Magnice iusques au cap des courantes, est du tout

Cuama fleuve.

Coste de Soffala.

Bancs de la Iuifue.

Ville des Mahometains en Soffala.

sterile & deserte, mais depuis ledit cap iusques au fleuve Cuama, elle est habitée & assez fertile. Vis à vis du cap des courantes, entre iceluy & la grande Isle de S. Laurent, autrement appelée Madagascar, sont les bancs ou escueils qu'on nomme *Baixos da Iudia*, c'est à dire de la Iuifue ou Iudée, si redoutez de ceux qui nauigent en ceste mer, qu'ils tremblent de peur, iusqu'à ce qu'ils les ayent passez. Et non sans cause, car plusieurs nauires ont fait briz contre iceux, mesmement vn l'an 1585. comme nous dirons cy apres. Mais retournant à la coste de Soffala, combien que les originaires du pais soient comme vne table d'attente, n'ayans aucune Religion ny bonne ny mauuaise; toutesfois depuis six vingts ans en ça on d'auantage, c'est à dire vn peu auant que les Portugais n'arriuaissent és Indes, quelques Mahometains de secte, partis

de Quiloa & de Magadoxo, estans venus là pour y trafiquer avec les naturels, & trouuans que le pais estoit riche, resolurent de s'y arrester : de façon qu'ils bastirent vne ville en vne des Isles que fait la riuiera Cuama, qu'ils appellerent Soffala, de mesme que la coste. Mais les Portugais y estans venus quelque temps apres, y bastirent aussi vn fort avec le congé du Mahometain, qui gouuernoit en la ville de Soffala, combien que par apres s'en estant repenty, il voulut ruyner, & mettre à mort tous les Portugais. Lesquels non seulement se deffendirent vaillamment, mais encore l'allerent tuer dans sa propre maison ; d'ou s'estant ensuiuy vn grand tumulte pour la succession du gouuernement entre le fils & le gendre du defunct, les Portugais presterent secours au fils, qui se vint retirer à eux, & avec leur ayde il fut déclaré Roy : tellement que depuis il leur fut tousiours bon & fidelle amy ; toutesfois il en y a qui disent, qu'il leur est encore tributaire. Quoy qu'il en soit, les Portugais ont vne bonne forteresse sur la riuiera de Cuama, & de là vont trafiquer avec les habitans tant de Soffala, que de Monomotapa, troquans quelques draps de soye, & de coton, qu'ils apportent de Cambay, avec de l'or, de l'yuoire, & de l'ambre gris. Car ce pais est fort riche de ces choses. Ils en tirent encore d'icy force serfs ou esclaves, parce que ce sont les meilleurs & les plus robustes de tous. Mais d'autant qu'il nous faut parler cy dessous du Royaume de Monomotapa, pour en donner au prealable quelque cognoissance, il faut sçauoir, que toute la terre ferme, qui est entre ces deux riuieres Magnice & Cuama, commençant depuis leur source iusques à leur embouchure dans la mer (si nous laissons à part la coste de Soffala) appartient au Royaume de Monomotapa. Que si on y comprend ladite coste, il sera comme vne Isle borné de tous costés d'eau. Ce Royaume est fort abundant en or. Car en plusieurs Prouinces d'iceluy, il y a des minieres, d'ou l'on en tire en grande quantité : mais principalement au Royaume de Toroa, ou l'on void encore des ruynes de quelques grands edifices de pierre, fort antiques, qui peuuent estre parangonnez, pour leur grandeur & beauté, aux œuures des anciens Romains. Et pour ceste cause il y a des auteurs qui estiment, que le Roy Salomon, & apres luy les autres Roys Hebreux, retiroient d'icy l'or, qu'ils faisoient venir de trois en trois ans (selon que l'escriture tesmoigne) d'un pais nommé Ophir, qu'ils disent estre Soffala ou Cephala : car les 70.

Forteresse des Portugais en Soffala.

Limites du Royaume de Monomotapa.

Abondance en or.

Si c'est Ophir? Voyez Ortelius en son thesor verbo Ophir.

interpretes l'appellent *σούφειρα*, ou *σάφειρα*, nom qui s'approche fort de Soffala. Outre ce les originaux disent (ainsi que le rapporte Thomas Lopez en sa nauigation de l'Inde) qu'ils ont des liures, ausquels il est escrit que le Roy Salomon faisoit venir d'icy tout l'or qu'on luy apportoit. Toutesfois nous auons dit ailleurs, qu'il nous sémloit plus probable, que ce fut la Chersonesse d'or, ou bien toute ceste contrée qui est depuis le Pegu iusques à Malaca, avec l'Isle de Sumatra, d'autât que ce païs est fort riche, tant en minieres d'or, qu'en autres choses, qu'on apportoit de là au Roy Salomon, comme sont des pierres precieuses, des singes, des paons, d'yuoire, & d'un bois excellêt, que l'Escripture sainte appelle Thyin: toutes lesquelles choses se retrouuent en l'Inde Orientale, mais non pas à Soffala, horsmis l'or & l'yuoire; ny au Peru aussi, que quelques vns veulent estre l'Ophyr de l'Escripture, car il n'y a point d'yuoire ny de ce bois excellêt, que nous auons dit. Or au Royaume de Monomotapa il y a si grand nombre d'Elephans, qu'on tient que ceux qu'on y tue chascque année, montent à plus de cinq mille: & pour ce l'yuoire (qui sont les dens de ceste beste) y est à fort bon compte. Le Roy de Monomotapa est fort riche & puissant. Il a beaucoup d'autres Roys sous soy, qui luy font hommage, & luy payent tribut: tellement que son domaine s'estend bien auant en long & en large, venant aboutir presque au cap de bonne esperance. Car le Royaume de Toroa, ou il y a des minieres d'or si riches, & qui luy est subiect, auoisine fort ce promontoire. Il entretient tousiours un grand nombre de soldats, qu'il depart en diuerses Prouinces, les tenant là comme en garnison, lors qu'il n'a point de guerre, partie pour monstrier sa puissance & grandeur, partie aussi pour maintenir son Estat en paix. Quelques vns disent, que ses principales forces consistent en une legion de femmes, qui habitent seules sans compagnie d'hommes en une Prouince, que le Roy leur a baillée, & vont à la guerre comme les anciennes Amazones. Elles se bruslêt aussi le tetin droit, pour tirer mieux de l'arc (car ce sont leurs armes ordinaires) & combattent le plus souuent contre les Giachas, peuples cruels & farouches, dont a esté parlé cy deuant, ausquels elles ne cedent point, ny en prouësse, ny en subtilité, ny en experience; estans fort courageuses, & exercitées aux armes. Voylà ce qu'aucuns en ont escrit. Toutesfois cela n'est pas encor fort verifié. Les armoiries du Roy de Monomotapa sont une

*Richesse
de puissance
du Roy.*

*Legion
d'Amazones.*

petite hoüe au manche d'yuoire, & deux fleches. La hoüe c'est pour faire entendre à ses subiects le soing qu'ils doiuent auoir de cultiuier la terre. L'vne des fleches est pour signifier qu'il a du pouuoir, pour chastier les meschans & rebelles: & l'autre pour monstrier qu'il a des armes pour se deffendre contre ses ennemis. Les enfans des Roys qui luy sont tributaires, sont nourris & esleuez en son palais, tant pour leur faire apprendre les coustumes & ceremonies de la Cour, que pour contenir leurs Peres en son obeïssance. Il enuoye tous les ans vn Ambassadeur à tous ces Roys & autres grands Seigneurs de son Royaume, qui ont des vassaux, pour allumer le feu nouueau, qu'ils appellent: ce qui est vne ceremonie instituée pour preuue de leur fidelité: & se faict en ceste sorte. Quand l'Ambassadeur enuoyé du Roy tout expréz, arriue à la maison de quelqu'un de ces Roys ou Princes, l'on tue soudain tout le feu qu'il y a, & ne s'en allume point d'autre, iusqu'à tant que l'Ambassadeur en aye faict de nouueau, d'où il faut que tous les subiects de ce Prince en prennent, & en portent en leurs maisons. Que s'il y a quelqu'un qui face autrement, il est estimé traistre ou desloyal à son Prince, & chastié comme tel. Ce sont les principales choses qu'on raconte de ce pays: mais auant que dire comme la foy Chrestienne y a esté plantée, il est necessaire de parler encore de l'Isle du Mozambique. Ayant dōc passé toutes les bouches du fleuue de Cuama, l'on trouue vne autre riuere appellée Qualimane, sur laquelle les Portugais font vn grand trafic, & le Roy de Gilqa, qui commande en ce pais-là, leur est confederé. Suit apres la riuere & le Royaume d'Angoscia, & puis vne autre appellée Mafute, qui n'est qu'à neuf lieues du Mozambique.

Armoiries du Roy.

Ceremonie du feu nouueau, preuue de fidelité.

Qualimane fleuue.

Or le Mozambique estoit iadis, comme quelques vns disent, vn promontoire appellé des anciens Prasum, mais à present c'est vne Isle sur la coste d'Afrique à 15. degrés de latitude Australe, ayant deuant soy deux autres petites Isles, qui sont comme alignées, & quasi à droict fil de la terre ferme; dont ie coniecture que l'eau ayant peu à peu gaigné la terre, a faict ces Isles au lieu du Cap qui y estoit. La plus Orientale de ces deux Islettes, porte à present le nom de S. George, & l'autre de S. Iacques: toutes deux sont inhabitées, & de petite estendue: mais celle du Mozambique est bien peuplée, combien qu'elle est assés petite, n'ayant pas plus de large, qu'est la portée d'une arquebuzc, & de long quatre fois.

Mozambique iadis promontoire, maintenant Isle.

*Figues
d'Inde.*

autant: ou comme disent quelques vns, cinq cens pas de l'ogueur, le pais est tout plainier, & le riuage aussi. Elle porte force palmes d'Inde, dont a esté parlé ailleurs; & vne sorte de figuiers, qui viennent à mourir tous les ans, & tous les ans renaissent, n'ayans qu'une seule branche, en laquelle il y a plusieurs figues, qu'on mange toute l'année: car les vnes meurissent apres les autres. Elles sont plus longues, que larges, & surpassent quatre fois en grandeur celles d'Europe. C'est vne viande commune & fort saine: les cueilles sont longues de la hauteur d'un homme de stature mediocre, & larges de cinq ou six pans. Quand le figuier s'en va mourir, il laisse vne racine, de laquelle sort vn nouuel arbre. Il y a encore

*Ananas
au.*

vn autre fruit qu'on nomme Ananazes, de la façon d'un cocombre fait en cylindre, d'un pa de l'ogue pour le moins, iaune de couleur, & couuert de petites peaux, ou bourfes, qui s'esleuent vn peu en façon d'ecailles, & sont vertes au bout, & d'une odeur tres-souetue. On le mange apres qu'on l'a pelé tout entier: & le goust est fort semblable à celui d'un coin, combien qu'il est plus agreable. Ces mesmes fruits viennent encore en l'Inde, d'où, peut estre, on les aura portez icy. Je laisse à part les citrons, oranges, & autres fruits qu'il ont semblables aux nostres. Quant au

*Queue
de bre-
bis aussi
grande
qu'un
des quar-
tiers.
Poules
qui ont
la chair
et les os
noirs.*

bestial, les brebis de ce pays ont vne queue si grande, qu'elle est suffisante pour nourrir autant de personnes qu'un des 4. quartiers de la mesme beste; de sorte qu'on fait cinq parties esgales d'une brebis, dont la queue en est vne. Les poules ont non seulement le plumage noir, mais aussi la chair & les os: combien qu'elles sont d'un fort bon goust. On appelle les originaires de ce pais, Caffres, tout de mesme que ceux de Soffala, & tous les habitans de ceste coste, depuis le Cap de bonne esperance, iusqu'au Mozambique, & de là on nomme toute icelle contrée Caffraria. Ce sont gens pour l'ordinaire fort rudes & barbares: ils vont tous nus sans l'honnesteté, que les hommes couurent d'un linge, mais les femmes vont couuertes depuis la poitrine iusques à demie iambe. Ils n'adorent point aucune Idole, & n'ont rien qui les destourne de la vraye Religion, sinon leur brutalité, ou le peu de capacité

*Citadel-
le des
Portu-
gais au
Mozam-
bique.*

qu'ils ont: car à peine recognoit-on en eux quelque estincelle de raison. Toute l'Isle du Mozambique est possédée par les Portugais qui y ont vne ville, & vne citadelle assez forte, ou ils tiennent bonne garnison: parce que c'est comme la clef des Indes: de façon que s'ils auoyent perdu ceste Isle, difficilement pourroyent

ils y aller : car elle leur sert de rafraichissement , & pour y faire aiguade , & se reposer quelques iours durant , afin de pouuoir continuer leur nauigation : autrement il seroit fort mal aisé de faire ce voyage tout d'une traite. Elle leur sert aussi tant pour assurer le traffic, qu'ils ont avec les peuples d'alentour , comme de Soffala, & de Monomotapa, d'où ils tirent grande quantité d'or; que pour tenir en bride les Roys ou Princes de ceste coste qui leur sont presque tous subiects, ou aliez. Les Religieux de l'ordre de S. Dominique y ont vn Cōuent. C'est tout ce que nous auons peu trouuer de ce pais: venons maintenant à ce qui est de la foy.

Comme le P. Gonzale Sylueira fust enuoyé de Goa au Mozambique, d'où il alla trouuer le Roy de Inambane, qu'il conuertit à la foy, & puis celuy de Monomotapa.

CHAPITRE IX.

FIN d'entendre mieux l'occasiō, pour laquelle le P. Gonzale Sylueira fust enuoyé au Mozambique, il faut sçauoir, qu'au pres de ceste Isle, il y a en la terre ferme, vers le Cap de bonne esperance, vn Royaume appellé Inambane, le Roy duquel l'an 1559. auoit deux enfans masles: dont le puisné ayant entendu de quelques Portugais, qui trafiquoyent au Royaume de son pere, maintes choses de la loy des Chrestiens, espris d'un grand desir d'en sçauoir dauantage, & de l'embrasser s'il la trouuoit à son goust, il s'en vint au Mozambique pour ceste cause. Le Capitaine de la forteresse sçachant qui il estoit, & ce qui l'auoit porté là, le receut fort humainement, & avec grand honneur. Puis il feit en sorte qu'il fust suffisamment instruit és choses de nostre foy: laquelle luy pleust & agrea si fort, qu'il demanda instammēt le baptisme. Il fust donc baptizé, avec grande magnificence, & reuestu non seulement en son ame de la robbe d'innocence, mais aussi le corps de tres-riches accoustremens, que le Capitaine luy donna: puis s'en voulant retourner en son pais, on luy bailla quelques Portugais, qui l'accompagnerent iusqu'à là. Estant de retour, comme son pere, son frere, & ses autres parens le virent venir si ioyeux (car il monstroient en son visage vne nouuelle allegresse) ils luy demandent ce qu'il auoit, pourquoy il estoit si ioyeux? Luy commence à leur raconter le bon accueil qu'il auoit receu des Portugais, & à dire tāt de loüanges.

*Le fils
puisné
du Roy
est baptisé.*

*Esmeus
son pere
& son
frere à
desirer le
mesme.*

de la loy des Chrestiens, qu'un chacun en conceuoit vne grande opinion: si bien que son frere aîné, qui deuoit succeder à la couronne, esmeu du mesme desir, estoit resolu d'aller aussi au Mozambique pour estre baptisé: mais il fust retenu par l'auctorité de son pere, qui ne voulut pas le luy permettre: disant qu'il falloit au prealable peser plus meurement la chose, & attendre iusqu'à ce qu'il eust pris resolution de ce, qu'il deuoit faire luy mesmes.

*Le Roy
de Mo-
nomota-
pa desire
l'alliance
des Por-
tugais.*

Car s'il pouuoit recouurer des gens, qui l'informassent entiere-ment de ce qui estoit contenu en la loy des Chrestiens, par adu-enture qu'il la receuroit. Son fils puîné desia Chrestien entendant cela, s'en retourne au Mozambique, & fait sçauoir au Capitaine de la forteresse la bonne disposition, en laquelle estoit son pere, son frere, & plusieurs autres pour receuoir la foy de IESVS-CHRIST: adioustant qu'il n'estoit besoin sinon d'enuoyer des Prestres, pour cueillir la moysson desia meure, & toute preste à couper. En ce mesme temps les Portugais receurent nouuelles, que le Roy de Monomotapa desiroit auoir leur alliance, dont ils furent extremement ioyeux. Car ils esperoyent par ce moyen non seulement auoir le commerce libre en toutes ses terres, avec vn grand gain & profit: mais encor y planter la foy Chrestienne. Ils donnerent aduis de tout cecy au Viceroy de l'Inde, lequel communiqua de cest affaire avec le P. Antoine de Quadros, qui estoit lors Prouincial de la Compagnie de IESVS en l'Inde, luy demandant quelqu'un de la mesme Compagnie, pour enuoyer là. Le P. Prouincial apres meure deliberation, & beaucoup de Messes & oraisons qu'il feist offrir à Dieu à ceste intention, nomma en fin le P. Gonzale Sylueira, personnage non moins illustre de race, qu'en vertu: car pour l'extraction de son sang, il estoit enfant legitime du Comte de Sortella, maison fort noble & ancienne en Portugal, & pour sa rare vertu il auoit esté Prouincial de ladite Compagnie en l'Inde, & ne faisoit que sortir de charge lors qu'on luy donna ceste commission, qu'il estiua beaucoup plus que tous les honneurs & Prouinces de la terre. Il eust pour cōpagnons d'une si glorieuse entreprise, autres deux Peres, lesquels partirent avec luy de Goa l'an 1560. & en peu de temps arriuerent au Mozambique fort heureusement. Le Capitaine de ceste place les logea dans la forteresse mesme, leur faisant vn tres-honorable accueil; & apres les auoir faict rafraischir quelques iours, il leur donna six soldats, pour leur seruir d'escorte & conduire

*Le P.
Gonzale
Sylueira
enuoyé
au Mo-
zambic.*

conduite iusqu'au Royaume d'Inambane, là ou si tost qu'ils furent arriuez, ils tomberent tous trois malades, à raison des grâdes chaleurs, qu'il fait en ceste region, car elle est sous la Zone torride. Et encore que le P. Sylueira fut homme robuste de corps, si fut il bien tost abbatu à cause de la vehemence de la maladie, qui estoit vne douleur des yeux, si aspre & si violente, qu'il fut en danger de la vie. Or si tost qu'ils furent remis en santé, ils s'en vont à la ville de Tonge, ou le Roy faisoit sa demeure, qui les reçoit avec vne singuliere ioye & allegresse, mesmes entendant qu'ils estoient venus là tout exprés pour luy enseigner la loy diuine. Ils commencent donc aussi tost qu'ils furent arriuez, à publier la bonne nouuelle de la loy de grace, apportée en terre par IESVS-CHRIST nostre Sauueur, qui donna telle efficace à leurs parolles, qu'en peu de temps ils luy eurent gagné beaucoup d'ames. Tellement qu'apres auoir, durant quelques iours, instruit plus particulièrement ceux, qui estoient resolz d'embrasser la foy Chrestienne, ils baptiserent le Roy, la Royne, leurs enfans, & autres parens, nommémēt la sœur du Roy; brief tous les principaux Seigneurs du Royaume, & vne grande multitude de peuple. Le Roy eut à nom Cōstātin, la Royne, Catherine, la sœur du Roy, Isabeau. Cela fait le P. Sylueira laisse les autres deux Peres en ce pais là, afin de maintenir les Chrestiens en la foy, & en gagner tousiours d'autres à icelle. Quāt à luy il prēd son chemin vers Monomotapa; iugeant que de la conuersion de ce Prince, dependoit celle de tous les autres d'alentour. Mais auant que traicter de son voyage, nous dirons en brief, ce qui aduint depuis à ces deux Peres, qui furent laissés au Royaume de Inambane, puis que nous n'auons pas l'occasion d'en parler cy apres: car il nous faut suyure la route du Pere Gonzale Sylueira. Doncques ces deux Peres, qui s'arresterent à Inambane, firent premierement bastir vne Eglise, qui fut dediee à l'honneur de l'Assomption de nostre Dame, & trauaillerent beaucoup audit pais pour la maintenance de la foy, & l'accroissement d'icelle: mais l'un d'iceux pour cause des infirmités & maladies, qui l'affligeoient continuellement en ces quartiers, fut contrainct se retirer à Goa; l'autre nommé le P. André Fernandez, demeura parmy ce peuple plus de deux ans, ou il endura beaucoup de trauaux, afflictions, & persecutions, se trouuant bien souuent en danger de sa vie. Car ce peuple, & pareillement tous les autres de ceste contrée

*Baptize
le Roy
& toute
sa famille.*

*Laisse
deux Peres à Inambane pour continuer bien encom-
mandé.*

là, qu'on nomme Caffres, sont gens cruels & barbares: & ne peuvent souffrir qu'on les avertise de ce qui leur convient pour leur salut, & beaucoup moins qu'on les reprenne du mal, qu'ils font.

*ce qui
aduient
à ces
Peres.*

A raison de quoy ce Pere reçut tout plein d'affronts & iniures de ces barbares, & vne fois entre autres il cuyda estre tué & massacré d'iceux, parce que sçachant qu'ils se preparoient, pour faire des jeux & Sacrifices à l'honneur de leurs Idoles, & que le Roy mesme s'y debuoit trouuer, luy esmeu du zele de l'honneur de Dieu, s'en va d'un grand courage, appuyé sur le diuin secours, renuerser sans dessus dessous tous les apprests des jeux & sacrifices, & apres se met à fouler aux pieds tout ce qu'ils auoient là pour cest effect. Ce qui offensa & irrita tellement le peuple, que peu s'en fallut qu'il ne le massacra. Le Pere donc voyant qu'il ne faisoit aucun profit avec ces barbares, & que c'estoit peine perduë de s'arrester d'auantage avec eux, à cause de leur inconstance & barbarie, se retira au Mozambique, & de là à Goa. Mais

*Le Pere
Gonzale
Sylueira
s'en va à
Mona-
metapa.*

pour retourner au P. Gonzale, apres qu'il eust passé l'Isle du Mozambique, regeant tousiours la coste d'Afrique, il arriue en fin à l'emboucheure d'une riuire appellée Mafuté, esloignée du Mozambique vers le Sud-ou-est enuiron 9. lieues: là ou suruint vne grande tempeste, qui battist si furieusement la Galere, qu'elle reçut grande quantité d'eau: de façon que tous pensoient estre perdus. Le Pere voyant ce danger se mit à genoux; & les mains esleuées au ciel, prie nostre Seigneur de vouloir appaiser son ire. Ce qu'il luy accorda tout incontinent. Car soudain la tempeste cessa, & la Galere print port le iour de Sainct Hierosme. Le Pere voulut dire la Messe pour rendre graces à Dieu de

*ce qui
luy ad-
uient en
chemin.*

ce benefice, & à ces fins il fit dresser sur le riuage vn autel portatif: mais la chaleur du Soleil estoit si vehemente, que les Portugais, qui l'accompagnoient, bié qu'ils eussent des foliers, ne pouuoient supporter la chaleur qu'ils enduroient aux pieds, causée de l'ardeur de la terre. Le Pere aussi ayant dict la Messe, se trouua la teste toute couuerte de bouteilles; & jaoit qu'ils eussent des medicamēts propres pour le guerir, toutesfois il ne voulut point s'en seruir, poussé d'une sainte haine de soy mesme, laissant faire son cours à la nature. Ils s'arresterent en ce port trois iours, pour

*Quali-
mane
fleuve.*

calfeutrer leur Galere, & le quatriesme ils se tournerent embarquer, & voguerent heureusement iusques au fleuve de Quilimane, ou ils surgirent en fin, bien qu'avec difficulté, à cause des

vents contraires, qu'ils eurent à l'emboucheure; mais iceux s'estans accoisés, ils descendent à terre, & s'en vont voir le Roy de Giloa Mingoaxames, amy & confederé des Portugais, duquel ils furent reçeus fort humainement. Et bien qu'il fut Mahometain, si donna il congé au Pere de prescher la foy Chrestienne en ses terres, d'autant que les superstitions de la secte de Mahomet luy desplaioiét fort, & souhaittoit grâdemment que ses vassaux se rendissent Chrestiens. Le Pere ne voulut pas faire icy long sejour, par ce qu'il desiroit arriuer bien tost au Roy de Monomotapa, estimant que celuy-là estant conuertty à la foy, il seroit aisé d'y attirer les autres Roys d'alentour, qui sont tous moindres que luy, & plusieurs d'iceux ses vassaux. Ils partent donc de Giloa, & tirent droit à la grande riuere de Cuama, dans laquelle voulans entrer, ils furent rejettez par vne tempeste fort dangereuse, iusques à vn petit sein qu'on nomme Linda: mais apres ils reuindrēt à l'entrée dudit fleuue, là ou le Pere voulut offrir à Dieu le S. Sacrifice de la Messe, pour recommander à nostre Seigneur l'affaire qu'il auoit en main; & pour la mesme cause il admonesta les Portugais, de faire oraison à Dieu plus seruement que de coustume: afin qu'il luy pleust donner vn heureux succez à sa Mission, puis que desia ils commençoient d'entrer es terres du Roy de Monomotapa: les priant aussi de ne prendre pas en mauuaise part, s'il se retiroit de leur compagnie durant les iours, qui restoient de la nauigation, pour s'addonner plus particulièrement à l'oraison; car en chose de si grande consequence (ce disoit-il) on a besoin d'vn plus grand ayde & secours du S. Esprit, que le commun. Apres donc qu'il eut dit Messe, il se va mettre à vn coin de la Galere, & fait estendre deuant soy vne voile, qui luy seruoit comme de courtine. Il demeura là retiré l'espace de huit iours, pendant lesquels il ne prenoit pour sa nourriture, qu'une petite poignée de pois, & ne beuuoit qu'un verre d'eau, & ce vne fois le iour tant seulement: quant au reste du temps, il l'employoit ou à l'oraison ou à la lecture de la vie des Saints.

*Cuama
riuere
celebre.*

*Prepara-
ratifs du
P. Syl-
ueira à
l'entrée
du pais
ou il al-
loit.*

Apres qu'ils eurent vogué huit iours contre-mont la riuere de Cuama, ils arriuerent à vn bourg fort grand & bien peuplé nommé Sena; d'ou le Pere Sylueira enuoya vn Portugais pour saluer de sa part le Roy de Monomotapa, & l'aduifant de son arriuée, luy demander congé de l'aller trouver. Cependant il s'arreste là, pour entendre la responce du Roy. Tandis qu'il y sejour-

*Sejour-
ne à Sen-
na, & le
profit
qu'il y
fait.*

*Le Roy
de Inha-
mior de-
sire estre
baptisé.*

*Voyage
du Pere
Sylveira
vers Mo-
nomota-
pa.*

na, il entendit en confession des Portugais, qui demeuroient en ce bourg. En quoy il profita beaucoup, car il feit quitter les concubines à plusieurs d'iceux, & en fit marier legitiment d'autres, avec celles qu'ils ne vouloient laisser. Il enseignoit aussi publiquement la doctrine Chrestienne, & dans vn mois qu'il y fut, il baptisa quelques cinq cens esclaves, que les Portugais auoient achepté. En ce temps aussi il visita souuent le Roy d'Inhamior, tributaire de celuy de Monomotapa : par ce que son domaine, & le lieu ou il tient sa Cour, n'est qu'à trois quarts de lieuë de Sena. Ce Prince fut tellement esmeu des remonstrances, que le Pere luy fit, qu'il se vouloit rendre Chrestien avec sa femme, & ses enfans: mais d'autant que le Pere n'auoit personne pour luy laisser, afin de le maintenir en la foy, apres qu'il seroit party de Sena, & d'ailleurs craignant d'offencer le Roy de Monomotapa, s'il eut sçeu qu'il auoit donné le baptisme à vn sien vassal, plustost qu'à luy; il le consola le mieux qu'il peust, l'exhortant de perseuerer en son bon propos, & remettant l'affaire à vne autre saison. Deux mois s'estoient desia escoulez, & l'on n'auoit encore aucune response du Roy de Monomotapa, dont on s'estonnoit fort, mais là dessus voicy arriuer vn Portugais nommé Antoine Cayade, qui faisoit sa demeure ordinaire en la ville Royale de Monomotapa, & auoit esté enuoyé tout exprés du Roy vers le Pere Gonzalez, pour le conduire iusques à sa Cour. Le Pere ayant receu ce message fait vn petit paquet des ornemens sacrés, desquels il se seruoit au saint Sacrifice de la Messe, ou il y auoit vn Calice & vne pierre sacrée, avec le reste qui est necessaire pour cest effect, & chargeant tout cela sur ses espaules, se met en chemin, marchant à pied, sans vouloir permettre qu'aucun l'aydast à porter son fardeau. Aussi en ce pais là on ne trouue point des cheuaux, ny autres montures, sinon des Elephans. Quand il rencontroit quelque riuiera, ou ruisseau (qui sont là fort frequens) s'il les pouuoit passer à gué, il se mettoit dedans l'eau quelquefois iusques au col, portant son paquet sur la teste. Mais quand ils n'estoient pas gueables, les Caffres pouffoient en nageant vn vaisseau, dans lequel estoit le Pere portant son paquet : & voyageant de ceste façon, il arriua avec ses compagnons la veille de Noel sur le tard, à vn village nommé Chetuchin, assés proche de la ville de Monomotapa, là ou le Pere dict ses trois Messes, avec vne singuliere consolation spirituelle, tant de son costé, que de celuy des Por-

tugais, qui l'accompagnoient. Il s'arresta là encore huit iours, pendant lesquels il recommanda sa mission à Dieu, avec plus de serueur que iamais. Finalement le iour de la Circoncision de *Arrive à Mo-*notre Seigneur, il arriue à la ville de Monomotapa capitale de *notapa.* tout le Royaume. Le Roy ayant esté aduertey de sa venue, l'envoye incontinent saluer par vn de ses Gentils-hommes, qui luy presenta de la part de sa Majesté, premierement grande quantité d'or, puis quelques bœufs qu'ils estiment là beaucoup, & plusieurs seruiteurs ou esclaves, pour les offices domestiques; car il auoit entendu des Portugais qui trafiquoyent en sa Cour, que le Pere estoit de grande maison, & pource il le vouloit traicter comme sa qualité requeroit. Le Pere remerciant tres-humblement le Roy de l'honneur qu'il luy faisoit, & de l'affection singuliere, qu'il monstroit en son endroict, luy renuoye tous ses presents, & luy fait dire par Antoine Cayade, que sa Majesté cognoistroit bien tost quelles richesses il estoit venu querir en son Royaume. Le Roy s'elmerueilla grandement de cela, & parlant à ses Courtisans; C'est homme (dict-il) n'est pas comme les autres, qui cherchent avec tant de soin par mer & par terre, l'or & les richesses. Ayant donc conceu tres-bonne opinion du Pere, comm'il l'alla saluer le lendemain, sa Majesté l'accueillit avec *L'accueil que le Roy luy fait.* plus grand honneur & demonstration de bien-ueillance, qu'il n'auoit encore iamais receu personne. Car il le fit entrer dans son cabinet mesme: ou aucun estranger ne souloit auoir accez. Sa mere estoit là assise sur vn tapis; & il fist asseoir aussi le Pere sur vn autre près de soy, puis commence à l'interroger par l'entremise d'Antoine Cayade, qui luy seruoit de truchement, lequel il fit tenir près de la porte du cabinet. Le Roy donc demande au Pere combien d'or il vouloit, combien de bœufs (car ils n'estiment pas moins en ce pais là ces animaux, que nous faisons icy l'or & l'argent) combien d'arpens de terre; & finalement combien de femmes, ne sçachant pas la profession qu'il faisoit. Le Pere luy respond qu'il ne demandoit rien de tout cela, ains sa Majesté mesme. Le Roy se tournant vers l'interprete: Il faut (dict-il) necessairement, que cet homme, qui ne desire rien de ce que les autres prisent tant, soit quelque chose de plus, que le reste des hommes. En fin apres auoir esté quelque temps ensemble, le Roy nonobstant son premier refus, luy fait derechef offre des presens susdits, & d'autres encore. Mais le Pere le remercia tres

estoit bien marry de ne pouuoir entendre les propos que ceste Royne luy tenoit chasque nuit. Le P. luy respond que c'estoit vn langage diuin, lequel personne ne pouuoit entendre, s'il ne suyuoit la loy du fils de ceste Royne, qui estoit le Createur du ciel & de la terre, & Redempteur du genre humain. Le Roy ne dict autre chose pour lors, combien qu'il fist quelque signe du visage, monstrant de vouloir faire son profit du conseil du Pere. Mais deux iours apres il luy fit dire clairement par Antoine Cayade, qu'il estoit resolu de se rendre Chrestien, & sa mere aussi, le priant bien fort de s'en venir au plustost pour les baptiser. Le Pere y alla, mais il ne voulut leur conferer si tost le baptisme, ains attendit quelques iours, durant lesquels il les catechisa, & leur declara briuelement les commandemens de Dieu, & les principaux poincts de la foy Chrestienne, & à plusieurs autres Gentils-hommes de sa Cour. Quand le Pere iugea qu'ils estoient suffisamment instruits, il leur conféra le baptisme avec grande solemnité le 15. iour apres son arriué. Le Roy fust nommé Sebastien, & sa mere Marie. Ce mesme iour le Roy sçachant bien que le Pere ne voudroit pas prendre de l'or pour present, il luy enuoye cent bœufs. Le Pere les receut pour ne desplaire à sa Majesté, mais il les enuoya tout incontinent à Antoine Cayade, à fin qu'il les fist tuer & despecer pour estre distribuez aux pauvres. Cette liberalité, & munificence du Pere, fist esmerveiller grandement tout le peuple; de façon qu'on ne faisoit que parler de luy, avec grande loüange. Il y eut aussi quelques trois cents Gentils-hômes, & mesmes des principaux Seigneurs du Royaume, qui receurent pareillement avec le baptisme le doux ioug de nostre Sauueur. Ceux-cy se monstroyent si affectionnez à l'endroiect du Pere, & de sa doctrine, qu'ils ne bougeoient quasi iamais d'aupres de luy, pour apprendre tousiours quelque chose, & luy faisoient force presens de lait, de beurre, de cheureaux, & choses semblables pour sa nourriture: car ils sçauoyent bien qu'il n'en prenoit pas d'autres: mais encore de celles cy, le Pere n'en touchoit pas guere, ains les distribuoit incontinent aux pauvres, & se nourrissoit tant seulement d'un peu de millet cuit, & de quelques herbes ou fruiets sauuages.

*Parle au
Roy:
mais il
ne la
peut en-
tendre
& pour-
quoy?*

*Le Roy
avec sa
mere est
baptisé.*

*Comme le Roy de Monomotapa faict tuer le P. Gonzale Sylueira:
& ce qui aduint apres sa mort.*

CHAPITRE X.

LE P. Gonzale ayant gaigné à IESVS-CHRIST, le Roy, la Royne sa mere, & les plus grâds Seigneurs du Royaume, le peuple aussi, qui estoit fort edifié de la vie qu'il menoit, desiroit ensuyure l'exemple de son Roy, embrassant comme luy la foy Chrestienne: tellement qu'il y auoit grande esperance que tout ce Royaume viendroît en brief à se soubmettre à l'empire de nostre Sauueur. Là dessus voila que Sathan ennemy de tout bien, enragé de voir qu'on luy arrachoit tant d'ames de ses griffes, & fasché du progrès que le Christianisme faisoit en ce pais là, qu'il tenoit soubz sa tyrannie dés si long tēps, commence à braquer toutes les pieees de sa malice, & à dresser ses engins pour mettre par terre les murs de ce nouveau bastiment spirituel: & afin d'en venir à bout plus aisément, il veut faire sapper au prealable le fondemēt d'iceluy, taschant de mettre à mort le P. Gonzale Sylueira. Il print pour instrumens de son dessein, quatre grands forciers, & enchanteurs Mahometains, les plus cauteleux & rusez qu'on eust sçeu trouuer lesquels auoient credit aupres du Roy. Ceux cy donc s'accordent ensemble, & brassent vne trahison au Pere, forgée plustost dans les boutiques d'enfer. Le principal chef & autheur d'icelle, fut un Cazique Sarrafin, qui se nommoit Minguames, natif du Mozambique. Or comme ces meschans traittres auoient grande puissance & autorité aupres du Roy, ils luy font entendre premierement par personnes interposées, puis par eux mesmes, qu'ils estoient grandement marris de voir, que sa Majesté s'estoit mise de son plein gré en vn euident danger de perdre sa vie, & son Royaume: car ils luy faisoient sçauoir, que ce Gonzale, de quel il se fioit tant, & à qui il faisoit tant de caresses, estoit venu de tout expres de la part du Vice-Roy de l'Inde, & des Seigneurs de Soffala, qui estoient liguez avec les Portugais, non seulement pour espier & recognoistre l'estat & les forces de son Royaume, & les gens de guerre, qu'il pouuoit mettre en campagne, mais aussi pour solliciter le peuple à se reuolter contre sa Majesté: afin que cela estant fait, il en donnast aduis au Vice-Roy & aux autres Seigneurs,

*Sathan
procure
la mort
au Pere
Gonzale
Sylueira.*

*Ses instrumens
ou moyē
neurs.*

*Leur vue
se &
malice.*

Seigneurs, lesquels debuoiẽt venir là dessus, menans des grosses armées, pour luy tollir le Royaume & la vie. Ils adioũtẽt encor, que ce Gonzale estoit le plus meschant & rusé enchanteur, qu'il y eut au monde, & qu'il auoit apporté quant & soy tout plein d'enchantemens pour seduire les personnes, & gagner les cœurs de ses subjets; afin qu'il les eut tous à sa deuotion, pour faire mettre à mort sa Majesté. Car tous ceux (disoient ils) qui se laissoient arrouser de ceste eau (ils entendoient parler du Baptême) y estant adioũtées les parolles des Angariens (ainsi appelloient ils les Portugais) prononcées par Gonzale, soudain ils estoient du tout en son pouuoir, & faisoient tout ce qu'il vouloit. Et pour confirmer encore leur dire, ils adioũtẽt que l'experience auoit desia monstré cecy en plusieurs autres endroits, & partant que sa Majesté aduisast bien à qui il fioit sa personne & son estat: & que s'il laissoit eschapper ce Gonzale sans le chastier, comme il meritoit, qu'il auoit occasion de craindre, que ses subjets estãs diuisés en deux bandes, ne vissent à se mutiner & s'entretuer les vns les autres. Brief ils sçurent tellement desguiser & colorer leur meschante intention, qu'ils firent croire au Roy (qui estoit vn ieune Prince) & à sa mere aussi (laquelle selon la nature des femmes, estoit fort craintifue & soupconneuse) tout ce qu'ils voulurent: de façon qu'il fut conclu & arresté entr'eux de faire mourir celuy, qui leur auoit donné la vie de l'ame. A grand peine auoient ils resolu sa mort, auant mesme que la chose fut sortie hors de leur conseil, que le Pere le sçeut par reuelation diuine, comm'il est croyable. Car ainsi qu'Antoine Cayade le fut venu trouuer; le sçay bien (dit-il) que le Roy a delibéré de me faire mourir: mais ie suis prest, quand il plaira à Dieu, de donner ma vie & mon sang pour son seruice. L'autre ne le pouuant croire aucunement, se print à rire, comme d'une chose quasi impossible, & du tout incroyable. Mais le iour estant venu, auquel il sçauoit par inspiration diuine, qu'on le deuoit massacrer (car personne ne luy en auoit rien dit) il pria ledit Antoine Cayade de luy vouloir faire venir tous les Portugais, qui estoient en la ville, pour les entendre de confession, & leur donner à tous la sainte Communion du precieux corps de IESVS-CHRIST: Car ce iour passẽ (dit-il) ie ne le pourray point faire. L'autre estonné d'auantage d'ouyr telles choses, & ne pouuant se persuader bonnement ce que le Pere luy disoit, s'en va neantmoins querir les

*Les Portugais
appellent
Angariens.*

*Le Roy
delibere
de faire
mourir
le Pere
Gonzale.*

*Le Pere
sçait par
inspiration
diuine le
dessein
du Roy.*

autres Portugais ; mais il ne les trouua pas , car ils estoient sortis hors de la ville ce iour là. Le Pere les attendit iusques à nudy, ayant gardé iusqu'à lors les hosties consacrées ; mais voyant qu'ils ne venoient point , il les consomma toutes : & ce mesme iour il baptisa enuiron cinquâte personnes, ausquelles il distribua quelques chappelets, qui luy estoient restez. Sur le tard arriuerent les Portugais, lesquels il ouyt seulement de confession, ne leur pouuant donner la sacrée Communion. Mais il les exhorta d'estre tousiours constans & fermes en la foy , & au seruice de nostre Seigneur, nonobstant toutes les trauerſes & persecutions, qui leur pourroient aduenir : monstrant luy mesme tant en son maintien qu'en sa face, vne grande serenité & constance : tellement qu'ils voyoient bien, qu'il auoit son esprit fort reposé, combien qu'ils ne sçauoient à qu'elle occasion il leur disoit ces choses. Car personne d'eux ne le sçauoit, sinon Antoine Cayade, auquel le Pere auoit descouuert ce, qu'a esté dict. Vn peu apres il leur bailla les ornemens sacrés, afin qu'ils les portassent à la maison d'Antoine Cayade, pour les garder, de peur qu'ils ne vinsſent entre les mains des infidelles , & ne fussent profanez d'iceux , monstrant par là euidentement qu'il estoit assuré de mourir ceste nuit là. Cependant les Portugais s'estans retirez, le Pere demeura tout seul, reuestu d'une aube, tenant vn Crucifix en la main, & se disposant à la mort, qu'il attendoit d'heure en heure. Antoine Cayade estant retourné derechef pour le voir, le Pere le prend tout doucement par la jouppe à l'endroit de l'estomach : & luy dit, Certainement Cayade, ie suis plus prest à recevoir la mort, que ne sont mes ennemis à me la donner. Quant à moy ie pardonne volontiers au Roy & à sa mere, car ils ont esté seduits par les Mahometains. Apres qu'il eut dit ces parolles avec vne face ioyeuse & allegre, Antoine Cayade se retire, ne se pouuant encore bonnement persuader, que le Roy voulut faire executer vn acte si meschant. Toutesfois par ce qu'il auoit ouy vn peu auparauant quelques propos, que le Roy auoit tenus, monstrant estre plus aigry, qu'il ne cuydoit, contre le Pere ; & que ce iour mesme il l'auoit veu tout pensif, il se doubta de quelque chose. A ceste cause il enuoya deux de ses seruiteurs pour se tenir avec le Pere ceste nuit là : afin qu'ils l'aduissent, s'il aduenoit rien de nouveau. De ces deux seruiteurs on a sçeu depuis toutes les circonstances de sa mort, que nous raconterons presentement. Apres.

*Se pre-
pare à la
mort.*

*Sa con-
stance.*

done qu'Antoine Cayade se fut retiré, le Pere commence à se promener deuant son logis, & ce d'un pas plus viste, que de coustume. L'on eut dit à le voir, qu'il luy tarδοit, ce qu'il desiroit tāt, à sçauoir de sortir hors de la prison de ce corps. Il fichtoit quelquesfois les yeux au ciel, ou il esperoit se voir en brief avec Dieu: tātost il mettoit les mains en Croix, ou les esleuoit en haut, pour offrir (comme il est croyable) sa vie à nostre Seigneur, qui auoit auparauant liuré la sienne en Croix, pour son salut: & tiroit en ce faisant, des grands souspirs du plus profond du cœur. Ayant employé en cecy vne bonne piece de la nuict, & se trouuant vn peu las, il se retire en sa chambre, là ou il se met encor à faire oraison deuant le Crucifix, qui luy estoit resté pour tout soulas. Puis il se jette sur vn liēt de cannes ou roseaux, sur lequel il souloit prendre son repos, & comm' il s'estoit tant trauaillé, il s'endort là dessus du sommeil des justes. Car sur ce poinēt huit soldats, qui le guettoient, ayans apperceu qu'il dormoit, se jetterent soudain sur luy pour l'estragler. L'un d'iceux nommé Mocrumes Gentil-homme barbare, avec lequel il souloit conuerser familièrement, & qui auoit mesmes pris quelquefois le repas avec luy, le tire du liēt, & l'ayant faict tomber à terre, luy monte sur la poitrine, & le soule tellement avec les pieds, qu'il l'escreuante. Là dessus autres quatre le prennent par les pieds & par les bras, & l'ayāt leué de terre, autres deux luy mettent vne corde au col, & la tirent l'un deça l'autre delà: & de ceste sorte ils le tuent, luy ayant fait jetter grande quantité de sang par le nez & par la bouche. Tel fut l'heureux trespas du glorieux martyr le P. Gonzale Sylueira, qui aduint l'onzième du mois d'Aoust l'an 1561. Or apres que les barbares l'eurent meurtry, ils prindrent l'image du Crucifix, qu'il auoit entre les mains, & la mirent en pieces: puis attacherent le corps à vne corde, & le trainerent à vne riuere, qui passe là aupres nommée Monsengesses. Car ces meschans Sarrazins, qui auoient machiné sa mort, dirent au Roy, que si le corps d'un homme si malheureux demouroit sur terre, il infecteroit l'air, & seroit cause d'une griefue pestilence. Le Roy sçachant que le Pere Gonzale estoit mort, & n'ayant encore assouuy sa cruauté, commanda qu'on massacraist aussi les cinquante Chrestiens, que le Pere auoit baptisés le iour precedent: ordonnant qu'on leur ostant au prealable les chappelets, qu'il leur auoit donnés. Les principaux Seigneurs du Royaume (qu'ils appellent

*Les mou-
uemēts
essence-
mens de
son ame.*

*Sū mar-
tyre.*

*Adue-
nu l'on-
zième
d'Aoust
1561.*

*Cruauté
du Roy.*

Encosés) indignés d'un fait si atroce, s'en vont d'un commun accord trouver le Roy, & luy dirent, que s'il estimoit estre iuste de faire mourir ces cinquante personnes, pour avoir permis que le Pere Gonzale leur espanchast de l'eau sur la teste (entendans par cela le baptême) qu'ils estoient aussi compris en semblable faute, voire sa Majesté mesme, & partant qu'ils deburoient tous subir pareille peine. Le Roy entendant cecy, addoucit un peu son courroux, & deux iours apres les Portugais l'allerent trouver, & luy remonstrent le grand forfait, qu'il avoit commis de faire tuer un tel personnage, qui n'avoit eu autre intention, que de pourchasser son salut, & de tout son estat: adioustans que non seulement Dieu iuste juge & vengeur des iniquités le chastieroit, de ce qu'il avoit fait tuer un homme tres-innocent: mais aussi que les hommes vengeroient par armes la mort d'un personnage si noble de sang. Le Roy pour lors commence à s'excuser disant, que c'avoit esté par les suggestions & faux rapports de quelques meschantes gens, qui l'avoient seduit & trompé, monstrant qu'il en estoit tres-marry. Et de fait soudain il fit empoigner & mettre à mort deux d'iceux, & en eut fait autant des autres, s'ils n'eussent gagné au pied. Mais si tost qu'ils eurent senty quelque vent de la repentence du Roy, ils se retirerent plus viste que le pas: combien que le Roy les fit chercher avec grand soing & diligence, afin de leur donner la recompense qu'ils meritoient, pour un si damnable conseil. L'un de ceux qui euaderent, fut ce meschât Minguamies, qui avoit tramé & ourdy toute ceste conspiration. Le P. Antoine de Quadros, qui estoit lors Prouvincial de la Compagnie en l'Inde, & avoit enuoyé le P. Gonzale à Monomotapa, ainsi qu'à esté dict, ayant receu les nouvelles du glorieux martyr d'iceluy, en fust d'un costé fort marry, pour trouver à dire un si excellent subiect: mais l'heur & felicité, qu'il avoit acquis par ce moyen, & le grand courage, que sa mort donnoit à tous ceux de la mesme robbe, d'estre participants d'un tel sort, le consolait d'autre part, tant s'en faut que cela le descourageast de poursuyvre une si sainte entreprise, que plustost il y estoit porté d'avantage, si qu'il avoit bonne enuie d'envoyer audit pais quelques autres Peres de la mesme Compagnie pour continuer l'œuvre encommencée, de la conversion de ce peuple à la foy de nostre Seigneur, esperant qu'elle auroit un fort heureux succès, puis que les fondemens de ceste nouvelle Eglise

*Estant
repris
s'adou-
cis.*

*Se repēt
de son
forfait,
& cha-
stie ceux
qui le luy
avoient
cōseillé.*

*La nou-
velle de
la mort
du Pere
Gonzale
encoura-
ge ceux
de la mes-
me Com-
pagnie.*

auoyent esté arrousez du sang innocent de ce bien-heureux martyr : toutesfois il n'eust moyen d'exécuter son dessein aussi tost, comme il eust bien voulu, pour beaucoup de considerations, & iustes causes. Mais quelques huit ou neuf ans apres, à sçauoir l'an 1569. le Roy Sebastien, qui regnoit lors en Portugal, enuoya vne grosse flotte contre le Roy de Monomotapa, dont il bailla la conduite au Capitaine François Barret, qui auoit esté quelques seize ou dix sept ans au parauant Gouverneur des Indes Orientales, où il auoit non moins vaillamment qu'heureusement exploité plusieurs beaux faicts d'armes. On luy bailla vne instruction dressée par le conseil de conscience du Roy, laquelle il deuoit garder, auant que faire la guerre à ce barbare, & si cela fust faict, & que l'autre ne voulust pas satisfaire aux iniures & offenses, que les Portugais auoyent receuës de luy ou des siens, la guerre estoit tres-iuste, iacq̃oit que l'ysuë n'en fust pas telle, que l'on eust bien desiré. Car bien que le Capitaine Barret l'espace de quelques années, eust faict continuellement la guerre au Roy de Monomotapa, & a quelques autres, qui s'estoyent ioincts à luy, lesquels il falloit debeller plustost : si est-ce qu'à la parfin on fust contrainct de quitter ceste entreprise ; à cause que ceste meschante race de Sarrazins (qui estoyent lors en grand nombre, & fort puyssans en ce pais-là) firent mourir la plus part des soldats Portugais, avec du poison qu'ils mirent és fontaines, & aux viandes qu'ils mangeoyent. De sorte que beaucoup en moururent, & entre autres le General de l'armée, François Barret, qui fust extremement regretté des Portugais : combien qu'un autre luy succeda depuis, & continua la mesme guerre iusqu'à ce qu'il eust mandement du Roy de se retirer avec le reste des soldats és forteresses, que les Portugais ont là auprez, d'où ils ont si bien faict la guerre aux Sarrazins, & les ont tellement chastiez, qu'il ne s'en trouue maintenant que fort peu en ces quartiers là : & ceux qu'il y a sont tributaires ou vassaux du Roy de Portugal. Quant au Roy de Monomotapa, il est aussi maintenant amy & confederé des Portugais, desquels mesmes il se sert en ses guerres, les attirant à sa solde, avec des gros gages & pensions. Or avec ceste armée que le Capitaine Barret conduysoit furent enuoyez trois Peres de la Compagnie de Iesvs, tant pour ayder les soldats en ce, qui estoit du spirituel, que pour s'employer à la conuersion des habitans de Monomotapa, si l'on eust peu subiuguer ce pais.

Le Roy de Portugal enuoya vne armée contre ce luy de Monomotapa.

L'ysuë de ceste guerre.

Le Roy de Monomotapa est amy & confederé des Portugais.

Pour-
quoy
ceux de
la Com-
pagnie
ne vont
en ce
pays?

Mais il en y eut qui moururent là, de mesme sorte que plusieurs des soldats: & le reste se retira en l'Inde. Depuis l'on n'y a pas enuoyé aucun de la Compagnie pour y resider, non pas, comme quelques Huguenots disent, pour cause de la sterilité du païs. Car ils vont bien en des lieux plus steriles, comme à la coste de la pescherie & ailleurs; outre que l'on trouue là tout tout ce qu'on scauroit desirer pour la vie humaine, moyennant l'or qui y abonde: ny aussi pour la cruauté des habitans, veu qu'ils vont bien au Brasil, ou les gens sont beaucoup plus farouches: & il y a vne infinité de Portugais, qui trafiquent en Monomotapa aussi asseurement qu'en Portugal. La cause donc est parce que les Peres de l'ordre de S. Dominique ont entrepris de cultiuer par leur sainte doctrine & bons exemples ce champ de nostre Seigneur. A raison de quoy, ceux de ladite Compagnie, pour ne mettre la faux en la moisson d'autrui, n'y vont pas: afin de n'offencer ces bons Peres. Nous n'auons toutesfois aucunes memoires de ce qu'ils y ont fait iusqu'à present, ny d'autre chose de ce païs, qui concerne la foy, & pource remettons les voiles au vent, pour aller voir ce qui est aduenu sur mer, viz à viz de la coste de Soffala.

D'un naufrage lamentable arriué l'an 1585. eñ bancs de la Iuifue, à vn nauires qui alloit eñ Indes Orientales, & des grandes miseres qu'encoürurent ceux qui y estoient: particulièrement deux troupes d'iceux qui se voulurent sauuer.

CHAPITRE XI.

A Celle fin que l'on cognoisse à quels dangers s'exposent ceux, lesquels poussez du zele de la gloire de Dieu, & du salut des ames, entreprennent le voyage des Indes, pour aller retirer de l'esclauagé de Sathan, vne infinité d'ames, qu'il y tient asseruies, j'ay voulu inserer en ceste histoire vn naufrage fort memorable, qui aduint l'an 1585. à vn nauires, ou estoient embarquez huit Religieux, deux de l'ordre de S. Dominique, & six de la Compagnie de Iesus, qui faisoient voile vers ces quartiers là pour l'intention que dessus. Car outre que cela n'est pas hors de nostre propos, l'on y verra encore des beaux traicts de la prouidēce que Dieu a des hommes, & comme parmy les choses

ameres, il en mesle souuent des douces, pour leur donner quelque soulas en leurs aduersitez. Or ce que nous dirons, est tiré d'une lettre escrite de Goa sur la fin de l'an 1586. par le P. Pierre Martinez de ladite Compagnie, qui eschappa de ce naufrage, par vne faueur speciale de Dieu, l'ayant voulu (ce semble) preseruer de tant de perils, esquels plusieurs autres de ses compagnons, qui estoient plus ieunes & plus robustes que luy, laisserent la vie, pour estre, comme il fust dix ans apres, le premier Euesque du Japon, selon qu'il se dira en son lieu. Voicy donc comme le tout passa.

L'an 1585. le 10. d'Auril partirent du port de Lisbonne, deux nauires vers les Indes Orientales, l'une portant le nom de S. Albert, & l'autre de S. Iacques. Toutes deux furēt au commencement de leur nauigation battues d'une si furieuse tourmente, qu'elles se cuyderēt perdre au seuil de la porte, comme l'on dict: mais en fin la tempeste, qui dura trois iours, estant accoisée, ceux de la nauire S. Iacques, passerent le 11. Iuin les Isles de Martin Vaz, là où ils commencerent d'auoir quelques prognostiques, s'il faut ainsi parler, de leur infortune. Car estans là ils veirent vn poisson d'une façon estrange, lequel fist incontinent fuyr tous les autres, qui suyuoient la nauire, & ne l'abandonna iamais iusqu'à celle nuit, quelle fist naufrage, ayant esté veu ce mesme soir sur la brune, nager à la prouë, & ietter en haut grande quantité d'eau.

Après donc qu'ils eurent doublé le Cap de bonne esperance, assez heureusement enuiron le 27. Iuillet, vne telle contrariété de vents s'esleua, que leur nauire alloit tantost en auant, tantost en arriere, ayant le vent quelquefois en prouë, d'autres en poupe: si qu'ils pensoient ne pouuoir point entrer au canal, qui est entre la terre ferme d'Afrique, & l'Isle de S. Laurent, autrement appelée Madagascar. Or en ce canal vis à vis de la coste de Sofala, il y a vn passage fort dangereux, que les Portugais appellent *Baixos da India*, c'est à dire escueils de la Iuifue ou Iudée: car ce sont des rochers, ou comme des gros tas, & mōceaux de pierres, de corail blanc, aiguës & picquantes, sans qu'il y ait rien de terre: & quand il y a pleine mer, ils sont presque tous couuerts d'eau, tellement qu'on ne les apperçoit point que lors qu'on y est dessus, ou qu'on y a faict briz: & c'est la cause pour laquelle ils sont tant redoutez de ceux qui nauigent en ceste mer, pour s'y estre

perdus plusieurs vaisseaux, comme fit celuy duquel nous parlons maintenant, lequel estant arriué sur l'emboucheure du Canal le 16. d'Aoust, tous les Gentils-hommes & principaux officiers du nauire s'assemblerent, pour consulter s'ils deuoyent entrer dans le canal, ou bien prendre l'autre chemin qui est par delà l'Isle; veu que les vents Occidentaux leurs manquoient desia, combien que durant la consultation ils estoient encore assez forts.

coustume de ceux qui nauigēt s'en des.

Car c'est la coustume de ceux, qui font ceste nauigation de consulter apres auoir passé le Cap de bonne esperance, s'ils doibuent prendre leur toute par ce canal, ou bien par dela l'Isle de S. Laurent: d'autant que s'ils passent le Cap au mois de Iuillet, ils peuuent entrer au canal, & aller au Mozambique, se rafraischir pour quelques iours, puis continuer leur voyage, & arriuer à Goa ceste mesme année. Mais s'ils ne le passent qu'au mois d'Aoust, ils ne peuuent arriuer au port de Goa sinon l'année suyuaute: parce que s'ils vont mouiller l'ancre au Mozambique, la saison propre pour nauiger est passée, & s'ils vont par delà l'Isle de S. Laurent, ils ne peuuent arriuer qu'au port de Cochin, & ce à raison que

consulte sur la route qu'il faut prendre.

les flots & les vents Generaux les portent plus bas. Or en la liberation susdite il fust arresté, que pendant qu'on auroit les vents Occidentaux, on continueroit la mesme route entrant dās le canal, pourueu qu'ils conduysissent iusqu'au 22. degré; mais si les Orientaux s'esleuoient auant qu'atteindre ce degré, ils prendroient le chemin par dehors l'Isle. Il aduint donc que les Occidentaux continuans à souffler les menerent si auant, qu'encore bien qu'ils eussent voulu fuyr l'entrée du canal, ils ne pouuoient. Le 19. d'Aoust le Pilote ayant pris la hauteur du Soleil, trouua qu'ils estoient à 22. degrez & vn tiers; ce tiers seulement restant iusques aux bancs de la Iuifue qui sont en telle hauteur. Et par ce que le vent estoit fort fauorable, il estima qu'avec iceluy on pouuoit faire enuiron 40. lieues par iour, & durant la nuit, qui estoit proche, passer les bancs de la Iuifue, si qu'il fust d'adus de ne caler point les voiles, de peur que le courant de l'eau n'emportast le nauire es bācs que les Portugais appellent *de las Prayas*, c'est à dire des plages, comme il estoit aduenu quelque temps au parauant à vn autre nauire portant le nom de S. Pierre. Pensant donc auoir eschappé le danger des bancs de la Iuifue, parce que les sentinelles qui estoient à la hune, disoient auoir veu des oyseaux voler du costé de la terre ferme, il commanda qu'on allast

allast à voiles desployées, à cause qu'il craignoit n'auoir pas assés de temps, pour arriuer au Mozambique à la saison propre. Quelques vns des officiers du nauire, qui estoient bien entendus au fait du pilotage, & mesmes en ceste route là, s'opposoient à ce commandement, disans qu'il ne falloit pas tant s'assurer, lors qu'on n'estoit pas certain d'estre hors de danger : mais l'aduis du Pilote, qui peut commander absoluëment en cela, fut suyui. Il est bien vray, qu'il mit des sentinelles à la prouë, afin de prendre garde aux dangers, que le nauire pourroit encourir: mais comme elle alloit trop viste, & la nuit estoit fort sombre, personne ne se print garde desdits bances, iusques à ce qu'ils y furent dessus. Car les flots donnans contre ces rochers, rejalloient si haut, qu'ils les couuroient entierement. Comme donc l'on estoit sur le premier somme, enuiron la minuit, voicy que la nauire va hurter contre ces escueils, sans qu'aucun presque s'en apperceut, mesmes du commencement. Car le bruiet & tintamarre que menoit le vent par trop fauorable, donnant dans les voiles desployées, estoit si grand, qu'on n'ouist point quasi le bruiet, iusqu'à ce que le vaisseau se brisa. Il en y eut bien quelques vns, qui se mirent à crier, tourne, tourne : mais la force du vent, & la roideur avec laquelle il alloit, estoit si grãde, qu'il heurta vne, deux, & trois fois, auant qu'on eust loisir d'y remedier. Et de ceste sorte il s'ouurit par le beau milieu, se tournant ce dessus dessous : tellement que le tillac ou premiere couuerture se posa sur le rocher, qui estoit creux au milieu, & là dessus tomberent toutes les personnes. Car ce creux estoit prou spacieux, & au descendant de la marée, l'on y voyoit vne heure durant ou enuiron quelques costaux, qui se couuroient d'eau au montant. Or leur naufrage aduint en ce temps là. Ce qui fut vne particuliere prouidence de Dieu. Car si la marée eust esté basse, le nauire n'eust pas esté brisé sur le rocher, ains à costé, de maniere que tous fussent allez à fond, sans qu'aucun eust eschappé. D'ailleurs la marée s'en allant, arresta les bords du nauire sur le rocher, desquels par apres quelques vns s'ayderent pour se sauuer, comme nous dirons bien tost.

*Inconsi-
deration
du Pilo-
te cause
du nau-
frage.*

*Briz du
nauire.*

*Circon-
stances*

Ce nonobstant ledit naufrage a esté l'un des plus effroyables, qu'on ait, peut estre, iamais veu, pour plusieurs circonstances. Dõt la premiere est le temps, auquel il arriua, qui fut vne nuit fort sombre & obscure : tellement qu'on ne voyoit ny ciel ny terre, mais seulement des grosses ondées, qui couuroient à chascun coup.

*qui ren-
dēt fort
effroya-
ble ce
naufrage.*

ces pauvres gens, qui auoient fait naufrage. L'autre est, que depuis la minuit iusques au iour, ils furent comme en vne continuelle agonie de la mort, pensant à chasque moment estre engloutis des vagues, qui donnoient à tout propos contre les pièces du nauire, sous lesquelles ils estoient, & les couuroient entiere-ment. A cela faut adiouster les cris, les pleurs, & lamentations, qu'un chascun tiroit, du plus profond de l'ame implorant l'ayde de Dieu, & luy demandant pardon de ses pechés. L'on n'entendoit que crier confession, confession. Il y auoit bien six Prestres, deux del'ordre de S. Dominique, & quatre de la Compagnie de

*Ceux qui
ont fait
naufrage
se pre-
parent à
la mort.*

IESUS : mais vn chascun pensoit estre si proche de la mort, que plusieurs ne pouuant attendre que l'on eust acheué d'ouyr les premiers, faisoient à haute voix la confession de leurs pechés, pour en estre absous au plustost, sans qu'on les peut faire taire. Quelques vns cherchoient ceux, qu'ils auoient offencez en leurs biens, honneur, ou personnes, pour leur demander pardon, comme gens qui pensoient s'en aller mourir à l'instant, & s'ils ne les pouuoient si tost trouuer, ils prioient quelques autres de faire ce debuoir en leur nom, s'ils les rencontroient. Brief ceste crainte de la mort fut cause, qu'un chascun taschast de mettre son ame en bon estat : & sans cela, il estoit à craindre, que plusieurs n'eussent fait vn plus piteux naufrage de leur salut, que n'estoit celui du nauire. En telle affliction furent ils durant le reste de la nuit, qui estoit encore accreuë par l'incertitude du lieu, ou ils estoient, ne sçachans s'il y auoit là aupres quelque lieu ou se pouuoit retirer. Mais le iour estant venu, comme ils se virent environnez d'eau de toutes parts, & ce autant que l'œil pouuoit voir de loing, lors ils perdirent toute esperance d'eschapper ce danger.

*Perdent
toute es-
perance
d'escha-
per ce
danger.*

Doncques vn chascun estant quasi asseuré d'aller comparoitre deuant le iugement de Dieu, auant soleil couché, ne pensoit qu'à se disposer le mieux qu'il luy estoit possible à ce passage ; tellement qu'on n'entendoit que pleurs & gemissemens, ou autres signes de douleur & repentence. Il en y eust bien quelques vns des plus resolu, qui prindrent des cordes pour s'attacher à quelque piece de bois, pensans de ceste sorte aborder à quelque lieu plus asseuré ; mais ils y alloient plustost, comme gens condamnés au supplice, qu'avec esperance d'euader. Toutesfois comme la nature abhorre tant ce passage de la mort, plusieurs comincerent à traicter ensemble de se sauuer. On voyoit les mariniers de cinq

en cinq, six & sept, monter comme à cheual sur des pieces des masts du nauire rompu : d'autres assembler des pieces de bois, & en faire vn radeau ou vne claye, sur laquelle ils se jettoient, cuydans avec ce aller à terre. Mais les vns & les autres ne s'estans pas pourueus de viures, il est croyable qu'ils perirent tous sur mer, veu que l'on n'a point ouy depuis aucunes nouuelles d'iceux. Toutesfois il en y eut quelques vns, lesquels ayās pris prouision, aborderent à terre, partie en des clayes, partie en l'esquif & en la barque du nauire, combien qu'ils endurent tant de miseres & calamitez, qu'une bonne partie d'iceux en mourut, comme nous allons dire maintenant. Commençons donc par ceux de l'esquif.

Le Capitaine General voyant les choses si deplorées, ne pensoit si non à se preparer à la mort comme les autres : toutesfois il s'aduise qu'il seroit bon de faire mieux recognoistre ces rochers, pour voir s'il en y auroit quelque vn qui fut plus assuré & commode, afin qu'on s'y peut retirer, attendant que l'on mit en ordre quelque vaisseau, pour prendre la route de Soffala. A ceste fin il fait raccoustrer l'esquif du nauire, qui estoit demeuré entier, bien que fort endommagé : & y entrant avec le Pilote du nauire, & 17. ou 18. autres, ils s'en va faire ceste descouuerte. Apres auoir bien tout recogneu, & n'ayant trouué lieu aucun de seur accez, il proposa à ceux, qui estoient avec luy, d'aduiser ensemble ce qu'ils debuient faire. Tous d'un commun accord luy remonstrent, que s'il retournoit vers le nauire brizé, ceux qui estoient là restez, oyans qu'il ny auoit aucun lieu d'assurance, se jetteroient à la foule, comme gens desespererez, dans l'esquif, & le feroient enfoncer. Partant qu'il valloit mieux rebrousser chemin, & chercher quant à eux moyen de se sauuer, & par apres, s'ils pouuoient, ils remedieroient au danger des autres. Ceste resolution prise, ils se mettent à radoubier mieux leur esquif : à fin qu'il peut seruir pour le reste du voyage; car ils auoient à faire plus de soixante lieues, iusques à la plus proche terre. Or ils n'auoient porté que deux auirois, l'un desquels ils firent seruir au lieu du mast : & deux espées liées ensemble par les poignées, au lieu d'antenne : pour voile ils prindrent un linceul, duquel un marinier de leur troupe s'estoit enueloppé; & au lieu de la petite voile appelée trinquet, ils se seruirent d'une couuerte blanche, qui fut trouuée dās l'esquif; & pour cordages ils accoustrerēt le mieux qu'ils sceurent des filers à pescher. Mais d'autant que l'eau entroit en

Quelques vns taschent de se sauuer, mais en vain.

Resolution du Capitaine du nauire, & de quelques autres.

Accommodent l'esquif pour aller chercher terre.

abondance dans l'esquif, ils s'ayderent de quelques pieçes de cordes, les defaisans en estoupes: & pour brayer leur vaisseau, au lieu de poix, ils prindrent de la saulce de quelques confitures moins liquide, qu'ils auoient. Voyla comment la necessité mere de l'indultrie, apprend au besoin plusieurs expediens, qu'on ne sçauoit imaginer autrement. L'esquif estant radoubbé, comm' a esté dit, il restoit vne plus grande difficulté, à sçauoir de trouuer vn canal, par lequel il peut passer sans donner contre ces rochers.

*Jouis-
qu'ils l'ay
de de
Dieu,
par l'in-
terces-
sion de la
Vierge.*

Et d'autant que l'industrie humaine n'estoit pas bastante à cela, ils se mirent à inuoker deuotement le diuin secours, par l'intercession de la sacrée Vierge, faisans vœu que s'ils eschappoient de ces dangers, ils iroient visiter l'Eglise de nostre Dame de Guadalupe, qui est en Espagne. Ils cogneurēt bien tost que leurs vœux & prieres auoient esté acceptées de Dieu & de la Vierge. Car en brief ils sortirent de ces bancs, & commencerent à voguer en haute mer. Cependant ils ne mangeoient par iour chascun que deux tranches de cotignac, l'une au matin, l'autre au soir, & ne beubient qu'un demy verre de vin à chascue repas, trempé d'eau salée; car ils n'en auoient point d'autre; hors-mis le Capitaine, lequel pour quelque sienne infirmité, s'estoit gardé vn peu d'eau de fleurs, tirée à l'alambic. Sur le tard ils disoient chascue iour deuotement les Litanies de nostre Dame, apres lesquelles ils frapportoient tous leur poitrine, crians à Dieu misericorde: puis s'embrassoient les vns les autres, & se demandoient mutuellement pardon. Le Capitaine estoit le premier à ces actes de deuotion, & tant par son exemple, que par ses bons propos, il esmouuoit vn chascun à la pieté. Poursuyuans ainsi leur route, au quatriesme iour ils descouurent la terre ferme, Dieu sçait avec qu'elle ioye: toutesfois parce qu'ils ne sçauoient en quel endroict ils estoient, ils nauigerent encore quatre iours, costoyās tousiours la terre, pour trouuer l'emboucheure de quelque riuier. En tout ce voyage ils se virent fort poursuyuis des Bileines, qui alloient tout à l'entour de leur esquif: mais pour les faire fuyr, ils menoient vn grand bruiet & tintamarre avec quelques instrumens: & tant avec ce, qu'avec les cris espouuentables, qu'ils jettoient, mais sur tout avec l'ayde de Dieu, ils en furent deliurez. La soif encore les tormentoit grandement; si qu'il en y eust, qui beurent leur vrine. Finalement le huitiesme iour de leur embarquemēt, voyant que le ciel les menaçoit du costé de Midy, de quelque

*Ils des-
couurent
terre.*

bourrasque, ils résolurent de prendre terre aux lieux plus proches, l'un desquels s'appelloit Trilinde, & l'autre Qualimane. Mais auant qu'aborder, comme la tempeste se renforçoit de plus en plus, il s'en fallut de bien peu qu'ils ne se noyassent trestous: neantmoins ayant renouuellé le vœu, qu'ils auoyent faict à nostre Dame, ils furent encore garentis de ce danger: & sans attendre que le vaysseau fust abordé à terre, ils se jetterent dans l'eau, qui alloit à quelques vns iusques à la ceinture, & à d'autres à la poictrine. Soudain qu'ils furent sortis de la mer, ils s'en vont tous chercher quelque fontaine, hors mis deux, qu'ils laisserent pour la garde de l'esquif, & des hardes qu'ils y auoyent. En ayât bien tost trouué vne, ils se jetterent dessus, & se mirent à boire avec vne telle auidité, qu'ils ne pouuoient s'en saouler ny se retirer de là. Cependant vn des habitans de ce païs, qu'on appelle Caffres, vint trouuer ces deux, qui estoient demeurez à l'esquif, & frappant des mains (qui est entre eux vn signe de bien-veillance) leur bailla quelques petits poissons, & promist de leur faire recouurer du feu pour les faire cuire, si que l'un d'eux alla quant & luy pour en chercher. Là dessus voila arriuer deux cens Caffres ou enuiron, armez d'arcs & de fleches, & afin qu'on ne pensast qu'ils estoient ennemis, ils posèrent leurs arcs, & frappans des mains monstroyent vn bon visage à ceux qui retournoient de la fontaine. Lesquels faisans aussi bonne mine leur donnerent en signe d'amitié quelques boëtes de cotignac. Mais ces barbares descouurirent bien tost ce qu'ils pretendoyent, qui n'estoit autre que deualizer entierement ces pauures gens. Ils commencent donc par les espèces, que les Portugais, se doubans de ce qui aduint, auoyent cachées dessous le sable, au nombre de trente: mais les Caffres les trouuerent bien tost avec telle ruse. Ils se rengerent cent d'entre eux, & se mirent à fouyr dans terre avec les mains: les autres cent demeurans de bout, tout à l'entour, & de ceste sorte ils eurent bien tost trouué lesdites espèces. Mais non contents de ce, ils leur prindrent encore la couuerte, qui auoit seruy de trinquet, & la tirans les vns deça, les autres delà, elle fust toute deschirée, & mise en pieces. Les Portugais voyans cela, & se craignans qu'ils en fissent autant sur leurs personnes, taschent de gagner au pied s'enfuyans le long de la rade. Mais ce fust en vain: car ils estoient si recreus & debiles, & les autres si lestes & agiles, qu'ils les attrapperent bien tost. Les

*Sont
despouil
lez de
tous
leurs
accou
stremens.*

ayans pris ils les despouillerent tous nuds, sans leur laisser nō pas mesmes la chemise : & bailloyent toutes ces despouilles à leurs femmes, qui les suiuyoient avec des paniers. Ce qu'il falloit endurer patiemment, pour crainte de n'auoir pis : comm'il cuyda aduenir à leur Capitaine, auquel ayant esté commandé par le conducteur de ces brigands (qu'ils appellent Xequé, c'est à dire Capitaine) de se despouiller, comm'il n'en vouloit rien faire, le Xequé se mist tellement en cholere, qu'il le sayrist au corps avec grande rudesse, & luy osta par force tous ses accoustremens, ne luy ayant pas mesmes voulu laisser le chapeau pour se garentir de l'ardeur du Soleil. Doneques ces pauures gens, comm' ils se virent en cet estat, & ne sçauoyent si en quelque lieu proche de là ils trouueroyent des Portugais, par le moyen desquels ils fussent secourus, ils s'adressent à Dieu, & à leur Aduocate la sacrée Vierge, laquelle ne leur manqua non plus en ceste necessité, qu'elle auoit fait aux precedentes : car à grand peine eurent-ils marché trois lieues, qu'ils vont descourir vne riuere, que les habitans du pais appellent Qualimane, sur laquelle les marchāds Portugais font vn grand trafic. Le Capitaine voyant vn bateau sur la riuere, se met à courir pour le gaigner, & passer avec iceluy de l'autre costé. Mais là dessus voicy vn Rhinoceros sortir d'un bois, lequel s'alloit ietter sur le Capitaine, & sur le Pilote, qui estoit avec luy, s'ils ne se fussent sauuez de vistesse gaignants le bateau, dans lequel ils passerent la riuere : & comm' ils furent à l'autre riué, ils prierent les Caffres de retourner vistement querir leurs compagnons, lesquels eussent esté en danger de se perdre : parce que la marée qui venoit, souloit couvrir d'eau tous les champs d'alentour, & les laissoit pleins de bourbe & de falaïse, d'oū il n'y eust eu moyen de sortir. Mais Dieu adoucit les cœurs de ces barbares, autrement fort inhumains, si qu'ils firent volontiers, ce dequoy on les requist, tellement qu'ils aborderent tous de l'autre costé, & arriuerent bien tost à vn port, auquel commandoit vn Gentil-homme Portugais nommé François Brochade, qui estoit Maistre des ports & passages pour le Roy de Portugal, en toutes les riuieres de ceste region d'Æthiopie, combien qu'ils ne l'y trouuerent pas : car il estoit allé à vne autre riuere esloignée de celle-là vers la coste de Soffala, de quelques trente lieues, n'ayant laissé en sa maison que ses chambrieres esclaves : les-

*Arriuēt
à vn port
ou cōmū
doit vn
Gentilho
me Por
tugais nō
mé Frā
çois Bro
chade,
maistre
des ports
et pas
sages.*

quelles voyant ces pauvres gens tous nus, & en si piteux estat (car ils sembloient proprement des ladres, ayans la peau toute escorchée, tant à cause de l'ardeur du Soleil, que pour les picqueures des guêpes ou grosses mouches, qu'ils auoyent trouué en chemin) elles se mirent à pleurer de compassion: & aussi tost leur apportèrent vne certaine viande faite d'une sorte de millet, appellé en ce païs Nazeren, avec quelques petits poissons. Or il y auoit bien près de ce port vn Mahometain fort riche, & grand amy des Portugais, lequel ayant sçeu l'infortune de ces pauvres gens les alla voir, & apporta au Capitaine, vne chemise, des calçons, vne robbe, des souliers, & vn bonnet rouge: pour ses compagnons il donna quelques mesures de riz: & non content de ce, il leur presta deux batteaux, & deux de ses esclaués, pour les conduire à Louabe, où estoit lors le maistre des ports, lequel voyant ces pauvres gens en tel estat, se mist à plorer à chaudes larmes avec grande compassion de leur misère, & apres les auoir tous embrassez l'un apres l'autre, les pourueust fort liberalement de tout ce, dont ils auoyent besoin. Mais laissons ceux-cy, puis qu'ils sont maintenant en lieu de seureté, & venons aux autres, qui resterent sur le rocher, ou le nauire se brisa. Car il en y eust encore deux ou trois bandes qui en sortirent, & arriuerent à terre, ainsi que nous allons dire.

*Charité
& libe-
ralité de
ce Gen-
tilhom-
me.*

Après donc que ceux qui se sauuerent dans l'esquif, furent partis, il en y eut quelques autres lesquels voyans vne petite colline, esloignée de ce rocher de la portée d'une harquebuzé, ne se couvrir point d'eau au mont de la mer, sinon enuiron le haut d'une coudée, & que sur icelle plusieurs pieces de bois & hardes du nauire, s'estoyent assemblées, ils estimerent que par aduventure y auroit-il moyen de s'y arrêter, iusqu'à ce qu'ils eussent accommodé quelque vaisseau pour se sauuer. Voylà donc vne quarantaine de personnes ou enuiron, qui taschent d'y aborder: mais quand ils y furent, ils trouuerent que l'impetuosité des vagues estoit si forte, qu'ils iugerent ne se pouoir tenir là, lors qu'il y auroit pleine mer: tellement qu'ils vouloyent s'en retourner au nauire: mais ils n'osoyent craignans la violence des flots. Là dessus la diuine prouidence, qui sembloit les vouloir sauuer, leur enuoye deux ou trois pieces de la couuerture du nauire,

*Seconde
troupe
de ceux
qui se
sauuerēt
du nau-
frage.*

*Diuine
prouide-
ce en
leur en-
droit.*

& outre ce vne claye ou radeau fait de plusieurs pieces de bois iointes ensemble, laquelle quelques vns auoyent bastie auprés du nauire, cuydans se sauuer sur icelle : mais tant de gens y monterent dessus qu'elle s'enfonça, & toute vuyde de personnes, fust portée par les flots à ces pauures gens, lesquels prindrent ceste claye comme enuoyée de Dieu vers eux, eltimans qu'elle seroit bastante, pour les conduire iusques à certains rochers qu'ils voyoyent à trois lieuës de là ou enuiron, ressemblans à des arbres: car ils y pensoyent trouuer quelque lieu d'assurance. Ayans donc recouuert avec les pieces du nauire vne basse de drap iatine, ensemble quelques aulnes de toile : & avec la claye deux autres basses, l'une de velours, & l'autre de damas, ils en firent leurs voiles, & avec tel equipage, les vns monterent sur les pieces du nauire, & les autres sur la claye, tirans droit à ces rochers: mais comme ils y furent arriuez ils se trouuerent descheuz de leur esperance: car il n'y auoit rien, que des pierres de corail blanc, aiguës & tranchantes à guise d'un couteau, qui leur bleissoyent les pieds & les iambes avec grande douleur: si qu'ayans perdu quasi tout espoir de se sauuer, ils se ietterent là dessus fort tristes & desolez. Dieu neantmoins leur donna encore quelque peu d'esperance de se sauuer, leur enuoyant force bois, hardes, prouisions, & autres choses du nauire brisé, poussées là par le vent. Entre autres ils trouuerent dans vn bahu bien fermé, deux chartes marines, l'une pour tenir la route du Cap de bonne esperance iusques en Portugal, & l'autre dudit Cap iusques à l'Inde, dont le soubz-Pilote, qui estoit avec eux fit vn grand cas. Brief leur courage croissoit de plus en plus voyant qu'ils trouuoient à tout propos, quasi miraculeusement, plusieurs sortes de victuailles, comme des grosses boëttes de conserue de cotignac, & quelques barriques de vin, dont ils rendirent graces à Dieu. Or ayans basti vn radeau plus fort que celui de deuant, ils y mirent trois masts: & pour la voile du milieu, ils firent seruir vn linceul, qu'ils auoient apporté: au lieu de celle qui est à la prouë, ils accommoderent vne nappe de table avec vne piece de damas vert: brief ils firent celle de la poupe de pieces de velours & damas vert cousuës ensemble. Pour leur viure ils auoyent trente grosses boëttes de cotignac, six petits barrils de confitures en conserues, vne barrique de farine, vne autre d'eau douce, & vne autre de vin. Equippez & pourueuz de la sorte, ils commencent à sortir hors de ces bancs.

*Comme
ils flot-
tent en-
tre grain
se & e-
sperance.*

banes. Mais tant de gens estoient montez sur ce radeau qu'il s'en alloit à fond. Le soubz-pilote voyant cela en fort ineontinent, & tous les autres le suyuent, se retirās derechef aux mesmes rochers bien estonnez, & ne sçachans à quoy se resoudre : mais en fin ils se mirent tous entre les mains du soubz-pilote, afin qu'il disposast de tous, selon qu'il iugeroit. Luy voyant que le radeau ne pouuoit porter guere plus de seize personnes (bien qu'ils fussent 40.) & que les viures n'estoient pas bastans, pour vn si grand nombre, fait apporter vne partie des prouisions sur le rocher, & laisse sur la claye dix boëttes de cotignac, six barrils de conserue, avec les barriques d'eau & de vin : puis aduise seize de la troupe, & se retire dextremement avec eux dans le radeau, donnant le mot du guet à vn des matelots de lascher habillement la corde, faisant semblāt qu'elle s'estoit rompuë, & qu'eneore qu'il criast & tempestast, luy commandant de retourner à terre, qu'il feit tout le contraire, & se mit au large. A quoy le matelot obeïst de poinct en poinct. Or comme il mit la voile au vent, ceux qui estoient restez sur les rochers voyans cela, commeneerent à se lamenter, remplissans l'air de cris & de gemissemens. Il en y eut quatre ou cinq qui poursuyuirent le radeau à la nage ; & ceux qui estoient dedans n'oserent leur refuser l'entrée : combien qu'entre ceux-là il y eust vn facteur du nauire qui se noya, pour ne sçauoir pas nager. Mais le soubz-pilote eut bien encore la siennes ; car il y perdit son fils, qu'il affectionnoit comme pere, de la façon qui s'ensuit. Quand il fit lascher la corde, il vid bien que son fils n'estoit pas sur le radeau, ne l'ayant voulu aduiser, pour ne donner soupçon aux autres de ce qu'il vouloit faire, & pensant qu'il le suyuroit à la nage (car il sçauoit biē ce mestier) : mais le ieune hōme n'eut le courage de ce faire, à cause qu'il estoit griefuement blessé aux pieds & aux jambes, ayant hurté contre ces pierres tranchantes, ains s'arresta avec ceux qui demurerent sur le rocher, au grand creue-cœur de son pere, qui le vouloit bien aller querir, mais les autres qui estoient dedans, ne le luy voulurēt permettre, de peur que cela ne fut cause que tous perissent. Ce pauvre homme se ressentit si fort de ceste perte, que durāt tout le voyage il ne feit que pleurer, & se lamenta si fort, qu'il en cuyda perdre le sens. Ils nauigerent donc sur ce radeau l'espace de 12. iours sans deseouurer terre, pendant lesquels chascun d'eux ne prenoit par iour qu'une tranche de cotignac, ou bien vne poire confite, ou le gros

*Finesse
du soubz
pilote.*

*Ces la-
mētable
aduenu à
son fils.*

Six per-
sonnes
meurent
de soif.

d'une laiſſuë en conſerue, avec vn petit trait de vin : d'ou s'en-
ſuyuiſt en eux vne telle alteration, que le ſixieſme iour vn de la
troupe de pure imagination de boire tomba dans l'eau, ou il ne
beuſt que trop. Le meſme aduint à vn Chinois, à vn ſoldat, & à
trois autres encore, dont ceux qui reſterent furent ſi deſcoura-
gez & attriſtez, qu'ils les cuyderent tous ſuyure. Mais en vn dan-
ger ſi extreme, Dieu les pourueut d'une extreme & merueilleu-
ſe conſolation. Car (ainſi qu'ils ont tous aſſeuré d'un com-
mun accord) cinq iours durant ils entendirent du coſté de la prouë
vne muſique tres-douce d'un chœur (ce leur ſembloit) d'enſans,
ou pluſtoſt d'Anges, qui chantoient fort melodieuſement les ar-
ticles de la foy, & les loüanges de noſtre Dame: mais ſi diſtincte-
ment, que l'un d'entre eux ayant enuie de leur tenir compagnie,
ſe mit à faire le baſſus, qui ſembloit manquer en ceſte muſique;
laquelle ne ceſſa que iuſqu'au douzième iour de leur nauiga-
tion. Cependant voyla que toutes les prouiſions de bouche leur
viennent à manquer, ſeulement leur reſtoit-il vn peu de la lie du
vin, laquelle ils meſlerent avec l'eau de la mer, & ſe nourrirent de
cela deux iours entiers, craignans encore qu'elle ne leur faillit
auant que prendre terre, laquelle en fin ils deſcouvrirent le 13.
iour au leuer du Soleil, avec vn merueilleux contentemēt: com-
bien que ce iour là ils n'y peurent pas aborder, auant Soleil cou-
ché. Mais lors, combien que la nuit fut proche, & qu'ils ne

Ceux de
la trou-
pe pren-
nent ter-
re.

ſçeuſſent point où ils eſtoient, neantmoins pour l'extreme ſoif
qu'ils enduroient, ils aborderent de nuit ſur vne rade fort ſeure.
Le ſoubs-pilote fut le premier qui ſauta en terre, & ſoudain s'en
va chercher de l'eau douce: laquelle, en fouyſſant la profondeur
d'une ou deux coudées, il trouua fort prez du riuage: quaſi
miraculeuſement: parce que ce lieu au flot de la mer ſe couuroit
tout d'eau ſalée. Les autres entendans cela y accourent viſte-
ment, & s'eſtans ſaoulez d'eau tous mouillez & rompuz qu'ils
eſtoient, ſe mettent à dormir là meſmes. Le lendemain apres So-
leil leué voyla ſept Caſſres, qui ſe preſentent à eux, & ils leur
donnerent vn bonnet rouge à chaſcun. Les Caſſres leur baille-
rent en recompence quelques fruiſts du païs, dont ils mangerent
de bon appetit: car ils eſtoient à demy morts de faim. Mais parce
que l'eau qu'ils auoient trouuée là eſtoit fort trouble, & bour-
beuſe, ils promirent à vn de ces Caſſres de luy bailler le linceul,
qui leur auoit ſeruy de voile, s'il leur en monſtroit de meilleure.

Le Caffre ayant promis de ce faire, le sous-pilote s'en va avec luy : & à peine eurent ils fait demie lieuë, qu'ils en rencontrent vne, ou le sous-pilote beust si fort, que le Caffre en estoit tout estonné. S'estant saoulé d'eau il en fit remplir quelques barrils : & le Caffre avec quelques femmes en apportèrent encore avec des cruches à ses compagnons ; lesquels suyuoient le sous-pilote tout bellement à cause des blessures, qu'ils auoient aux jambes. Mais ces meschans Caffres monstrent tost apres ce qu'ils auoient *Sont de-
naltsez
par les
Caffres.* enuie de faire. Car deux d'iceux se jettans sur le sous-pilote, le despoillèrent par force de tous ses accoustremens : vray est qu'ils luy baillerent quelques aulnes de damas, qu'ils auoient pris à ses compagnons, pour couvrir sa nudité : & l'inviterent d'aller en leurs cabannes. Mais il n'y voulut point aller, ains se retira vers ses compagnons, qu'il rencontra en chemin presque tous nuds, ayans esté pareillement despoillez par d'autres. Estans tous ensemble, ils se consoloient les vns les autres, & parce qu'ils ne sçauoient ou aller, ils furent contraincts de suyure l'un de ces barbares, qui sembloit estre le plus vieux de tous, & le plus humain d'entre eux, lequel les mena en sa maison, & là leur bailla à manger quelques faïsoles à demy cuittes, car ils n'eurent la patience d'attendre, qu'elles fussent long temps au feu, pour la grande faim qu'ils auoient. Il leur mit aussi deuant quelques poires sauuages, semblables à noz poires d'hyuer, mais si dures & si aspres, que les ayant bien maschées, il leur falloit boire pour les aualer, trois ou quatre traicts d'eau, que le sous-pilote & un autre de leur troupe auoit apportée. Or d'autant que la charité de ce Caffre ne dura guere, ils furent contraincts d'aller de porte en porte demander l'aumosne, pour se pouoir entretenir : mais ces gens là estoient si cruels & si barbares, qu'ils n'auoient aucune *Endurēt
grande
faim.* pitié de leur misere. Eux voyans cela, se mettent à faire tout plein de soupplesses, ou tours de passe-passe, & autres gestes ridicules, pour les faire rire, & auoir de ceste sorte quelque chose pour viure. Ce moyen leur réussit assés heureusement. Car si tost qu'ils eurent commencé de faire ainsi des bouffons, on leur donnoit autant de faïsoles, & d'herbes, qu'ils vouloit pour se nourrir : & telle vie menerent ils quelques sept iours, apres lesquels Dieu (ce semble) inspira le Caffre, chés lequel ils demouroient, d'enuoyer le sous-pilote à Louabe, qui n'estoit qu'à trois lieuës de là, vers ce Gentil-homme Portugais, François Bochade, qui

P^{re}m d'i- auoit hebergé ceux de la premiere bande, qui se sauuerent dans
ceux est l'esquif, selon qu'a esté dit. Le sous-pilote voyant vne si belle
enuoyé commodité, pour sortir luy & ses compagnons de ceste misere,
vers Frâ fut bien aise de ceste commission, mais les autres craignans qu'il
sois Bro- ne s'oubliait d'eux, & les laissât tremper là toute leur vie, ne l'en
cbade. vouloiēt laisser aller: toutesfois leur ayant promis & iuré qu'il fe-
 roit tout son possible pour moyenner leur deliurance, ils furent
 contens qu'il y allast. A grand peine eut il fait deux lieues de
 chemin, qu'il va rencontrer vn seruiteur ou esclau de ce Gentil-
 homme, qui luy demâde s'il n'y auoit pas sur ceste rade quelques
 Portugais, qui eussent fait naufrage; parce que son maistre, qui
 estoit aussi Portugais, desiroit les voir. Ceste nouuelle resiouist si
 tres-fort le sous-pilote, que les larmes luy tomberent des yeux
 grosses comme des pois, & beaucoup plus lors qu'ayât dit à cest
 esclau, qu'il estoit vn d'iceux. L'autre luy baille vne lettre de son
 maistre, adressée au premier qu'il trouueroit: là ou il les prioit
 qu'ils s'en vinssent chez luy, comme au port de salut; & qu'ils
 demandassent aux Caffres des batteaux, pour aller à môl la riuie-
 re, ou estoit son logis, s'asseurant qu'ils ne faudroient point à fai-
 re tout ce qu'ils leur diroient de sa part. Car il auoit vn grand
 credit en tout ce pais là, tant à cause de son office, que pour y
 auoir demeuré desia l'espace de 30. ans. Les Caffres donc, qui ha-
 bitent sur la riuée de ce fleuue, le pourueurent d'un bateau fait
 d'un tronc d'arbre caué, ou ils entrerent neuf en tout; car ils alle-
 rent avec le Portugais pour traicter de la rançon des autres.
 Apres qu'ils eurent vogué sur ceste riuere vn iour & demy, ils
 descendirent à vn port, qui estoit vne lieuë loin de la maison du
 Gentil-homme. Et bien que le sous-pilote eut bonne enuie d'y
 arriuer au plustost, si est-ce que pour cause de sa foiblesse, & des
 blessures qu'il auoit aux jambes, il ne peut passer outre; tellemēt
 qu'il se coucha par terre, & dit au seruiteur du Gentil-homme,
 qu'il allat dire à son maistre, comm' il ne se pouuoit plus trainer,
 & qu'il le supplioit de le vouloir pouruoir de quelque moyen
 pour l'aller trouuer. Le seruiteur auant que faire ce message, fait
 cuyre du riz & trois poules, pour seruir de viande au sous-pilote,
 tandis qu'on le viendrait querir. Mais il estoit si affamé,
 qu'en vn repas il despeche tout cela: & se sentant vn peu plus
 renforcé, il commence à marcher vers le logis de ce Gentil-
 homme. Et estant au milieu du chemin, il va rencontrer quatre

*Lettre
 charitable
 de
 François
 Brocha-
 de Gêtil
 homme
 Portu-
 gais.*

esclaues d'iceluy qui estoient venus pour le porter , & avec eux venoit vn des matelots, qui s'estoyent sauuez dans l'esquif: car il estoit arriué là avec ses compagnons, il n'y auoit que deux iours. Le sous-pilote voyant cestuy-cy fust merueilleusement esbahí, & beaucoup plus lors qu'il luy raconta le succès de leur navigation. Finalement il arriue porté par ces esclaues au logis du Gentil-homme , lequel tout fondu en larmes le receut avec vne charité vraiment Chrestienne, & le pourueut fort liberallement de tout ce, qu'il auoit de besoing. Mais ce pauvre hōme considerant les perils tant de la mer, que des barbares , desquels Dieu l'auoit garanty par sa misericorde, ne cessoit de l'en remercier, pleurant de ioye à chaudes larmes , de ce qu'il se voyoit parmy les Chrestiens, & dans la maison d'un hōste si humain & si liberal. Mais sa ioye n'estoit pas accomplie se resouuenant combien de miseres & pauuetez enduroient ses compagnons, qu'il auoit laissez parmy les barbares , de façon qu'il le fist entendre au plustost audit Gentil-homme. Lequel enuoya soudain querir à vne ville appelée Sena , ou les Portugais ont vne forteresse , & vn magazin, *Delivre de capti- uité ceux* quelques basses de toile: afin de les enuoyer aux Caffres pour leur rançon, & cependant leur faict porter des viures par ses ser- *uiteurs de la se- conde trouppé.* niteurs dans vne barque , avec vn beau present à la femme du Caffre, qui les auoit logez , afin qu'elle eust plus de soing d'eux. Et parce que ceux qui estoient allez à Sena , tarderent vn peu à venir, il les pourueut pour la seconde fois de viures, leur baillant avec ce esperance d'estre bien tost racheptez , cōme de fait il aduint: car deux iours apres, les toiles qu'il auoit enuoyé querir à Sena, arriuerent, & soudain il en enuoya deux basses au Caffre, qui les tenoit prisonniers, moyennant lesquelles ils furent tous deliurez, & s'en vindrent à la maison de ce Gentilhomme, ou ils furent receus avec les autres fort charitablement. Quelque temps apres le maistre du nauire & presque tous les autres, qui estoient eschappez dans l'esquif vindrent aussi là. On peut penser quelle ioye & consolation ce leur fust de se voir là ensemble apres vn naufrage si espouuantable , & tant d'autres dangers, qu'ils auoyent encouru sur mer & sur terre. Mais puis que nous auons conduit ceux-cy iusqu'au lieu de sauueté, retournons aux autres, qui resterent sur les rochers.

De la troisiſme bande de ceux qui eſchapperent du naufrage, & des accidens eſtranges qui leur aduindrent.

CHAPITRE XII

A PRES que ceux qui ſe ſauuerent dans l'eſquif, & les autres, qui euaderent ſur le radeau (deſquels nous auons parlé cy deuant) furent partis des rochers, ou le naufrage eſtoit arriué, ceux qui eſtoient reſtez s'encourageans les vns les autres, par l'exemple de leurs compagnons, commencerent à mettre eux auſſi la main à la beſoigne, baſtiſſans des reſtes du nauire quelques clayes ou radeaux, pour aller chercher terre, laquelle ils penſoyent trouuer à deux ou trois lieuës delà, trompez par l'apparence de quelques rochers qui paroiſſoyent à des arbres.

Le Contrerolleur du nauire ſuiuy de quelques ſiens parens, & amis fuſt des premiers, qui ſe mirent à trauailler apres cela. Or comme au parauant ils n'auoyent quaſi point d'eſperance d'eſchapper de ce danger, il leur ſembloit que les viures, qu'on leur auoit laiſſez, eſtoyēt pluſtoſt pour le ſoulas de la mort, que pour l'entretien de la vie : mais deſlors qu'ils vindrent à conceuoir quelque peu d'eſperance de ſe ſauuer, ils commencerent à reſſentir la faim. Pour remedier à cela, on fiſt allumer du feu ſur les pieces du nauire qui reſtoient, pour faire roſtir quelques poules qui eſtoyent encor demeurées en vie, dont la compagnie *Bons* mangea de meilleur appetit. Ce qui fut pris de quelques vns à *preſages* bon augure, croyans que puis que Dieu les traitoit ſi delicatement en vne telle deſconuenue, c'eſtoit ſigne qu'il les vouloit aſſiſter de ſon ayde. Et bien toſt apres ils en eurent vne autre preuue: car la barque qui eſtoit ſoubs la premiere couuerture du nauire, lors qu'il ſe froiſſa, ayant eſté briſée en partie, & ietée par les flots aſſez loing, ſe vint rendre ſur le rocher, ou le naufrage eſtoit arriué, inopinément, & outre l'eſperance de ceux qui y eſtoient encore : mais la plus part d'iceux la voyans ainſi mutilée, diſoyent qu'elle ne pouuoit ſeruir de rien : toutes-
*Edouard de Melo ſaiſt re-
parer la
barque.* fois vn Gentil-homme meſtif engendré d'un Portugais, & d'une Indienne, appellé Edouard de Melo, eſtant en la troupe aſſeura & prouua par bonnes raiſons à vn Pilote, & à quelques autres que l'on ſ'en pourroit ayder : tellement qu'ils ſe mettent apres

pour la raddouber: bien que ce fust avec grande peine, parce que lors qu'il y auoit pleine mer, l'eau venoit à quelques vns iusqu'à la ceinture, & à d'autres à la poitrine: mais en fin ils en vindrent à bout dans deux iours, s'aydans pour reparer le tiers, qui manquoit à l'endroit de la poupe, de quelques caisses & fonds de barriques mal cousus: & pour fermer les ioinctures ils mettoyēt en lambeaux leurs chemises. Mais d'autant qu'ils n'auoyent ny poix ny resine, pour brayer leur barque, ils se seruirent au lieu de cela de fromage pilé: & craignans qu'elle ne s'entr'ouurist, ils l'attachèrent tout à l'entour avec six liens de cordes, & la serrent si estroictement qu'ils peurent: iacoit qu'avec tout cela il y eust si grande abondance d'eau, que deux hommes trauaillans nuit & iour à la pompe, n'estoyent pas bastās à l'espuyser. Apres qu'on eust ainsi basty ce merueilleux vaisseau, auquel pour equipage en lieu de voile on mist vne piece de drap, & pour cordage des filets à pescher, le Pilote fist signe à quelques vns qu'il vouloit partir, nommécment aux Religieux de S. Dominique & de la Compagnie; lesquels se presenterent bien à demeurer avec les autres, qui restoyent pour les consoler, & mourir là quant & eux: mais le P. Pierre Martinez Superieur des autres, voyant que tous auoyent esté ouys en confession, & pensant que nostre Seigneur se voudroit peut estre seruir de quelques vns d'iceux pour l'aduancement de sa gloire, & la conuersion des infidèles en l'Inde, fust d'aduiz de suiure le party qu'on leur offroit, & partāt il se retire dans la barque avec trois autres de la mesme Compagnie, sçauoir est le P. Pierre Alvarez, Emmanuel Diaz, & Emmanuel Herrera. Quant aux autres deux à sçauoir les Peres Vincēt Zappata, & Iean Gonzales ils furent demandez par quelques autres qui auoyent basty vne claye assez forte pour aller en leur compagnie, afin de les consoler & ayder au besoing pour le salut de leurs ames, & le P. Martinez les leur accorda volontiers, voire s'offrit luy mesme d'aller avec quelques vns, qui partoyent aussi sur vne autre claye: mais le Capitaine de la barque ne le voulust point permettre (c'estoit ce Gentilhomme Edoüard de Melo, qui auoit esté esleu par le consentement de tous, comme il auoit esté le premier à donner le bransle à la fabrique d'icelle.) Et à la verité ce fust vne prouidence de Dieu, parce que ceste claye ou il se vouloit embarquer perist comm' il est croyable: car on n'a entendu depuis aucunes nouuelles d'icelle. Ils par-

*Equipa-
ge mer-
ueilleux.
d'une
barque.*

*Autre
claye qui
arriua à
bō port.*

*Piteux
specta-
ble.*

tent donc de ce lieu, combien qu'avec grand creue-cœur de laisser tant de gens à la mercy des vagues: & ce qui l'accrueust dauantage, fust vn triste spectacle qu'ils virent de six hommes, lesquels estans montez comm' à cheual sur vne grosse piece de mast du nauire rompu, icelle se renuerfant, eux aussi se noyerent deuant leurs yeux. Estans partys sur le midy, durant tout le reste du iour ils ne peurent sortir de ces bancs: car ils ont vne longue estenduë de plusieurs lieues, bien qu'ils pensoient trouuer terre apres en auoir fait trois; mais il leur en aduint comme aux autres, n'y ayant trouué rien que viues roches de corail blanc. Sur le tard comme ils virent qu'il seroit mal-aisé de trouuer le canal, pour sortir hors de ces escueils, ils resolurent de s'arrester durant la nuit en ce lieu, auquel ils trouuerent plusieurs du nauire brizé, qui estoient arriuez là sur des clayes. Iceux voyans la barque y accourent soudain pour y entrer dedans: mais n'y ayant point de place ils eurent le refus, excepté vn, qui y entra par force. Tous les autres furent cōtrainctz de se retirer avec grande tristesse, tant de leur costé que de ceux de dedans. Mais le lendemain il aduint vne chose

*Deschar-
ge de la
barque.*

encore plus triste: car le Pilote, & autres gens de marine, qui estoient dans la barque, protesterent deuant tous qu'elle n'estoit pas bastante pour faire vn si long voyage avec tant de gens, & persuaderent au Capitaine qu'il la falloit descharger, luy laissant tous le choix de ceux qu'il en voudroit renvoyer. A ceste cause vne douzaine furent congediez, & renuoyez avec beaucoup de larmes ausdits rochers, où il y auoit encore quelques viures. Lors aduint, comme ie pense, ce qu'un autre aucteur raconte de deux freres germains, dont le plus ieune voyant que son frere aîné estoit contrainct de sortir par le commandement du Capitaine, s'offrist de son bon gré d'estre delaisné en sa place, disant que son aîné estoit plus rompu aux affaires, & meilleur artisan que luy: de façon qu'il nourrissoit avec son trauail, ses sœurs, & toute la famille: & partāt qu'il valloit mieux qu'il mourust que son frere.

*Chari-
té mer-
ueilleuse
d'un frere
recueurs
l'autre.*

Sa requeste ayant esté interinée, il fut mis dehors avec les autres: mais parce qu'il scauoit bien nager il suyuit la barque six heures durant, & comme il la vouloit prendre avec les mains, on le menaçoit avec vne espée nuë de luy couper les bras: toutesfois il fust si constant & si hardy qu'il empoigna l'espée nuë, & bien qu'elle le blessast fort auant, si ne lascha-il point iusqu'à ce qu'on eust prié de luy, & qu'on le receut en la barque: & de ceste sorte

il sau

il sauua la vie à soy & à son frere. Or avec la barque partirēt quatre autres radcaux, deux grands & deux moindres, tous lesquels ce iour là & la nuit suyuante, accompagnerent ladicte barque, mais le lendemain vn d'iceux tant seulement, ou estoiet les deux Peres de la Compagnie, que nous auons dit, la suyuit: les autres trois ayans esté emportez par le courant de l'eau vers la coste de Soffala. Quant à ceux de la barque qui auoiet vn quadran & des chartes geographiques, ils dressierent leur route droit au Mozambique: & l'espace de huit iours, qu'ils nauigerēt, Dieu les fauorisa tellement, qu'ils eurent tousiours le temps & la mer fort propice. Ce qui leur vint bien à propos, car si le vent eust esté le moins du monde impetueux, sans d'ouïte leur barque eust donné à fond: car la poupe estoit si fresse, qu'elle n'eust sceu resister aux vagues vn peu fortes. Durant ces huit iours, ils ne prenoient qu'un peu de biscuit, & vn traiēt de vin bien trempé sur le midy, & autant sur le soir: mais ils ne songeoient à rien moins qu'à la nourriture. Chasque iour ils disoient à haute voix les Litanies, implorans l'intercession des Saints, & principalement de la Vierge Marie, à l'honneur de laquelle ils feirent vn vœu de donner certaine somme d'argent. Or comme ils virent que plusieurs d'entre eux, mesmes des principaux, estoient griefuement tourmentez de la soif, & d'ailleurs que leur barque estoit emportée par les flots vers la coste de Soffala; de façō qu'il n'y auoit point moyen d'arriuer au Mozambique: ils changerent de conseil, & resolerent d'aborder à la premiere terre, qu'ils rencontretoient. Mais le iour auparauant qu'ils n'y abordassent, ils furent vn peu incommodéz du vent, qui souffloit du costé d'Orient. Et par ce que la nuit s'approchoit, & personne d'eux ne scauoit en quelle contrée ils estoient, on fut d'aduis de s'arrestter là durant la nuit: tellement qu'apres auoir ietté la sonde, & recogneu que l'eau estoit profonde de neuf coudées, ils ancrent leur barque, avec 1300. reaux d'Espagne, & quelques pieces de fer qui faisoient poids, saydans pour chable d'une balle de toile despliée. Le lendemain voyans la terre de loin, ils s'en approchent: mais comme ils naugeoient sans beaucoup de soucy, pensans estre hors de danger, ils cuyderent faire naufrage sur le port melines, comme dit le prouerbe. Car au montant de la marée, vn vent s'esleua si impetueux, qu'ils eurent tous belle peur: si que pour le desir qu'un chascun auoit de sortir au plustost hors du peril, les matelots

*Perte de
trois
clayes.*

*Nauiga-
tion de
ceux de
la bar-
que, &
leurs me-
sures.*

*Cuydent
se perdre
au port.*

*Abordés
à terre.*

pouffèrent vers le riuage la barque agitée des flots & des vents, à voiles desployées: & comme ils sentirent que le fond touchoit à terre, ils sautent viftement dans l'eau, qui arriuoit à quelques vns iusques à la ceinture, & à d'autres plus haut. De ceste sorte ils prindrent terre tous mouillees, reereus, & affoiblis, pour la grande soif & faim qu'ils auoient enduré: car leurs prouisions estoient desia faillies.

*Sont de-
strouffez
par les
Caffres.*

Soudain qu'ils furent à terre, ils planterent vne Croix sur vne terre: deuant laquelle ils se mirent tous à genoux, remerciaus Dieu de la grace, qu'il leur auoit faicte. Apres cela comme ils estoient si fort alterez, ils cherchent quelqu'un des habitans (qui sont ces Caffres que nous auons dit) afin qu'il leur mōstrast quelque fontaine. Mais par ce qu'ils estoient en si grand nombre, aucun d'iceux n'osoit comparoistre, iusqu'à ce qu'ils se furent assemblez enuiron deux cents, armez de jauclines, d'arcs, & de fleches. Ce qu'ils firent presqu'en vn rien: courans parmy les bois & espesses forests, aussi viste que nous faisons en vne plaine, pour aduiser leurs compagnons qui se tiennent dans des cachots, & leur donner le rendez-vous; mais ils ne vindrent que trop tost pour eux. Car soudain ils se jettent sur ces pauvres gens, eschapez de tant de dangers, & commencent à piller leurs hardes, à sçauoir le drap, qui auoit seruy de voile, & trois basses de velours, avec le reste qu'ils auoient mis au Soleil pour secher. Et non contents de ce, ils les despoillent presque tous nuds: & si la nuit ne fut suruenue là dessus, ils ne leur eussent laissé rien du tout, mais à la faueur de l'obscurité, il en y eut qui euaderent, emportans leurs accoustremens. Quelques vns auant qu'estre pris & despoillez, furent bien d'aduies qu'il falloit se deffendre cōtre ceste raquaille, car ceux de la claye ou estoient les deux Peres de la Compagnie, ayant abordé vn peu plus bas vers la coste de Sofala, s'estoient auparauant ioinctz à ceux de la barque, de façon qu'ils estoient 47. en tout, & quelques vns auoient des espées: mais le Capitaine ne trouua pas bon ce conseil, d'autant qu'aucun d'eux n'auoit d'arquebuzes, & ils estoient si harassez, qu'il eust esté bien aisé aux Caffres de les massacrer tous, s'ils se fussent voulu deffendre. Ils resolurent donc de s'armer plustost de patience que de fer. Et bien en print à ceux, qui le firent: car il en y eut quelques vns lesquels s'estans voulu deffendre, furent griefuement blessez. Or pour retourner à nostre propos, la nuit

suruenant là dessus, ils eurent moyen de couvrir leur nudité, & *Eschap-*
 de gagner au pied, pour eschapper des mains de ces barbares, *pent de*
 s'enfuyans le long du riuage de la mer : toutesfois ils ne sçeuient *leurs*
 si bien faire, que les Caffres n'attrapassent deux des principaux *mains.*
 Gentils-hommes de la troupe, qu'ils firent esclaués. Les autres
 ayant eschappé le mesme danger, employèrent vne bonne partie
 de la nuit à marcher le long de la coste, tirant vers le Mozam-
 bique, afin de voir s'il y auroit là aupres quelque riuere, sur la-
 quelle les Portugais trafiquassent : mais estans lassés du chemin,
 ils se retirerent dans vn bois proche du riuage, pour reposer vn
 peu. Là ou les vns se couuroient de fucilles, les autres cauoient
 dans le sable avec les mains, & s'enfouissoient là dedans, afin de
 cacher leur nudité, & prendre vn peu de repos, combien que ces
 liets n'estoient pas si mollets, qu'ils se peussent endormir si tost:
 mais ainsi qu'ils commençoient à reposer, voyla qu'on les esueil-
 le pour marcher. Ayant fait vne piece de chemin, la soif les con-
 traignit de se retirer sous l'ombre, pour chercher de l'eau dou-
 ce, sur les dix heures auant midy. Mais là dessus les Caffres vin-
 drent à eux armez de jaelines & de fleches, & les firent aller *S'ils pris*
 par force à leurs loges, là ou ils les tindrent l'espace de quinze *derechef*
 iours si à l'estroit & en si grande misere, qu'ils ne pouuoient pas *& sailla*
 mesme aller querir de l'eau fresche pour boire. Ils estoient pres- *captifs.*
 que tous nuds : car ils auoient esté pris & deualisés trois fois par
 ces meschans Caffres. Ils couchoient tous sur la dure, n'ayans
 qu'un peu de paille de millet dessous : pour couuerture ils n'a-
 uoient que quelques meschans haillons qui leur estoient restez.
 Leur nourriture estoit vn peu de pain de millet paistry avec de
 l'eau, sans sel, & encore si escharnement, que pour ne mourir de *Le trai-*
 faim, ils recueilloient soigneusement le son, & en faisoient du *tiement*
 pain à nostre façon, cuit toutesfois sous la braize : & celuy en- *& nour-*
 core qui en pouuoit auoir vn morceau, s'estimoit heureux. Quât *riture*
 à la chair ou poisson point de nouuelles : car les mesmes Caffres *qu'on*
 n'en mangent que rarement. Au reste les nuits estoient si froides *leur*
 (bien qu'ils fussent sous la Zone torride) que s'ils n'eussent fait *fait.*
 vn bon feu, il n'y auoit moyen de durer. Au contraire le Soleil
 du iour estoit si chaud qu'il les brusloit, de façon que plusieurs
 de leur troupe, estoient tous couuerts de pustules ou boutilles,
 & deuindrent comme ladres, mesmement aux bras & aux jam-
 bes. Dieu neantmoins les conseruoit en santé, & leur donnoit

*Vn Sarrazin
veut rachepter,
mais ne
s'accorde
pas
du prix.*

*On le
prie de
bailler
tout ce
que les
Caffres
voudrôt*

*Les pri-
sonniers
sont re-
serrez,
& plus
mal trai-
ctez que
iamais.*

vne si grande consolation interieure, qu'ils se tenoiēt fort ioyeux parmy tant d'aduersitez. Or estans en ceste affliction, & ne trouuans aucun messager pour enuoyer au Mozambique, ou à Qualimane, afin de procurer leur rachapt, le fils d'un certain Sarrazin qui estoit le Xequé ou Capitaine de ce païs, & demouroit sur la riuieré de Lorange, à huiēt lieus loing de là, vint à eux pour les rachepter. Mais comme ces Mahometains sont taquins, & eschars à promettre, apres auoir deux ou trois fois parlé de leur deliurance, ne s'estant peu accorder du prix avec les Caffres, il s'en retourne sans rien faire, & s'oublie de ces pauvres gens. Eux voyans leurs forces se diminuer de iour en iour, à cause de l'extreme faim, & autres miseres qu'ils enduroient, se delibèrent d'enuoyer deux de leur troupe à ce Mahometain, pour le prier de bailler tout ce que les Caffres demanderoient, luy promettās de luy faire rendre par apres tout ce qu'il auroit fourny, & beaucoup d'auantage. Mais il n'en voulut rien faire pour cela. Ce qui fut cause qu'ils commirent l'affaire à deux Religieux fort zelés, & de grande efficace, pour persuader ce qu'ils vouloient, sçauoir est à vn Pere de l'ordre de S. Dominique appellé Frere Adrian, & à vn de la Compagnie de Iesus nommé Emmanuel Herrera, lesquels, moyennant l'ayde de Dieu, en vindrent à bout. Mais cependant qu'ils estoient allés là, quelques vns ne pouuans supporter vne si dure captiuité, s'enfuyrent vers le Xequé, lesquels furent suyuis par autres seize, qui euaderent de nuit. Les Caffres voyās le nombre de leurs prisonniers si fort diminué, penserent bien en auoir la reuenche sur ceux, qui estoient restez: & afin qu'ils ne suyussent l'exemple des autres, ils les enfermerent bien estroitement. Car ils en mirent vne trentaine dans vne petite cabanne, ou plustost prison, laquelle n'en pouuoit pas tenir vingt: si qu'ils estoient contraincts d'estre tousiours debout: & le moindre mal qu'ils eussent, c'estoit la faim, qui toutesfois les pressoit fort: mais les autres incommoditez estoient si grandes, qu'ils ne s'en ressentoient pas. Car outre que c'estoit vne chose tres-facheuse, que de demeurer là tous debout, & si fort pressez, la chaleur qu'ils enduroient estoit si extreme, qu'il leur sembloit estre dans vne fournaise. Et auoient beau subject de mediter les peines d'enfer ou de purgatoire. Car outre le chaud intolerable, ces meschans Caffres à guise de diabolins, couroient tout à l'entour de la cabanne, leur disans mille injures & vilainies: & non contents de ce,

ils en battirent à bon esciēt deux, qui n'auoyent peu entrer dedans. Alors ces pauures gens leuent les yeux au ciel, & ont recours à nostre Seigneur, & à sa sainte mere, luy faisans vn vœu tous ensemble que s'ils venoyent à estre deliurez de ceste calamité, si tost qu'ils seroyent arriuez en quelque lieu de Chrestiens, ils seroyent vne confession generale de toute leur vie, & reciteroyent le chappelet ou rosaire de nostre Dame soixante trois fois, à l'honneur & memoire d'autant d'années, qu'on tiēt qu'elle a vescu en ce monde. Il semble que leur vœu & priere fust acceptée: car peu de tēps apres ils receurent lettres d'Emmanuel Herera, l'un de ceux qui auoyēt esté enuoyez au Xequé, par lesquelles il les aduisoit qu'ils seroyent bien tost racheptez, comme de fait il arriua: car la mesme nuit le nepueu du Xequé porta ce que les Caffres auoyent demandé: & moyennant cela ils furent elargis. Or il aduint à leur depart vne chose, qui monstra bien le soing que Dieu auoit d'eux. C'est qu'il y auoit en leur compagnie vn Chirurgien fort expert en son art, & mesmes à faire les saignées: lequel auoit porté quāt & soy vn petit estuy tout plein d'instrumēs de son art, & entr' autres de quelques lancettes pour saigner. Mais lors qu'ils furent deualisez les Caffres luy prindrēt cest estuy, & n'y auoit aucun moyen de le recouurer, dont ce bon Chirurgien estoit fort marry: car aduenant que quelqu'un tombast malade, il n'auoit moyen de faire la saignée, à faute de laquelle le patient seroit en danger de mourir. Or iāçoit que quand on les rachepta, on n'eust fait aucune mention de rendre cest estuy, & qu'ils fussent desia partis sans le demander, Dieu neantmoins, qui preuoyoit combien ils en auroyent affaire, toucha le cœur de ceux qui l'auoyent, si qu'ils l'enuoyerent par vn garçon, sans demander aucune recompense. Et bien leur seruist de l'auoir: car ils tomberent presque tous malades au lieu ou ils alloient: & sans cela il est croyable que tous y fussent demeurez. Ils deslogerent donc enuiron la minuit, & ne ceesserent de marcher durant le reste d'icelle, ny le lendemain encore iusques à deux heures apres midy, qu'ils arriuerent à la riuiera de Lorange, laquelle s'engolfe dans la mer entre la coste de Soffala & le Mozambique; là où estoit la maison du Xequé, qui les auoit deliurez, & les receut assez courtoisement, bien que pour toutes caresses il ne leur baillast qu'un peu de ris & de millet à manger. De ceste sorte ils furent traictez l'espace de six sepmaines, qu'ils

Ont recours à Dieu, & font vn vœu à l'honneur de nostre Dame.

Sont racheptez par le Sarrafin

Estuy du Chirurgien rendu cōme miraculeusement

Le besoing qu'il leur fist.

furent chez luy: tellement qu'ils n'estoyēt guere mieux, & n'enduroyent pas moins de faim que parmy les Caffres: d'autant que ce Xequé estoit pauvre, & eux estoient en grand nombre. Car outre ceux de la barque, les autres qui se sauuerent sur la claye, estoient ensemble, ainsi qu'a esté dict, bien qu'ils fussent abordez vn peu plus bas, à sçauoir plus près de Soffala. Mais puis que nous auons parlé de l'assemblée de ces deux troupes, il faut dire en passant combien se trouuerent loing toutes les autres, à leur descente de celles-cy. La premiere donc, ou estoit le Capitaine & ceux qui se sauuerent dans l'esquif, donna à 30. lieuës loing de Louabe, la seconde a trois lieuës seulement, & la 3. & 4. estans à Lorage se trouuerent à 50. lieuës dudit Louabe, là ou finalement tous se vindrent rendre, cōme nous dirons. Et si tous ceux qui eschapperent le naufrage, y fussent arriuez, ils eussent peu reuenir à 90. qui estoit le reste de 250. personnes qu'il y auoit au nauire: mais plusieurs de ceux qui auoyent euadé les dangers de la mer, moururent sur terre, comme nous allōs dire, mesme de ces deux dernieres troupes.

Plusieurs meurent de faim & de misere.

Le Xequé donc estant pauvre, & ayant beaucoup de gens à nourrir, ne pouuoit fournir à tous, ce qui estoit necessaire pour leur viure: tellement qu'ils endurerent vne tres-grande faim: d'où s'ensuyuit que leurs forces s'affoiblirent de façon, que plusieurs accablez de miseres finirent leurs iours en ce lieu, & tous les autres presque furent grieffuement malades, si qu'entre tant de gēs à grand peine s'en trouuoit-il trois, qui eussent les forces pour ensepuclir les morts. Et bien qu'ils fussent tous entretenus si escharnement & miserablement; si est-ce que le Xequé n'ayant pas les moyens pour en nourrir tant, il en enuoya chez ses voylins vne partie, qui ne furent pas mieux à leur aise que les autres. Or entre ceux qui passerent, comm' il est à croire, de ceste miserable seruitude en la liberté des enfans de Dieu, furent quatre Religieux de la compagnie de IESVS, trois Peres, à sçauoir le P. Vincent Zappata, le P. Iean Gonzales, & le P. Pierre Aluarez, le 4. fust Emmanuel Herrera, qui n'estoit pas Prestre: tous lesquels moururent en extreme pauvreté, destituez de tout humain secours, & avec grandes angoissēs: acheuans ainsi le cours de ceste vie, en la croix de tribulation avec IESVS-CHRIST, pour l'amour duquel ils auoyent entrepris ce voyage. Leur couche n'estoit qu'un peu de paille, leur conuette quelques vieux & petits

4. de la compagnie meurt.

haillons, leur viande vn peu de riz ou de millet, leur boisson de
 l'eau pure: de chair ou de poisson, point de nouuelles, encore
 moins de medecines. Tellement qu'il n'est pas de merueille si
 tous presque tomberent grieffement malades, & que plusieurs
 en moururent: car il n'y auoit qu'un seul remede pour tous, à
 sçauoir la saignée: & si n'oisoit le Chirurgien tirer le sang cor-
 rompu à plusieurs, craignant qu'ils ne mourussent de debilité,
 & foiblesse: mais d'autre part ne les saignant pas, la mort aussi
 s'en ensuyuoit: à cause que le mauuais sang gastoit le bon. Ainsi
 donc trespasserent en ce lieu plusieurs de ceste trouppes, & entre
 autres ces quatre de la Compagnie n'en restant que deux seule-
 ment, à sçauoir le P. Pierre Martinez, qui a escrit ce narré, avec
 Emmanuel Diaz, qui n'estoit pas Prestre. Mais comme la diuine
 bonté a de coustume de retirer ceux qu'il luy plaist, de l'aby sme
 des calamitez, lors qu'ils y sont le plus plongez, afin qu'ils reco-
 gnoissent mieux la grace qu'il leur fait, les deliurant des maux,
 qu'ils endurent, lors que moins ils y pensent; elle enuoya son
 secours inopinément à nos pauures captifs, qui s'estimoient
 quasi tous perdus. Car voicy que le premier iour de Novembre
 dédié à la feste de tous les Saints, (l'intercession desquels ils
 auoyent deuotement inuquée) ils vont descouurir sur mer vn
 certain vaysseau, qu'on appelle en ce pais là Pangaya, lequel ve-
 noit du Mozambique, & tiroit droit à Cuama les voiles des-
 ployées; toutesfois il tourna la prouë vers Lorange ou ils estoient:
 dont ils receurent vne telle cōsolation, qu'il leur sembloit com-
 mencer à reuiure, croyans fermement que Dieu leur enuoyoit
 ce vaysseau, pour les retirer de ces miseres ou ils estoient. Aussi
 ne furent-ils pas trompez: car ce ne fust pas sans vne particuliere
 prouidence de Dieu, que ce nauire y aborda, d'autant que le Ca-
 pitaine d'iceluy auoit expresse desence d'entrer en ceste riuiera
 de Lorange, à cause qu'un autre nauire ayant esté jetté là par vne
 tormentte, auoit esté pillé & saccagé par les Caffres de ceste con-
 trée, & par ce il estoit allé mouiller l'anchre à vne autre riuiera
 appellée Quisunge (qui est vn peu plus auant vers le Mozambi-
 que) là où il auoit appris d'un ieune homme Portugais, qui estoit
 eschappé des mains des Caffres, durant leur premiere captiuité,
 tant le debreiz de leur nauire, que la dure seruitude en laquelle ils
 estoient à Lorange. Ce qu'entendant ledit Capitaine resolut,
 nonobstant la desence qui luy auoit esté faite, d'aller deliurer

Plus-
 sieurs
 autres
 passent
 le pas,
 & tous
 pensent
 y demen-
 rer.

Dieu les
 deliure
 au rēps
 de leur
 plus
 grande
 angos-
 sa.

Proui-
 dence de
 Dieu à
 les se-
 courir.

Charité ces pauures gens, ce qu'il n'eust pas autrement faict. Ayant donc
Chrestien ledit nauire pris port, ils furent tous racheptez par vn Gentil-
ne en- homme Portugais, qui estoit dans ce nauire, & le Capitaine les
uers les vestit de drap qu'il portoit : car ils estoient presque tous nuds.
miserables. Brief ils les prindrent dans le nauire, & les traicterent fort cha-
 ritablement, tant aux viures comme és autres necessitez, si bien
 qu'ils recouurerent dans peu de temps leurs forces, & apres
 qu'ils furent sortis de la riuere de Lorange, ayant faict quelques
 50. lieues vers la coste de Soffala, ils arriuerent à celle de Louabe,
 ou estoient leurs compagnons du naufrage, tant ceux qui s'es-
 toient sauuez dans l'esquif, que les autres qui estoient abordez
 là sur la premiere claye, qui partit des bancs, ou le nauire s'estoit
Arriué: brizé apres ceux de l'esquif. C'est honnorable Gentil-homme
chez François Brochade, les recut tous fort humainement, & les
Frâçois pourueut avec grande liberalité de toutes les commoditez, co-
Brocha- me s'ils fussent esté ses propres enfans. Là neantmoins le P. Pierre
de ou Martinez commença de ressentir de plus viues attaques de sa
estoyent maladie, qui estoit vn flux de ventre, avec vne grosse siebure, &
les au- outre ce vn desuoyement d'estomach, qui luy auoyent tellemēt
tres. debilité les forces, qu'il pensoit n'estre guere loing du cercueil.
 Et ce croyoit-il d'autant plus, qu'il voyoit que le Chirurgien n'o-
 soit le saigner pour sa grande foiblesse. Partant il resolut de s'en
 aller à Sena, qui est vn lieu contre-mont la riuere, ou il y a vne
 forteresse des Portugais, en compagnie de ceux, qui estoient
 venus du Mozambique, qui portoyent là quelques denrées pour
 vendre aux Caffres : non pas qu'il luy manquast aucune chose à
 Louabe pour le viure, luy estant pourueu de tout fort libérale-
 ment par ce Gentil-homme: mais parce qu'il n'y auoit pas là des
 Medecins ny des medecines pour l'ayder à se remettre en santé,
 & principalement pour rassasier son ame de ce pain celeste, du
 precieux corps de IESVS-CHRIST, dont son ame auoit aussi
 grande faim, comme le corps l'auoit eue du pain materiel. Il em-
 ploya 13. iours à ce voyage; au bout desquels il se trouua vn peu
 plus fort, bien que son estomach ne fust pas du tout remis: &
 estant arriué à Sena, il rencontra vn de ses plus intimes amis Re-
 ligieux de l'ordre de S. Dominique, & Inquisiteur de la foy en ce
 pais là, qui le mena quasi par force dans son monastere, où il le
 traicta fort charitablement. Si bien qu'ayant repris ses forces, il
 peut ouyr les confessions aux festes de Noel, & auant icelles il
 prescha

Le P.
Mari-
hez s'en
va à
Sena.

prescha quatre fois, combien qu'assis sur vne chaire, à cause qu'il ne pouuoit se tenir sur les pieds. Il escriit nommément, qu'il fut grandement consolé en ce lieu là, se souuenant comme le Pere Gonzale Sylueira y auoit esté allant à Monomotapa, ou il fut martyrisé, comme nous auons dit. Car il esperoit, que par son intercession & merites, on entendroit vn iour retentir la trompette du S. Euangile dans ce grand Empyre, au salut d'vne infinité d'ames. Veu que ces gens là sont comme vne carte blanche, ou l'on peut aisément escrire tout ce, qui est de la Religion, n'en estans destournez par le culte d'aucun Idole.

Après donc que le Pere eut recouré sa santé, il partit de Sena avec ses compagnons, qui s'estoient rendus là, & s'estans embarquez sur trois Pangayas, arriuerēt tous, Dieu mercy, au Mozambique, sains & sauuez, sur le commencement del'an 1586. Les habitans du Mozambique les reçurent avec vne ioye incroyable: & cōme ils n'auoient ouy auparauant, sinon en confus leurs miseres & dangers, après qu'on les leur eust declarés tout au long, ils en estoient si esbahis, qu'ils les regardoient, comme si c'estoient des gēs resuscitez. Eux aussi memoratifs du vœu qu'ils auoient fait, de visiter à genoux & les pieds nuds, quelque Eglise de nostre Dame, si tost qu'ils seroient arriuez à vne ville de Chrestiens, sortans du nauire, s'en vont à vne chappelle, qu'il y a sur le riuage de la mer, dediée à l'Archange S. Gabriel, & de là ils s'en vont en procession tous pieds nuds à la chappelle qu'ils appellent de nostre Dame *do Baluarte*, c'est à dire du Boulevard, située tout cōtre vn boulevard de la forteresse: & de si loing qu'ils l'aperçurent, ils se mirent à genoux, se trainans de ceste sorte iusques dedans la chappelle; suyuis d'vne grande multitude de peuple, qui les accompagnoit, tout trempé en larmes, de compassion qu'il leur portoit. Eux d'autre part se souuenās des dangers qu'ils auoient eschappé, accomplirent leur vœu, rendans graces à nostre Seigneur, & à sa sainte Mere, avec beaucoup de larmes, sanglots, & batemens de poitrine. Sortis qu'ils furent de l'Eglise, les citoyens les menoient avec grande charité en leur maison. Les Religieux de S. Dominique prièrent instamment le P. Martinez & son compagnon, de loger en leur monastere. Mais parce qu'il n'estoit pas du tout remis en santé, & pour ne donner de la peine à ces bons Peres l'espace de cinq mois, qu'il falloit sejourner en ceste Isle, iusques à la saison propre pour nauiger à Goa, il les

*S'embar-
quēt to-
à Sena,
& arri-
uent au
Mozam-
bique.*

*Rendent
graces à
Dieu, &
accōplis-
sent leur
vœu.*

*Logis &
occupa-
tions du
P. Mar-
tinez &
de son
compa-
gnon.*

remercia humblement de leur charité, & se retira pour vn temps chez le Vicaire de l'Euesque, qui est en ce lieu là, iusqu'à tant qu'on luy bailla vn logis assés commode hors la ville, tout aupres d'une Chappelle de S. Antoine. Là ou il s'occupoit à ouyr les confessions de ceux, qui s'en venoient à luy pour cest effect, & à faire quelques sermons: son compagnon aussi enseignoit le Catechisme tous les Dimanches, & iours de festes en vne grande place, ou beaucoup de monde accouroit deux fois le iour, l'une auant midy, & l'autre apres. Finalement au mois d'Aoust, comme ils se preparoyent pour s'embarquer dans le gallion, qu'ils appellent du trafic: lequel s'en va tous les ans du Mozambique à Goa en ceste saison, ayant quasi perdu esperance qu'aucun nauire y arriuaist de Portugal ceste année là, parce que le neuuesisme d'Aoust estoit escheu, auant lequel ils ont accoustumé de s'y trouuer, le lendemain iour dedié à la feste de S. Laurent la nauire qu'on appelloit du bon IESVS, arriua à ce port, & dans icelle venoyent douze Peres de la Compagnie, comptant leur Supérieur, qui estoit le P. Ayres de Sousa, tous aussi fraiz & gaillards, comme s'ils n'eussent fait que partir de Lisbonne. Aussi eurent-ils vne des plus heureuses nauigations qu'on eust de long temps ouy dire: car estés partis le 10. d'Auril de Portugal, ils n'auoyent demeuré en chemin que quatre mois.

*Arriuee
du nauire
du bon
IESVS
au Mo-
zambique.*

Estans donc descendus à terre, ils se logerent tous ensemble avec le P. Martinez, duquel ayans entendu les dangers & miseres, qu'il auoit encouru, & dont nostre Seigneur l'auoit en fin deliuré, ils ne cessoient de le louer & le remercier. Onze iours apres qu'ils furent arriuez au Mozambique, ils se tournerent embarquer dans le mesme nauire du bon IESVS, avec le P. Martinez & son compagnon: d'ou tirans droit à Goa, ils y aborderent heureusement dans trente six iours. Tel fut le succès de la nauigation du P. Martinez, & tels sont bien souuent les dangers qu'encourent ceux, qui entreprennent le mesme voyage, pour la gloire de Dieu, & le salut des ames. Lesquels bien qu'ils meurent en chemin, ne sont pas pour cela frustrez de la recompense, qu'ils auroient, s'ils auoient gagné beaucoup d'ames à IESVS-CHRIST. Car selon que dit tres-bien S. Augustin, *Quicquid vitæ & non peccatis, factum Deus computat.* Tous ce que tu veux & ne peux, Dieu le tient pour fait. Mais poursuyuons ce qui reste de ceste coste d'Afrique, iusques à la mer rouge.

*Arriuee
du Pere
Martinez à
Goa.*

*Aug. in
Ep. 57.*

Des principales villes & Royaumes, que l'on trouue sur la coste de la mer, depuis le Mozambique iusques au destroit du goulfe Arabique: & d'une belle expedition de guerre, que les Portugais feirent là, contre les Turcs l'an 1589.

CHAPITRE XIII.

APRES qu'on a passé le Mozambique tirant au Nort, ^{*ville & Royau-*} l'on trouue l'Isle & la ville de Quiloa, capitale d'un ^{*me de*} Royaume, appelé de mesme nom. Il en y a qui disent ^{*Quiloa.*} que c'est la ville appelée Rapta de Ptolomée, qui dit que c'estoit ^{*Ptol.*} jadis la capitale de Barbarie, d'ou aussi a esté nommé le Promon- ^{*Geog.*} toir Raptum: combien qu'il la met au.7. degré de latitude Au- ^{*lib.4.*} strale: & on la trouue au 9. Quoy qu'il'en soit, ceste Isle est tres- ^{*c.7.*} fertile & abondante en diuerses sortes de fruiçts, & de viures, propres à la nourriture de l'homme. L'air aussi y est fort bon. Le Roy de Quiloa estoit jadis Seigneur du Mozambique, quand les Portugais commencerent de nauiger en ces quartiers là: mais depuis pour les torts qu'ils y auoient reçu, ils l'enuahirent, & y bastirent vne citadelle, comm' aussi à Quiloa: mais ayans d'autres lieux plus commodés sur ceste mesme coste, ils razerēt ceste-cy quelque tēps apres, par le commandement du Roy de Portugal. Les habitans sont Payens pour la plus-part, bien qu'il y aye aussi ^{*Mauvs*} force Mahometains. Ils sont blancs de couleur, & vont vestus ^{*des ha-*} honnestement de diuerses sortes de draps, tant de laine que de ^{*bitans.*} soye. Les femmes portent des chaisnes & des brasselets d'or. Ils bastissent leurs maisons de pierre, de bois, & tels autres matériaux que nous, mais avec vne belle & magnifique structure.

Montant plus haut vers le Noroest on trouue le Royaume de ^{*Mom-*} Mombaza, qui prend son nom d'une Isle située pres de la terre ^{*baza*} ferme, appelée aussi Mombaza, ou il y auoit jadis vne ville por- ^{*Royau-*} tant le mesme nom, qui fut ruinée par les Portugais, ainsi que ^{*me.*} nous dirons cy dessous. Le Roy estoit Mahometain, subiect à l'Empereur de Monemuque, duquel nous parlerons bien tost.

Après Mombaza s'enfuit le Royaume de Melinde, la principa- ^{*Melinde*} le ville duquel appelée aussi Melinde, est située sur la coste de la ^{*Royau-*} mer, à deux degrés & demy de latitude Australe. Le Roy du ^{*me.*} pais, dès que les Portugais ont commencé de hanter ces regions,

*Trois Is-
les, Mo-
fia, Zan-
zibar, &
Pemba.*

*Empire
de Mo-
nemuge.*

a esté amy & confederé des Portugais, & s'est tousiours mainte-
nu en leur alliance. Le port y est tres-commode, & les habitans
sont fort humains. Ils sont blancs de couleur, & se vestent com-
me les Mombaziens. Viz à viz de ces deux Royaumes de Mom-
baza & Melinde, il y a plus auant dans la mer trois Isles, la pre-
miere desquelles & la plus Australe est appellée Monfia, la secon-
de Zanzibar, & la troiziesme Pemba, toutes trois fort fertiles &
bien peuplées d'habitans, qui sont neantmoins plus attentifs à
l'agriculture qu'au fait des armes. Ils ont là force sucre, dont ils
font grand trafic. Mais du costé de la terre ferme plus au dedans
du pais, viz à viz de ces trois Royaumes Quiloa, Mombaza, &
Melinde, se trouue le grand Empyre de Monemuge, qui confron-
te du costé du Sud avec le Royaume de Monomotapa, & du
Mozambique; d'Occident il est borné d'une ligne, ou de ceste
ruiere, qui court entre les deux lacs, d'ou sort le Nil, ainsi qu'a
esté dit: vers le Septentrion il a l'Empire du Preste-jan; & du
Midy ces trois Royaumes qu'auons dit. L'Empereur de Mone-
muge est amy des Roys, qui tiennent la coste maritime, à cause
du commerce, dont il tire aussi beaucoup de profit. Car l'on ap-
porte en ses terres diuerses sortes d'accoustremens & marchan-
dises, comme de draps de laine ou de soye, de toiles de cotton, &
autres telles denrées. Mais il fait continuellement la guerre au
Roy de Monomotapa. On dit que les Giachas, desquels a esté
parlé cy deuant, sont ses stipendiaires, & qu'il se sert d'eux pour
les opposer à ces vaillantes Amazones, qu'on dit que le Roy de
Monomotapa tiët à sa solde: lesquelles ne sont pas moins cruel-
les & farouches en guerre, que les Giachas: si toutesfois il est
vray ce qu'on en conte.

*Villes
& ha-
bitures de
Lamo,
Pate,
Braua,
Magadoxo,
Cap de
Guar-
dash.*

Poursuyuant la coste de la mer, apres le Royaume de Melin-
de suyuent les villes, Royaumes, & ports de Lamo, Pate, Braua,
Magadoxo, qui sont à vn ou à deux degrés tant delà, que deçà la
ligne Equinoctiale, & quelques autres peu renommez, iusques
au cap de Guardasu, qui est à 12. degrés de l'Equateur vers le
Nort: & l'ayant doublé on va donner au destroiët de la mer rou-
ge, maintenant appellé le destroiët de la Meque.

Nous auons parlé de ces lieux à l'occasion d'une expedition
de guerre que les Portugais firent l'an 1589. contre les Turcs.
Lesquels estans sortis par le destroiët susdit, rauageoient toute
ceste coste de mer, dont nous auons parlé maintenant; & faisoient

tous les maux qu'ils pouuoient aux Roys & Princes confederez ou vassaux des Portugais. Or jasoit que nostre principal dessein ne soit pas d'escrire en ceste Histoire les exploits de guerre, si non en tant que cela est necessaire, pour mieux entendre ce qui est propre de nostre subiect: toutesfois quand nous en trouuons quelques vns, qui n'ont pas encore esté publiez, & qui seruent, ou peuuent seruir à l'aduenir, pour l'establissement de la Religion esdits pais, nous ne les laissons pas en arriere. Nous descrirons donc cestuy-cy que nous auons tiré des aduis qu'en ont esté enuoyés au R.P. General de la Compagnie de **LES VS**, pour estre l'un des plus braues que les Portugais ayent fait long temps y a, & d'autant plus admirable, que la victoire qu'ils gaagnerent consista moins de sang Chrestien, bien qu'elle fut de grande importance. Car par le moyen d'icelle ils maintindrēt en leur debuoir les Roys barbares, qu'ils ont d'autrefois subiuguez, lesquels redoutans la puissance du Turc bransloient, comme l'on dit, au manche, ou s'estoient reuoltez contre iceux. Car il faut sçauoir, que la pluspart des Princes qu'il y a sur la coste maritime d'Afrique, depuis le Cap de bonne esperance, iusques à Melinde, & encore plus outre, font hommage, ou sont subjects à la Couronne de Portugal. Ce qui a tellement despleu depuis maintes années au grand Seigneur des Tures, qu'il a souuent enuoyé force natures de guerre, ou des galeres bien equipées, les faisant descendre par le Golfe Arabique, dans le grand Ocean, pour rauager toute ceste coste, & fermer le passage des Indes Orientales aux Portugais. Ausquels ce n'est pas vne petite espine au pied, que d'auoir vn tel ennemy, qui les guerroye sans cesse, & qui fait du braue, si de fortune il a du meilleur, ou si par ses courtes il peut embler quelque chose sur eux, outre que le peu d'assurance, qu'ils ont sur les Princes Sarrazins leurs confederez, les met bien souuent en peine. Et de fait peu de temps auant ceste expedition, que nous allons descrire, vn Capitaine Portugais nommé Roch Britto, qui estoit gouuerneur de la coste de Melinde, auoit esté traistressement liuré par le Roy de Lamo, entre les mains d'Alebechio Pirate Turc, qui auoit par deux fois pillé la plus grande partie de ceste coste de mer, avec vn notable dommage des habitans d'icelle. A ceste cause le Viceroy des Indes, qui estoit lors Emmanuel Sousa Coutigno, desiroit extremement vanger l'une & l'autre iniure, afin de contenir plus aisement ces Roys barba-

Descriptiō d'un bel exploit de guerre, fait par les Portugais cōtre les Turcs.

Les Roys de la coste d'Afrique des le Cap de bonne esperance iusqu'à Melinde & plus outre, sāt subiects ou amis des Portugais.

L'occasion pour- quoy les Portugais entreprenēt ceste expedition.

res en leur deuoir. Scachant donc que les Turcs costoyoient de-
rechef ce riuage d'Affrique, il resolut de leur enuoyer au deuant
vne armée, pour les empescher de rebrousser chemin. Il constitua
son frere Thomas, Admiral de ceste flotte, luy baillant quelques
vingt nauires de guerre, tant petites que grandes: esquelles
estoyent embarquez neuf cens soldats Portugais bien resolz.

Partent Or d'autant que c'est leur coustume, lors qu'ils vont à la guerre,
de Goa, de mener quant & eux quelques Peres de la Compagnie de
& deux Iesus, pour les ouyr en confession, & les encourager à vaillam-
Peres de ment combattre contre les ennemis de la foy, ils en demanderent
la Com- aussi, quand ils voulurent aller à ceste expedition, & on leur en
pagnie bailla deux, lesquels partirent avec le reste de la flotte du port
quant & de Goa, le 28. Ianuier, & eurent vn bon vent l'espace de 15. iours:
eux. mais apres cela suruint vne grosse tourmente, qui dura trois iours
avec vn grand danger de toute la flotte. Et comme la crainte
(principalement de la mort) pousse d'ordinaire les hommes au
bien, & à r'entrer dans eux mesmes, chascun songeoit à sa con-

Une ré- science, & faisoit sa confession aux Peres. Outre ce les vns au-
peste cuy mosinoient les pauures, les autres pardonnoient à leurs enne-
de bou- mys, plusieurs recitoient ensemble les litanies en public, ou bien
leuer chascun à part soy: brief ce n'estoit que larmes, que souspirs, que
la flotte. vœux, & prieres. Tout le monde leuoit les mains au ciel implo-
rant le secours d'enhaut. Mais cependant il fallut pour allegier
la galere Capitaineſſe ietter en mer vne bonne partie du bagage.
En fin, le troisieme iour apporta la bonace, & par ce moyen les
nauires, qui auoyent esté espars çà & là par la tempeſte, se rallie-
rent ensemble, & continuerent leur route: combien qu'ayant fait
quelques quatorze ou quinze lieues, en vn destroit de mer fort
perilleux, ils cuyderent s'assabler, & se perdre: car ils estoient
emportés par la marée sur la rade, si Dieu ne les eust preseruez
miraculeusement. Dautant que pour eause des broüillas espez,
qui les enuironoyent, ils ne voyoient pas la terre; laquelle neant-
moins ils auoyent plus proche, qu'ils ne pensoient: tellement
qu'ils alloient donner contre, s'ils n'eussent apperceu quelques
feux sur le bord de la mer, combien que toute celle coste est in-
culte & deserte. Voyans donc le danger, ou ils estoient, ils de-
stournent leur route, & vont finalement aborder à vne ville ap-
pellée Braua, tenuë par les Sarrafins vassaux ou amis des Portu-
gais. Là ils furent accertainez, que cinq galeres Turquesſes bien

Arrive
à Braua.

équipées & armées, estoient sorties par le destroit de la Meque, qui est celuy de la mer rouge, & auoyēt pris la route de Melinde. Ceste nouuelle resiouyſt tellement les Capitaines & Soldats de la flotte, qu'ils commencent à fanfarer des trompettes, & à lâcher toute l'artillerie en signe d'allegresse. L'on eust dict qu'ils triomphoyent desia apres auoir gaigné la victoire. Ils partent donc soudain de Braua, rengeans tousiours la coste, & vont poser l'anchre au port d'Ampaza, où il y auoit eu jadis vne ville appelée de mesme nom: mais deux ans au parauant elle auoit esté faccagée & bouleuersée par Martin Alphonse de Mello, Capitaine Portugais, pour s'estre reuoltée contre la couronne de Portugal, dont elle estoit subiette. La flotte y aborda, parce que l'on auoit ouy dire que deux galeres des Turcs s'estoyēt là retirées: mais on ne les y trouua pas. Le Roy d'Ampaza, qui demeuroidt encore parmy les ruines de son ancienne ville, se craignant de ceste flotte enuoya dire à l'Admiral, qu'il desiroit parlerement avec luy: mais ce n'estoit que pour le prier de vouloir ratifier la paix & alliance, qui auoit esté faicte entr'eux au parauant. On luy donna bonne esperance que cela se feroit au retour, moyennant qu'on sceust, que les Turcs n'estoyent pas venus à son instance, & qu'il ne les auoit pas receus en son haure. Estans partis d'Ampaza, vn peu apres leurs nauires s'affablerent à l'entrée d'un fleuue, qu'il falloit nauiger contre-mont, à la faueur de la marée, pour arriuer à Lamo, où ils vouloyent aller, bien qu'on leur eust baillé vn Pilote du pais, pour les garantir des passages dangereux, qu'il y a en ceste emboucheure: mais cela n'empescha pas qu'ils n'y tombassent. On ne ſçait si ce fust, ou par la malice du conducteur, ou par son ignorance. Il excusa bien son faict le mieux qu'il sceut, & l'on fust contrainct d'accepter sa descharge, ayant encore besoing de luy: mais ils sortent en fin de ce danger, & arriuent à Lamo: ou cependant que les matelots vont faire aiguade, pour se pouruoir d'eau douce, il fust dressé vn pavillon sur le riuage, pour y offrir le saint sacrifice de la Messe, laquelle y fust dicte par chascun des Peres, & là aussi ils entendirent la confession de plusieurs soldats. Tandis qu'ils estoient occupez en ceste bonne oeuvre, voicy qu'on apporte des lettres à l'Admiral, de la part du Capitaine Matthieu Mendez Portugais, Gouverneur de la coste de Melinde, par lesquelles il l'aduertissoit de l'arriuée des Turcs en ces quartiers là, ensemble du nombre & de l'appareil des nauires,

Ampaza ville ruinée pour quoy?

La flotte s'affable.

Arriue à Lamo.

*Reçoit
nouvel-
les de
l'armée
des
Tures.*

*Arrive
à Me-
linde.*

*Reçoit
deux na-
uires de
renfort.*

*Moba-
za Isle
& ville.*

ou galeres, qu'ils menoyent, luy faisant aussi sçauoir quelle route ils auoyent prise, & que le Chef de l'Armée estoit Alebechio, celuy mesme, qui auoit pris le Capitaine Britto, avec les autres Portugais. Brief il prioit l'Admiral, qu'il se hastast en diligence, pour donner dessus l'ennemy à l'impourueu: car il ne sçauoit rien de son arriüée: combien que les Princes Sarrafins de ceste coste luy auoyent escrit, qu'une grosse armée des Portugais alloit fonder sur luy: mais que ces lettres auoyent esté surprises par le Roy de Mombaza, lequel voulant s'ayder des forces des Tures, pour resister à certains peuples barbares appelez Imbies, qui taschoyent d'entrer en l'Isle de Mombaza, pour la ruiner & destruire, il auoit retenu ces lettres. Ces nouuelles resiouirent extremement les Portugais: & afin de surprendre l'ennemy sans y penser, ils remettent soudain les voiles au vent le 2. iour de Mars, & vont abborder à Melinde, où ils furent receus avec grande ioye & allegresse, tant du Roy, que du Capitaine Mendez. Là on leur dict, que les Tures auoyent voulu venir à ce port de Melinde: mais qu'ils en auoyent esté rechassez à viue force. L'Admiral fut visiter par honneur le Roy ancien amy des Portugais, & luy faict present de quelques raretez, qu'il auoit apportées des Indes: mais voyant que le long séjour pourroit rendre vaine son entreprise, le lendemain apres son arriüée il fist desmarer la flotte, renforcée de deux nauires, que le Capitaine Mendez, & le Roy de Penda y contribuèrent. Car ce Roy estoit lors à Melinde, ayant esté dechassé de son Royaume par vne esmeute du peuple, & fournist volontiers son nauire armé & équipé, moyennant la promesse que l'Admiral luy fit de le restablir en son Royaume, apres qu'il auroit gaigné la victoire contre les Tures. Les Portugais d'oc bien aises de ce renfort, partent au plustost de Melinde, & le lendemain arriuent à la veüe de Mombaza, dont ils tressaillirent de ioye pour l'enuie qu'ils auoyent de joindre l'ennemy. Or l'Isle de Mombaza est assez petite, n'ayât de circuit qu'une lieüe ou enuiron: mais elle est fort plaisante, & bien pourueüe de fontaines d'eau douce, & de viures, lesquels on y apporte d'une autre Isle fort platureuse, qui n'en est qu'à trois lieües loing. Je croy que c'est l'Isle de Penda, dont le Roy auoit esté chassé, cōme a esté dit. La ville de Mombaza située en l'Isle, estoit lors enuironnée d'une enceinte de murailles, semblables à celles de la ville de Rhodes. Les Tures auoient basti vn fort tout contre le bord de la riuere, par laquelle il fal-

loit

loit passer, pour aller à la ville. Et aussi tost qu'ils apperçurent l'armée des Portugais, ils se mirent en debuoir de le deffendre, & de leur empescher le passage. Ils commencent donc à faire iouer leur artillerie, soit pour les estonner, ou pour leur nuyre: mais tout ce tonnerre esclata, sans aucun dommage de la flotte des Portugais. Lesquels resolus de passer outre, nonobstant tous ces coups en l'air, enuoyerent deuant deux esquifs, afin de sonder si l'entrée estoit seure, pour leurs vaisseaux: & ayans trouué que l'eau estoit assés profonde, ils feirent approcher tout bellement leurs nauires. Ce qui fut fait dans denie heure: auquel temps plusieurs des soldats tascherent de mettre leur conscience en bon estat: afin de combattre plus courageusement, se confes- sans aux Peres, & se pardonnans les iniures receües les vns aux autres, voire les coups, les playes, & les meurtres, dont ils desiroient au parauant se venger, ceux qui auoient esté lezéz, allans mesme trouuer les autres, qui les auoient offencés, pour leur pardonner. Comme ils furent sur le point de passer le destroit, les Peres se mettent à les encourager, & les exhorter à combattre vaillamment sous la conduicte celeste, contre l'ennemy commun & iuré des Chrestiens, à l'exemple de leurs majeurs & ancestres: lesquels auoient les premiers descouuert ces contrées, & auoient tant de fois vaincu les mesmes ennemis en ces endroits. Et pour les esmouuoir dauantage, ils leur monstrent à tous l'Image de la sacrée Vierge Marie, qui a accoustumé d'assister de son ayde ceux, qui bataillent contre les ennemis de son fils, comme ils auoient tant de fois experimenté en leurs guerres. Avec tels & semblables propos, ils hausserent le courage aux soldats, & eschaufferent en eux le desir de bien faire: de sorte qu'il leur sembloit auoir desia gaigné la bataille, faisans retentir tous les riuages d'alentour, du bruiet des siffres & tambours, & du son des clairs & trompettes. Mais ce qui leur donna plus de courage & d'assurance de la victoire, fut vn grand prodige, qu'ils apperçurent en l'air ce mesme iour: car au leuer du Soleil, il fut veu au ciel vn rond enuironné d'une fumée noire, comme de la poix, & le dedans estoit aussi rouge que du sang, lequel alla fondre sur la ville de Mombaza. Presage qu'ils estimerent signifier la ruine & saccagement d'icelle. Comme les nauires Portugaises entroient par le canal, on leur tiroit des coups de canon du fort des Turcs, avec les plus grosses pieces d'artillerie, continuelle-

Approches des Portugais contre vn fort des Turcs.

Se preparent à la bataille.

Les Peres les encouragent.

Grand prodige ven au ciel.

*La flotte
te passe
vn de-
stroit
fort pe-
rilleux
sans dō-
mage.*

*Le fort
des
Tures
gagné.*

*Trois ga-
leres des
Tures
prises &
butinées*

*Effet
admirable
de la
divine
prodesti-
nation.*

ment, & sans pause. Mais tout ce foudroyant tonnerre ne fit qu'un grand esclat, sans que la flotte en fut aucunement endommagée, moyennant l'ayde & faueur celeste; tellement qu'elle passa le destroit en despit de l'ennemy, saine & sauue. Le Capitaine des Tures Alebechio, voyant que l'armée des Chrestiens estoit sortie de ce passage contre son attente, ne s'osa fier en son fort, ains monta viftement sur un cheual leger, qu'il auoit reserué à dessein, pour semblables occasions, & s'en court à bride abbatuë vers la ville de Mombaza, pour se ioinre avec le Roy: mais les Portugais aussi tost qu'ils eurent passé le destroit, se mettent à poursuire leur entreprise. Au moyen de quoy vn des Capitaines saute promptement de son nauire dans vne barque, suyui d'une bande de soldats, & ayant pris terre donne l'escalade au fort des Tures; mais il n'y trouua que trois soldats, deux desquels furent tuez; & le troisieme estant pris vif fut mené à la flotte. Ils y trouuerent neantmoins les estendars des Tures, lesquels ils apporterent à l'Admiral, & en offrirent le plus beau de tous à nostre Dame, le plantant deuant son Image, qui estoit au nauire. D'un si heureux commencement ils conçurent plus grande esperance d'une meilleure yssue, moyennant le diuin secours. Nous auons dit, que les Tures auoient cinq galeres, quatre desquelles estoient de trois rames pour banc, & vne de deux: & ceste-cy avec deux des autres estoient pardeça la ville, & les autres par delà, occupées en mesme temps à resister aux Imbies, avec toutes les forces des Mombaziens: & la pluspart aussi des Tures. Ce qui fut cause que les galeres, qui estoient de ceçà la ville, n'ayant que fort peu de gens pour les deffendre, apres qu'on eut lasché les pieces de canon & harquebuzes, sans faire aucun domage aux Portugais, furent bien tost prises. Il y eut quelques vns des ennemis, qui y furent tuez, d'autres qui estoient blessez furent pris: mais ceux qui n'auoient point receu de blesseure, tacherent de gagner le bord à la nage. Toutesfois il y eut quelques vns des Portugais, qui se jetterent dans l'eau pour les atteindre, & en ayans attrapé aucuns, les tuerent sur le riuage: mais ils furent par apres en peine de retourner à la flotte. Le butin qui se trouua dans ces galeres, & principalement dans la Capitainesse, fut tres-riche, & resiouïst fort les soldats. L'on y trouua aussi vn Ethiopien, lequel tirant à la mort, à cause des blessures qu'il auoit, demanda instamment le baptisme: lequel ayât receu, sou-

dain il trespassa. Cela estant fait, l'Admiral de la flotte Portugaise
 commande qu'on print l'artillerie, qui auoit esté trouuée dans le
 fort des Turcs, & la fit porter en ses nauires: puis il enuoye deux
 de ses galeres à trois rames pour banc, avec quelques nauires,
 pour aller donner dessus celles des ennemis, qui estoient attachez
 au combat contre les Imbies. Mais auant que passer outre, il est
 necessaire de dire quelque chose de ce peuple là, & pourquoy il
 assiegeoit Mombaza. C'est donc vne sorte de gens, qui sont ori- *Imbies*
 ginaires d'une contrée d'Afrique, non guere loin du Cap de bon- *quels*
 ne esperance. Ils sont tous pour l'ordinaire de haute stature, à lar- *peuples*
 ges espauls, fort robustes de corps, & merueilleusement affreux *ce sont?*
 à voir. Ils ne s'occupent à rien autre, si non à faire la guerre, & ne
 viuent que des prises qu'ils font, & du pillage. Ils mangent la *Mangée*
 chair humaine, tant de leurs ennemis, que de leurs compatriots, *la chair*
 ains ils trouuent plus de goust en ceste-cy. Et pource qu'ad quel- *humaine*
 qu'un des leurs tombe malade, s'il ne guerit bien tost, ils le des-
 pechent, & le mangent entr'eux. Que s'ils peuuent attraper quel-
 qu'un de leurs ennemis, ils ne le mettent point à rançon, mais
 sans aucune misericorde l'esgorge, & l'ayât mis en pieces, ven-
 dent sa chair en pleine boucherie, pour seruir de pasture. Ils vsent *Leurs at*
 du test humain, au lieu de hanap. Leurs armes offensives sont *mes offe-*
 des arcs avec des fleches enuenimées: & certains pieux de bois *sives &*
 endurcis au feu. Ils portent encore de gros couteaux, non pas *desfen-*
 guere longs, mais fort larges, dont ils se seruent pour esgorger, & *sives.*
 despecer les hommes. Mais pour leurs armes defensives, ils n'ont
 qu'un long bouclier de bois fort leger, couuert d'une peau de
 quelque beste sauuage, avec lequel ils couurent tout le corps. Il
 n'y a parmi eux aucune religion, nulle crainte de Dieu. On les *Leur im-*
 tient pour insignes forciers, & enchanteurs; tellement qu'on dit *piété.*
 que par art magique ils paroissent, lors qu'ils sont rangez en ba-
 taille, en beaucoup plus grand nombre qu'ils ne sont. Ils honno-
 rent leur Roy de mesme, que s'il estoit Dieu: & disent, que
 c'est luy qui domine & seigneurie sur terre, comme les Portugais
 sur mer. Au reste il est si sot, & outrecuydé, que si d'adventure il *Superbe*
 pleust contre sa volonté, ou que le chaud excessif le travaille, il *outre-*
 se met en cholere contre le ciel, & comme forcené de rage déco- *cuydée*
 che son arc contre luy, parce qu'il n'obeist à son commandemēt. *de leur*
 Brief son orgueil ou plustost sa folie est bien si grande, qu'il se *Roy.*
 promet l'Empire de l'Vniuers, & se vente qu'il ruinera & sacca-

*L'ordre
de son
camp.*

*Les
maux
qu'ils
fût par
ou ils
passent.*

*Tasché
d'entrer
en l'Isle
de Mombaza.*

*Les
Tures
avec les
Mombaziens
la
dissent.*

gera toute la terre habitée. Il est suuy d'ordinaire de quatre vingts mille combattans : & l'ordre qu'il garde en son camp est tel. Premièrement il fait marcher deuant plusieurs troupeaux de bestail, pour arrester les courses des ennemis, ou afin de les rendre vaines, & de nul effect. Apres cela il fait porter du feu deuant soy, pour donner à entendre, que tous ceux qu'il subiuguera, & prendra, ne doibuent attendre autre chose, que d'estre rostis & mangez. Par tout ou ces gens là passent, ils font vn tel desgast, que outre le saccagement & bouleuersemēt de tous les villages, bourgs, villes, & citez, qu'ils rencontrent, leur rage s'acharne encore contre toutes les personnes, voire contre les bestes, qu'ils trouuent, de sorte qu'ils ne laissent rien en vie. Et pour ce on les redoute si fort, que dès qu'on entēd en quelque lieu leur venue, tout le monde s'enfuit, & laisse les champs & les villes desertes. Avec cest appareil & tels vestiges de cruauté, le Roy de ces Imbies estoit arriué à l'Isle de Mombaza, prez de laquelle estoient anchrées les autres galeres des Tures, qui s'estoient joints avec les Mombaziens, pour empescher que ce peuple barbare n'entraist dans l'Isle. Car ne pouuant passer le bras de mer, qui separe l'Isle d'avec la terre ferme, il s'estoit arresté tout court, de mesme que le feu (qu'il meine deuant soy) ayant fait le degast de quelque grād bois ou taillis, est arresté par l'entrejet d'vne riuierre. Toutesfois apres auoir fondé le gué, ils trouuerent vn passage gueable, par lequel ils resolurent d'entrer dans l'Isle, nonobstant la resistance, que leur faisoient les Tures & les Mombaziens. Sur ces entrefaictes voicy arriuer les Portugais, lesquels commencē d'assaillir viuement les Turs & Mombaziens, dont les Imbies furent si aises, que se gaudissans des Tures; Voicy (leur disoient-ils) les Portugais, qui vengeront les maux que vous nous avez faits: & apres qu'ils vous auront tous massacrez, nous vous deuorerōs. Ce qu'ils disoient principalement contre les Tures, à cause qu'ils auoient tué beaucoup des leurs à coups d'artillerie. C'estoit à la verité vn spectacle fort effroyable : car ceux qui eschappoient des mains des Portugais, tombotent entre celles des Imbies; mais ils n'en auoient pas meilleur compte ; d'autant que sans aucune mercy, ils estoient tous meurtris & deuorez. A raison de quoy plusieurs des Tures & Mombaziens, qui pour ne venir entre les mains des Portugais, auoient gaigné à la nage l'autre riue du fleuve, du costé de laquelle estoient les Imbies, voyans leur cruauté,

& ce qu'ils faisoient à ceux de leur party, rebroussoyent chemin, & se venoyent rendre aux Portugais, aymans mieux estre esclaves d'iceux, que seruir de curée à ces barbares. Et ce fut la cause, pour laquelle les Portugais gaignerent ceste victoire avec moindre perte de gens: car il n'y en eust que quatre de tuez, cōbien que beaucoup y furent blesez, toutesfois sans danger de mort. Mais des Turcs il y en demeura sur la place quelques cent, entre lesquels y auoit deux Capitaines, & soixante furent faits prisonniers. Outre ce, grand nombre de Chrestiens captifs, qui estoient aux galeres, fust mis en liberté. On tronua dans lesdites galeres vingt & trois grosses pieces d'artillerie de fonte, & plus encore de petites de tres-grand prix. L'assistance particuliere de Dieu parust tant en la bataille nauale, qu'en la saison qu'elle fust donnée, à cause de l'arriuée inopinée de la flotte des Chrestiens: de façon que les mesmes Turcs cōfessoient auoir esté plustost vaincus, qu'ils n'auoyent apperceu leur ennemy. Le lendemain iour de S. Thomas d'Aquin quelques cinq cens Portugais descendent à terre, & marchent droit à la ville de Mombaza: laquelle ils trouuerent toute vuide d'habitans. Les rues estoient si estroites qu'à peine deux hommes y pouuoient marcher de front. Les maisons estoient basties de pierre & de chaux, & plusieurs d'icelles fort hautes. Elles sembloient belles par le dehors: mais au dedans elles estoient obscures, & sans ordre ny symmetrie, de façon qu'on eust dict, que c'estoyent plustost des grottesques, ou le Soleil ne donne iamais, que des logis pour les hommes. Or comme les Portugais furent entrez dans la ville sans aucune resistance, ils s'arrestèrent vn peu, craignans qu'il n'y eust quelque fraude, ou embusche: mais apres qu'ils eurent veu la solitude de la ville, ils mettent le feu par tout ou ils peuuent: ruinent & demolissent les murailles, & les temples des faux dieux, vn entre autres, qui estoit fort vaste & tout vouté. La ville de Mombaza estant ainsi bouleuerfée, l'on mist le feu à toutes les nauires, qui estoient au port, & cela fait Sousa reestablit le Roy de Penda en son Royaume. Mais ce ne fust pas là que se termina la victoire: car voicy comme Dieu leur mit entre les mains sans y penser Alebechio, & plusieurs autres Turcs & Mombaziens. Le seiziesme iour de Mars comme la flotte victorieuse s'en retournoit rengeant la coste, l'on va voir vne grande multitude de gens, qui couroyent à grand' erre vers le riuage, & tendant les mains im-

*Victoire
des Por-
tugais
sur les
Turcs &
la cause.*

*Prise &
bouleuer-
sement
de la
ville de
Mombaza.*

*Le Roy
de Penda
remis en
possession.*

*Alebe-
chio avec
plusieurs
autres
Turcs &
Momba-
ziens font
pris des
Portu-
gais.*

ploroit à haute voix le secours des Portugais, les priant de les vouloir recevoir dans leurs nauires: parce que les Imbies les poursuuoient à toute reste. Entre ceux-là estoit Alebechio avec vn autre Capitaine d'une des galeres Turquesques, & quelque trentaine d'autres Turcs, & bien deux cents Mombaziens. Alebechio estant près des nauires, commance à parler en langage Espagnol: (car il y estoit bien entendu) priant les Portugais de le vouloir recevoir dans leurs nauires. Il s'excusoit sagement sur l'incertitude des choses humaines, & des euenemens de la guerre: disant qu'il ayroit mieux estre esclau des Chrestiens (la douceur & clemence desquels il auoit autre fois experimentée en Espagne) que seruir de viande à ces barbares. Car il racontoit que le Roy de Mombaza, & les Magistrats de la ville, avec tous les principaux de sa Cour, auoyent esté deuorés par les Imbies, lesquels en amenoyent encore vne grande multitude de prisonniers destinés à pareille boucherie. Les Portugais reçoient Alebechio, & les autres Turcs & Mombaziens, qui s'estoyent venus rendre à eux, chassans les Imbies, qui les poursuuoient à grands coups de canon. Les choses estant en tel estat, les Peres celebrent le S. Sacrifice de la Messe sur le riuage de la mer, le Dimanche de la Passion, quinze iours auant Pasques, pour rendre graces à Dieu d'une si belle victoire; Ils prescherent aussi là dessus, & firent d'autres choses, qu'on a accoustumé de practiquer en vn tel temps, pour le salut de plusieurs. Le mesme iour fust fait le departemēt entre les Capitaines victorieux des galeres, qui auoyent esté prises, & qu'on deuoit amener en l'Inde. De là on va mouiller l'anchre à Melinde, là où le Roy fust voir l'Admiral dans sa galere mesme, pour se conjoindre avec luy de la victoire gagnée, & voyant Alebechio avec les autres Turcs, & plusieurs de la noblesse de Mombaza attachés à la cadene; Il n'a fait iamais bon (diēt-il) d'attaquer & harceler les Portugais: car tost ou tard, ceux qui ont osé entreprendre cela, en ont porté la peine. Là dessus Sola voulant se gaudir d'Alebechio: Pourquoi (luy diēt-il) mesprises-tu, & regardes d'une si triste mine le Roy de Melinde? A quoy l'autre repart: Monsieur, quoy que l'asne face pour paroistre cheual, si ne laisse-il point pour cela d'estre tousiours asne. L'Admiral par apres s'en alla à la ville de Melinde pour saluer le Roy, & luy payer la visite: là où il fut receu & accueilly de tout le peuple avec vne extreme liesse. Icy aduint sur le des-

*La flotte
victorieuse
arriue à
Melinde.*

partement du butin, quelque debat ou querelle entre Sofa & Mendez, pareillement entre les Capitaines, & soldats Portugais: laquelle ne se fust terminée que par quelque funeste accident, si Dieu n'y eust mis la main. A quoy seruiſt de beaucoup l'auctorité & preſence des Peres, lesquels avec leur prudence & l'assistance diuine, composerent ce different, & plusieurs autres qu'il y auoit en la ville assez intriquez. Ces choses ayant esté faites selon le ſouhait, & contentement de plusieurs, ils partent de Melinde le 26. de Mars, sept iours auant Pasques: & apres auoir passé l'Æquateur, le lendemain ils arriuent à Lamo. Icy l'Admiral Sofa fit apprehender le Roy, comme criminel de leze Majesté, & le fit mettre à la cadene iusqu'à tant que son procès luy seroit fait. Le propre iour de Pasques les Peres dirent la Messe à Lamo, & administrerent les Sacremens de la Penitence, & de l'Eucharistie à l'Admiral Sofa, & aux autres Capitaines, brieſ à plusieurs des soldats. Puis ils vont tous aborder à Paté, qui est vne belle & grande ville. L'Admiral estant là commande au Roy de Sian, & aux Princes de Pate & d'Ampaza de se trouuer avec les principaux Seigneurs & officiers de leur Cour, au iugement qu'il deuoit faire du Roy de Lamo, pour estre puny comm'il meritoit, ſuyuant les loix. On dressa publiquement vn eschaffaut fort esleué de terre: à l'entour duquel furent rangez deux cens Portugais en armes. Le Roy de Lamo avec les autres criminels furent traînez là dessus, les mains attachées par derriere. Le Roy ayant fleschy le genouil sur vn tapis, qui estoit là estendu, on luy demande, s'il vouloit mourir Chrestien. Ayant dict que non, il fust condamné à perdre la teste. La teneur de la sentence fust telle. D'autant que vous Panebaxira iadis Roy de Lamo auez esté preuenu, & deuëment conuaincu du crime de perfidie & trahison, ayant liuré Roch Britto, Gouverneur de la coste maritime de Melinde, avec autres quarante Portugais, tant hommes que femmes, & petits enfans, entre les mains d'Alebechio Capitaine Turc, & faisant alliance avec luy, l'auiez secouru de vos forces; en quoy vous auez griefuement offensé la majesté Royale; pource le puissant Roy Philippe, & de son auctorité Emmanuel Sofa Coutigno vous cōdamne à perdre la teste, & le Royaume de Lamo avec tous vos biens, qui luy sont confisquez. Vostre corps aussi estre priué de sepulture, pour seruir de pasture aux oyseaux & autres bestes: & deffence est faite à toute personne de l'enſe-

*Arriuee
de la
flotte à
Lamo,
& ce
qu'elle y
fit.*

*aborde
à Paté
ville.*

*Le Roy
de Lamo
est con-
damné à
perdre
la teste.*

*Teneur
de la
sentence.*

*Autres
gēs ex-
cutez à
mort par
la lu-
stice.*

uelir. Quiconque contreuiendra à ceste ordonnance, sera coul-
pable de mesme crime, & puny de mesme supplice. Tel cha-
stiment doit-on prendre d'un traistre de ses amys, d'un recepta-
teur & défenseur des ennemis d'iceux, afin que desormais per-
sonne n'ose atenter chose semblable. Voyla le contenu de la
sentence. Il y eust outre ce le frere du Roy de Chelicie, qui fust
chastie de mesme peine, pour s'estre associé au Turc, & l'auoir
accompagné. Son corps ayant esté escartelé, ses membres furent
pendus ou attachez en diuers endroicts, pour seruir de terreur.
On fit aussi mourir de mesme sorte deux officiers de la ville de
Paté. L'exécution estant faite, & la ville pacifiée, l'on offrit le S.
sacrifice de la Messe, & lors les soldats de la flotte, qui n'auoyent
pas encore fait leurs Pasques, reçurent la communion du pre-
cieux corps de IESVS-CHRIST, comme aussi les soldats Por-
tugais, qui estoient en garnison à la forteresse de Paté. Plusieurs
encore de la mesme ville, qui estoient en picques, furent mis
d'accord par le moyen des Peres. Or entre les villes de Sian & de
Paté, il en y a vnē autre nommée Mondra, qui estoit aux Sarra-
fins, mais tributaire des Portugais; combien que depuis plusieurs
années, elle ne tenoit compte de payer le tribut, & si tramoit
encore quelque reuolte contre eux. A ceste cause Soufa la fit
mettre rez pied, rez terre, & les habitans furent condamnez aux
galeres. Mais deuant que passer outre, il ratifia le traité de paix
auec le Roy d'Ampaza ayant sceu qu'il n'auoit point assisté le
Turc de son secours.

*Mondra
ville ra-
née et
pour-
quoy.*

*Arrivée
de la
flotte à
Goa.*

Les affaires de Melinde ayant esté ainsi composez, la flotte re-
met les voiles au vent, pour s'en retourner : mais en chemin elle
va passer à l'Isle de Socotora, pour y faire aiguade : d'ou estant
partie le 1. de May, elle vogue heureusement en l'Inde : & enuiron
le 15. du mesme mois arrive au port de Goa chargée de des-
pouilles, & de gloire. Les Capitaines Turcs, & les plus nobles d'i-
ceux furent menez en prison. Ce fut à la verité vn tres-beau &
tres-joyeux spectacle aux yeux des habitans de Goa, que de voir
le Capitaine Alebechio, du quel ils auoyent tant ouy parler,
pour auoir tenu l'espace de plusieurs mois toute ceste mer sub-
jecte, & fait tant de rauages sur terre, estre venu en fin en leur
pouuoir. Mais a tant de cecy. Parlons maintenant de l'Empire
du Preste-jan.

*De l'Ethiopie deffous l'Egypte, ou de l'Empire du Prestre-jan,
& de l'alliance qui a esté faicte entre luy & les
Rois de Portugal.*

CHAPITRE XIII.

PTOLOME descriit en sa Geographie deux Ethiopies, *Ptolom. lib. 4. c. 7. & 9. Deux* l'une qui est deffous l'Egypte, & l'autre qu'il appelle Interieure. La premiere confronte (comme il dit) du costé d'Orient avec la mer rouge; du Midy avec l'Ethiopie interieure, *Ethio-* qui commence à huit degrés de latitude Australe : d'Occident *pies &* avec la Lybie, aussi interieure; & du Nort avec l'Egypte. Or cest *deux fois, -* à peu pres là ou est maintenant l'Empire du Prestre-jan. Quant à *tes d'Ethiopiens.* l'Interieure il luy baille pour limites vers l'Occident & le Midy des terres incognues, mais à present l'on trouue que c'est le grand Ocean, qui lave les costes maritimes, tant deçà que delà le Cap de bonne esperance, jusques au Mozambique. Homere fait aussi *Homere.* mention de deux sortes d'Ethiopiens, les uns Orientaux, & les *odys. à* autres Occidentaux. Ceux-cy, comm' il se collige de Strabon, *Strabo lib. 1.* sont les habitans de Congo, & de ces autres quartiers, qui vont aboutir à l'Ocean Ethiopique du costé d'Occident. Mais ceux-là sont les Abyssins, desquels il nous faut maintenant traiter. Celuy qui commande & seigneurie en ce pais est appelé de ses subiects Grand Negus, c'est à dire Roy, ou bien Acegue, qui signifie *Le Roy des Abyssins ou de l'Ethiopie* Empereur : à cause qu'il a beaucoup de Royaumes sous soy. Mais en Europe nous le nommons communément le Prestre-jan. L'occasion en est diuersement rapportée par les auteurs : *Ethiopie sous l'Egypte est appelé Grand Negus ou Acegue.* toutesfois ceux qui en parlent plus probablement, à mon aduis, disent, que c'est, par ce qu'au commencement de la decouverte des Indes, faicte par les Portugais, l'on croyoit que ce grand Prince fut celuy, que Marc Paul Venetien en ses voyages appelle *Marc Paul 1^{er} de nat. l. 2. c. 52.* Prestre-jan, & dit qu'il est souverain Prestre & Roy tout ensemble en ce pais du Levant, ou des Indes. Et bien qu'il mette son Empire aupres du Cathay ou de la Chine: neantmoins, comme lors qu'on bailla ce nom au Roy d'Ethiopie, il y eust peu de gens de deçà, qui sceussent la distance de l'une & de l'autre contrée, l'on appelloit tous les pais, dont on n'auoit point de connoissance, Indes : & pour ce l'on a donné à l'Amerique, le nom d'Indes Occidentales. D'ailleurs, s'il est vray ce, qu'en escrit Oforius, comme *Pourquoy en Europe l'on ne*

*nomme
Preste-
jan.*

*bornes
de son
Empi-
re.*

*fertili-
té du
païs.*

en ce temps là on voyoit plusieurs Prestres Ethiopiens venir à Rome, & voyager en France, & en Espagne, lesquels estans interrogez si leur Roy auoit vne Prestrise souueraine, & si on l'appelloit Preste-jan, brief si leur païs estoit contenu dans les Indes, eux pour estre mieux traictez & receus, ne disoient pas du contraire: d'ou ceste opinion s'engraua tellement en l'esprit de plusieurs, que le nom en est demeuré encore. Mais s'il est vray, ce que quelques vns disent, qu'on nomme en ce païs là le Roy Bel Gian, c'est à dire souuerain Seigneur, il a esté aisé de prendre l'un pour l'autre, de maniere qu'au lieu qu'ils disoient que leur Prince s'appelloit Bel Gian, on entendit Preste-jan. Quoy qu'il en soit, ce Prince Chrestien commande à vne grande estenduë de païs. Son Royaume est borné de l'Egypte au Septentrion; des môtaignes de la Lune au Midy, ou comme disent quelques vns, de l'Empire de Monemuge. A l'Orient il a la mer rouge depuis le golfe d'icelle, iusques au port de Suez; & vers l'Occident le Royaume de Congo ou païs d'Agesymba. Iadis il auoit en son pouuoir tous les ports de la mer rouge du costé d'Ethiopie: mais depuis quelque tēps en ça, les Turcs les luy ont tous ostez, hormis celuy d'Arcoco ou Arquico, & encore deuant celuy-là ils tiennēt l'Isle de Mazua, qui en empesche l'entrée. Quelques vns disent que cest Empire a 670. lieuës de circuit, mais d'autres luy en donnent plus de mille. Il contient plusieurs hautes montaignes presque inaccessibles; entre lesquelles il en y a de fort commode habitation. Au sommet d'icelles on trouue des plaines belles & spacieuses, des fontaines d'eau douce, des pasturages & herbages propres à nourrir force bestail à laine & à corne, & beaucoup d'autres commoditez. Le païs d'embas est fertile, & gras pour la pluspart. Il porte force grain, nommément du seigle & de legumages, mais peu de froment. Il nourrit force cheuaux & mulets. Leurs cheuaux sont petits pour l'ordinaire: combien que ceux, qui viennent de la race des cheuaux d'Arabie & d'Egypte, sont assez grands. Il foisonne en miel & en cotton: pour le vin il n'en y a point: leur breuuage ordinaire est fait de millet, & pour les plus delicats ils font vne sorte d'hydromel agreable à la bouche, & profitable à la santé. A la table du Roy, comme quelques vns disent, on y sert du vin: mais on n'en trouue gueres ailleurs. Ils ont des Elephans, Lyons, Tygres, Ours, Cerfs, & autres telles bestes sauuaiges. Au reste la nation est pa-

tesseuse iusques au bout, & fort grossiere. Ils ont force cannes ^{Nation} ou roseaux de sucre : mais ils ne le sçauent point affiner. Le pais ^{paref-} est abondant en mines d'or, d'argent, & de citiure : toutesfois ils ^{seuse &} ne s'en sçauent pas seruir, ny ne veulent prendre la peine de les ^{grossie-} tirer : sinon quelque peu d'or, dont ils vsent en leur traffic, non ^{re.} pas monnoyé, mais en lingots. La terre aussi, bien qu'elle soit fertile, ne leur apporte pas ce qu'elle pourroit, à cause de leur setardise & nonchalance. Ils n'ont point de tempestes ny orages, qui ruinent leurs champs ; mais bien des langoustes, qui leur rauagent quelquefois les Prouinces entieres. Les villes du Royaume sont petites, les maisons basses, & les parois faictes de croye. Il y a neantmoins des Eglises basties de pierre, & fort magnifiques. Le Roy ne demeure point d'ordinaire en aucune ville, ains passe toute sa vie soubs des pauillons en plaine campagne: ou il est ac- ^{Le Roy}compagné d'un tel nombre de gens & de tentes, que son camp ^{demeu-} s'estend enuiron six lieuës de long, & autant de large: mais en tel ^{re tous-} ordre, qu'encores qu'ils se remuent souuent, il est aisé de trouuer ^{jours des} tous ceux, à qui on veut parler. Car l'on y garde tousiours la mesme disposition tant des ruës, que des pauillons. Tout le camp est diuisé en sept paroisses, qui ont chascune leurs Prestres assignez: auxquels appartient de dire la Messe, & faire le seruice diuin, prescher au peuple, & instruire ceux, qu'ils ont en charge, chastier les delinquants, & exhorter vn chascun à faire son deuoir, viuant Chrestienement. Car ils font tous profession de la foy Chre- ^{Profes-}stienne, & disent qu'elle fut premieremēt enseignée & preschée ^{sent la} à leurs ancestres par l'Eunuque de la Royne de Candace, duquel ^{foy Chre} est fait mention es Actes des Apostres, & puis par l'Apostre ^{stiennz} S. Matthieu. Et de fait les histoires & les anciens Peres ou Do- ^{& par}cteurs de l'Eglise tesmoignent, que ledit Apostre a presché l'E- ^{qui ils}uangile en ces quartiers là. Mais ils l'ont à present fort meſſangée ^{l'ont re-} d'erreurs, tirez partie des superstitions Iudaïques, partie de di- ^{l'us fort}uerſes heresies. Car ils donnent à leurs enfans non seulement le ^{meſſie} baptisme, mais encore la circoncision. Ils ne māgent point de la ^{avec les} chair de pourceau, ny semblables viandes defenduës en la loy ^{supersti-}Mosaïque: & se conforment en plusieurs autres choses à la façon ^{tions Ju-}daïques.

Aussi disent ils, que leur Roy descend de la race de Salomon & de la Royne de Saba, qui en eust, à leur dire, vn fils nommé Melilec ; & que de luy sont extraicts tous les Roys d'Ethiopie, qui ont esté iusqu'à present. Plusieurs aussi des Ethio-

piens s'estimēt & se prisent d'estre yssus de la race des seruiteurs Iuifs, que le Roy Salomon enuoya avec son fils, lors qu'il s'en alla en Æthiopie vers sa mere. D'ou vient, qu'ils sont tāt afectionnés au Iudaïsme; & le Roy mesme en ses tiltres s'appelle fils de Dauid & de Salomon selon la chair, & de S. Pierre & de S. Paul selon la grace. Ils ont des Euesques tout de mesme que nous, & des Prestres aussi, qui leur administrent les Sacremens, nomméement de la confession auriculaire, laquelle ils font sōuuent, & de la communion encore: combien qu'ils communient sous les deux especes de pain & de vin. Ils ont force monasteres de Moines, tous lesquels sont de l'ordre de S. Antoine. Quant aux Euesques, le Roy seul les crée, & les Moines eslisent le Patriarche, qu'ils appellent Abuna, mais par apres il doit estre confirmé du Patriarche d'Alexandrie d'Ægypte, d'ou vient qu'ils suyuent les mesmes erreurs, que les Alexandrins. Ils portent grande reuerence aux Eglises, n'estant permis à personne d'y entrer, sinon à pieds deschaux: & ceux qui y rient, ou deuissent, ou s'y promènent, sont estimés meschans & malheureux. Ils ieusnent fort estroitement le Careme: car pour le regard des Moines, ils ont accoustumé de le ieusner tout au pain & à l'eau: voire il en y a, qui ne mangent point du pain en tout ce temps là, & se nourrissent seulement d'herbes. Mais les autres ne sont pas si austeres: combien que tous ceux qui ieusnent, s'abstiennent de manger & de boire iusques à Soleil couché. Ils n'ont point accoustumé de manger de poisson: car encore que les riuieres en portent grande quantité, si est-ce qu'ils ne le sçauent pas, ou ne le veulent pas pescher. Leurs Prestres disent la Messe, & font des processions, comme nous, portans deuant des Croix, & des encensoirs: mais avec ce ils retiennent la coustume des Grecs de se marier: combien que si leur femme vient à deceder, ils ne conuolent pas à secondes nopces, & mesmes lors qu'ils doibuent celebrer la Messe, ils s'abstiennent de l'acte coniugal deux ou trois iours deuant. Ils ont en fin beaucoup d'erreurs de Dioscorus, d'Eutiches, & de semblables heresiarches. Au moyen dequoy ils se sont retrâchez de l'vnion de l'Eglise Catholique Apostolique & Romaine: tant par leur schisme, ne recognoissant pas le chef de l'Eglise vniuerselle, que par leurs hieresies. Et en tel estat sont ils il y a desia long temps.

*Ce qu'ils
observēt
du Chri-
stianisme.*

*Sont heretiques
& schismatiques.*

Jean 2. Or le Roy de Portugal Iean 2. desirant trouuer quelque païs

sage pour aller de son Royaume aux Indes, & destourner par ce moyen le trafic des drogues, espicerics & pierres precieuses du Leuant de la Surie, & de l'Egypte, pour le transferer en Portugal: afin d'affoiblir d'autant les forces du Turc & du Soldan d'Egypte, & accroistre les siennes, comm' il eust entendu qu'il y auoit en Orient vn certain Empereur Chrestien, qui commandoit vn fort ample pais dans l'Inde, & s'appelloit Preste-jan, il pensa que ce luy seroit vn grand honneur, & vne chose qui pourroit beaucoup seruir, tant pour l'aduanacement du Christianisme, que pour venir au bout de son entreprise, de descouurir les Indes, s'il faisoit alliance avec ce Prince Chrestien. A ceste cause il enuoya quelques vns de ses subiects en Egypte par la mer Mediterranée, avec charge de passer de là par la mer rouge, en l'Inde, pour s'informer de ce Prince Chrestien, & l'ayant trouué luy presenter des lettres de sa part, & luy offrir son alliance. Ceux-cy estonnez des difficultez grandes, qu'ils trouuerent en ce voyage, mesmes à cause qu'ils n'entendoyent pas la langue Arabesque; comme ils furent arriuez à la sainte cité de Hierusalem, ils s'en retournerent en Portugal sans rien faire. Apres ceux-là il en vint deux autres, qui estoient bien versez en la susdite langue: l'un s'appelloit Pierre Couillan, combien que Oforius l'appelle Iean Petreio) l'autre Alonse Payua, leur baillant des lettres, qui s'adressoyent à quelques Roys des Indes, & nommément au Preste-jan. Si leur ordonna que cas aduenant de la mort ou autre inconuenient de quelqu'un d'eux, l'un print la charge de l'autre. Arriuez qu'ils furent en Alexandrie d'Egypte, ils s'en vont en habit de marchans de là au grand Cayre, jadis appelé Memphis, comme quelques vns disent, là où s'estans ioincts & associez aux Carauanes des Sarrafins, par le moyen du langage Arabesque qu'ils sçauoyent parler, ils se transportent à la ville de Toro, jadis appelée Elana, fort celebre à raison du passage des enfans d'Israël, qui traufferent la mer rouge en celieu, comme l'on tient par traditiue. De là ils s'en vont à la ville d'Aden, sise sur le destroit du golfe Arabique, ou ils se separent l'un de l'autre. Alonse Paiua prend son chemin vers l'Ethiopie, qui est sous l'Egypte, pour aller trouuer le Roy des Abyssins, qu'il auoit ouy dire estre Chrestien, & luy offrir l'amitié & alliance du Roy de Portugal: l'autre prend la route de l'Inde, tant pour voir s'il trouueroit là ce Preste-jan, que son Roy luy auoit designé, que pour

*Pierre
Couillā
& Al-
onse
Payua
Embaf-
sadeurs.*

*Voyez
Ortel-
ius in
thesau-
ro geo-
grafico
uerbo
Mēphis.*

*Voyage
de Cou-
uillan.*

*Fait son
Ambas-
sade au
Roy des
Abyss-
sins Ale-
xandre.*

descourir les ports & haures de l'Inde. Mais auant que par-
tir, ils arresterent ensemble, qu'ils s'en reuiendroyent dans cer-
tain temps au grand Cayre, pour se rejoindre là. Couillan fit heu-
reusement son voyage de l'Inde, remarquant en vne carthe marine
tous les principaux ports & haures du Leuant, ou il auoit esté,
selô que nous auôs dict au premier liure, cōbien qu'il n'y trouua
pas ce Prince Chrestien, que son Roy luy auoit marqué. Mais
Payua mourut (lō ne sçait de qu'elle façon) auât qu'il arriuaît au
Roy des Abyssins; tellement que Couillan estant reuenu au grâd
Caire, au temps qu'ils s'estoyent promis l'un à l'autre: & ayant
sceu le trespas de son compagnon. Bien qu'il eust enuie de s'en
retourner en Portugal: neantmoins sçachât que le Roy son mai-
stre ne seroit pas content, s'ils n'auoyent faict ceste Ambassade
du Prestre-jan, il pensa qu'il y debuoit aller.

Ayant donc au prealable aduisé par lettres le Roy de Portugal
de tout ce que dessus, par le moyen des marchands Portugais,
qui trafiquoyent au grand Caire, il s'en va en Æthiopie. Estant
arriué au Roy des Abyssins, qui estoit lors nommé Alexandre, il
fust receu de luy fort gracieusement. Car jasoit que le Roy ne
s'assuraît pas que tout ce que Couillan luy disoit, fust vray,
mesmes au commencement, si est-ce qu'il luy donna croyance à
la parfin: & luy fit beaucoup de caresses, estant bien aise d'enten-
dre qu'un Prince Chrestien enuoyast de si loing par deuers luy,
& desirast son amitié & alliance, voire qu'il la luy demandast
par lettres & gens exprés. Tellement qu'après s'estre enquis de
plusieurs choses, tant du Roy Iean, que des autres Roys de l'E-
urope, il le vouloit renuoyer avec beaucoup de presens, vers son
Prince, auquel il pensoit escrire des lettres pleines d'affection, &
de bien-ueillance: mais la mort qui vint là dessus couppa bro-
che à tous ees beaux desseins. Il estoit en son viuant homme fort
benin & debonnaire, & duquel on pouuoit esperer beaucoup,
pour l'effect de l'alliance, & pour la conuersion de tout ce país à
l'Eglise. Mais il eut pour successeur vn sien frere appellé Nau,
fort different en mœurs & en volonté d'iceluy. Car non seule-
ment il ne daigna pas faire responce au Roy de Portugal: ains
encore retint ledit Couillan son Ambassadeur par force, ne vou-
lant permettre aucunement qu'il s'en retournaît en son país: de
maniere qu'en Portugal on le tenoit pour mort, iusqu'à ce que
quelques autres Ambassadeurs vindrent de Portugal. Or quel-

*Est rete-
nu par
force en
Æthio-
pie.*

que temps apres ce Roy Nau estant mort, la couronne vinb à vn sien fils nommé Dauid, qui estoit fort ieune, quand son pere mourut; de façon qu'il fust laissë soubs la tutele de sa grande mere appellée Helene, femme de grand entendement, & courage, laquelle mania pendant la minorité de son petit fils, tous les affaires du Royaume: & entendant les grandes proüesses que les Portugais faisoient es Indes en ce temps là, aduertie par Pierre Couillan, que c'estoyent des subiects de son Prince, de la part duquel il auoit esté enuoyé pour Ambassadeur au Roy Alexandre, elle bien aise d'auoir occasion de contracter alliance, & amitié avec vne nation si valeureuse, enuoya vers le Roy de Portugal Emmanuel qui regnoit lors, vn Ambassadeur nommé Matthieu, Armenien de nation, homme de grande prudence & vertu, luy baillant pour compaignon vn Gentil-homme Abyssin, des principaux de sa Cour. Et afin que l'alliance fust confirmée avec des gages plus saincts & plus sacrez, elle luy enuoya vne piece du bois sacré de la croix: en laquelle nostre Sauueur & Redempteur IESVS-CHRIST, mourut pour nostre salut. L'Ambassadeur Matthieu estant party avec son compaignon, s'en va de l'Ethiopie tout droict à Goa, trouuer le Lieutenant du Roy de Portugal, qui estoit lors le grand Albuquerque. Lequel scachant les precieuses reliques, qu'ils portoyent à son Prince, leur fit vn fort honorable accueil, enuoyât deuant eux tout le Clergé, avec les ceremonies, qu'on a accoustumé d'vser en semblable chose. Et lors qu'ils voulurent partir pour aller en Portugal, il les recommanda soigneusement au Capitaine du nauire; toutesfois ceux qui les conduisoient leur firent beaucoup d'outrages par les chemins, mesmes audit Matthieu, ne le traictant pas en qualité d'Ambassadeur: mais plustost d'esclau ou de bouffon; & ce principalement pour faire despit à Albuquerque, duquel ils estoient ennemis mortels: l'accusans de ce qu'il auoit esté si peu aduisé, selon leur iugement, que d'adiouster foy aux parolles d'un Armenien, qu'ils tenoyent pour vn donneur de baliuernes. Mais telles inciuilitez leur penserent couster bien cher: d'autant que le Roy Emmanuel ayant sceu leurs deportemens, les fist mettre en prison. Et si n'eust esté que l'Ambassadeur Matthieu le pria instamment de leur vouloir pardonner, il les eust fait punir bien rigoureusement: car le Roy se pleust fort à ceste Ambassade, comme l'on cogneut à l'honneur & aux caresses, qu'il fist aux

*Matthieu
Ambassadeur
du Roy
d'Ethiopie
vers
celuy de
Portugal.*

*Est bien
receu
d'Albuquerque
à Goa
enuoyé
en Portugal.*

Ambassadeurs leur enuoyant au deuant, comme ils approchoiēt de la ville le Clergé, & vne bonne partie de sa noblesse pour les accueillir: & leur faisant bailler vn logis fort honorable, ou ils furent pourueus de tout fort largement. Trois iours apres leur arriuée ils eurent audience du Roy, auquel ils furent conduits par l'Euesque d'Igedita, & le Comte de Villanoua avec force suytre de gens. Entrez qu'ils furent dans le Palais, le Roy se leue de son throsne, & leur va au deuant; puis les enbrasse fort humainement. Apres la salutation ils tirent d'une canne d'or les lettres qu'ils portoyent à sa Majesté, l'une du Roy Dauid; & l'autre d'Helene sa grande mere, escrites en langue Arabesque & Persique. Luy baillent aussi les presens que lesdits Princes luy enuoyoient; à sçauoir cinq pieces de monnoye d'or, ou estoient escrits certains caracteres Abyssins, poissant chascune enuiron huit escus, & vne boîte toute d'or, où estoit contenuë vne piece de la sacrée croix, dont nous auons cy dessus parlé, qui auoit esté autres fois enuoyée de Hierusalem aux Roys d'Ethiopie. Emmanuel receut à genoux ceste boîte, pleurant de ioye, & rendant graces infinies à Dieu, de ce que des Regions si esloignées de l'Europe, & d'un si grand Prince, il receuoit vn don si precieux, & vne Ambassade si honorable. Apres ce, les lettres furent leuës & interpretées par des truchemens fidelles, dont le contenu estoit tel. Premièrement apres vne petite preface, en laquelle le Roy Dauid professoit deuotement la distinction des trois personnes diuines en vne seule nature & Deité, priant sa diuine Majesté pour la santé & prosperité du Roy Emmanuel, il remercioit le dict Roy des lettres, que ses deuanciers auoyent enuoyées aux Roys d'Ethiopie ses predecesseurs, puis il exaltoit la puissance & les richesses d'Emmanuel, se promettant que si sa Majesté d'un costé vouloit entreprendre la guerre par mer, & luy par terre de l'autre contre les Sarrafins, qu'ils osteroyent en brieuf du monde la memoire du meschant & detestable Mahomet: & recouureroyent le saint Sepulchre de nostre Seigneur. Apres cela il authorisoit & aduoüoit pour son Ambassadeur ledit Matthieu, asseurant que la croix qu'il luy enuoyoit en signe d'amitié, auoit esté tirée du bois, auquel le Sauueur du monde fust attaché pour nostre rachapt. Finalement il inuitoit le Roy de Portugal à faire vne ligue offensive & deffensive avec luy, enuers tous & contre tous: adioustant que ce luy seroit vne chose tres-agreable que

*Contenu
des let-
tres du
Roy d'E-
thiopie
à celui
de Por-
tugal.*

*Luy fait
present
d'une
croix du
mesme
bois ou
N. S. J. C.
crucifié.*

que leur amitié & accord fussent confirmez par le lien sacré de mariage, entre leurs enfans & filles. Sur la fin il louoit les exploits de guerre, que les Lieutenâs d'Emmanuel auoient faicts en l'Inde, confessant que **IESVS-CHRIST** y auoit operé miraculeusement, & exhortoit le Roy de poursuyure iusques au bout ce qu'il auoit entrepris. Ces lettres estant leuës, le Roy respondit aux Ambassadeurs avec pareille humanité, & les fit reconduire à leur logis, commandant que toutes choses leur fussent abondamment fournies. Par apres il interroge à loysir lesdits Ambassadeurs des mœurs, coustumes, loix, & ceremonies de ceste nation: lesquelles ont esté depuis amplement escrites par plusieurs. Et apres qu'ils eurent demeuré quelque temps en Portugal, il les congedia fort humainement, & leur bailla des lettres & presens pour le Roy Dauid & son ayeule Helene. Mais afin que ceste alliance fut mieux ratifiée d'un costé & d'autre, il enuoya pareillement vne autre Ambassade fort honorable avec des lettres & presens au Roy d'Æthiopie, par vn des Gentils-hommes de sa maison, appellé Edoüard de Gamma, qu'il constitua son Ambassadeur, lequel partit de Lisbonne avec l'Armenien Matthieu, & ce Gentil-homme Abyssin l'an 1520. Toutesfois ledit Gamma estant decedé en chemin auant qu'arriuer là, vn autre Gentil-homme Portugais, nommé Rodrigue de Lima, qui estoit en sa compagnie, fut substitué en sa place, suyuant l'ordonnance que le Roy en auoit faicte.

Cestuy-cy estant arriué à Goa avec l'Armenien Matthieu, rebrossa son chemin derechef, pour s'aller joindre avec l'Admiral de la flotte Portugaise nommé Sequeira, qui rodoit à l'entour du golfe Arabique. Sequeira suyuant le commandement du Roy Emmanuel, fit mettre à terre les deux Ambassadeurs; à sçauoir Roderic de Lima & l'Armenien, qui aborderent au port d'Arcoço, là ou le Gouverneur du pais, qu'on nomme Barnagasso, vint iurer la paix au nom du Roy d'Æthiopie son maistre avec Sequeira, qui estoit aussi venu là tout exprés pour faire le mesme de la part de son Prince. Les Portugais furent là receus avec grande feste & resiouissance, tant du Gouverneur que des Moines de S. Antoine, qu'il y a là bien pres: lesquels vindrent voir l'Ambassadeur Matthieu, & les Portugais, monstrans receuoir vn singulier contentement de cest' entreeuë. Car ils auoient, selon leur dire, vne ancienne prophetie receüe de main en main

*Comme
ceste Am
bassade
fut re-
ceüe.*

de leurs ancestres, qu'un iour viendroient là des regions Occidentales, des hommes faisant profession de la foy Chrestienne, avec lesquels ils deuoient estre vnis en mesme croyance. Ce qu'ils estoient deuoir estre lors accompli : & s'en reioissoient fort. Les Prestres Portugais de la flotte les accueillirent aussi avec grande ioye, reuestus de leurs surplys, & chantans des hymnes &

*La paix
& alli-
ce entre
les Roys
de Por-
tugal &
d'Aethio-
pie est
iurée.*

cantiques avec vne belle musique d'instrumens : dont les vns & les autres furent grandement consolez ; leur estant aduis, que l'Eglise Occidentale & Orientale, se venoient comme à donner la main, & à se rejoindre en vn mesme corps, apres tant de temps qu'elles auoient esté separées. Pour faire court, le Gouverneur de Barnagasso iura solemnellement la paix sur vne Croix d'argent, qu'un Prestre de la flotte Portugaise luy presenta, les genoux en terre, disant de ceste sorte. La paix que IESVS-CHRIST, Redempteur du genre humain, a laissé à ses disciples, soit entre nous, qui professons sa foy & religion ; Je promets au nom de mon Roy, de garder ceste paix tant que sera de mon costé, & ie le iure ainsi par ceste sacrée Image de nostre salut. Le mesme aussi iura Sequeira, & tous les trois iours suyans, ce ne fut que dōs & presens, qu'ils s'entr'enuoyent les vns aux autres, avec beaucoup d'autres signes de resiouissance. Cependant Sequeyra mit entre les mains du Gouverneur de Barnagasso l'Ambassadeur Matthieu, & celuy aussi du Roy de Portugal Roderic de Lima, pour les faire conduire tous deux à son Prince avec assurance. Roderic de Lima menoit avec soy beaucoup de gens d'honneur, & entre autres vn Prestre nommé François Aluarez, lequel estât par apres de retenir en Portugal, coucha par escrit en sa langue, tout le discours de ce voyage, qui a esté depuis traduit en plusieurs autres, & inseré par Paule Ioue en son histoire. Or l'effect qui s'ensuyuit de ceste legation de Roderic de Lima fut, qu'il en ramena quelque temps apres vn autre Ambassadeur nommé Zagazabus, que le Roy d'Aethiopie Dauid enuoyoit premierement au Roy de Portugal, pour le remercier de tāt de courtoisies, qu'il luy offroit & faisoit ; puis il luy ordonna d'aller de sa part baiser les pieds de nostre S. Pere le Pape, auquel il enuoya force presens, & des lettres aussi, par lesquelles il le recognoissoit pour Prelat souuerain, & chef de l'Eglise Vniuerselle. Ce Prestre, duquel nous auons cy deuāt parlé, nommé François Aluarez auoit charge d'accompagner ledit Ambassadeur, & le mener à nostre

*Autre
Ambas-
sade du
Roy d'Ae-
thiopie à
celuy de
Portu-
gal, &
au Pa-
pe.*

S. Pere. Estans donc arriués en Portugal, ils trouuerent que le Roy Emmanuel estoit decedé, & que Iean 3. son fils estoit installé en sa place. L'Ambassadeur donc s'adressa à luy comme successeur de la Couronne, luy offrant vne riche couronne d'or & d'argent de la part de son Prince, & Roderic de Lima luy rendit conte de sa legation. Ce qui resiouïst merueilleusement le Roy, & tout le Royaume de Portugal, voire toute la Chrestienté, qui en entendit les nouuelles aussi tost. Car l'on pensoit, que ce grâd Empire disioinct dès si long temps de l'Eglise Catholique Apostolique & Romaine, venoit lors se joindre à icelle. Or l'Ambassadeur du Roy d'Æthiopie ayant fait en Portugal ce qu'il auoit en charge, passa de là en Italie, accompagné de François Aluarez, pour prestre à nostre S. Pere au nom de son Roy l'obeïssance, que les autres Princes Chrestiens ont accoustumé, comme au VicairPresle obeïssance au S. Pere par son Ambassadeur. de IESVS-CHRIST en terre, & successeur de l'Apostre Saint Pierre en qualité de Pasteur de l'Eglise Vniuerselle. C'estoit lors Clement VII. qui s'coit au S. Siege Apostolique. L'Ambassadeur le trouua à Boloigne avec vne belle assemblée de Cardinaux & autres grands Seigneurs: Car c'estoit vn peu apres le couronnement de Charles Quint, faict en ladiète ville; ou il fut reçu de sa Saincteté, & de tout le College des Cardinaux, avec grande demonstration d'allegresse; & renuoyé à son Prince avec vn singulier contentement de l'vn & de l'autre costé. Quelques années apres le Roy Dauid vint à mourir: auquel succeda vn sien fils nommé Claude, qui s'entretint pour vn temps tât en l'alliance, que son pere auoit commâcée avec le Roy de Portugal, comme aussi en l'obeïssance du S. Siege. Mais de là à peu venant à manquer en ceste cy, Dieu permit qu'un autre Roy sien voisin luy fit la guerre, & le mit en grand danger de perdre son Estat. Ce fut le Roy de Zeilâ & d'Adel tributaire du Turc, lequel estant Mahometain de secte, & grand ennemy des Chrestiens, se vint jetter avec vne puissante armée sur les terres du Roy d'Æthiopie: tellement que le Roy Claude apres auoir faict beaucoup de pertes, fut cōtraïct de se retirer à vn coing de son Empire, priué d'une grande partie de son Estat. L'autre cepédant alloit ruinant & mettant par terre toutes les Eglises, & monasteres, qu'il trouuoit, ranageoit tout le plat païs, & destruisoit tout ce, qu'il trouuoit deuant soy. Le Roy Claude se voyant fort pressé de son ennemy, enuoya demâder secours au Vice-Roy de l'Inde, qui estoit

Le Roy Claude son successeur la quitte perd une partie de son Royau me.

*Estienne
Gamma
Viceroy
de l'In-
de.*

lors Estienne Gamma, par vn Ambassadeur exprés. Or en ce tēps là le Vice-Roy par cas fortuit n'estoit guere loing de l'Ethiopie, car il voguoit tout à l'entour de la coste du golfe Arabique, avec vne bonne flotte de nauires, ayāt failly vne entreprise, qu'il auoit sur le port de Suez. L'Ambassadeur du Roy Claude s'estāt joint avec le Gouverneur de Barnagasso vint à la flotte Portugaise, & fit entendre au Vice-Roy l'estat miserable des affaires de son Prince, apres luy auoir rendu les lettres du Roy & de la Royne Elisabet sa mere, par lesquelles ils le prioient instamment, que selon l'accord d'alliance, qu'ils auoient faict & iuré avec le Roy de Portugal, il les voulut assister à vn si grand besoin. La chose sembla iuste & equitable à tous les principaux Capitaines de la flotte, qui furent assemblez pour consulter s'il estoit expedient d'y enuoyer du secours. Mais la principale difficulté estoit, à qui on donneroit ceste charge. Car vn chascun la desiroit auoir pour soy.

*Enuoye
secours
au Roy
Claude
de 400.
Portu-
gais, co-
diuits
par son
frere
Christo-
fle de
Gamma.*

Le Vice-Roy la bailla à son frere Christofle de Gamma, qui estoit vn ieune homme d'un grand courage, & d'un esprit bouillant. Il luy donna quatre cens Portugais, choisis de toutes ses troupes, baillant à chascun d'iceux deux paires d'armes, & pour toute la troupe assés bon nombre de pieces de canon, & autres bastons à feu. Avec cest esquadron Christofle de Gamma descend à terre le mois de Iuin de l'an 1541. & dans peu de temps arriue tout anpres d'une montaigne, en laquelle la Royne Elisabet s'estoit retirée. Le lieu est si fort d'assiete, qu'il ne peut estre prins ny par force ny par famine. Car c'est vne montaigne haute, & tellement desrompuë, qu'on n'y peut monter que par vn estroict sentier. Le pied d'icelle est assés ample: mais elle monte petit à petit en poincte, iusques au sommet; là où elle vient à s'elargir à la façon d'un potirō: & faict là dessus vne belle plaine, qui contient de circuit bien mille pas: là il y a deux grandes citernes, pour tenir de l'eau, & vne belle maison en laquelle on a accoustumé d'enfermer les enfans puisnez du Roy d'Ethiopie: afin qu'ils n'excitent des troubles, ou seditiōs contre leur ainsé, pour luy raiir la couronne, & sont là tenus en seure garde. Il y a aussi vne belle Eglise, avec vn Monastere de Religieux; & outre ce vn grand champ, lequel estāt bien cultivé peut suffire pour la nourriture de cinq cens personnes par an. L'on descouure de ceste plaine tout ce qui se presente à l'entour de la montaigne, de façon qu'on ne se peut aucunement cacher. Et le sentier qu'il y a

*Belle &
forte as-
siete de
montai-
gne.*

pour y monter, n'arriue que iusques à vn certain espace: de là il faut guinder avec des cordes & des corbeilles, tout ce qu'on veut y faire tenir. La Royne mere du Roy Claude se tenoit là avec ses Dames. Mais Gamma fust d'aduis de la faire venir en l'armée: afin que les Abyssins accourussent plus promptement vers elle; parce qu'ils ne pouuoient pas si tost se ioinre avec les forces du Roy, qui estoit esloigné de deux moys de chemin; & cependant il leur falloit necessairement combattre l'ennemy. Or pour faire brief Gamma & ses gens, avec le secours des Abyssins, qui leuindrent trouuer, regaigna beaucoup de païs, qui auoit esté pris sur le Roy Claude: & obtint force belles victoires contre les ennemis. Mais deux entr'autres, lesquelles il gagna en deux batailles rangées quasi miraculeusement, contre le Roy de Zeilan. La premiere fust le quatriesme d'Auril de l'an 1542. contre quinze mil hommes de pied, & mil cinq cens cheuaux, que le Roy de Zeilan auoit, outre deux cens Turcs, qui estoient comme les nerfs de son armée. Christofle de Gamma n'auoit que 350. Portugais, car les autres cinquante estoient absens, & fort peu d'Abyssins: neantmoins apres que la bataille eut duré depuis la poincte du iour, iusques au midy, le Roy de Zeilan ayant esté blessé d'un coup d'arquebuzé, aussi tost les siens tourment le dos, & se mettent en suytte. Les Portugais les suyuirét pour vn téps; mais n'ayans pas de cheuaux, ils les laisserent aller, sans plus les poursuire. Plusieurs Mahometains y furent tués, & entre autres vne trentaine de Turcs: des Portugais il n'en mourut que douze, & en y eut quarante de blessés. Le Roy de Zeilan s'estant bié tost apres refaict par le moyen des gens de renfort, qui luy suruindrent, & entre autres d'un grand Capitaine nommé Gradamar, avec trois mille pietons, & cinq cens cheuaux, ils assaillirent de rechef les Portugais, qui les reçurent courageusement, & combattirent en bataille rangée la plus part du iour. Finalement ils tuerent le capitaine Gradamar, qui menoit l'auant-garde avec un grand nombre de Sarrafins, & par ce moyen toute l'armée de l'ennemy fut mise en route. Le Roy de Zeilan s'estant mis en fuite, & toutes ses gens avec luy, les Portugais gaignerent son camp, & ses tentes avec tout le bagage: & le poursuuiurent demy lieuë loing, faisans un grand carnage des siens: & s'ils eussent eu des cheuaux, ils eussent mis fin à ceste guerre. Il n'y mourut que 14. Portugais, plusieurs neantmoins y furent blessés. Le

*Eligabeth
Royne,
mere de
Claude
s'en va
rendre
au cap.*

*Christofle
de Gamma
gagne deux
victoires
contre
le Roy de
Zeilan.*

*Gradamar
Capitaine
tué.*

*Le Roy
de Zeilā
assiégé.*

*Ayant
receu vn
grād se-
cours
fort &
attaque
les Por-
tugais.*

*Christo-
ste de
Gamma
pris.*

Roy de Zeilan, se retirant au petit pas, les Portugais deux iours apres vont à sa poursuite, & luy baillent la chasse dix iours durant, iusques à ce qu'il fust arriué à vne certaine montaigne forte d'assiette, où ils le tindrent comme assiégé, pendant tout vn Esté, iusques à ce que du costé de l'Arabie, & de la forterefse de Zebit, qui est à l'emboucheure du golfe Persique tenuë par les Turcs, luy arriua vn puissant secours de neuf cens Turcs, & de plusieurs autres soldats, avec deux pieces de campagne, & force armes, avec lequel il vint à l'impourueu assaillir les Portugais dans leur camp, ou ils s'estoyent retranchez. Le Capitaine Gamma voyant qu'on braquoit les canons contre son forr, ne se tenant pas assuré là dedans, commande à ses soldats de faire des saillies contre l'ennemy. Ce qui fust executé fort valeureusement, & de cette sorte les Portugais soustindrent l'effort des assaillans tout vn long temps, avec vn grand courage: mais comme ils virent que les boulets romboyent sur eux dru & menu comme la gresse, & plusieurs des leurs estoyent desia morts; ceux qui restoyent furent d'aduis de se sauuer, se mettant en fuite, auant qu'ils ne fussent enuironnez de toutes parts, & sans espoir d'euader. Ils se retirent donc dans quelques forests espesses, qu'il y auoit là aupres, & entr' autres le Capitaine Gamma, lequel apres auoir combatu vaillamment tout vn long temps, en fin ayant esté fort blessé se retiré à la suasion de ses amis, avec quelques autres hors du camp, sur la brune, & comm' il commençoit de se faire nuit, car la bataille auoit duré depuis le poincte du iour, iusques à Soleil couché. Or ayant cheminé toute la nuit avec tres-grande peine & trauail, le iour venu il se destourne du chemin, afin de n'estre recognu, & se jette dans vne vallée prochaine, où il y auoit quelques forests fort espaises. Estant là aupres d'une fontaine pour se rafraischir & penser ses playes, voicy arriuer quelques gens à cheual des ennemis, qui le prindrent, & le menerent deuant leur Roy: lequel apres luy auoir dict mille outrages & vilainies, le fait cruellement fouëtter: puis commande qu'on le traîne par tout son camp, pour estre moqué & baffoüé des plus vils ragachs de l'armée. Ce vaillant Gentil-homme endura tous ces affrons & tourmēts avec vne grande patience, leuant souuent les yeux au ciel, & se recommandant à Dieu. Apres ce il fust derechef mené deuant le Roy: lequel espris de rage & de fureur contre ledit Capitaine, luy mesme

luy trancha la teste avec son coutelas. Il en y a qui disent, qu'au lieu, ou son corps tomba estant decapité, faillit vne fontaine, qui guerissoit les malades. Plusieurs estiment qu'il merite d'estre canonizé & tenu pour martyr, veu qu'il a enduré telle mort pour le seruice de nostre Seigneur. Au moins le Roy des Abyssins en la lettre qu'il escriuoit au Vice-Roy de l'Inde sur ce faict, ne doubta pas de l'appeller martyr de IESVS-CHRIST. Sa teste fust enuoyée au grand Turc, & de douze autres Portugais des principaux qu'on auoit pris. Ceste desconfiture arriua le 28. d'Aoust de l'an 1542. là où moururent en tout deux cens Portugais ou enuiron : de ceux qui eschapperent quelques six vints se rallierent avec la Royne, qui estoit au camp avec eux : mais voyant que tout estoit perdu, elle se retire vistement à vne montaigne, qui estoit proche de là, où bien tost apres le Roy Claude son fils la vint trouuer, ne s'estant iusqu'à lors peu ioin-
*Les Por-
tugais se
rallient
avec le
Roy
Claude.*
 dre avec les Portugais. Et entendant la mort du Capitaine Gamma, & des autres Portugais qui auoyent esté tuez fraischement, il en fust extremement marry. Ceux neantmoins qui resterent en vie le prierent de leur faire tant de faueur, que d'assembler toutes les forces qu'il pourroit, & qu'avec icelles ils esperoyent moyennant l'ayde de Dieu, d'auoir raison de la perte qu'ils auoyent faicte, & de venger la mort des leurs, & noméement du Capitaine. Le Roy leur accorda cela volontiers, & amassa dans peu de temps huit mille hommes, avec lesquels & les six vingts Portugais qui estoient restez, il s'en va trouuer l'ennemy : lequel enorgueilluy de la victoire passée, ne faisoit que s'addonner à ieux & à passe-temps, & en auoit renuoyé avec force dons & presens les Turcs, qui luy estoient venus au secours ; pensant que tout fust acheué. Il s'estoit retiré avec sa femme & ses enfans à vne maison de plaissance, qu'il auoit sur la riuere du Nil, pour se recréer & refaire. Là dessus comme il y pensoit moins voicy arriuer le Roy Claude avec les Portugais & Abyssins, entre lesquels il y auoit cinq cens cheuaux : car pour lors presque tous les Portugais estoient montez à cheual, & n'auoyent voulu eslire aucun Capitaine, depuis la mort de Gamma : mais au lieu de Capitaine ils portoyent deuant eux l'enseigne & banniere de la Misericorde. Le Roy de Zeilan pouuoit auoir encore treize mil hommes, tant à pied qu'à cheual, & deux cents Turcs. Or estant venus aux mains les Portugais

*Le Roy
de Zeilā
est tué &
ses gens
desfaits.*

se ietterent avec telle furie, & roideur sur l'ennemy, qu'en peu de temps la victoire se monstra de leur costé : car il y eut vn certain Portugais, qui donna vn coup d'arquebuzé au Roy de Zeilan, dont il mourut soudain : l'on n'a iamais peu sçauoir qui ce fut, parce que tous visoyent principalement au chef. Ils firent apres vn grand carnage des Sarrafins, qui se mirent en fuite, si tost que le Roy fust mort. Le butin qu'ils gaignerent là fust tres-grand : car outre toutes les richesses qu'il auoit là amassées, ils luy prindrent encore les pieces de canon, & le reste des munitions & appareil de guerre, que les Turcs luy auoyent enuoyé. Ayant rencontré son corps mort, ils luy couperent la teste, laquelle fut apportée au Roy Claude : & prindrent encore son fils aîné, comme quelques vns disent, iasoit que d'autres n'en font point mention : mais sa femme se mit en fuite accompagnée de quelques trois cents cheuaux. Or ce qui resioit sur tout les Chrestiens fust vne grande multitude de captifs, & esclaués Chrestiens de tout aage & sexe, que le Roy de Zeilan auoit pris, lesquels furent deliurés de ceste dure captiuité par la victoire gagnée. Aussi le Roy des Abyssins recouura par ce moyen toutes ses terres, & les grands Seigneurs de son Royaume, qui auoyent suiuy le party contraire és guerres passées, apres auoir humblement requis pardon, furent reconciliez à luy, & reduits à son obeyssance. Le Roy Claude considerant les grandes faueurs & benefices, qu'il auoit receu de ceste main liberale, & toute puissante de Dieu, luy en rendit aussi fort humblement graces, passant les iours de la sepmaine sainte en grande deuotion. Car tout le temps que le precieux corps de nostre Seigneur fut au monument, il ne mangea ny ne beut aucune chose, & ne sortit pas mesme del'Eglise. Il fust tous ces iours là vestu de noir, & couuert d'vn vil accoustrement, selon la coustume du país. Le mesme fit sa mere & les autres grands Seigneurs de sa suite. Mais ils ne celebrerent pas avec moindre solemnité les festes de Pasques : car tous tant grands que petits, s'estās au prealable confessez, ceux qui estoýt en aage, receurent la sacrée Cominunion, & firent en recognoissance des biens receus vne procession generale. Quelque temps apres ils firent encore les funerailles des Portugais, qui estoýent decedez en la guerre, avec vne magnificence du tout Royale : car le Roy y dependit beaucoup vsant de tres-grande largesse enuers les pauures, & faisant dire force Messes pour les ames des

*Le Roy
Claude
remis en
sonestat.*

*Reco-
gnoit ce
benefice
de Dieu.*

Portugais

Portugais trespassés en son seruice. Quant aux autres, qui estoient restés, le Roy leur fit beaucoup de presens, & à ceux qui voulurent demeurer là, il donna de bonnes rentes, & force possessions; tellement que se voyans traités si liberalement & honorablement, ils s'arrestèrent là pour la plus part tout le reste de leur vie, & se marièrent avec des femmes du païs. Mais voyons ce qui aduint depuis.

Comme nostre Saint Pere le Pape à l'instance du Roy de Portugal Jean III. crea le P. Jean Nugnes de la Compagnie de IESVS Patriarche d'Aethiopie, & les Peres André d'Ouiedo, & Melchior Carnero, Euesques titulaires, l'un de Hierapolis, l'autre de Nice, lesquels avec dix autres Peres de la mesme Societé, furent destinez en Aethiopie, & d'une lettre que le B. P. Ignace de Loyola fondateur de ladite Compagnie, escruiuit au Roy Claude.

CHAPITRE XV.

LE Roy de Portugal Iean III. ayant reçu nouuelles des beaux exploits de guerre, que ses gens auoient fait en Aethiopie, & comme ils auoient remis le Roy Claude en son estat, fut merueilleusement consolé d'entendre ces choses, & faisant estat que ledit Roy ne luy oseroit refuser chose, dont il le requit pour l'obligation qu'il luy auoit, il entreprit vn œuvre digne de sa vertu & pieté, à sçauoir de réunir de rechef à l'Eglise Catholique Apostolique Romaine, cest Empire du Presterjan. Car jasoit que le Roy Dauid eut enuoyé vn Ambassadeur au S. Pere pour luy prestre obeïssance, le recognoissant pour souuerain Pasteur de l'Eglise Vniuerselle: neantmoins les Abyssins ses subjects n'estoient pas encore seurez des erreurs de Dioscorus & d'Eutyches, ny de plusieurs superstitions Iudaïques, qu'ils auoient reçu de leurs ancestres, & humé avec le lait de la nourrice, n'y estant allé iusqu'à lors personne de ces quartiers, qui leur eust osté le bandeau d'ignorance. D'auantage, comme le S. Siege Apostolique est si esloigné de leur païs, & qu'ils auoient si près d'eux le Patriarche d'Alexandrie, le schisme duquel ils suyuoient, & dont ils auoient puyté leurs heresies, ils s'adressoient à luy de mesme qu'auparauant, pour auoir leurs dispenses, & les resolutions des cas douteux: tellement qu'il n'y auoit aucune difference de l'estat auquel ils estoient pour lors, avec celuy

*Le Roy
Jean 3.
pretend
réunir
l'Aethio-
pie au
S. Siege.*

d'aparauant:& ceste reünion sembloit auoir esté faicte plustost de bouche que d'effect. Aussi le Roy Claude successeur de Dauid, ne faisoit point estat d'enuoyer quelque Ambassadeur pour recognoistre de nouveau nostre S.Pere, ainsi qu'ont accoustumé de faire les Princes Chrestiens à leur aduenement à la Couronne. Au moyen de quoy le Roy de Portugal pensant à part soy quel expedient on pourroit prendre pour enseigner la vraye foy à ce peuple, & l'empescher d'auoir recours doresnauant au Patriarche d'Alexandrie schismatique & heretique, il n'en trouua de meilleur que de procurer enuers le S. Pere, qu'il enuoyast en Æthiopie vn Patriarche creé & constitué par luy, afin de gouuerner selon les loix de l'Eglise Catholique, ceste bergerie de nostre Seigneur, luy baillant comme pour Colleges deux autres Euesques pour l'ayder ez fonctions Pontificales, & luy succeder en cas de mort, avec quelques Theologiens Catholiques de rare vertu & doctrine, afin que par leurs sermons, colloques, & disputes, ils vinssent à desfraciner du cœur de ce peuple ces opinions erronnées, & superstitions Iudaïques, qu'ils retiennent encore. Le Roy donc en escriuit premierement à nostre S. Pere le Pape Iules III. & puis à Paul III. qui luy succeda, lesquels appelloient d'ordinaire à ceste consulte le B. P. Ignace de Loyola, fondateur de la Compagnie de I E S V S, parce que le Roy demandoit quelques Peres d'icelle pour enuoyer là. Or apres que la chose eut esté bien ballotée, finalement il fut cōclud & arresté, qu'on choisiroit pour ceste mission douze ou treize Peres de ladiète Societé, qui fussent tous personages signalés en vertu & en doctrine; & qu'on y adiousteroit quelques Coadiuteurs temporels, qui les aydassent és choses necessaires pour la vie humaine. Il n'y eut aucun de ceux, qui furent nommez, qui ne se monstreat prompt & appareillé pour entreprendre ce voyage, bien que fort long, dangereux, & penible; estans tous bien aises d'auoir quelque occasion d'endurer beaucoup de travaux & incommodités pour l'amour de nostre Seigneur. Mais quand ils entendirent, qu'il en y debuoit auoir quelques vns d'entre eux promeus aux dignitez d'Euesques & de Patriarche, lors chacun esquiuoit, fuyant telles charges & tiltres d'honneur; tellement qu'il en y eut d'entre eux, lesquels estans nommément appelez pour cela, respondirent franchement, qu'ils n'accepteroient point telles dignitez; neantmoins nostre S. Pere le Pape ayant enjoinct expressement, sur

*En escrit
au S. Pe-
re.*

*12. Peres
de la Co-
mpagnie
de J E-
S V S s'ot
nommez
pour y
aller.*

peine de desobeïssance, au P. Iean Nugnes Barret Portugais, de recevoir la charge de Patriarche d'Æthiopie, il l'accepta en fin bien qu'à contre-cœur. Ce Pere auoit esté enuoyé quelque temps auparavant en Afrique, pour rachepter les captifs Chrestiens, qui estoient detenus sous l'esclauage des Mores: en quoy il s'estoit employé fort charitablement, & y auoit acquis grande louange pour sa prudence & vertu. Il estoit frere germain du P. Melchior Nugnes lors Prouincial de la Compagnie en l'Inde. Nostre S. Pere luy donna pour Coadiuteurs & successeurs en la mesme charge, en cas de mort, ou autre semblable accidēt, deux Peres de la mesme Societé, à sçauoir le P. Melchior Carnero Portugais, & le Pere André d'Ouiedo Espagnol, les creant tous deux Euesques titulaires (comme l'on dit) l'un de Nice, à sçauoir le Pere Carnero, & l'autre de Hierapolis, qui sont deux villes en l'Asie mineure, sous la puissance des Turcs, d'où les nouveaux Prelats ne pouuoient tirer, ny reuenu ny profit. Aussi ne le cherchoient ils pas, ains beaucoup de trauaux & fatigues, pour l'amour de nostre Seigneur, comme aussi ils trouuerent, selon que nous verrons cy apres. Car jasoit que ceux de ladicte Compagnie n'acceptēt pas les prelatures, ny autres telles dignités Ecclesiastiques, qui sont riches & honorables, ils reçoient neantmoins celles, ou tout l'honneur & reuenu consiste, à souffrir & endurer force peine, pauureté, & persecutions, pour le seruice de nostre Seigneur, ne pretendans autre gain ny profit, que le salut des ames: combien qu'encore ces tiltres d'honneur, faschoient fort ceux, qu'on esleuoit à telles dignités: & ne les eussent point acceptés, n'eust esté l'exprés commandement de sa Saincteté, qui leur en fut fait.

L'election & creation de ces nouveaux Prelats donna à plusieurs grande esperance de la reünion de l'Æthiopie à l'Eglise Catholique, combien qu'on en parloit diuersement. La plupart neantmoins sembloient fort approuuer vne si saincte entreprise. Or le P. Ignace desirant employer le reste de sa vie, & son sang mesme, si besoing estoit, pour l'accroissement de la gloire de Dieu, & de son Eglise, au profit & salut des ames, & noméement en ceste occasiō s'estoit offert à nostre S. Pere, pour estre du nombre de ceux, qui accōpagneroient le Patriarche, & les Euesques; mais sa saincteté considerant d'un costé la charge, qu'il auoit de General de ladicte Compagnie, avec plusieurs autres grands affaires, qu'on luy mettoit tous les iours sur les bras; & de l'autre

Le Pere Iean Nugnes Barret est fait Patriarche d'Æthiopie.

Le Pere Melchior Carnero Euesque de Nice.

Leurs reuenus.

Le B. P. Ignace desirant s'offrir d'aller en Æthiopie.

Le 9. de
re ne le
luy aya
voul
accorder
il escri
au Roy.

son aage & ses forces, qui estoient desia grandement affoiblies par les labeurs & penitences passées, il ne luy voulust point permettre ce voyage. Luy donc voyant qu'il ne pouuoit s'y transporter, ny aider à vn œuure si saint par sa presence, il voulut à tout le moins y contribuer ce qu'il pourroit, taschant de disposer le Roy par ses lettres: tellement qu'apres y auoir meurement pensé, il escriuit au Roy Claude les raisons, qui auoient esmeu sa Saincteté à luy enuoyer ces Prelats, & pareillement celles qui le pouuoient induire à se resoudre d'embrasser à bon esieût l'vnion de l'Eglise Catholique Apostolique Romaine. Or d'autant que ceste lettre m'a semblé digne d'estre leuë, tant pour la solidité des raisons qu'elle apporte, que pour la rare prudence, avec laquelle elle est escrete, ie l'ay vouluë mettre icy toute au lōg, selon qu'elle est couchée en diuers auteurs, qui ont escrit l'histoire des Indes. En voicy donc la teneur.

Tiltres
du Roy
des A-
byssins.

A tres-haut & tres-puissant Prince Claude, Empereur de la haute Aethiopie, Roy de Xoa, de Casate, de Fatigar, de Angore, de Barua, de Baligange, de Ades, de Vangue, de Boyame, de Amara, de Baggamidri, de Ambea, de Bague, de Tigvimalon, de Sabain, de Barnagasso, & Seigneur de ce qui est iusques en Aegypte, tant par mer que par terre.

Lettre
du B. P.
Ignace
de Loy-
la au Roy
Claude.

MOnseigneur en nostre Sauueur IESVS-CHRIST, La grace, le salut, & l'affluence de tous biens spirituels soient donnés à vostre Majesté par nostre Seigneur IESVS-CHRIST. Le Serenissime Roy de Portugal, selon le soing & le zele, que Dieu nostre Createur luy a communiqué de la gloire de son saint nom, & du salut des ames, qui ont esté racheptrées par le sang precieux & la vie de son Fils vnique, m'a faict entendre souuentefois par ses lettres, que ce luy seroit vne chose fort agreable, si des Religieux de nostre tres-petite Compagnie, qu'on appelle de IESVS, ie luy en nommois douze, desquels il en peut choisir vn, pour estre Patriarche, & deux autres, pour estre Coadiuteurs & successeurs d'iceluy en la mesme charge; afin qu'il demandast pour eux au souuerain Vicair de IESVS-CHRIST nostre Seigneur, puissance & autorité, pour estre legitiment enuoyés aux Royaumes de vostre Majesté, & par ce moyen pouuoir bien & deuëment exercer leur charge, avec quelques autres Prestres

qu'il desiroit enuoyer és terres de vostre Majesté. Ayant donc
 esgard aux grandes obligatiōs, que toute nostre Cōpagnie reco-
 gnoit auoir audiēt serenissime Roy de Portugal, plus qu'a tout
 autre Prince Chrestien, & à l'honneur & seruice que nous luy
 deuons trestous reciproquement, i'ay fait ce qu'il m'auoit com-
 mandé, ayant choisy tout exprés le nombre, qui represente le
 college Apostolique de IESVS-CHRIST nostre Sauueur. Car
 outre ledit Patriarche i'ay choisi, & trié du corps de nostre Com-
 pagnie douze Prestres, pour seruir comme de renfort ausdits
 Prelats, ou bien comme de seminaire, pour en mouler d'autres,
 à ceste mesme façon. Tous lesquels vont deliberez de sacrifier
 leurs vies, & s'exposer à toute sorte de dangers, pour ayder les
 ames des subiects de vostre Majesté. Ce que i'ay fait d'autant
 plus volontiers, que ie me sens avec tous mes compagnons in-
 cité dauantage à faire seruice à vostre Majesté: laquelle estant
 enuironnée de tous costez de tant de nations d'Infideles & en-
 nemis des Chrestiens, suyuant l'exemple de ses majeurs, s'em-
 ploye neantmoins si soigneusement à maintenir & promouuoir
 la religion, & gloire de IESVS-CHRIST nostre Dieu & Sei-
 gneur. Et pource il estoit à souhaitter, que de si saincts & loüa-
 bles desirs, que vostre Majesté auoit, fussent secondez de l'ayde
 & assistance des Peres spirituels, qui eussent le pouuoir legitime
 donné du Souuerain Pasteur de l'Eglise, & ensemble la pure &
 syncere doctrine de la foy Chrestienne: car ce sont les deux clefs
 du Royaume des cieux; lesquelles IESVS-CHRIST nostre Sau-
 ueur a premierement promises, & puis données à S. Pierre, & à
 tous les autres, qui apres luy seroyent assis en son throsne. Il les
 luy promit tant seulement lors qu'il luy dict, ainsi que nous li-
 sons en S. Mattheu, *Te te dis que tu es Pierre, & sur ceste pierre ie
 bastiray mon Eglise, & te donneray les clefs du Royaume des Cieux:
 & tout ce que tu lieras en terre, sera lié au Ciel.* Il les luy bailla &
 accomplit la promesse lors, qu'apres sa resurrection, auant que
 monter au Ciel, l'ayant interrogé par trois fois, selon que l'Euan-
 geliste S. Iean tesmoigne; *Simon fils de Iean m'aimes-tu plus que
 ceux-cy,* comme S. Pierre luy eust respondu, qu'il l'attachonnoit
 voirement, comme il sçauoit luy mesme, nostre Seigneur luy re-
 part à toutes les trois responces; *Pays mes brebis,* luy commettât
 & baillant en charge non pas vne partie seule de ses ouailles,
 mais tout son troupeau, avec plein pouuoir de donner la pasture

*Le pou-
 uoir legi-
 time &
 la pure
 doctrine;
 sont deux
 clefs du
 Royaume
 des cieux*

Mat. 16.

Iean 22.

*Nostre
 seigneur*

donne à
S. Pierre
& à ses
succes-
seurs
plein
pouvoir
sur toute
l'Eglise.

Es. 6. 22.

Les clefs
symbole
de pou-
voir ab-
solu.

L'Eglise
est une
seule, &
ne peut
avoir plu-
sieurs
chefs sou-
uerains.
cant. 6.

de vie contenuë en la foy Chrestienne à tous les fideles en quel-
que part du monde qu'ils fussent, & de les mener & conduire
aux pasturages celestes de la beatitude eternelle. Pour le regard
des autres Apostres IESVS-CHRIST nostre Sauueur leur a bien
baillé vne puissance deleguée, & comme extraordinaire : mais à
S. Pierre & à ses successeurs vne autorité absoluë & ordinaire:
afin que les autres Pasteurs des ames puiffent de ce souuerain
Pasteur, comme d'une fontaine, tout le pouuoir qu'un chacun
d'iceux a besoin, pour exercer sa charge & gouverner son trou-
peau: brief afin qu'ils recogneussent l'auoir & le tenir d'iceluy.
Ce qu'il semble que Dieu a voulu jadis représenter, lors que par-
lant du souuerain Pontife Eliachim; *Je mettray* (dict-il) *la clef de*
la maison de Dauid sur son espaule, & il ouurira, & n'y aura person-
ne qui puisse ouurir, par laquelle figure S. Pierre a esté représenté
avec ses successeurs. Or qu'ils ayent receu de nostre Seigneur un
plein pouuoir en son Eglise, les clefs le monstrent assez : car c'est
un symbole & vne marque, par laquelle on a accoustumé de de-
clarer & signifier vne entiere & absoluë puissance. Partant vostre
Majesté a grande occasion de rēdre graces infinies à nostre Dieu
& Seigneur, de ce que pendant son regne, il luy a pleu enuoyer
en ses terres des vrais Pasteurs des ames, lesquels soyent depen-
dens du souuerain Pasteur & Vicaire, que IESVS-CHRIST no-
stre Sauueur a laissé en terre, & qui ont puisé tout leur pouuoir
(qui est à la verité tres-grand) de ce mesme Vicaire. Et non sans
cause le Pere & l'Ayeul de vostre Majesté estoient desplaisants,
qu'il leur fallut prendre leur Patriarche de la ville d'Alexandrie:
car tout ainsi qu'un membre separé du corps ne reçoit ny mou-
uement ny sentiment ny vie d'iceluy; de mesme le Patriarche
d'Egypte, soit qu'il se tienne en Alexandrie, ou au grand Cayre,
estant schismatique & retranché du S. siege Apostolique, & du
chef de toute l'Eglise, qui est le souuerain Pontife de Rome, ne
peut recevoir pour soy ne la vie de grace, ne l'auctorité de Pa-
steur, & moins la donner legitiment à quelqu'autre. Car il
n'y a qu'une seule Eglise Catholique en tout l'univers, & ne se
peut faire que l'une partie soit subiecte à l'Euesque de Rome, &
l'autre à celuy d'Alexandrie. Tout ainsi que IESVS-CHRIST son
espoux n'est qu'un seul; ainsi son espouse n'est qu'une seule, de la-
quelle Salomon dict és Cantiques parlant en la personne de no-
stre Seigneur IESVS-CHRIST, *Ma colombe n'est qu'une*; & le

Prophete Ozée patlant plus particulièrement de cecy, *Les en-*
fans (dict-il) d'Israël & de Iuda se iointront ensemble, & constitue-
ront sur eux vn chef. Et long temps apres l'Euangeliste S. Jean
 s'accordant avec le Prophete, *Il n'y aura* (dict-il parlant en la *osée.*
 personne de nostre Seigneur) *qu'un bercail & un Pasteur.* Il n'y
 a donc qu'une seule arche, comme nous lisons au Genese, hors *Gen. 7. 8.*
 laquelle personne ne peut aucunement estre sauué. Il n'y a eu *Exod. 19*
 qu'un tabernacle dressé par Moysse, vn seul temple en Hierusa- *3. Reg. 6.*
 lem basti par Salomon, auquel il falloit sacrifier & adorer Dieu,
 vne Sinagogue au iugement de laquelle il se falloit rapporter.
 Or toutes ces choses representoyent l'Eglise, qui est vne seule;
 & hors laquelle il n'y a rien de bon: car quiconque ne sera con-
 joint au corps d'icelle, ne recevra du chef, qui est IESVS-
 CHRIST, aucune influence de grace, qui viuifie l'ame, & la dis-
 pose pour la felicité eternelle. Pour declarer ceste vnité nous
 chantons au Symbole: Je croy vne sainte Eglise Catholique &
 Apostolique. Tellement que par les Saints Conciles, c'est er-
 reur a esté condamné, à sçauoir qu'il y ait des Eglises particu-
 lieres, soit celle d'Alexandrie, ou de Constantinople, ou autres
 semblables, qui ne soyent subiectes au commun chef de toutes,
 qui est l'Euesque de Rome: duquel par vne suite continuelle
 depuis S. Pierre (qui par le commandement de IESVS-CHRIST *S. Pierre*
 nostre Sauueur, comme dict S. Marcel martyr, a choisi son siege *a choisi*
 en la ville de Rome, & par son sang l'a illec estably) sont descen- *par com-*
 dus tous les Euesques de Rome, Vicaires de IESVS-CHRIST, qui *mande-*
 sans controuersé ont esté recogneus pour tels de tant & de si *N. S. son*
 saints Docteurs Latins, Grecs, & de toutes autres nations, reue- *siège à*
 rez & honorez des Saints Anachorettes, Euesques & autres *Rome, &*
 Confesseurs, approuuez par tant de signes & miracles; bref par le *a espā-*
 tesmoignage de tant de martyrs qui ont espandu leur sang pour *du son*
 la deffence de ceste foy, & pour se maintenir en l'union de la
 sainte Eglise Romaine. A bon droit donc les Euesques qui e-
 stoyent assemblez au Concile de Calcedoine s'escrierent d'un
 cōmun accord, appellâts le Pape Leon, treffinct, Apostolique, &
 vniuersel; & au Concile de Constance a esté condamnée l'heresie
 de ceux qui nioient la primauté de l'Euesque de Rome par des-
 fus toutes les autres Eglises de l'uniuers. A ces statuts & decrets
 des Peres si clairs & si solides, a esté adioustée l'autorité du
 Concile de Florence, qui fust tenu sous Eugene 4. & auquel

outre les autres nations, les Grecs aussi, les Armeniens, & les Iacobites se trouuerent, & y soubſcriuèrent. Or voicy leurs paroles formelles. *Nous declaronſ & decretons que le S. ſiege Apoſtolique, & l'Eueſque de Rome a la primauté ſur tout le monde : qu'il eſt*
aussi ſuccesseur de S. Pierre, & le vray Vicaire de IESVS-CRIST,
chef de toute l'Egliſe, & le Pere, docteur & maiſtre de tous les Chre-
ſtiens; pareillement qu'à iceluy en la perſonne de ſainct Pierre, IESVS-
CHRIST noſtre Seigneur a donné pleine puiſſance de paſtre, regir &
gouuerner l'Egliſe vniuerſelle. Ce n'eſt pas donc ſans iuſte tiltre,
 que le ſereniſſime Roy Dauid Pere de voſtre Majeſté a recogneu ceste ſaincte chaire, comme la mere & maiſtreſſe de toutes les autres, enuoyant vn Legat pour deſerer l'obeyſſance deuë à l'Eueſque de Rome; & bien que pluſieurs choſes grandes ayent eſté, ſelon la rapport qu'on en fait, heureuſement miſes à chef, par voſtre Majeſté, & ſon Pere le Roy Dauid : toutesſois il en y a deux, qui pour leur excellence ſemblent eſtre dignes d'eternelle memoire; & à raiſon deſquelles tous les ſubiects de voſtre Majeſté ſont obligez de rendre graces à Dieu, pour auoir receu des benefices tant ſignalez, par le moyen, l'induſtrie & la vertu de tous deux. Veu que l'vn a eſté le premier, qui a preſté l'obeyſſance deuë au Vicaire de IESVS-CHRIST en terre, l'autre eſt auſſi le premier, qui a receu de la main du meſme Vicaire de IESVS-CHRIST, vn vray & legitime Patriarche, ſils de ceste ſaincte & ſacrée chaire. Car ſi on doit eſtimer beaucoup, & tenir pour vn grand benefice (comme de faiet il l'eſt) d'auoir eſté enté ſur le corps myſtique de l'Egliſe Catholique, qui eſt viuifié & regi par le S.Eſprit; parce que (comme dict l'Euangeliſte) c'eſt elle, a qui le meſme eſprit enſeigne toute verité; ſi c'eſt vn grand bien, que d'eſtre eſclairé de la lumiere d'vne ſaincte doctrine, & d'eſtre appuyé ſur les fondemens de l'Egliſe, laquelle l'Apoſtre S. Paul eſcriuant à Timothée, appelle colomne & firmament de verité, & à laquelle IESVS-CHRIST a promis ſon aſſiſtance à iamais, diſant : *Voicy ie ſuis avec vous inſques à la conſummation du ſiecle,* comme nous liſons en S. Matthieu; il eſt auſſi raiſſonnable, que ſes ſubiects rendent graces infinies à Dieu noſtre Seigneur & Createur, la prouidence duquel s'eſt daignée leur conſerer vn ſi grand bien par le moyen de voſtre Majeſté & de ſon Pere auſſi; puis que nous deuons à bon droict eſperer, que ceste reeconciliation & vnion, moyennant l'ayde de noſtre Seigneur, ſera cauſe de
 de

Quel benefice eſt d'eſtre en l'Egliſe Catholique.
Jean 16.

1.Tim. 3

Mat. 28

de beaucoup de biens, non seulement spirituels, mais aussi temporels, tant pour l'amplification du Royaume de V. Majesté, que pour la confusion de ses ennemis. Les Prestres qui sont enuoyés là, & principalement le Patriarche & ses deux Coadiuteurs & successeurs sont tous personnages de grande vertu, comme l'on a esprouué en beaucoup d'occurrences, depuis qu'ils sont en nostre Compagnie: tellement qu'ils ont esté choisis pour vn affaire de telle importance, tant à raison de leur charité, que l'on auoit pieça cogneuë, que pour leur rare & exquisite doctrine. Ils n'ont pas aussi faute de courage, ny de bonne volonté, ayans conçu grande esperance, que leurs traux ne seront pas inutiles, soit pour l'aduancement de la gloire de IESVS-CHRIST, soit pour le bien de vostre Majesté, soit pour le profit des ames de ses vassaux. Car le zele qu'ils ont du salut des hommes, & le desir d'imiter en quelque façon IESVS-CHRIST nostre Seigneur, les incite & esmeut à traualier, pour l'amour d'iceluy, considerans que luy de sa propre volonté a souffert les tourments & la mort mesme, pour deliurer les hômes des peines eternelles d'enfer. D'autant que c'est luy qui dict par son Euangeliste; *Je suis le bon Pasteur. Je le bon Pasteur liure volontiers sa vie pour l'amour de ses brebis.* Joan. 10.

Esineus donc de cest exemple, le Patriarche & les autres vont tous prests & appareillés pour ayder les ames, qui sont en danger de leur salut: non seulement par parole, & par conseil, ou autres aydes spirituels; mais par leur mort mesme, s'il en est de besoing. Vostre Majesté en receura (comme i'espere) vn singulier contentement en nostre Seigneur, & iceluy d'autant plus grand, qu'elle se communiquera d'auantage, & plus familièrement à eux. Or quant à la croyance, qu'on doit donner à ce qu'ils declareront, soit en priué, soit en public, vostre Majesté n'ignore pas, qu'un chacun d'eux, entant que vray Legat, mais principalement le Patriarche doit estre creu, & auoir l'autorité qu'il cōuient, comme parlant au nom & en la personne du S. Siege Apostolique. Et partant qu'on doit adiouster foy à leurs parolles, qui ne sont autres, que celles de l'Eglise, de laquelle ils sont comme les interpretes. Et parce qu'il est necessaire, que tous les fidelles Chrestiens croient fermement à l'Eglise, & qu'ils obeyssent à ses commandemens; & s'il y a quelque chose, qui soit obscure ou douteuse, qu'on s'adresse à icelle, pour en auoir la resolution, ie ne doute pas, que V. M. selon sa pieté singuliere, ne face vn Edict,

*Il se faut
rappor-
ter au
dire de
l'Eglise
et dou-
tes & cō-
trouerses*

*Deut.
c. 17.*

*Mat.
23.*

*Pro-
uer. 1.*

*Prou.
23.*

Luc. 16.

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

*Mat.
17.*

*Ad Ga-
lat. 1.*

par lequel il commande à tous ses subjects de quelque estat & qualité qu'ils soient, de suyure dorenavant sans aucun doute les determinations, commandements, defences, ou responces dudit Patriarche, & de ceux qu'il. commettra en sa place. Il est notoire par le Deuteronome, qu'on auoit accoustumé de rapporter toutes les controuerses & difficultés à la Synagogue, qui estoit la figure de l'Eglise; & à ce propos nostre Seigneur a dict; *Sur la chaire de Moïse ont esté assis les Scribes & les Pharisiens;* le mesme enseigne la sagesse aux Prouerbes de Salomon disant, *Ne lais- se pas en arriere les commandements de ta mere* (c'est à dire de l'E- glise) & ailleurs: *Garde toy bien d'outrépasse les bornes qu'ont pose tes Peres,* qui sont les Prelats d'icelle. Finalement IESVS-CHRIST nostre Redempteur veut & entend, qu'on s'arreste au mesme ju- gement de l'Eglise: tellement qu'il dict en l'Euangile de S. Luc parlant des Prelats d'icelle: *Celuy qui vous obeyst, m'obeyst; & celuy qui vous mesprise, me mesprise:* & en S. Matthieu, *S'il ne veut obeyr à l'Eglise, tiens le comme vn Ethnique & Publicain.* D'ou il appert, qu'il ne faut pas mesme prester l'oreille à ceux, qui apporteroiēt quelque chose contraire, & discordante du sens & interpretation de l'Eglise Catholique. Ainsi nous admoneste S. Paul en l'Epistre aux Galates disant: *Si vn Ange du ciel vous annonce autre chose, que ce que nous vous auons annoncé, qu'il soit anatheme.* En somme cecy mesme nous enseignent les Saincts Docteurs, les canons des Conciles, & le commun consentement de tous les Fideles, avec la coustume de toute l'Eglise. Le Patriarche & ses compagnons sont deliberés reciproquement de deferer à vostre Majesté tout l'honneur & l'obeyssance, qu'il est conuenable: & la supporter autant que leur debuoir le permettra. Et nous, qui sommes icy en ces quartiers d'Europe, bataillans pour l'amour de IESVS-CHRIST, soubz le drapeau de ceste tres-petite Compagnie, nous offrons tous à vostre Majesté, prests & appareillés pour luy faire seruice, & luy rendre l'honneur, qui luy est deu. Mais ne pouuans pour le present tesmoigner en quelque autre chose l'affection, que nous luy portons, nous continuerons, comme nous auons commencé, de prier Dieu en nos oraisons & sacrifices, afin qu'il luy plaise maintenir vostre Majesté & ce siē Royaume tres-ample en son saint seruice, & en l'obeyssance de son Fils nostre Sauueur & Redempteur IESVS-CHRIST. Le mesme Dieu & Seigneur vucille par son infinie bonté donner continuellement

à vn chacun de nous sa diuine lumiere, pour cognoistre clairement sa tres-saincte volonté, & les forces pour l'accomplir. De Rome ce 23. Feurier 1555.

Ceste lettre fut enuoyée au P. Iean Nugnes designé Patriarche d'Æthiopie, qui estoit lors en Portugal, afin qu'estant arriué en ce païs là, il la baillast au Roy. On luy fit tenir par mesme moyen ses despeschés & prouisions du S. Pere, par lesquelles il le constituoit Patriarche, & luy donnoit de grands pouuoirs, ensemble le mâteau Archiepiscopal, que sa Saincteté luy enuoyoit, comme la coustume porte. Le P. Melchior Camero, qui estoit aussi en Portugal, reçeut pareillement ses prouisions de Rome, par lesquelles il estoit créé Euesque de Nice. Les autres dix Peres furent enuoyez d'Italie en Portugal, avec le Pere André d'Ouiedo designé Euesque de Hierapolis, qui estoit lors Recteur du College de Naples. Ils furent tous triés par le B. P. Ignace, & choisis de diuerses nations: car il en y auoit d'Italiens, de Flamans, de Portugais, & d'Espagnols. Mais voyons l'yssuë de cest affaire.

Prouisions de Rome pour le Patriarche & l'Euesque de Nice.

Deux Ambassadeurs sont enuoyez de Goa au Roy d'Æthiopie, pour le preuenir auant l'arriuée du Patriarche, & du debris d'un nauire, auquel y auoit trois Peres qui estoient nommez pour aller audit païs, lesquels avec plusieurs autres personnes moururent de faim en vne Isle deserte.

CHAPITRE XVI.

Les Peres & Religieux de la Compagnie de Iesus, qui auoient esté destinez pour accompagner le Patriarche d'Æthiopie, estans espars en diuers quartiers de l'Europe, furent bien tost ralliez: & ceux qui n'estoient pas lors en Portugal, s'y rendirent en brief. Or tandis qu'ils attendoient la saison pour la navigation, le Roy voulant vser de son accoustumée liberalité, & magnificence vrayement Royale, feit faire au Patriarche & aux Euesques des vestemens, pour dire la sainte Messe, & faire l'office diuin en Pontifical, brochez d'or & d'argent, avec le reste de l'appareil des vases & autres instrumens, qui seruent à cela, le tout fort riche, & artistement elabouré. Outre ce, afin de rendre la chose plus celebre & honorable, il destina vn des Gen-

Liberalité du Roy de Portugal.

tils-hommes de sa maison appellé Fernand de Sofa, pour presenter de sa part le Patriarche & les autres Peres au Roy Claude, en tiltre d'Ambassadeur de sa Majesté. Cependant qu'on apprestoit à Lisbonne toutes ces choses, & autres necessaires à leur voyage, le Roy Iean escriuit & ordonna à son Lieutenant és Indes, qui estoit lors François Barret, d'enuoyer promptemēt au Roy d'Æthiopie quelques Ambassadeurs, afin de voir la disposition qu'il y auoit en iceluy, pour receuoir de la main de nostre S. Pere, le Patriarche & les autres Peres, qu'on luy debuoit enuoyer: brief pour sonder & cognoistre sa volonté, touchant le but qu'on pretendoit de sa reconciliation & de tout son Royaume à l'Eglise Catholique. François Barret Gouverneur des Indes ayant reçu ces lettres, & le commandemēt de son Prince, despeche soudain au Roy Claude vn Gentil-homme fort prudent & aduisé, qu'on nommoit Iacques Diaz, & avec luy vn Pere de la Compagnie de I E S V S, appellé Gonzale Rodriguez, personnage de rare vertu & doctrine, auquel outre la commission commune à tous deux, il recōmanda particulièrement d'ayder les Portugais qui estoient là restez de la desconfiture de Christofle de Gamma, és choses qui concernoient le salut de leur ame, leur administrant les Sacremens, nommément de la confession & communion, & les exhortant à leur debuoir, d'autant qu'ils n'auoient aucun Prestre Catholique avec eux.

Estans donc partis de Goa en deux Galeres, ils arriuent dans vn mois au port d'Arcoco ou Arquico, qui est viz à viz de l'Isle de Mazua, laquelle est au dedans du golfe Arabique, fort pres de l'Æthiopie. Incontinent qu'ils furent descendus à terre, il s'en vont trouuer le Roy Claude, lequel estant aduertty de leur venue leur donna bien tost audience. Apres les courtoisies & complimens ordinaires, la lettre du Roy de Portugal, qu'ils luy portoiēt, fut leuē, qui cōtenoit en somme, comme tous les Princes Chrestiens, & luy principalement, pour l'affectiō singuliere qu'il portoit à sa Majesté, auoient esté infiniment aises & ioyeux, d'entendre le vif & enflammé desir qu'il auoit d'embrasser à l'exemple de son pere Dauid, & de son ayeul Alexandre, la communion de l'Eglise Catholique Apostolique Romaine, & par consequent la vraye & syncere doctrine de la foy qu'elle enseignoit. Au moyen de quoy nostre S. Pere, comme vray Pasteur & chef de l'Eglise vniuerselle, ne desirant rien tant que le salut de son ame, & de

*François
Barret
Gouverneur des
Indes.*

*Enuoye
des Ambassadeurs de
la part
du Roy
de Portugal à
celuy
d'Æthiopie.*

*Sommaire de la
lettre
que le
Roy de Portugal
luy enuoyoit*

tous ses subiects, l'auoit pourueu d'un Patriarche, & de deux autres Prelats, ensemble de quelques Peres, tous personages signalez en vertu, & bien versez aux saintes lettres, qui alloient là tout exprés pour luy faire seruice, & seconder ses saintes intentions & desirs. Partant qu'il les luy enuoyeroit l'année prochaine avec vn Gentil-homme de sa maison, s'assurant qu'il les receuroit avec l'honneur & le respect que leur dignité requeroit: & que non seulement il leur presteroit l'oreille, mais aussi tout ayde & faueur, pour executer les choses qui seroyent de leur charge. Apres la lecture de la lettre du Roy, les Ambassadeurs adiousterent ce qu'ils estoient enchargez de luy dire de bouche, & les Portugais qui s'estoyent habituez en ce pays illec presens luy dirent encore beaucoup de choses sur les qualitez des Peres, qui deuoient venir.

Or ceste preuention que le Roy Iean ordonna estre faite, fust tres-sagement aduisée, & executée fort à propos, comme l'yssüe monstra bien: d'autant que l'Abyssin se trouuant comme surpris, changea subitement de visage, & tout confus respondit ambiguëment; de sorte qu'on n'entendoit pas bien, ce qu'il vouloit dire: neantmoins on cogneut assés, qu'il auoit esté changé, soit par l'inconstance de son esprit, soit par la suasion des melchants. Et de fait comm' on le pressast luy demandant s'il n'auoit pas escriit au Roy de Portugal, qu'il desiroit se reünir avec tout son Royaume à l'Eglise Romaine, il commence à esquiuier, tantost le niant, tantost reietant la faute sur son interprete, ou secretaire. Brief pour toute resolution il dict; qu'il estoit, & seroit tousiours frere du Roy de Portugal, & son loyal & fidele amy: mais qu'il n'auoit rien moins pensé que de quitter les coustumes & vsances de ses maieurs, au fait de la Religion, & moins encore sa croyance, laquelle auoit esté confirmée par vne si longue traicte de temps, & par le cours de tant de siecles. Le Pere Rodrigues voyant cela, tasche par tous moyens de le remettre au bon chemin; & à ces fins il disputa plusieurs fois, tant avec luy mesme, qu'avec d'autres en sa presence: esquelles disputes ou conferences, il vit à l'oeil la grande ignorance, qu'il y auoit parmy leurs Docteurs, non seulement des Conciles, & de l'histoire Ecclesiastique: mais aussi du droit tant diuin qu'humain. Combien qu'ils n'auoyent pas faute de finesse & astuce: car lors que le Roy se sentoist pressé des raisons, que le Pere luy proposoit, quelques fois il se retiroit

*Responce
du Roy
Claude
monstrant
qu'il e-
stoit
changé.*

de là, faisant semblant d'auoir quelques affaires d'importance à expedier d'autres : il prolongeoit le temps avec des longs discours hors de propos: ausquels il ne mettoit point de fin, tout exprés, pour ne venir au poinct. Mais se voyant serré de près il se rioit des arguments, comme s'ils n'eussent point eu de force: souuent il nioit ce qu'il auoit confessé, & approuuoit ce qu'il auoit nié. Quelques fois il tançoit le Pere avec des parolles picquâtes: disant que pour vn simple Prestre, il auoit bien de l'hardiesse. Le Pere voyant qu'il ne profitoit rien avec les disputes, se va adui-

*Liure
composé
par le P.
Gonzale
Rodri-
gues, cō-
tre les er-
veurs des
Abyssins*

ser d'un autre expedient. Ce fust qu'il composa vn liure, auquel apres auoir refuté les opinions erronées que les Abyssins tiennent, il prouuoit clairement la Primace de l'Eglise Romaine; & l'ayant faict traduire en Chaldaïque (car ils se seruent de ceste langue és offices diuins) le presenta au Roy, qui le leut fort attentiuement, mais avec vn esprit de contradiction. Neantmoins il se trouua fort empesché à y respondre; tellement que pour ce faire, il estudioit iour & nuict s'addonnant à la lecture de plusieurs liures, qu'il se faisoit apporter de diuerses bibliotheques, principalement des Monasteres de son Royaume. Mais avec tout cela, il ne se peut desempestrer; ains au cōtraire il rendit par ce moyen la renommée du Pere plus celebre: car tout le monde s'estonnoit d'entendre, qu'il y eust vn Prestre Latin si docte, & si versé aux saintes lettres, que personne ne pouuoit respondre à vn liure qu'il auoit composé. Et si l'on n'eust bien tost supprimé ce liure, il y eust eu sans doubte vn grand nombre de gens qui se fussent volontiers remis au giron de l'Eglise Catholique. Mais ce

*Venu
de Labu-
na qui est
le Prelat
des Aby-
ssins.*

qui accieust dauantage le bruiet du Pere, fut la venuë de l'Abuna, qui est leur souuerain Prelat. Car ayant esté freschemēt promuë & esleué à ceste dignité par le Patriarche d'Alexandrie d'Ægypte, comme il ne faisoit qu'arriuer delà, le Roy vouloit fort le faire disputer avec le Pere Rodrigues, & le pria de respondre au liure qu'il auoit composé: mais l'autre avec vn visage renfroigné, & les sourcils ridez, luy respond qu'il ne pouuoit parler ny traiter avec vn heretique: & qu'il n'estoit pas venu là pour contester avec vn estranger: mais seulement pour reformer le Clergé: adioustant que sa Majesté auoit commis vn grand peché, lisant les escrits impies de ce Prestre Latin (ainsi appelloit-il le liure du Pere Rodrigues, & luy deffendist sous grieues peines de ne

faire plus telles choses. Six mois s'estoyent desia passez en semblables disputes & altercations, & le temps s'approchoit, auquel il falloit, que les Ambassadeurs s'en retournassent à Goa. Le Pere Rodrigues voyant qu'ils n'aduançoient rien, apres auoir ouy en confession les Portugais, qui s'estoyent là domiciliez, & leur auoir administré le saint Sacrement de l'Eucharistie, aduisant vn chascun de faire paroistre par leur bon exemple, quel estoit le deuoir d'un bon Chrestien; de sorte qu'ils vinsent à re-
 luire en vertu, comme des flambeaux ardents au milieu d'une nation peruerse, il demanda congé au Roy de s'en retourner avec Jacques Diaz. Mais auant que partir ils supplierent tous deux sa Majesté, de vouloir declarer sa volonté apertement, & sans ambages, touchant la venue du Patriarche, & de ses compagnons: afin qu'ils en fissent le rapport au Gouverneur de l'Inde, qui les auoit enuoyez là tout exprez. Le Roy leur respond clairement, que quant à luy il estoit bien content, qu'ils vinsent à sa Cour, si tel estoit leur bon plaisir, & qu'il enuoyeroit de ses gens au port d'Arquico, pour les receuoir en sortant du nauire, & les conduire avec toute assurance iusques au lieu ou il seroit: & qu'estans là apres les auoir ouys, il se resoudroit sur ce qu'il deuroit faire. Il donna quelques presens à l'Ambassadeur Jacques Diaz, & commanda pareillement qu'on donnast au P. Rodrigues dix onces d'or pour son viatique: mais le Pere remerciant sa Majesté les refusa honnestement. Or comme ils s'en retournoyent en l'Inde, estans bien près de la coste de Zeilan, vne tourmente s'esleua soudainement qui pensa bouleuerfer leur nauire sans dessus dessous, & peu s'en fallust qu'ils ne se noyassent tous: mais nostre Seigneur les deliura de ce danger par l'intercession (comme il est à croire) de sa Sainte mere, à l'honneur de laquelle ils firent vn vœu s'ils eschappoyent de ce peril. Car n'ayans au parauant presque point d'esperance d'euader le naufrage; aussi tost qu'ils eurent fait le vœu, voyla que le nauire sans l'ayde d'aucun se remit sus, de façon qu'il y eut moyen d'espuiser l'eau, qui estoit desia entrée dedans en grande abondance. Et apres qu'ils furent arriuez à Goa, ils firent attacher à l'Eglise de nostre Dame, le pourtraict de leur nauire, avec le peril, auquel ils s'estoyent veus, pour faire foy de leur deliurance miraculeuse.

*Le P.
Rodri-
gues ay-
de les
Portu-
gais es
choses
de leur
salut.*

*Resour
des Am-
bassa-
deurs à
Goa.*

Mais retournons au Patriarche, & à ceux qui le deuoyent accompagner, lesquels nous auons laissé en Portugal, cependant que le P. Gôzale Rodrigues fust en Æthiopie. Le Patriarche dōc s'estât detenu pour quelques affaires de cōséquence à Lisbonne, dix de ses compagnons partirent de Portugal, diuisez selon la coustume en diuers nauires. Ils arriuerent tous sains & sauues au Mozambique: mais de là remettant les voiles au vent pour tra- uerser ce grand Ocean, bien tost apres qu'ils furent sortis du port de Mozambique, l'un des nauires s'escarte des autres avec l'ob- scurité de la nuit, & venant à donner contre des bancs ou es-

Debris d'un na- uire. cueils, se froisse là miserablement. La marée n'estoit pas lors fort haute, & de ces escueils on pouuoit passer aisément à vne petite Isle deserte qu'il y auoit là au près, parce que la suite des ro- chers, contre lesquels le nauire auoit hurté, les menoit à icelle. Ceux donc qui estoient dans ce nauire, lesquels arriuoient au nombre de trois cens personnes ou enuiron, vindrent surgir par le moyen d'une piece du vaisseau rompu en ceste petite Isle, la- quelle ils trouuerent despourueü de toute sorte de viures, qui neantmoins leur faisoient bon besoing. Car il ne leur restoit de leurs prouisions, sinon vn peu de vin, & quelques autres viandes, qui estoient encores toutes gâtées; de façon qu'ils preuyoient bien que s'ils n'estoient promptement secourus, ils mourroient là tous de male faim. Le Capitaine du nauire considerant cela prend vistement l'esquif, qui estoit resté entier, & avec vne tren- taine des plus robustes, s'embarque là dedās avec intention d'al- ler demander à quelque lieu proche du secours pour les autres. Mais les vents & la marée les porterent en peu de iours à Goa:

Merueilleux voyage. tellement qu'il trauersā toute ceste vaste mer avec vn petit es- quif, & arriua tout d'une traicte à ce port, ayant fait plus de cinq cens lieües de chemin, comme il fut supputé par apres. Ce qui sembleroit presque incroyable, si ceux-lā mesmes qui le fi- rent ne l'eussent assuré. Vn peu apres que le Capitaine fust par- ty, il en y eut autres cinquante de ceux, qui estoient restez en ceste Isle deserte, lesquels ayans à la haste assemblé quelques

Trois Peres meurent de faim en vne Isle deserte. pieces de bois, en bastirent vne petite nacelle, & prindrent la mesme route que les premiers. Ceux qui demurerent là pou- uoyent estre en tout deux cents personnes: & entr'autres il y a- uoit trois Peres de la Compagnie de I E S V S, à sçauoir le P. Gon- zale, le P. Pascal, & le P. Alфонse Lopez, lesquels bien qu'ils eus-

sen

sent esté inuitez, & priez par ceux, qui estoient partis, de se sauuer quant & eux, ils n'auoient pas voulu accepter cest' offre, afin de ne laisser ceste pauvre & affligée troupe au desespoir, & sans le recôfort ou côsolation qu'ils luy pouuoient donner. De façon que pour leur tenir compaignie, & les encourager à supporter patiemment leur calamité, tant par parolles que par exemple, ils aymerent mieux perir avec eux de faim, que se sauuer avec les autres. Exemple de charité fort remarquable. Cependant qu'ils combattoient avec la faim & la mort, le Gouverneur des Indes ayant entendu par le rapport du Capitaine, qui s'estoit sauué, le danger auquel il auoit laissé les autres, l'en renuoye soudain là mesmes avec deux Carauelles, en l'une desquelles estoit le grand maistre des mariniers, qu'on appelle le grand Pilote, afin de retirer dans icelles ceux, qui estoient là restez, & les mener à sauueté. Mais bien que l'un & l'autre vst de grande diligence, si n'y peurent ils arriuer à temps. Car la distance des lieux estoit si grande (outré qu'ils auoient la marée contraire) & ceste Isle estoit si petite, qu'à grande peine la sceurent ils trouuer. Bref quand le Capitaine y aborda, tous estoient morts de faim. Entre autres ces trois Peres qu'auons dict. La nouuelle de ceste perte causa beaucoup de tristesse en la ville de Goa, & nommément à ceux de la Compagnie, jaçoit qu'un chascun estimast leur sort heureux, & louast grandement leur vertu & charité. L'année suyuant le Patriarche & le P. André d'Ouiedo Euesque de Hierapolis, avec le P. Jean de Mesquita, arriuerent à Goa sains & sauues, Dieu mercy: mais l'Ambassadeur Sosa, qui debuoit les mener en Æthiopie, mourut par les chemins. Or comme ils sceurent que le Roy Claude n'estoit pas resolu de quitter les erreurs de ses ancestres; ains persistoit tousiours en son schisme, contre l'opinion qu'on auoit de luy en Portugal, & le bruiet qui en couroit par toute l'Europe, il sembla bon de faire vne consulte, pour veoit s'il estoit expedient, que le Patriarche & ses Coadiuteurs, avec les autres Peres, qui luy auoient esté baillez, pour l'ayder en ses fonctions, allassent en Æthiopie, les affaires y estans en tel estat. En ceste consulte se trouuerent les principaux du Clergé de la ville de Goa, & les plus graues & anciens Peres de ladicte Compagnie, qui estoient pour lors en ce College: tous lesquels vnamiment & d'un cômun accord, iugerent n'estre point expedient, qu'un personage de telle auctorité que le Patriarche, fust exposé

*Arriuée
du Pa-
triarche
à Goa.*

*Consul-
te tenuë
pour de-
liberer si
on le de-
uoit lais-
ser aller
en Æ-
thiopie.*

à la risée d'une nation schismatique & heretique. Mais afin qu'il ne semblaſt, qu'on auoit quitté par crainte ou laſcheté de cœur, vne choſe de ſi grande importance, & pour ne laiſſer en arriere aucun moyen, qui peut ſeruir à remettre le Roy en ſon debuoir; il fut trouué bon, que l'Eueſque de Hierapolis y allaſt cependant avec deux ou trois autres Peres: afin qu'ils taſchaſſent de perſuader au Roy de vouloir recognoiſtre le S. Siege de Rome. Car cela eſtant faiſt, la venuë du Patriarche ſeroit plus à propos, pour exercer ſa charge: ſi non, qu'ils l'aduiferoient de tout par lettres, ſelon le train que les affaires prendroient. Voyons donc ce qu'ils y firent.

L'Eueſque de Hierapolis André d'Oniedo entre en Aethiopie avec quelques Peres de la Compagnie de IEſus, & de ſa ſucceſſion au Patriarchat, enſemble de quelques choſes qu'il a fait & enduré en ce païs là.

CHAPITRE XVII.

LE Pere André d'Oniedo Eueſque de Hierapolis, ayant volontiers accepté la charge qu'on luy auoit impoſée, bien que pleine de dangers & de difficultés, partit de Goa, pour aller en Aethiopie l'an 1557. avec quelques autres Peres de la Compagnie de IEſus, qui luy furent baillez pour l'ayder en ſes fonctions. Auſſi toſt qu'il y fut arriué, il taſche de ſ'aboucher avec le Roy, qui eſtoit pour lors occupé en certaines guerres, dont il ne ſe pouuoit deſpeſtrer ſi promptemēt, & pour ce il alla le trouuer en ſon camp. Le Roy luy ſeit vn fort honorable accueil, & aux autres Peres encore, monſtrant à vn chaſcun d'eux, & particulierement à l'Eueſque, beaucoup de ſignes de bien-veillance. Mais quand il fut queſtion de venir au point, touchant ſa reconciliation & de tout ſon Royaume à l'Egliſe Catholique, il ne ſe monſtra pas plus ſoupple ny plus docile qu'il auoit fait auparauant. L'Eueſque voyant cela, pour ne rompre du tout avec le Roy, meſmes au beau commencement, fut d'aduiz de temporizer pour vn peu: & cependant il ſ'employe avec les autres Peres à trauailler, tant à l'endroit des Portugais, que des Abyſſins, taſchans de reduyre ceux-cy à l'Egliſe Catholique, & maintenir ceux-là au debuoir d'un bon Chreſtien. Or ayant par leurs remonſtrances & colloques familiers retiré quelques vns

L'Eueſque de Hierapolis arriue en Aethiopie.

En quoy luy & les autres Peres s'occupent.

des Abyssins de leur schisme & erreurs, le Roy en fut aduertý, dont il monstra receuoir du desplaísir. L'Euesque sçachant cela, s'en va le trouuer pour luy rendre raison de son fait, & pour conclusion le supplie de vouloir permettre quelques conferences ou disputes estre faictes entre eux & les plus doctes Moynes, ou autres qu'il eut en son Royaume, sur les poincts qui estoient en cõtrouersẽ entre nous & eux, afin qu'on s'esclaircist au plustost de la verité. Le Roy n'entendit pas volontiers la proposition de ceste ouuerture, combien qu'il feist semblant de l'approuuer: car il alloit dilayant l'effect d'icelle de iour à autre: tellement qu'on voyoit bien qu'il n'en auoit pas grande enuie: mais on luy en feist vne telle instance, qu'en fin il fut contraint d'y condescendre. L'Euesque donc & les autres Peres disputerent souuentefois contre les Docteurs, lesquels tousiours demeuroient confus, & ne sçauoient que respondre aux raisons & auctoritez qu'on leur apportoit. Mais pour cela ils ne se recogneurent pas. L'Euesque voyant cela, & desirant pourueoir au salut de toute ceste natiõ, s'aduisa qu'il seroit bon de composer quelques traictez contre les erreurs des Abyssins, & les faire publier. Ce qui reüssit fort heureusemẽt, si bien que le Roy se voyant fort pressé de ce costé là, il descouurit en fin ce qu'il auoit dans le cõeur. Car au mois de Decembre 1558. il dit clairement à l'Euesque, qu'il ne pensoit pas quitter la croyance de ses ancestres, ny prester obeýssance au Pontife Romain. Mais la diuine iustice (ce semble) ne tarda pas longuement à punir son obstination. Car estant allé à la guerre au mois de Feurier ensuyuant, comme il vint à donner la bataille à son ennemy, il y fut vaincu & tué. Vn sien frere nommé Adamas, homme cruel & sanguinaire, qui auoit apostaté de la Religion Chrestienne; & par mesme moyen estoit ennemy iuré du S. Siege, luy succeda. L'Euesque sçachant que cestuy-cy estoit installé au siege Royal, l'alla trouuer tout aussi tost. Adamas monstra du commencement vn fort bon visage à l'Euesque, & à ses compagnons, plustost par feintise, que de bonne volonté, ainsi que les effects declarerent tost apres. Car ayant sçeu que deux de ses vassaux, personnages de marque, auoient esté reduicts à la foy Catholique par l'Euesque, il en fut extremement fasché, & commanda qu'ils vinsent tous deux deuant luy pour rendre raison de leur faict. L'Euesque les ouyt en confession, & les communia tous deux deuant qu'ils allassent parler au Roy. Ayant

*Le Roy
Claude
refuse de
prester
obeýssance
au Pape.*

Est vaincu en bataille & tué.

*Adamas
frere de
Claude
luy succeda.*

*Fait
hier vn
de ses
subiects
pour s'e-
lire ren-
du Ca-
tholique*

*Guerre
entre luy
& le fils
du Roy
Claude
son nep-
ueu.
Adamas
pert la
bataille.*

*Humili-
té du Pa-
triarche
d'Æ-
thiopie
Iean Nu-
gues, &
de decés.*

comparu en sa presence, il tasche premierement de leur persua-
der avec douces parolles, de se remettre en leur ancienne croyan-
ce: mais voyant qu'il n'aduançoit rien ny par ses allechemens &
promesses, ny par ses menaces & espouuantaux, il feit trancher
la teste au plus ieune d'iceux, qui n'auoit que vingt ans, & l'au-
tre, qui estoit aagé de soixâte, fut enuoyé en exil hors du Royau-
me. En outre considerât que la cause de tout cecy estoit l'Eues-
que & ses compagnons, il les fit prendre prisonniers pour faire
d'iceux vne punition exemplaire. Et à celle fin qu'ils ne luy es-
chappassent, tandis qu'il alloit à la guerre, il les menoit prison-
niers en son camp, ou on leur faisoit vn fort mauuais traicte-
ment. L'occasion de la guerre, qu'il faisoit lors, estoit telle. Apres
la mort du Roy Claude, quelques vns des principaux Seigneurs
du Royaume se reuolterent contre Adamas, à la faueur d'vn Ca-
pitaine Turc, qui leur presta secours, pretendans (comme ils di-
soient) faire venir la couronne au fils du Roy defunct, comme au
legitime heritier. Car Adamas n'estoit que frere d'iceluy, & l'au-
tre son fils legitime, qui est vn debat fort ancien, & ordinaire en-
tre les oncles & les nepueux. Les deux armées vindrent à cho-
quer; mais Adamas perdit la bataille: & toutes ses troupes furēt
mises en route. Il se sauua neantmoins à la fuytte, combien que
ce fut avec grand danger de sa vie. Le champ estant demeuré au
fils du Roy Claude, les Turcs, qui luy auoient aydé, se mettent
à piller & saccager tout ce qui estoit resté du camp d'Adamas, &
courans d'vn costé & d'autre, ils vont rencontrer l'Euesque, &
les autres Peres, qui estoient tous en vne tente, ou on les tenoit
prisonniers. Et les voyans si pauures & si miserables, ils n'eus-
sent pas pitié d'eux, ains mirent le feu à leur tente, leur ayans
plustost osté tout ce qu'ils auoient. Dieu voulut toutesfois qu'ils
eschappassent la vie sauue, bien qu'ils furent reduits à vne ex-
treme pauvreté & misere. Mais laissons pour vn peu ce pais, &
reuenons en l'Inde, là ou pendant que ces choses passoient en
Æthiopie, l'Euesque de Goa Iean d'Albuquerque estant decédé,
l'on feit tres-grande instance au Patriarche Iean Nugnes, qui
estoit demeuré là, de vouloir prendre le gouuernement de l'E-
glise de Goa. Mais il n'y eust iamais ordre de l'y faire condéscen-
dre, ains plustost abaissant la grandeur de sa dignité, tant qu'il
luy estoit possible, il se soubmettoit aux Superieurs de la Com-
pagnie, qui gouernoient le College de Goa, tout de mesme

que s'il n'eust esté qu'un simple Religieux. Or apres auoir refusé ceste Prelature, & auoir laissé des beaux exemples de son abstinence, de sa pieté & deuotion, & autres grandes vertus, il finist heureusement ses iours au mesme College de Goa, & par son decés l'Euesque de Hierapolis André d'Ouiedo resta Patriarche d'Æthiopie, selon l'ordonnance du S. Pere, que nous auons cy dessus r'apportée. Mais ceste dignité ne luy accreust pas ses rentes ou commoditez temporelles, ains plustost ses peines & travaux. Car apres ceste desconfiture du camp d'Adamas, Dieu voulant (ce semble) punir ce pays d'Æthiopie, à raison de son obstination ez erreurs, dont il le vouloit retirer, & de sa contumace refusant d'obeyr à son Eglise, il luy enuoya des fleaux fort estranges: car laissant à part les guerres sanglantes, qu'il y eut entre Adamas, & le fils du Roy Claude sur la succession de la Couronne, par lesquelles la plus grande partie du Royaume fust ruinée, comme chascun d'eux se voulust ayder des Turcs, pour ses pretensions, ces cruels ennemis du nom Chrestien, vindrent par ce moyen à se rendre maistres d'une grande partie de l'Æthiopie, & la ruinerent quasi tout à fait. D'autre costé les Galles qui sont la populace du pais, s'esleuerent en forme de Communautéz, pour se garentir des extorsions & autres indignitez, que les soldats leur faisoient; & se mirent à piller & rauager tout ce qu'ils rencontroyent. Or comme il n'y auoit personne, qui leur resistast, les Roys estans occupez en leurs querelles particulieres, ils acheuerent de ruiner ce que les Turcs auoyent laissé d'entier. Apres ces maux suruindrent beaucoup de maladies, & pestilences, par lesquelles vne grande partie de l'Æthiopie fust depuée. A raison de ces miseres les Portugais qui s'estoyent là domiciliez, perdirent leurs maisons, & tous les moyens qu'ils auoyent, de sorte qu'ils furent contraincts, pour se pouuoir entretenir de seruir és guerres susdites à diuers Princes, & par ainsi se diuiserent en plusieurs lieux: d'où aduint que le Patriarche & les autres Peres tomberent en vne extreme pauureté & disette. Car estans auparauant nourris & entretenus des seules aumosnes des Portugais, cōme celles-cy leur viurent à manquer, ils n'estoyent aydez de personne, tellement qu'ils endurerent beaucoup d'incommoditez & miseres. En fin ils en vindrent là, qu'ils furent contraincts d'achepter vne charruë & des bœufs pour labourer la terre: afin d'amasser vn peu de grain d'orge: & de ceste maniere

*Le P.
André
d'Ouie-
do luy
succeede
au Pa-
triarche.*

*Les
fleaux
que Dieu
enuoya
sur l'Æ-
thiopie.
Galles,
quelles
gēs sont.*

*Labon-
vent eux
mesmes
la terre.*

pouuoir passer la vie, ils menoyent eux mesmes la charuë, & cultiuoyent la terre avec leurs propres mains. Quant aux accoustrements, le Patriarche se trouua en tel estat, qu'il n'auoit pas vne pietre robbe, ie ne dis pas pour représenter sa dignité Patriarchale, voire mesmes pour se couvrir; & voulant escrire vne lettre au Roy de Portugal, qui estoit lors Sebastien, il n'eust moyen de recouurer vne fucille entiere de papier: de façon qu'il fust contrainct de l'escrire en vn quart de fucille, qui sembloit encor auoir esté tiré de quelque vieux liure, & tout ce cy enduroyent-ils volontiers, pour l'esperance qu'ils auoyent, que les affaires se remettroyent, & pour n'abandonner ce petit troupeau de Catholiques, qu'ils auoyent desia gaigné à sa foy, avec tant de trauaux & dangers.

*Quel-
ques Por-
tugais
voulans
entrer en
Ethiopie
sont faits
esclaves
des
Turcs.*

Enuiron ce mesme temps il y eut seize Portugais, qui partirent de l'Inde, pour venir en Ethiopie, afin de sçauoir comme les choses y alloient, mais estants tombez entre les mains des Turcs, quelques vns d'iceux furent tuez, d'autres blesez & rendus esclaves, du nombre desquels fust vn Religieux de la Compagnie de Iesvs, nommé Fulgence Freire, qui fust pris ioignant les confins de l'Arabie, au destroit de la mer rouge, & de là estant mené à Mazua, il fust mis aux galeres pour ramer comme les autres forçats. Durant sa captiuité, il conuertit à la foy Chrestienne six personnes, & les trois moururent incontinent apres le baptesme; finalement il fut racheté par la liberalité du Roy de Portugal, & reuint en Espagne avec volonté de retourner encor derechef en l'Inde. Car tels & semblables accidens n'abattent pas le courage à ces braues champions de Iesvs-CHRIST, ains leur donnent enuie d'en endurer dauantage.

*Fulgence
Freire
de la Com-
pagnie
racheté*

Mais reuenons au Patriarche. Comme le Roy Sebastien sceut la misere, en laquelle il estoit & ses compagnons aussi, il en fust grandement marry, & le fist sçauoir à nostre saint Pere, qui estoit lors Pic cinquiesme nouuellement créé, escriuant à son Ambassadeur qui estoit à Rome, & luy ordonnant de remonstrer à sa Sainteté les grands trauaux, que ces Peres enduroyent en ce pais là, & le peu d'esperance, qu'il y auoit de reduire ce Royaume à l'obeyssance du saint Siege, veu les guerres continuelles, qui estoient entre les Princes, qui pretendoyent à la couronne: & de plus luy représenter comme es Royaumes du Lapon, il n'y auoit aucun Euesque, qui peust conferer le Sacre-

ment de Confirmation aux Chrestiens nouuellement conuertis, ny donner les ordres sacrez, tant à ceux de la Compagnie, qui ne les auoyent encore receus, comme à plusieurs Iaponois, lesquels estoient desia capables de la Prestreise. A ces fins qu'il priaist de sa part sa Saincteté de vouloir ordonner, que le Patriarche d'Ethiopie se transportast au Iapon, pour y exercer les fonctions Episcopales, puis qu'en Ethiopie il n'y auoit moyen de rien faire. Sa Saincteté accorda tres-volontiers au Roy tout ce qui luy fust requis là dessus, tant par son Ambassadeur que par le P. François de Borgia, qui estoit lors General de la Compagnie de IESVS, lequel luy feit entendre le mesme par parole, qu'il auoit sceu par les lettres du Roy Sebastien. Le Pape donc ayant bien pesé & considéré le tout, mande au Patriarche qu'à la premiere commodité il sortist d'Ethiopie, & se transportast au Iapon pour les fins que dessus, luy escriuant vn brieuf que i'ay voulu inserer en ce lieu traduit en nostre langue.

*A nostre venerable frere André d'Ouedo, Patriarche
d'Ethiopie.*

Venerable Frere, salut &c. Nous auons entendu par les lettres de nostre bien-aymé fils Sebastien Roy de Portugal, esrites à son Ambassadeur, qui est resident à nostre Cour, & par le recit de plusieurs autres personages dignes de foy, que vous ayant esté enuoyé par ce saint Siege vers les quartiers d'Ethiopie, pour reduire les peuples de ce pais à la cognoissance de la sainte Foy, & à l'vnion de l'Eglise Catholique, apres y auoir employé plusieurs années, n'en auez toutesfois par tout vostre trauail, & industrie peu tirer grand fruiet, à cause de la dureté de cœur de ces peuples, & de l'obitination qu'ils monstrent à vouloir retenir leurs anciennes erreurs, & que si vous estiez enuoyé en l'Isle du Iapon, ou en la Prouince qu'on appelle la Chine, esquels pays la foy de IESVS-CHRIST Nostre Seigneur commence à estre receuë avec grande deuotion, il y auroit esperance qu'avec l'ayde de Dieu vostre trauail y seroit mieux employé, & plus profitable, comme en lieu ou il y a beaucoup de moysson & peu d'ouuriers. Ayant donc ouy & pesé toutes les choses susdites; nous vous auons premierement

porté grande compassion, voyant que n'avez peu recueillir le fruit de tant & si grands travaux, qu'avez soufferts, & d'un si long pelerinage. Mais si vostre travail a esté inutile pour ces peuples là, il ne l'aura esté pour vous, qui avez paty & enduré tant & de si grandes afflictions pour nostre Sauveur, lequel en son temps vous rendra le salaire d'une telle pieté, obéissance, & charité. Nous trouuans donc esleuez à ce saint Siege sans aucun nostre merite, & cognoissans comme nous sommes debtors à tous, & obligez à raison de nostre office, de seruir à l'honneur & gloire de Dieu tout puissant, & procurer le salut des ames, apres vous auoir salué en toute charité fraternele, pour les bons & suffisans tesmoignages, que nous auons de vostre zele, & du soing & peine que vous prenez à prescher nostre sainte foy Catholique; vous exhortons en nostre Seigneur, & en vertu de sainte obéissance, & pour la remission de vos pechez, vous commandons, que pouuant avec assurance sortir, & ayant trouué commodité de faire voile, apres que vous aurez receu les presentes, vous partiez, pour aller au Japon, ou à la Chine, & là preschiez la parolle de Dieu, conformément à la doctrine de la sainte Eglise Romaine, qui est mere, & maistresse de tous les fideles. Vous administrerez aussi tous les Sacremens, & procurerez gagner à Dieu le plus d'ames qu'il vous sera possible, avec l'ayde & faueur de sa sainte misericorde. Et afin que vous le puissiez mieux faire, par l'auctorité Apostolique qui nous est octroyée, nous vous donnons puissance d'exercer tous offices Pontificaux, en tous les lieux susdits, & autres ausquels vous aborderez, si tant est qu'il n'y aye point de propre, & particulier Euesque. Voulons aussi que vous usiez par tous les lieux ou arriueriez, de toutes les puissances, & priuileges, qui par le Pape Iules III. de bonne memoire, & par tous les autres Papes nos predecesseurs vous ont esté octroyez pour le Royaume d'Ethiopie. Nous dispensons aussi par la mesme auctorité Apostolique avec vous, à ce que puissiez sans aucun scrupule de conscience, demeurer & resider esdits lieux, si vous n'avez plus grande esperance de pouuoir reduire les peuples d'Ethiopie à l'union de la foy Catholique. Dauantage d'autant que le Concile Oecumenique & General, qui fust asssemblé par le Pape Paul III. d'heureuse memoire, continué par Iules III. & conclu sous Pie III. nos predecesseurs a esté confirmé par l'auctorité de ce saint Siege, nous auons commandé qu'on

vous en enuoye vne coppie authétique avec les presentes. Vous le receürés avec toute deuotion:tiendrés la doctrine,& garderés les canons, qui appartiennent à nostre sainte Foy. Au reste trauaillés volontiers, mon frere, & ioyeusement, pour le seruice de Dieu,& salut des ames,vous confiant que la diuine bõté ne vous manquera d'ayde & faueur.Exercés fidellement & diligemment les talens,que vous aués receu de sa main liberale, & employés les à chercher sa sainte gloire. Finalement quand l'occasion se presentera, ne faillez pas de nous aduertir de ce,qu'avec la grace de Dieu vous aurez aduancé en ces terres, & de tout ce que vous iugerez estre bon que nous sçachions, pour le bien de ce saint Siege: Dieu tout-puissant, Pere de nostre Seigneur Iesus-CHRIST, vous conserue, mon frere bien-aymé, vous conduise en santé au susdit pais, & augmente en vous ses diuines graces: afin que puissés conuertir ces pauures infidelles, & les retirer de l'auueuglement de leur idolatrie. Donné à Rome en nostre palais de S. Pierre le premier de Feurier 1566.

Antoine Floribel Euesque d'Abelin.

Le Patriarche receit bien ce brief,mais il ne s'en seruit pas,d'autant que le Pape disoit en iceluy, qu'il allast au Iapon, ou à la Chine, s'il n'auoit plus grande esperance de pouuoir reduire les peuples d'Æthiopie, à la foy Catholique. Et d'vn costé ledit Patriarche esperoit tousiours, que les choses s'amenderoient: & d'autre part il voyoit tant de difficultés & dangers de tomber entre les mains des Turcs,s'il vouloit sortir d'Æthiopie,qu'en fin il s'arresta là, & apres beaucoup de trauaux & persecutions, y mourut saintement.

C'estoit vn personnage durant sa vie de grande vertu & perfection: fort addonné à la penitence & mortification, mais sur tout à l'oraison: de sorte que ne pouuant quelquefois y vacquer durant le iour,aussi longuement qu'il desiroit,il le recompensoit sur la nuit, retranchant autant de son sommeil,& souüentesfois y employoit vne bonne piece de la nuit. Auant qu'aller en Æthiopie il auoit esté Recteur du College de Gandie, ou il luy aduint vne chose digne de remarque; C'est qu'estant vne fois en oraison,le diable, ennemy de tout bien, & principalement de ce saint exercice, avec la permission que Dieu luy en donna(tout ainsi que pour affliger le saint homme Iob)il le battit si cruellement,que le Pere fut contrainct de se mettre à crier:de sorte que

Les vertus du Patriarche.

est battu du diable.

*Fut Re-
cteur du
College
de Gan-
die & de
Naples.*

*Inform-
ations
faites
de sa
vie.*

quelques vns de la maison l'entendans, y accourent viste-
ment, pour sçauoir que c'estoit : mais la chambre estant serrée par der-
riere, ils ne peurēt entrer dedans, & le Pere ne leur voulut ouurir
disant, que ce n'estoit rien, & qu'ils se pouuoient retirer. Il partit
quelque temps apres du College de Gandie, avec le Duc Fran-
çois de Borgia fondateur d'iceluy, qui s'en alloit à Rome, pour
estre reçu en la Compagnie de Iesus : & apres qu'il l'eust ac-
compagné iusqu'à là, il fut enuoyé à Naples, par le B. P. Ignace,
pour estre Recteur du College de ladicte ville. Estant donc en
ceste charge, il fut creé Euesque de Hierapolis, & puis s'en alla
en Æthiopie, ou il demeura l'espace de vingt trois ans, endurant
de grands trauaux, calamitez, & persecutions, pour l'amour de
nostre Seigneur, & faisant des choses grandes & merueilleuses,
comme il appert par les Informations qui en ont esté dressées
depuis n'agueres sur les mesmes lieux, par le soing & diligence
d'un Prestre seculier, natif de la ville de Goa, nommé Melchior
de Sylua, qui fut enuoyé audit pais l'an 1598. comme nous di-
rons cy apres. Car ayant charge expresse de l'Archeuesque de
Goa, de s'informer & tascher de sçauoir au vray tout ce que ledit
Patriarche & les autres Peres auoient fait & paty en ceste region,
il feit faire les Informations pardeuant Notaire & tesmoins, en
bonne & deuë forme, appellant ceux qui pouuoient sçauoir ces
choses, & les faisant iurer au prealable sur les Saincts Euangiles
de dire verité. Ces informations ayant esté faictes authentique-
ment, furent premierement apportées d'Æthiopie à Goa, par le-
dit Prestre, qui s'en retourna en son pais l'an 1604. & de là puis
apres enuoyées en Portugal, ou elles ont esté imprimées l'an
1607. Or d'autant qu'en icelles il y a beaucoup de choses fort
remarquables, qui n'ont pas encore esté sçeuës par deçà, j'ay esti-
mé les debuoir inserer en ce lieu, puis que cest leur propre place.
Nous parlerons donc au chapitre prochain du Patriarche André
d'Ouiedo; & au suyuant des Peres qui l'accompagnerent.

Declaration plus ample des travaux, calamitez, & persecutions, que le Patriarche André d'Oniedo a enduré en Aethiopie pour la foy Catholique, & des œuvres merueilleuses, qu'il y a fait tant en sa vie, qu'après sa mort.

CHAPITRE XVIII.

PARLANT en general, les informations susdictes portent, que le Patriarche & les autres Peres, qui furent avec luy en Aethiopie, ont tousiours mené vne vie sainte & Apostolique, estâs tenus & estimez pour gens vrayemēt Saints, non seulement des Catholiques, mais aussi des gens du païs, ores que Schismatiques ou Heretiques, & du Roy mesmes; Qu'ils se sont tousiours trauallez à reduire à la foy Catholique, tant le Roy que ses vassaux, & principalement les Moynes & Religieux de ceste nation; Qu'ils ont disputé souuent avec les plus doctes de leurs Religieux, & que les ayans conuaincus, ils en ont reduit plusieurs à la foy de l'Eglise Catholique Apostolique Romaine, & qu'à ceste cause ledit Patriarche & les Peres ont enduré des grandes persecutions, bannissemens, pauuretez, & afflictions, comm' il se dira cy apres.

Mais venant en particulier au Patriarche, c'estoit (disent les mesmes informations) vn hōme si charitable enuers les pauvres, que ne luy estant vne fois resté autre chose pour leur donner qu'un seul bœuf, qui luy souloit porter les ornemens d'Eglise quand il alloit voyageant d'une part & d'autre, comme il veid la grande faim que plusieurs enduroient, il le feit tuer, & distribuer aux pauvres. Or comme celuy qui a depōsé ce fait, luy remonstra la necessité qu'il en auoit pour le bien de l'Eglise, & partāt qu'il ne le feit pas tuer; le Patriarche luy respondit ces parolles: Laissez le tuer, mon fils, & le departir aujourd'huy aux pauvres, car demain Dieu nous pouruoitra. Comme de fait il aduint. D'autant qu'un Seigneur Abyssin, bien que Schismatique, ayant sçeu la charitable liberalité du Patriarche, & la necessité qu'il auoit de ce bœuf, esmeu d'un tel exemple de charité, luy enuoye le lendemain septante ou quatre-vingts pains, & quelques vaches, avec plusieurs autres viures, par le moyen desquels le Patriarche pourueut; tant à sa necessité, comme à celle des autres pauvres.

S'estant vne fois présentée l'occasion de marier vne pauvre fille orpheline, comm' il n'auoit autre chose que luy dōner pour son dot, il luy baillavne mule, dont il se seruoit, quand il faisoit quelque long voyage : & apres cela il alloit sur vn asne, ou bien à pied. Brief il vint à vne si extreme pauureté, qu'il n'auoit pas mesmes vn' aube pour dire la Messe. Ce qu'ayant entendu vn certain Seigneur Abyssin Schismatique, luy enuoya force toile, dōt il feit plusieurs aubes, & distribua le reste aux pauvres.

Or combien qu'au commencement plusieurs tant Catholiques, que Schismatiques, mesmes des plus grands Seigneurs du Royaume, luy eussent fait beaucoup de presens, luy donnant grande quantité d'or & d'accoustremens; si est-ce qu'il n'en gardoit iamais rien quasi pour soy, ains le departoit incontinent aux pauvres, sans en faire reserue pour vn long temps. Ce qu'il obserua toute sa vie inuiolablement: & apres qu'il auoit aumosné tout ce qu'on luy auoit donné, afin qu'il eust de quoy ayder les pauvres, il s'en alloit à pied par les villages d'alentour, quelquesfois à deux ou trois iournées loing, mendier quelque chose pour eux: & ayant amassé ce qu'on luy vouloit donner, il le chargeoit sur ses espauls, & s'en retournoit vers ces pauvres fort ioyeux & content, pour les consoler & repaistre tant spirituellement, que corporellement. Vne fois il luy aduint de rencontrer en chemin, lors qu'il alloit ainsi à la queste, plusieurs Elephans sauuages, desquels il cuyda estre tué: mais nostre Seigneur le garantit de ce danger, comme aussi de plusieurs autres, que nous dirons.

Sa charité enuers les malades, n'estoit pas moindre qu'enuers les pauvres, comme le monstre ce qui s'ensuit.

Il y auoit vn Abyssin heretique, lequel estoit fort trauaillé d'une grieve maladie, non seulement contagieuse, mais encore si hydeuse, qu'on ne trouuoit personne qui le voulut seruir; non pas mesmes de ses propres parens. Le Patriarche entendant cela, poussé de son accoustumée charité, sans faire estat d'aucun danger, s'en va au logis du malade, & se met à le seruir, luy donnant à manger, balayant sa chambre, luy lauuant les linges sales, avec plus de soing & diligence, que n'eust fait le plus loyal seruiteur, qu'on eust sçeu trouuer. Ce qui esmeut l'Abyssin de telle sorte, qu'il abjura ses erreurs, & se conuertit à la foy Catholique, esmerueillé de la grande charité du Patriarche.

Sa nourriture ordinaire n'estoit que du pain fait de certaine

semence amere dont les pauvres se sustennent. Or estant vne fois adueni qu'une grande multitude de langoustes ou sauterelles mangeoit & gautoit toute ceste semence, (car il en y auoit telle quantité sur les branches des arbres qu'elles en rompoient) les habitans des villages d'alentour s'en vindrent à luy, le supplians de vouloir interceder pour eux enuers Dieu, afin qu'ils fussent garantis de ce fleau. Le Patriarche esmeu de pitié de voir ce pauvre peuple ainsi affligé, s'en va avec les Catholiques à l'Eglise pour prier Dieu, & apres auoir dict les Litanies de N.Dame, & des Saincts, ils sortēt de l'Eglise, & trouuēt toutes ces langoustes mortes, & seiches. Cecy luy acquit vne grāde opiniō de sainteté, tāt parmi les Catholiques qu'enuers les Schismatiques: mais ce que nous raconterons maintenant l'accrēst bien d'auantage.

Estant vn iour en vn gros bourg nommē Fremona, les Catholiques qui demeuroient là auoyent grande peur des Turcs, & des Galles (dont a esté parlé cy deuant) lesquels estoient bien près de ce lieu bruslans, meurtrissans, & ruinans tout ce qu'ils rencontroyent deuant eux. Les Catholiques craignans le danger qui sembloit les menaĝer de si près, se retirent au Patriarche leur bon Pasteur, & luy disent qu'ils n'estoyent pas asseurez en ce lieu là, & si n'en sçauoyent d'autre, ou ils eussent moyen de se garantir d'un tel orage. Le Patriarche leur dict qu'ils eussent bon cœur, & qu'ils missent toute leur confiance en Dieu, & de ce pas s'en va offrir à Dieu le S. Sacrifice de la Messe, pour la necessité presente de son peuple, priant la diuine bonté de luy vouloir faire cognoistre ce qu'ils deuoient faire en tel cas. Or disant la Messe il va entendre vne voix qui luy dict: Fremona demeurera en pied; par laquelle nostre Seigneur luy vouloit faire entendre, que ce lieu ne seroit pas ruiné des ennemis. Tellement qu'apres auoir acheuē la Messe, il dict à tous les assistans que nul ne bougeast de là, parce qu'ils estoient plus asseurez en ce lieu qu'en tout autre, eōme de faict il aduint. Car les Turcs & les Galles ayant ruiné & destruit tous les lieux d'alentour, bien qu'ils deussent passer par cestuy-cy, suiuant leur droit chemin, prindrēt neantmoins vne autre route, & ne vindrēt point à ce bourg, encor qu'il fust en vne plaine descouuerte, & qu'ils n'en fussent pas esloignez plus de demie lieuē. Mais N.S. eust esgard aux prieres de son seruiteur, & luy oētroya la deliurāce de son troupeau, qui estoit autrement pour endurer des grādes miseres & calamitez.

*advertis-
sance A-
byssins à
la foy Ca-
tholique*

Le bruit de telles & autres semblables merueilles, que le Patriarche faisoit, s'estant espandu en diuers quartiers de l'Ethiopie, plusieurs originaires du pais s'en venoyent à luy pour estre instruits en la foy Catholique: tellemēt qu'il y eut vn bon nombre d'Abyssins, & entre autres plusieurs Moynes, qui furent reduicts à icelle par son moyen. Le Roy ayant esté aduertey de cela le mande venir vers luy, & luy donne vne griefue reprimende, luy tenant ces propos: Hé quoy! (dict-il) ne vous iussit-il pas qu'on vous permette de demeurer en mes terres, & d'auoir soing de vos Portugais, sans que vous infectiez du venin de vostre faulxe doctrine mes Moynes, & attiriez apres vous tout mon peuple? Estes-vous venu en mon Royaume pour y esmouuoit des seditions, & innouer les loix & coustumes de la religion, qui ont esté si long temps obseruées? Or ie vous deffends de conuerfer d'ores-en-auant avec autres qu'avec vos Portugais. Que si vous faites autrement, ie vous chassieray comme vous meritez. Le Patriarche entendant ces parolles, luy respond avec grande liberté, qu'il ne faisoit sinon ce qui estoit de son deuoir, & qu'il ne lairoit point d'enseigner la vraye foy à ceux qui voudroyent estre instruits en icelle, bien qu'il y allast de sa propre vie. Le Roy fust tellemēt indigné de ceste responce, qu'il sembloit estre forcené de rage, & desbagoulant contre luy vne infinité d'injuries, luy disoit entr'autres choses qu'il estoit vn seducteur, venu là pour deceuoir son peuple, avec des fourbes qu'il luy contoit, ne scachant que c'estoit de la vraye foy & religion. Brief il en vint iusqu'à là, ainsi qu'a depose vn des tesmoins, qu'il luy mist les mains dessus, & luy deschira la robbe: mais les grands Seigneurs qui estoient aupres retindrent le Roy, & luy remonstre- rent, qu'il n'estoit pas bien seant à sa Majesté de traicter de la sorte vn Prestre forain & estranger: ce qui fust cause qu'il le lascha. Mais il l'enuoya en exil avec le P. François Lopez, en des hautes montaignes si aspres & si steriles, qu'à peines trouue l'on personne qui y vueille habiter, ou les cultiuer: neantmoins il les enuoye là, leur deffendant d'en bouger sur peine de la vie. Et afin de les attrister dauantage, il leur fait oster le calice qu'ils auoyent pour dire la S. Messe, ne voulant leur laisser l'usage d'vn si diuin Sacrement, pour les priuer encore de ceste consolation. Le Patriarche & son compagnon endurent beaucoup en ce bannissement, non seulement de faim, de soif, de froid, & de chaud: mais aussi

*Est per-
sulté du
Roy pour
cette
cause.*

*Est en-
uoyé en
exil.*

de plusieurs autres incommoditez & mesaises : car ils auoyent manque presque de tout ce qui est necessaire pour la vie humaine, & outre ce estoient en grand danger d'estre tuez, & massaczés par les voleurs, qui auoyent là leur retraicte. Leur demeure estoit vne pauvre logette de pasteurs, ou ils se retiroyēt de nuict, & les dures pierres leur seruoient d'oreiller & de materas pour coucher. En tel estat furent-ils sept ou huit mois, pendant lesquels vne grande Dame parente du Roy, à laquelle appartenoit ^{vne grã de Dame parente du Roy} ce pays, ou ils estoient, les vint visiter vne fois, & entrant dans leur cahutte, luy sembla voir vne grande lumiere, comme si c'eust esté du Soleil ou de la Lune : dont elle fust tellement effrayée, qu'elle s'en retourna sans leur dire mot, ayant neantmoins conçu en son esprit vne si grande opinion de leur vertu, & sainteté, que par apres elle feit tres-grãde instance au Roy, afin qu'il leur fust permis de sortir de là, & de se retirer en quelque lieu habité. Ce que le Roy leur octroya : mais il deffendit tres-expressement aux habitans des lieux ou ils alloient, de les pouruoir de viures : tellement qu'ils estoient contraints se nourrir d'herbes de racines, & autres choses, qu'ils trouuoient par les champs, comme les bestes brutes.

Vn autre tesmoin qui fust present lors que le Roy les bannist, & les accōpagna tousiours, a adiousté à ce que dessus, que quand le Roy appella à soy le Patriarche, tout le monde pensoit qu'il le vouloit faire tuer, & qu'apres l'auoir appellé trahistre & seducteur, luy deffendant d'enseigner plus sa doctrine à ses vassaux, sur peine qu'il luy feroit trancher la teste; le Patriarche ayant respondu qu'il ne desisteroit point encore que sa Majesté le feit massacrer, ou exposer aux Lions, pour monstrier qu'il estoit prest & appareillé d'endurer la mort sur l'heure mesme, il quitte son manteau, demeurant avec son seul roquet, & leuant les mains & les yeux au ciel, feit offrande à Dieu de sa vie; mais le Roy estant tout en cholere luy dict : Tu voudrois bien maintenant mourir martyr par mes mains, mais oste toy de deuant moy : & lors il l'enuoya en exil. Or apres que le Patriarche & son compagnon furent condamnez à estre bannis, le Roy feit prendre tous ceux, qui s'estoyent reduicts à la foy Catholique, & les ayant repris fort aigrement, les menaça de les faire mourir s'ils ne retournoyent à leur ancienne croyance. Quelques vns d'iceux se monstrierent fort constans, & protesterent qu'ils espandroyent plu-

estoit leur sang, que de reprendre leurs erreurs: dont le Roy fust si
 fâché, qu'il commanda qu'on les exposast aux Lions en sa pre-
 sence mesme: car il en auoit quatre ou cinq tous prests, & appa-
 reillez à cela. Ce qui fust incontinent fait: mais il pleust à Dieu
 renouueller icy les miracles qui estoient aduenus jadis en la pri-
 mitiue Eglise es anciens Martyrs. Car les Lions bien que farou-
 ches, ne leur firent aucun dommage, ains demurerent coys sans
 oser agresser ces valeureux champions de nostre Seigneur. Ce
 qui fit estonner merueilleusement le Roy, & tous ceux qui assi-
 sterent à cest spectacle. Ainsi l'a depose vn tefmoin qui a dit &
 iuré auoir esté present à tout ce que dessus. Le Roy voyant cela
 ne les voulust pas faire mourir, mais il les enuoya en exil avec le
 Patriarche & le P. François Lopez. Or comme ces glorieux
 Confesseurs de IESVS-CHRIST, s'en alloient tous ensemble au
 lieu destiné pour leur exil, fort ioyeux & contens, apres auoir
 fait vne partie du chemin, ils vont tomber en vne telle disette
 de viures, qu'ils furent plusieurs iours sans rien manger: de façon
 qu'il y en auoit qui venoyent à defaillir de pure foiblesse. Se voy-
 ans en telle necessité ils s'assirent sur l'orée d'un grand fleuve a-
 uec leur bon Pasteur, lequel representant à Dieu l'affliction de
 son petit troupeau, le prie humblement de vouloir remedier à
 icelle. Son oraison ne fust pas de moindre efficace deuant Dieu,
 que celle de S. Gregoire surnommé le Thaumaturge, c'est à dire,
 faiseur de miracles: lequel par sa priere feit seicher vn grand Lac,
 qui estoit cause de discorde entre deux freres. Car icy de mesme
 sorte pour secourir à la disette de ses seruiteurs, nostre Seigneur à
 la requeste du Patriarche feit seicher ce grand fleuve, tellement
 qu'au milieu de son liêt resterent force poissons, par le moyen
 desquels non seulement ils remedierent à la necessité presente,
 en mangeant autant qu'ils en voulurent, mais encore en charge-
 rent de reste quelques mulets qu'ils menoyent, rendans graces à
 Dieu, pour vn tant signalé benefice. Le fleuve estant retourné
 par apres à reprendre son cours accoustumé, eux aussi continuēt
 leur chemin avec grande liesse, & confiance en Dieu, esperans
 qu'il ne lairroit point de les assister en leur exil. Ce qui les ayda
 beaucoup à supporter patiemment les incommoditez d'iceluy,
 iusques à ce qu'ils en furent rappelés qui fut 7. ou 8. mois apres.
 A ce miracle se trouua present celuy-là mesme qui en a donné
 tesmoignage, lequel estant seruiteur du Roy auoit charge de les
 conduire

*Sont en-
 uoyez en
 exil.*

*Grande
 merueil-
 le.*

*Vn fleu-
 ue seche
 & puis
 retourne
 à son liêt.*

conduire au lieu destiné à leur exil.

Vn'autre fois le Roy feit venir deuant soy le Patriarche, & apres luy auoir dit des injures atroces, il le menace de luy tran-
 cher la teste, s'il continuoit de prescher à ses vassaux la doctrine *Autre*
 qu'il enseignoit. Mais le Patriarche, qui ne desiroit rien tant que *persecu-*
 d'estre mis à mort pour ceste cause, croisant les bras deuant l'es- *tion du*
 tomach, baissa la teste, pour donner à entendre, qu'il estoit tout *Patriar-*
 prest & appareillé pour receuoir la mort: tellement que le Roy *che.*
 forcené de cholere, mit la main à l'espée, & leuât en haut le bras *Fureur*
 pour luy descharger le coup, auant que l'abbaisser, l'espée luy *du Roy.*
 tombe des mains; dont le Roy & tous les assistans (du nombre
 desquels estoit celuy qui a depose cecy) furent fort estonnez.
 La Roynne qui estoit presente voyant cela, se leue soudain de son
 siege, & s'en va embrasser le Patriarche pour le garantir de la fu-
 rie du Roy: auquel elle remonstra modestement, qu'il n'estoit
 point seant à sa Majesté, d'vser ainsi de force & de violence con-
 tre vn tel personnage. Mais le Roy ne deuint pas plus humain
 pour cela, ains commanda au Patriarche de se retirer prompte-
 ment de deuant luy, & en secret il commanda qu'on le tuaist. Ce *Commā-*
 qui eust esté executé, si quelques Gentils-hommes Abyssins & *de qu'on*
 Schisminatiques ne l'eussent empesché. Car côm' ils auoient gran- *tué le*
 de opinion de sa sainteté, ils luy prestoient secrettement tout *Patriar-*
 ayde & faueur, & mesme quand le Roy le traictoit plus mal, c'e- *che se-*
 stoit lors qu'ils luy faisoient plus de bien, luy donnans de grosses *crette-*
 aumosnes pour remedier à ses necessitez. Il aduint aussi vn'autre *ment.*
 fois que le Roy apres l'auoir griefuement repris, parce qu'il auoit
 reduit à l'Eglise quelques vns de ses gens, il luy fit commande- *Enuoye*
 ment de vuyder le Royaume, & sortir hors de ses terres, en ame- *de rechef*
 nant quant & soy tous les Portugais, mais il voulust qu'ils laissas- *en exil*
 sent là leurs femmes & enfans, pour estre ses esclauces. Ce qu'ils *le Pa-*
 feirent tout aussi tost, & s'en allerent bien loing de là en exil, ou *triarche*
 ils endurerent de grandes miseres & pauuretez. Mais depuis ayās *& les*
 esté rappelez, le Patriarche avec le P. François López, s'en allè- *Portu-*
 rēt trouuer le Roy qui estoit lors avec son camp, faisant la guerre *gais.*
 contre vn sien Lieutenant ou Gouverneur d'une Prouince, qui
 s'estoit reuolté contre luy. Estans arriues à l'armée, ils y trouue- *Joyeux*
 rent tous les autres Peres, qui auoient aussi esté dispersez en *rencon-*
 diuers endroits. Dont ils receurent tous vne si grande consolati- *tre.*
 on, qu'il leur estoit aduis d'estre desia en la compagnie des bien-

*change-
mēt ino-
piné.*

heureux en Paradis. Mais cōm' ils discouroient par ensemble des miseres & calamitez, qu'ils auoient enduré en leur exil, voicy que l'ennemy suruint à l'impourueu, & mit en route le camp du Roy, tellement qu'ils furent de nouveau escartez ça & là : mais le Patriarche demeura coy au milieu du camp avec le P. Frâçois Lopez, & vn homme qui souloit accompagner les autres Peres, lesquels s'en estoient fuyz. Adonc le Patriarche avec le P. Lopez & cest autre homme se metrent à prier Dieu, tāt pour eux mesmes, que pour leurs compagnons. Et biē qu'ils fussent au milieu d'vne rase campagne au descouuert, & sans aucune deffence, que celle de nostre Seigneur, si est-ce que les ennemis qui couroient ça & là, tuant & massacrant tous ceux qu'ils rencontroient, ne vindrent iamais à eux, encore qu'ils s'en approcherent à soixante pas, ou enuiron. Dont cest homme, qui estoit avec eux & a desposé tout cecy, fut grandement esmerueillé, estimant que Dieu par les prieres du Patriarche, auoit tellement esblouy les yeux des ennemis, qu'ils ne sceurent les veoir. Mais apres qu'ils eurent esté long temps en oraison, & que les ennemis se furent retirez, le Patriarche s'adressant au P. Lopez ; Dieu soit loué (dit-il) nos Peres sont encor en vie, combiē qu'entre les mains des ennemis ; mais ce ne sera rien, prions Dieu seulement pour eux, & le mesme (dit-il) derechef à cest homme. Or il aduint tout ainsi que le Patriarche l'auoit dit : car les autres Peres furent pris des Turcs, despouillez de leurs habits, & fort mal traictez : mais en fin ils furent deliurez par le moyen d'un Capitaine Chrestien, qui tenoit le party des ennemis, lequel demanda ces Peres au Baxa, General de l'armée Turquesque, & les obtint aisément. De façon que les ayāt en son pouuoir, il les en laissa aller libres. Mais le Patriarche apres auoir prié Dieu pour les Peres qui estoient lors captifs, monta sur vne mule pour aller trouuer les Portugais, qui tenoient le party du Roy : & en marchant il va rencontrer vn soldat Abyssin du costé des ennemis, qui luy print sa mule, & l'en emmena. Le Patriarche sans faire estat de ceste perte, continue son chemin à pied, rendant graces à Dieu de ce qu'il le faisoit participant de sa Croix. Or comme celuy qui les accompagnoit sembla estre fasché de cela, le Patriarche luy dir, Laissez, laissez, mon fils, tout cecy n'est rien. Arriué qu'il fut au lieu, ou les Portugais s'estoient retirez ; vn peu de temps apres, les Peres qui auoient esté captifs, vindrent la mesme, estans deliurez des mains

*Danger
euidant
miracu-
leusemēt
eschap-
pé.*

*Les Pe-
res sont
pris des
Turcs &
deliurez*

*Vn sol-
dat préd
la mule
du Pa-
triarche.*

des Turcs, par le moyen de ce Capitaine Chrestien, duquel a esté parlé. Dieu sçait quel contentement ils receurent de se trouuer tous ensemble derechef. Ils se racontotent les vns aux autres les miseres qu'ils auoient enduré, avec vne extreme ioye & consolation. Là dessus voicy le soldat Abyssin, qui en auoit emmené la mule du Patriarche, s'en venir à grande haste, pour la luy rendre. La cause fut (à ce qu'on entendit de luy mesme) parce que soudain qu'il entra dans sa maison avec ceste mule, sa femme & deux enfans qu'il auoit luy moururent, & recognoissant par là que Dieu luy enuoyoit ceste punition, pour auoir fait ce tort au Patriarche, il s'en vint tout esperdu de crainte luy rēdre sa mule; & se jettant à ses pieds luy demāde humblement pardō, & le requist de vouloir prier Dieu pour luy, afin qu'il ne le punit pas de mesme peine. Le Patriarche luy dit pour lors, avec grande charité; N'ayez pas peur de cela, mon fils: & l'ayāt consolē de sa perte l'en renuoye fort edifiē. Depuis ce soldat fut tousiours grand amy du Patriarche, & luy apportoit quelque petit present, quād il le venoit visiter par honneur, comme il faisoit souuent. Mais puis que nous sommes sur ce propos, ie raconteray vn autre fait quāsi semblable à cestuy-cy. Il aduint donc vne fois que le Roy ayant fait prendre le Patriarche, celui qui le meina prisonnier luy demanda quelque salaire pour sa peine, le Patriarche n'ayāt rien autre que son surplis avec l'estole, & ne luy voulant donner cela, par ce qu'il en auoit besoing pour exercer les fonctions de sa charge, l'autre les luy rauit par force. Ce que le Patriarche supporta patiemment, & sans monstrier autre signe de fāscherie, sinon que lēuant les yeux au ciel il dit ces parolles: Ha Seigneur! ha Seigneur! Mais peu apres ce larron s'estant retirē pour aller en quelque part, comme il eust fait vn quart de lieuē de chemin, il s'en retourne vers le Patriarche en grande haste, & luy rend le surplis avec l'estole, sans luy dire mot: tellement qu'on ne peut sçauoir qui l'auoit induit à ce faire. Car soudain il rebrousse chemin avec pareille viftesse qu'il estoit venu, & depuis on ne l'a iamais plus veu, jāsōit que ses parens & amis l'ayent fort cherché, & qu'il y a desia plus de quarante ans passēz de cela.

Au reste l'opinion que les naturels de ce païs, mesmes les heretiques, auoient de la sainctetē du Patriarche, estoit si grande, qu'ils le parangonnoient à ces anciens Peres du desert: & entre autres l'oncle du Roy disoit, que non seulement luy, mais aussi

La luy rend apres auoir esté puny de Dieu.

Deuient son grād amy.

Vn autre luy prend le surplis & l'estole.

Les luy rend, on ne sçait pourquoy.

L'opiniō grande que les heretiques mes-

*mes a-
uoit du
Patriar-
che.*

plusieurs autres de sa Religion embrasseroient la foy qu'il prêchoit, s'ils ne craignoient que le Roy les fit mourir. Les Moy-
nes aussi en faisoient tres-grand cas; vn entre autres, qui auoit
grand credit parmy les Abyssins. Car les Turcs ayans assiegé vne
place, dans laquelle estoit le Patriarche, il enuoya dire aux habi-
tans de ce lieu par vn Portugais, qu'ils n'eussent aucune crainte
des forces des Turcs, & qu'ils se prinsent seulement garde que le
Patriarche ne sortist de là. Car il n'y auoit aucune occasion de
craindre au lieu ou vn si saint personnage seroit. Et de fait, il
n'arriua aucun mal à ce lieu, ou il estoit.

*Libera-
lité d'un
Gentil-
homme
Abyssin.*

Vne fois comm' il estoit en necessité, ayant tout distribué aux
pauures, vn certain Moyne qui auoit grand pouuoir aupres du
Roy, s'en alla trouuer vn Gentil-homme Abyssin, & luy dict; Ce
Pere-cy est veritablemēt vn saint homme, & i'estime que Dieu
par les prieres d'iceluy conserue ce païs. Assistez-le donc, & se-
courez-le en ses necessitez, & mesme à present qu'il est en diset-
te. Le Gentil-homme obeysant au conseil du Moyne, luy en-
uoya tout incontint plusieurs bœufs, & vaches, avec beaucoup
de drap, dont le Patriarche pourueut, tant à sa necessité, qu'à cel-
le des pauures. Et depuis ce mesme Gentil-homme luy enuoyoit
souuent plusieurs grands presens, ne luy demandant pour toute
recompense, ou comme il disoit, par aumosne, que ses oraisons
& prieres. Mais quand il sceust que le Patriarche estoit passé de
ce monde à l'autre, se mettant les mains deuant la face; Le Pa-
triarche (dit-il) est mort, c'est fait de nous: car sans luy, qu'est-ce
de nous? Voulant dire par là, que c'estoit luy, qui conseruoit par
ses prieres tout ce païs.

*Songe
lieu-
teux.*

Il y a vn tesmoing qui a depose de foy-mesme, qu'estant en-
cor heretique, & demeurant loing du Patriarche quelques tren-
te cinq iournées de chemin, il luy fut aduis vne nuit en dormant,
qu'il voyoit le Patriarche avec vn autre Pere, & qu'il receuoit
d'eux à boire dans vn Calice. Le lendemain se souuenant de son
songe, il le raconte à ses amys. Or il aduint deux ans apres, que
s'estant transporté pour trafiquer au lieu ou le Patriarche residoit
avec l'autre Pere, qu'il auoit veu en songe, nommé le P. Melchior
Fernandez, & les rencontrant vn iour tous deux en chemin, il
recogneut aussi tost, que c'estoient ceux, qu'il auoit veus en dor-
mant: tellement qu'il les alla trouuer, & leur raconte tout ce
qu'a esté dit, les priant de le vouloir instruire en la foy Catholi-

que. Ce qu'ils firent, & le reconcilierent à l'Eglise, si bien que depuis ce temps-là il s'est tousiours monstré bon Catholique.

*Delivré
ce mira-
culeux.*

Ce mesme tesmoin a dict encore de soy, qu'estant vne fois prisonnier des Turcs, comm'ils le pressoyent pour luy faire renier la foy, il enuoye au Patriarche son bonnet de nuit, luy faisant entendre par le porteur d'iceluy, que c'estoit pour le supplier de vouloir prier Dieu pour luy, à celle fin qu'il peust estre delivré de captiuité, parce que les Turcs luy vouloient faire renier sa foy: mais qu'il esperoit sortir de prison, s'il plaisoit au Patriarche de prier Dieu pour sa delivrance. Comm' il aduint aussi, mais d'une façon fort merueilleuse: car ce marchant s'en estant fuy de nuit, se mit à la nage pour trauerser vn bras de mer assés large, bien qu'il n'eust iamais appris à nager: toutesfois appuyé sur l'esperance qu'il auoit en Dieu & aux oraisons du Patriarche, il s'hazarda à le passer, & se sauua de ceste sorte: puis s'é alla trouuer le Patriarche pour le remercier d'un si grand benefice, qu'il estimoit auoir receu par son intercession & priere.

*Trespas
du Pa-
triarche*

Ce saint personnage passa de ceste vie à l'immortelle, au mois de Septembre de l'année 1579. sa mort ayant esté causée d'une grieve douleur de pierre, de laquelle il souloit estre fort vexé, combien qu'il enduroit ces maux avec tres-grande patience: tellement qu'une fois quelques vns de ses amis l'estans venus voir, lors qu'il en estoit fort affligé, entendans les plaintes & les cris, que ces picquantes douleurs luy tiroient, comme par force, esmeus de compassion; Il vaudroit mieux (dirent-ils entre eux) d'estre hors de ce mode, que de viure en telles angoisses. Mais le Patriarche entendant cela, & sçachant cōbien valent les afflictions de ceste vie pour acquerir l'eternelle, quand on les endure patiemment, leur repart ainsi: Ne dictes pas cela (mes amis) car si ie puis faire icy quelque seruice à N.S. ie seray content de viure encore plus long temps, endurant ces douleurs, & encore de plus grandes. Or depuis son trespas l'on a conceu encore plus grande opinion de sa sainteté que iamais: tellement que les Abyssins debans faire quelque serment de grande consequence, ils s'en vont iurer sur son tombeau, comme en plusieurs lieux de l'Europe sur le bras de S. Antoine. Ils portent aussi bien souuent sur son sepulchre de l'encens, du bled, & plusieurs autres choses, desquelles ils luy font offrande, & se recommandent à ses prieres, le tenans pour vn saint de Paradis. Les benefices aussi qu'ils reçoient de

Gueri- sons mi- raculeu- ses fai- tes avec la pou- siere pri- se du se- pulchre du Pa- triarche. Dieu, selon qu'ils croyent, par son intercession, les confirme d'auantage en ceste foy. Car plusieurs guerisons miraculeuses ont esté faictes avec de la poussiere, qu'on prind de son tombeau. Entre autres il y eut vne grâde Dame de la race mesme du Roy, laquelle estant griefuement malade, se fit apporter vn peu de la poussiere de son sepulchre, & l'ayant beuë avec de l'eau, soudain elle fust remise en santé. Dauantage vne ieune fille, qui auoit quelque blessure au pied, dont elle n'auoit peu estre guerie, par l'industrie des Chirurgiens apres beaucoup de tourmens, qu'ils

luy auoyent faict endurer, si tost qu'elle eust pris vn peu de la poussiere du tombeau du Patriarche, & l'eut appliquée sur son mal, elle fust incontinent guerie. Brief plusieurs autres malades ont esté remis en santé, & deliurez de leurs maux par ce mesme remede. Entre autres, plusieurs femmes qui estoient en trauail d'enfant, & en grand danger de mourir pour les douleurs extremes qu'elles enduroient, se recommandans aux prieres du S. Patriarche, ou beuans de l'eau meslée avec de la poussiere de son tombeau estoient deliurées heureusement.

Femmes deli- urées du trauail d'enfant par ce mesme remede. Vn tesmoin a depose de foy mesme qu'ayant esté griefuement blessé en vn costé, & ne pouuant estre guery par aucun remede qu'il s'y appliquast (car il estoit Chirurgien) il luy sembla vne nuit ouyr en dormant vne voix qui luy dict: A quel propos tant de medecines si exquises, & si recherchées pour ta playe? Va t'en, va t'en, au tombeau du S. Pere Patriarche, & tu seras incontinent

guery. Le lendemain apres ce songe, il s'en va prendre de la poussiere de son sepulchre, & la mit sur la playe avec grande foy & deuotion, & au mesme instant il fust du tout guery.

Playe guerrie miraculeusement. Le mesme tesmoin a depose encore de foy mesme qu'apres le trespas du Patriarche, allant trouter le Roy qui l'auoit mandé venir, il tomba entre les mains des Turcs, qui le menerent en vne forteresse, ou ils luy mirerent les fers aux pieds, & auoyent delibéré de l'empaler le lendemain. Luy sçachant cela, comme il auoit grande horreur d'vn tel genre de mort, se recommande aux prieres du saint Patriarche, le suppliant de le vouloir deliurer du danger auquel il estoit. Ceste nuit mesme le Patriarche s'apparust à luy les portes & fenestres de la prison estant closes, & le prenant par la main le leue de terre, & luy dict ces parolles: Baylu George (c'estoit le nom du prisonnier) n'ayes point de crainte: car tu ne mourras pas maintenant: & ayant dict cela, soudain il

disparust. L'autre fust tellement encouragé par ceste vision, qu'il luy estoit aduis que desia il estoit hors de prison. Et de faict il aduint que le lendemain les Turcs le renuoyerent libre, sans luy faire aucun mal. Outre ce il dict, qu'estant vne fois allé auant le iour à l'Eglise, ou le corps du Patriarche reposoit, pour prier Dieu, ainsi qu'il s'approchoit de l'Eglise, il va appercevoir dedans vne grande lumiere, dont il fust tellement effrayé, *visions de lumiere.* qu'il s'en retourne vistement à sa maison. Vne autre fois étant entré dans la mesme Eglise auant Soleil leué, il y va voir (ce luy sembloit) vn cierge ardēt: & parce qu'il ne voyoit personne dans l'Eglise, il le voulut aller esteindre: mais ceste lumiere s'esuanouïist incontinent de deuant luy, dont il fust grandement estonné: estimant neantmoins que toutes ces choses estoient autant de marques de la lumiere de gloire, de laquelle l'ame dudit Patriarche estoit ioiuyssante en Paradis. Telles & plusieurs autres merueilles raconte-on de ce grand seruiteur de Dieu, par lesquelles il semble, que nostre Seigneur a voulu declarer sa sainteté, & estre glorifié, en iceluy. Mais disons à present quelque chose des autres Peres.

*Des Peres qui accompagnerent le Patriarche en Ethiopie,
& de ce qu'ils y ont faict & enduré iusques
au trespas.*

CHAPITRE XIX.

Les Peres de la Compagnie de Iesvs, qui allerent en Ethiopie avec l'Euesque de Hierapolis, André d'Ouiedo, qui fust depuis Patriarche d'Ethiopie, furent cinq, c'est à sçauoir le P. Antoine Fernandez, le P. Gonzale Cardoso, le P. Gualdanes, le P. Emmanuel Fernandez, & le P. François Lopez: desquels ils nous faut parler briuevement.

Le P. Antoine Fernandez (suiuant les mesmes informations) estoit si charitable enuers les pauures & malades, que pour les secourir en leurs necessitez, tant spirituelles que corporelles, il ne cessoit quelque fois de trauailler iour & nuict. C'estoit aussi vn homme doié de grande prudence, ioincte neantmoins avec vne sainte simplicité.

*P. Antoine
Fernandez
ses vertus.*

pliqua à l'estude de la lāgue du païs, avec vn tel soing & diligence, que dans cinq mois il en eut vne si parfaite cognoissance, qu'il se mit deslors à traduire en leur langue tout ce, qui concernoit nostre foy, & qu'il iugeoit pouuoir seruir, tant pour l'instruction des Catholiques, que pour la reduction des erraus. Mais si sa vie fut exemplaire, sa mort ne fut pas moins glorieuse. Car estant enuoyé par son Superieur à l'Isle de Mazua, qui est en la mer rouge, *Est mas-* il rencontra en chemin vne troupe de Turcs, lesquels poulsiez *sacré des* de ceste hayne mortelle, qu'ils portent aux Chrestiens, se ruèrent *Turcs.* incontinent sur luy, & sur vn autre Portugais, qui l'accōpagnoit, de sorte qu'ils furent tous deux là massācrez à coups de jaelines.

Pour le regard du P. Emmanuel Fernandez, il estoit si embrasé de l'amour de Dieu & de son prochain, qu'il ne se lassoit iamais à procurer le bien & salut des ames, lesquelles il alloit chercher quelquesfois bien loing, entreprenant des longs & fascheux voyages, pour leur administrer les Sacremens. Il ne fuyoit aucun trauail pour ceste occasion, fut ce de iour ou de nuict, ains se presentoit à tout, avec vne telle ioye, & allegresse, qu'avec son seul regard il consoloit les personnes affligées. Nostre Seigneur luy auoit entre autres graces communiqué le don de prophetie. Car il predict beaucoup de choses auant qu'elles n'aduinsent, mesmes celles qui s'ensuyuent. Comme il y eut vn certain Moyne heretique de grand credit aupres du Roy, qui auoit desia persuadé à sa Majesté de faire mourir tous les Abyssins, qui s'estoient reduits à la foy Catholique, celuy qui a tesmoigné ce que nous racontons, estant en grād esmoy à ceste occasion, parce qu'il estoit du nombre de ceux-là, le P. Emmanuel Fernandez luy dict, qu'il n'eust point de peur, car le Roy ne feroit aucun mal aux Catholiques; & que ce Moyne ne viueroit pas deux mois. L'vn & l'autre arriua tout de mesme, qu'il l'auoit dit. Outre ce, comm' il prennoit congé de cestui-cy, qui a depose ce que nous disons, voulant s'en retourner au logis, auquel le P. Patriarche estoit decedé, il luy dit, qu'il ne se contristast de son depart, d'autant que la fin de ses iours s'approchoit; & qu'il se retiroit là tout exprés pour estre enseuely aupres du Pere Patriarche. Ce qui aduint tout de mesme. Car peu de iours apres son arriuée il mourut, & fut enseuely aupres du Patriarche. Vn autre Catholique a tesmoigné aussi de foy naefme, qu'estant allé visiter ledit Pere en sa maladie,

P. Emmanuel Fernandez.

A le dō de prophetie.

Predit sa mort.

& luy demandât, quand estoit le iour de Noel, il luy respond, que c'estoit le Dimanche prochain: Or c'est ce iour là, dit le Pere, que j'attends. Lequel estant venu, il fit appeller tous les Catholiques, qui estoient en ce lieu là, pour entēdre la Messe, laquelle il ouyst aussi : & apres icelle les enuoya disner, les priant de retourner soudain apres à l'Eglise. Ce qu'ils firent, mais au retour ils trouuerent, qu'il estoit decedé. Vn peu auāt que rendre l'esprit, il pria le P. François Lopez, qui luy assistoit, de faire le signe de la Croix vers vn coing de la chambre, qu'il luy monstra avec le doigt: puis s'estant tourné de l'autre costé, il se met à crier, ô sainte Dame, ô sainte Dame, & tost apres s'adressant au P. François Lopez; l'ay veu, dit-il, tout à ceste heure, la Vierge Marie nostre Dame, qui estoit si belle & si gracieuse, que sa seule veuë & presence m'a merueilleusement consolé. En disant cela il rend l'ame, qui fut enleuée au Ciel (comm' il est croyable) en compagnie de ceste Mere de misericorde, qui l'auoit visité à la mesme heure.

*Est visité
de nostre
Dame
auāt sa
mort.*

*Le Pere
François
Lopez
meurt le
dernier.*

*Son ab-
stinence.*

*Sa cha-
rité &
libera-
lité en-
uers les
pauvres.*

Le dernier de tous les Compagnons du Patriarche, qui moururent en Æthiopie, fut le P. François Lopez, lequel deceda au mois de May de l'an 1597. Il estoit apres le Patriarche tenu & estimé pour le plus saint de tous, selon que l'escriuirent les Portugais, qui estoient là, & les tesmoings le deposerēt ez informations. Il auoit aussi tousiours tenu compagnie au P. Patriarche en ses afflictions & trauaux : car il fut enuoyé en exil avec luy, & se trouua present lors que le fleuve s'asseicha, comme aussi lors que le camp de l'Empereur fut mis en route. Il viuoit d'ordinaire fort pauurement ; & outre ce affligeoit son corps, avec beaucoup de penitēces & austeritez : de sorte qu'il estoit venu si maigre, qu'il n'auoit que la peau & les os, comme l'on dit. Il gardoit vne abstinence si roide, qu'il fallut que le Superieur luy commandast de prendre sa refection necessaire : & auoit accoustumé de dire que ceste vie ne nous estoit donnée que pour trauailler & faire penitence. Apres que tous les autres Peres furent decedés, luy seul estant resté, il fut contraint de porter la charge que tous les autres ensemble souloient porter. Il estoit fort liberal enuers les pauvres, & eschars enuers soy-mesme: car incontinent qu'on luy auoit donné quelque chose, il la leur distribuoit, ne s'en reseruant que bien peu, & rien du tout bien souuent : voire quelquesfois il leur departoit les meubles de la maison. Vn Catholique voyant la pauvreté, en laquelle il viuoit, eust compassion

de luy : & luy enuoya vn materas pour coucher:mais il le donna incontinent aux pauures,aymant mieux dormir sur la dure, que permettre que les pauures y dormissent. Vn pauure luy estant venu demander l'aumosne,comme il n'auoit rien que luy dōner, il coupe vne piece de la sottane qu'il portoit, & la luy donne. Vne autre fois ayant trouué vne pauure fēme morte,qui n'auoit rien pour estre enucloppée, il s'en alla despoiller sa chemise, qu'il portoit sur son corps, & l'acommode avec icelle le mieux qu'il peut,pour estre plus honnestement enterrée. Quant à son manteau, qui estoit desia tout vsc, il l'auoit aussi long temps auparavant donné aux pauures. Or quand il luy falloit voyager en temps d'hyuer,pour aller ayder les Catholiques & pauures gens en leurs necessités spirituelles ou temporelles, il se couuroit d'une peau d'animal, parce qu'il n'auoit rien plus, pour se garantir des pluyes,& du froid.Brief comme sa charité enuers les pauures *sa pau-* estoit si grande,qu'il ne pouuoit garder ny retenir chose aucune, *ureté.* qu'il ne leur donast, il vint sur la fin de ses iours à mourir en telle pauureté, qu'il ne luy estoit pas mesmes resté vn linge ou suaire pour enuclopper son corps apres sa mort. Voire en toute sa maisō ne fut trouuée autre chose,qu'une piece de cuyr vieux, & deschiré,sur lequel il dormoit,& ou il mourust.

Mais il ne se contentoit pas de secourir les pauures leur donnant ce peu qu'il auoit, ains encore se donnoit soy-mesme, leur seruant en leurs maladies,avec grāde charité,comm' il fit à quelques personnes, lesquelles estant atteintes d'une maladie puante & contagieuse,auoient esté delaisées de tout le monde.Car luy voyāt cela s'en va les seruir l'espace de trois ou quatre mois,leur baillant à manger,ballayant la maison,& leur lauant les linges,& autres accoustrements,avec l'estonnement de tous, tant Catholiques qu'Heretiques: desquels il y en eut aucuns qui furent reduits à la foy par cest exemple de charité. Car les œuures esmeuent plus que les parolles.

Or il aduint vne fois que seruant à vn semblable malade plein de vers,puant,& horrible à veoir, les Galles, desquels a esté parlé cy deuant,arriuerent en ce pais là, ruynans tout le plat pais,& meurtrissans ce qu'ils trouuoient en vie. Le Pere voyant le danger,auquel estoit son malade,le charge sur ses espauls,& le porte en vne montagne fort haute,iusqu'à tant que les Galles se fussent retirez, le deliurant par ce moyen de la mort, qui luy estoit

quasi certaine: parce que ces meschans voleurs ne pardonnoient à perlonne. Voyla des exemples de sa charité: voyons maintenant quelques autres preuues de sa saincteté.

*Preuues
de sa
saincté.*

Vn des tesinoings a depose, qu'il auoit ouy dire souuent à son pere, que maintes fois il auoit veu le visage du P. François Lopez, lors qu'en disant la Messé il se tournoit vers le peuple, pour dire *Dominus vobiscum*, si resplādisant que le Soleil: & lors qu'il tournoit la face vers l'autel, il ne voyoit plus ceste lueur. Vn autre a assure l'auoir veu aussi quelquesfois disant la Messé, avec le visage si reluyfant, qu'a grand' peine ses yeux pouuoient supporter ceste lumiere, & qu'il luy estoit aduis que ses cheueux estoient comme de fil d'or: mais apres la Messé sa cheueleure retournoit à sa premiere blancheur: car il estoit desia tout chesnu. Pour telles & autres semblables choses, les habitans de ceste contrée auoient vne si grande opinion de sa saincteté, que quand il leur arriuoit quelque inconuenient ou defastre, ils s'adressoient à luy; afin qu'il priaist Dieu pour eux: & bien souuent ils en estoient deliurez. Comme il aduint vne fois qu'une grande multitude de vers ou chenilles, destruysoient & gastoient tous les grains de ce pais. Car les habitans s'en estans venus à luy, pour le prier de les vouloir secourir avec ses oraisons, il feit force eau beniste, & cōmanda aux Catholiques de la ietter sur les champs; ce qu'ayāt fait, Dieu voulut qu'ils fussent deliurez de ce fleau. Deux ans auant sa mort, il tomba en vne griefue maladie, dont les Catholiques craignoient fort qu'il mourut, & estoient en grand soucy. Car par sa mort ils se voyoient destituez de Pere, de Pasteur, de Prestre, & de tout humain secours, en leurs necessités spirituelles: tellement qu'ils alloient tous les iours à l'Eglise prier Dieu pour sa santé. Et il pleust à sa diuine bonté exaucer leurs prieres, & donner la guerison au Pere, apres laquelle il s'en va à l'Eglise, pour leur dire la Messé, ou il leur feit vne fort deuote exhortation: à laquelle ils se trouuerent presque tous presents, avec tres-grande consolation. Or entre autres choses il leur dict, que les iours de son pelerinage sur terre, estoient bien desia accomplis: mais qu'il auoit pleu à Dieu luy adioster encore deux ans de vie, esmeu par les prieres, qu'ils luy auoient fait à ceste intétion; dont il dict qu'il estoit bien content, afin de leur pouuoir faire seruice. Aussi ne suruesquist il apres cela, que deux ans, pendant lesquels il leur assista avec plus grande serueur, que iamais. Huiet

*Dieu luy
prolonge
ses iours
de deux
ans.*

iours avant sa mort, il dict à plusieurs Catholiques, qu'il deuoit *Predit*
passer de ce monde en l'autre dans vne sepmaine, les priant de *la venue*
ne se contrister pas pour son depart: car il les asseuroit qu'ils ne *de son*
seroyent pas plus d'un an sans Pasteur, & que nostre Seigneur *succes-*
auroit soing de les en pourvoir dans ce temps-là. Toutes ces *seur.*
choses aduindrent de mesme sorte qu'il les auoit prediâtes. Car
la sepmaine suiuite il alla receuoir en Paradis la recompense de
ses trauaux. Ce fut l'an 1597. au moys de May, & vn an apres
iustement arriua en Ethiopie, ce Prestre natif de la ville de Goa
nommé Melchior de Sylua. Iusques icy sont les informations
faictes en Ethiopie, & portées à Goa par le susdit Prestre, quâd il
s'en retourna à son pays, ainsi qu'a esté dict. Mais adioustons icy
vn mot du P. Melchior Carnero Euesque de Nice, lequel apres *Le Pere*
le decés du P. André d'Ouiedo succeda, selon l'ordonnance du *Mel-*
S. Pere au Patriarchat d'Ethiopie. Il auoit esté retenu à Goa avec *chior*
le P. Iean Nugnez, nommé en premier lieu au Patriarchat sus- *Carnero*
dit, ou il attendoit que les affaires d'Ethiopie prinsissent quelque *Euesque*
bon ply, pour y aller exercer sa charge: & cependant il demeu- *de Nice.*
roit au College de Goa, comme s'il eust esté vn simple Religieux,
s'accommodant en tout & par tout à la façon de viure des au-
tres. Il se plaisoit aussi à faire quelques courses selon la coustume
de la Compagnie, vers les Chrestiens de S. Thomas, qui demeu- *Est rete-*
rent és Royaumes de Cochin & de Coulan: mesmeiment vne *nu à Goa*
fois qu'il eust aduis qu'un faux Euesque Nestorien estoit venu *& l'autre*
là pour infecter du venin de sa meschante doctrine ces bons *qu'il y*
Chrestiens. Or estant là avec le P. Gonsale Rodrigues, il tasche de *menoit.*
le rencontrer pour le rembarrer & conuaincre: mais l'autre com-
me enfant de tenebres fuyoit de venir au iour. Comm'ils veirent *s'y rele.*
qu'ils ne le pouuoient trouuer en aucune part, ils feirent pour le
moins entendre au peuple ses ruses, de sorte que l'autre se retira
de la ville de Cochin, & s'en alla vers les montaignes, ou il y a
grand nombre de Chrestiens de S. Thomas; & là cōmençoit de
rechef à semer l'yraye de sa fausse doctrine, n'estant recogneu
pour ennemy de ces bons & simples Chrestiens, iusques à tant
que lesdits Peres sçachans ou il estoit. Et comin' il taschoit de
corrompre ces bonnes gens, par le poison de ses erreurs, ils s'en
vont aussi là pour l'attaquer: mais si tost qu'il les sentit venir, il
gaigne vistement au pied, & ne comparust oncques plus en ces
quartiers. Apres donc qu'ils eurent mis en suite ce chat-huant,

IESVS, leur faisant entendre en quel danger ils estoient de se voir bien tost sans Pasteur, qui leur conferast les Sacremens, & leur remonstroit ce qui estoit du deuoir d'un Chrestien. Partant ils requeroient instamment l'un & l'autre, que puis qu'ils auoyent esté iusqu'à lors maintenus en la foy Catholique, & receu les aydes spirituels, par le moyé des Peres de ladite Comp. qu'il leur pleust aussi continuer la mesme faueur enuers eux. Le Viceroy ayant communiqué de cet affaire avec les Peres de Goa, eux bien aises de poursuiure ceste entreprise, bien que fort penible & laborieuse, promirent de leur costé toute ayde & assistance ausdits Catholiques. Et pour cest effect le P. Prouincial noimma les Peres *Les Peres Antoine de Montferrat, & Pierre Paës: lesquels partirent de Goa le second de Feurier de l'an 1589. & prindrent la route de Diu, ou ils debuoyent s'embarquer dās vn autre nauire; pour entrer plus aisément en Ethiopie. Sur la fin de leur nauigation, estans bien près du port de Diu, ils furent assaillis d'une furieuse tourmente, qui dura toute la nuit avec vn si grand orage de vents, de pluye, & d'esclairs, qu'ils se tenoyent desia quasi pour perdus. Mais Dieu par son infinie bonté cōmanda aux vents, & à la tempeste, de façon que le tout fust accoisé auant Soleil leué, & ce mesme iour sur le tard ils entrerent dans la ville de Diu, ayant au prealable changé d'habit: afin de n'estre recogneus. Ils se vestirent à la mode des Armeniens, à cause que tel habit est le moins soupçonneux aux Turcs, qui gardent les haures, par lesquels il faut entrer en Ethiopie. A Diu ils se retirent chez vn Portugais qui auoit charge de leur trouuer commodité, pour s'embarquer delà à Suaquen, qui est vne ville située du costé de l'Ethiopie, dās le golfe Arabe. Le P. Pierre Paës sortoit quelque fois du logis pour negotier ce qui estoit de besoin pour leur voyage: & comme il estoit vestu à l'Armenienne, les petits enfans de la ville, qui hayssent à mort les Armeniens, luy ruoyēt tant de coups de pierres, qu'il ne s'en pouuoit bonnement garantir. Ils s'arrestèrent en ceste ville de Diu enuiron vn mois: parce que les Turcs, qui auoyēt promis de les mener en Ethiopie, se doubtās, peut estre, de ce qui estoit, ne voulurent point se charger d'eux. Tellemēt que les Peres se voyans descheus de leur esperance de ce costé, resolurent de prendre la route d'Ormuz, pour s'en aller de là tout droit à Bassora, ou ils pensoyent se ioinde à la Carauane, qui a accoustumé d'aller de Bassora à Alep enuiron le mois de Septembre.*

*Sont as-
saillie
d'une su-
viuise
épaisse.*

Arriuez donc qu'ils furēt à Ormuz, comm' ils estoient prests de partir de là, ils vont recevoir vne lettre du Capitaine de Mascate, qui est vn port de l'Arabie heureuse, là où ils estoient allés mouiller l'anchre, auant qu'arriuer à Ormuz, & auoyent fait entendre audict Capitaine, qui estoit Portugais, leur dessein de passer en Ethiopie. Cestuy-cy les aduisoit, qu'il auoit trouué en ce port de Mascate vn Pilote Turc, lequel promettoit de les mettre dans vn moys en Ethiopie, & selon le discours qu'il leur faisoit du chemin, par lequel il les deuoit conduire, la chose sembloit estre fort assurée. Receu qu'ils eurent cest aduis, ils rebroussent chemin vers Mascate, là où ils tomberent tous deux malades: mais nostre Seigneur leur rendit bien tost la santé, si bien qu'ils partirent de ce port la nuit de Noel, prenans la route d'Ethiopie, & nauigerent costoyans l'Arabie heureuse l'espace de huit iours fort heureusement. Mais le premier iour de l'an 1590. vne tempeste les attaqua bien plus furieuse & dangereuse que la premiere. Car le mast & le gouuernail de leur nauire se rompirent, & à grand' peine peurent-ils trainer le vaisseau à terre, s'aydant de quelques barques de pescheurs. Or d'autant que là ils ne trouuerent commodité aucune pour reparer leur mast, ils furent contraincts d'aller à vn autre port situé sur la mesme coste nommé Curia Muria, huit lieus plus auant vers l'Occident. Mais aussi peu de moyen trouuerent-ils là de radoubier leur vaisseau: tellement qu'ils furent contraincts de fretter vn seul nauire, qu'il y auoit en ce port. Et d'autant que ceux à qui il estoit ne le voulerent bailler qu'à condition, que leurs propres matelots le conduiroient, ils furent contraincts de laisser ceux, qui les auoyent menez iusqu'à là. Toutesfois se craignans qu'ils ne les descouurissent, ils prièrent le Patron, qui auoit entrepris de les mettre en vn mois dās l'Ethiopie, de faire deffence à ses matelots de partir de Curia Muria, que quelques iours apres eux, afin qu'ils eussent moyē de passer à la ville de Dofar, auant que les matelots y arriuaissent: le Patron leur feit bien ceste deffence, mais ils ne luy obeirent pas: car ayans trouué vn' autre commodité, comm' ils estoient accoustumez à voyager en ce pais là, ils arriuerent plustost à la ville de Dofar, que leur Patron & les Peres: tellement qu'ils donnerent aduis, qui ils estoient, & pourquoy ils venoyēt là. Auant donc qu'ils fussent arriuez au port de Dofar, deux vaisseaux de Sarrafins leur vindrent au deuant pour les prendre: car

ils

ils auoient esté encores auisés de leur venuë, par quelques autres Arabes, qui demeuroident à Mascate. Sonme qu'ils furent faictz prisonniers l'an 1590. & menés à la ville de Dofar, qui est sise sur le riuage de l'Arabie heureuse, du costé qu'elle est arroufée de l'Ocean, vn peu par deça Curia Murja. Ils les tindrent là cinq iours en prison, sans leur donner que fort peu à manger, & puis les enuoyerent à leur Roy, qui demeuroident en vne ville loing de là plus de vingt cinq iournées de chemin, lequel ils firent avec grãd trauail. Car ils marchoident à pied, suyans les chameaux, que leurs guides menoient : & bien souuent il leur falloit marcher pieds nuds parmy les ronces & les chardons. Or comme ils enduroient tant, & qu'on ne leur donnoit que fort peu à manger, les forces vindrent à leur manquer, de telle façon qu'ils ne pouuoient passer outre. Leurs guydes voyans cela, furent contraincts de les mettre sur les chameaux, avec la charge qu'ils portoiẽt. Ils voyagerent de ceste sorte l'espace de dix iours, parmy les deserts, sans trouuer aucune ville ny village. Ces Arabes qui les conduisoient, se gouuernoient de iour par le Soleil, & de nuict par les estoilles : leur boisson estoit de l'eau puante, puyfée de quelques petites fosses ou puis creusés, qu'ils trouuoient par le chemin, & s'arrestoient d'ordinaire sur le midy, pour donner à manger aux chameaux. Lors aussi ils amassoient force sautereaux, ou grillons, dont il y a grande foison en ce pais là ; & les ayans faict rostir, les mangeoient, cõme vne viande fort delicate. Mais bien que les captifs endurassent grande faim, si ne leur fust il iamais possible d'en manger. Car ils auoient fort à contre-cœur ceste viande, & falloit qu'ils se contentassent d'vne petite tourte de pain cuit sous la cendre, que les guydes leur dõnoient. Au bout de dix iours ils arriuerent à vne ville fort peuplée, qu'on appelle Tarin, de laquelle beaucoup de monde sortit tout exprès pour voir les prisonniers, se riant & gabbant d'eux, & leur faisant mille autres inciuilités & outrages, iusques à leur cracher au visage. Nos captifs ne sonnoient mot parmy ces vituperes, ains louoient Dieu, & se resiouyffoient en leur cœur, de ce qu'il les auoit trouués dignes d'endurer quelque chose pour son nom, estans plus marrys de l'auuglement de tant d'ames, qui estoient asseruies sous l'esclauage de Sathan, que de leur propre captiuité, ny des affronts qu'on leur faisoit. De Tarin ils continuerent leur voyage de la mesme sorte, & avec autant de peine qu'auparauant,

*Sous
faictz pri
sonniers
à Dofar
& de là
enuoyez
au Roy.*

*Les pau
ures
& misé
resqu'ils
endurẽt
en che
min.*

*Ils ar-
riuent à
Einan ou
le Roy se
tenoit.*

iufqu'à ce qu'ils arriuèrent à la ville de Einan, ou commandoit vn Roy Mahometain nommé Soldan Ama, duquel estoient vafaux ceux, qui menoient les prifonniers.

Le Roy eftant aduertý de leur arriuée commanda de les mettre dans vne petite chambrette, qui eftoit fur la muraille de la fortereffe, ou il fe tenoit: & le lendemain il leur fit rendre quelque partie des accouftremens qu'on leur auoit oſtez, afin qu'ils cōparuffent en fa prefence plus honneſtement: car iufques à lors ils n'auoient porté qu'vne ſimple chemiſe & des calçons de toile, ſans autre deffence quelconque, tant contre le froid & le ſerain de la nuit, que les chaleurs du iour, qui ſont extremes en ce païs là.

*Parlent
au Roy.*

Le lendemain donc de leur arriuée, ils furent menés à la Citadelle, ou ils trouuerēt le Roy bien accompagné de gens-d'armes, aſſis ſur vne fenestre couuerte d'vne piece de drap d'or. Ils luy baiſerent la main, comme font les captifs & eſclaves à leurs ſeigneurs & maîtres. Le Roy les feit aſſeoir ſur le paué, ſelon qu'ils ont de couſtume, puis leur demande qui ils eſtoient, d'ou ils venoient, & ce qu'ils alloient faire en Æthiopie. Les captifs luy reſpondirent ſelon qu'ils iugerent eſtre conuenable, pour ne ſe deſcourir point, & ne dire auſſi aucun menſonge. Finalement ils le ſupplierent de leur faire rendre quelques petits liures, qu'ils auoient apporté pour leur conſolation; entre leſquels eſtoient leurs Breuières. Le Roy ne leur reſpondit rien pour lors, mais les en renuoye à leur chambrette ou priſon; & quelques iours apres il leur fit rendre les liures, qu'ils auoient demandé, donnant charge à ſes gens d'auoir ſoing d'eux, & de leur bailler ce qui ſeroit neceſſaire pour leur entretien. Mais eux tout au contraire eurent ſoing de n'en faire rien: car ils ne leur donnoient qu'vn peu de pain, & iceluy ſi pauvre, qu'il eſtoit beſoing d'auoir bonne faim, pour le pouuoir manger. Ils les tindrent quatre mois dedans ceſte chambrette, leur faiſant endurer beaucoup de miſere & pauvreté. Or en ce meſme temps mourut vne fille du Roy, & pour

*Ses mal
traictes.*

*N'e fil-
le du Roy
meurt,
& ſes fu-
nerail-
les.*

faire ſes funeraillles, vn grand nombre de femmes Mahometaines ſ'aſſembla de diuers quartiers: leſquelles ayant la teſte couuerte de pouſſiere, faiſoient retentir l'air de pleurs & lamentations: tellement que le Roy ſ'ennuya en fin de ces crieries, & fit ietter hors du Palais ces femmes: leſquelles continuerent autres huit iours de faire le meſme en vn autre quartier de ville. Durant ce tēps-là

les Sarrafins firent beaucoup d'aumônes aux pauvres, & aux captifs aussi, auxquels pour faire feste ils donnerent vne piece de chameau cuitte dans l'eau sans sel, ny autre assaisonnement. Quelques iours apres vn Baxà de l'Empereur des Turcs, auquel ce Roy paye tribut, luy enuoya demander les deux captifs, qu'on luy auoit amené de Dofar. Et combien que ce Roy les baillast à regret: toutesfois il fut contrainct de les luy deliurer: car l'autre estoit plus puissant que luy, & l'en eut faict repêtir, s'il ne les luy eut enuoyés. Il sembloit que ce Roy leur portast assés bonne affection: car mesme quand ils s'en allerent de chés luy, appelant à soy vn de ceux qui les debuoit conduire, il luy dict qu'il eut soing de donner à manger & à boire à ces gens là: par ce, dit-il, qu'ils ne demâdent rien. Partis qu'ils furent de Eigan, ils marcherent l'espace de quinze iours, au bout desquels ils arriuerent à la ville de Cana, d'où le Gouverneur sortit pour les recevoir avec quelques gens à cheual, & les mena deuant soy iusques à la maison du Baxà, les tambours battans, comme si c'eussent esté prisonniers de guerre. Estans arriués deuant le Baxà, ils luy firent la reuerence: l'autre commence à leur parler fierement, & rudement. Entre autres choses il leur dict qu'ils estoient des espions, & qu'il leur feroit trancher la teste. Les captifs luy respondirent avec toute submission & honnesteté, qu'ils n'estoient point espions, & qu'il n'y auoit point aucune occasion de soupçonner cela d'eux. Or apres quelques autres propos le Baxà commande, qu'ils fussent conduits à la maison du Iuge de la forteresse: afin qu'il s'informast plus à plain de leur estat & condition. Dans ceste maison du Iuge, ils surêt recogneus par vn Chrestien renié de l'Inde, qui declara comme c'estoient deux Prestres Religieux. A cause de cest aduis, ils furent reserrez plus estroitement, & menez dans vne tour & prison, ou ils trouuerent plus de trente Chrestiens captifs, partie Portugais, partie Indiens, qui estoient là despuis quatre ans tant affligés, à raison d'vne si longue captiuité, & du mauuais traictement qu'on leur faisoit, qu'il y auoit grand danger, qu'ils ne vinssent tous à renier leur foy, comme desia quelques vns auoient fait, pour sortir hors de tant de miseres, qu'ils enduroient. Les deux Peres voyans cōme Dieu les auoit enuoyez là si à propos, pour consoler ces pauvres Chrestiens, & les encourager à supporter patiemment leur aduersité, en remercièrent sa diuine bonté, & l'en loierent, reco-

Un Baxà du Turc les demâde & les en ameige.

Rudestes & menaces du Baxà.

Ils sont mis en vne prison ou il y auoit 31. Chrestiens captifs.

*Proui-
dence de
Dieu ad-
mirable.*

*Comment
l'on s'en-
t à Goa
leur ca-
ptivité.*

gnoissans en cecy vne providence particuliere, que Dieu a des-
siens, & comme il les pouruoit des remedes conuenables à leur
salut, par des voyes si occultes & si incogauës aux hommes. Ils
commencent donc à mettre la main à la besoigne, & taschent
premierement d'induire tous ces Chrestiens à se confesser, afin
que l'affliction qu'ils enduroient, leur seruit de plus grand meri-
te. Les remonstrances qu'ils leur firent, eurent vn tel poids, &
furent si bien prises, que bien tost apres tous se confessèrent. Mes-
mes quelques vns de ceux, qui estoient desia deliurés pour auoir
renié la foy, furent reduits à icelle: & par apres s'enfuyrent aux
terres des Chrestiens; de façon que quatre d'iceux vindrent en
fin surgir au port de Goa, & donnerent nouuelles de l'estat, au-
quel estoient ces deux Peres. Or comme ils preuoyoiēt que leur
captivité iroit en longueur, ils dresserent dans vne chambre de
la prison vn petit oratoire, là ou tous ensemble faisoient leur
oraison & priere à Dieu chasque matin, auant qu'aller au trauail:
& le soir estans de retour, ils y disoiēt les Litanies. Mais les iours
qui n'estoient point de trauail, ils assistoient aux exhortations;
que les Peres leur faisoient: lesquels aussi ez festes principales,
leur disoient la Messe seiche, qu'on appelle, car ils n'auoient point
de calice, n'y d'autel, ny de vestemens sacrés, pour la dire au-
trement.

*La femme
du Baxà
desire les
voir.*

Cependant que les autres captifs alloient au trauail, mesmes
le P. Paes portant vne chaisne de fer attachée au pied avec vn
autre prisonnier, le P. Monserrat pour estre desia vieux, demeu-
roit à la prison, & pour la mesme cause on luy faisoit grace de ne
le charger pas des fers. Or afin de ne demeurer pas oïseux, il ap-
prenoit la langue Arabesque, par le moyen de certains Arabes,
qui estoient aussi prisonniers avec luy, tellement qu'il sçeut bien
tost lire & escrire en icelle. Ce qui luy seruit de beaucoup, pour
moyenner sa deliurâce, laquelle cuyda arriuer bien tost apres, de
la maniere qui s'ensuit. La femme du Baxà ayat ouy dire, que ces
Religieux prisonniers estoient fort modestes & vertueux, eust
enuie de les voir: & à ceste occasion commanda à vn de ses ser-
uiteurs, qu'il les feit aller au jardin pour faire feste à vn sien petit
fils, qui se pourmenoit dans iceluy. Nos captifs furent menez au
jardin, & s'arrestèrent avec l'enfant vne bonne piece de temps,
luy faisans tout plein de caresses: & apres se retirèrent sans iamais
hausser les yeux vers les fenestres, ny les tourner d'vn costé ou

d'autre. La femme du Baxà les regardoit tousiours par vne ialousie, & fust si bien edifiée de voir leur modestie, & esprise de leur vertu, qu'elle resolut d'employer tout son credit pour leur obtenir liberté. A ceste fin elle commande au seruiteur, qui les auoit menez au iardin, de dresser vne requeste au nom desdits captifs, & de faire en sorte que son petit la baillast au Baxà son mary, lors qu'elle seroit presente. Le seruiteur executa de poinct en poinct tout ce que sa dame, & maistresse luy auoit ordonné, si bien que le petit enfant bailla la requeste à son pere en presence de sa mere. Elle prenant occasion de le prie le Baxà son mary de vouloir donner liberté à ces pauures Religieux captifs. *Obtiens leur deliurâce.* Ce qu'il octroya gracieusement à la requeste de sa femme & de son fils, & promit encor de les enuoyer en Hierusalem, avec le premier Turc qui se presenteroit pour aller là. Car s'il les y eust enuoyez sans telle compagnie, il estoit à craindre qu'ils n'eussent esté pris ou tuez par les chemins. Brief il s'offrist de leur donner tout ce qu'il seroit necessaire pour leur viatique. Nos captifs voyans leurs affaires si bien acheminez cuidoyent estre desia libres: mais comme les iugemens de Dieu sont incomprehensibles, les choses se renuerserent en vn moment. Car là dessus le Baxà receut vne lettre d'un Payen de la ville de Mombaza, par laquelle il luy faisoit entendre, que les Prestres qu'il tenoit prisonniers estoient fort estimez dans Goa, & qu'on luy bailleroit vne grosse somme d'argent pour leur rançon, s'il les retenoit quelque temps encore. Le Baxà ayant ouy ces nouuelles, change d'aduis, & dict à son maistre d'hostel, qu'il leur parlast de se rachepier, & leur demandast vingt mil escus de rançon. Les captifs respondirent, qu'ils n'auoyent autre chose en ce monde, que ce qui leur estoit donné d'aumosne par quelques Chrestiens qui estoient là, & qu'ils ne pouuoient promettre ce qu'ils n'auoyent point. Le Baxà *Ils sont reserrez en prison.* pensant qu'ils disoyent cela, afin qu'il les laissast aller sans rien payer, les faict mettre derechef en prison, & deffend de leur donner autre chose à manger que deux petis pains par iour, cuydant par ce moyen les contraindre à se rachepier plustost. Sur ces entre-faictes vn autre Baxà natif de la ville de Seuille en Espagne, qui auoit esté pris des Turcs en son ieune aage, passa par ceste ville, & entendât parler de ces prisonniers, tascha de les deliurer, & les mener avec foy en Ethiopie, car il alloit trouuer le Roy. Mais cela n'ayant pas reüssy, le naistre d'hostel du premier Baxà

*On leur
demâde
rançon.*

les fist appeller pour la seconde fois, & leur dit qu'il failloit qu'ils payassent cinq mil escus de rançon, autrement qu'ils ne seroyent point deliurez de toute leur vie. Et pensant les contraindre par le mauuais traictemēt de faire ce qu'il vouloit, il leur fist mettre à tous deux les fers aux pieds, & vn collier de fer au col, puis vne chaisne aussi de fer attachée au collier, & aux ceps, qui estoit si courte qu'ils ne pouuoient hausser la teste; tellement qu'ils estoient contraincts de la tenir tousiours courbée. De ceste sorte furent ils menez à vne prison fort estroicte & obscure, & si basse qu'estans assis à terre ils touchoyent de la teste au toict. Toutesfois vn peu apres ils osterent la cadene du col au P. Monserrat à cause de sa vieillesse: mais au lieu d'icelle ils luy mirent des gros fers aux pieds. Ils furent dans ceste prison de la sorte l'espace de quinze iours avec beaucoup de peine & de misere. Or comme les Turcs veirent qu'ils ne presentoyent rien pour leur rachapt, ils les menerent à vn port de mer, ou les nauires de l'Inde vont quelque fois aborder, esperans qu'ils trouueroyent là de l'argent pour se rachapter, par le moyen de ceux qui y venoyēt trafiquer. Toutesfois cōme ils furent arriuez à ce port, il n'y eust personne

*Sont mis
à la ca-
dene cō-
me for-
çats de
Galere.*

qui les voulust rachapter, ou les ayder en cela. Les Turcs qui les auoyent conduits, voyans que les nauires de l'Inde estoient partis, sans qu'on leur eust rien donné, les mirent dans vne galere, pour ramer avec les autres forçats: mais trois iours apres qu'ils y furēt la foudre va tomber sur la galere, qui mit en pieces le mast d'icelle, combien que ce fust sans aucun dommage des personnes. Les Sarrazins prindrent cela pour vn mauuais augure, de façon que la femme du Baxà ne voulust point aller à la Meque, ny entrer dans ceste galere, qui s'equipoit tout exprès pour cela. Ce nonobstant ils employerent nos captifs en cest office de rameurs plus de deux moys, pendant lesquels ils endurent tant de pauvreté & de misere, que le P. Monserrat tumba en vne grosse maladie: qui fust cause qu'on les tirast tous deux hors de la galere, & qu'on les mist à terre, de peur qu'ils ne mourussent. Sur ce temps là arriuerent de l'Inde quelques nauires, qui porterent leur rançon, tellemēt que ceux qui auoyēt charge de les rachapter, accorde-

*Sont ra-
chepiez
à 1000.
escus de
rançon.*

rent avec le maistre d'hostel du Baxà, de bailler pour tous deux mil escus, moyennāt laquelle somme ils furent mis en liberté, sur la fin du mois d'Aoust de l'an 1596. & finalement vindrent surgir au port de Goa au mois de Decembre de la mesme année.

Comme le P. Abrahā de Georgijs Maronite, voulūt entrer en Ethiopie fut martyrisé par les Turcs à l'Isle de Mauza: & quelques temps apres, vn Prestre natif de la ville de Goa est enuoyé au mesme pays, & y fait vn grand fruit.

CHAPITRE XXI.

LE voyage de ces deux Peres n'ayant pas reüssi, comme l'on desiroit, on fust d'aduis d'en enuoyer autres deux en Ethiopie, pour l'ayde spirituel des Portugais, & autres Catholiques du pais: lesquels estans enuironnez d'un costé des Sarrafins, & de l'autre des Schismatiques & Abyssins, il estoit à craindre qu'ils ne vinsent à se fouruoyer du droict sentier de la foy, s'ils demeuroyēt long tēps sans Pasteur, qui les enseignast ce qui estoit de leur salut. Or il y auoit grand danger que cela n'aduint, à cause mesmement de ce que le P. François Lopez estant resté seul des compagnons du Patriarche André d'Ouiedo, outre qu'il estoit aagé de plus de soixante & dix ans, il se sentoit tellement accablé de maladies & infirmitéz, causées des grāds travaux qu'il auoit enduré, qu'il ne pēsoit pas viure lōguement; & d'ailleurs il estoit si cassé, qu'il luy estoit impossible moralemēt parlāt d'assister à tous les Catholiques de ces quartiers là, qui sont dispersez en plusieurs lieux, esloignez les vns des autres de plusieurs iournées de chemin. A ceste cause l'on aduisa vn P. de la Cōp. de Iesus, Maronite de nation appellé Abrahā George, ou de Georgijs: lequel ayāt esté enuoyé de Rome aux Indes, estoit pour lors occupé en l'instruction des Chrestiens de S. Thomas, qui demeurēt es mōtaignes, dont nous auōs parlé au 2. Liure: car il estoit bien versé és langues Syriaque & Arabique, & pource il sembla au P. Prouincial de l'Inde, qu'il seroit propre à ceste Mission d'Ethiopie, parce que moyennāt ces deux langues, il pouuoit se desguiser plus facilemēt que tout autre. On l'enuoye dōc querir, pour s'en venir au plustost à Goa: & pour son cōpagnon on nōma le P. Iaques Gonsales Portugais. Ils demeurērēt tous deux à Goa, dās la maison des Profez de ladite Comp. l'espace d'un an, sans qu'on en sceust rien à la ville, voire mesme ceux de la Cōpagnie pour la pluspart l'ignoroyēt, parce qu'on le tenoit caché tout exprés, à celle fin que les Sarrazins de ceste ville-là n'e prissent le vêt, & n'e dōnassent aduis aux Turcs, qui gardēt si soigneusemēt la coste d'Ethiopie, pour empescher que personne n'y entre, qui soit Chrestien ou au moins Latin.

Le P. Abraham de Georgijs est enuoyé en Ethiopie.

Se desguise en Armenien.

Prend congé du Viceroy & des autres Peres.

Or comme il fust temps de partir, le Viceroy qui auoit promis de trouuer moyen de les faire entrer en Ethiopie, pactisa avec vn certain Sarrafin, Capitaine d'vne nef, qui trafiquoit à Goa, luy faisant promettre qu'il luy cōduiroit deux Armeniens (entendant les deux Peres, qui debuoyent se desguiser en Armeniens) à l'Isle de Mazua sise tout aupres de la coste d'Ethiopie, dās le golfe Arabique, distante seulement trois iournées de chemin de la ville, ou estoit le P. François Lopez. Toutesfois depuis pour certains respects & considerations le Viceroy, & les Peres de la Compagnie furent d'aduis d'enuoyer pour lors tout seul le P. Abraham, avec vn ieune garçon natif d'Ethiopie, qui auoit esté esleué au College de S. Paul de Goa, estimans que de ceste façon ils y pourroyent entrer tous deux plus aisement, puis que l'vn & l'autre entendoit bien la langue. Il fust donc arresté, que le P. Jacques Gonfales demeureroit encore à Goa, attendant quelque autre commodité. Le Capitaine du nauire estant à point pour mettre les voiles au vent, aduise le Viceroy de luy enuoyer ceux qu'il deuoit mener à Mazua. Le Viceroy voulut voir le P. Abraham auāt qu'il partist : & afin que la chose fust plus secreete, il le manda venir de nuit à son palais. Le Pere y alla avec ce ieune homme, qui debuoit l'accompagner sans que personne sceut qui il estoit, excepté le Secretaire du Viceroy, qui l'attendoit à la porte. Il estoit vestu du mesme habit, qu'il deuoit porter en chemin, desguisé à l'Armenienne, la barbe longue, & vne toque sur la teste, avec le reste des accoustremens d'Armenien. Le Viceroy le voyant habillé de la sorte ne peut tenir les larmes, & l'embrassant avec vn grand soupir : Ce sont (dict-il) les inuentions, desquelles la Compagnie se sert, pour gaigner les ames à Dieu, exposant ses propres enfans à tant de dangers, pour le salut d'icelles. Apres qu'ils eurent esté assés long temps ensemble, le Pere prend congé du Viceroy, qui luy monstra beaucoup de signes de grand affection. Accoustre commi il estoit il s'en va dire à Dieu au P. Prouincial, & aux autres Peres & Freres, qui demeueroient au College de S. Paul: tous lesquels il embrassa vn à vn, avec grande charité, & eux aussi avec telle abondance de larmes, qu'ils sembloient prognostiquer, que ce seroit le dernier à Dieu, qu'ils se dirroyent en ceste vie. Estant donc aduise qu'il estoit temps de partir, il sort de la maison vn peu auant minuit, & s'embarque au mois de Ianuier de l'an 1595.

Ils eurent en leur voyage des grandes tempestes, & coururent des grands hazards, comm' il aduient souuent en telle navigation: mais nostre Seigneur les garantit de tous, si bien qu'ils arriuerent sains & sauues a l'Isle de Mazua, que les Turks occupent. Le Pere ne fut point iusqu'alors recogneu de personne, tellement qu'il eut congé du Capitaine Turc, qui gouuernoit ceste Isle, d'entrer en Æthiopie sous tiltre de marchand, pour y vendre ses denrées. Brief son affaire estoit si bien acheminé, que dans deux heures il deuoit passer en la terre ferme. Mais ce souverain Seigneur, duquel dependent tous les momens de nostre vie, & qui tient nostre sort entre ses mains, ordonna les choses d'autre façon, & luy voulut donner la couronne du martyre, auant que sortir de ce lieu. La chose passa de ceste sorte. Pendant que le Pere negotioit l'expedition de son passeport, le garçon Abyssin, qu'il auoit laissé à l'hostellerie pour garder les hardes, voyant que le Pere tardoit trop a venir, suyuant son appetit se met à manger. Or c'estoit vn iour, que les Mahometains ieusnoient avec grande rigueur: car ils celebroyent pour lors leur Ramadan (ainsi appellent ils vn ieusne qu'ils gardent, auquel ils n'oseroient auoir mangé vn seul morceau auant qu'il fut nuit) voyans donc que ce ieune homme se dispensoit à prendre sa refection auant le temps, ils luy demandent qui il estoit, & d'ou il venoit: somme qu'ils luy firent tant de menaces, & luy donnerent tant de coups de fouët, qu'à la parfin il confessa, qu'il estoit Chrestien, & son maistre aussi. Les Sarrazins donnerent aduis de tout cecy au Capitaine de la forteresse, duquel le Pere auoit desia eu son congé: mais comm' il entendit cecy, il le fit incontinent arrester, & mettre en prison. Le lendemain l'ayant fait venir deuant soy en presence de beaucoup de Turks, il l'interroge d'ou il estoit; le Pere luy respond qu'il estoit Armenien, natif de la ville d'Alep, comme de fait il estoit: il luy demande encore, s'il estoit Chrestien ou Mahometain: par ce que (dit-il) si vous estes Mahometain ie vous donray tout maintenant congé de vous en aller en Æthiopie, ou en telle part que vous voudrés. Le Pere luy respond qu'il estoit Chrestien. Or il faut (luy dict lors le Capitaine) que tout maintenant vous vous rendiez Mahometain, & en signe de ce dites ces paroles. *La Ilà, Ilà, Mahamet Treenlacà.* C'est des mots Arabes qui veulent dire. Il n'y a point d'autre Dieu, si non Dieu & Mahomet son messenger. Le Pere luy respond avec vn

*Arrive
au port
de Ma-
zua.*

*Ramadan
ieusne
des Sarra-
zins.*

*Le P. A-
brabâ est
recognu
& s'ad-
resse pour
chrestien.*

*Est tué
pour ne
vouloir
venir sa
foy.*

*Sa mort
autrement
racontée.*

*La con-
stance &
liberté.*

*Deux es-
pees dût
on le
frapper,
se repen-
sans l'en
dormager*

visage constant & assuré, qu'il estoit Chrestien, & qu'il aimoit mieux perdre la vie mille fois, que faire ou dire telle chose. Le Capitaine grandement indigné d'une responce si hardie, met incontinent la main à son cimeterre, & luy en baille un coup sur la teste: puis les autres, qui estoient auprès de luy, l'acheuent de tuer. Voyla comme la chose a esté racontée du commencement: mais depuis l'on a sceu par la deposition d'un Catholique Abyssin, qui se trouua lors en l'Isle de Mazua, suyuant les informations qu'en feist faire ce Prestre natif de Goa, duquel nous auons cy deuant parlé, que la chose passa en cete manière. Le Capitaine Turc ayant fait venir le Pere deuant soy, luy demande, s'il estoit Chrestien ou Mahometain. Le Pere ayant confessé qu'il estoit Chrestien; le Turc l'interroge de rechef, ce qu'il pretendoit faire en Ethiopie: à quoy il respond, qu'il y alloit pour conuertir à la foy de IESVS-CHRIST, tant de gens qu'il pourroit. Le Capitaine entendant cela tasche premierement de le gagner par amadouemens & promesses, & luy dit, que s'il vouloit se rendre Mahometain, il luy rendroit ses hardes (car il les luy auoit faites saisir) & le lairoit aller, ou il voudroit: que s'il aymoit mieux demeurer en ceste Isle là, il luy promettoit de le faire grand. Le Pere repart à cela, qu'il ne se soucioit point de la perte de ses hardes, moins encore des promesses qu'il luy faisoit, & qu'il ne vouloit point se rendre Mahometain, par ce que cette loy ne valoit pas ses sauues. Le Turc grandement indigné de cette responce, commande qu'on l'enferme dans une tour de la forteresse, ou il fut durât quelques iours, apres lesquels le Capitaine le fait venir deuant soy, & cuydant peut estre que le mauuais traictement de la prison luy auoit abbatu le courage, le presse de rechef de se rendre Mahometain, luy faisant beaucoup de promesses. Mais voyant qu'il n'estoit pas esmeu d'icelles, il luy dit qu'il falloit qu'il prononcast ces mots que nous auons dit cy dessus pour recognoistre Mahomet: autrement qu'il luy feroit trancher la teste. Le Pere ayant respondu ce qu'a esté dit auparauant, on le descapita publiquement. Or jasoit que le tesmoing, qui a depose cecy, n'assistast pas à la mort, de peur qu'il ne fut recogneu pour Catholique: toutesfois il a assuré que ceux qui y auoyent assisté, luy raconterent come l'espée du bourreau se rompit au premier coup, qu'il luy donna, sans faire aucune blessure au Pedomager. Ce qui feist estonner grandement le Capitaine Turc, & les

autres, qui assistoient à cet spectacle. Mais cela ne fut pas bastant pour adoucir leur cruauté, ains ils seirent porter vn' autre espée, de laquelle le mesme bourreau luy ayant baillé deux coups elle se rompit encore, laissant seulement vne petite marque empreinte sur son col: brief on en feit apporter vne troysiesme, avec laquelle la teste luy scust tranchée au mois d'Auril 1595.

Le mesme tesinoing adioustoit, que l'espace de 40. iours apres sa mort, apparoissoit chasque iour sur le tard vne grande lumiere sur son tombeau, comme s'il y eut eu force chandelles tout au tour: de façon que plusieurs Sarrazins & autres gēs sortoiēt tous les soirs hors de la ville, pour voir cela. Les vns l'interpretoyēt en bonne part, les autres en mauuaise: he! quoy? (disoient les vns) ne fust il pas a ce Caffre (ainsin appelloient ils le Pere) que son ame soit brulée es feux infernaux, qu'il faut encore pour chastier ses pechez que son corps brulle en ces flammes-cy, D'autres neantmoins disoient au contraire, que c'estoit vn signe de sa Saincteté: Pendant ce mesme temps de 40. iours, on voyoit trois grands oyseaux blancs & d'une espèce qu'on ne sçauoit recognoistre, voltiger tout à l'entour de sa sepulture. Or quoy que cela voulut dire, il est au moins asseuré, que le Capitaine qui luy feit trancher la teste, mourut peu de iours apres, & tous ceux qui le luy auoyent conseillé, dans ces 40. iours, ainsi qu'il est porté es informations susdites. Durant sa vie cestoit vn homme de tres-grande vertu, fort adonné à la mortification & à l'oraison. Tout le temps qui luy restoit de ses occupations ordinaires, il l'employoit en prieres, & autres œuures de deuotion. Le Pilote mesme du nauire, dans lequel il s'estoit embarqué, encore qu'il fut Mahometain, admittoit grandemēt sa vertu, ainsi qu'il a raconté despuis, disant qu'il l'auoit bien cogneu pendant le tēps qu'ils auoyent nauigé ensemble: mangeant & beüuant à mesme table, & demeurant en mesme chambre & logis, iusques à ce qu'il fut pris. Entre autres choses il racontoit de luy, que reposant vne nuit quelque temps auparauant qu'il ne fut pris, il se mit a crier si fort, que le Pilote se leua, & l'ayant esueillé luy demanda ce qu'il auoit: le Pere luy dict qu'il songeoit qu'on le massacroit; de façon qu'il semble que nostre Seigneur l'alloit preuenant petit à petit, pour le disposer a ce qui luy deuoit aduenir bien tost apres. Aussi s'estoit il preparé pour ce voyage long temps auparauant, faisant de si

*Lumiere
venē au
tour de
son tom-
beau 40.
iours
durant.*

*Trois
grands
oiseaux
blancs
voltigēt
tout au
tour d'i-
celuy.*

*Songe
qu'il eust
auant sa
mort.*

*Estades
Portu-
gais &
Catholi-
ques d'E-
thiopie.*

grandes poenitences & mortifications, que tous ceux de la maison s'en esbahissoient. Ainsi dispose Dieu pour l'ordinaire les ames de ceux quil veut recompenser d'une si glorieuse couronne. Cependant les Portugais & autres Catholiques d'Æthiopie estoient en grande necessité, se trouuans destituez de pasteurs: car le P. François Lopez vint a deceder deux ans apres la mort du P. Abraham à scauoir l'an 1597. De façon qu'il n'auoient aucun Prestre Catholique, pour les consoler, & leur administrer les sacremens. D'ailleurs les Turcs, qui tiennent les forteresses de la coste d'Æthiopie, estoient tellement sur leurs gardes, mesmes apres la mort du P. Abraham, qu'il estoit presque impossible d'y faire entrer aucun Portugais, sans estre descouuert, & fait esclau ou massacré. Car les Turcs, qui sont en garnison esdicts lieux ont beaucoup d'espions, pour scauoir qui va, & vient en Æthiopie, ayans l'œil principalement à ce qu'aucun Portugais n'y entre: à cause qu'ils ont empesché, que l'Æthiopie n'ait esté reduite en leur puissance à raison du secours, qu'ils ont donné souuent au Roy. Ils escriuirent donc au P. Prouincial de la Cōpagnie de IESVS en l'Inde la necessité extreme, en laquelle ils estoient de leur salut; l'aduisant neantmoins que, selon la disposition qu'ils voyoient ez affaires, ils estoit impossible, qu'aucun Pere de la Cōpagnie les allast secourir sans euidēt dāger d'estre massacré ou fait esclau: mais que s'il y auoit quelque Prestre Indien qui sceut la langue du pais, & qui fut desguisé en habit de matelot: il pourroit passer a leur aduis sans estre recogneu. Le P. Prouincial ayant receu ces lettres, les communique prepiierement aux Peres, plusieurs desquels, nonobstant tous ces dangers, s'offrirent volontiers d'aller secourir ces pauures ames destituées de tout ayde spirituel. Apres cela il monstre les mesmes lettres au Vice-roy, & a l'Archeuesque de Goa Don Alexis de Meneses de l'ordre de S. Augustin, leur faisant parëillement entendre le desir qu'auoient les Peres de s'exposer a tout danger pour vne si sainte cause. Mais le Vice-roy & l'Archeuesque iugerent, qu'il n'estoit pas expedient, qu'aucun de ladite Compagnie y fut enuoyé. Neantmoins cett' offre que feirent lesdits Peres pleust si fort a l'Archeuesque, qu'estant vn iour allé prescher à l'Eglise des Profez de la mesme Societé, comm' il fut tombé sur ce propos, il loüa grandement le zele du salut des ames qu'auoyent monstré les Peres, & prenant occasion sur ces mots de l'Escripture

Hi sequuntur Agnum quicumque ierit. Ceux-cy suiuent l'Ai-^{Apoc.}gneau, par tout ou il va : le cherche (dict-il) quelqu'un qui sans faire compte de l'esclauage ou de la mort, veuille aller en Ethiopie, & ie trouue incontinent prests & appareillez les Peres de la Compagnie, &c. Suyuant donc l'aduis des Portugais qui estoient en Ethiopie, l'on cherche vn Prestre Seculier natif de l'Inde, qui voulüst aller en ce pais là, pour consoler les Portugais & les autres Chrestiens ensemble pour voir la disposition des affaires, & comment l'on y pourroit faire entrer quelques Peres de la Compagnie. Il s'en trouua vn natif de la ville de Goa, homme docte & vertueux, nommé Melchior de Sylua, qui auoit esté nourry & esleué au seminaire de Goa, sous la conduite & discipline de la Cōpagnie, lequel s'offrist de son bon gré pour les fins que dessus. Le Viceroy qui estoit lors François Gamma, Comte de Vidi-gueyra & Admiral de la mer Indique, en receut vn merueilleux contentement, & commanda non seulement qu'on le pourueust de tout ce, qui luy seroit necessaire pour son viatique, mais en-
cor, afin qu'il y allast plus libre & desempestré de tous affaires, il luy fist bailler vne bonne somme d'argent, pour payer tous ses debtes. Ayant donc satisfait à ses creanciers, & mis ordre à tous ses affaires, il s'embarqua & partit de Goa l'an 1598. prenant la route de Diu, ou il deuoit entrer dans quelque nauire de Turcs ou Sarraïns en habit de marinier. Il arriua heureusement à Diu,^{Arriue à Diu} & dela à l'Isle de Mazua, viz-à-viz du port d'Arcoco, par lequel on entre d'ordinaire en Ethiopie. Estant parueniu iusqu'à là sans estre recogneu, ny aucunement descouuert, il se ioinct avec quel-^{habillé en marinier.}ques autres mariniers, qui alloient voir la ville de Delec, où il va rencontrer vn Abyssin, qui auoit accompagné tout vn long tēps le P. Patriarche André d'Ouiedo, & lors estoit venu là pour sçauoir, si quelques lettres estoient arriuées de l'Inde pour les Portugais habitās de l'Ethiopie, comme tous les ans il souloit faire. Cet Abyssin ayant trouué le Prestre susdict, en donne soudain aduis aux Portugais : lesquels se mirent incontinent en deuoit pour le retirer au plustost du danger ou il estoit, le plus secretement que faire se pourroit, & conduisirent l'affaire si bien, qu'il arriua sain & sauf à la ville de Tygare, qui est vn lieu habité des Portugais dans l'Ethiopie mesme, combien que ce ne fust pas sans courir grand hazard de sa vie. Car ayant esté recogneu des Sarraïns, peu s'en fallut qu'ils ne le missent à mort. Et de faict il

*Entre en
Ethiopia*

entendit vne nuit grommeler contre luy quelques vns d'iceux, qui parloyent entre les dents de l'audace des Chrestiens, lesquels sçachans qu'un autre Prestre (ils entendoient le P. Abraham) auoit esté les années passées tué, pour estre voulu entrer en Ethio- pie, estoient neantmoins si outrecuidez, que d'entreprendre derechef la mesme chose. Mais en fin Dieu le garantit de ce danger, & de tout autre, tellement qu'il arriua sans aucun matuais rencontre à ladite ville de Tigare : ou il fut receu des Portugais & autres Chrestiens du pais, avec vne extreme consolation d'un chacun d'eux, remerciaans Dieu de les auoir pourueus d'un Prestre Catholique : auquel ils peussent descouurir asséurement les affaires de leur conscience. Ils le menerent au mesme logis, ou auoyent demeuré iadis le P. Patriarche avec les autres Peres, & à l'Eglise, ou ils sont enterrez. Or apres qu'il se fust un peu delassé : commençant à exercer sa charge, il treuve qu'à raison de la frequentation ordinaire, que les Portugais & autres Catholiques, auoyent eu avec les Schismatiques, & pour auoir quasi perdu toute esperance de voir en ce pais là des Prestres Catholiques ils auoyent desia pris plusieurs coustumes des Schismatiques, & si estoient presque resolu de continuer à frequenter leurs Eglises, & à recevoir les Sacremens de leurs mains. De maniere qu'ils auoyent commencé de baptiser & circoncire tout ensemble leurs enfans à la mode du pais, & de garder le Samedy iour de feste, tout de mesme que le Dimanche. Ils mangeoyent de la chair les iours prohibez & deffendus par l'Eglise : & ne gardoyent pas les ieusnes commandez en icelle, comme les Veilles, ny les Quatre temps : bien que par deuotion ils ieusnoyent tous les Mecredys, & Vendredys de l'année avec un tel meslange de la loy Mosaique, & des coustumes de l'Eglise Grecque, que peu s'en fallust qu'ils ne vinsent du tout à degenerer de la foy Catholique. Or la premiere chose à laquelle ledict Prestre trouua, fust

Sont corrigez par ce Prestre Indien. à leur oster de l'entendement tous ces erreurs & abus ; leur enseignant avec grand soing & diligence, ce qu'ils deuoyent croire, & garder conformement à la doctrine de l'Eglise Catholique, Apostolique Romaine. Entre autres choses il commença d'introduire l'usage du Calendrier Gregorien, qui iusqu'à lors n'y auoit esté receu, & publia les statuts & ordonnances de l'Archeuesque de Goa les faisant garder, tant en ce qui concernoit les choses de l'Eglise, que au reste qui appartenoit à la reformation

des mœurs. Finalement apres cela, il les ouyt tous de confession, & les remit aux coustumes, esquelles les Peres de la Compagnie, qui estoient venus là avec le Patriarche, les auoyent nourris & esleuez. Or comme les Portugais & Chrestiens du païs sont despartis en trois diuers lieux, car les vns demeurent à Tygare, les autres à Dambea (qui est la ville capitale de tout l'Empire du Prestre-jan) & le reste à la ville de Day, il estoit necessaire que ce bon Prestre courust d'un lieu à l'autre, pour les instruire tous, & les ayder és choses de leur salut. Ce qu'il fit avec vn grand trauail, visitant les autres lieux, apres auoir esté quelque temps à Tygare.

Mais d'autant que l'un des principaux aduertissements qu'on luy auoit baillé, quand il partit de Goa, estoit de traicter avec les Portugais du moyen qu'il y pourroit auoir, pour faire entrer des Peres de la Compagnie de Iesus en Ethiopie, il donna là dessus plusieurs bons aduis, & entr'autres, qu'il n'y auoit pas assurance d'y aller par la voye de Melinde, comme l'on estimoit à Goa: parce que ce chemin estoit plein de voleurs; mais qu'il estoit plus aisé d'y entrer par le port de Bailur, si par presens ou autrement, l'on gaignoit la bonne grace du Roy de Damcali, auquel ce port appartient: car iaçoit qu'il fust Mahometain, il n'estoit pas si meschant, ny si contraire aux Chrestiens, que les Turcs qui gardent les autres ports. Voyla

l'estat de l'Ethiopie pour le regard de la Religion, tel qu'il

estoit l'an 1599. suyuant les aduis qui en ont esté

enuoyez. Et c'est assez parlé de l'Affrique:

traictons maintenant du

Brasil.

*De la Region du Brasil, des qualitez du pays, & habitans
d'iceluy.*

CHAPITRE XXII.



OMBIEN que l'Histoire de ce pais semble estre plus propre des Indes Occidentales, que des Orientales, desquelles principalement nous traitons en cest oeuvre : toutesfois nous l'auons inserée icy, tant parce que les Portugais ont descouuert ceste contrée à l'occasion de la nauigation qu'ils faisoient, pour trouuer les Indes Orientales, que pour estre de leur appartenace : car nous auons dès le commencement proposé de parler des lieux qui sont de leur descouuerte. Mais auant de declarer comme l'on a instruit ce peuple barbare en la foy Chrestienne, il sera bon de donner quelque cognoissance de ce pais, & des qualitez tant d'iceluy que des originaires. Doncques, la Region du Brasil est vne portion de ceste quatriesme partie de l'Vniuers, qu'on appelle maintenât le Nouveau monde, pour auoir esté trouuée de nouveau, c'est à dire depuis l'an mil cinq cens : ou bien l'Amerique, à cause qu'elle fust quelque temps apres la premiere descouuerte, faicte par Pierre Aluarez Cabral Portugais, plus soigneusement recogneüe par Americus Vespuccius Florentin, lequell y fust enuoyé à ces fins par le Roy de Portugal, Emmanuel. Or le pays du Brasil, suyuant les bornes qu'on luy donne à present, confine du costé du Nort à la riuere, qu'on appelle Marañon, l'emboucheure de laquelle est à deux degrez par delà l'Equateur, vers le Pole Antarctique; & du costé du Sud, au fleuue que les Portugais nomment communement *Rio da prata*, c'est à dire, riuere de l'argent, qui entre dans la mer au trente-cinquesime degre de latitude Australe. Du Ponët il est contigu au Peru, duquel il est separé par le moyë de certaines môtaignes qu'il y a si hautes, que le vol des oyseaux à peines y peust-il atreindre, & de si difficile accès, qu'on n'a trouué encorës qu'un seul passage, & iceluy fort scabreux & mal aisé, pour aller de l'un à l'autre pays. Du Leuant, il est arrousé de ce grand Ocean, qui va aboutir à l'Ethiopie Occidentale, suiuant la route de l'Est. Toure cette region, bornée cōme dessus, a forme de triangle, duquel les deux costez sont plus longs que la base : laquelle prend sa longueur du Leuant au Ponant, selon le cours du fleuue

*Descri-
ption du
Brasil.*

*Ses bor-
nes.*

du fleuve Marañon, regardant la ligne Equinoctiale, & le Nort. Mais l'angle opposé à ladite base, regarde le pôle Antarctique, & touche les regions encore incogneues du Sud. Au reste c'est ^{sa tem-} vn pays d'un air fort doux & temperé : car jasoit qu'une partie ^{perature} d'iceluy soit sous la Zone-torride; toutesfois les vents, qui viennent de la mer, le rafraichissent tellement, qu'il est de tres-commode habitation. A cause que lesdits vents chassent à bonne heure les vapeurs, qui s'effluent au matin, & purifient l'air, de sorte qu'il y est fort bon. Le pays est diuersifié de plaines, collines, & montagnes, embelly de plaisantes vallées, qui sont ombragées de plusieurs boscs touffuz, & arroufées d'une infinité de fontaines, & de plusieurs grosses riuieres. L'une est celle que les habitans appellent Paraguay, & les Portugais ou Espagnols *Rio de la plata* cest à dire de l'argent: laquelle est d'une telle grandeur, que le Nil, le Ganges, & l'Euphrates, si elles estoient jointes ensemble, ne la pourroient esgaller, ainsi que dit le P. Acofta. Elle a ^{Ioseph} quarante lieues de large, a son emboucheure : & tous les ans a ^{Acofta} certaine saison vient à se desborder à la façon du Nil, a cause d'une ^{li. 2. c. 6.} infinité d'eaux, qui y tombent des montaignes du Peru; mais si estrangement que les habitans du pays d'alentour, durant tout ce temps là (qui est de trois mois) sont contraincts de se retirer dans leurs canoës ou barques, avec toutes leurs hardes & meubles, autrement ils periroyent tous. De maniere que preuoyans la creüe du fleuve, auant qu'elle n'aduienne, pour garantir leurs vies, & leurs moyens, ils se mettent sur l'eau avec tout ce qu'ils ont en ce monde.

L'autre est celle, que les vns appellent riuier des Amazones, les autres Marañon, & les autres Orellana, qui fluë aussi des montaignes du Peru, avec une abondance incroyable d'eaux de pluyes & de riuieres, qu'elle va recueillant. Puis passant par les grandes campagnes de Pantiti, du Dorado, & des Amazones, vient en fin à s'emboucher dans l'Ocean. Son lië est si large & spacieux, principalement au dernier tier de sa longueur, qu'il contient au milieu plusieurs grandes Isles : & quand on nauige par le milieu, l'on ne voit que le ciel & l'eau. Ce sont les deux plus fameuses riuieres non seulement du Brasil, mais aussi de toute l'Amerique: combien que toutes deux borment le Brasil, selon qu'a esté dit.

Les valées de ce pays sont très-fertiles & propres à porter quasi tout ce, qu'on veut y semer ou planter: car la terre y est grasse, & bié pourueü d'eaux. Maintenant on y amasse grande abondance de succe, qui vient dans certaines cannes, ou rouseaux fort hauts, d'ou on l'espreint en foulant lesdits rouseaux avec vne meule de moulin à l'eau: tellement qu'il en sort vn jus beaucoup plus doux & agreable au goust, que n'estoit jadis le miel d'Attique tant celebré des anciens; lesquels n'ont point eu la cognoissance du succe a tout le moins qu'on seache. Apres qu'on en a tiré ce jus, on le met dans des chaudières, ou on le faiët bien cuyre pour le purifier: puis on en faiët des pains pointus & longs en forme de piramyde, & de ceste sorte en porte-on grande quantité en Europe. Car ceste marchandise s'y debite fort bien & avec grand gain & profit des Portugais, qui demeurent au Brasil; lesquels en enuoyent tous les ans plusieurs nauires chargées, car c'est le trafic ordinaire de ceux, qui demeurent audit pays. D'auantage la terre du Brasil produiët plusieurs sortes de plantes & arbres, qu'on ne trouue point en l'Europe, nommée-ment des Copaiabas, Zabucals, & Ananazes. Ainsin appellent ils ces plantes. Le Copaiabas sont certains arbrisseaux, desquels si on coupe l'escorce en esté, sort vne liqueur tres-souëfue à l'odorat, comme du baufine, qui est vtile, & profitable à beaucoup de choses: mais sur tout pour guerir les playes & blessures. On void souuent ces plantes escorchées, à cause que les animaux se sentans blessez des bestes venimeuses, ou morduz des serpents, se vont frotter là contre, par vn instinct naturel. Les Zabucals sont des arbres qui croissent fort haut, & portent vn fruit ayant la coquille fort dure, dôt la bouche, cest à dire l'ouuerture, tend en bas. Dans ces coquilles il y a vn fruit, qui ressemble aux chataignes, lequel est de fort bon goust & saueur. Et lors quil est meur, la coquille s'ouure d'elle mesme, & laisse tomber à terre ces chataignes, l'vne apres l'autre. Mais les plus excellens de tous ces fruits sont les Ananazes, qui viennent d'vne petite plante, des branches de laquelle on void pendre des petits catons, c'est à dire vn fruit semblable à la fleur d'u noyer, mais faiët en forme de pōme de pin, fort mol, d'vne saueur & odeur tres-agreable, & estant confit en succe dure long temps. Mais il ne faut pas oublier l'arbre du Brasil, qui a donné le nom à tout le pays, parce qu'on en porte grande quantité en Europe. Il est

*Fertilité
du pays.*

*Succe &
sa descri-
ption.*

*Copaibas
quelles
plantes
ce sont.*

*Zabuca-
les arbres
& leur
fruit.*

*Anana-
zes plāse
du Brasil
& de son
fruit.*

*L'arbre
appellé
Brasil qui
a donné le
nom au pays*

beau, grand, & rouge au dedans: tellement qu'on s'en sert pour teindre les draps en rouge. Voyla quant aux plantes qu'ils ont différentes des nostres. Pour le regard des animaux, il y a grande quantité d'oiseaux peints de diuerses couleurs tres-agreables a la veüe, comme des Papegais, & autres semblables. Bref tous les animaux terrestres, tant domestiques que sauuages y foisonnent de telle sorte, que cest vne chose merueilleuse, combien ont multiplié les cheuaux, les bœufs, ouailles, pourceaux, & autre bestail gros & menu, que les Portugais y ont apporté d'Europe. Et ce à ^{Bons pa-}raison des bons pasturages, qu'il y a. Or outre les animaux de mes- ^{surages}me espeece que nous auons pardeca, ils en ont d'autre sorte, que ^{au Brasit}nous n'auons pas. Comme ceux qu'ils appellent Zerigons, qui ^{Zerigon}sont de couleur de buys, & de la grandeur d'un renard: lesquels ^{animaux}ont comme deux bourçes ou besaces sous le ventre, ou ils por- ^{tes qua-}tent leurs petits enuoloppez, & ne les tirent de là, sinon lors qu'ils peuuent paistre d'eux mesmes. Mais durant tout le temps qu'ils les tiennent dans ces bourçes, les petits sont tellement attachez aux mammelles de leur mere, qu'ils ne les laschent iamais, iusques a ce quelle leur donne les champs. Il y a encor vn autre animal, que les Portugais ont à bon droict appelé Pareffe, parce ^{Animal}quil est si lourd, & si tardif a se mouuoir, qu'a grand peine peut ^{appelé}il faire en quinze iours autant de chemin, qu'est l'espace d'un ^{Pareffe}iect de pierre, n'y ayant aucun moyen de le faire diligenter d'a- ^{ses}uantage, ny par menaces, ny par coups. Les Espagnols le nom- ^{seu-}ment pour ceste mesme tardiuete *Perrillo ligero*, c'est a dire petit chien legier, comme par antiphrase. Il se tient d'ordinaire sur les arbres, & demeure long temps à y monter, & pareillement à en descendre. Il est quasi de la grandeur des Zerigons, & a le museau fait à la façon des chats huans. Ses ongles ressemblent fort aux doigts des hommes. Sa longue cheueleure, qui luy pend par derriere couure tout son col. Iamais il ne se leue droict sur ses pieds, mais traîne par terre son ventre plein de graisse. Il en y a qui di- ^{Voyez}sent en auoir tenu long temps chez eux, & ne l'auoir veu iamais ^{Caroline}manger, d'ou ils colligent qu'il se nourrist de vent (comme l'on ^{Clusius}dit du Camelion.) Et pource afin de mieux prendre l'air qu'il ^{exoter. l.}expose sa bouche droict au vent qui souffle. Toutesfois Ioseph ^{Joseph.}Acosta tesmoigne, qu'il se nourrit de formis. Mais quoy qu'il en ^{Acosta}soit de cela, il est au moins assurez, qu'on l'entend quelquefois de ^{lib. 4. c.}nuiet repeter par six fois ceste voix ha, ha, ha: de sorte que la ^{38.}

premiere est plus haute que la seconde, & eelle cy que la troisieme, & ainsi consecutiuellement tousiours en abbaisiant par proportion, de mesme que les Musiciens chantent leur la, sol, fa, mi, re, vt. Et delà quelques vns ont voulu dire, que tout ainsi que les hommes ont appris de barder & harnacher les bestes, en voyans quelques vnes, qui ont leur harnas naturel, & à bastir des maisons à l'exemple des arondelles, de mesme que cest animal leur a enseigné la Musique. Mais i'estime, qu'un art si gentil & si beau a vne plus noble source, que cest animal si grossier, & si lourd.

*Tygres
du Bra-
sil & leur
nature.*

L'on trouue aussi en ce pays-là force Tygres, lesquels estans affamez sont fort cruels & farouches; mais au contraire estans saouls, ils sont si couards, & si craintifs, que les mastins abbayans apres eux, les mettent ordinairement en fuite. D'ou l'on peut voir comme le trop manger ou boire rend mesmes les bestes plus stupides & lourdes, qu'elles ne sont de leur nature. Il y a beaucoup d'autres sortes d'animaux au Brasil, & d'especes de plantes, mais celles que nous auons rapporté, sont les plus singulieres, & qui ne se retrouuent point en ces quartiers: pour ce en auons nous fait mention. Mais c'est assez parlé des choses naturelles du país: traictons maintenant des mœurs, & coustumes des habitans.

*Mœurs
des Bra-
siliens.*

Les Brasiliens auant qu'estre cultiuez par la doctrine de l'E-uangile, estoient les plus barbares de tous ceux, qu'on a descouuert iusques a present ez Indes, tant Orientales, qu'Occidentales. Ils n'auoient aucune cognoissance de lettres. En leur langue, mesmes de ceux qui habitoiēt sur la coste de la mer, l'on ne trouuoit point trois lettres de nostre Alphabet, à scauoir F. L. R. qui n'est pas sans mystere, comme l'ont remarqué fort a propos quel

*N'auoient
point de
foy, &
n'ado-
rbiēt au-
cū Dieu.*

ques vns: veu qu'ils viuoient sans Foy, sans Loy, & sans Roy. Car pour le regard de la Foy, ils ne recognoissoient aucune Deité, soit vraye, soit faulse, & n'adoroient aucun Idole, ny autre chose: seulement se seruoient ils d'augures, de diuinatiōs, & sorceries.

Ils auoient bien quelque cognoissance de Noé, & du deluge: la

quelle il est probable qu'ils auoient receuē par traditiue de main en main, depuis les premiers hommes, qui peuplerent ce pays là.

*Croyoient
l'immor-
talité de
l'ame.*

Mais ils ne scauoient rien autre de l'histoire Sacrée, & ne croyoient point, qu'il y eust aucune recompense pour les bons, ny chastiment pour les mauuais apres ceste vie. Ils pensoient neantmoins que l'ame suruiuoit au corps; mais ils cuydoient, que les

hommes demeurassent en l'autre vie tousiours tels, qu'ils estoient, quand ils mouroyent: comme si quelqu'un estoit manchot ou perclus de quelque membre, que ce defaut le suyuoit apres sa mort; pareillement qu'ils descendoient en enfer avec les mesmes playes & blessures, desquelles ils auoyent esté naurez à leur mort. À ceste cause ils ne brusloient point les corps des trespassez: mais les ensepuclissoient dans terre, & leur mettoient quant & quant dans leurs tombeau les retz & filetz, desquels ils se seruoient pour reposer, comme nous des liëts, ainsi que nous dirons bien tost. Ils leur laissoient encore sur le tombeau quelques viandes pour se nourrir; car ils cuydoÿent que les morts dormoyent & mangeoyent en l'autre vie. Voyla quant à leur croyance. Mais sur le faict de la police ils monstroyent encore plus leur barbarie: car ils ne recognoissoient aucun Roy, Prince, ou Supérieur entr'eux, pour luy obeïr és choses, qui concernent le gouuernement ciuil: aussi n'auoyent-ils aucun lieu certain, & arresté pour leur demeure. Mais s'estans plusieurs d'iceux, & la pluspart d'une mesme race, assemblez ils s'arrestoyent vn'année en quelque vallée, & la suiuite en vn' autre, & ainsi consecutiuelement chaque année changeans de place. En ce lieu là ils faisoient leurs semailles, & dressoient leurs loges qu'ils bastissent à guise de longs appens, & tandis, ou comme vne nasselle renuersée, longue & estroïcte, de façon que pour l'ordinaire, sous vn mesme toict, plusieurs familles habitent ensemble. La nuit ils s'en vont dormir aux champs: & afin que les bestes farouches, ou venimeuses ne leur nuysent, & qu'ils puissent iouyr de l'air libre, ils ont des rets ou filets, qu'ils attachent à deux grands arbres, tellement qu'ils demeurent pendus en l'air. Et de ceste sorte ils prennent leur repos. Auant que les Portugais eussent peuplé ce pays, ils ne sçauoyent que c'estoit ny de vin, ny de pain, à tout le moins de froment ou d'autre bled. Car leur viande ordinaire n'estoit que d'un pain faict de certaines racines semblables à nos naueaux, qu'ils appellent *Mandiocas*. Mais à présent ceux qui demeurent auprès des Portugais sement du bled froment, & autre, duquel ils se seruent pour leur nourriture. Ils s'entretenoyent aussi du fruiët des arbres, qui sont bons à manger: car ils en ont plusieurs qui viennent là sans estre cultiuez. Et encore qu'ils soyent sauages, le fruiët en est fort sauoureux, nommément certaines poires, qu'ils appellent *Cajnsia*, qui ont beaucoup de suc,

& iceluy fort agreable au gouſt, pource ſont elles propres meſmes en temps d'Eſté, pour rafraichir & eſtancher la ſoiſ. Ils ont pareillement force venaiſon : & ſont bien duiſts à la chaffe. Ils prennent grande abondance de poiſſon, tant en la mer que és riuieres: car ils ſont tres-bons nageurs, & demeureront les heures entieres deſſous l'eau, tenans les yeux ouuerts, pour trouuer quelque choſe qu'ils chercheront. Mais la plus delicate viande à leur gouſt, eſt la chair humaine de leurs ennemis, leſquels ils mangent avec grande feſte, & reſiouyſſance, de la maniere qui ſ'enſuit. Quand ils ont pris quelqu'un de leurs ennemis en guerre (laquelle ils ſe ſont bien ſouuent les vns aux autres, non pas pour agrandir leur domaine, car ils n'en ont point de certain, mais pour ſe venger des iniures receuës d'une part & d'autre) ils le ſont engraiſſer, comme nous faiſons icy les pourceaux ou les chappons. Apres qu'il eſt bien gras ils le menent deuant vne grande aſſemblée de gens, qui ſe trouue là tout expreſ, attaché par le milieu du corps avec vne corde, laquelle pluſieurs tiennent de chaſque bout, a fin que le priſonnier ne puiſſe aller ny d'un coſté n'y d'autre, ſinon autant qu'ils veulent. Le tenans ainſi attaché, ils commencent à luy dire mille iniures & vilainies: & apres qu'ils ſe ſont ioüez de luy tout un long temps, l'un d'iceux l'aſſomme avec vne groſſe maſſue, dont il luy eſcraſe la teſte. Le priſonnier eſtant mort ſoudain les femmes ſe iettent deſſus pour l'eſuentrer, & l'ayant couppe en quartiers, le ſont roſtir, & le mangent là tous enſemble; ou bien ſont ſeicher à petit feu les membres, pour les garder plus long temps, lors meſmement qu'ils en ont tué pluſieurs à la fois. Ceux qui meurent de la ſorte, ne ſ'eſtiment pas malheureux, parce qu'ils eſperent que leurs parens & amis vengeront leur mort: ains ils ſ'en vont (ce ſemble) fort ioyeux & contens au lieu ou on les doit maſſacrer. Eſtans là ils commencent à dire leurs proueſſes, racontans les maux, qu'ils ont faiſt à ceux qui le doibuent manger. Tels eſtoient les Braſiliens, auant qu'on les euſt ciuiliſez : & ceux qui ne le ſont encores ſont le meſme, & vont d'ordinaire tous nuds, tant hommes que femmes. Combien que les femmes portent leur cheuelure ſi longue, qu'elle leur couure la pluſpart du corps. Mais ny les vns ny les autres ne laiſſent croiſtre aucun poil en autre partie, ſinon les hommes quelques vns derriere la teſte, & quand ailleurs il leur en vient, ils les arrachent. Lors que

*Mangēt
la chair
humaine
de leurs
ennemis.*

*Vōtōne
nudi.*

conſu-

quelque femme s'accouche, le mary se met au liſt, ou il eſt viſité & traicté durant quelques iours, comme s'il euſt enfanté. On luy donne des boulies, & autres viandes qu'ils tiennent pour délicates. Les parens & amis luy font des preſents, comme de gaſteaux, & autres choſes ſemblables. Somme qu'il ſe comporte tout de meſme, que ſont icy les accouchées. Et au contraire la pauvre femme apres qu'elle eſt deliurée, s'en va ſoudain tra-
 caffer çà & là par la maiſon, trauaillant à ce qui eſt neceſſaire pour la meſnagerie. Choſe qui monſtre à l'œil combien ils ſont barbares. Mais ce n'eſt pas tout. Ils ſont auſſi fort meſchans & malicieux, ingrats & meſcognoiſſans du bien qu'on leur faiſt, extremement addonnez à la luxure, choleres & vindicatifs à tout' outrance: d'où vient qu'ils ſont ſi cruels enuers leurs ennemis, & fort precipitez en guerre. Brief ceux qui viuent és pays mediterraneés, & qui retiennent encore leurs mœurs anciennes, reſſemblent pluſtoſt à des beſtes ſauuages qu'à des hommes. Mais depuis que la lumiere de l'Euangile a commencé de rayonner ſur eux par le moyen de l'inſtruction, que les Peres de la Compagnie de Ieſus, & pluſieurs autres tant Religieux que Seculiers leur ont donné, il en y a beaucoup, meſmement de ceux qui habitent près du riuage de la mer, qui ſont deuenus plus dociles, & plus traictables qu'on n'eueſt iamais penſé. Car pluſieurs d'iceux ſe ſont aſſemblez en des bourgs ou villages, qu'ils ont baſty eux meſmes près des villes des Portugais: ou on leur enſeigne la doctrine Chreſtienne, la police, l'honneſteté, la façon de cultiuer les terres, & pluſieurs autres meſtiers neceſſaires pour la vie humaine. Brief il en y a vn grand nombre qui ſont Chreſtiens, bien que ce n'a eſté ſans grand trauail & danger de ceux, qui les ont
 ciuiliſez & inſtruiſts, comme nous
 verrons cy apres.

* *
 *

*me bar-
 bare
 qu'ils ob-
 ſeruent
 à l'accon-
 chement
 des fem-
 mes.*

*Quand & comment les Portugais ont descouvert le Brasil: & comme
l'on y a enuoyé des Religieux & autres gens d'Eglise, pour
y prescher la foy.*

CHAPITRE XXIII.



A PRES que Vasque de Gamma eust faict la descouverte des Indes Orientales, par le commandement du Roy de Portugal, Emmanuel premier du nom, en l'an de nostre salut 1498. ainsi qu'a esté raconté au premier Liure, & qu'estant de retour à Lisbonne l'année suivante, il eust faict le rapport à son Prince, de tout ce qu'il auoit veu & appris de ces pays là; le Roy entendant ces choses conçeut vne plus grande esperance que iamais, non seulement de ioindre à sa couronne plusieurs de ces régiõs: mais aussi de gagner à la foy de IESVS-CHRIST beaucoup de ces peuples & nations barbares. Poussé donc partie du zele, qu'il auoit de l'honneur & gloire de Dieu, partie du bien & profit de son Royaume, il feit equiper & armer l'an 1500. vne autre flotte de treize nauires, ou il enuoya quinze cents soldats: constituant Admiral d'icelle, Pierre Alvarez Cabral Portugais. L'o y enuoya aussi vn Religieux de l'ordre de S. François, nommé P. Henry, personnage signalé tant en vertu qu'en doctrine, & quelques autres Prestres Seculiers, pour assister és choses spirituelles, ceux de ladite flotte, & pour instruire aussi les Infidelles, qui se voudroyent conuertir à la foy Chrestienne, si parauenture ils auoyent le moyen de la leur prescher. Ils partirent de Lisbonne le huietieme du moys de Mars de la susdite année, & arriuerent aux Canaries le treziesme iour de leur nauigation. De là voulans prendre la route du Cap de bonne esperance, ils furent agitez d'un si grand orage, qu'ils se tenoyent desia quasi pour perdus. Car la flotte fut par la force de la tourmente esparse çà & là, tellement qu'il y eut vn nauiere d'icelle, qui s'en retourna en Portugal. Mais apres que la bourrasque fust passée, & que le reste de la flotte se fust rallié, ils poursuiuirent leur voyage. Toutesfois afin de n'estre retenus long temps des calmes qu'on trouue près de la Guinée, & de doubler plus aisement le Cap de bonne esperance, ils s'esloignerent si fort de la coste d'Affrique vers le Ponant, qu'a-
pres

pres auoir vogué vn mois entier, ils descouurent terre, pensans que ce ne fust qu'une Isle. Mais apres auoir rengé la coste, quelques iours durant, ils cogneurent que c'estoit terre ferme, & de grande estenduë. Si prindrent port en vn lieu, qu'ils nommerent *Port-assuré*, tant à cause que l'haure, ou ils aborderent, estoit fort commode & assuré pour les nauires, que parce qu'apres tant de traux & perils, ils auoyent là trouué vn port assuré. Estans descendus à terre pour se rafraischir, ils voulurent aussi descouurer le pays, & sçauoir quels estoient les habitâs d'iceluy. Mais auant tout autre chose l'Admiral de la flotte feit dresser vn autel, pour y dire la Messe: laquelle y fut celebrée avec grande solemnité par ledit Pere Henry, aydé & assisté des autres Prestres, rendans tous graces à nostre Seigneur, de ce qu'il les auoit deliurez de tant de dangers, & conduits en ceste region iusqu'alors incogneuë. Les originaires suruindrent là dessus avec leurs arcs & fleches, qui sont les armes, desquelles ils se seruent tant pour la guerre que pour la chasse. Ils furent bien estonnez, & esmerueillez, des veoir telles gens en leur pais. Ceux aussi de la flotte ne le furent pas moins voyans ces sauuages tous nuds, & difformes, qu'ils leur faisoient horreur. Car ils portent en la face des petites pierres de nulle valeur enchaissées dans la chair mesme, les vns aux leures de dessous; les autres à celles de dessus, ou bien aux ioües, & quasi par tout le visage. Ce qui les rend extrêmement laids & hydeux a voir, combien qu'ils facent cela, pour paroistre plus beaux & gentils. Les Portugais, bien qu'estonnez de leur laideur, taschoient neantmoins de les apriuoiser, & les faire venir à eux leur monstrans bon visage, & leur faisans tout plein de caresses par signes, afin de leur oster toute apprehension de crainte. Les Brasiliens d'autre part sembloient aussi tesmoigner par leurs gestes le contentement, qu'ils receuoient de voir telles gens en leur contrée. Et tandis qu'on celebrâ l'office diuin ils y assisterent avec grande reuerance, bien qu'ils ne sceussent pas ce qu'on faisoit, sinon en gros, qu'on prioit Dieu.

Après ce l'Admiral fit planter vne belle croix de pierre sur le riuage de la mer avec grande solemnité: d'ou l'on appella quel que temps ce pays-cy la prouince de sainte croix. Mais depuis à cause du bois rouge, qu'on porte de là, nommé Brasil, le vulgaire commença de l'appeller le Brasil. Et ainsi ce nom luy est de-

meure. Or afin de faire scauoir au Roy Emmanuel la descouu-
erte de ceste region, l'Admiral luy enuoya Gaspar de Lemos avec
vn nauire de la flotte. Et pour plus grande preuue il luy bailla vn
de ces sauuages, qu'on print tout exprez pour l'amener en Por-
tugal, & le faire voir au Roy & à toute la Cour. Ce qui resiouit
extrememēt sa Majesté & tout le Royaume de Portugal, qui de-
puis a receu de grandes commoditez & richesses de ce pais là;
comme nous verrons. Cependant Cabral, qui auoit charge de
s'en aller aux Indes Orientales, ne voulut pas s'arrester là d'auan-
tage: tellement qu'apres auoir pourueu la flotte d'eau douce,
de viures & autres choses necessaires, il se remit à la voyle pour-
suivant son voyage. Mais ceux qui retournerent du Brasil en
Portugal dirent tant de belles qualitez de ce pais là, & nominée-
ment de la fertilité & bonne temperature d'iceluy, qu'ils feirent
venir l'enuie à plusieurs d'y aller pour le peupler, si bien que des-
lors on commença de tenir ceste route. Et comme l'on veid le
grand gain & profit, qui s'y faisoit, mesmement au trafic du suc-
cre, du bois de Brasil, des Papegais, des Guenôs, & choses sembla-
bles, dont il y a tres-grande foison, il y alla tant de gens, qu'ils fu-
rent contraincts de se diuiser, commençans d'y bastir des petites
villates, qu'ils appellerent Capitainies, tant pour arrester les lieux
de leur trafic & commerce, que pour se deffendre contre les
Barbares: lesquels rencontrans quelque Portugais tout seul & à
l'escart le massacroient & le mangeoient, tout de mesme que les
autres, qui leur estoient ennemys. Avec ceux, qui s'en allerent au
commencement pour peupler ce pais là, on enuoya pareillement
quelques Religieux de l'ordre de Sainct François, la pluspart
Italiens, pour les mesmes fins que dessus. L'vn de ces bons
Peres se noya, voulant passer vne riuere: laquelle a cause de
ce fut appellée la riuere de S. François; & ainsi la nomme-on en-
cores pour le iourd'huy. Quant aux autres ils furent tous tuez &
mangez par les barbares; car sans auoir aucune cognoissance de
leur langue ils s'allerent ietter bien auant dans la terre ferme,
pour leur prescher l'Euangile. Mais les sauuages ne recognois-
sans pas le bien, que ces bons Peres leur procuroient, se ruerent
soudainement sur eux, & les mirent a mort. Depuis, en ceste terre
arrousee du sang de ces bien-heureux Martyrs, l'on a cueilly vne
tres-grande moisson de Chrestiens, ainsi que nous verrons cy-a-
pres) par le merite & intercessiō (cōm' il est à croire) d'iceux. Mais

reprenant nostre propos : comme beaucoup de gens passoient chascque année au Brasil, on y bastit plusieurs villes, ou bourgades : entre lesquelles il en y auoit cinq principales. La premiere s'appelloit Itamacara, la 2. Pernambuco, la 3. Illéos, la 4. Port-afseuré, & la 5. S. Vincent. Quant aux Brasiliens, ils n'auoient aucune accointance, ny communication avec les Portugais, demeurans tousiours en leur sauueté accoustumée de manger les hommes, & mesmes ceux des Portugais qu'ils pouuoient attraper, les trouuans à l'escart. Pour obuier à cecy, & donner l'espouuante à ces Barbares, les Portugais s'assemblerent plusieurs fois, pour leur faire la guerre : afin de prendre vengeance des assassinats, qu'ils commettoient iournellement de ceux de leur nation. De sorte qu'ils en tuerent vn grand nombre, & en prindrent aussi plusieurs prisonniers, auxquels il donnoient la vie les rendans esclaués, dont ils se seruoient par apres en leurs engins de sucre, & au labourage de leurs terres. Mais comme c'est vne nation fort vindicatifue les parens & amis de ceux, qui auoient esté tuez ou rendus esclaués, venoient à grande foule se ruer à l'impourueu sur les Portugais. Et s'ils en pouuoient prendre quelques vns, ils les tuoient, ou les amenoient prisonniers, pour les engraisser, & les manger apres, suiuant leur barbare coustume. Quelques fois encore ils tiroient de captiuité leurs parens & amis : & d'autres aussi les mesmes captifs eschappoient & s'enfuyoient de leurs maistres, faisans par apres mille maux à ceux qui les auoient detenus en esclauage. Afin donc de mettre quelque ordre à tels inconueniens, & pouruoir à ce que les villes, ou Capitainies fussent bien policées, & regies, le Roy de Portugal Iean 3. enuoya l'an 1549. pour Gouverneur de ce pais, & de toutes les villes, auxquelles les Portugais demeuroient, vn fort honnestre & braue Capitaine, nommé Thomas de Sousa, qui fut le premier enuoyé là en tiltre de Gouverneur. Et afin que la conuersion des Brasiliens fut de là en auant procurée avec plus d'efficace, il demanda à nostre S. Pere le Pape, qui estoit lors Paul 3. & au B. P. Ignace de Loyola fonda-
Les noms des premiers Peres de la Compagnie de Iesus, qui furent enuoyez au Brasil

Pireo, Leonard Nugnes, Diego de S. Jacques, Vincent Rodrigues, tous quatre Portugais, auxquels fut baillé pour Supérieur le P. Emmanuel Nobrega aussi Portugais, personnage de grande vertu, doctrine, & prudence. Ils partirent avec le Gouverneur Sousa sur le commencement du mois d'April l'an 1549. & dans deux mois arriuerent au Brésil.

Comme ils y furent abordez, le nouveau Gouverneur voulut bastir, vne nouuelle Cité tout aupres du port, ou il auoit desembarqué, qui se nomme à present le port de la vieille ville. Car voyant qu'il estoit à craindre, que ces barbares ne vinsent vn iour massacrer tous les Portugais, qui estoient là, parceque ceste vieille ville n'estoit guere forte, ny le lieu propre, pour estre fortifié, il chercha quelqu'autre place plus commode, & qui neantmoins fut proche de là, pour donner commencement à la Cité du Sauueur, selon qu'on la nomme a ceste heure, ou bien la ville de la Baye de tous les Saints, par ce qu'elle est tout auprez d'un grand & tres-commode port, qui est dans le golfe, qu'on nomme la Baye de tous les Saints, à treize degrez & demy de Latitude Australe. La pluspart de ceux qui estoient venuz en ceste flotte allerent en procession iusques au lieu, ou se deuoit bastir la nouuelle Cité, qui estoit loing de la vieille ville demye lieu; là ou, auant toute autre chose, fut plantée vne belle croix, avec grande deuotion, & solennité. Bien tost apres plusieurs des habitans de la vieille ville, & encore des autres Capitainies, vindrent se loger là, leur estant par ledit Gouverneur despartie à vn chascun certaine place, pour y bastir: comme il en fut aussi baillé aux Peres de la Compagnie; afin qu'ils y edifiassent vn'Eglise & vn logis, pour eux.


Voilà donc qu'aussi tost tout le monde se mit à trauailler à ceste nouuelle Cité, avec vne telle ferueur & diligence, que dans peu de temps elle fut en estat de pouoir estre habitée. Les Peres ayans eu le choix de la place, ou ils vouloient bastir, esleurent vn certain lieu, ou est à present l'Eglise de nostre Dame de l'Ayde. Laquelle ils edifierent avec tres-grand peine: car on ne leur auoit encore rien assigné de reuenue, pour leur nourriture, ny pour la fabrique, de façon qu'ils charrioient eux mesmes sur leurs espauls la pierre, l'eau, le bois, & tout le reste, qui estoit necessaire pour le bastiment: parceque tous les autres estans occupez tant à faire l'enceinte de la ville, qu'à

bastir leurs maisons particulieres, ils n'estoyent aydez de personne. Et si estoyent-ils contraincts d'aller querir le bois és montagnes prochaines, les pierres en vn autre endroiect, le sable, la chaux, & l'eau en vn autre, avec tres-grande incommodité, y allans bien souuent tous pieds deschaux, & à demy nuds, si qu'ils vindrent tous haslez & bruslez de l'ardeur du Soleil. Mais le plus fascheux de tout estoit, l'extreme pauureté & indigence de viures qu'ils enduroyent. Car d'un costé ils estoyent en vn lieu, que l'on n'auoit encore commencé de cultiuier, & de l'autre ils n'auoyent aucun secours de personne presque: si que lors qu'ils alloient demander l'aumosne, contraincts de la necessité, les vns leur disoyent qu'ils en auoyent besoin pour eux mesmes, les autres esmeus de compassion leur en donnoyent: mais c'estoit si peu, & si rarement, qu'ils patissoyent beaucoup.

Le Gouverneur voyant leur disette & pauureté, leur assigna en fin quelque petite aumosne, qui leur seruit pour passer la vie, tellentent quellement, iusqu'à ce que le Roy de Portugal, ayant esté aduerti de leur necessité, commanda qu'on les pourueust de tout ce qui leur feroit besoin. Ce qui fust executé avec grande largesse, & humanité. Cependant les Peres ne laissoyent point de trauailler pour le bien & profit spirituel des habitans de la nouuelle Cité, leur faisant ordinairement tous les Dimanches & festes des predications, entendant leurs confessions, & leur administrant les autres Sacremens, comme s'ils eussent esté leurs Curez, car il n'y auoit lors aucun autre Prestre: tellement qu'ils furent contraincts de ce faire, iusqu'à ce qu'un Prestre Seculier vint tout exprés de Portugal, pour estre Curé & Pasteur de ces ames. Mais voyons ce qui aduint depuis.

Comme ceux de la Compagnie de IESVS commencent de s'employer à la conuersion des Brasiliens, & deux d'iceux sont massacrez des barbares pour ceste cause.

CHAPITRE XXIIII.

 Es Peres se voyans libres des charges, qui appartiennent aux Curez, commencerent de s'employer à bon escient à la conuersion des Brasiliens, comme ç'auoit esté la principale cause de leur venue, & la plus grande nécessité qu'il y eust en ce pais là. Ils quitterent donc l'Eglise & la maison,

cy pour vn temps leur seruirent de truchemens. Mais afin que le tout se feist plus aisément, & sans l'incommodité d'autrui, ils resolurent de s'estudier à bon escient, pour apprendre le plustost qu'ils pourroyent ceste langue: laquelle bien que ne soit pas si copieuse & abondante en parolles que plusieurs autres, est neantmoins du tout differente de celles d'Europe. Or ils s'y addonnent avec vne telle serueur, & sainte emulation l'vn de l'autre, que dans brief ils furent propres & idoines à leur faire quelques exhortations, & remonstrances. Mais ce qui retardoit dauantage la conuersion de ce peuple, estoit leurs vices, & meschantes coustumes: car ils estoient tous les iours à s'entretenir les vns les autres es guerres qui se faisoient ordinairement, avec vn desir insatiable de se venger de leurs ennemis, & se rassasier de leur chair. Ils auoyent aussi vne si grande inclination à l'yurongnerie, & à la lubricité, que s'il se trouuoit quelque petite estincelle de vertu en leur naturel, ell'estoit par tant de sortes de vices esteinte & assoupie quasi du tout. Ce neantmoins le mauuais exemple, que les Portugais leur donnoient, principalement en matiere d'impudicité & d'arrogance, estoit l'vn des plus grands destourbiens qu'ils eussent: car bien souuent s'en venans es bourgades des Brasiliens, ils se monstroyent si dissolus en leur façon de viure, & si meschans, que non seulement ils se faisoient haïr & abhorrer des originaires: mais encore estoient cause qu'ils vinssent à s'aliener de la foy Chrestienne, voyans ceux qui en faisoient profession, viure avec vn tel desbordement & dissolution de mœurs. L'inconstance pareillement de ceste nation, & la frequente mutation & changement des lieux, qui leur est coustumiere, apportoit vn grand empeschement à leur conuersion. Car lors qu'on pësoit faire vne belle cueillette, apres beaucoup de trauail qu'on auoit employé à les cultiuier, soudain ils s'enfuyoient bien loing de là. Si que tout le fruit, qu'on y pensoit recueillir, estoit quasi en vn moment perdu. Finalement le peu de gens, qu'ils estoient, pour endoctriner vne si grande & populeuse nation, sembloit retarder beaucoup leur entreptise, combië que appuyez sur l'esperance du diuin secours ils prenoient courage, considerans mesmement, qu'il n'est pas plus difficile à Dieu de sauuer les hōmes par le moyen de peu de gens, que de beaucoup, & qu'vn si petit nombre d'Apostres de nostre Sauueur, auoit faict de si grandes choses en tant de contrées du monde, pour y planter la mesme

Iacon.

siège des

Brasiliens

1. Reg. 34

foy qu'ils preschoyent. De faict ils cognoissoyent par experience, que le mesme Seigneur estoit le principal autheur, & promoteur de cet œuvre, & leur donnoit tous les iours nouvelles forces & courage, pour s'employer au salut de ceste nation. Ils meirent donc tant de peine pour apprendre la langue du pais, qu'auec l'ayde de Dieu ils y profiterent tous beaucoup dans peu de tēps: mais principalement le P. Iean d'Aspilcuēta Nauarrois, lequel auec c'est outil faisoit vn merueilleux fruit, à l'endroict de ces barbares. De façon que les Portugais ayans entendu ce que le B. P. François Xauier Nauarrois auoit faict és Indes Orientales, & voyas le profit que ce Pere natif du mesme pays, faisoit icy és Occidētales, disoyent communément qu'il sembloit que ce fust vne grace speciale, que Dieu eust donnée aux Nauarrois, que d'estre propres & heureux à la conuersion des Payens. Les autres neantmoins s'employoient aussi fort vtilement à cela mesme, & la premiere chose qu'ils feirent, ce fut de traduire en langue Brasilienne les oraisons du Catechisme, à sçauoir le *Pater*, l'*Aue*, le *Credo*, & autres; puis les commandemens de Dieu, & l'explication tant d'iceux, que des articles & Sacrements de la foy. Cela faict, ils apprirent par cœur toutes ces choses en Brasilien, & puis s'en alloyent par les villages, ou demeuroyent les barbares, chantans ces oraisons en leur langage: & tant par ce moyen, que par le bon exemple de vie qu'ils leur donnoyent: & auec leur debonnaireté, modestie, & affabilité, ils gaignerent tellement le cœur à ces sauuages qu'il les affectionnoyent, & respectoyent merueilleusement. Ayant donc gaigné leur bonne grace, & acquis plus grande cognoissance de leur langue, ils commencent à leur faire quelques exhortations, esquelles ils leur declaroyent plus a plain les principaux poincts de nostre foy, comme la création du monde, la cheute du premier homme, & plusieurs autres histoires sacrées, que ces barbares escoutoyent auec vn si grand plaisir, & contentement, qu'ils sembloient estre quasi hors d'eux mesmes: principalement lors qu'on leur parloit de la toute puissance & infinie grandeur de Dieu. Car entendans discourir de ces choses, ils monstroyent par signes, qu'ils estoient merueilleusement estonnez & esbahis, n'ayans iamais plus ouy parler de choses si grandes. Ils s'esmeruilloyent aussi de nostre façon de lire & escrire, ayans (selon qu'ils faisoient paroistre) enuie de l'apprendre, & de se renger à vne vie plus ciuile & humaine:

brief

brief d'embrasser la foy Chrestienne qu'on leur preschoit. Toutesfois ils en estoient grandement destournez par leurs vices & mœurs depraüees, & notamment par ceste meschante & barbare coustume qu'ils auoient de manger la chair humaine de leurs ennemis. De façon qu'encore bien qu'ils semblaissent porter grand respect & affection aux Peres, qui les instruisoient, & leur faisoient plusieurs autres plaisirs; si est ce que quand il taschoient de leur oiter les occasions d'exercer ceste cruauté, & inhumanité barbaresque, ils encouroient de grand dangers de leur vie, signamment vne fois, qu'ils leur rauirent des mains la charoigné d'un homme mort, qu'ils alloient manger. La chose passa en ceste sorte. Les Brasiliens, qui estoient logez pres du mont Caluaire, ou les Peres demeuroient, auoient prins en guerre vn de leurs ennemis, & l'ayant trainé au pied de la montaigne, l'auoyent meurtry avec grande feste, & resiouyssance, estans tous prets & appareillez, pour en faire curée, & le manger à leur accoustumé. Les Peres aduertis de cecy apres s'estre recommandez à Dieu, s'en vont vers eux avec vn grand courage, resolu de leur rauir la proye des mains: afin d'empescher vne telle cruauté. Arriuez qu'ils furent à la loge, ou s'apprestoient l'abominable banquet, ils trouuent qu'on estoit apres pour faire rostir les membres de ce pauvre miserable. Les Peres commencent là dessus à leur remontrer tout bellement l'enormité du fait, les tançans de ce, qu'ils ne gardoient pas la promesse, qu'ils leur auoyent faicte, de n'vser plus de semblable boucherie, & d'estre plus humains que cela. Les hommes, qui estoient là presens, ne sonnerent mot, pour la honte qu'ils auoient, & le respect, qu'ils portoient aux Peres, à cause de leur voisinage, & de l'instruction qu'ils reccuoient d'eux. Mais les femmes n'eurent pas telle patience, mesmement quelques vieilles acharnées de longue main en ces cruantez, & affriandies de tels morceaux: lesquelles ne pouuant endurer, qu'on leur ostat la lippée, qu'elles pensoient desia tenir entre les dents, sortent de leur loge comme des enragées, & se mettent à crier, & à tempester, courant deçà, & delà, tantost aux vns, tantost aux autres, pour se plaindre du tort, qu'on leur faisoit, à leur aduis. Par telles crieries quelques jeunes hommes furent incitez à courir sus aux Peres, pour les empescher qu'ils n'emportassent les membres de cest homme mort. Mais quand ils veirent que les Peres ne craignoiēt point leurs rhodomontades, ils cederent

*Histoire
notable.*

*Les Peres
se leur
ostent des
mains.*

en fin : fut ce ou par vn instinct de nature, qui enseigne mesme d'auoir honte du peché; ou plustost par la vertu & puissance diuine, qui les intimida de telle sorte, qu'ils n'eurent la hardiesse de s'opposer à ce que les Peres n'enleuassent ce corps mort, lequel ils ensepuelirent dans leur iardin. Mais se doubtons, que les barbares y viendroient de nuit le chercher, ils y firent plusieurs fosses par cy, par là, bien qu'en vne tant seulement fut le corps: afin de les amuser pour quelque temps, & auoir cependant moyen de les empescher. Ce qui arriua tout de mesme qu'ils auoient pour-pensé, car la nuit suiuaute les barbares s'en vont en troupe au iardin, & apres auoir fouillé en tous les endroiçts, où ils voyoient, qu'on auoit remué la terre, ils trouuent en fin celui, auquel le corps estoit enterré, & desia en auoyent tiré vn bras. Les Peres qui faisoient la sentinelle voyans cela, soudain y accourent, & avec vn grand courage s'opposent à leurs efforts: tellement qu'il les empescherent de l'emporter. Mais afin qu'ils ne fussent plus en alarme, & en peine de garder ce corps, ils le tirent de là & l'emportent dans la ville du Sauueur, là où ils l'ensepuelirent en terre. Cecy aigrist merueilleusement les Sauuages esineuz principalement des crieries des femmes, qui ne cessoient de tempester, & de mettre le feu aux estoupes, comme l'on dit; tellement qu'il s'en fallut de bien peu, qu'ils ne vinssent tout à coup se ruer sur la ville, pour la saccager & la ruiner de fond en comble. Les Peres aussi furent en tel danger, qu'il leur fut force de se retirer dans la ville par le commandement du Gouverneur, iusqu'à tant que la cholere des barbares fut passée: & cependant ils y commencent de nouueau à bastir vn autre logis, au lieu où est maintenant edifié le College de la mesme Compagnie, fondé en ladicte Cité. Or d'autant que les Portugais faisoient beaucoup de plainçtes au Gouverneur des Peres, disans qu'ils estoient cause par leur zele indiscret de tous ces troubles, & qu'il estoit à craindre qu'à leur occasion les barbares ne les vinssent vn iour tous esgorger, il print en main leur cause; & les deffendit contre ces murmures, disant qu'il ne faillloit pas craindre l'euenement de ceste guerre, qui auroit esté intentée à telle occasion, parceque Dieu assisteroit le meilleur party, & leur feroit la grace ou d'emporter la victoire, si les autres pour cela les agaçoient, ou bien qu'il appaiseroit les affaires de maniere, que les niuages & brouillars de dissention estans chassés, ils reuer-

Ils s'accroissent.

roient de nouuean le soleil de la paix si clair qu'auparauant. Aussi en aduint-il tout de mesme ; car les barbares furent bien tost appeaisez contre l'esperance des habitans de la ville. Ce qui leur apporta vn grand contentement. Mais les Peres depuis se comporterent autrement enuers les barbares : à fin de ne donner fascherie aux Portugais, plustost que pour crainte, qu'ils eussent d'y perdre la vie. Ils taschoient donc de leur oster ceste meschante coustume, non pas à viue force, comme auparauant, mais tantost par remonstrances, tantost par prieres, quelques-fois leur donnant à entendre l'enormité de ce peché; d'autres les menaçant de l'ire de Dieu, s'ils continuoient en cela, apres auoir recogneu la verité.

Et de ceste façon ils diuertirent plusieurs d'une si cruelle rotisserie : des autres, qu'ils ne peurent pas si tost gaigner, ils auoient impetré au commencement, qu'il leur fust loisible d'aller parler à ces pauures miserables, qui deuoient estre tuez & mangez, tandis qu'on les engraissoit : & par ce moyen ils taschoient de sauuer leur ame, puis qu'ils ne pouuoient sauuer le corps. Car en ce temps là ils leur declaroient les principaux mysteres de la foy Chrestienne, & leur faisoient venir l'enuie d'estre faits enfans de Dieu par le moyen du Baptisme. Finalement apres les auoir excitez à vne vraye douleur & repentance de leurs pechez, ils les baptisoient, auant que d'estre conduicts au lieu, ou ils deuoient estre massacrez. Et là aussi ils mettoient peine, que leur ame passast de cest vie en bon estat, & qu'au lieu des mocqueries, des iniures, & de la mort, qu'ils enduroient, ils reçussent la Couronne de gloire, & vne vie eternelle en Paradis. Mais ils ne peurent pas s'ayder long temps de ce remede : car le diable persuada aux barbares, que la chair humaine ayant esté baptizée perdoit son goust. Tellement qu'ils ne voulurent plus consentir, qu'on les baptizat. Les Peres apres auoir consulté longuement entr'eux de quel moyen ils se pourroient seruir, pour ayder ces pauures ames, à celle fin qu'elles peussent obtenir le salut eternel, à la parfin ils resolurent qu'apres auoir parlé au patient, & obtenu de luy son consentement, pour estre baptizé ils l'iroient accompagner iusques au lieu, ou il deuoit estre tué, & qu'estans là sans faire semblant de rien ils l'arrouseroyent d'un peu d'eau, de laquelle ils auroient trempé leur mouchoir, & en ce faisant prononceroient les parolles essentielles

Moyen pour sauuer les ames de ceux, qui deuoient estre mangez.

Le Diabe l'empesche.

Autre qui seruit pour vn tēpt.

du baptesme. Ce qu'ils executerent fort heureusement quelques fois, & eussent continué de faire le mesme, s'il ne fut là dessus aduenü vn accident, qui pensa gaster tout. Car vn des Portugais, allant çà & là parmy les loges des Brasiliens, eust quelque debat & querelle avec iceux, l'on ne scait pour quelle occasion, mais la chose alla si auant, qu'il fut tué & massacré des barbares. Les autres Portugais furent grandement irritez de cela, & vouloient aller incontinent venger la mort de leur compagnon, sans auoir esgard, ny au danger, auquel ils mettoient leur nouvelle ville, qui n'estoit encore guere bien fortifiée, ny au hazard auquel ils exposoient, non seulement leurs moyens, mais encores leurs vies, qui n'estoient pas plus asséurées que leur ville. Ils alleguoient que s'ils se laissoient ainsi gourmander, ces barbares ne tiendroiēt aucun compte d'eux, & que leur audace croistroit, de sorte qu'ils viendroient vn iour à les esgorger trestous, si au commencement on ne leur donnoit quelque espouuante. Ils tenoient tels propos deuant le Gouverneur, & entr'eux mesmes, poussēz plustost d'une passion de cholere, & desir de vengeance, qu'induits à ce par la raison. Car s'ils fussent venus aux mains, il y eut eu, comme il est croyable, vne cruelle boucherie tant d'un costé que d'autre. Mais Dieu, qui voyoit ce qui estoit le plus expedient pour le bien de ceste nouvelle Eglise, feit feschir au debuoir les Brasiliens: lesquels preferans le droict d'amitié & de voysinage, à celuy de parenté & d'alliance, mirent le coupable entre les mains des Portugais, pour estre puny selon qu'ils iugeroient. Eux l'ayans en leur pouuoir, pour causer plus grande terreur à ces barbares attacherent le coupable à la gueule d'une grosse piece de canon, & y mettans le feu par derriere firent voler en l'air ce pauvre miserable tout escartelé, & desmembre. Ceste sorte de supplice incognu iusqu'à lors aux Brasiliens, leur causa vn telle frayeur, que depuis ils furent plus aduisez à ne s'attaquer aux Portugais: lesquels aussi furent plus considerez, pour ne s'aller temerairement fourrer parmy ces gens sauuages, de peur que le mesme ne leur aduint, qu'à leur compagnon.

*La predication
de l'E-
uangile
cōsinue.*

Les Peres, apres cela se meirent encore derechef à leur prescher la foy de IESVS-CHRIST, mais avec plus de liberté & d'assurance qu'au parauant, si qu'ils se tenoyent parmy eux tant assurez, que s'ils eussent esté long temps nourris ensemble.

Or entr' autres choses, ils leur firent cognoître les tromperies & fallaces de certains Magiciens & enchanteurs, qui les abbreuoyent de mille & mille menfonges, pour estre bien venus aupres d'eux, & en tirer du profit. Il y auoit entr' autres vn meschant & rusé Sorcier, qui auoit acquis par ces enchantemens beaucoup de credit parmy ce peuple. Il se vantoit de pouuoir guerir toutes sortes de maladies, & les auoit tellement embabouynez, que s'il y auoit quelque malade parmy eux, ils l'appelloyent soudain pour le guerir. Le P. Nobrega l'ayant rencontré vn iour, l'attaque à dessein, & luy demande en vertu de qui il faisoit telles choses: s'il recouroit à Dieu tout-puissant Createur du ciel & de la terre, qui est seul autheur des merueilles: ou bien s'il auoit accointance & familiarité avec le malin esprit, par l'aide & inuocation duquel il fit telles guerisons? L'autre luy respōd aussi arrogamment qu'impudemment, qu'il estoit Dieu luy mesme, & engendré de Dieu: & pour preuue de ce il fit venir là deuant vn homme, lequel estant griefuement malade auoit esté guery par luy, ainsi qu'il disoit, adioustant que ce Dieu qui regne au Ciel estoit son grand amy, & qu'il se monstroit bien souuent à luy entre les nuées, les foudres & les tonnerres, meslant avec ce plusieurs autres semblables folies, qui declaroyent assez l'orgueil, & la presumption, & vanité de cest homme. Le P. Nobrega ne pouuant plus supporter vne telle audace & impieté, fait assembler le peuple, & là deuant tous se met à refuter poinct par poinct tout ce que l'autre auoit dict, avec des raisons si preignantes, & vne telle force de parolles, & viuacité d'esprit, que l'enchanteur fust bien tost conuaincu, & mis au roiet, ne sçachant que respōdre. Apres ce le Pere luy persuade (assisté de la grace diuine) qu'il changeast & d'opinion & de vie, renonçant au pacte qu'il auoit avec le Diable. Ce que l'autre resolut de faire, & le Pere luy promist qu'il prierait ce grand Dieu Createur, & Conseruateur de toutes choses, afin qu'il luy pardonnast ses pechez. Ayāt donc esté aduise de ce qui luy estoit conuenable pour son salut, il se presenta pour estre instruit en la foy, & fust enroollé au nombre des Catechumenes, lesquels on alloit instruisant, & preparant à la longue, à cause que la plupart de ces sauuages sont fort grossiers d'esprit, & durs pour apprendre; de sorte qu'il est bien mal-aisé de leur faire entendre les choses mesmes, qui sont les plus communes en nostre foy, & croyance, à cause du peu de

*Superbe
& arro-
gāce d'un
Sorcier.*

*Est con-
uaincu
& conuer-
ti par le
P. No-
brega.*

capacité qu'ils ont. Mais en fin apres auoir esté longuement instruits, ils se rendoyent propres & idoines pour estre faicts participans du sacrement de Baptesme : & à mesure qu'on les trouuoit capables, on en baptisoit ou plus ou moins ensemble. Mais le plus difficile estoit de les induire apres à se joindre legitime-
 ment par le sacrement de mariage avec vne seule femme, & leur faire quitter toutes les autres, qu'ils auoyent auparauant: neant-
 moins tous ceux qu'on baptisoit, s'accordoyent à cela: autremēt on ne les eust pas receus. Or il en y eust entr'autres vn de ceux, qui auoyent esté baptizez, lequel tout transporté de ioye s'en va trouuer les Peres, & leur faict entendre par signes & par parolles qu'il auoit eue certaine vision la nuit precedente, luy estant ad-
 uis qu'il auoit esté esleué au Ciel, ou il auoit receu (ce disoit-il) vn contentement indicible. Et il est croyable que nostre Sei-
 gneur voulust arrouser cete nouuelle plante de l'eau de ses con-
 solations, pour la faire enraciner & croistre de plus en plus en la foy. Mais les autres estoient si attachez à leurs banquets cruels & inhumains, à l'iuongnerie, aux dāces, à l'impudicité & pluralité des femmes, qu'on ne les pouuoit diuertir, ny retirer, qu'avec grande peine, de ces meschancetez : tellement que le trauail qu'on employoit à cultiuer ceste barbare nation, estoit plus grand, que le fruit qu'on en recueilloit. A ceste cause les
 Peres, suyuant le conseil du Prophete, de ne ietter pas la bonne semence parmy les espines, resolurent de cultiuer vne terre toute neuue. Ils se mettent donc à baptiser les petis enfans, qui s'en alloient mourir auant l'vsage de raison. Apres ce ils obtien-
 nent tantost par prieres, tantost par promesses, ou amadoüie-
 mens des peres & meres des autres, qui estoient desia vn peu grandelets, de les leur bailler pour les instruire. Ce que plusieurs leur accordoyent tres-volontiers : car ils estoient bien aises que leurs enfans apprinsent quelque chose de bon. On allechoit aussi ces ieunes garçons avec quelques friandises, ou bagatelles qu'on leur donnoit, pour leur faire apprendre plus volontiers le Catechisme. Par tels & autres semblables moyēs, non seulement on leur enseigna la doctrine Chrestienne : mais encore leur feit-on prendre le ply de la vertu. L'experience monstra que c'estoit vn singulier moyen, pour la conuersion de ce peuple. Car les enfans apprenoyent heureusement, & retenoyent fidellement, tout ce qu'on leur enseignoit : & apres qu'ils estoient de retour

*Vison
 celeste
 d'un
 Brasiliē
 nouuelle
 ment co-
 nerty.*

Etier. 4.

à leur maison, le disoyent à leurs peres, meres, & autres de leur parenté ou cognoissance: si que beaucoup plus de gens estoient instruiets és choses de la foy, par ces ieunes enfans, & plus aysement, que par les Peres de la Compagnie, tant à cause du langage, que de la hantise qu'ils auoyent plus frequente avec eux. Outre ce, ils destournoyent bien souuent leurs parens des meschancetez, cruautez, & vilainies qu'ils souloyent commettre, quelquesfois par parolles, d'autres par le bon exemple qu'ils leur donnoyent. Les parens estoient d'ailleurs fort contens de voir l'obeissance, l'honnesteté, la sobriété, & autres bonnes mœurs de leurs enfans. (Tant aymable est la vertu d'elle mesme, que ceux-là » encore qui ne la veulent auoir pour eux, l'ayment & la prisent » és autres. Brief ils se plaisoyent tellement à la bonne education de leurs enfans, qu'ils les exhortoyent à profiter de plus en plus tant en la vertu, qu'en l'estude des lettres, que les Peres leur enseignoyent. De là vint que ces barbares commencerent à prendre goust, & à s'affectionner aux choses de nostre sainte foy, si que plusieurs demanderent d'estre enroollez au nombre des Catechumenes, lesquels faisoient retentir les bois, les champs, & les riuages des noms sacrez de IESVS, & de Marie, chantans avec vn singulier goust & plaisir, le *Pater*, l'*Aue*, le *Credo*, & les autres oraisons Chrestiennes. Brief le feu du S. Esprit s'eschauffa parmy ce peuple, de maniere que dans peu de tēps il y eust sept ou huiet cēs personnes, qui demandoient instāment le baptēse: lequel on cōfēra premieremēt à vne cētaine tant seulemēt, choisissant ceux qui furēt trouuez plus capables de le receuoir. Ce qui fust fait avec grāde solēnité aux festes de Pasques: car c'est le tēps deputé à telles ceremonies, selon l'anciēne coustume de l'Eglise. L'on distīra le baptēse à sept cēs autres, qui le demandoyent avec pareille instance, iusques à vn autre temps, afin qu'ils fussent mieux instruiets: & cependant on fit preuue de leur constance; iaçoit qu'ils estoient bien faschez d'attendre si long temps. Or l'ennemy de nostre nature voyant vn si heureux commēcement, fit en sorte par le moyen des enchāteurs ou forciers, qu'il y a parmy ce peuple, que presque tous les nouueaux Chrestīcs tomberent malades, les vns de flux de vētre, les autres du mal des yeux, & semblables accidents. D'oū ces meschans forciers prindrent occasion de mesdire de la foy Chrestienne: car ils ne faillirent pas de rapporter tout aussi tost cēs maladies au laucement sacré des eaux du baptēse, disants que par cel laucement la santé

*Duo tē-
pora de
consec.
d.4.*

*Les nou-
neaux
Chrestiens
baptisiez
deux E-
glises.*

du corps estoit interessée, & que la foy de IESVS-CHRIST apportoit soudain la peste, & la mort à ceux qui la receuoÿt. Mais leur calomnie & blasphème, fust bien tost confondu, parce qu'il s'ensuiuit : car Dieu voulust que dans peu de iours tous ceux, qui auoyent esté baptisez, furent deliurez de ces maux, & remis en santé. Apres ce ils se mettent, à la suasion des Peres, à bastir quelques Eglises, afin de s'assembler là pour ouïr la Messe, & entendre les sermons, & l'explication du Catechisme. Ils en basterent deux, en deux diuers endroicts, avec vn notable profit, soit pour l'aduancement de la gloire de Dieu, soit pour le salut des ames. D'auantage les Peres consulterent entr'eux des moyens, qu'ils pourroyent prendre, pour r'allier ces sauuagés, qui alloient espars çà & là, sans auoir certaine demeure ny habitation, à fin de les assembler en vn corps de communauté; ou ils s'accoustumassent peu à peu à se ciuiler, & à garder quelque forme de police, & de reglemēt; à obeïr aux loix & aux Magistrats; à cultiuier les terres, en somme de bestes deuenir hômes: qui est ce dequoy les Grecs ont iadis tant loüangé Theseus, fondateur de la ville d'Athenes. Ayans donc trouué là dessus quelques expediens, ils rascherent peu à peu de les mettre en execution, & assiste du diuin secours ils en rassemblerent plusieurs, comme nous verrons cy apres.

Or en ces entre-faictes quelques ieunes hommes Portugais, qui s'estoyent desia habituez au Brasil, voyans le fruit que les Peres faisoient en la conuersion de ces Sauuages, feurent esmeus d'entrer en leur Compagnie pour y seruir Dieu, & selon leur pouuoir ayder au salut desdits barbares. Entr' autres il en y eust vn, ieune Gentilhomme Portugais nommé Pierre Correa, des principaux qui fussent en tout ce pais là; lequel auant la venue des Peres, auoit fait beaucoup de maux aux Brasiliens. Car il fouloit courir, avec vn nauire qu'il auoit, toute la coste du Brasil, & descendant à terre avec vne troupe de soldats qu'il menoit, alloit à la chasse de ces barbares, comme si c'estoyent des bestes sauuages, prenant tous ceux qu'il pouuoit attrapper, & les faisant esclaués, puis les menoit aux Capitainies des Portugais: ou ils estoyent vendus aux vns & aux autres, pour s'en seruir en leurs labourages, engins de sucre, & autres offices semblables. Il pensoit faire vn grand seruice à Dieu en cela, voyant que par ce moyen ces esclaués apprennoient la ciuilité, & souuentes fois aussi se conuer-

se conuertissoiēt à la foy Chrestienne, demeurans parmy les Portugais. Mais après que les Peres luy eurent remonstré l'injustice qu'il commettoit en cela, captiuant contre tout droict & raison ces pauvres gens, qui ne luy faisoient aucun tort, il resolut de recompenser le mal, qu'il leur auoit fait en leur faisant tout le bien, qu'il pourroit. Il entra doneques en ladiete Compagnie, *Entre en la Compagnie de JESUS.* pour vacquer selon son pouuoir au profit spirituel de ces barbares, comme il fit tout le temps qu'il suruesquist, apres qu'il fut entré en religion: tellement qu'il employa, non seulement ses travaux, mais sa vie mesme, & son propre sang, pour le salut d'iceux, comme nous allons dire tout maintenant. Il estoit si bien versé en la langue du pais, que pour ceste cause les Brasiliens l'appelloient le maistre du parler. Ce qui ayda beaucoup, tant les Peres qui apprirent plus aisément ceste langue par son moyen, que les barbares mesmes, ausquels à raison de son beau parler, il faisoit mieux entendre les choses de nostre sainte foy, & les leur persuadoit plus aisément. Tout ce que dessus aduint durant le Gouuernement de Thomas de Sousa: sur la fin duquel vn autre *Autre querelle entre les Portugais & Brasiliens.* différent ou querelle suruint entre les Portugais habitans de la ville du Sauueur, & les Brasiliens qui demouroient pres d'icelle, qui empescha pour vn temps le cours de l'Euangile. Car les Brasiliens s'estans reuoltéz contre le Roy de Portugal, il n'y auoit moyen de les instruire en la foy ny aux bonnes mœurs. Toutesfois les affaires ayant esté bien tost apres remises en leur premier estat, l'instruction & conuersion des originaires, reprint aussi son train, comme deuant. Là dessus vint de Portugal vn nouveau Gouuerneur nommé Edouard d'Acosta, & avec luy quelques autres Peres de ladiete Compagnie, pour trauailler en ceste nouvelle vigne de nostre Seigneur. C'estoient les Peres Louys de Grana, Blaise Laurens, Gregoire Serran, & Iean Gonzale, tous quatre Portugais, avec les Peres Antoine Velasquez Espagnol, & Ioseph d'Anchieta Viscaïn, qui depuis fut Prouincial du Brasil. Avec l'ayde de ces nouueaux ouuiers, il y eût moyen d'amplifier d'auantage le Royaume de nostre Seigneur: tellement qu'on bastit quelques autres Eglises, & noméement en vn village nommé Paratininga, là ou il pleust à la diuine bonté donner credit & autorité à sa foy par le moyen d'vn miracle, qui aduint en la *Six Peres de la Compagnie arrivēt au Brasil.* maniere suyuant. La guerre estant fort eschauffée entre les habitans de ce bourg, & quelques autres peuples circonuoyfins,

comme ceux de Paratiniuga estoient sortis pour donner la bataille, ils se vont veoir enuironnez d'une si grande multitude d'ennemis, qu'ils perdirent incontinent courage, & toute esperance d'euaider, ne sçachans quel conseil prendre. Mais il y eust vne femme, qui se trouua en leur troupe, d'un cœur masle & genereux : laquelle auoit esté baptisée vn peu auparauant, & accompagnoit son mary à la guerre. Icelle donc voyant vn tel trouble en ceux de son party, se met à les encourager & à leur dire, qu'ils eussent à s'armer du signe de la sainte Croix, comme les Chrestiens faisoient : les asseurant, que s'ils donnoient la bataille aux ennemis, estans munis de ceste armure celeste, ils emporteroient la victoire sans faute. La chose aduint tout de mesme, qu'elle leur auoit predict. Car si tost qu'ils se furent armez du signe de la Croix, qui faict mesme trembler les Diables, ils conceurent vne si grande esperance de la victoire, qu'ils donnerent teste baissée contre leurs ennemis, avec vne telle roideur, qu'ils les mirèrent tous en fuite, & en firent vn grand carnage, sans qu'aucun d'iceux eust esté blessé, horsmis deux, qui n'auoient tenu compte des aduertissemens de ceste femme Chrestienne : lesquels furent lardez de coups de fiesches : & l'un d'iceux en mourut.

Le Gouverneur fait chercher des mines d'or.

Le Pere Azpilcueta descend.

En ces entre-faictes le Gouverneur du Brasil pensant trouuer quelques minez d'or ez pais mediteranees, y enuoya quelques vns de ses soldats avec des artisans, pour en faire la recherche. Le P. Iean d'Azpilcueta y alla quant & eux, par le commandement de son Superieur : afin d'auoir soing & cure du salut de leurs ames. En ce voyage ils furent tourmentez & affligez de beaucoup de miseres, comme c'est la coustume, & apres auoir long temps erré çà & là, sans aucun profit, & avec beaucoup de peine, ils s'en retournerent à la ville du Sauueur, non pas plus riches, mais bien plus las & recreus du travail : dont le P. Azpilcueta tomba en vne maladie, qui l'alla consommant petit à petit, iusqu'à ce qu'elle eut mis son corps en la fosse, son ame s'en volant au ciel, comme il est à croire, veu la sainte vie, qu'il auoit mené, & les grands travaux, qu'il auoit souffert, pour l'amour de Nostre Seigneur, mesmement à cultiuer cette sienne vigne du Brasil. Sa mort causa vn grand regret non seulement aux Portugais, mais encore aux Brasiliens, qui desia l'affectionnoient merueilleusement, à cause qu'il les instruioit avec vne grande douceur & facilité.

Or comme le bruit de ce que luy & les autres Peres faisoient :

pour l'instruction & conuerſion des Braſiliens à la foy, euſt eſté eſpandue en diuerſes contrées du Braſil, il arriua à la cognoiſſance des Cariges & Ibiragiâres, qui ſont certains peuples habitans en l'Amerique interieure fort dociles, & debonnaires de leur nature: leſquels eſtans deſia aſſez enclins à embraffer la diuine loy, dont ils auoyent ouy parler à quelques Eſpagnols, qui habitoient aupres de la riuiere du Paraguay, qui eſt la meſme que celle de l'argent, ou bien vn bras d'icelle; & comme leur deſir croiſſoit de iour a autre, il y en eut plus de deux cés d'entre eux, qui reſolurent d'entreprendre vn voyage bien long & dange-reux, pour aller trouuer les Peres, qui demeuroient à la Capitainie de S. Vincent: afin d'eſtre par eux inſtruits en la foy de Ieſvs CHRIST. Quelques Eſpagnols ſe meirent en leur compagnie pour leur ſeruir de truchemens. Le chemin n'eſtoit pas moins que de cent cinquante lieues, & ſi falloit paſſer par un pays habité de gens cruels & barbares. Si eſt-ce qu'ils ne tindrent aucun compte de ces dangers, pour pouuoir iouyr de la lumiere de la foy. Mais noſtre Seigneur les voulut recompenser de leur bonne volonté, accourciſſant leur voyage. Car il permit qu'ils reçeuſſent en chemin le baptême de ſang, au lieu de celui d'eau: & par ce moyen les amena à la lumiere de ſa gloire, au lieu de celle de la foy, qu'ils cherchoient avec tant de trauail. Brief ils trouuerent en chemin la fin de leur carrière, autant heureuſe, qu'ils euſſent ſçeu deſirer. Car les Tupinaquins ou Tupini-quins, qui ſont certains peuples fort barbares & cruels, les ayâs ſurpris en chemin, les maſſacrèrent preſque tous: tellement qu'ils furent lauez en leur propre ſang, qui ſeruit en lieu de baptême, eu eſgard à l'intention, avec laquelle ils auoient entrepris ce voyage. Et de fait, on dit qu'ils moururent avec ſi grande conſtance, & confiance d'arriner par ceſte voye à la felicité eternelle, que tandis qu'on les meurtriſſoit, ils diſoient à leurs ennemis: Taillez, taillez hardiment, & coupez à voſtre plaifir ces membres puants & periffables; car quant aux âmes, vous n'empescherez pas, qu'elles n'aillent aujourd'huy veoir leur Createur. Voila donc comment pluſieurs d'iceux furent meurtris, & quelques autres faits priſonniers, pour eſtre engraiſſez, & puis mangez, ſelon la couſtume de ces barbares. Il y euſt vn Eſpagnol ſeulement, qui eſchappa, & en vint porter les nouuelles à la Capitainie de S. Vincent, ou il racôta tout ce que deſſus aux Peres, qui demeuroient là,

*Cariges
& Ibi-
ragiâres
peuples
de l'A-
merique*

*Deux
cens d'i-
ceux en-
trepren-
nent vn
lûg voya-
ge pour
ſe faire
inſtruire
en la
foy.*

*Sont tuez
en che-
min par
les Tu-
pina-
quins.*

*Quel-
ques vns
ſont faits
priſon-
niers.*

*Pierre
Correa
s'en va
les de-
liurer.*

lesquels furent d'aduis d'enuoyer au plustoit vers les Tupina-
quins Pierre Correa, celuy duquel nous auons parlé cy deuant,
qui estoit si bien entendu en la langue Brasiliëne, à celle fin qu'il
addoucit ces barbares, & leur persuadast de mettre en liberté les
prisonniers, qui n'estoient pas encore mangez. Ce qu'il fit par la
grace de Dieu si heureusement, que les ayant amadoüés avec
douces parolles, il deliura de leurs mains deux autres Espagnols,
qu'ils tenoient en prison: & les amena quant & soy à la Capitai-
nie de S. Vincent. Or il s'affectionna tellement aux Cariges,
ayant ouy de si belles qualitez d'iceux, qu'il supplia instamment
le Pere Nobrega son Superieur, de luy permettre, qu'il s'en allast
faire la descouuerte de ce peuple, & veoir la disposition qu'il y
auroit, pour y planter la foy de IESVS-CHRIST. Le P. Nobrega
luy octroya finalement ce qu'il demandoit, & luy bailla pour
associé vn autre frere de la mesme Compagnie nommé Iean So-
sa, qui estoit lors cuysinier de la maison, homme doué d'une ver-
tu fort solide, & sur tout de tres-grande charité, humilité, & pa-
tience. On leur prescriuit le temps, dans lequel ils deuoient estre
de retour, à sçauoir les festes de Noel de l'an 1554. Ils endure-
rent beaucoup par les chemins, & coururent de grands hazards
de leur vie; toutesfois ils arriuerēt à la parfin au pais des Cariges:
ausquels ils se mirent tout incontinent à prescher l'Euangile, &
dans peu de temps ils y firent vn tel profit, que presque tous
estoient resolués d'embrasser la loy diuine, non seulement le sim-
ple peuple, mais encore les principaux d'entr'eux; & desia ne te-
noient aucun compte de leurs superstitions anciennes, se mon-
strans de iour en iour plus eschauffés à recevoir le Baptisme.

*Il est
puis a-
pres en-
uoyé aux
Cariges
avec tel
Sosa.*

*Il fait
grand
fruit.*

Là dessus le temps estant escheu, auquel Correa & Sosa de-
uoient s'en retourner, ils voulurent reprendre leur route, pour
aller querir quelques autres de la mesme Compagnie, qui vin-
sent les ayder à la pesche des ames: mais nostre Seigneur les vou-
lant recompenser des trauaux, qu'ils auoient desia endurez pour
son nom, leur donnât, auant que partir de ce pais, la couronne du
martyre & de gloire, en la maniere qui s'ensuit. Ils auoient mené
quant & eux vn certain Espagnol, lequel Correa auoit vn peu
auparauant tiré des mains, & de la gueule des Tupinaquins, qui
le tenoient prisonnier, & le faisoient engraisser, pour le deuorer
par apres. Cestuy-cy donc auoit tellement gagné, par ses fines-
ses & subtilitez, la bonne grace des Cariges, pendant qu'il y fut

*Ingrati-
tude &
desloyau-
té nota-
ble.*

avec Correa, qu'il faisoit de ce peuple tout ce qu'il vouloit. Or
 d'autant qu'il luy auoit faict quitter auât qu'arriuer aux Cariges,
 vne garche qu'il trainoit tousiours avec soy, afin de ne donner oc-
 casion de scandale à ces nouueaux pretendans au Christianisme,
 l'autre fust si despité de cela, qu'il resolut de faire mourir celuy
 qui luy auoit sauué la vie. (Tât est aueugle cete passio desbordée) *Au-
glements
d'un lu-
xurieux.*
 À ces fins il sema vn faux bruiet parmy les Cariges, disant que
 Correa & son compagnon auoyent conspiré leur ruine, & s'e-
 stoyent accordez avec leurs ennemis voisins, pour les faire tous
 massacrer, que s'ils les en laissoient aller, ils verroyent bien tost
 tomber sur eux le malheur, qui leur pendoit à l'oreille, & que ces
 deux leur brassoyent. Les Carriges qui estoient gens simples, &
 peu malicieux, creurent aysement les fourbes, que ce meschant
 garnement & trahistre leur donna, de façon que Correa & Sofa
 commencerét d'estre autant hays de ce peuple, à cause des faux
 rapports de l'Espagnol, qu'ils auoyent esté aymez auparavant.
 Voulans donc s'en retourner à la Capitainie de S. Vincent, d'où
 ils estoient venus, pour en ramener d'autres de la mesme Com-
 pagnie: afin de baptiser & instruire mieux en la foy les Cariges,
 quelques vns les vont guetter au pas, pour les assassiner. Correa
 & Sofa ne pensans point qu'on leur tramast vne telle trahison,
 arriués qu'ils furent au lieu ou on les attendoit, ils se veirent sou-
 dain assaillis de ces guette-pas, lesquels tuerent premierement
 deux Brasiliens, qui les accompagnoient, leur ayant tiré de loing
 quelques coups de fleche. Sofa cōpagnon de Correa voyāt qu'ils
 y alloient à bon escient, se met à deux genoux: afin de receuoir
 la mort plus deuotement, pour l'amour de nostre Seigneur. En
 telle posture il fust percé d'outre en outre de quelques coups de
 fleche, & rendit ainsi l'ame à son Createur, pour estre couronnée
 de gloire. Celuy-là estant mort, les mesmes barbares bandent en-
 core leurs arcs contre Correa; lequel bien qu'il eust reçu deuant
 quelques coups de dard, raschoit neantmoins de les addoucir
 avec vn bon visage, qu'il leur mōstroist, & de bōnes parolles: mais
 eux au contraire poür les bonnes parolles luy rendoyent force
 coups de fleches. Lors mettant les genoux en terre, cōme son cō-
 pagnon, il laisse son bourdō à part, & leuant les yeux & les mains
 au ciel, se met à prier Dieu pour ceux qui le massacroyent, & en
 tel acte passa-il de ce monde en la gloire. Mais voyons cependant
 ce qu'on proiectoit en Europe pour le salut des Brasiliens.

*Pierre
Correa
& Jean
Sofa
martyri-
sez par
les Cari-
ges.*

Trente-neuf Religieux de la Compagnie de Iesvs, avec le P. Ignace d'Azebedo leur Prouincial, s'en allans au Brasil sont massacrez pour la foy Catholique, par Iacques Sore, & quelques autres Calvinistes partis de la Rochelle.

CHAPITRE XXV.

*Le P.
Ignace
d'Aze-
bedo Por-
tugais
destiné
visiteur
du Brasil*

LE P. François de Borgia, premierement Duc de Gandie, & depuis Religieux de la Compagnie de Iesvs, ayant esté esleu General de la mesme Compagnie l'an 1565. & ne pouuant luy mesme en personne aller visiter, comm' il eust bien desiré, toutes les Prouinces d'icelle, il enuoya par tout des Peres, qui les visitassent en sa place. L'un d'icieux fust le P. Ignace d'Azebedo, natif de la ville du Port en Portugal, personnage non moins illustre pour sa vertu, que pour son extraction & noblesse : lequel il enuoya à la Prouince du Brasil, pour consoler ceux qui estoient là, cultiuâs ceste vigne de nostre Seigneur, avec tant de trauaux & dangers. Il luy recommanda sur tout, de voir ce qui seroit necessaire, pour continuer & aduancer l'œuure encommencée de la conuersion des Brasiliens. Le P. Ignace s'acquita deuëment de sa charge, au grâd contentement & satisfaction d'un chacun : & apres auoir accomply sa visite, s'en retourna en Portugal, & de là s'en alla à Rome, pour rendre compte à son General, de ce qu'il l'auoit enchargé, luy remonstrant entre autres choses, que pour faute d'ouuriers, en ce pais là sur tout, beaucoup d'ames estoient priuées du salut eternel. Or en passant par le Portugal, lors qu'il alloit à Rome, il trouua force ieunes hommes, tant de la Compagnie, que de seculiers estudians en l'Vniuersité d'Euora, qui le prierent instamment de les vouloir mener quant & luy au Brasil, & leur impetrer cela du P. General, desireux d'employer leurs forces, tant du corps que de l'esprit, pour la gloire de la diuine Majesté, & le salut de ceste nation. Le Pere donna bonne esperance tant aux vns qu'aux autres, d'accomplir leur desir, remettant le tout à son retour de Rome. Là où estant arriué, apres qu'il eust fait sçauoir au mesme Pere General, tout ce qu'il auoit fait en la commissiō qu'il luy auoit baillée, il luy fist aussi entendre la grande faute qu'il y auoit de gens, qui s'employassent à la conuersion des Brasiliens : à cause que le pays estoit de grande estendue, & les lieux,

esquels on deuoit assister, en grand nombre, & fort esloignez les vns des autres: & n'y auoit quasi personne, qui s'occupast à ayder les originaires du païs és choses de leur salut, hors-mis ceux de la Compagnie. Partant qu'il luy sembloit du tout necessaire, qu'on receut des Nouices là mesmes: car il n'estoit pas possible d'enuoyer tous les ans d'Europe tant de gens, comm' il eust esté besoin: & pource qu'il falloit dresser au Brasil vn Nouitiat, & vn Seminaire d'Estudiâs de ladite Compagnie, afin qu'on y peust esleuer & instruire la ieunesse qu'on y receuroit, tant en vertu qu'aux lettres.

Le P. General ouyt fort volontiers le rapport, qui luy fust faict de l'estat du Brasil, & approuua grandement l'aduis du P. Ignace: mais cependant qu'on establiroit là vn Nouitiat, & vn Seminaire pour les Estudiâs, il voulust pouruoir à la necessité presente. Partant il luy ordonna de s'en retourner au Brasil en tiltre de Prouincial, pour establiir toutes ces choses, luy donnant commission & pouuoir de prendre en chasque Prouince de la Compagnie d'Espagne, certain nombre de subiects, qui vouldroyent aller avec luy au Brasil. Outre ce il luy permist de receuoir en la Compagnie tous ceux, qui vouldroyent le suiure, pourueu qu'il les trouuast aptes & idoines à cest' entreprise, tant parce qu'il n'y auoit pas encore assés de Religieux de ladite Compagnie desia faicts, qui peussent aller au Brasil, sans laisser en arriere plusieurs autres affaires, qu'ils auoyent en main de grande consequence pour le seruice diuin, comm' aussi pource qu'il estoit expedient qu'aucuns de ceux qui iroyent là, fussent ieunes gens, pour s'accoustumer plus aisement à l'air du païs, & pour apprendre aussi la langue. Le P. Ignace ayant esté expedié de la sorte, auant que partir de Rome, voulut visiter le S. Pere qui estoit lors Pie V. tant pour luy baïser les pieds & receuoir sa benediction, que pour obtenir quelques Indulgences de sa Saincteté. Le Pape le receut fort amiablement, & luy octroya Indulgence pleniere, pour luy & pour ceux qui iroyent au Brasil, avec intention d'y faire quelque seruice à nostre Seigneur. Il luy donna aussi force Agnus-Dei, beaucoup de reliques des Saincts, & entr' autres vne tette des vnz mille Vierges: & (ce que le Pere estima dauâtage) luy permist de faire tirer vn pourtrait de l'image de nostre Dame, laquelle on tient auoir esté peinte par l'Euangeliste S. Luc, qui se void à Rome en l'Eglise de nostre Dame appellée *Maria Maior*, ce que

iufqu'à lors, ny les Papes, ny ceux qui en auoyent charge, n'auoyent voulu permettre à perfonne: afin que ladite Image eftant feule fust plus eftimée & reuerée d'un chacun. Party qu'il fust de Rome avec tant de richesses fpirituellen, il s'en va par les Prouinces d'Efpagne, affemblant tous ceux qu'il pouuoit, & finalement arriue en Portugal, ou il en trouue auffi vn bon nombre, qui se ioignirent à luy: de façon que comptant non feulement ceux qu'on luy bailla, mais encore les autres qu'il receut pour Nouices, il auoit amassé 69. fubicts: entre lesquels il en y auoit quelques vns, qui estoient defia Prestres, les autres partie Escholiers, ou de Theologie, ou de Philosophie, partie Coadiuteurs temporels de diuers offices. Vn entr'autres qui estoit excellent peintre, auquel on fist tirer 4. pourtraicts de cest image de nostre Dame, que nous auons dict, l'un desquels fust pour le College de Coïmbre, l'autre pour celuy d'Euora, le troisieme pour la maison Professe de S. Roch de Lisbonne, & le quatrieme pour la Prouince du Brasil.

*Valde-
rosalieu
ous'as-
blēt ceux
qui de-
uoient
aller au
Brasil.*

Or d'autant que la flotte, avec laquelle ils deuoyent partir, estoit conduite par celuy, qui alloit en tiltre de Gouverneur commander en ceste Prouince là, au nom du Roy de Portugal, le P. Ignace d'Azebedo, apres auoir fretté à la ville du Port, la moitié d'un vaisseau, tandis que le reste de la flotte & son nauire s'apprestoient, assembla la pluspart de ses gens à Valderosal, qui est vn lieu champestre, appartenant au College de Lisbonne de la mesme Compagnie. Pendant qu'ils furent en ce lieu, ils menoyēt vne vie plustost Angelique qu'humaine: car ils employoient la pluspart du temps, ou à l'oraison & meditation des choses celestes, & diuines, ou à la lecture des liures de deuotion, accompagnans ces actes de pieté de plusieurs autres de mortification, comme ieusnes, disciplines, cilices, haires & semblables exercices de poenitence, se disposans de telle sorte à leur voyage du Brasil, ou plustost à celuy du Ciel, ou ils arriuerent par le moyen du martyre, qu'ils receurent en chemin, comme nous dirons bien tost. Il semble aussi que nostre Seigneur les alloit preuenant & fortifiant au combat, avec si grande affluence des consolations celestes, qu'on pouuoit coniecturer par là, qu'il vouloit oindre de l'huyle de ioye & de lieffe ses chāpions, pour batailler plus courageusement; si bien que le P. Ignace disoit souuent, qu'il n'esperoit point auoir iamais en sa vie tant de contentement d'esprit, qu'il sentoit lors: si grandes

si grandes estoient les faueurs, que la diuine bonté luy departoit. Les lettres, qu'il escriuoit de là à diuerses personnes, le tesmoignoient assés: car elles estoient si embrasées du feu de deuotion, qu'en les lisant on se sentoit tout eschauffé en icelle. Le temps de partir estât proche, son nauire du Port n'estoit encor arriué, & toutesfois le Gouverneur estoit avec sa flotte, quasi à point pour demarer. Le Pere se voyant pressé du temps, prend resolu-^{partem} tion de faire voile avec la flotte, sans attendre son nauire, com-^{de Val-} bien qu'il estoit fort marry de laisser en arriere quelques autres ^{derosai} de la Compagnie, qu'il attendoit avec son vaysseau; tellement ^{et vont} qu'il prie instamment nostre Seigneur de faire en sorte, qu'ils ^{à Lis-} vissent à temps, pour s'en aller tous ensemble. Cepédant il part ^{bonne.} de Valderosai avec ceux, qu'il auoit quant & soy; tous lesquels s'en allerent à Lisbonne, pour donner ordre à leur embarquement, resolu, puis que leur nauire tardoit tant à venir, de se mettre dans les autres, que le Gouverneur menoit.

Desia le Pere auoit accommodé ses gens en diuers nauires, quand on l'aduisa, que la nef qu'il auoit fretée en la ville du Port estoit arriuée, & dans icelle ceux qu'il attendoit. Ce qui le resjouïst merueilleusement: car il portoit fort à regret de partir sans eux. Il fait donc soudain retirer les hardes, qu'on auoit mises dās les autres nauires, pour en charger le sien, qu'on nommoit le nauire de Saint Iacques, dans lequel il s'embarque avec autres 44. ^{S'embar-} de la mesme Compagnie, laissant le P. Pierre Diaz avec 20. au- ^{quent en} tres dans celuy du Gouverneur; & le Pere François de Castre avec ^{diuers} le reste, dans la nef qu'on appelloit des Orphelins, à cause que là ^{nauires} dedans on menoit vn grād nombre de petits enfans & filles, qui ^{69. en} estoient restez sans pere ny mere, à raison de la contagion, qu'il ^{tout.} y auoit eüe quelque temps auparauāt à Lisbonne, fort estrange: car le Roy auoit commandé qu'on les portast au Brasil, pour peupler ce pais là. Or ceux de ladiète Compagnie, diuïsés en ces trois nauires, estoient en tout 69. sans compter quelques vns, qui les accompagnoient, avec desir d'estre reçus en icelle, quand ils feroient arriuez au Brasil. Estans tous embarquez, le P. Ignace voulut dresser dans son nauire l'ordre, qu'on gardoit aux Colleges, puis qu'il l'auoit fretté par moytié, & à ces fins il fit agençer d'un costé & d'autre d'iceluy quelques chambrettes, laissant au milieu comme vn courtoir, pour seruir de refectoire. Il print aussi charge du foyer, afin que luy & ses compaignons eussent

moyen d'exercer les offices de charité & d'humilité, faisant cuire les viandes pour tous ceux du nauire. L'on sonnoit vne clochette, quād il falloit se mettre en oraison, ou s'employer à quelqu'autre exercice de pieté, & semblablement pour tout le reste, qui estoit de la communauté, comme s'ils eussent esté dans vn College. Pour ayder les passagers & autres gens du nauire, il ordonna, que tous les iours on enseignast publiquement la doctrine Chrestienne: & luy mesme le fit les premiers iours; de façon que pour le respect & l'affection qu'un chascun luy portoit, il n'y auoit personne qui n'y assistast, depuis le Capitaine & maitre du nauire, iusques au moindre de tous les matelots; & vn chascun d'eux estoit bien aisé d'estre interrogé, comme s'il eut esté vn petit enfant. Au soir on chantoit les Litanies en musique: car il y auoit de bons musiciens, & tous ceux du nauire y assistoient, de mesme façon qu'a la doctrine Chrestienne. Les Dimanches & autres festes, le Pere faisoit dresser vn autel au plus haut du chasteau de la poupe, paré de beaux ornemens: car il en auoit fait bonne prouision. Il mettoit sur ledit autel, l'Image de nostre Dame, qu'il auoit portée de Rome, & chantoit avec toute la solemnité qu'il estoit possible, la Messe seiche, qu'on appelle, c'est à dire sans consacrer. Car il n'est pas loisible, suyuant les loix de l'Eglise, de faire la consecration sur mer. Mais il faisoit chanter en musique, ce qu'on a accoustumé de dire tout haut, & sur la fin de la Messe, apres auoir quitté la chasuble, il faisoit vn petit sermon ou exhortation, qui estoit ordinairement de la charité, de laquelle son ame estoit tout'embrazée. De ceste sorte les passagers & autres du nauire, estoient si modestes & si bien rapportés en leurs actions, qu'ils sembloient estre tous des Religieux. Car ils viuoient en grande paix & concorde, & n'y auoit entr'eux aucunes riotes ny débats, ou querelles. Vn chascun se monstroient fort deuot & soigneux d'entendre les sermons, de dire le chapellet, & d'exercer plusieurs autres œuvres de pieté. Le mesme quasi pratiquoient les deux Peres, qui estoient és autres nauires, selon la commodité qu'ils en auoient.

La concorde & deuotion de tous ceux dedans.

La flotte partit le 5. de Iuin de l'an 1570. composée en tout de 7. nauires. L'admiral d'icelle, qui debuait aussi estre Gouverneur du Brasil, estoit Don Louys de Vasconçel, Gentil-homme d'honneur, & de valeur: lequel s'estimoit heureux d'estre en la compagnie de tant de bons Religieux. Ils arriuerent en 7. iours

D. Louys de Vasconçel Gouverneur du

à l'Isle de Madere fort heureusement. Le P. Ignace sortit du navire avec quelques autres, & s'en alla au College de la mesme Compagnie, qui estoit desia estably en cest' Isle, là ou ils furent, selon leur coustume, reçeus & traictez avec grande charité. Et pendât le temps que la flotte sejourna en ce port, qui fut vne vingtaine de iours, tantost les vns, tantost les autres, alloient au College. Or d'autant que la nef de S. Iacques, ou estoit embarqué le P. Ignace avec la plus part de ses gens, debuoit aborder à l'Isle de la Palme, qui est vne des Canaries, pour descharger partie des marchandises qu'elle portoit, & qu'à ceste occasion il falloit se separer du reste de la flotte, laquelle se debuoit arrester encore quelques iours à l'Isle de Madere, afin que ladiete nef eust deschargé lors que les autres s'approcheroient des Canaries. Le P. Ignace ayant ouy dire que certains Corsaires de la Rochelle rodoient tout à l'entour desdictes Isles, auisa tous ceux du navire, du danger, auquel ils estoient, les exhortant à se cōfesser & communier, avant que partir de l'Isle de Madere : afin qu'ils fussent mieux prests & appareillez pour mourir, si besoing estoit. Là dessus il assemble à part tous les compagnons, & leur dict, comm' il auoit entendu, qu'au voyage qu'ils deuoient faire, ils estoient pour rencontrer des escumeurs de mer Caluinistes : lesquels estans ennemis iurez des Catholiques, taschoient de leur raur, non seulement les moyēs, mais aussi les vies. Partant qu'ils se tinssent prests pour mourir, si besoing estoit, pour la deffence de la foy, & que s'il en yauoit aucun d'eux, qui ne se sentit pas assez fort, & resolu à cela, qu'il l'aduist de bōne heure: car il le lairroit avec les autres navires. De 44. qu'ils estoient en sa nef, il en y eust tant seulement 4. qui se monstrerent lasches, & eurent peur du danger, si qu'ils demanderent d'attendre encore à l'Isle de Madere, avec le reste de la flotte. Ce que le Pere leur accorda tres-volontiers. Tous les autres se resolurent courageusemēt de suyure leur chef, & s'il estoit question, d'espandre leur sang, pour l'honneur & gloire de leur souuerain Capitaine IESVS-CHRIST nostre Sauueur. Quant à ces 4. qui aymerent mieux s'arrester, aucun d'iceux ne perseuera en sa vacation : tant incomprehensibles sont les iugemens de Dieu. De façon qu'on void par là estre tres-veritable, ce que souloit dire le B. François Xavier, qu'un singulier remede contre les vaines craintes, & terreurs, que le Diable nous met deuant les yeux, est de ne se monstrer point lasche de

*Brasil,
& Ad-
miral de
la flot-
te.
Arrive
à l'Isle
de Ma-
dere.*

*Le navi-
re Saint
Iacques
doibt al-
ler aux
Canaries*

cœur ny craintif, ains magnanime & courageux, mettant toute sa confiance en Dieu: puis que le Diable ny ses ministres ne nous peuuent en rien nuire, si non entant qu'ils ont permission de Dieu: lequel ne permettra point, que soyons tentez par dessus nos forces. Car se monstrier coïard & desiant de l'ayde de Dieu en semblables occurrences, n'est autre qu'ouurir la porte à l'ennemy, pour nous battre à son plaisir, & nous faire perdre les graces que Dieu nous a données, comm' il en print à ces Nouices: lesquels pour ne s'estre entierement iettez entre ses mains, avec telle confiance qu'ils debuoiert de son ayde & secours, comme firent les autres, ils vindrent à perdre la couronne du martyre, qui leur estoit si proche, & ensemble l'estat de Religion, qu'ils auoient tant pourchassé. Au demeurant ceux, qui restèrent avec le Pere, tant de la mesme Compagnie, que des autres du nauire, tous se confessèrent auant partir, & reçurent le precieux corps de IESVS-CHRIST, la veille des Apostres S. Pierre & S. Paul. Le Pere aussi leur distribua quelques Agnus-Dei, & autres choses de deuotion, qu'il auoit portées de Rome, les encourageant à estre constans en la foy, & au seruice de nostre Seigneur. Le lendemain iour & feste des bien-heureux Apostres S. Pierre & S. Paul, comm' ils voulurent s'embarquer, & prendre congé de ceux qui demeueroient avec le reste de la flotte, ils s'entr'embrasferent les vns les autres avec telle abondance de larmes, qu'ils sembloient deuiner qu'ils ne se verroient iamais plus en terre. Le nauire donc de S. Iacques prent sa route droit vers l'Isle de la Palme, & eust vn bon vent les sept premiers iours: durât lesquels ceux qui estoient dedans, ne faisoient que parler entr'eux de la couronne du martyre, monstrans vn grand desir d'en estre participans (mais sur tous le P. Ignace) & s'encourageans les vns les autres, disoient entr'eux mesmes: O s'il plaisoit à Dieu nous faire la grace de rencôtrer en chemin ce que nous allons querir si loing, que d'endurer le martyre pour la foy de IESVS-CHRIST! O que nous serions heureux! ô le iour fortuné pour nous! Ce seroit bien arriuer aux Isles fortunées, non pas de la terre, mais du ciel. S'entretenans en tels & semblables propos ioyeusement, & avec grande consolation, ils se trouuerent à deux lieuës seulement loing de l'Isle de la Palme. Mais lors vn vent contraire s'esleua, de façon qu'il ne leur fut aucunement possible d'y aborder pour lors: toutesfois ils vindrent en fin surgir à vn port, qui estoit

*Le Pere
Ignace
avec 39.
autres
de ses
compagnons
prend la
route des
Canaries.*

*Arriué à
l'Isle de
la Palme.*

derriere l'Isle nommée Terza cohorte, là où ils auoyent intention d'attendre le vent propre, pour arriuer au port de la Palme, qui est le principal de l'Isle, auquel on deuoit exposer les marchandises. Or en ce lieu où ils estoient abordez, ils vont par cas fortuit rencontrer vn Gentilhomme de marque & de moyens, qui auoit esté nourry & esleué en son ieune aage à la ville du Port, en cōpagnie du P. Ignace d'Azebedo, lors qu'il estoit aussi ieune enfant, tellement qu'ils auoyent esté grands amis ensemble. Cē Gentilhomme fust extremement ayle de voir le Pere en ce pais là, où il estoit bien assorti des commoditez de ceste vie, & le mene en sa maison, où il luy fit tres-bonne chere, & à ses cōpagnons aussi, durant quelques iours. Mais quand il fust question de partir il pria instamment le Pere, de vouloir prendre son chemin par terre, iusques à la ville de la Palme, où le nauire deuoit aborder; qui n'estoit qu'à 3. lieues de là, s'offrant de luy bailler des montures, tant pour luy & ses compagnons, que pour le bagage qu'ils portoyent, leur remonstrant qu'ils estoient en danger de trouuer les coursaïres, & de n'arriuer de plusieurs iours avec leur nauire au port, à cause des vents contraires qui regnoient là en telle saison. Le Pere fust au commencement en doubte de ce qu'il deuoit faire: car d'un costé l'affection que ce bō Seigneur luy monstroït, sembloit le forcer à suiure son conseil; del'autre il estoit marry de laisser son nauire & la compagnie, qu'il auoit eue iusqu'à lors. Ce Gentilhomme voyant qu'il estoit en perplexité, l'importuna de telle sorte, que le Pere vouloit vne fois descendre à sa volonté; de façon que ceste mesme nuit, il auoit faict porter quelques fardeaux des hardes hors du nauire, pensant le lendemain matin partir avec ses compagnons, pour faire ce chemin par terre: mais auant cela il les voulut tous faire confesser & communier en la Messe, qu'il dict. On ne sçait ce que N.S. luy communiqua durant icelle; mais incōtinent apres qu'il l'eust dictē, il monstra qu'il auoit changé d'aduis. Car il commanda de rapporter toutes les hardes dans le nauire, estant du tout resolu de n'aller point par terre, ains de s'embarquer de nouveau. Ce ne fust pas, à ce qu'on pense, sans vne particuliere reuelation, ou inspiration de Dieu: car il auoit accoustumé de luy recommander au S. Sacrifice de la Messe, les affaires d'importance, desquels il estoit en doubte; tellement qu'il est croyable qu'il en feit autant de cestuy-cy, duquel dependoit la couronne du martyre, qu'il

*Carefles
qu'un
Gentil-
homme
luy fait
en cette
Isle.*

*Communi-
que a-
uec Dieu
en la Sa-
cristie
les affai-
res d'im-
portance.*

*Se tour-
ne em-
barquer.*

obtint en ce voyage. Il print donc congé de ce Gentilhomme, apres l'auoir remercié affectueusement des bons offices, qu'il auoit receus de luy, & entre dans le nauire, qui desmara de ce port le iedy matin. Or apres auoir fait vn grand circuit (auquel ils employerent tout ce iour là, & encore le Vendredy suiuant) le Samedy matin sur la poincte de l'aube du iour ils se trouuerent à deux ou trois lieues du port de la Palme: mais là dessus vn des Matelots commence à crier, qu'il voyoit vne grosse nef venant tout droit à eux, & avec grande viffesse. Vn peu apres il en decouurist autres 4. plus petites. Au cōmencement on pensoit que ce seroit la flotte du Gouverneur du Brasil, mais estant arriuées plus près, on cogneut que c'estoyent des voiles Françoises, & (comme l'on sceut par apres) c'estoit la flotte d'un Coursaire François fort fameux, & redouté en toute ceste mer, à cause des voleries & brigandages, qu'il auoit executé sur plusieurs nauires. Les Portugais l'appelloient Iacques Soria: mais il se nommoit Iacques Sore natif de la Comté d'Eu en Normandie, près du Pôt Orson. Il faisoit profession du Caluinisme, & soy disant ennemy juré de tous les Papistes, c'est à dire de ceux qui recognoissoyent N.S.P. le Pape pour chef de l'Eglise vniuerselle, estoit party de la Rochelle pour leur courre sus, avec cinq nauires bien equippees & armées: car dedans son galion seul il auoit plus de trois cens soldats bien duiets & exercez aux armes, & le galion estoit fourny de plusieurs grosses pieces d'artillerie. Or auant qu'arriuer aux Canaries, il auoit esté bien près de l'Isle de Madere: car le 4. de Iuillet on y apporta nouuelles, que Iacques Sore n'estoit qu'à cinq lieues du principal port ou estoit pour lors la flotte, qui alloit au Brasil. L'Admiral d'icelle Louys de Vasconcel entendant cela fait viftement armer dix nauires pour luy aller au deuant: mais s'estans enuifagés, Iacques Sore craignant de n'auoir du pire, se retira sans oser attaquer les Portugais, lesquels aussi ne poursuirent pas plus loin l'ennemy, se contentens de l'auoir mis en fuite. Mais l'autre s'en va de là aux Canaries, & arriue dans trois jours, à la vené de l'Isle de la Palme, ou le nauire S. Iacques, auquel estoit le P. Azebedo & ses compagnons n'auoyent peu atteindre dans quinze iours, iasoit qu'il n'y ait que quatre vingts lieues de l'Isle de Madere jusqu'à là, & que leur nauire ne fust pas guere chargé: mais au cōtraire, il en y auoit entre ceux de Iacques Sore de fort chargés, si qu'il semble que N.S. dispoist les choses, pour

*Rencon-
tre la
flotte de
Iacques
Sore Cal-
uiniste
François.*

faire participans de la courõne du martyre, plusieurs de ceux qui estoient en ce nauire, comm'ils furent aussi. Si tost donc que ceux de la nef S. Iacques eurent descouuert, que c'estoit vne flotte d'ennemis & de coursaïres, le Capitaine fit assembler tous ceux du nauire qui pouuoient porter les armes, pour consulter ce qui estoit à faire. Ils resolurent tous de combattre iusqu'à la mort, veu que ceux qui les assailloyent estoient ennemis de la foy Catholique. Ils n'estoyēt pas 40. personnes en ce nauire, qui fussent accoustumez aux armes. Le Pere Ignace ayant sceu leur resolution, alla vers eux, pour les encourager dauantage à tenir bon, leur remonstrant que puis qu'il falloit venir aux mains contre les ennemis de la foy de N. S. & de son Eglise, qu'ils debuoiēt employer volontiers leur vie & leur sang, pour la deffence d'icelle, & mourir comme bons Chrestiens. Apres s'adressant à ses compagnons: Bon courage (leur dict-il) mes tres-chers freres, le cœur me dict que ce iourd'huy nous irons peupler le Ciel, pour regner eternellement avec nostre Redempteur, & la glorieuse vierge Marie sa sainte mere, avec toute la Cour celeste. Ne voyez-vous pas le grand bien, que nostre bõ Dieu nous prepare, & cõme il nous est beaucoup meilleur, qu'au lieu du Brasil nous prenions port en cest haure asseuré de la gloire celeste? Mettõs nous dõc tous en priere, & faisons estat que c'est la derniere heure que Dieu nous donne, pour meriter la vie eternelle, nous disposans à mourir pour son amour. Lors il leuerent au Ciel les mains & les yeux tous trempes en larmes de cõsolation, criãs à haute voix: Ainsi soit-il Seigneur, ainsi soit-il: que vostre volõté soit en nous accomplie, nous voicy prests à donner nostre vie, & nostre sang pour vostre seruice. Cependãt Iacques Sore s'approche avec son Galion, & ceux du nauire se tiennent prests pour le recevoir. Le P. Ignace s'en va pour lors avec 10. ou 12. de ses compagnons les plus courageux qu'il sceut choisir, & se mesle parmy les soldats pour les exhorter à vaillamment cõbattre. Il print pour foy le lieu le plus proche du mast; & de là leur préschoit tenant en main l'image de N. D. qu'il auoit portée de Rome. Quant aux autres il les fit retirer tous, dessous le tillac, afin qu'ils fussent lors en oraison, leur baillant pour Superieur Benoist de Castre, qui estoit comme Maistre des Novices. Tous estans disposez comme dessus, Sore fait accrocher la nef saint Iacques pour y entrer dedans. Le premier qui s'y presenta, fust son Pilote suiuy de deux autres: sur lesquels se tua le Maistre de la nef saint Iacques, aydē de beaucoup d'autres

*Exhorte
ses com-
pagnons
à mourir
constam-
ment pour
la foy.*

*Deuote
offrande
qu'ils
font à
Dieu de
leur vie.*

soldats, qui firent tomber dans la mer ces trois, lesquels avec le poids des armes qu'ils portoyent, & les blessures qu'ils auoyent receues, furent enfondréz & noyez tout aussi tost. Ceste premiere attaque n'ayât pas réussi à l'ennemy, il voulut encore aborder pour la 2. & 3. fois le nauire S. Iacques : mais il fust tousiours repoussé brusquement, iusqu'à ce que les autres 4. vaisseaux estans venus au secours, tous ensemble enuironnent la nef S. Iacques, & y entrent par diuers endroicts plus de 40. soldats tous à la foy. Les Portugais se deffendoient encore vaillamment, & le P. Ignace les encourageoit tousiours de combattre à toute reste, disant : Mourons tous, mes amis, mourons tous pour le seruice de nostre Sauueur, & pour la confession de sa foy, de laquelle ceux-cy sont ennemis iurez. L'un des Huguenots qui estoit entré dedans, entendant cela, descharge vn si grand coup d'espée sur la teste dudit Pere, qu'il la luy ouurist iusques à la ceruelle, mais pour cela le Pere ne desista pas de pouruiure ce qu'il faisoit, ny ne bougea du lieu ou il estoit, demeurant tousiours pied coy, iusqu'à ce qu'il receut trois autres coups de demie picque : desquels se sentant blessé à mort, & tombant sur le tillac, il dict ces parolles à haute voix : Que les hommes & les Anges me soyent tesmoins, comme ie meurs pour la desſence de la sainte Eglise Catholique Apostolique & Romaine, & de tout ce qu'elle professe & enseigne. Ses compagnons qui estoient presens, bien qu'ils vissent leur Capitaine par terre, ne s'estonnerent pas pourtant, ains accoururent à luy la larme à l'œil pour receuoir à tout le moins sa derniere benediction, & il les embrassoit fort tendrement tout trempé en sang, leur disant : Courage mes enfans, ne craignez point la mort : mais remerciez nostre Seigneur, qui vous fait vne si grande grace, que de pouuoir employer vostre vie pour son amour, & puis que nous auons vn si fidelle tesmoin, & si liberal remunerateur, ne soyons point lasches, ny faillis de cœur maintenant, qu'il est temps de batailler pour son seruice. Voila comment il rendit l'esprit à Dieu, tenant tousiours l'image de nostre Dame en ses mains, sans que iamais les Huguenots la luy eussent peu arracher, de façon qu'ils le ietterent avec icelle dans la mer. Les autres voyans l'exemple de leur chef, qui auoit marché le premier, & franchi le fault de la mort ; se presentent aussi courageusement armés mesme pas. Le premier d'iceux fust Benoist de Castro, lequel estant en oraison avec ceux qu'on luy auoit baillez en charge,

comme

comme il entendit le bruiet des ennemis entrans dans la nef à la foule, il print vn Crucifix en main, & s'en va tout droict au chasteau de la prouë, ou estoit le plus fort de la meslée, là ou monstrant aux Huguenots le signe de nostre redemption, qu'ils ont tant en horreur, il leur disoit avec vn grand courage; Je suis Catholique, fils de l'Eglise Romaine, & veux mourir comme tel. Eux entendans ces parolles, de despit & de rage luy tirent trois coups d'arquebuzé, & voyans qu'il continuoît encore à dire le mesme, luy donnent plusieurs coups d'estoc, puis le iettent dans la mer, auant qu'il fut du tout mort. Vn autre de la mesme Compagnie nommé Emmanuel Aluarez, qui encourageoit aussi les soldats au combat, reprenant les Huguenots de leur aueuglement & obstination, fut d'iceux blessé au visage: & apres qu'ils l'eurent estendu sur le tillac, quasi à demy mort, ils luy rompirent les iambes, & luy briserent les os d'icelles: afin qu'il endurast d'auantage. Or estant en ces angoisses, & tournant les yeux vers ses cōpagnons, il leur disoit; Mes freres ie vous supplie de ne me porter point compassion, ains plustost enuie. Car ie confesse n'auoir iamais merité vn si grand bien, que Dieu me faict à present, d'endurer ces tourmens, pour son honneur. Il y a quinze ans, que ie suis en la Compagnie, & plus de dix; que ie luy demande de faire le voyage du Brasil, me disposant à iceluy: & i'estime que mes trauxsont tres-bien recompensés, par vne fin si heureuse. Les Huguenots creuoient de despit entendans ces propos: de sorte qu'ils le ietterent dans la mer, estant aux abois de la mort. Et parce qu'ils en trouuerent deux autres, qui prioient Dieu deuant les Images, qu'ils detestent si fort, ils se ruerent sur eux avec vne rage Diabolique, & avec les pōmeaux des espées rompirent le cran ou l'os de la teste à l'vn d'iceux, qui s'appelloit Blaise Ribere: lequel soudain qu'on luy eut faict sauter la ceruelle, tomba roide-mort: l'autre nommé Pierre Fonséca, ou Fontaura, reçut vn coup de poignard dans la bouche, qui luy auala vne maschoire, & luy couppa la lāgue. Le Pere Jacques d'Andrada, qui estoit Superieur des autres, apres la mort du P. Ignace, ouyot cependant la confession de quelques vns de ses compagnons. Les Huguenots l'ayās trouué sur le faict, & cognoissans par là, qu'il estoit Prestre, furent indignez contre luy d'auantage, mesmement lors qu'ils l'entendirent encourager les autres, & leur dire ces parolles: Mes freres apprestés vos ames: car vostre redemption s'appro-

Martyre de Benoist de Castro.

D'Emmanuel Aluarez.

De Blaise Ribere & Pierre Fonséca.

*Du Pere
Iacques
d'Andrada.*

che ; si qu'ils se ruerent sur luy, & luy donnerent plusieurs coups de poignard : puis le ietterent dans la mer, estant encore à demy viſ. Pendant que ces choses passoient, deux autres de la meſme Compagnie, qui giſoient au liſt malades, ſe leuent le mieux qui leur fut poſſible ; & prennans leurs ſottanes ſur la cheſe, tous deſchaux, & à demy nuds, s'en vont fourrer parmy les autres qu'on maſſacroit, pour ne perdre vne ſi belle couronne : de ſorte qu'ils furent tuez avec les autres pour la meſme cauſe, encore qu'ils euſſent peu facilement euader, s'ils euſſent voulu demeurer coys dans le liſt, ſans dire qu'ils eſtoient compagnons des autres : mais ils aimerent mieux gagner avec eux la couronne de gloire, que iouyr plus long temps de ceſte vie temporelle. L'un d'iceux s'appelloit Gregoire Eſcriuain, & l'autre Aluare Mendes.

*De Gre-
goire Ef-
criuain,
& d'Al-
uare Men-
des.*

Il en y eut encor vn autre appellé Simon d'Acoſta, que les Huguenots penſoient eſtre fils de quelque Gentil-homme, ou autre perſonnage de marque. Car il auoit vn bel entregent, & fort hōneſte façon, n'eſtant aagé que de 18. ans. Iacques Sore le fit pour ceſte cauſe venir deuant ſoy, & l'interrogea, ſ'il eſtoit auſſi des Preſtres Ieſuiſtes. Or bié qu'il eut peu eſchapper diſant que non, veu meſmes qu'il eſtoit entré en leur ordre vn peu auparauant :

*De Simō
d'Acoſ-
ta.*

toutesſois il s'en aduoüa, & dict qu'il eſtoit compagnon, & frere de Religion, de ceux qui mouroiēt pour la foy Catholique Apoſtolique & Romaine, dont Iacques Sore fut tellement indigné, qu'il le fit tout auſſi toſt eſtrangler, & ietter dans l'eau. Les Huguenots s'eſtans rendus maîtres du nauire, commencēt à butiner tout ce, qu'il y auoit dedans. Et comme ils eurent ouuert les coffres & bahuts, eſquels le Peré Ignace auoit enſerré force reliques, Agnus-Dei, chapellerts beniſts, & ornemens d'Egliſe, ils tirent tout cela dehors, & commettent mille indignités contre ces choses ſacrées ou beniſtes : meſmes à l'endroiēt des reliques des Saints, qu'ils mettoient en pieces avec grand deſdain : puis les

*Sacri-
les ex-
ecrables
commis
par les
Hugue-
nots cō-
tre les
choses
ſacrées.*

fouloient aux pieds par deriſion & moquerie, vomiffans de leur puante & deteſtable bouche, vn' infinité de blaſphemes contre Dieu & contre les Saints. Ils executerent tels ſacrilèges, notamment ſur le chef d'une des vnze mil Vierges, que le S. Pere auoit donné au P. Ignace, pour la conſolation de ces nouueaux Chreſtiens du Braſil. Trouuans auſſi là dedans vne piece du bois precieus de la vraye Croix, en laquelle IESVS-CHRIST noſtre Sauueur eſpendit ſon ſang pour noſtre ſalut, ils la ietterent dans

le feu, disans à vn de la Compagnie, qui estoit encor en vie; Regarde chien Papaut, comm' il se brusle. Ayans aussi rencontré vn Crucifix, que le P. Ignace auoit porté de Rome, & le gardoit fort soigneusement, parce qu'il estoit tres-bien faict, & fort deuot, ils executerent sur iceluy des indignités semblables à celles, que les Iuifs firent endurer à nostre Seigneur en sa mort & Passion. Car l'esleuant en haut, ils se mettent à chanter par derision & moquerie, ceste prose ou hymne, qui comence; *O Christe sancte, &c.* & l'ayant posé sur vne table, ils luy donnent force coups de dague, disans vne infinité d'outrages & vilainies audit Crucifix, & par consequent à IESVS-CHRIST, représenté par icelle Image. Finalement ils vont prendre les vestemens Sacerdotaux, & l'un d'iceux s'en estant reuestu, commence à représenter quelques ceremonies de la sainte Messe, & au lieu d'hostie, se seruoit d'un Agnus-Dei; qu'il esleuoit en haut, puis le iettoit sur le plancher par mespris: & tous les autres se mettoient à le poignarder, avec vne rage & fureur diabolique. Tels & plusieurs autres semblables sacrileges furent executés sur les choses saintes & sacrées par ces impies: lesquels, si Dieu ne chastia sur le champ, comme ils meritoient: il ne faut pas estimer pour cela, qu'il approuast leurs actes. Car bien souuent il differe la punition des méchans, pour leur donner loisir de se recognoistre, ainsi que nous verrôs estre aduenü à quelqu'un de ceux-cy plus de vingt & trois ans apres; combien que le chef de tous ces brigands & scelerats Iacques Sore ne fait pas son profit de la grace, que nostre Seigneur luy offroit, l'attendant à penitence. Car il mourut miserablement quelques années apres au Comté d'Eu, ne s'estant iamais voulu recommander à Dieu, combien qu'il fut sollicité & exhorté à ce faire par ses propres parens & amis, qui luy assistoient; ains comme forcené de rage, il rendit son ame detestable avec grande frayeur de tous les assistans. Ainsi que le raconte celuy qui a escrit en François l'histoire de Portugal, qui estoit vn

*Punition
divine
de Iac-
ques So-
re.*

*Voyez
l'histoire
de Por-
tugal en
François
liv. 20.*

Mais d'autre part nous sçauons, qu'un de sa troupe fut conuertie miraculeusement à la foy Catholique, plusieurs années apres, en la ville de Dole, qui est en la Franche-conté de Bourgogne, & il est croyable, que ce fut par l'intercession de ces glorieux Martyrs, de mesme que jadis l'Apostre S. Paul fut gaigné à la foy de nostre Seigneur, par la priere de S. Estienne premier Martyr.

*Conuer-
son mi-
raculeu-
se d'un
de la
troupe
de lac-
ques So-
re.*

à la mort duquel il auoit esté consent. La chose passa de ceste sorte, ainsi que ie l'ay apprise des aduis, qui furent enuoyés de ladicte ville, à ceux de la mesme Compagnie l'an 1594. auquel cecy arriua. L'un donc de ceste troupe se retrouvant lors en la ville de Dole, apres auoir longuement vescu avec telle sorte de gés, faisant tousiours profession du Caluinisme, comm' il fut entré dans l'Eglise de nostre Dame, pour se rire & mocquer d'une procession, qu'on y faisoit à l'honneur de ceste Sainte Vierge, voila soudain qu'il commence à trembler de tous ses membres, saisi d'une grande horreur & frayeur. Et cognoissant que Dieu luy enuoyoit cela en punition de son impieté, si tost qu'il fut reuenu à soy, il commence d'implorer de tout son cœur l'ayde de celle, qu'auparauant il mesprisoit, declarant publiquement son peché, & luy en demandant humblement pardon. Ceste Mere de misericorde ne reietta pas la priere de celuy, qui l'auoit offensée, ains luy impetra de son Fils, ce qu'il desiroit. Car apres qu'il eust rendu l'honneur & le culte deu à sa tres-douce Aduocate, la santé aussi luy fut rendue, non seulement du corps, mais encore de l'ame : car il abjura l'heresie, & r'entra en l'Eglise Catholique Apostolique & Romaine. Mais à tant de cecy, reprenons le fil de nostre histoire.

*Jacques
Sore com-
mande
de tuer
tous les
Iesuites
qui re-
stoient.*

La nef S. Jacques ayant esté si mal traitée par l'artillerie des Huguenots, qu'ils se craignoiēt qu'elle ne donnast à fond, à cause de l'abondance d'eau qu'elle receuoit, pour empescher cela, ils assēblerent tous ceux de ladicte Compagnie, qui restoient encor en vie, & apres leur auoir donné force soufflets & coups de poing, ils les mettēt à la pompe, pour espuiser l'eau. Ce trauail ne dura guere : car Jacques Sore entendant, qu'il y auoit encore des Iesuites en vie, commanda qu'on les mit tous à mort, criant à pleine teste : Tue, tue moy toute ceste racaille, qui s'en alloit au Brasil semer la Papisterie, & s'approchant plus pres avec son Galion, il dit aux soldats, qui pilloient le nauire, criant à haute voix : Iettez moy dans la mer ces chiens de Iesuites. Les soldats, ouy qu'ils eurent le commandement de leur Capitaine, ils s'en vont prendre ceux, qu'il leur disoit, & les ayant attachez deux à deux, ou trois à trois, les menent sur le bord du nauire, là ou ils les despouillent de leurs sottanes : & apres auoir donné à chacun deux ou trois coups de poignard à trauers le corps, ils les iettent dans la mer : à quelques vns aussi ils couppoient les bras ou les

mains, pour leur oster tout moyen d'euader. De ceste sorte meur-
 trirent les Caluinistes de sang froid quelques trente, ou Re-
 ligieux, ou Nouices de la Compagnie de Iesus, bien qu'ils fus-
 sent pour la pluspart ieunes gens, & ne leur eussent faict aucun
 dommage, monstrans assez par là le mal-talent, qu'ils portent
 particulièrement à tous ceux de cest ordre. Et ce qui descouure
 encore plus cecy est, que le mesme Iacques Sore ayant vn peu au
 parauant pris vn nauire, ou il trouua deux Peres de l'ordre de S.
 François, & tous deux Predicateurs, avec autant de Prestres Se-
 culiers, il ne feist aucun mal ny aux vns ny aux autres : mais de
 ceux-cy, qui estoient encore tous nouices ou ieunes gens, il n'en
 laissa pas eschapper quasi vn, de maniere que comme vn sien pa-
 rent, qui estoit entré des premiers dans la nef S. Iacques, eust pro-
 mis la vie à quelques Portugais, & l'enuoyast dire à Iacques Sore,
 afin qu'il l'eust pour agreable ; Sore demande soudain si tous les
 Prestres Iesuites estoient morts, & luy ayant esté respõdu qu'ouy ;
 lors il permist qu'on sauua la vie aux autres. Tellement qu'il n'y
 eust aucun plus de tñé, sinon deux ou trois, qui auoyent mis à
 mort le Pilote avec les deux autres, qui voulurent entrer les pre-
 miers dans le nauire. Car ayant sceu qui ils estoient, ils les fit es-
 uentrer tous vifs deuant soy, & puis commanda de ietter leurs
 entrailles en la mer. Or de tous les 40. de la Compagnie, qui es-
 toient dans la nef S. Iacques avec le P. Ignace d'Azebedo, il n'en
 estoit demeuré qu'un seul nommé Iean Sanches, auquel les Hu-
 guenots sauuerent la vie, à l'occasion que ie m'en vay dire. Quand
 ils separoyent des autres ceux de ladite Compagnie, afin de les
 massacrer, ils regardoyent soigneusement les mains, les vestemēs,
 & le maintien d'un chacun. Voyans donc que cestuy-cy, duquel
 nous parlons, auoit les mains sales & endurcies de cals ou duril-
 lons, & estoit couuert d'une meschante & courte robbe, ils luy
 demandent, s'il n'estoit pas le cuysinier des Prestres ? Il respondit
 qu'ouy (aussi estoit-il vray) & pour ceste cause, voulans se seruir
 de luy pour le mesme effect, ils le laisserent en vie, de sorte qu'il
 fut avec eux iusqu'à leur retour en France, d'où par apres il se re-
 tira en Portugal, & raconta ce qui a esté dict de la mort de ses
 compagnons, combien que d'autres Portugais, à qui les Hugue-
 nots donnerent la vie, en porterent plustost les nouuelles à l'Isle
 de Madere, ou ils trouuerent encore les autres 30. de la mesme
 Compagnie, qui s'estoyent arrestez en ceste Isle : & de là le Pere re-

*Trente
 d'ieux
 sont tués
 de sang
 froid.*

*Cruauté
 des Hu-
 guenots.*

*Comme
 on a sau-
 toute ce-
 ste histoi-
 re.*

Pierre Diaz l'escriuist au Pere Leon Henriquez Prouincial de ladite Compagnie en Portugal en vne lettre, qu'il luy enuoya le 18. Aout de la mesme année, vn mois ou enuiron apres leur martyre. Or d'autant qu'il n'y auoit eu que trente-neuf de ladite Compagnie de tuez, cestuy-cy estant euadé, afin que le nombre de 40. fust complet (car il semble que c'est vn nombre mystereux, ainsi que l'a remarqué S. Basile sur semblables propos, en l'Homelie des 40. Martyrs) au lieu de celuy-là il y eust vn ieune homme, communement appellé S. Iean, qui estoit nepueu du Capitaine du nauire S. Iacques, lequel voyant les actes de vertu & pieté, qu'exerçoient ces bons Religieux & Nouices, comme il estoit fort honneste & bien enclin à la vertu, il demanda au Pere Ignace d'estre receu en la mesme Compagnie: & bien que le Pere ne luy eust pas octroyé sa demande auant ce rencontre, si est-ce qu'il se portoit de mesme, que s'il eust esté vn d'iceux, se tenant presque tousiours au costé du Pere, ou avec les autres Nouices, & s'addonnoit aux mesmes exercices de deuotion, qu'il leur voyoit practiquer. Lors donc que les Huguenots faisoient la trie & separation de ceux de ladite Compagnie, pour les mettre à mort, selon le commandement de laques Sore, ce icun' homme se mist du costé d'iceux, & sans dire-mot se laissa mener à la boucherie, afin d'estre receu par ce moyen en la Com-

*Vn ieune
homme se
fourre
parmy
ceux, qui
deuoient
mourir
pour la
foy.
Ribaden.
in vita
P. Ber-
gie lib. 3.
c. 10.*

pagnie de ces bien-heureux Martyrs là haut au ciel, puis qu'il ne l'auoit peu estre en terre. Que si nous comptons cestuy-cy pour l'un d'iceux, comme nous pouuons faire, ils furent iustement 40. de la Compagnie de Iesus, qui espendirent leur sang pour la foy Catholique le 15. Iuillet de l'an 1570. le noms desquels il n'est pas raisonnable de mettre en oubly, puis qu'ils sont escrits au liure de vie. Ce sont donc les suiuaus, 1. Le P. Ignace d'Azebedo Portugais, Prorouincial du Brasil, 2. le P. Benoit de Castro Portugais, 3. le P. Iacques d'Andrada Portugais, 4. Emmanuel Aluaro Portugais, 5. Blaise Ribeiro Portugais de Braga, 6. Pierre Fonseca Portugais, 7. Gregoire Escriuain Portugais, 8. Aluaro Mendez Portugais, 9. Simon Acosta Portugais, 10. François Aluaro Couillo Portugais, 11. Dominique Hernandez Portugais, 12. Alphonse Vaëna Espagnol du Royaume de Tolledo, 13. Gôzale Henriquez Portugais Diacre, 14. Iean Fernandez de Lisbonne, 15. Iean Fernandez de Braga, 16. Iean de Mayorga Aragonois, 17. Alexis Delgado Portugais, 18. Louys Correa Portugais, 19. Emmanuel Ro-

driguez Portugais d'Alcorchet, 20. Simon Lopez Portugais, 22. *Les nés*
 Pierre Nugnez Espagnol, 23. François Magallanes Portugais, 24. *des 40.*
 Nicolas Dinys de Bregâce, 25. Gaspar Aluares Portugais, 26. *martyrs.*
 Antoine Hernandez Portugais de Monte-mayor, 27. Emmanuel
 Pacheco Portugais, 28. Pierre Fôtaura Portugais, 29. André Gô-
 zales Portugais de Viana 30. Jacques Peres Portugais de Misée,
 31. Jeâ Baëza Espagnol, 32. Marc Caldeira Portugais, 33. Antoi-
 ne Correa Portugais du Port, 34. Hernand Sanches Espagnol, 35.
 François Peres Godoy Espagnol de Torijos, 36. Iean de S. Martin
 Espagnol de Illescas, 37. Iean de Zafra Espagnol de Toledo, 38.
 Antoine Suarez Espagnol, 39. Estienne Zuzayre Viscain. Cestuy-
 cy auant que partir de Plaifance. en Espagne, ou il demouroit
 lors qu'il fust nommé pour aller au Brasil, comm' il estoit vn hō-
 me fort candide, il dit au P. Ioseph Acoſta ſon Confeſſeur, qu'il
 alloit au Brasil fort cōtent & ioyeux, parce qu'il estoit aſſeuré de
 mourir martyr : & luy ayant eſté demandé, comm' il ſçauoit
 cela, il reſpond qu'il en estoit tres-aſſeuré, parce que N. S. le luy
 auoit reuelé. Pour le 40. nous pouuōs compter ce ieune homme
 nommé S. Iean, lequel bien qu'il n'eust pas eſté de faiēt receu en
 la Compagnie, il en estoit neantmoins de volonté. Voylà ce que
 i'ay peu trouuer de ces 40. Martyrs, qui furent maſſacrez près de
 l'Isle de Palma. Venons maintenant à ceux que nous auons laiſſé
 en l'Isle de Midere : car pluſieurs d'iceux furent auſſi participans
 de la meſme couronne.

*Douze autres Religieux de la Compagnie de Iesvs allans au Brasil
 ſont auſſi tuez pour la foy Catholique par Iean Capdeuille
 Huguenot, & quelques autres de la meſme ſecte.*

CHAPITRE XXVI.



LE Pere Ignace d'Azebedo ayāt aſſemblé quelques
 69. ſubiectz, comme a eſté dit, les auoit departis en
 pluſieurs nauires, & en auoit mené quāt & foy 40.
 laiſſant le reſte à l'Isle de Madere, avec les autres
 nauires de la meſme flotte: leſquels partirent de
 l'Isle ſuſdiète vn mois apres que le maſſacre raconté au chapitre
 precedent fut aduenü, pourſuyuans la route du Brasil. Mais com-
 me ces nauires euſſent eſté agitez de pluſieurs tēpeſtes, & grāds
 orages, il aduint, qu'ils furent diſpercés çà & là, & emportez en
 differents endroiets: tellement qu'ils eurent auſſi diuers accidens

*Nauiga-
tiō du P.
Pierre
Diaz
fort de-
fastrou-
se.*

& rencontres. Celuy auquel le P. Pierre Diaz, avec quelques autres de la mesme Compagnie estoit embarqué, aborda à l'Isle de Cuba, & vint surgir au port S. Jacques: mais il estoit si cassé, que ceux qui estoient venus dedans, furent contraincts de le quitter, & n'en ayans trouué là aucun autre, ils deliberent de s'en aller à vn autre haure plus Oriental nommé Abana. Or apres auoir fait trois iournées de chemin à pied, tous deschaux, & ayant la pluye tousiours sur le dos, avec vne tres-grande peine, tant à cause des bouës, que pour plusieurs autres incommoditez, qu'il y a en ce pais là, ils arriuerent à vn autre port, ou ils trouuerent seulement vne petite barque, qui n'auoit nul abry ny deffése cōtre la pluye & les vents: dans laquelle ils furent contraincts de s'embarquer, exposez à toutes les iniures du temps; si que non seulement les viures se corrompoient à cause de l'humidité, mais aussi leurs vestemens se pourrissoient presque sur leur corps. Avec ceste barque ils firent 74. lieues, & arriuerent en fin au port d'Abana, ou ils fretterent vn plus grand nauire, qui les porta iusques aux Isles Terceres. Ils y aborderent au mois d'Aoust de l'an 1571. & y rencontrerent l'Admiral de leur flotte Louys de Vazconcel, avec le P. François de Castro, & cinq autres de la mesme Compagnie, qui les auoient ja deuancez. L'Admiral voyant que les gens de sa flotte estoient fort diminuez: (car de son nauire seul en estoient morts soixante, à cause d'une si longue & si fascheuse nauigation de quinze mois qu'ils eurent, plusieurs aussi s'estoient arrettez aux Isles qu'on nomme Antilias, & beaucoup encore ennuyez de tant de trauaux & dangers, s'en estoient retournez en Pourtugal) de sorte qu'à grande peine y auoit il assez de gens pour remplir vn nauire de charge, comptant matelots & passagers, entre lesquels il falloit aussi nombrer vne troupe d'enfans & filles qu'on menoit, pour peupler le Brasil, & 25. femmes qui les gouuernoient: L'Admiral donc voyant cela, resolut de mettre toutes ses gens dans vn nauire, & pourfuyure sa route avec iceux. Il y auoit en ce nombre 14. de la Compagnie. Car les autres qui estoient, se perdirent es tourmentes passées: tellement qu'on n'a sceu depuis ce qu'ils sont deuenus. Entre ceux-là il n'y auoit que deux Peres, à sçauoir le P. Pierre Diaz, & le P. François de Castro, les autres 12. ne l'estoient pas. Ils demarerent avec D. Louys Louys de Vazconcel le 6. Septembre l'an 1571. & apres auoir nauigé quelques 7. ou 8. iours avec vn vent prospere; ils vont

*Part de
là avec
D. Louys
de Vaz*

descourir

descourir cinq nauires de haut bord, quatre desquelles estoient *conçel-*
 Françoises, & la 5. Angloise. L'Admiral de ceste flotte estoit vn *13. au-*
 Capitaine Bearnois nommé Iean Capdeuille, combien que les *tres de*
 Portugais l'appellent Cadouillo, aussi meschant Huguenot & *la Com-*
 pyrate de mer que Iacques Sore, lequel commâdoit dans le mes- *pagnie.*
 me Galion que ledit Sore auoit, lors qu'il print le nauires S. Iac-
 ques. C'estoit (comme i'ay appris de quelques Rochelois) vn
 vaisseau du port de 300. tonneaux, nommé communément le
 Prince, avec lequel Iacques Sore auoit vn peu auparauant buti-
 né à l'entrée du destroit de Gibraltar vn nauires des Venetiens,
 appelé la grande Caraque, du port de 1200. tonneaux, remplie
 de fort riche marchandise du Leuant, & encore vn autre plus
 petite hors dudit destroit, chargée de raisins de Corinthe, & de
 vin de maluoisie. Apres ces beaux exploits, il fut baillé à Iean
 Capdeuille, lequel pour faire quelque chose digne de foy, suy-
 uant la commission qu'il auoit de mettre à mort tous ceux qui
 confesseroient la Messe, il s'en va piller & saccager vn' Isle des *Ils ren-*
 Canaries appelée la Gomere, & au depart d'icelle il rencontre le *contrent*
 nauires de Louys Vazconçel, qui se doubta soudain, voyant la *la flotte*
 flotte susdite, que c'estoient ennemis & Huguenots; & feit in- *de Fran-*
 continent assembler tous les soldats, pour les encourager à com- *Capde-*
 battre vaillamment pour la deffence de la foy Catholique, de *uille Hu-*
 laquelle ceux, à qui ils auoient affaire, estoient ennemis iurez. *guenot.*
 Apres cela il fait distribuer les armes à vn chacū, mettre des coit-
 tes & materas ez lieux qu'il falloit, assembler en vn monceau
 quelque quantité de pierres, tirer les caques de poudre hors du
 lieu ou on les gardoit. Finalement il baillé à vn chacun sa place.
 Ceux de la Compagnie qui estoient là, commencent aussi à ex-
 horter vn chacun de se mettre en bon estat, & de purifier leur
 conscience, puis qu'ils estoient en si grand danger. Leurs remon-
 strances ne furent pas vaines: car l'Admiral se cōfessa le premier,
 & apres luy les soldats, puis tous les autres qui estoient en aage.
 A quoy faire il y eut prou de temps: car la nuit suruint là dessus.
 Le lendemain sur la Diane, les Huguenots commencent à faire
 les approches. La partie n'estoit pas esgale, car le nauires seul de
 Iean Capdeuille, estoit plus fort & mieux équipé, que celuy de
 Vazconçel, estant garny de becs, & picquants par dehors du co-
 sté de la prouë, & si estoit encor beaucoup plus haut que l'autre:
 neantmoins les ennemis ayans lasché de leur Galion deux coups

*Bataille
navale
entre les
Portu-
gais &
Hugue-
nols.*

de canon, pour faire caler voile aux Portugais, selon qu'est de coustume, eux n'en voulurent rien faire. Les autres voyans cela, attaquent par trois fois le nauire des Portugais, & en tuent cinq d'iceux : mais ils en blessèrent 17. quasi tous aux jambes, si que pour se deffendre, ils estoient contraincts de se tenir d'une main au cordage, & de l'autre combattre. Or jaçoit que les corsaires combattissent d'un lieu plus haut & auantageux, si est-ce qu'ils y perdirent beaucoup des leurs. Car au commencement de la meslée 20. d'iceux furent tuez, & il en y eust quelques vnz de blessés. Apres ce les Portugais laschent trois coups de canon, l'un desquels rompit le mast, & les voiles du galion, ou Jean Capdeuille commandoit : l'autre perça d'outre en outre l'un des costés du mesme nauire : de maniere qu'il y entroit beaucoup d'eau : le 3. fit voler en l'air 10. soldats. Mais ce qui estonna plus que tout les ennemis fust, de voir les voiles abbatuës, & leur nauire percé, avec grand dâger de s'enfoncer; de façon qu'ils se tenoient quasi pour perdus. Toutesfois prenans force du desespoir, ils se ietterent pour la 4. fois sur le nauire des Portugais avec telle roideur, qu'ils y entrerent dedâs tout d'un coup, iusques au nôbre de 60. soldats, lesquels mirent à mort cinq Portugais, qui deffendoient la prouë, n'en restant qu'autres cinq, qui batailloient encore fort courageusement. Louys de Vazconçel estoit aussi lors en pied combattant vaillamment, bien qu'il eut reçu un coup d'arquebuzé dans le corps, & un autre à la cuisse : mais pour cela il ne laissoit pas de faire le debuoir d'un braue Capitaine, tenant tous-

*De Louys
de Vaz-
conçel
Admi-
ral des
Portu-
gais. est
sacré.*

jours son bouclier en une main, & l'espée en l'autre, iusqu'à ce qu'ayant esté nauré de plusieurs autres coups, il tomba mort sur la place, & fut despouillé & ietté dâs la mer, sans estre recogneu. L'Admiral estant mort, les autres se rendirent aussi tost, & les ennemis entrerent tous pêle-mêle dans le nauire, mettans à mort avec grande fureur & rage, tous ceux qu'ils rencontroient. Le Pere Castro estoit pour lors dans la plus basse tour de la prouë, ou il entendoit la confession du Pilote, qui estoit blessé à mort, & proche à rendre l'ame. Les Huguenots cognoissans par là qu'il estoit Prestre, se ruent sur luy, avec une rage diabolique, & luy donnent tant de coups d'estoc & de taille, qu'il tōba roide-mort sur la place. La mesme cruauté executerent ils sur le P. Pierre Diaz, qui iusqu'à lors auoit esté occupé à ouyr les confessions de ceux, qui estoient sous les planchers du nauire : mais entendant

*Le Pere
Castro
est sacré.*

le bruiet, quand les ennemis entrèrent dedans, il s'estoit allé rendre au lieu, ou estoit le P. Castro, accompagné d'un frere nommé Gaspar Goes, auquel, pour estre encore ieune, il auoit ordonné de se tenir tousiours à son costé; mais aussi tost que les Huguenots les veirent sortir dehors, ils se ruèrent sur eux, & massacrerent cruellement l'un & l'autre à coups d'espée, tout de mesme forte que le P. Castro, & les ayans despoillés, ietterent les corps de tous trois dans la mer. Les autres vnze qui estoient encore sous le tillac, attendans qu'on les allast massacrer, comm' ils virent qu'on ne venoit pas à eux, & que le bruiet estoit un peu accoisié, apres s'estre encouragés les vns les autres à mourir constamment pour l'amour de nostre Seigneur, ils sortent tous dehors de leur plein gré, & s'en vont mettre sur le tillac, à la veüe des ennemis, se tenäs tous à part en un lieu, afin d'estre recogneus pour tels qu'ils estoient, à sçauoir de mesme Religio que les trois, qui auoient esté mis à mort, & aussi prests & appareillés pour l'endurer, comme les autres. Les Huguenots apres leur auoir dit vne infinité d'iniures tout ce iour là, & donné force coups de poing, outre plusieurs autres mauuais traitemens qu'ils leur firent, sans qu'eux respondissent aucune chose, sinon qu'il fut nécessaire pour la deffence de la foy Catholique, le soir estât venu, ils leur lient à tous les mains derriere, & les enferment dans la chambre ou souloit loger Louys de Vazconcel, qui leur seruit comme de prison ceste nuit là, leur mettant des gardes aupres. Or comm' ils les attachoient ainsi, il en y eust un nommé Michel Aragonois, lequel ayant esté auparauant blessé en un bras, ainsi qu'on le garrottoit, luy attachant par derriere le bras blessé avec l'autre, il ietta un soupir, à cause qu'on luy auoit touché à la playe. Les Huguenots au lieu de luy porter quelque compassion, & de le soulager un peu, le prennent & le jettent dans la mer, en luy disant force outrages, & afin qu'il ne fut sans compagnie, ils en precipitent avec luy un autre qui estoit à son costé appelé François Paul, & tous deux finirent là bien tost la vie temporelle, pour aller iouyr de l'eternelle avec nostre Seigneur. Les autres demurerent liés & garrottés toute ceste nuit, & vne partie du iour ensuyuant, sans qu'on leur donnast rien à manger ou à boire. Cependant les Huguenots venoient les vns apres les autres à la porte de la prison, tantost leur apportans nouuelles, qu'ils seroient deliurés, tantost qu'ils seroient mis à mort. Il en y auoir

*Le Pere
Pierre
Diaz &
Gaspar
Goes
sont
morts.*

*Michel
Arago-
nois &
un autre
de la Cō-
pagnie
sont jet-
tez dans
la mer.*

aussi qui venoyent les menaçer avec les espées nuës, & d'un visage rebarbatif: Larrons Papistes(leur disoyēt-ils) vous serez tous massacrez. Eux cependant ne disoyent mot, à ceux qui les outrageoyent, mais preuoyans ce qui leur deuoit arriuer, s'encourageoyent entre eux mesmes, à supporter patiemment pour l'amour de nostre Seigneur, tous les tourmens qu'on leur apprestoit. Le iour estant venu ils furent tirez de la prison, & condamnerez tous à mourir. Desia on apprestoit les licols pour les pendre du plus haut mast du nauire, mais le chef de ces pyrates Capdeuille, esperāt descourir par leur moyen quelque grand thresor, (car il pensoit qu'ils portoyent au Brasil beaucoup d'or & d'argent pour y fonder des maisons) afin de sçauoir d'eux ce qui en estoit, il fit surseoir l'execution de la sentence, pour quelque temps. Toutesfois comm'il eust cogneu leur pauureté, & qu'il se vid frustré de son attente, il commanda qu'on laissast dans le nauire deux d'iceux, à sçauoir Pierre Diaz, non pas celuy qui estoit Prestre (car il auoit esté desia tué) mais vn autre qui ne l'estoit pas, appelé du mesme nom, & avec luy vn nommé Iacques Caruaillo. Les autres sept furent par son commandement menez en son nauire. Là où derechef les Huguenots les attaquent, & les ayant enuironnez d'un costé & d'autre, se mettent à leur dire mille vilainies & outrages, les appellans chiens, larrons, seducteurs & imposteurs. Il ne tient qu'à vous (disoyent-ils) que tout le monde ne soit en paix, & n'ait qu'une mesme foy, & Religion: par vostre meschante doctrine, non seulement l'Allemagne & la France: mais aussi le Brasil, & tout le monde est infecté. Ces bons Religieux ne respondoyent pas vn seul mot à ces outrages, mais lors que les autres commencerent à debagouler tout plein d'iniures contre nostre Saint Pere, & à vomir vn' infinité de blasphemés horribles & detestables, non seulement contre les Saints de Paradis, & les choses sacrées: mais aussi contre le tres-saint Sacrement de l'Autel, lors ils ne peurent se tenir de leur respondre, & les reprêdre hardiment & courageusement de leurs impietez & blasphemés. Eux ne pouuans supporter cela, & ne voulans permettre qu'on defendist ce qu'ils detestoyent si fort, leur donnoyent force soufflets & coups de poing sur le visage, & sur la teste: principalement s'ils en trouuoient quelqu'un qui portast la couronne, ayant receu quelqu'ordre de l'E-

*Les autres sont
condamnez à
mort.*

*Sont bnf
fetez &
tourmẽ-
tez.*

glise : car alors ils se mettoient tous à frapper là dessus, comme sur vne enclume. Or entre les Nouices qui estoient là, il en y auoit vn nommé Pierre Fernand, menuisier de son estat, lequel aussi tost qu'ils se furent rendus maistres du nauire, ils auoyent despouillé de sa sottane : tellement qu'il estoit demeuré en pourpoint, & craignant de n'estre pas recogneu pour vn de la Compagnie, & par consequent de perdre la couronne du martyre (qu'il souhaittoit sur tout) il s'accostoit tousiours des autres, tenant les yeux & la teste baissée, avec telle modestie, que par son seul maintien, l'on pouuoit assez cognoistre, qu'il estoit compagnon des autres. Ce qui faisoit d'auantage les Huguenots, de façon qu'ils le prenoient par la teste avec les deux mains, & le souleuoient en l'air, puis luy donnoient des soufflets, & luy ouuroient les yeux par force avec les doigts, le contraignant de hausser les paupieres. Ils luy mettoient aussi des petites broches sous le menton, afin de luy faire tenir la teste haussée, & parmy ces mauuais traitemens, ils luy disoyent mill' iniures & outrages. Chien (faisoyent-ils) hausse la teste, estends le front, & choses semblables, que ce bon Nouice enduroit avec vne telle ioye & allegresse, qu'on eust dict à le voir qu'il estoit en nocces : de façon qu'il les faisoit tous estonner, recognoissans & en son visage, & par ses parolles, combien il estimoit ces affronts & opprobres. Car leuant les yeux au Ciel, il disoit à nostre Seigneur en leur presence: Quel seruice vous ay-ie fait mon Dieu, pour auoir merité vn si grand bien, que de pouuoir endurer quelque chose pour l'amour de vous ? Les Huguenots s'estans ioiez tout vn long temps de ces bons seruiteurs de Dieu, se retirent en fin, qui deça, qui delà, & laissent en paix pour quelque temps nos prisonniers, lesquels trouuans ce peu de relasche se rallient & s'encouragent les vns les autres, à volontiers endurer la mort pour l'amour de nostre Seigneur. En quoy principalement se monstra la ferueur & le zele de ce bon nouice Pierre Fernand, duquel nous parlions tout à cest' heure. Car iasoit qu'il eust esté receu le dernier de tous en la Compagnie, neantmoins il estoit si feruent & si desireux d'endurer pour l'amour de IESVS-CHRIST nō seulement les iniures qu'on luy disoit;

Modestie & patience de Pierre Fernand.

Son zele & le desir qu'il auoit d'endurer pour N.S.

Les Huguenots disputent contre eux.

Reponse perilleuse.

Confiance d'Alfonse Fernand.

mais aussi les tourmens & supplices, voire la mort qu'il enflamoit tous les autres au mesme desir: monstrant vne grande liesse & contentement d'esprit, tât en sa face, qui estoit tousiours ioyeuse & allegre, comm' en ses propos, s'encourageant soy-mesme, & les autres encore, par les parolles qu'il leur disoit: leur faisant entendre que c'estoit le plus grand heur qu'ils eussent secue desirer en ce monde. Or comme ils deuisoient entr'eux de la sorte, voicy venir vne troupe de soldats, qui les environnent de toutes parts, & commencent à disputer contre eux sur quelques poincts de controuerse. Et afin qu'on voye quels arguments ils leur proposoyent, j'en toucheray icy tant seulemēt vn, en passant. Ils vouloyent combattre les prieres qu'on faict aux Saincts, pour leur demander ayde & secours; selon la doctrine, & ancienne coustume de l'Eglise: & sur ce propos il en y eust vn qui pensoit estre des plus habilles, lequel commence à les arguer de ceste sorte. Venez çà, Papauts (faisoit-il) ne voyez-vous pas, que nous vous tenōs prisonniers, & que vous estes en nostre pouuoir? pourquoy donc n'inuoquez-vous la vierge Marie, & les Saincts, à l'ayde desquels vous auez recours, afin qu'il vous deliurent de nos mains? Voire mais, respondoient les autres, s'il estoit plus expedient que nous vesquissions dauantage, sans doubte la bien-heureuse Vierge, & les Saincts de Paradis nous obtiendroyent de Dieu, & la vie & la liberré. Mais parce qu'il est meilleur, que nous mourions maintenant pour la deffence de la vraye foy, c'est pourquoy ils ne le nous impetrent pas. Telles & semblables responces leur donnoient-ils, qui les faisoient creuer de despit: tellement que ne pouuans les endurer, ils leur crachoient au visage, & leur faisoient beaucoup d'autres indignitez. L'vn d'iceux comme forcené de rage, pour cause d'une responce vn peu libre, que luy auoit faict Alfonso Fernand: Va (dict-il) pour cela seul, que tu as dict maintenant, tu mourras. Alfonso luy respond, non seulement moy, mais aussi tous mes compagnons, sommes prests à mourir, quand il plaira à Dieu le permettre. Ce qu'il dict non seulement pour soy, mais encore au nom des autres, parce qu'il estoit, apres les Peres qui auoyent esté tuez, Superieur de tous ceux qui restoyent. L'heretique ayant ouy cela: Attendez donc vn peu gros mastins (dict-il) car ie vous veux moy mesme trencher la teste; & vous ietter dans la mer. Or apres qu'ils eurent ainsi debattu par parolles, iusqu'à ce qu'il fust temps d'aller souper, les Hugue-

nots s'en vont remplir leur pançe: mais les prisonniers, se voyans vn peu libres, commencent derechef à s'encourager par ensemble, & s'exhorter à la constance & patience, par la consideration des peines & tourmens, que nostre Sauueur IESVS-CRIST voulut souffrir pour l'amour de nous, le remercians humblement de ce qu'il leur presentoit vne si belle occasion d'employer leur vie, pour son honneur & seruice.

Les autres donc apres auoir saoulé leur ventre de viandes, voulurent aussi rassasier leur cruauté & felonnie, mettant à mort ces innocens, tellement qu'au sortir de table, ils s'en vont à eux, & les entourent de tous costez: si que chacun d'iceux estoit entourné de huit ou dix soldats, lesquels tout aussi tost les prennent, & les ayans despoillez de leurs robbes, les iettēt avec toute leur force & puissance en la mer, le plus loing qu'ils peuuent. Pierre Fernād & Iean Aluarus qui ne sçauoyent pas nager surēt incōtinēt enfondrez & noyez. Les autres cinq qui estoient mieux duiçts à cela, apres qu'ils eurent esté iettez dans l'eau, se trouuerent tous ensemble en vn mesme lieu, & se soustindrent tout vn long temps, s'exhortans les vns les autres à mourir volōtiers pour l'amour de N.S. Mais en fin les forces, & l'haleine vindrēt à manquer à trois d'iceux, lesquels se sentans fort las, & perdans toute esperance de pouuoir durer dauantage, prindrent congé des autres, & leur dirent le dernier adieu, apres s'estre demandez pardon les vns aux autres. Or comme quelques vns des heretiques eussent sur le tard donné à manger & à boire à deux d'iceux, à sçauoir à Iacques Fernand, & à Sebastien Lopez, celuy-là se sentant fort & robuste suiuiot petit à petit la flotte, laquelle alloit fort bellement, parce que les vents s'estoyent accoisez, à raison d'vne grande pluye qui estoit suruēnuë: de façon qu'il atteignist à la parfin la flotte, & fust receu dans vne patache, ou autre tel vaisseau. (Dieu l'ordonnant ainsi par vne speciale prouidence, afin qu'on sceust par son moyen tout ce qui estoit arriué.) Les autres cependant disputoyent avec les flots, & bien qu'ils fussent fort las, & eussent grande peine à nager, toutesfois ils ne cessoyēt de se recommander à Dieu, & pour se munir cōtre les assauls du malin esprit, qui nous tend principalement ses embusches sur nostre derniere heure, ils recitoyēt tous ensēble le Symbole des Apostres, & quelques autres oraisons qu'ils sçauoyent par cœurs, nommément le Pseaume 50. qui cōmence Misereere mei Deus.

Pierre
Fernād
& Iean
Aluarus
sont no-
yez.

Iacques
Fernand
se sauue.

Alfonse Alfonse Fernand disoit le premier, & les autres suiuyoyent. Sur la
Fernãd minuiet Alfonse apres auoir reïteré souuent avec ses cōpagnons,
André ces parolles du mesme Pseume *Tibi soli peccau*, les forces luy
Pais, & venant à manquer, s'enfonça, & ne comparut plus. C'estoit vn
Ferrant homme de grande vertu, & sur tout fort deuot. Il auoit monstré
Aluarus non seulement son courage: mais encore son sçauoir, en refutant
se noyât. les obiections que les heretiques leur faisoient vn peu au para-
 uant. Aussi le P. Azebedo le menoit au Brasil, avec intention de
 luy faire lire le cours de Philosophie: car il auoit bien estudié en
 ceste faculté. Apres Alfonse André Pais se noya, & le dernier mot
 qu'il prononça fust le tres-sainct nom de I E S V S, pour l'amour
 duquel il mouroit. Ferrand Aluarus se noya le dernier de tous.
 Sebastien Lopez voyant que ses trois compagnons estoient
 morts, & qu'il restoit seul au milieu des vagues en vne nuit som-
 bre & obscure, la pluye tombant sur luy à grands randons, bien
 qu'il ne pensast pas eschapper, toutesfois ayât apperceu quelque
 lumiere en vn des nauires de la flotte, qui estoit loing de luy en-
 uiron demie lieuë, il reprend courage, & se met à tirer droit à
 ceste lumiere en nageant, & feit tant qu'en fin il arriua à la flotte.
 Mais s'estant approché d'un nauire d'icelle, comm'il priaist ceux
 qui estoient dedans de le vouloir receuoir, les autres luy respon-
 dirent fort brusquement de parolles, & pis encore de faict: car
 ils luy voulurent tirer vn coup d'arquebuse. Finalement il s'ad-
 dresse à vne patache qu'ils menoyent, & s'estant prins au bord
 d'icelle, il trouua là dedans vn homme, lequel bien qu'il fust here-
 tique, toutesfois n'estoit pas si cruel, ny si desnaturé que les au-
 tres. Cettuy-cy dōc, ou fut qu'il eust pitié de ce pauvre homme,
 ou peut-estre esmeu du remors de conscience, d'auoir quitté la
 vraye Religion, le retira, & le cacha en vn coing de la patache,
 luy donnant à manger & à boire, & quelque vestement pour se
 couvrir, puis le fit passer dans vn nauire dissimuléement, faisant
 entendre que c'estoit quelque autre Portugais qu'on auoit pris,
 & de ceste sorte luy sauua la vie. Voyla comment cestuy-cy &
 Iacques Fernand eschapperent par le diuin vouloir la cruauté des
 Huguenots, afin qu'on sceust par le moyen d'iceux, comme la
 chose estoit passée, qui est tout de mesme que nous auons racoté.
 Mais ils adioustèrent encore que les Huguenots s'estans rendus
 maîtres du nauire, apres auoir tué ceux qui le deffendoient, ils
 tournerent les rage & fureur contre les reliques des Sainctz, &
 leurs

*Sebastiẽ
 Lopez
 est receu
 en vn
 nauire
 des enne-
 mis, &
 se sauue.*

leurs Images, desquelles il y auoit aussi bõne prouision tât en ce nauire, qu'en celuy du P. Ignace: & les ayans attachées des mains des Catholiques, les trainoient par le plancher, les fouloient aux pieds, les iettoient dans le feu avec grande risée & mocquerie, proferant de leur bouche puante telles blasphemés contre les Saints, desquels estoient ces reliques, que le seul recit fairoit tremousser d'horreur les ames Chrestiennes: & pource nous les passerons sous silence. Seulement nous dirons, qu'ayant trouué vingt iours apres dans le mesme nauire deux Images en bossé, l'une de la Vierge sacrée, l'autre de l'Archange Gabriel, ils les prindrent toutes deux, & les rompirent avec leurs mains sacrileges, trainans par le nauire le chef de l'Image de l'Archange, par mespris. Bref ils executerent sur ces choses saintes ou sacrées, tant d'indignitez & sacrileges qu'ils sçeurent excogiter, ou que Sathan ennemy d'icelles leur suggera. Et ne faut s'estonner, si celuy qui a permis qu'on executait sur le corps de son propre Fils nostre Sauueur, tant de cruauté & indignitez, quand il mourut en Croix pour l'amour de nous, ait voulu encore souffrir tant d'iniures & outrages estre faictes à ses Saints, non seulement en leurs Images, mais aussi en leurs ossemens sacrez, sans les punir tout sur le champ. Car c'est pour nous apprendre de n'estre pas si bouillans à venger nos propres iniures, bien que nous en ayons le moyen. Mais puis que c'est luy qui a dit, *Mihi vindicta, ego retribuam*: A moy appartient la vengeance, ie la rendray; il monstrera vn iour deuant tout le monde qu'il est iuste Iuge, & vengeur des iniquitez, principalement de celles, qui sont cõmises cõtre son honneur ou celuy de ses Saints: lesquelles il repete pour siennes, eux estans ses membres. Et mesmes bien souuent en ceste vie il punit semblables sacrileges, lors qu'il void que le pecheur ne fait pas son profit de sa douceur & clemence, comme il aduint à quelques vns de ces impies; & nommément au Capitaine d'iceux: Car i'ay appris de bonne part que ledit Iean Capdeuille chef de tous ces Corsaires, & scelerez, fut tué miserablement à Salies en Bearn, d'ou il estoit natif, à coups de hache, que luy feit donner quelqu'un, de qui il auoit mal parlé. Et telle est d'ordinaire la fin de gens semblables. L'on a sceu encore par le rapport de certain Rochelois, qu'un des matelots heretiques, appellé cõmunément le gros Pierre de Brouage, apres auoir ietté volentiers la mer quelques vns desdits Religieux, y tomba luy mesmes, te.

Pour
quoy
Dieu ne
punit
soudain
tels sa-
crileges

Rom. 12
Deu. 32

Capde-
uille
mourut
d'une
mort
volent-

& iamais plus ne comparust. Mais reprenons, nos erres. Apres que les Huguenots eurent fait ce bel aëte, & vagabondé encor sur mer quelques vingt & trois iours (auquel temps ils prindrent & pillerent vn nauire des Algarbes) finalement ils vindrent sur-gir au cap de Orajó, qui est sur la coste de Galice, ou ils se départirent le butin, & de là ces deux de la Compagnie qui estoient restez en vie, se retirerent en Portugal avec les autres, ausquels les Huguenots auoient donné la vie. Et tât par leur rapport, que par le tesmoignage des autres, on sçeut comme le tout estoit passé, qui est de la mesme sorte que nous l'auons icy escrit, suyuant la lettre qu'en enuoya à Rome le P. François Henriquez Supérieur de la maison des Profés à Lisbonne le 9. Decembre 1571.

Quant aux autres deux qui auoient esté laissez dans le nauire, à sçauoir Iacques Caruaillo & Ferrant Aluaro, l'on n'a sçeu depuis ce qu'ils estoient deuenus: de façon qu'on pense qu'ils furent aussi tuez comme les autres, & pour la mesme cause. Comptant donc ces deux cy avec le reste, ils furent en tout douze qui furent meurtris pour la foy Catholique l'an 1571. partie le 13. Septembre, partie le 14. dont voicy les noms & surnoms. 1. Le P. Pierre Diaz Portugais. 2. Le P. François Castro Portugais. 3. Gaspar Goetz Portugais. 4. Michel Aragonois de Tarraçone. 5. François Paul Portugais. 6. Iean Aluarus Portugais. 7. Pierre Fernand Portugais. 8. Alфонse Fernand Portugais. 9. André Pais Portugais. 10. Autre Pierre Diaz Portugais. 11. Iacques Caruaillo Portugais. 12. Ferrant Aluaro Portugais. Que si l'on adioust ces douze, aux autres quarante du precedent chapitre, ils fairoient en tout cinquante deux Martyrs.

Voyla donc l'heureuse fin du voyage qu'auoit entrepris le Pere Ignace d'Azebedo, & ceux qui le suyuoient, pretendans aller au Brasil, pour y amplifier la foy Chrestienne, qui auoit bon besoing de tels ouuriers en ces quartiers là. Mais bien qu'ils n'y soient pas arriuez, ayans plustost pris port aux haures fortunez de la vie eternelle, il est toutesfois croyable, qu'ils y ont plus profité par leur intercession & merite; qu'ils n'eussent fait par leur trauail, eu esgard au grand fruiçt qui s'y est fait depuis, comme nous verrons ez chapitres suyuant.

*Les noms
des 12.
qui furent
mis à
mort.*

De la fondation de quelques Colleges & maisons de la Compagnie de Iesvs au Brasil, & du fruit qui s'y est faict en general pour la conuersion des Barbares.

CHAPITRE XXVII.



UN des principaux desseins, que le Pere Ignace d'Azebedo auoit, menant tant de gens au Brasil, estoit de donner commencement au Nouitiat, & au Seminaire des estudians, qu'il desiroit establis en icelle Prouince. Car il y auoit là fort peu d'ou-
 uriers, eu esgard à la grande moysson, qui s'y preparoit, & si n'en pouuoient venir de Portugal en si grand nombre, qu'il eust esté besoing, parce que ceste seule Prouince de Portugal ne pouuoit fournir tant de subiects, qui fussent bastans pour les Indes Orientales, & pour le Brasil: joinct qu'il falloit pourueoir au Royaume mesme de Portugal, qui auoit desia plusieurs Colleges fondez, & tous les iours s'en establissoient de nouueaux. Pource il estoit du tout necessaire d'en receuoir quelques vns au Brasil, & les former là selon l'institut de la Compagnie, premierement ez exercices de deuotion, & de mortification durant le Nouitiat, & puis aux lettres, les faisant estudier és sciences & facultez requises.

Ceux qui succederent au P. Ignace en la mesme charge, con-
 gneurent bien le defaut, qu'il y auoit remarqué, & tascherent d'y apporter le mesme remede, aydez principalement par la libera-
 lité des Roys de Portugal. Car le zele que ces deuots Princes ont tousiours monstré à l'amplification de la foy Chrestienne, en toutes les terres de leur domaine & jurisdiction, les esmeut à pourchasser, qu'il y eust pareillement au Brasil des Colleges de la Compagnie, estimans que ce seroit vn moyen tres-propre pour la conuersion de ces sauuages: de sorte que le Roy Sebastien fonda & renta de ses propres reuenus ces trois Colleges, qu'il y a maintenant en la Prouince du Brasil; sçauoir est le College de la Baye, qui est celuy de la ville du Sauueur, laquelle maintenant on appelle la Baye, parce qu'elle est dans ce golfe de mer, nommé la Baye de tous les Saints. Le second est celuy du fleuue Ianuier; & le 3. de Pernambuco. Au moyen dequoy on a peu receuoir vn bon nombre de ieunes gens, & les esleuer en ces Colleges, pour seruir par apres à la conuersion des naturels. Car en celuy

*Dessein
du Pere
Ignace
d'Aze-
bedo.*

*Libera-
lité &
piété des
Roys de
Portu-
gal.*

*Le Roy
Sebastiẽ
fonde
3. Colle-
ges au
Brasil.*

*Residen-
ces du
Brasil
pour
quoy sé-
dées?*

*Demeu-
res des
Peres de
la Com-
pagnie
parmy
les Bra-
siliens.*

*Reli-
gieux de
S. Fran-
çois &
de S. Be-
noist au
Brasil.*

de la Baye, comptant les Peres, Escoliers, Coadiuteurs, & Noui-
cés, ils sont d'ordinaire soixante dix personnes, ou d'auantage. En
celuy du fleuue Ianuier 40. ou 50. & à Pernambuco quelques
25. ou 30. Outre ce, quelques Portugais desirans auoir des Peres
de la mesme Societé aupres d'eux, ont fondé & basti plusieurs
autres maisons, que nous appellons Residences, en diuers en-
droits: lesquelles on a acceptées volontiers, afin de pouuoir plus
commodément pouruoir aux necessitez spirituelles, tant desdits
Portugais, que des Brasiliens, qui se tenoient aupres d'eux, tas-
chans de rendre ceux-cy Chrestiens, & ceux-là bons Chrestiens.
Les principales residēces sōt celles cy: Du port assure, de S. Vin-
cent, de Paratininga, & du S. Esprit. Or de ces Colleges & Residē-
ces, les Peres vont faire des courses, que nous appellons Missions,
pour amener les Brasiliens, qui habitent es pais mediterranees, à
la cognoissance de leur Createur. Il y a aussi d'autres maisons,
qui dependent desdits Colleges, & Residences, aux villages des
Brasiliens, qui sont desia conuertis à la foy. Là ou vn des Peres se
tient avec vn cōpagnon la plus part de l'année, afin d'entretenir
ces nouuelles plantes, & les arroser des eaux celestes de la pa-
rolle de Dieu, & des Sacremens. Ceux neantmoins, qui deme-
rent en ces maisons là, se retirent à certains temps aux Colleges,
ou Residences, d'ou ils dependent, soit que leur propre aduan-
cement spirituel le desire, soit que les maladies causées des grands
labeurs, qu'ils supportent, les y r'appellent, pour recouurer leur
santé, & receuoir quelque peu de rafraeschissement. Auquel cas,
comme à tour de roolle, besoing est d'en subroger d'autres en
leur place. Mais parce que depuis qu'on a commencé de trauail-
ler en la conuersion de ce peuple, qui fut l'an 1549. lors que les
premiers de ladicte Compagnie y arriuerent, il n'y a point eu
d'autres Religieux, qui y soient venus, de trente ans apres: & que
ceux-cy ont tousiours continué à defricher ceste vigne de nostre
Seigneur, trauaillans incessamment presque en tous les quartiers
du Brasil. De là vient, que la plus part de ce peuple, qui a reçu la
foy Chrestienne, a esté conuertie par le moyen d'iceux: iacoit
qu'en la Prouince du Parayba, depuis quelques années en ça, il y
a des Conuents de l'ordre de S. François, & ailleurs aussi de S. Be-
noist. Or les trauaux qu'il est necessaire de supporter, pour gai-
gner ces barbares à la foy de IESVS-CHRIST, sont d'ordinaire
fort grands, pour plusieurs causes. La première est à raison de la

diuersité des langues, qu'il y a parmy eux : laquelle est si grande, qu'on en a desia descouuert plus de soixante toutes differentes l'une de l'autre. Car bien que ceux qui habitoient jadis sur la coste de la mer vlassent presque tous de mesme langue : si est-ce qu'au dedans du pays on y a trouué si grande diuersité, qu'à peines les a-on encore cogneuës. Et comme il est aduenü, que quelques peuples de la terre ferme, se sont depuis habitez tout auprès de l'orée de la mer, ayant chassé les premiers habitans, comme nous dirons cy apres, de là vient aussi que maintenant l'on trouue encore sur la coste de la mer ceste mesme diuersité de langages. La seconde raison est à cause de l'estenduë grande du pays, & de la distance qu'il y a d'un lieu à l'autre : d'où s'ensuit qu'il leur conuient patir beaucoup és voyages qu'ils font, parce qu'on ne trouue ny logis, ny autre lieu, pour se retirer. D'autant que les Brasiliens n'ont pas certaines demeures, & pource il faut marcher à pied quelque fois les cent & deux cens lieuës parmy les montaignes & forests, parmy les deserts & lieux inhabitez, sans trouuer vne seule cabanne pour se loger : & outre ce l'on encourt vne infinité de dâgers des Tygres, des Serpens, & mesmes souuentefois de ces sauuâges, qui tiennent à grâd heur de pouuoir massâcrer quelqu'un, pour le manger. La troisieme raison est, parce qu'il est necessaire d'aller querir fort loing ceux qu'on desire amener au bercail de nostre Seigneur ; & ce qui est encore plus difficile leur persuader de s'en venir loger tout auprès des villes des Portugais, à celle fin de les pouuoir plus aisément instruire : car ils se craignent que les Portugais ne les veuillent rendre esclauës. Et afin d'entendre mieux l'occasiõ de leur crainte, il faut sçauoir, que durant les vingt ans premiers, apres que les Portugais furent entrez en ce pays, il y auoit si grande multitude de Brasiliens, principalement sur la coste de la mer, qu'il sembloit estre impossible de les pouuoir iamais esteindre. Or comme les Portugais se monstroyent aisables & benins en leur endroiçt, plusieurs s'accostoyent d'eux, & venoyent se loger auprès des villes ou forteresses, qu'ils auoyent basties : là ou entr'autres choses on leur enseignoit, ce qui estoit du culte diuin. De façon que la plupart de ceux-là estans desia conuertis à la foy Chrestienne, bastissoyent des Eglises en leurs bourgs, & se ciuiliboyent peu à peu par le moyen de la communication qu'ils auoyent avec les Portugais. Mais comme ceux-cy continuoient tousiours à peu-

*Les tra-
uaux de
ceux de
la Comp.
fort
grâds &
pour-
quoy?*

*Les Bra-
siliens se
craignent
des Por-
tugais
& pour-
quoy?*

pler le païs, & dressoyent force engins de sucre, faisans aussi cultiuer la terre, & s'occupans en choses semblables, esquelles ils auoyent besoin de beaucoup de gens de trauail, ils commencerent à se saisir des Brasiliens, les prenans pour esclauues: tellement qu'ils leur attachoyent la cadene au col, & se les vendoyēt les vns aux autres: puis les menoyent en diuerſes contrées, separans les enfans des peres, les filles des meres, les freres des sœurs, & de leurs autres parens & amis. Cela fust cause que ces patures gens assés tristes d'eux mesmes, furent encore saisis d'une nouuelle melancholie, si grande, que la pluspart d'iceux en mourut, & se consuma de tristesse. Les autres s'ensuyrent au dedans de la terre fermie, si auant qu'ils s'en alloyent les cent & deux cens lieues loing, pour se tirer d'auprès des Portugais, & s'esloigner d'eux tant qu'ils pourroyent. De maniere qu'ils laisserent la coste de la mer quasi toute depeuplée, d'où s'ensuyuirēt deux grands inconueniens. L'un fust que les Portugais habitans des lieux, ou les Brasiliens furent mal traictez, se trouuerēt destituez d'ayde & de secours, non seulement pour faire trauailler à leurs engins de sucre, & à cultiuer leurs terres, mais aussi pour resister à leurs ennemis: si qu'il aduint par vn iuste iugement de Dieu, tout le contraire de ce qu'ils pretendoyent. Ainsi permet nostre Seigneur bien souuent, que quand on se veut enrichir par des voyes iniustes & illicites, au lieu d'y gagner l'on y perd. L'autre inconuenient encore plus grand fust, que la pluspart de ces patures gens estans baptizez, & par consequent obligez à l'observation du Christianisme, retournoyent à leur premiere barbarie, & infidelité, n'ayans le moyen d'estre instruits en ce qui estoit du deuoir d'un Chrestien, parce qu'ils s'en estoient fuys bien loing des villes des Portugais, ou les Peres de la Compagnie, qui les auoyent conuertis faisoient leur residence: qui a esté cause que lesdits Peres ont entrepris souuent des voyages pour les aller querir, & les ramener à leur ancienne demeure & croyance. A ceste occasion, il leur falloit aller parmy les foreſts & deserts, & cheminer à pied quelques fois les six mois, voire les ans entiers, endurant beaucoup de pauuretez & miseres. Mais c'est aussi de la façon qu'ils ont ramené peu à peu à la bergerie de nostre Seigneur, & à leurs anciennes demeures beaucoup de ces fugitifs, & en ont gagné de nouveau plusieurs autres: lesquels ils ont

s'esloignent d'eux tant qu'ils peuuent.

Inconueniens qui s'en sont ensuiuis de là.

attiré souuent de bien loing, pour les faire venir demeurer au près d'eux: afin de les pouuoir plus commodement instruire, & maintenir en la foy. Car ces bonnes gens ont si grande opinion d'edits Peres, & leur portent vn tel honneur & respect, qu'ils se fient sur leur parole, tellement que leur promettant de les garantir des iniures des Portugais, qui leur voudroyent faire quelque tort, ils les suiuent comme les brebis leur Pasteur. Mais il est arriué quelque fois que les Portugais venoyent attendre au pas ces paitures gens, & les prenoyent par force, sans que les Peres eussent inoyen de les garantir, & se les despartoyent entr'eux, ou les vendoyent à d'autres, qui les emmenoyent bien loing de là. Et qui pis est, il en y a bien eu de si meschans, qu'ils se sont desguisez & vestus à la façon des Peres, se faisant mesme raire la barbe, & la couronne à la teste, pour le paroistre mieux: & de ceste sorte s'en sont allez vers eux, se disans estre Peres de la Compagnie, de façon qu'ils en ont amené auec telle ruse plusieurs, iusques à ce qu'ils les ont tenus près du riuage de la mer, là où ils ont leurs villes. Et lors qu'ils les auoyent en leur pouuoir, ils les garrottoyent, & lioyent auec des cordes, puis les trainoyent par force à leurs engins & metairies, pour s'en seruir comme d'esclauues. Or d'autant que les Peres crient d'ordinaire contre telles meschancetez, & tiennent le party des Brasiliens, s'efforçans tant qu'il leur est possible, d'empescher telles iniquitez, plusieurs des Portugais leur en veulent vn mal mortel. Et iacoit que les Roys de Portugal passez, & apres eux les Roys d'Espagne, qui ont succédé à la mesme couronne, ayent deffendu soubz griesues peines, qu'il n'y eust aucun qui allast ainsi à la chasse des Brasiliens, permettant seulement à ceux de la Compagnie de les aller querir, afin de les conuertir à la foy de nostre Seigneur: toutesfois rien de cela n'est suffisant, pour refrener l'auarice insatiable de quelques vns, principalement là où ceux qui deuroyent executer tels commandemens, se sentans interesséz au mesme fniét, ne se soucient pas beaucoup de faire garder ces Edicts. C'est donc vn des principaux destourbiers qu'il y aye à la conuersion des Brasiliens. Mais outre ce le peu de subtilité naturelle, qu'ont la plupart des originaires de ce pays, est aussi vn grand empeschement: car ils sont si rudes & si grossiers, qu'on diét n'auoir esté trouuée de nostre temps aucune natiõ de

L'affection & le respect des Brasiliens enuers les Peres de la Comp.

Meschanceté de quelques Portugais.

Empeschement de la conuersion des Brasiliens.

moins d'esprit & capacité, ny de mœurs plus barbares, que ceste cy. Mais comme d'un costé,

*Horati.
l. 3. ep. 3.*

*Nul homme est si farouche, à qui par la doctrine,
S'il l'esconte, on ne puisse adoucir la poitrine.*

selon le dire du Poëte; & que de l'autre les Peres se sont tant peinez pour les façonner, & dresser à la vertu, ils les ont, par la grace de Dieu, rendus si doux & si traitables, qu'on en peut esperer beaucoup. Car desia en plusieurs de leurs bourgs, ils ont non seulement des Eglises basties: mais encores des Confrairies du S. Sacrement, & autres establies, ou ils font de fort belles & deuotes Processions, & tout plein d'autres actes de pieté. Leurs enfans officient és Messes, & les chantent en musique, tant de voix, que d'instrumens, & apprennent la doctrine Chrestienne, & les lettres qu'on leur enseigne assés gentiment.

*Pour-
quoy les
Brasiliens
portent
si grande
affection
à ceux
de la
Comp?*

Or d'autant qu'ils recognoissent ceux de la Compagnie comme leurs Peres, tant pour le regard du spirituel, que du temporel: parce que ce sont ceux, qui non seulement leur preschent la foy de nostre Seigneur, qui les enseignent comm'il faut viure en bons Chrestiens, qui leur administrent les Sacremens, & la parolle de Dieu; bref qui les assistent en toutes leurs necessitez spirituelles, iusques au dernier soupir de la vie: mais aussi les civilisent, leur enseignent à cultiuier la terre, à faire leurs semailles, & moissons, & beaucoup d'autres petites menageries: afin qu'ils ayent le moyen de gagner honnestement leur vie en trauaillant, & quand ils sont malades, les pouruoyét des remedes qu'ils ont: c'est pourquoy les Brasiliens les ayment & respectent, de sorte qu'ils font pour l'amour d'eux, & à leur consideration ce qu'ils ne voudroyent faire pour tout autre. Si que les Gouverneurs mesmes sont contraincts de se seruir de leur ayde, quand ils veulent que les Brasiliens fassent quelque chose, comme nous pourrions monstrier par beaucoup d'exemples. Mais nous lairrons cela

*Trois
sortes de
gens au
salut de
ceux de
la Cōp.
s'emplo-
ient au
Brasil.*

à part, à fin de dire quelque chose en general du fruit qui s'est fait en la conuersion de ce peuple. Toutesfois auant qu'entamer ce discours, il faut sçauoir qu'il y a au Brasil trois sortes de gens, au salut desquels il est necessaire de s'employer.

Les premiers sont les Portugais, lesquels on ayde spirituellement, en leur preschant la parolle de Dieu, leur administrant les Sacremens de la Penitence, & de l'Eucharistie, les consolant en leurs afflictions, les aydant à bien mourir, enseignant la doctrine Chrestienne,

Chrestienne, & les bonnes lettres à leurs enfans, brief faisant en leur endroiēt tout ce qu'on a accoustumē ailleurs, pour le salut du prochain. D'ou s'en est ensuiuy, par la grace de Dieu, l'amendement de beaucoup d'abus, & la conuersion d'une infinité de gens, qui ont esté retirez d'une vie meschante & detestable, estās induiēt à faire penitence de leurs pechēs, & à viure plus Chre- *Le profit qu'on a fait à l'edroit des Portugais.*

stiennement. On a esteinēt & assoupy plusieurs inimitiez & rancunes enuieillies des long temps: beaucoup de meurtres ont esté empeschez: on a fait faire à plusieurs restitution des biens mal acquis; & beaucoup d'autres bonnes œuures & pieuses pour le diuin seruice. Lesquelles choses nous ne specifions pas icy, pour estre communes à tous les autres lieux, ou ceux de la mesme Compagnie resident. La seconde sorte de personnes sont les Negres ou les Mores d'Angola ou de la Guynée, que les Portugais vont achepter en ces pais, & de là les menent au Brasil, tāt pour leur seruir aux engins de succe (qui est le principal gain qu'ils retirent de là) que pour le labourage de leurs terres. Il y a donc au Brasil vn fort grand nombre de ces Negres, dont la pluspart sont si rudes & si grossiers, qu'a grand peine cognoist on en eux l'vsage de la raison. Or comm' ils sont dispersez ça & là par les engins & metairies de leurs maistres, & n'ont aucune commodité de venir es villes, ou ceux de la Compagnie resident, ils croupiroiēt tousiours en leur infidelité & ignorance des choses de leur salut, si les Peres ne les alloient instruire là mesmes. Et pource il en y a, qui sont destinez pour aller ça & là par les metairies & engins de succe, afin d'enseigner ces pauvres gens le chemin de salut, & leur conserer les Sacremens necessaires, comme le Baptisme, la Penitence, l'Eucharistie, & le Mariage, faisant en leur endroiēt l'office des Curez: parce qu'il n'y a là autre qui le face. L'on ne *Le profit qu'on a fait envers eux pour leur salut.*

scauroit croire le grand bien, qui s'ensuit de cela. Car autrement il y auroit bien peu de ces Negres, qui allassent en Paradis. La troisieme maniere de gens sont les naturels Brasiliens. Et parce qu'outre le fruiēt qui se fait avec ceux, qui demeurent aupres des villes des Portugais, le principal consiste es Missions, qu'on va faire au dedans de la terre ferme, pour les amener près du riuage de la mer, les Peres entreprennent souuent de bien longs & fascheux voyages pour ceste occasion. Car puis que les Brasiliēs, qui demeurent au long du riuage de la mer en diuers villages ou bourgs proches des villes ou citez des Portugais, sont desia tous

Chrestiens, & qu'on n'a autre chose à faire avec eux, que de les maintenir en leur debvoir, afin d'en conuertir de nouveau quelques autres, ou reduire ceux, qui se sont esgarez, il faut necessairement les aller querir, tantost parmy les espesses forests, tantost parmy les hautes montagnes ou profondes vallées. En quoy il est necessaire de patir beaucoup. Car on va d'ordinaire par vn pais tout despeuplé, sans trouuer homme du monde, sinon de ces sauuages, qui ne souhaitent rien tant que de rencontrer à l'escart quelques Portugais ou autres de leurs ennemis, pour les manger. On trouue fort souuent des Tygres, des Pantheres, & autres bestes farouches, en danger d'estre deuoré d'icelles. Le laisse à part la faim qu'on endure : car il aduiant souuent qu'on n'a pour se nourrir autre chose, que des fueilles d'arbres, ou des racines d'herbes : & quelquesfois on est contrainct de manger des rats, des lezards, voire des serpens, & autres bestes semblables, pour ne mourir de faim. Mais la soif qu'on endure est bien encore plus fascheuse. Car la terre ferme du Brasil est en plusieurs endroiets despourueüe d'eau : tellement qu'on marche plusieurs iournées sans trouuer aucune riuiera ny ruisseau, ou fontaine : & pource il faut porter des bouteilles pleines d'eau, laquelle venant à faillir, si on ne trouue d'ou en puyser, on est contrainct d'esteindre la soif avec la racine, ou les fueilles de certaines herbes humides, & d'vser de plusieurs autres artifices, que la necessité enseigne. Ce qu'on endure volontiers en souuenance de la soif, que le Sauueur du monde patist en l'arbre de la Croix pour le salut de nos ames, duquel principalement il estoit alteré : taschant de l'estancher avec ces peines & trauaux qu'on souffre, pour la mesme cause. Aussi ce debonnaire Seigneur depart ses consolations à mesure des trauaux, & deliure d'un infinité de dangers ceux, qui s'hazardent à tels perils : monstrant bien que c'est luy qui a dit à ses disciples, que s'ils beuuoient quelque chose venimeuse, cela ne leur nuyroit point : comme il aduiant d'ordinaire à ceux, qui entreprennent ces voyages, ainsi que nous verrons cy apres. Voyla ce que nous pouuons dire en gros du profit, qui s'est fait au Brasil. Baillons maintenant en detail, ce qui est propre de chasque lieu, ou l'on a des Colleges, ou maisons de Residence, rapportans les Missions, qui ont esté faictes aux lieux, d'ou sont sortis ceux, qui y ont esté enuoyés.

Sont contraincts de manger des rats, des lezards, & des serpens.

Moyens pour estancher la soif.

Murs.
26.

*Du College de la Baye de tous les Saincts, & des Residences des
Itheos, & du Port-asseuré qui en dependent.*

CHAPITRE XXVIII.

NOUS auons cy deuant parlé de la fondation du College de la Baye, qui est en la cité du Sauueur, ou l'on tiét d'ordinaire six Regens, l'un qui liist la Theologie Scholastique, l'autre la Morale, vn qui fait le cours de Philosophie, deux qui enseignent la langue Latine, & vn qui monstre à lire & escrire aux petits enfans. L'on a pareillement charge de trois gros bourgs de Brasiliens, qu'il y a tout aupres de la ville, pour les instruire és choses de leur salut, & leur administrer la parolle de Dieu, & les Sacremens. En chascun de ces bourgs, il y a deux Religieux de la Compagnie, l'un qui est Prestre, & l'autre non : lesquels resident là, pour la plus part du temps, bien que d'aucunes fois ils se retirent au College, pour les raisons qu'auons dit. Les Brasiliens les ayment & respectent grandement : & leur sont si obeyssans, qu'il ne faut que leur dire vn mot de ce, qu'on veut qu'ils executent, & aussi tost cela est faict. Je pourroy apporter beaucoup d'exemples de cecy: mais pour n'estre trop long, ie me contenteray d'un seulement, qui aduint l'an mil cinq cens quatre vingts huiet, auquel les Anglois arriuerent à la Baye de tous les Saincts, avec vne flotte de plusieurs nauires, pour prendre terre, & se saisir de quelque place là aupres, ou de la Cité mesme, s'ils eussent peu. Le P. Christofle de Gouea, qui estoit lors Visiteur des Colleges & maisons de la Compagnie au Brasil, se trouuant à la saison en ceste ville, & voyant le peu de forces, qu'il y auoit pour empescher la descente des Anglois, faict aduertir les Peres, qui demeuroient aux bourgs des Brasiliens du danger, auquel la ville se retrouuoit, leur ordonnant de faire en sorte, que ceux qu'ils auoient en charge, vinssent au secours. Ce qu'ils firent en diligence. Et aussi tost voyla vn bon nombre d'originaires, armés de leurs arcs & fleches, qui s'en vont aux lieux, qui leur furent assignez, pour empescher les ennemis de prendre terre. Bref assistez & encouragez par les Peres, ils se comporterent si vaillamment, que les Anglois ayās demeuré plusieurs iours aux anchres, & s'estās efforcés bien souuent de sauter à terre, n'eurent toutes-fois iamais le courage, ny le moyen de ce faire, à cause de la re-

Exercices du College de la Baye.

Histoire remarquable.

*Raris
monta-
gne.*

*Les Ra-
riens se
veulent
rendre
Chre-
stiens.*

*Deux de
la Com-
pagnie
vont vers
eux.*

*Leur per-
suadent
de s'al-*

sistence, que les Brasiliens leur feirent. Tellement qu'ils furent contraincts de se retirer, sans auoir rien aduancé de ce, qu'ils pre-
tendoient. De ce College partirent l'an 1581. deux Religieux de
la mesme Compagnie, vn Pere avec vn autre, qui ne l'estoit pas,
pour faire vn voyage vers certains peuples, qui habitent en vne
haute montaigne appellée Raris, qui est esloignée de la Cité de
la Baye quelques cent ou six vingt lieuës, au dedans du païs. Ceste
montagne prenant du Midy au Septentrion, aura quelques
vingt lieuës d'estenduë. Or l'occasion de ce voyage fut, parce
que les habitans de ceste montagne, qui sont en grand nombre,
delegerent quelques vns des leurs, pour venir au College de la
Baye, faire entendre aux Peres le desir, qu'ils auoient de se rëdre
tous Chrestiens: mais qu'ils ne pouuoient aller par deuers eux;
parce que leurs ennemis leur tenoient le passage fermé. Et par-
tant les prioient de vouloir faire en sorte enuers leurs ennemis,
qu'ils les laissassent passer. Les Peres entendans cela, enuoyerent
au plustost vers leurs ennemis ces deux de la Compagnie. Le
chemin pour aller là, est si fascheux & difficile, qu'à peinc en
peut on sortir: car il faut passer par des longues & vastes solitu-
des, trauerser force ruyssaux & riuieres; mesmes quelques vnes
bien perilleuses. Il faut grauir cõtre-mont par des lieux desrom-
pus, & fort roides. Brief à cause de la disette des viures, ce voya-
ge est presque insupportable: car bien souuent ceux, qui le font,
sont contraincts de se nourrir de serpens, & autres bestes veni-
meuses, comme nous auons dit. Cela fut cause que le compa-
gnon du Pere tomba malade en chemin; tellemēt qu'il fut con-
trainct de s'arrester à vn bourg ou village de certains barbares,
qui ont vn langage tout different des autres; de sorte qu'il falloit
se donner à entendre à eux par signes, & conceuoir par mesme
moyen, ce qu'ils vouloient dire. Neantmoins Dieu les rendit si
humains & si charitables enuers le malade, que leur Chef bail-
la charge à quelques ieunes hommes fort experts à la chasse, tant
des oyseaux, que d'autre venaison, de l'en pourueoir abondam-
ment. Ce qu'ils firent si bien, qu'en peu de temps le malade fut
remis en santé, & arriua quelque temps apres à la montagne de
Raris, ou il trouua le Pere, lequel auoit desia obtenu le passage
libre des ennemis, pour les Rariës; de maniere que chascun d'eux
s'apprestoient desia, pour suyure le Pere, & s'aller loger près la
Cité de la Baye. Mais comme tous estoient prests de marcher,

voicy l'ennemy de nostre nature, & de tout bien, qui se met à la trauerse, pour empescher vne si sainte retraicte. A ce faire, il se fert d'une certaine race de gens, qu'il y auoit parmy les Rariens, qu'on appelle en ce pays là Mammeluz, qui sont des mestifs, c'est à dire engendrez d'un Portugais, & d'une Brasilienne. Ceux-cy donc ayans accoustumé de longue main, d'abuser ces simples gens avec leurs ruses & fallaces, & voyans que s'ils s'alloyent tenir près de la ville, ils n'auroient plus moyen de leur donner des bayes, comme ils font extrêmement meschans, ils se fourrent parmy le peuple, & luy persuadent de ne se fier pas au Pere, disans qu'il les vouloit mener près de la ville des Portugais, pour les afferuir & rendre esclaves. Les Rariens qui estoient d'un costé fort simples & faciles à tromper, & de l'autre craignoient merueilleusement de tomber en ce malheur, que les Mammeluz leur depeignoient si au vif, furent à ceste occasion destournez du bon conseil qu'ils auoyent pris, & changerent tout à fait de resolution. Il en y eust seulement deux cens, qui perseuererent en leur bonne volonté, & furent cōduicts par le Pere aux bourgs des Brasiens, qui sont auprès de ceste ville: ou ils arriuerent au mois de Iuillet, avec grande resiouissance de tous les anciens habitans d'iceux. Quant aux autres qui s'arrestèrent à la montagne, ils ne perdirent pas pour cela le desir, qu'ils auoyent d'estre Chrestiens: car ils deleguerent de là à quelque temps un homme exprés au P. Prouincial, pour le prier de leur enuoyer quelques uns de la mesme Compagnie, afin de les instruire & baptiser. Tellement qu'il en y alla trois l'an 1590. deux desquels estoient Prestres. On les aduisa qu'ils taschassent de persuader à ces montagnards, de s'en venir demeurer auprès des villes ou citez des Portugais, affin qu'on eust moyen de les instruire plus commodement: car on a veu par experience, qu'il ne se fait pas autrement beaucoup de profit, à l'endroiect de ces barbares, au moins qui soit de durée: parce que n'estans pas entretenus de pasture spirituelle, ils se fouruoient bien tost du droiect sentier de la vertu, & retournent à leur premiere barbarie. Or demeurans si loing des villes, ou les Portugais habitent, on n'a pas le moyen de leur despartir si souuent le pain de la parole de Dieu, & des Sacramens: c'est pourquoy on tasche de les induire à cela tât que faire se peut. Ces Peres dōc estans arriuez à la montagne de Raris, cōbien qu'avec grand peine, à cause des incōmoditez du chemin,

*les tenir
près de
la cité
de la
Baye.
Mamme
lus quel
les gens
sont.*

*Les Rariens sont
destournez par
eux de
leur bon
propos.*

*Conti-
nuent en
leur va-
lonté d'es-
tre Chra-
stiens.*

remonstrerent aux principaux des habitans, qu'il estoit expedié de changer de demeure, s'ils vouloyent estre Chrestiens. Il en y eust quelques cent cinquante, qui les creurent, & s'en allerent avec eux se loger aux bourgs des Brasiliens proches de la cité de la Baye: là où apres qu'on les eust deuëment instruits en la foy, ils furent baptisez avec grandé solemnité & resiouissance, tant de leur costé, que des autres Chrestiens.

On les
va in-
struire
en leur
montai-
gne.
S'esuyët
pensans
qu'à les
voulut
afferuir.

Finalemēt comme l'on vid, que ceux, qui s'estoyent encores arrestez en la montaigne, continuoyent tousiours en leur bon desir, nonobstant qu'ils ne voulussent pas quitter leur demeure, l'on fust d'aduis de les aller instruire là mesme. Tellement que l'an 1594. à l'instance du Gouverneur du Brasil, quatre de la Compagnie s'y acheminerent. Mais d'autant qu'ils auoyent amené quelques cent Brasiliens de ceux, qui s'estoyent desia domestiquez, & nourris parmy eux, tant pour les soulager par les chemins, que pour monstrier par leur exemple la vie, que deuoyent mener ceux qui se voudroyent conuertir; les Rariens voyans vne si grande multitude de gens tous vestus, contre la coustume des naturels du païs, penserent que c'estoyët des Portugais, qui vinsent pour les afferuir: de façon qu'ils mirent le feu à leurs loges, & s'enfuyrent, qui deçà, qui delà; les vns se retirans aux lieux plus assurez de la montaigne, les autres s'allans muser dans quelques cachots des plus profondes vallées; quelques vns se fourrans parmy les bois & forests espesses, qu'on trouue là. Ceux de la Compagnie s'estans apperceus de cela, tascherent de leur oster ceste vaine crainte, faisans entendre à quelques vns d'iceux qu'on attrapa, que c'estoyent des Peres, qui estoient venus là tout exprés pour leur môstrer la voye de salut: & ceux-là le feirent incontinent sçauoir aux autres: de maniere qu'ils sortirent tous de leurs cachots, & vindrent accueillir les Peres, & ceux qui les accompagnoyent, monstrans à tous beaucoup de signes d'amitié, & de bienueillance. La premiere chose, que les Peres y feirët fust de dresser vne chappelle, & là dedās vn autel, pour y dire la Messe. Apres ce ils se mirent à catechiser ceux, qui desiroyët estre baptisez. Et lors qu'ils estoient prests ils leur conferoyent le Baptisme. Puis on leur enseignoit comme ils se deuoyent cōfesser, & s'approcher de la sainte table du precieux corps de IESVS-CHRIST, si bien qu'il en y eust dans peu de temps quelques quatre cens, qui furent trouuez propres & idoi-

nes pour y estre receus. Bref ils faisoient en leur endroict l'office de Curez, en deffaut d'autres : & s'il y auoit quelque querelle ou different entr'eux, ils les accordoyent aisement : car ces gens là sont fort dociles, & d'un bon naturel, & portent un grand respect & honneur aux Peres. Ils firent donc un grand fruit en ceste montagne, combien que ce ne fust pas sans beaucoup de peine : car il leur falloit courir çà & là par mots & par vaux, pour assembler ces brebis esgarées. Et comme les chemins sont là fort raboteux & malaisés, entre plusieurs autres incommoditez qu'il y a en un pais desert & inhabité, cōme celuy-là, ils enduroient beaucoup : mais avec cela ils estoient si contents & si ioyeux en leur traualx & mesaises, qu'ils ne trouuoient pas de goust en leurs fonctions, si elles n'estoyent assaisonnées avec telle saulce. Or afin que les Rariens n'eussent point occasion de se scandaliser de la mauuaise vie des Portugais, qui estoient parmy eux (car quelques uns d'iceux s'y estoient desia habitez) le Gouverneur du Brasil leur commanda, qu'ils eussent à vider, & se retirer ailleurs, de peur que leur auarice, leur dissolution, & autres vices, ne donnassent mauuais exemple à ces nouueaux Chrestiens. Voila ce que nous auons peu sçauoir iusques à present de ces montagnards. Pourfuyons maintenant le reste, qu'il y a eu de remarquable és missions du College de la Baye.

Comme donc ce grand Pere de famille alloit tous les iours semant le bon grain de sa sainte parolle dans les chāps de ceste gentilité, l'ennemy de nostre nature ne laissoit pas aussi de son costé d'y sursemer de l'yuraye. Car enuiron l'an 1583. il suscita vne nouuelle secte parmy les Brasiliens, tant Payens qu'autres, qui auoyent esté desia baptisez, d'autant plus pernicieuse, qu'elle sembloit auoir plus de ressemblance avec la vraye foy. Inuétion du tout diabolique, controuuée par ce forger de toute malice & impieté, pour faire accroire à ces simples gens, qu'il n'y auoit point de difference entre leur superstition, & la Religion Chrestienne : afin que quand on la leur prescheroit pure & nette de tout mélange d'erreur, ils n'estimassent pas qu'on leur enseignast vne foy differente de leur croyance, ou que s'il y auoit quelques poincts qui ne fussent pas semblables, que la leur estoit à preserer à la nostre. Je pense que ceste secte fust semée par le moyen de quelques uns de ces Mammeluz, ou Mestifs, que nous auons dict : lesquels ayans apprins parmy les Chrestiens beau-

*Se couer
tissent à
la foy.*

*Sathan
inuenta
et intro
duisit vne
super
stition
parmy
les Bra
siliens.*

*Pour
mieux
tromper
il la fait
paraître
semblable à la
Religion
Chre-
stienne.*

*Comme
ils esti-
moient
auoir at-
teint au
sommet
de la per-
fection.*

coup de choses de nostre Religion, en forgerent vne à leur fantaisie, qui auoit quelque peu de ressemblance à icelle, y adioustant de leur teste, & par la suggestion de Sathan, beaucoup de sottises & impietez, comme l'on cognoistra par leurs dogmes & façons de faire, que ie m'en vay deduire. Ils eslisoyent vn des leurs, qui estoit comme souuerain Pasteur de tous: lequel ils appelloyent aussi Pape, de mesme sorte que nous. Ils auoyent outre celuy-là plusieurs autres Prelats, qu'ils nommoient Euesques, & encore des Prestres, que ces faux Euesques consacroyent à leur mode. La confession auriculaire estoit en vsage parmy eux: laquelle ils faisoient à ces faux Prestres, qui sembloient leur donner l'absolution, & dire la Messe, comme les nostres. Ils portoyent de certaines petites boulettes enfilées à guise de patenostres, & s'en seruoyent pour la priere, comme nous faisons des chapelets. Quand ils vouloyent assembler le peuple à l'oraison, ou à la predication, ils sonnoient quelques grandes courges vuides, comme nous nous seruons des cloches. Pour l'instruction de la ieunesse, ils auoyent institué certaine façon de Colleges, ou tous ceux qui vouloyent, pouoyent aller estudier, sans payer rien, comme l'on fait és Colleges de la Compagnie. Ils auoyent des liures faicts d'une certaine escorce d'arbre, lesquels ils couuroyent avec des petis ais ou planches de bois fort desliées: là où ils auoyent escript plusieurs caracteres incognus, qu'ils receuoyent de la main du diable, à ce qu'on diët. Au reste ils se vëtoient de sçauoir la façon d'arriuer & atteindre au sommet de la perfection de sainteté: laquelle ils estimoient auoir acquise, lors qu'ils estoient deuenus comme fols & insensés, en beuuant le suc d'une certaine herbe, qu'ils appellent Petina (peut estre que c'est le Petun si renommé parmy les Brasiliens, & autres barbares de l'Amerique) qui est de si grande force & vertu, & d'une chaleur si excessiue, qu'aussi tost qu'ils auoyent beu le suc d'icelle, ils tomboyent par terre, avec vn tremblement de tous les membres: & tordoyent fort vilainement le visage, tirans la langue hors de la bouche d'une façon fort laide, & mal-seante. Brief ils se veautroyent par terre, comme ceux qui tombent du haut mal. L'on entendoit cependant bruire quelque chose dans leur corps, de façon qu'il sembloit, que quelqu'un parlât au dedans d'eux, combien qu'ils n'ouurissent point la bouche, ny ne remuassent aucunement les leures. En fin ils faisoient des gestes

si hideux

si hideux & si horribles, qu'on pouuoit aisément cognoistre, que celuy qui caufoit tels sympromes, n'estoit autre, que le malin esprit, qui les possédoit. Or apres qu'ils auoient esté assez long temps en tel estat, ils reuenoient à eux mesmes, & s'estans vn peu delassez, ils se faisoient lauer tout le corps auec de l'eau: & voyla comment ils s'estimoient estre sanctifiez, & auoir attein le sommet de la perfectiõ de leur fortise; mais ceux, qui auoient faiet des gestes plus affreux & plus horribles, estoient tenus pour les plus saincts. Quât à leurs dogmes; ils disoient que leurs ancestres, decédez long temps auparauant, debuioient aborder là dans vn nauire, & que par leur moyen, ils seroient deliurez de la seruitude des Portugais; lesquels ils disoient deuoir estre tous massacrez par leursdits deuanciers, si tost qu'ils seroient arriuez: & que s'il en eschappoit aucun, il seroit transmué ou en poisson, ou en pourceau, ou en autres bestes semblables. Finalemēt ils disoient, que tous ceux, qui croyoient ces choses, s'en iroient asseurement en Paradis: mais ceux, qui les meseroient, seroient deschirez par les oyseaux de proye, & autres bestes sauuages.

*Les fa-
bles
qu'ils
croyoient.*

Ceste folle creance & superstition ayant commencé de naistre en la region mediterrannée du Brasil (là ou se tenoit leur venerable Pape) s'estoit desia espandue d'un costé & d'autre par le moyen des Legats, qu'il enuoyoit ça & là vers les Brasiliens, qui habitoient au dedans du païs, & encore à ceux qui demeuroient sur la coste de la mer, ou tout aupres des villes des Portugais. Tellement qu'elle estoit desia entrée bien auant en la teste de plusieurs, qui s'en couroient à grosses troupes à leur faux & supposé Pape, laissant leurs maisons à l'abandon, & tout ce qu'ils y auoient dedans. Voire qui pis est, esgorgeoient quelquesfois leurs propres enfans, ou les ensepuelloient tous vifs dans terre, afin qu'ils ne leur empeschassent la fuytte, ou ne fussent cause, qu'on les attrappast en chemin: & auant que partir ils faisoient le pis qu'ils pouuoient contre les Portugais. Car ils brusloient leurs metairies, & engins à sucree; ils rauageoient leurs champs ensemencez, ou leurs vergiers plantez, & massacroient cruellement tous ceux, qu'ils rencontroient à l'escart. Les Peres de la Compagnie voyans vn tel desordre, s'en vont promptement aux bourgs des Brasiliens, bien qu'ils fussent en grand danger de leur vie: & taschent par tous moyens de leur ôster de l'entendement ces illusions diaboliques, & de maintenir en leur debuoir ceux, qui

*Les mes-
chance-
tes qu'ils
commet-
toient.*

*plusieurs
sont de-
sormais
de ces so-
lies par
ceux de
la Com-
pagnie.*

n'auoient pas encore pris la fuytte. Ils en gaignerent beaucoup, assiste de la diuine grace. Et par ce moyen empescherent de grands maux, que ces mal-aduisez alloiēt com mettre: si que plusieurs des Portugais recognoissans le benefice, qu'ils auoient re-
 çeu par le moyen des Peres, s'en venoient les remercier la larme à l'œil, les vns de leur auoir sauué la vie, les autres de les auoir garantis de beaucoup de pertes & dommages, qu'ils alloient encourir: quelques vns qui n'estoient pas encores du tout asseürés, les venoient prier, de les vouloir secourir, amadouant les sauua-
 ges, & les destournant de leur mauuaise volonté. A quoy les Peres s'employoient volontiers. Et non sans fruiēt: car ils en conuertirent beaucoup.

*Mesmes
 en vn
 bourg
 qui es-
 toit
 sous
 leur
 charge.*

Or comme ceste peste se fut aussi glissée dans vn bourg de
 Brasiliens, duquel ils auoient charge, & ce du temps, que le Pe-
 re, qui les souloit gouverner, en estoit absent (car cest lors, que ce
 loup infernal a coustume d'entrer en la bergerie, quād il la treu-
 ue despourueü de Pasteur) si tost que le Pere en fut aduertý, il
 s'en va vers ses parroissiens, & releue ceux, qui s'estoient laissez
 aller; maintenant en pied les autres, qui branloient, comme l'on
 dit, au manche. Ce qui leur profita de beaucoup: car à l'occasion
 de ceste cheutte, ils se r'affermerent d'auantage, & furent plus cō-
 firmez en leur foy, tirans du poison la medecine mesme. De fa-
 çon que de là en auant ils se monstrent plus deuots & feruens
 que les autres, qui n'auoient pas esté esbranlez. Ce qu'ils feirent
 bien paroistre lors, qu'on leur donna congé de prendre vengean-
 ce de ce meschant seducteur, qui les auoit embabouinez. Car
 ainsi qu'il reuenoit d'un voyage, qu'il estoit allé faire vers certai-
 nes montaignes, tout expres pour en seduire d'autres, estant bien
 pres de son logis, ceux qu'il auoit premierement deçeus, & qui
 s'estoient desia recogneus, se iettent incontinent sur luy, & luy
 donnent tant de coups de poing, & de baston, qu'ils l'eussent as-
 sommé, si le Pere ne les en eust empeschez. Mais afin que son for-
 faiēt eut la punition qu'il meritoit, ils le menerent deuant le
 Gouverneur, luy demandans justice. Laquelle le Gouverneur
 leur octroya, condemnant ce seducteur à estre mis à mort, de la
 façon qu'ils voudroient. Ayant dōc esté liuré entre leurs mains,
 ils luy coupent premierement la langue, pour punition de ce,
 qu'il les auoit seduits par icelle, & apres ils le vont pendre &
 estrangler à vn arbre: & de ceste sorte traicterent ils celuy, qu'ils

*Chasti-
 ment
 d'un se-
 ducteur
 orgueil-
 leux.*

auoient tant estimé & honoré auparauant. Ainsi en aduient il pour l'ordinaire aux superbes & orgueilleux, que de se veoir d'autant plus humiliez & abbaissez, qu'ils se sont voulus esleuer par dessus leur portée.

Mais à tant de cecy, racontons maintenant quelques miracles, qu'il a pleu à Dieu faire parmy ces barbares, pour donner auctorité à sa foy. L'an 1584. vne femme Brasilienne, estant si malade, qu'on pensoit qu'elle deust mourir bien tost, demanda qu'on luy donnast le saint baptême : l'on fut d'aduis, eu esgard au danger, ou elle estoit, de le luy conferer sur le champ. Ce qu'ayât esté faict, elle recouure tout aussi tost la santé, Dieu voulant (ce semble) monstrier par ce miracle, la vertu & efficace du S. Sacrement de baptême. Mais en voiey vn autre pour celuy de l'Eucharistie. Certain Brasilien ayant esté grieuement blessé à vn bras d'un coup de fleche, laquelle estoit entrée si auant, & luy auoit tellement coupé la veine, qu'il tomboit souuent en faisoison, tant à cause de la douleur, que pour l'abondance du sang qu'il perdoit: car on ne pouuoit en façon quelcôque le luy estancher. Finalement comme l'on vid, qu'il n'y auoit point d'esperance aux remedes humains, on l'exhorte à se confesser, & à se preparer pour receuoir son Createur: car il estoit Chrestien. Somme qu'aussi tost, qu'il eut reçu le precieux corps de IESVS-CHRIST, voyla que le sang s'arreste, & il fut biē tost apres guery. Plusieurs autres ont reçu guerison de leurs maladies en beuuant de l'eau beniste, & par telles merueilles non seulement le nombre des Chrestiens a prins grand accroissement: mais encore ceux, qui l'estoient, ont esté confirmez de plus en plus en la foy. Je rapporteray cy apres plusieurs autres faits semblables, & encore de plus merueilleux, en parlant des lieux, ou ils sont aduenus. Mais auant que passer outre, i'adiousteray encore icy vn mot d'une Mission, que les Peres de ce College de la Baye seirent au dedans du païs l'an 1587. pour l'amplification de la foy, combien que la chose ne réussit pas, comme ils eussent désiré. Car ayant desia persuadé aux habitans de dix villages, qui vouloient estre Chrestiens, de s'en venir loger aupres de la ville, pour estre mieux instruits, le malin esprit preuoyant l'escheec, qu'il alloit receuoir, si ces gens là eussent creu le conseil, qu'on leur donnoir, va finement susciter quelques vns d'iceux, qui font courir vn faux bruit disans, qu'on les menoit finement en esclauage, & que sous pretexte de reli-

Miracles aduenus à Brasiliens.

Du Baptême.

De l'Eucharistie.

gion, on les vouloit afferuir. Ces simples gens donnerent croyance à telles bourdes; de façon qu'il n'y eut personne d'eux, qui voulut suyure le Pere, excepté vn vieillard avec sa fille, & deux enfans d'icelle, ses nepueux, l'un masle, qui estoit bossu, & partant falloit il le porter sur le col, & l'autre aueugle, qui estoit vne fille, laquelle il falloit guider. En ceste sorte la sentence de nostre Seigneur fut accomplie, disant que ceux, qui estoient inuitez au banquet celeste, refusans d'y venir, les aueugles & les estropiez y entrèrent en leur place.

Luc. 14.

Voyla quant au College de la Baye. Mais parce que d'iceluy dépendent deux Residences, à sçauoir celles des Ilhéés & du Port-assuré, nous en traicterons en ce mesme chapitre.

La ville donc ou Capitainie des Ilhéés, appartenant aux Portugais, est esloignée de la Cité de la Baye, vers le Sud, quelques trête lieues, sur la coste de la mer, là ou on a basti & fondé d'aumosnes vne maison, pour ceux de la Compagnie: en laquelle ils sont d'ordinaire six ou sept: & outre les fonctions ordinaires qu'ils exercent en tous les autres lieux, ils ont icy vne eschole, ou ils monstrent aux enfans à lire & escrire: lesquels sont si bien appris, & si deuors, que s'ils entendent quelqu'un iurer ou blasphemer le nom de Dieu, ou des Saints, ils se mettent soudain à genoux deuant celuy, qui a iuré, & le prient pour l'amour de Iesus-CHRIST, de ne vouloir pas renier de la sorte. Ce qui profite beaucoup à l'endroit de plusieurs: car se voyans ainsi confondus par les petits enfans, ils s'abstiennent souuent de iurer. Outre ce, ils s'employent avec grand soing & diligence à l'instruction & conuersion des Brasiliens, qui demeurent près de ceste ville. Si bien qu'ils en ont desia gaigné vn bon nombre à la foy de nostre Seigneur. Mais il y en auoit vn entr'autres, qui estoit fort obstiné en son infidelité, aussi auoit-on opinion qu'il estoit vn grand Sorcier: & de faict il auoit acquis si grand credit par ses enchantemens auprès de ces barbares, qu'ils luy adioustoient foy comme à vn Oracle, & à ceste cause il empeschoit la conuersion de plusieurs. Les Peres l'auoyent attaqué plusieurs fois, pour luy faire prester ioug à la verité: mais il se moquoit de tout ce qu'on luy disoit. Or ayant esté touché de la main de Dieu, par vne griesue maladie, comme vn des Peres le fust allé visiter, & l'aduisast que s'il vouloit faire son salut, il recogneut le vray Dieu, & celuy qu'il auoit enuoyé pour le rachap du monde, son fils

En la
ville ou
capitai-
nie des
Ilhéés y
a vne Re-
sidence de
la Com-
pagnie.

Le fruit
qu'ils y
font à
l'endroit
des Bra-
siliens.

vnique IESVS-CHRIST nostre Sauueur, iagoit qu'il n'entendist pas auparavant ces choses volontiers, toutesfois il les escouta pour lors, & ne pouuant resister dauantage à la voix de nostre Seigneur, qui l'appelloit, soudain se tournant vers le Pere: le veulx (dict-il) mon Pere, estre Chrestien, & receuoir le S. Baptisme.

*Conuersio
& guerison
son mira-
culeuse
d'un Bra-
silien.*

Or afin que vous ne pensiez pas que ie me mocque, ou que ie ne croye pas à ce que vous me dictes; sçachez que Dieu m'a rendu la santé: & aussi tost il se leue sain & gaillard du liect, ou il gisoit, & de ce pas s'en va à l'Eglise, ou il fust baptisé avec sa femme: puis s'en alla prescher la mesme foy qu'il auoit auparavant combattuë, à ceux aupres desquels il auoit tant de credit, & ce avec vne telle ferueur, que non seulement les Brasiliens, mais aussi les Portugais en estoient tous esmerueillez, voyans vn si grand changement en luy. Cecy aduint l'an 1585. & deux ou trois ans apres, ce qui s'ensuit, non guere moins esmerueillable. Il y auoit en ce mesme bourg vne vieille si contraire à la foy Chrestienne, qu'elle ne tenoit aucun cōpte de tout ce qu'on luy en disoit: ains, qui pis est, destournoit les autres tant qu'elle pouuoit de l'embrasser. Or vn iour son mary luy bailla tant de coups de baston, qu'il l'auoit laissée pour morte: car elle demeura tout vn long temps estenduë sur le pauë, si qu'on pensoit qu'elle eust rendu l'ame: mais comm' on luy eust ietté de l'eau dessus, elle reuint à foy, & aussi tost faict appeller vn des Peres: lequel elle prie instamment de luy vouloir conferer le Baptisme au plustost. Le Pere tout estonné d'un changement si soudain, luy en demande la cause: lors elle commence à dire, qu'elle auoit esté menée en des lieux fort obscurs, là où ceux qui n'ont point esté baptisez, estoient bruslez d'un feu horrible, & i'y ay veu (adioustant-elle) ma pauure & miserable fille, toute enuironnée de flammes: parce qu'elle est morte opiniastre en ceste superstition damnable, que ie tenois: de façon qu'avec son haleine, elle m'a bruslé tout le dos, & de faict on trouua les marques de la brulure sur iceluy. Autres deux ou trois ans apres il y eust vn des chefs ou principaux Seigneurs de ces barbares, qui fust aussi conuertý par le moyen d'une affliction, que Dieu luy enuoya: car au parauant il estoit si obstiné, qu'il n'y auoit moyen de le fleschir à faire ioug à la loy de nostre Seigneur. Mais ayant esté griefuement blessé de quelques coups de fleche, & son fils encores, il se rendit vn peu plus souple: de sorte que quelques Peres l'estans allé

*Autre cō-
uersion
& guerison
merueilleuse
d'un Bra-
silien.*

2

visiter en sa maladie, il leur dict qu'il vouloit estre Chrestien: & de faict apres qu'ils l'eurent suffisamment instruiet, il fust baptisé à sa grande consolation, & des Peres. Peu de iours apres estant proche de la mort, il commanda à ses seruiteurs d'aller querir quelqu'un des Peres, pour luy assister en ceste derniere heure: mais aucun des seruiteurs ne le voulut faire, parce qu'ils estoient tous fort obstinez en leur erreur. Luy voyant cela prend en ses mains vne croix, à laquelle, comme bõ Chrestien, ores que nouveau, il portoit grand honneur, & l'embrassant deuotement, & avec grande abondance de larmes, il rendit l'ame à nostre Seigneur. C'est assez pour le regard des conuersions.

*Aymu-
res ou
Gaymu-
res quel-
les gens
sont.*

*Leur cru-
auté &
barbarie*

Or pour entendre beaucoup de choses, que nous dirons cy apres, il faut sçauoir, que tout auprès de ceste Capitainie des Ilhées, il y a vne sorte de gens les plus barbares & cruels, qui soyent en tout le Brasil nommez Aymures, ou Gaymures: car on dict qu'ils mangent les enfans tous vifs, vn membre apres l'autre (ainsi que les Poëtes anciens ont feint de Saturne) & qu'ils ouurent le ventre des femmes enceintes, pour en tirer le fruiet qu'elles portent, & l'ayant osté de leurs entrailles, le mangent en leur presence mesme. Ils vont d'ordinaire à la chasse des hommes, comme nous des bestes sauuages, pour se nourrir de leur chair, & se ruent à l'impourueu sur les metairies, ou engins de sucre, que les Portugais ont là, de sorte qu'ils en amènent tous ceux, qu'ils peuuent attrapper, & les gardent quelque fois en vie, pour vn temps, afin de les faire engraisser, & les manger par après. Chacun d'eux vist comme il luy plaist, & là ou bon luy semble: car ils n'ont point de Superieur, auquel ils obeissent: combien que celuy est estimé le plus vaillant entr'eux, qui a tué & mangé plus d'ennemis: non pas toutesfois, que pour cela il ait aucune surintendance ou auctorité sur les autres, ny qu'il les puisse chastier ou reprendre. Ils sont fort sur leurs gardes, afin qu'aucun des leurs n'ait en façon quelconque intelligence ou communication avec les ennemis, de façon que s'ils en sçauent quelqu'un, qui ait parlé ou hanté avec eux, pour ceste seule cause ils le tuent & le mangent. Ils ne vont pas d'ordinaire en grâdes troupes, encore qu'ils aillent attaquer les ennemis: mais ils sont tous leurs exploicts de guerre par surprise, ou par trahison, se tenans cachez derriere les arbres, les buissons, ou mottes de terre, & attendans là, que quelqu'un d'iceux passe. Contre lequel estant proche d'eux, & n'y

pensant pas bien souuent, ils decochent leurs fleches, dont pour l'ordinaire ils se tuent, car ils sont grâds archers. Que s'ils se craignent de leurs ennemis, ils s'ensuyent incontinent, & se retirent dans les bois, avec vne telle viffesse, qu'on diroit que ce sont des cerfs. Voila pourquoy on ne leur peut pas faire la guerre: car on ne sçait ou ils se tiennent, & si tost qu'ils descouvrêt quelque grâd nombre de gens, ils se mettent en fuite, & ne combattêt iamais en plain champ de bataille, ny mesme en escarmouches. Ils font leur sejour & demeure depuis la riuiera de S. François, iusques au cap Frie, qui seront près de cent lieuës, non pas sur la coste de la mer, car les Toupinambauts & les Tupinachins, desquels nous parlerons cy apres, les en ont chassés, il y a assez long temps. Les Portugais aussi y ont force peuplades, qui empeschent que ces barbares n'arriuent pas à la coste: mais ils occupêt, ce qui est immediatement apres vers la terre ferme: & de là ils s'eslancent sur les villages, ou des Portugais, ou des Brasiliens, qu'il y a là tout auprès; leur faisans tous les maux qu'ils peuuent. De maniere que plusieurs Portugais, qui auoyent là leurs metairies, ont esté contraincts de les quitter; jasoit qu'elles leur vallussent les 30.40. ou 50. mil escus de rente: car ils estoient tous les iours en alarme, & en danger d'estre tuez & mangez de ces barbares: lesquels auoyent desia deuoré tous les seruiteurs & esclaués, qu'ils y tenoyent. A ceste cause la ville de saint Aymar a esté abandonnée des Portugais, avec quatre ou cinq engins de succe, qu'il y auoit de grand profit & reuenue. Ceste ville aussi ou Capitainie des Ilhéas, qui a vn terroir tres-fertile, a esté quasi du tout ruinée, & beaucoup d'autres pays tres-bons, & tres-propres pour estre cultiuez, ont esté rendus incultes, personne n'osant labourer la terre pour crainte de ces Aymures. Mais celle qui en a plus paty a esté la Capitainie du Port-assuré: car ils ont reduict ceste ville en tel estat, qu'il n'y a pas maintenât vne vingtaine d'habitans: & ceux-là encores à grand peine s'y peuuent-ils entretenir, à raison des assauts continuels, que ces barbares leur donnent. Si que bié souuent ils sont contraincts de se nourrir d'herbes ou de racines tant seulement, pour n'auoir moyen ny de cultiuer la terre, ny de recevoir viures d'ailleurs. Les habitâs encore de la Baye, ont beaucoup enduré d'iceux, iusques à ce qu'ils ont fait la paix avec eux ces années dernieres, côme nous dirons, Dieu aydant, au supplement de ceste histoire: car cela est arriué depuis l'an 1600.

*S. Aymarville
desertée
à leur ac-
casion &
autres
fort rui-
nées.*

Les habitants des Ilhéas vainquēt les Aymures depuis qu'ils ont les reliques de S. George.

Mais retournāns à la Capitainie des Ilhéés; l'an 1581. on escrimit delà, que depuis qu'ils eurent receu vne relique de S. George martyr, que le R.P. General de la Compagnie de IESVS leur auoit enuoyée six ans au parauant, ces Aymures, qui emportoient d'ordinaire le dessus és guerres, qu'ils faisoient contre les habitants de ceste ville, dès que ceste precieuse despouille du B. martyr S. George y fust portée, la fortune de la guerre se changeant des lors, ils estoient par apres tousiours battus, & perdoient beaucoup des leurs, sans qu'il y eust aucun Portugais de tué, & bien peu des Brasiliens qui soustenoyent leur party. Ce qu'on attribuoit aux merites & prieres de ce valeureux Cheualier de IESVS-CHRIST, & à ceste occasion l'on celebre sa feste avec grande solemnité & resiouissance, laquelle est souuētesfois accreuē par le baptesme de plusieurs Catechumenes, qui sont regenez ce iour là. Il en y eust ceste année de 1581. quelques cinq cens. Mais c'est assés arresté à la Capitainie des Ilhéés: parlons maintenant de celle du Port-assuré.

Port-assuré pour quoy ainsi nommé?

Ce lieu a esté ainsi nômé, à cause que ce fust le premier port, auquel Aluarez Cabral premier descouureur de ceste region, apres beaucoup de tempestes & orages, vint terrir, & pource il l'appella Port-assuré, comme a esté dict cy dessus: depuis les Portugais y ayans basti vne ville, l'ont appelée de mesme. Elle est loing de la Baye vers le Sud quelques cinquāte lieues, & vingt de celle des Ilhéés sur la coste de la mer. Ceux de la Compagnie ont encore icy vne maison de Residence, là où se tiennent d'ordinaire six d'iceux. On y monstre à lire & escrire aux petits enfans, & avec ce l'on s'employe comme és autres lieux, au salut des ames, tant des Portugais, que des Brasiliens, desquels il y a vnze villages proches de ceste ville, ou ils vont ordinairement semer la parolle de Dieu, afin d'amener ces barbares à la cognoissance de leur Createur, & quelques fois il plaist à sa diuine bonté les y attirer par des œures merueilleuses, comme faict foy ce qui s'ensuit. En l'un de ces bourgs il y auoit vn Brasilien, qui estoit le principal, & le plus grand de tous, lequel estant tout couuert de lepre, n'auoit peu trouuer aucun remede pour en guerir. Mais vn des Peres l'estant allé visiter luy donna bonne esperance de sa guerison, s'il mettoit toute sa confiance en Dieu, Createur du ciel & de la terre, qui auoit puissance non seulement de le deliurer de ceste maladie, mais aussi de le faire bien heureux.

Vn Brasilien lepreux guerit avec l'eau beniste & conuerti.

heureux. Et apres luy auoir declaré qu'il auoit laissé en son Eglise des remedes, pour la guerison des ames principalement, & souvent aussi pour celle du corps, il luy faict entendre briuelement la force & vertu de l'eau beniste, puis luy en lene la ladrerie. Or il pleust à nostre Seigneur môstrer sa diuine puissance en la guerison de ce lepreux, car il fut nettoyé soudain, qu'il en eust esté laué, tout ainsi que Naaman le Syrien s'estant laué aux eaux du fleue Iordain. Mais le principal fruit, qui s'ensuyuit de là, fut que ce Brasilien incontinent apres se cōuertit à la foy Chrestienne, avec tous ceux de sa famille, & le bourg entier, ou il demouroit: voyre, qui plus est, à l'exemple de cestuy-cy, deux autres bourgs proches d'iceluy, seirent le mesme: & de ceste sorte l'on est allé petit à petit gaignant le reste. Combien que ce n'est pas sans beaucoup de traualx & dangers, tant à cause des continuel-
 les allarmes, que les Aymures souloient donner à ces bourgs, comme tenans le party des Portugais, que pour raison des grâds
 fleues, lacs, ou mariz, qu'il faut passer, tantost à gué, tantost à la nage, pour aller à ces bourgs. Mais outre ce, l'on encourt quel-
 quesfois aussi sur mer beaucoup de perils, tant des tourmentes, que des Corsaires, comm' il aduint l'an 1594. à deux Religieux de la Compagnie de Iesvs: lesquels faisans voile de la ville de la Baye à ceste-cy du Port-asseuré, & portans quant & eux vn coffre plein de reliques des Sainets, & beaucoup d'autres choses de deuotion, rencontrerent en chemin vn nauire de Corsaires
 François, lequel se ietta soudain sur le vaisseau ou ces deux de la-
 diète Compagnie estoient embarquez, qui fut bien tost pris & saccagé; car il n'y auoit que fort peu de gens de deffence; toutes-
 fois auant qu'il ne fut pris, l'vn desdits Religieux craignant que les reliques ne tombassent entre les mains de ces Pyrates (qu'il estimoit estre heretiques) ne fussent profanées ou exposées à la
 risée d'iceux, il prend le coffre, & passant à trauers la gresse des arquebuzades & canonades, le porte dans l'esquif, lequel il
 poussa comme il peut, iusqu'à terre: là ou estant abordé, il charge ledit coffre sur ses espanles, & l'emporte bien auant dans la
 terre ferme, de peur que les ennemis ne le trouuassent; jaçoit qu'il fut si pesant, que lors qu'on le remit dans le nauire, apres que les
 Pyrates s'en furent allez, il y fallut trois hommes bien puissants à le rapporter. D'ou il cogneut euidentement que Dieu luy auoit
 donné les forces & le courage pour l'emporter luy seul si loing.

*Dangers
& tra-
uaux de
ceux de
la Com-
pagnie
qui resi-
dēt icy.*

*Deux
d'iceux
rencon-
trent lex
Hugue-
nots qui
pillent
leur na-
uire, &
eux se
sauuent.
Sauuent
aussi les
reliques
des SS.
qu'ils
portoient
mira-
culeu-
sement.*

*Histoire
remar-
quable
de quel-
ques Hu-
guenots
de la Ro-
chelle.*

*Se gos-
sent a'u-
ne fma-
ge de S.
Antoine
de Pa-
doué.*

Or comme les Pyrates eurent pillé & buttiné tout ce, qu'ils trouuerent dans le nauire, ils le laisserent à l'abandon: & ceux qui s'en estoient fuyz à terre, y rentrerent, & arriuerent sains & sauues à la Capitainie du Port-asseuré, rendans graces à Dieu, & aux Sainets, dont ils portoient les reliques, par l'intercession & merite desquels ils croyoient auoir eschappé ce dâger. Mais puis que nous sommes sur ce propos de l'assistance & puissance des Sainets, i'adiousteray icy vne hilstoire bien remarquable, qui arriua vn peu auparauant au port de la Baye. L'an 1595. quelques nauires estans partis de la Rochelle pour aller au Brasil piller & saccager la Cité de la Baye, s'ils eussent peu, ils s'en vont deuant ietter sur vne forteresse, que les Portugais ont en la coste d'Afrique, nommée Arguin, tout aupres du cap blanc, qui est à 21. degrés de latitude Septentrionale. Et comme ils trouuerent les gardes ou endormies, ou qui ne faisoient guere bonne sentinelle, ils s'en emparēt aisément, & apres auoir tué le Capitaine, avec quelques soldats, ils ietterent par terre les bouleuars & deffences. Mais comme ils estoient Huguenots, non contens de cela, ils se met- tēt à ruiner l'Eglise, renuerser les Autels par terre, briser les Im- ges, brier à profaner tout ce qu'il y auoit de saint & de sacré. Ils garderent seulement pour se rire & gossier, vne Image en boisse faicte de bois, representant S. Antoine de Padoué, com- m' on le nomme communément, bien qu'il fust narif de Lis- bonne: laquelle ayant porté dans leur nauire, ils luy mettent l'espée au costé, & commencent à luy dire mille iniures, l'appel- lans Antoine le Portugais, & en se moquant l'inuitoient à com- battre avec eux, & le prioient par moquerie de mener leur na- uire au port de la Baye. Mais leur impieté & detestable gosserie ne demeura pas long temps, sans estre puie. Car bien tost apres leurs nauires furent escartez ça & là par la tourmente, les mala- dies se glisserent parmy eux, brier ils tomberent en tels desastres par vne iuste vengeance, & punition diuine, qu'il n'y eust que deux nauires de toute la flotte, qui arriuaissent à la coste de la Baye. Là ou deux matelots euydans aller puiser de l'eau douce (car ils en auoient grande disette) furent incontinent faits pri- sonniers, & menez à la ville. Les autres, qui estoient dans les nauires, estoient tous si accablez des maladies, qu'ils se rendirent à composition, la vie sauue, baillans sans contredict leurs nauires & tout ce qu'il y auoit dedans. Mais l'vn d'iceux auant qu'arriuer

au port s'enfonça dās la mer, parce qu'il faisoit beaucoup d'eau, & n'y auoit que fort peu de gens pour l'espuiser (tous les autres estans morts de maladie;) l'autre dans lequel estoit l'Image de S. Antoine, arriua au port de la Baye, comme les Huguenots l'auoient prié, bien que ce fut en se moquant. Or ceux, qui estoient dedans, afin que leur meschanceté ne fut descouuerte, ietterent dans la mer ladicte Image toute gastée, & tronçonnée. Les flots ores qu'insensibles, porterent (ce semble) plus de respect & d'honneur à l'effigie de ce Sainct personnage, que ces meschans & impies. Car peu de iours apres, ils la mirent à bord; & ce qui est plus admirable, ladicte Image se tenant en pied. De sorte que ceux, qui l'apperceurent de loing, pensoient au commencement veoir quelque homme au riuage de la mer: mais s'estans approchez de plus pres, ils cogneurent que c'estoit vn' Image en bosse. Vn honneste homme de la ville s'estant trouué là, va prendre ceste effigie, & la porte avec grande reuerence dans vne Chappelle proche de ce lieu. Mais le Gouverneur ayant sçeu, comme le tout s'estoit passé, voulut par apres qu'elle fut transportée dans la ville. Ce qui fut fait avec grande solemnité & deuotion de toute la ville, laquelle, avec le Gouverneur, & le Clergé, l'alla querir en procession. Finalement elle fut colloquée dans l'Eglise des Peres Cappucins, avec grande reuerence: Dieu voulant ainsi recompenser les Saincts, non seulement en Paradis, mais encores en ce monde, pour le deshonneur qu'ils y recoiuent quelquesfois des meschans.

Leur impiété chassie d'innocence.

L'honneur rendu aux Saincts, mesmes quelquefois en ce monde.

De ce qui est aduenu pour le fait de la Religion, tant en la ville du fleuue Ianuier, qu'en lieux cirouuoisins, & de la Capitainie de S. Vincent: ensemble des voyages, qu'on a fait aux Cariges, & de l'affection, qu'ils monstrent auoir, d'embrasser la foy Chrestienne.

CHAPITRE XXIX.



A ville que les Portugais appellent du fleuue Ianuier, est à 23. degres de hauteur Australe, esloignée de la cité de la Baye, quelques quatre vingts lieux vers le Sud. On l'a ainsi nommée, à cause d'une riuiera qui coule tout contre icelle, & s'embouche bien tost apres dans la mer, que les habitans appellent Ganabara, &

Fleuve Ianuier ou Ga-

*nabara
ou Ge-
neure.*

nos François Geneure, mais les Portugais la nomment *Ianeiro*, qui est aussi le nom, qu'ils donnent au premier mois de l'an, que nous appellons Januier, peut estre pour l'auoir descouuerte en ce mois là. Les François voulans aller aussi peupler le Brasil aborderent icy, conduicts par Villagagnon l'an 1555. & bastirēt vne fortteresse en vne petite Isle, demie lieuë loing de l'emboucheure de ce fleue. Mais ils furent contraincts de la quitter bien

*Ceux de
différente
Religion
à celle de
l'Eglise,
ne pros-
perēt pas
en la co-
queste
des nou-
ueaux
païs, &
pour-
quoy?*

toist apres, à cause des dissentions, qui se fourrerent parmy eux au faict de la Religion: car tous ceux là estoient Huguenots, ou faisoient semblât de l'estre. Aussi ne faut il point attēdre que Dieu face prosperer en la conqueste des nouueaux païs ceux, qui sont de différente croyance à celle de son Eglise. Car il est vray-semblable, comme nous auons remarqué au commencement de cest œuure, que Dieu a faict descouurir ces terres, qui nous estoient auparauant incogneuës, pour les esclairer de la lumiere de sa foy. Tellement qu'il ne veut point permettre, que la fausseté y soit installée, auant que la verité y ait pris pied & racine.

*College
de la Co-
pagnie
fondé à
la ville
du fleu-
ue Ian-
uier, &
ce qu'on
y fait.*

Or en ceste ville du fleue Januier, comme nous l'appellerons dores-en-auant, il y a vn College de la Compagnie, fondé par le Roy Sebastien, comme sont aussi les autres du Brasil. En cestuy-cy il y a d'ordinaire vne cinquanteine de Religieux, comprenant ceux, qui sont leur demeure aux Residences, qui en dependent. L'on y enseigne la Theologie Morale, la langue Latine: & l'on monstre aussi à lire & escrire aux petits enfans. Outre les occupations qu'ils ont à l'endroiēt des Portugais, ils s'employēt à l'instruction de deux gros bourgs de Brasiliens, qu'il y a tout aupres de ladiēte ville, qui seront en tout plus de deux mille ames, lesquelles ont estē cōuerties à la foy, & lauées des eaux du baptisme, par leur moyen. Lors aussi que quelques Brasiliens de la terre ferme se veulent rendre Chrestiens, ils s'en viennent en ces bourgs, pour estre instruits & baptizés. Deux de ladiēte Compagnie resident ordinairement en chascun d'iceux, comme es autres lieux que nous auons dit. Il en y a encore, qui vont aux engins de succe, pour cōuertir à la foy ces pauures esclauës,

*Esclauës
Ethio-
piens &
autres,
aydez &
consolés.*

qui ne sont pas encore Chrestiens, ou pour maintenir en icelle ceux, qui le sont desia: ausquels non seulement ils conferent les Sacremens de la Penitence & de l'Eucharistie, mais encor assistent à leurs mariages, au lieu des Curez, & les espousent selon la forme de l'Eglise Catholique, ayans pour ce faire licēce speciale

de nostre S. Pere en ce pais là. Mais l'un des plus grands biens qu'ils fassent enuers ces pauures gens, c'est de les cōsoler en leurs afflictions: car ils ont bien souuent des maistres, lesquels plus soigneux de leur profit temporel, qu'il ne faudroit, les font tra-uailer quasi nuict & iour, comme s'ils estoient des asnes, ou autres bestes. Et quelques yns encore non contents de cela, les affligent en beaucoup de sortes & manieres; tellement que le plus grand soulas & contentement que ces pauures gens ayent en ce monde, c'est de voir quelqu'un des Peres, pour se consoler avec luy, & le prier qu'il intercede pour eux enuers leurs maistres, afin qu'ils ne les tourmentent pas tant. Ce qu'ils leur obtiennent souuentefois: & pour ceste cause ces esclauues les aiment, & respectent comme leurs Peres. Voila ce que nous pouuons dire en general de ce College, reste que nous touchions quelques particularitez des choses les plus remarquables, qui y sont arri-uées.

L'an 1581. le Capitaine de ceste ville estant allé à la guerre avec tous les habitans presque d'icelle, contre certains barbares de la terre ferme, qui leur faisoient mille maux; il aduint qu'au mesme temps, la ville estant ainsi despourueüe, arriuerent trois nauires de François Huguenots bien armez & equipez, avec grand nombre de soldats. Or estans prez de l'emboucheure du fleuue Ianuier, ils tirerent quelques coups de canon, pour aduertir leurs anciens amis & confederes, qu'on nomme Zoëns. Je croy que ce sont ceux que nos François appellent Toupinambauts, ennemis iurez des Margageats & des Toupinaquins, qui sont confederes des Portugais. Les François voyans que leurs allies ne venoyent point, entrent neantmoins dans le fleuue, & nauigent contre-mont à voiles desployées droict à la ville. Cecy estonna fort tous ceux qui estoient dedans: car il n'y auoit presque aucun soldat pour la deffendre, & ce qui accreust dauantage la peur, fust un faux bruiet, qui courut ces iours-là par la ville, que le Capitaine & les autres, qui estoient allez avec luy à la guerre, auoyent esté deffaits, & massacrez par les ennemis. Ceux qui estoient restez dans la ville, se voyans sans forces suffisantes, pour aller au deuant de ceste flotte, voire qui pis est n'auoir de gens assez pour fournir aux corps de garde, s'aduisent de faire prendre les armes aux femmes, & les font monter sur la muraille pour estonner l'ennemy. La femme du Capitaine fust

Histoire notable.

*Zoëns,
Margageats,
Toupinambauts,
Toupinaquins,
peuples du Brasil*

Plaisant

quelques torts & iniures, données & receuës de part & d'autre; tellement qu'on pensoit qu'il en deuoit soudre quelque grosse guerre. Ce qui mettoit en grand soucy tous les habitans de la ville, qui prenoyent bien les dominages, que cela leur pourroit apporter. Afin donc d'appaiser les choses, les Magistrats prièrent le P. Recteur du College, de vouloir enuoyer aux Barbares vn des Peres, qui auoit grand crédit & auctorité euuers eux, pour moyenner quelque accord. Le Recteur enuoye soudain le Pere, qu'ils demandoient avec vn compagnon, vers les Brasiliens du contraire party, lesquels il mania si dextrement, & avec tant de prudence, qu'il les fist condescendre, moyennant l'ayde de Dieu, à tout ce qu'il voulut : & fit heureusement la paix : mais outre ce, il en amena six cens à vn village, duquel ceux de la Compagnie auoyent charge, pour estre instruits en la foy, & par apres baptisez : combien que ce ne fust pas sans beaucoup de peine & de danger : car il s'en fallut de bien peu, qu'il ne tombast entre les mains de quelques autres Sauuages, ennemis aussi des Portugais, qui l'eussent infalliblement tué & mangé, s'ils l'eussent peu attrapper. Mais les incommoditez qu'il endura en chemin furent incroyables, car au temps qu'il voyageoit, suruindrent des grosses & continuelles pluyes, de maniere que luy & ses compagnons viuoient à guise de poissons au milieu des eaux : ayans continuellement la pluye sur le dos, & nauigeans aussi sur l'eau ; tellement qu'ils nageoyent, comme l'on dict, entre deux eaux. Ils estoient contraincts bien souuent de passer les marais, quelques fois à gué, d'autres à nage, & ce qui fut le plus facheux, ayans perdu le chemin en s'en retournant, ils errerent l'espace de vingt iours çà & là, parmy les bois & forests, en grand danger de rencontrer des bestes ou hommes sauuages. Mais ce, qui les greuoit d'auantage estoit la faim & la soif ; toutesfois ils furent par le diuin vouloir & assistance, deliurez en fin de ces labyrinthes, & arriuerent au College, iàçoit qu'à demy morts, principalement le Pere, qui auoit jetté par la bouche grande abondance de sang, quarante iours durant. Mais ces fatigues ne sont pas facheuses à ceux qui ont le cœur enflammé du zele de la gloire de Dieu, & du salut des ames : ains leur sont si agreables, qu'ils les preferent à la douceur du repos, ne souhaitans rien tant qu'amplifier les bornes du Royaume de Dieu.

*Belle pes-
che de
six cens
ames.*

*Grands
dangers
& inco-
moditez
endurées*

Au demeurant les Brasiliens qu'on instruiet en ces bourgs proches de la ville, monstrent souuentefois leur grande foy & pieté, comme peuuent faire foy les exemples qui s'ensuiuent.

*Deuotio
& pieté
des Bra-
siliens
cōuertis.*

Il fallust vne fois faire changer de place à vne grande multitude d'iceux pour les loger en vn lieu plus propre : le Pere qui les gouuernoit leur dict qu'ils bastissent premierement leurs loges, & que par apres ils edificeroient vne Eglise, pour y faire leurs deuotions. Ia à Dieu ne plaise (respondirent-ils) que nous bastissions plustost des maisons pour nostre demeure, que le tēple ou Dieu doibt habiter ne soit edifié: nous faisons avec le congé du P. Recteur l'Eglise auant toute autre chose, & par apres nous bastirōs des loges pour nous. Le Pere voyant leur zele ne voulust pas y contredire, de façon qu'ils commencerent de mettre la main à la besongne, & bastirent l'Eglise avec vne telle promptitude, qu'on en fust grandement esmerueillé. Il y eust entr'autres vn bon vieillard des principaux d'entr'eux, qui menoit vn sien petit fils, aagé seulement de trois ans, auquel il faisoit porter dās sa petite main vne poignée de terre, pour ayder au bastiment de l'Eglise, selon ses petites forces, & s'adressant à luy; Apporte (luy disoit-il) mō fils ceste poignée de terre, & la mets en la paroy : car c'est pour toy que ceste Eglise se bastist, puis que Dieu t'a faict la grace de naistre en ce temps-cy, afin que tu ne veisses pas les mœurs sauuages & barbares de tes ancestres. Mais voicy vne chose du tout miraculeuse.

*Miracles
en-
fante-
ment par
l'ayde de
la Vier-
ge Ma-
rie.*

Il y auoit vne Esclaue des Portugais Chrestienne, laquelle ayant esté l'espace de trois iours aux douleurs de l'enfantement, abandonnée de tous, voire de son propre maistre, parce qu'il n'auoit point esperancé qu'elle suruesquist, comme elle estoit en ses plus grandes angoisses, voicy la Vierge Sacrée, mere de misericorde, qui s'apparust à elle, & avec vn maintien graue, & modeste, apres l'auoir humainement saluée, luy commande d'enfanter : ce qu'elle feit tout aussi tost, quasi sans aucune douleur, & soudain ladite Dame disparust. Le laisse à part plusieurs autres choses, lesquelles bien qu'autant merueilleuses, sont toutesfois fort ordinaires en ces lieux, & semblables à celles qui ont esté narrées cy denant, comme des guerisons obtenues par le moyen du Baptisme, de l'eau beniste, ou choses semblables : qui neantmoins sont grandement croistre la deuotion de ces nouueaux Chrestiens. Mais c'est assez arresté en ce College, & lieux proches

ches d'iceluy; venons maintenant aux Residences qui en dependent.

La premiere est celle de S. Vincent, qui est en vne ville ou Capitainie des Portugais, sise dans vn petit sein, qu'il y a en la coste de la mer, au 24. degré de latitude Australe. Ell' est esloignée quarante lieuës de la ville du fleuve Ianuier, tirant au Sud. Il y a six ou sept de la Compagnie de Iesus, qui sont icy leur demeure ordinaire, & s'employent au profit & aduancement spirituel, tant des Portugais, que des originaïres, qu'ils ont departis en plusieurs bourgades tout aupres de ceste ville, & tous les iours en y amènent d'auantage. Car ils sont souuent des cources au dedans du païs, & nommément vers certains peuples, qu'on appelle les Cariges: lesquels habitent sur la coste de la mer, quelques quatre vingts lieuës loing de la ville de S. Vincent vers le Sud: & occupent bien près de deux cens lieuës de ladicte coste; car ils vont aboutir iusques au fleuve de l'argent.

Or c'est vne nation la plus docile, & mieux policée, qu'on ait encore trouué au Brasil: de façon qu'ils vont tous honnestement vestus de peaux de bestes, contre la coustume des autres. Et quâd les Portugais vont là pour trafiquer, ils entrent librement dans leurs nauires, & les Portugais aussi se promènent par leurs bourgs ou villages, autant assurez, que s'ils estoient dans leurs propres maisons. Ils sont gens de belle stature, & en y a d'aussi blanches, que les Europeans. En quelques vns de leurs villages on trouue des Croix plantées, ausquelles ils portent grand honneur & respect. Ce qu'ils ont appris (comm' ils disent) d'vn certain Euesque, & de quelques Religieux, qui passerent par là, il y a quelque temps, & y baptiserent plusieurs des leurs, dôt il en y a encore quelques vns, qui s'en souuiennent. Ce sont (à mon aduis) les mesmes que ceux qui tuerent Pierre Correa & Iean Sofa, com' a esté dit. Or comme les Portugais eurent descouuert ce païs là, ils commencerent d'y aller negotier, mesmement de ceste Capitainie de S. Vincent, & auoient desia contracté alliance avec eux: nonobstant laquelle quelques vns des Portugais, apres auoir vëdu leurs denrées, en amenèrent par force, ou par finesse, quelques septante personnes. Et les ayans dans leur nauire, haussèrent les voyles, & s'ensuyrent. Entre ceux qu'ils enleuerët, il y auoit vn des principaux de ceste nation, nommé Cayobig, frere d'vn autre homme de marque & credit parmy eux, appellé Farancaha. Estans de

*Cariges
natio du
Brasil la
plus do-
cile &
mieux
policée
de tou-
tes.*

*Mescha-
ceté de
quelques
Portu-
gais, qui
rauis-
sirent
quelques
gens, con-
tre tout
droict.*

retour à la ville de S. Vincent, il y eut quelques vns des soldats plus consciencieux (bien que ce soit chose fort rare parmy telle sorte de gens) lesquels s'estans trouuez au faict , eurent scrupule d'auoir enleué contre tout droit & raison ces prisonniers ; veu qu'ils auoient faict paix & alliance avec ce peuple, & n'en auoient receu aucun tort ny dommage ; tellement qu'ils en aduertirent le Capitaine de la ville , lequel fit incontinent examiner la cause aux gens de Iustice, qui condempnerēt le Capitaine & le maistre du nauire, à remettre ces prisonniers au lieu , d'ou ils les auoient tirez ; & cependant de les nourrir à leurs propres despens. Ceux qui debuoient les ramener , craignans de n'estre pas les bien venus des autres, qu'ils auoient offensez, raiuisans ainsi leurs parēs ou amis, prièrent le Superieur de ceux de la Compagnie, qui habitent là, de leur bailler quelques vns des Peres, pour les accompagner : afin qu'ils accordassent ce different , & appaisassent les parens de ceux, qu'ils en auoient amenez. Le Superieur leur en donna deux, à sçauoir le P. Augustin de Matos, & le P. Custode Pirez : lesquels partirent de S. Vincent le 4. Decembre de l'an 1596. & arriuerent heureusement à vn port des Carijos, que les Portugais appellent Patos, c'est à dire Oysons, à cause qu'il y a là tout aupres vn Lac fort grand , qu'on appelle le Lac des Pates, parce qu'on y nourrist grande quantité d'oysons. Et d'autant que tout à l'entour de ce Lac les Cariges ont leurs villages, les Portugais les appellent aussi communément *Patos*, c'est à dire Oysons. Les Peres donc estans descendus à terre, planterent auant toute autre chose vne grande Croix , qu'ils auoient apportée tout exprès, puis enuoyerent deux Cariges de ceux, qu'ils ramenoient, avec vn autre Brasilien , habitant d'un bourg proche de la ville de S. Vincent , pour donner aduis de leur venue, & de celle encore des Portugais à Farancaha frere de Cayobig. En attendant la responce, ils dresserent près du bord de la mer vne petite Chapelle, faicte de branches d'arbres, & de fucillages, avec vn Autel, pour y dire la Messe. Les Portugais estoient cependant en grand soucy , ne sçachans comment les Cariges receuroient leur ambassade, ayans esté si griefuement offensez d'eux. Mais ils furent bien tost hors de crainte : car ceux qu'ils auoient destinez vers Farancaha, retournerent avec quelques autres Cariges, enuoyez de sa part pour bien-veigner les Peres , & les Portugais aussi , les aduisant, qu'il les viendroit veoir au plustost. Et de faict il vint de

*Sont cō-
damnez
à les re-
stituer.*

*Le port
de los
Patos.*

*Farancaha vn
des prin-
cipaux
des Ca-
riges.*

là à quelques iours, suyui d'une grande troupe de gens. Il estoit vestu d'une longue robe de couleur perse, ou bleuë, portant à l'endroict de l'estomach une Croix rouge, à la façon des Commandeurs de S. Jacques. Et auoit au costé son espée ceinte, assez gentiment. Les Peres l'allerent accueillir avec honneur, & le menerent dans leur Chapelle. Luy aussi les accola fort humainement, & courtoisement. S'estant assis au milieu d'eux, il commance à pleurer, les tenant tous deux embrassez : car en ce pais là, c'est vn signe de grande affection & bien-veillance. De façon que quand quelqu'un de leurs parens ou amis vient de loing, ils ont accoustumé de le recevoir en pleurant, soit qu'ils facent cela pour les incommoditez du chemin, qu'il a enduré, ou que ce soit parmy eux vn signe de contentement, & resiouissance : car on pleure aussi de ioye quelquefois. Apres donc qu'il eut assez pleuré, il leur fit vn recit des torts & iniures, que luy & ses subjects auoient reçu des Portugais, sans leur en auoir donné aucun subiect. Mais il leur dit, qu'il estoit content d'oublier tout cela, pour l'amour des Peres, & de faire de nouveau alliance avec les Portugais. Voire (dit-il) ie veux me rendre Chrestien avec ma famille, & tous mes parens & alliez. Les Portugais, qui auoient esté iusques à lors en crainte dans leur nauire, voyans que tout estoit appaisé, descendent à terre, amenans quant & eux Cayobig, frere de Farancaha, & les autres, qu'ils auoient enleuez. Les articles de la paix furent conclus & arrestez, au gré & contentement tant de l'un que de l'autre party. Et pour plus d'assurance Farancaha bailla vn sien nepueu, qu'il aymoit vniquement, aux Peres, afin qu'ils l'amenassent à la ville de S. Vincent, pour l'instruire en la foy & bonnes meurs. Or d'autant qu'ils ne pouuoient séjourner là plus long temps, il les pria instamment de vouloir retourner au plustost, pour luy enseigner la loy diuine, & le baptiser, avec tous ceux de sa famille & parenté. Car ils se vouloient tous rendre Chrestiens, comme il disoit, adioustant qu'ils auroiēt basti des Eglises à leur retour. Avec ce il print congé d'eux, & s'en retourna à son logis. Farancaha estant party, les Peres furent aduertis, que quatre ou cinq autres des principaux Seigneurs de la mesme nation, les venoient trouuer, suyuis de beaucoup de gens. Ceste nouuelle les fit arrester encore quelques iours, pour attēdre leur arriuée. Or ces Seigneurs vindrēt de bien loing tout exprés, pour veoir les Peres, & les prier de leur vouloir enseigner

*Reçoit
fort hu-
maine-
ment les
Peres de
la Com-
pagnie.*

*Pleurs
signes de
resiouys-
sance.*

*Paix ac-
cordée
entre les
Portu-
gais &
Farancaha.*

*Autres
4. ou
5. Sei-
gneurs
de la
mesme
nation*

*viennent
prouuer
les Pe-
res.*

*Le prin-
cipal de
tous leur
baille sō
fils ais-
né pour
l'instrui-
re.*

*L'affec-
tiō grā-
de qu'ot
eux de
ceste na-
tiō d'am-
brasser
la foy.*

*La bōne
volonté
de rece-
voir le
baptes-
me sert
à salut.*

le chemin de salut. Les Peres n'ayans moyen de s'arrester là d'a-
uantage, & ne voulans les esconduire du tout de leur requeste,
leur firent deux ou trois sermons, esquels ils leur donnerēt quel-
que cognoissance de leur Createur & Sauueur, selō que la brief-
ueté du temps le permettoit. Ce que les autres escoutoient avec
vne singuliere consolation & contentement d'esprit, comme l'on
pouuoit cognoistre par leurs gestes, & contenance, qui esmou-
uoit à deuotion tous ceux, qui les contemployent. L'vn d'iceux,
qui estoit le principal de tous, ayant sceu que Farancaha leur
auoit baillé vn sien petit fils, pour gages de l'affection qu'il leur
portoit, & de l'assurance qu'il auoit que bien tost ils reuien-
droient, leur laissa pareillement son fils aîné, les suppliant de le
vouloir instruire en la foy Chrestienne, & de s'en retourner avec
luy le pluſtost qu'ils pourroient, afin de les venir tous baptiser.
En prenant congé les vns des autres, ces bonnes gens monſtroiēt
estre si marris de leur depart, comme s'ils eussent esté toute leur
vie ensemble. Quelque temps apres il y eust trois Portugais, qui
s'en allerent au mesme païs pour y traffiquer: les Cariges pensans
que ce fussent des Peres, monſtrerēt de grands signes de resiouis-
sance à leur venue; mais ayans sceu, qu'ils n'en estoient pas, ils en
furent fort marris, nommément vn des principaux du lieu, qui
estoit lors griefuement malade: lequel se plaignoit des Peres, di-
sant qu'ils n'accomplissoient pas leur promesse, & qu'ils seroient
cause, qu'il mourroit sans baptesme. Partant il pria fort ces Por-
tugais, de le vouloir baptiser: mais eux ne le voulurent pas faire.
Neantmoins ils le guerirent de ceste maladie, combien que peu
de temps apres estant recheu, il mourut en tel estat. Il est croya-
ble que nostre Seigneur accepta sa bonne volonté, & qu'au lieu
du baptesme d'eau, il luy donna celuy du feu, qui est de son S. Es-
prit, veu qu'il estoit si desireux, de recevoir le Sacrement mesme.
Ce qui s'ensuit, monſtre encores combien ces gens sont desireux
de leur salut. Vn des leurs estant allé vne fois à la ville de S. Vin-
cent, entra dans l'Eglise de la Compagnie, qui est dediée à Saint
Paul, ou il veid comme l'on baptisoit quelques vns, & entendit
en gros que c'estoit le baptesme qu'on conferoit, de façon qu'e-
stant de retour en son païs, il dit à ceux de son village, ce qu'il
auoit veu. Et plusieurs s'en venoient à luy pour estre baptizez:
mais comme il ne faisoit autre que leur espancher de l'eau sur la
reste, sās proferer les parolles formelles & essentielles du baptes-

me (car il ne les sçauoit pas) cela ne leur proffitoit de rien. Les Peres voyans le grand desir, que ceste nation auoit d'embrasser la foy de IESVS-CHRIST, enuoyerent vn des leurs nommé *Vn de la Comp. baptise plusieurs des Cariges.* Sebastien Gomez à vn village d'icelle. Les habitans estans aduertis de la venuë, s'en vont au deuant de luy, vne demie lieuë loing: & le receurent avec grande ioye & allegresse. Il conuertit à la foy & baptisa plusieurs d'iceux: entr' autres fust baptisée vne petite fille de trois ans, laquelle soudain apres le Baptesme se mist à chanter avec vne ioye incroyable, disant qu'elle estoit fort aisee & contente, parce qu'elle estoit fille de Dieu. Brieuf ces gens-là souhaitent si tres-fort d'embrasser la foy Chrestienne, qu'ils ne peuuent attendre, qu'on les aille trouuer en leur pays: ains ils s'en viennent souuent à la ville de S. Vincent pour estre baptisez. Vne famille entiere de ces Gêtils, y vint tout exprès pour receuoir le baptesme, & avec eux venoyent aussi deux ou trois des principaux de leur bourg, qui s'en deuoyent retourner par apres. Il y eust encor vn homme de marque de ces Cariges, lequel vint là mesme pour s'en retourner aussi, apres qu'il seroit baptisé. Or il disoit qu'il auoit vn frere, lequel estoit vn des principaux de ceste nation, qui l'auoit enuoyé là pour prier les Peres de l'aller trouuer: parce que luy & tous ses subiects desiroient se rendre Chrestiens, & s'aller tenir auprès d'eux. Mais qu'auant de ce faire, il vouloit enuoyer là quelques vns de ses seruiteurs, pour cultiuer & ensemençer la terre: afin qu'ils eussent dequoy se nourrir, quand ils y seroyent.

Quelques vns aussi des principaux entre les Cariges, vindrent à la ville de S. Vincent enuoyez de là part de plusieurs autres, *Pour- quoy les Cariges se craignent ces Portugais.* pour prier les Peres de les aller querir: car ils n'osoyent pas venir sans eux, de crainte qu'ils ont que les Portugais ne les prennent en chemin, & les rendent esclaves, ainsi qu'ils ont accoustumé de faire: & à ceste occasion les villages des Brasiliens, qui estoyent tout auprès de Piratininga ont esté desertez. Que si les Portugais font cela (disent les Cariges) à leurs amis & comperes, c'est à dire à ceux qui s'estoyent habituez auprès d'eux, que feront-ils à nous, qui ne faisons qu'entrer en leur amitié & alliance. Et de fait ils ont dequoy craindre: car les habitans de ceste ville-là, sont si auides d'assequir ces pauvres gens pour s'en ayder en leurs engins & metairies, qu'ils ne se soucient ny des deffences que le Roy a fait là dessus, ny de la crainte de Dieu, ny de son hōneur.

L'avarice empesche de grâces biens.

& gloire: laquelle est grandement empeschée par ce moyen; d'autant qu'ils destourment beaucoup de gens, qui se viendroyent loger auprès de ladire ville, & se rendroyent Chrestiens: mais comm'ils voyent ce qu'on a fait à ceux qui s'y sont retirez, ils craignent, que le mesme ne leur aduienne. Voyla comment l'avarice de quelques vns empesche le salut de beaucoup d'ames. Mais l'on void par vn iuste iugement de Dieu, qu'il arriue tout le contraire de ce qu'ils pretendent: car ceste Capitainie de S. Vincent & toutes les autres, ou l'on traicte mal les naturels, vont de mal en pis: là où celles qui les fauorisent, & leur donnēt beaucoup de priuileges, croissent de iour en iour en toute prosperité: & sont les plus fleurissantes. Mais c'est assez de la ville de S. Vincent: venons aux autres.

Du fruit qui s'est fait és Capitainies de Piratininga, des Saints, & du S. Esprit, & és bourgs des Brasiliens, qui en dependent.

CHAPITRE XXX.



LA Capitainie ou ville de Piratininga est esloignée de celle de S. Vincēt quelque dix ou douze lieuës: non pas sur la coste de la mer, mais au dedans du país. Il y a en icelle vne maison de Residence pour ceux de la Compagnie: en laquelle demeurent coustumierement six ou sept Religieux d'icelle: lesquels s'occupent principalement au salut des Brasiliens, qui habitent là tout auprès en deux bourgs: ou il y aura en tout plus de huit mil ames. Nous pourrions en dire beaucoup de choses d'edification: mais pour faire court nous nous contenterons d'une tant seulement. C'est qu'il y auoit en l'un de ces bourgs vn Brasilien, qui viuoit fort exemplairement, & en tres-bon Chrestien. Or estant arriué l'heure de sa mort, deux femmes Brasiliennes, qui estoient ses voisines & Chrestiennes aussi, luy assistoyent: lesquelles tesmoignerent auoir veu entrer dans le logis, ou elles estoient avec le malade, plusieurs qui ressembloyent à des ieunes enfans, tous vestus de blanc, qui emporterent l'ame de ce bon Chrestien, avec grande resiouissance. Elles voyant cela, les prierent de vouloir aussi les emmener quant & eux: ils respondent à l'une qui estoit

Heureuse fin d'un Brasilien qui auoit bien vecu

fort deuote & vertueuse, que dans peu de iours ils retourneroyent la querir : mais quant à l'autre qui n'estoit pas de si bonne vie, ils l'aduiferent que si elle ne s'amendoit de ses pechez, il ne falloit pas qu'elle pensast de venir avec eux. Ainsi recompense nostre Seigneur ceux qui ont bien vescu, leur donnant vne si heureuse mort, & aduise cependant les autres, afin qu'ils se corrigent.

L'an 1590. mourut à Piratininga le P. Emmanuel de Chaves *Tres-pau*
de la Compagnie de Iesvs, accablé de vieillesse & de trauaux. *du P.*
Il estoit aagé de quatre vints ans : mais sa charité estoit indefati- *Emma-*
gable : car il ne restoit point pour son aage, ny pour sa debilité, *nuel de*
d'employer tout le soing & diligence, qu'il luy estoit possible, *Chaves.*
pour gagner les ames à nostre Seigneur, de façon qu'il alloit
ordinairement visiter à pied, & quelques fois tout deschaux
l'un & l'autre bourg des Brasiliens. Il semble aussi que nostre
Seigneur l'enleua de ce monde en ce temps-là tout exprés, afin
qu'il ne vid de ses yeux la desolation de ce païs, qui arriua bien
tost apres. Car les barbares, qui habitent plus au dedans de la ter- *Parati-*
re ferme, vindrent soudainement se ruer avec grosse puissance *ninga*
sur la ville : & commencent à piller & rauager tout le plat pays *assiégée*
d'alentour, emmenans le bestail, bruslans les metairies, & fai- *des bar-*
sans tout le pis qu'ils pouuoient contre les habitans : lesquels *bares.*
n'auoyent guere d'esperance de se pouuoir sauuer, parce que les
eunemis estoient en grand nombre, & les assailloyent viuement
avec beaucoup d'engins ou machines de guerre, dont ils n'es-
toient pas despourueus : tellement que les Portugais auoyent
quasi perdu l'esperoir de leur pouuoir resister. Cependant les
Peres de la Compagnie, qui estoient dedans la ville, vacquoient à
prieres & oraisons, ne laissant pas d'encourager les habitans à te-
nir bon iusqu'à ce, qu'ils eussent quelque secours : lequel en ces
entre-faites Dieu leur enuoya contre l'opinion de plusieurs.
Car le Capitaine de la ville des Saints, qui n'est pas guere loing
de Piratininga, estant aduertie par lettres du peril desdits habi-
tans, assemble promptement tous les Portugais qu'il peut, &
s'en va secourir les assiegez, menant quant & soy vn des Peres
de la Compagnie, qui demeueroit avec quelques autres à la vil-
le des Saints : mais ces barbares s'estoyent desia saisis des
faux-bourgs, ou ils trouuerent vne Eglise de N. D. & en icelle

*Sacrile-
ge & pu-
nitiō d'i
celuy.*

vn' Image de la mesme Vierge faicte d'argille : laquelle ayant tirée dehors ils rompirent avec leurs mains sacrileges. Mais si tost que le secours des Portugais fust arriué, & que les nouueaux Chrestiens se furent r'alliez, & ioincts à iceux, ils donnerent plusieurs attaques à l'ennemy : lequel fust à la parfin mis en fuitte avec perte de beaucoup de gens. Or tandis qu'on estoit en ces escarmouches, ceux de la Compagnie occupez partie à ouyr les confessions, partie à encourager les soldats, se trouuans bien souuent à ceste occasion és premiers rangs, exposez aux coups de fleches, que les barbares tiroient, & voyans à leurs costez plusieurs tomber à terre ; ne receurent toutesfois aucune blessure. Ce qui n'aduint pas sans vne grace de Dieu speciale, veu le danger ou ils estoient. La guerre estant finie par la fuitte des ennemis, on attrappa cest impie, qui auoit profané l'Image de nostre Dame : lequel fust attaché à la queue d'un cheual, & trainé par les ruës, où il finit miserablement sa vie.

*Mira-
momins
quelle
sorte de
gēs sont?*

Tout auprès de Piratininga il y a vne sorte de gens, qui habitent en la region mediterrannée, nommez Miramonins, fort barbares & differents en langue & en mœurs de tous les Brasiliens. Car ils vont en troupe d'un costé & d'autre, courans le pays à la façon de ceux que nous appellons en Europe Bohemiens, ou Egyptiens, se meslans de dire la bonne aduenture comme eux. Ceux-cy auoyent accoustumé de faire beaucoup de maux aux Portugais de Piratininga, se iettans à l'impourueu sur leurs metairies, ou engins à sucre, & leur emportoient tout ce qu'ils y trouuoient de viures. Or comme l'on n'entendoit point leur langage, il n'y auoit personne qui leur allast enseigner les choses de leur salut, iusqu'à ce que l'an 1587. vn des Peres de la Compagnie commença de les hanter, & se meslant parmy eux tascha de les instruire & endoctriner plustost par signes, que par parolles : car ils ne l'entendoyent pas lors qu'il leur parloit, mesmes au commencement. Toutesfois ayant en peu de temps apprins leur langue, il les endoctrina si bien, que plusieurs d'iceux laissant ceste maniere de viure sauuage & barbare, se sont appriuoisez peu à peu, & en y a desia vn bon nombre qui sont Chrestiens : lesquels apres auoir basti vne Eglise en vn certain endroit, ont faict auprès d'icelle quelques loges, pour demeurer ensemble : & au lieu qu'ils faisoient tous les maux qu'ils pouuoient aux Portugais, maintenant ils les aydent en leurs affaires, trouuillans és metairies & engins

*Plusieurs d'i-
ceux sōt
cōuertis
à la foy.*

& engins de succre, qu'ils ont là, & se vont tous les iours approuoisans & ciuilizans d'auantage.

La troisieme maison de la Compagnie, qui depend du College du fleuve Ianuier, est en la ville ou Capitainie qu'on appelle des Saints, qui n'est pas guere loing des deux precedentes : de maniere que les Peres qui resident icy, vont ayder ceux, qui se tiennent à S. Vincent, ou à Piratininga, lors qu'ils en ont besoing : & au contraire. Il y en demeure d'ordinaire cinq ou six, qui s'employent ez mesmes choses, que ceux des autres Residences. Et parce que ie n'ay trouué icy chose aucune, qui soit differente des autres, ie ne m'y arresteray pas d'auantage.

La quatrieme donc est en la ville du S. Esprit, sise au 20. degré de latitude Australe, sur la coste de la mer : tellement qu'elle est plus proche de la ligne Equinoctiale, que n'est la ville du fleuve Ianuier, d'ou elle est esloignée quelques septante lieues. Il y a le plus souuent sept ou huit de la Compagnie, qui y demeurent, & quelquesfois plus. Ils ont soing de six gros bourgs de Brasiliens, qui sont à l'entour de la ville, où l'on compte plus de dix mille Chrestiens : lesquels sont bien paroistre leur foy & deuotion, & en recoiuent aussi la recompense par beaucoup de merueilles, qu'il plaist à Dieu faire en leur faueur. L'en raconteray icy quelques vns sommairement. Certaine femme Brasilienne auoit vn petit enfant paralitique, lequel ne pouuoit aucunement marcher : sa mere le porte à l'Eglise, & le laue avec de l'eau beniste ; soudain qu'il eust esté laué, il se trouua si bien, qu'il s'en retourne à la maison, marchant sans l'ayde de personne. Deux autres, qui estoient à l'article de la mort, furent remis en santé, ayant vsé de mesme remede. Il y eut aussi vne ieune fille de cinq ans nommée Marie, laquelle estant malade s'en va à l'Eglise, & se mettant à genoux deuant vn' Image de nostre Dame, luy dit ces parolles : Dame de qui ie porte le nom, faisces moy la grace, ie vous prie, d'obtenir guerison, & santé. L'effect monstra que la priere de ceste simple fillette auoit esté agreable à Dieu & à la Vierge : car tout aussi tost elle obtint la santé qu'elle desiroit. Or d'autant qu'en l'Eglise de la Compagnie il y a vne relique de S. Maurice, Capitaine de la legion des Thebeans, les Brasiliens de ces lieux luy portent vne particuliere deuotion. Aussi experimentent-ils en leurs necessitez son ayde & secours. Car iamais ils ne portent en procession ses reliques pour auoir de la pluye,

La Residence des Saints.

La Residence du Saint Esprit.

Miracles aduenus prez la ville du Saint Esprit.

Relique de saint Maurice qui est en l'Eglise de la Compagnie.

(ce qu'ils font bien souuent) qu'ils n'obtiennent grande abondance d'eau. Mais il ne se monstre pas seulement fauorable pour les necessitez communes, ains aussi pour les particulieres, comme l'on verra en ce qui s'ensuit. Il y auoit en vn de ces bourgs certain Brasilien des principaux d'iceluy, lequel estant fort malade, se feit porter à l'Eglise dediée à l'honneur de ce Sainct. Là ou apres auoir baissé deuotement ses reliques, il s'en retourna sain & gaillard à sa maison. Voicy vn autre faict, qui est bien plus merueilleux.

*Faict
merueilleux.*

L'an 1589. le mesme iour, qu'on celebroit la feste du mesme Sainct avec grande solemnité, & assemblée de peuple, vn petit enfant, qui estoit monté sur vn lieu haut esleué, d'ou il regardoit la feste, tomba par mesgarde du haut en bas sur vn gros mōceau de pierres. Plusieurs qui veirent sa cheute y accoururent soudain, pensans qu'il deust estre tout froissé : mais il fut trouué aussi sain & entier, que deuant la cheutte. Ce fut sans doubte vne speciale grace & faueur dudit Sainct : car tandis quel'enfant rouloit du haut en bas, il imploroit son ayde, & inuquoit son nom. Mais pour marque & signe d'vn tel benefice, Dieu voulut qu'il luy restast tout à l'entour du corps, vne petite ligne rouge, à guyse de ceinture, qui l'environnoit de tous costez

*Tujupaluco
Seigneur de
plusieurs
vassaux.*

La mesme année le P. Prouincial estant allé visiter ce lieu, vne grande multitude de peuple luy vint au deuant : & le conduisist iusques à la maison de la Compagnie, avec grande feste & reioissance : & mesmes quelques vns, qui n'estoient pas encore Chrestiens, ayans ouy la nouuelle de sa venue, luy allerent au deuant bien loing de la ville, pour le prier de leur enuoyer quelques vns des Peres, afin de leur enseigner le chemin de salut, & à leurs vassaux encore. Car ils estoient des principaux Seigneurs de ceste nation, & desiroient tous se rendre Chrestiens. Entre ceux-là il y en auoit vn nommé Tujupaluco, lequel ne cedit en rien aux Portugais, quant à la subtilité d'esprit, ou à la solidité de iugement. Cestuy-cy ayant esté persuadé par les propos, que le P. Prouincial luy tint, s'en va trouuer ses gens, & en amene avec soy vne grande multitude, afin qu'ils fussent instruits par les Peres : tellement que ceste année là, il en y eut trois cens de baptisés.

*Est con-
uertie a-
uec 300.
des siés.*

Mais à celle fin qu'on entende mieux combien ceux, qui sont Chrestiens, estiment la grace que Dieu leur faict, les attirant à sa

cognoissance, & le desir qu'ils ont que leurs parens & alliez, errans encores parmy les deserts de l'infidelité, iouissent du mesme heur & felicité qu'eux; ie mettray icy quelques voyages, qu'ils ont entrepris avec de grands hazards & difficultez, pour les aller querir dans la terre ferme, afin de les faire venir en quelqu'un de ces bourgs, ou les Chrestiens habitent.

Donques au mesme temps, que le P. Prouincial vint visiter ceste maison du S. Esprit, quelques uns des principaux du bourg des trois Roys, qui est aupres de ceste ville du S. Esprit, supplierent ledit Pere de leur vouloir permettre de faire un voyage au dedans du pais, pour aller querir leurs parens & amis, afin de les amener à la bergerie de nostre Seigneur. Le P. Prouincial le leur permit, & donna charge à un des Peres nommé Dominique Gracia, qui estoit lors Superieur de ceste maison, de les aduiser de ce, qu'ils deuoient faire. Ayans donc préparé ce qu'il falloit pour leur voyage, le Pere les alla conduire une partie du chemin, s'embarquant avec eux (car ils alloient par eau contre-mont d'une riuie-re.) Or quand il fut question, que le Pere s'en retournât, ils voulurent tous faire leur confession, & recevoir la sainte Communion, avant son depart. Ce qu'il leur octroya volontiers; & encore leur fit une briefue exhortation, les encourageant à une si sainte entreprise. De là ils poursuyuent leur voyage dans sept canoas, ou petits batteaux, & ayant fait deux iournées de chemin, ils vont rencontrer les Tapuyas, qui sont certains peuples du Brasil fort cruels, & farouches, avec lesquels il fallut combattre. Un des Chrestiens ayant esté blessé à mort en ce rencontre, rendit l'ame en disant: *Iesus ayez pitié de moy.* Les autres passerent outre en despit des Tapuyas, & employèrent un mois à faire ce voyage. Arrivez qu'ils furent au premier village du pais, ou ils alloient, ils furent accueillis & reçus de leurs parens, & de tous les autres, mesmes des principaux de ce lieu, avec grandes caresses, & signes de resiouissance.

Estans là, on leur fait le recit comme six des leurs estans allés quelque temps auparavant au village des trois Roys, pour estre catechisez, apres qu'ils furent de retour, l'un d'iceux appelé Jaguabara, homme de marque, & fort renommé parmy eux, auroit si bien presché les autres, qu'il auoit desia persuadé à beaucoup de gens de s'en aller quant & luy loger aupres des Peres, pour se rendre Chrestiens. Tellement qu'il en amenoit tous ceux de son

*Tapuyas
peuples
barba-
res.*

*Jaguabara
homme de
marque
entre les
Brasiliens.*

village. Mais ayans rencontré en chemin les Apiapetangas, leurs anciens ennemis, qui voulurent les empêcher de passer outre, il fallut venir aux mains. En ce combat les Apiapetangas, ayant eu le dessus, tuerent & prindrent prisonniers beaucoup de ceux, qui estoient à la suite de Iaguabara, & luy mesme y fut fort blessé.

*Amé-
nât tous
ceux de
son vil-
lage à
l'église,
est em-
pêché &
blessé.*

Quoy voyant il s'en retourne à son village avec quelques vns, qui luy estoient restez, attendant quelque meilleure commodité, pour faire leur voyage. Voyla ce qu'on racontoit à ceux qui estoient freschement venus du village des trois Roys : l'un desquels nommé Emmanuel Mascaregnas, entendant cecy, se delibera d'aller parler aux Apiapetangas, pour faire paix avec eux, afin qu'ils n'empêchassent pas ceux, qui voudroient venir avec luy, de passer par leurs terres. Il fut suyui de plusieurs autres, qui le voulurent accompagner, & nommément de ceux, qui estoient venus du village des trois Roys avec luy. S'estans donc mis en chemin, ils rencontrent les Apiapetangas à vne lieuë de là, & mettent peine à leur persuader de vouloir venir à quelque accord. Mais cōme d'un costé la victoire passée auoit enflé le courage à ces barbares, & de l'autre qu'ils se sentoient renforcez, à cause de plusieurs esclaves de ceux qu'ils auoient deffaits, lesquels estoient deuers eux; ils aymerent mieux la guerre, que la paix: & comincerent à charger Mascaregnas, & ceux qui l'accompagnoient. Ceux-cy appuyez sur le diuin secours, plus que sur leurs forces (car ils estoient sans cōparaïson beaucoup moins & en nombre & en puissance que les ennemis) se mirent toutes-foïes en deffence: tellement qu'il y eut vn grand conflict, duquel Mascaregnas sortit blessé d'un coup de fiesche, qu'il reçeut auprès du cœur, & en mourut bien tost apres, exhortant ses compagnons d'estre tousiours bons Chrestiens, & de poursuyure ceste saincte entreprise, d'amener auprès des Peres leurs parens & amis, & tous ceux qui se voudroient rendre Chrestiens. Quant à

*Emma-
nuel
Mascare-
gnas
brasilé
mourut en
bō Chre-
stien..*

» moy (disoit-il) ie suis bien aise de mourir pour ceste cause: & par-
» tant ie ne veux point, que personne se contriste à cause de ma
» mort, ny mes enfans mesmes, lesquels i'ay laissé auprès des Peres:
» & suffit qu'ils soient là, car ie sçay qu'ils ne seront pas delaissez
» & abandonnez d'iceux. Or apres qu'il eust demandé pardon à
Dieu de ses pechez, il rendit l'ame, inuocant le nom de Iesus,
& ses compagnons enterrerēt le corps en vn lieu secret & caché,
de peur que les ennemis ne le trouuassent, & le mangeassent,

selon leur coustume. Apres la mort de Mascaregnas, les autres s'en retournent au village de Iaguabara, lequel peu de temps apres estant tombé malade, passa de ceste vie à l'autre. Mais l'un de ceux qui estoient venus du village des trois Rois, nommé Antoine Diaz le baptisa avant sa mort; car il auoit esté instruit par les Peres, comment il se deuoit comporter en ce faict: de sorte que Iaguabara mourut Chrestien, comm'il auoit tant désiré & pourchassé durant sa vie. Antoine Diaz avec le reste de ses compagnons part d'icy, pour s'acheminer vers les habitans de quelques autres villages, qu'ils desiroient faire venir aupres du bourg des trois Rois, ou ils trouuerent beaucoup de gens, qui furent bien aysez d'entendre ceste bonne nouuelle. Entr' autres vn des principaux nommé Piraguasu, lequel aussi tost resolut de suiure ceux qui le venoyent semondre avec toute sa famille, laissant en arriere les autres, qui s'apprestoyent pour s'en venir apres luy. S'estant donc mis en chemin avec eux, ils arriuent tous au village de Iaguabara, en nombre de deux cens personnes: mais ce ne fust pas sans beaucoup de peine, & de trauail: parce qu'ils menoyent quant & eux les petits enfans, les vieillards, & malades: toutesfois aucun n'en mourut par le chemin.

Partis qu'ils seurent de ce lieu pour s'en aller au bourg des trois Rois, ils rencontrent derechef les Apiapetangas, qui leur vouloyent empescher le passage. Mais les Chrestiens & ceux qu'ils conduisoient, les chargerent si viuement, qu'ils les mirent à vaude-route, & en tuerent beaucoup. Ils prindrent aussi vn bon nombre d'esclaues, & mirent en liberté ceux que les Apiapetangas auoyent de la suite de Iaguabara. Il n'y eust que cinq Chrestiens de tuez en ce rencontre, & des autres quatre. Mais le principal bien, qui s'en suiuiſt de ceste victoire, fust que le passage demeura libre, tant pour eux que pour les autres, qui les suiui-
rent apres. Ils employèrent deux mois à faire ce voyage: au bout desquels ils arriuerent au bourg des trois Rois. Piraguasu, duquel nous auons parlé cy deuant, accompagné de quatre enfans qu'il auoit, desia hommes faicts, entre dans le bourg, en preschant, selon leur coustume, c'est à dire faisant vn harangue, en laquelle il monstroït l'ayse & le contentement qu'il receuoit d'estre arriué là. Apres qu'il eust assez harangué, il s'en va avec ses quatre enfans à l'Eglise, & de là visiter les Peres, lesquels il accola avec vne ioye incroyable, & leur dict ces parolles: Je suis maintenant par-

*Iagua-
bara
trespasse
apres a-
uoir esté
baptisé.*

*Pira-
guasú
Brasil.*

*Desait
les Api-
petangas
& laisse
le passa-
ge libre.*

*Arriue
au villa-
ge des 3.
Rois & y
entre en
preschant.*

„ uenu au bout de mes desseins, qui n'estoyent autres, que de venir
 „ loger auprès de vous, mes Peres, & près de l'Eglise. Je n'ay pas
 „ voulu attendre d'auantage, ains ay voulu estre le premier. Mon
 „ frere Inabaquasû est encore demeuré avec ses gens: mais il vien-
 „ dra dans peu de iours, & cependant ie cultiueray, & ensemen-
 „ çeray la terre, afin qu'il aye dequoy pour s'entretenir luy & les
 „ siens.

*La vesue
de Iagua
baray
viët aussi
avec sa
famille.*

*La ha-
rangue
d'icelle.*

Après Piraguasû arriua la vesue de Iaguabara, qui mourut au premier rencontre. C'estoit vne fort honneste Dame ja suraagée, & menoit quant & elle, tous ses enfans & filles, avec ses gèdres, & toute sa famille. Elle entra dans le bourg des trois Rois, accompagnée d'une grande suite de gens, portant un chappellet pendu au col, & en preschant de la façon qu'a esté dict, & commença de ceste sorte: Personne ne s'estonne, si ie presche estant femme: car puis que mon mary est mort, il faut que ie tiennne sa place, & mesmes à present, que ie m'en vay à l'Eglise, comme
 „ i'auois si long temps souhaitté avec mes enfans, & ma famille,
 „ en laquelle aussi mon mary auoit tant désiré de viure & de mourir: mais nous fusmes detrossés par les chemins. Maintenant ie
 „ suis icy venue sans luy, pour auoir soing de l'Eglise, & des Peres,
 „ ausquels rien ne manquera, là où ie seray. Or après qu'elle eust faict sa harangue, & se fust retirée en son logis, tous ceux du bourg, s'en vont plorer deuant elle: car c'est leur coustume qu'ad ils accueillent quelqu'un qui vient de loing, comme nous auons dict: les pleurs estans finis, les femmes Brasiliennes de ce bourg, luy vont porter force presents. Les Peres aussi luy enuoyerent le leur, & le lendemain elle vint les visiter, menant toute sa famille deuant la porte de la maison. Ce qui causa vne tres-grande consolation aux Peres, voyans que la bergerie de nostre Seigneur s'amplifioit de telle sorte. Quatre iours après son arriuee elle tomba malade, & parce qu'on ne l'auoit pas encore baptisée, attendant qu'elle fust mieus instruite en la foy, elle se voyant proche de sa fin demanda instamment le Baptisme. Les Peres l'interrogerent si elle vouloit estre baptisée dans la maison, puis que son infirmité ne luy permettoit pas d'aller à l'Eglise.
 „ Nenny, respond elle: car ie suis venuë de si loing pour estre baptisée en l'Eglise, & en la presence de Dieu. Je ne veux point, que cela se face ailleurs. Le Pere luy repart, que Dieu estoit en

*Tombe
malade.*

tous lieux; Il est vray (dict-elle) mais ie veux estre baptisée en sa maison, & non en celle des hommes. Brief pour luy donner ce contentement on la porta à l'Eglise, ou elle receut le Baptême, avec grande deuotion & allegresse, tant de son costé, que du costé des Peres, & des autres Chrestiens, mesmes de ceux qui l'auoyent accompagnée. Apres auoir esté baptisée, elle ietta vn grand souspir disant; Maintenant mon ame est contente, & ie ne crains point de mourir: car i'ay obtenu ce que ie desiroy tant, à sçauoir d'estre fille de Dieu. Elle suruesquist encore deux mois, & se sentant fort accablée de la maladie, elle demanda le saint huille. Le Pere pour l'esprouuer luy dict n'estre pas necessaire, puis qu'elle auoit receu le Baptême, peu de temps au parauant: mais elle ne fust pas contente iusques à ce qu'elle eust l'extreme Onction: ayant au préalable fait sa confession, & receu le saint Sacrement de l'Autel pour viatique. Finalement apres auoir fait vne petite exhortation à sa famille, leur recommandant d'estre tousiours bons Chrestiens, & ne s'attrister pas de sa mort, puis qu'elle s'en alloit en Paradis regner avec IESVS-CHRIST, vne heure apres auoir receu le saint huille, elle rendit l'ame à Dieu avec le tres-saint nom de IESVS en la bouche. Trespas

*Du College de Pernambuco & des Missions
saintes aux Paraybas & Perigares.*

CHAPITRE XXXI.

PERNAMBUCO, ou comme quelques vns disent Fernambuco, c'est vne ville, que les Portugais ont au Brasil sur la coste de la mer, à huit degrez de latitude Australe: tellement qu'elle est plus proche de la ligne Æquinoctiale, que toutes les autres cy-dessus mentionnées. Il y a icy pareillement vn College de la Compagnie fondé par le Roy de Portugal Sebastien, ainsi que les autres deux de la Baye & du fleuve Ianuier. En cettuy-cy resi-

dent ordinairement vingt ou vingt-cinq Religieux de la mesme Compagnie. L'on y enseigne la Theologie morale, ou les cas de conscience, la langue latine : & l'on monstre à lire & escrire aux petits enfans.

Pour le regard des autres fonctions propres de leur institut, il s'y employent icy de mesme qu'ez autres lieux, mais principalement à resoudre les doubtes & difficultez, qui se presentent ez contractz des marchands: par ce que c'est vne ville de grand trafic: & ceux qui ont la crainte de Dieu deuant les yeux, & qui ayment plus le salut de leur ame, que les biens de ce monde mal-acquis, leur vont demander conseil en leurs affaires. En quoy l'on a fait, par la grace de Dieu, beaucoup de proffit empeschant plusieurs monopoles, contractz vsuraires, & autres telles meschancetez par trop ordinaires au commerce. Mais ie laisse à part tout eecy, & beaucoup d'autres choses d'edification, qu'on a fait à l'endroit des Portugais: par ce que mon intention n'est que d'escrire ce qui est aduenu en la conuersion des Infidelles.

Ond'autant qu'il y a encore icy plusieurs engins à faire le sucere, ausquels on employe les esclauuez tant Ethiopiens, que Brasiliens, le P. Visiteur de ladite Compagnie ordonna l'an 1585. que quelques Peres allassent visiter souuent ces pauures esclauues, pour les causer, qui ont esté deduites cy-deuant. Ce qu'ils font avec vn notable fruiet, pour le salut des ames de ces pauures gens, comme aussi ailleurs.

A ce College est annexé vn gros bourg de Brasiliens, qu'il y a tout auprès de la mesme ville, ou ils sont plus de neuf cens ou mille en nombre, & tous desia Chrestiens, combien qu'ils en viennent tousiours quelques vns de nouueau, pour entrer au bercail de nostre Seigneur, attirez & gaignez par les Peres, qui vont faire des courses au dedans du pays tout expres pour cela; tellement qu'ils font de baptêmes solempnels, mesmement le iour de S. Michel le patron de ce bourg, esquels il y a quelques fois les cent, cent cinquante, ou deux cens personnes baptisées.

On a fait aussi de ce College quelques Missions ou voyages pour le salut des ames, principalement au Parayba, & aux Petigares.

Le Parayba est vn pays esloigné de Pernambuco vers la ligne equinoxiale quelques 18. ou 20. lieues sur la coste de la mer. C'est là ou les François, ayans esté chassés de la riuere de Gana-
bara,

bara, ou fleuve Ianuier, se retirèrent: & apres auoir traité amitié & alliance avec les habitans, y arresterent leur trafic, mesmement en bois de Brasil: parce qu'il en y a là grande abondance. Dont quelques vns disent que les François ont imposé le nom de Brasil à toute ceste region, & mesmes qu'ils ont les premiers decouvert ceste contrée, & trafiqué avec les sauuages, qui demeurent tout contre la riuiere de S. François, au lieu qu'on a appellé Port-real.

*Les trois
mondes
liur. 3.
a. 6.*

Au reste comme ceux qui souloient aborder à ce port, estoient pour la plus part Rochelois & Huguenots, faisans tous les maux qu'ils pouuoient aux Portugais, ceux-cy resolurent de les desnicher de là, comme ils auoient fait du fleuve Ianuier: & à ceste occasion ils se mirent à faire la guerre aux habitans du Parayba leurs confederes. Ils y firent donc vne expedition l'an 1585. en laquelle ils menerent deux Peres de la Compagnie, tant pour ouyr les confessions des soldats, que pour les encourager, tandis qu'ils combattoient, portant deuant eux vn Crucifix, comm' ils ont accoustumé. Leur presence seruit de beaucoup, non seulement pour le bien des ames, mais encore pour contenir les soldats en leur debuoir, & leur faire garder la discipline militaire. Tellement que pour le respect qu'on leur portoit, & les remonstrances qu'ils faisoient, tant en commun qu'en particulier, à ceux qui en auoient besoin, tous estoient si retenus, qu'on n'entendoit nuls iuremens, & n'y auoit aucune querelle, ny dissention entr'eux: ains vne si grande paix & concorde, qu'il sembloit qu'on fut parmi des bons bourgeois d'une ville pacifique, plustost qu'entre des soldats. Il ne se passoit iour, auquel ils ne fissent leur priere à Dieu: & de ceste façon assistez de son ayde & secours, ils vindrēt au dessus de leur entrepryse. Les deux années suyuant, ils y allerent aussi, & en l'une d'icelles passans par certains bourgs d'originaires encore Gentils, ceux de la Compagnie en conuertirent quelques vns à la foy. Mais parce qu'ils ne pouuoient pas s'arrester là d'auantage, ils ne firent pour lors autre chose que planter des Croix en trois de ces bourgs, avec intention d'y retourner, lors qu'ils auroient plus de loysir, pour les instruire mieux, & y bastir des Eglises.

*Les vain
quent.*

Or quant à la guerre que les Portugais faisoient aux Paraybas, l'ysuë en fut telle. Apres plusieurs escarmouches & batailles, qu'il y eust entre les deux partis, finalement les Portugais de-

meurerent victorieux, & prindrent le Capitaine des Paraybas avec vne trentaine de ses soldats : lesquels ayans esté conduicts à la ville de Pernambuco, furent là condamnez à mourir : toutes-fois auant l'exécution, les Peres supplierēt le Gouverneur de leur permettre, qu'ils parlassent aux condamnez, pour veoir s'ils les pourroient gagner à nostre Seigneur, & sauuer leurs ames, puis qu'il n'y auoit moyen de sauuer les corps. Cela leur ayant esté accordé, ils firent si bien, qu'assistés de la diuine grace, ils les conuertirent tous à la foy, & les baptizerēt: apres les auoir instruits selon que le temps le permettoit, si bien qu'ils moururent tous Chrestiens, remerciaans Dieu de la grace, qu'il leur faisoit, de les amener à sa cognoissance, mesmement en ce temps là.

31. Pa-
raybas
sont bap-
tizés, a-
uāts qu'e-
stre exe-
cutés à
mort.

Mais d'autant que lesdits Paraybas se fortifierent de nouveau, dans vne place mal-aisée d'auoir, l'on y enuoya de rechef vne bonne troupe de soldats Portugais, sous la conduicte de Martin Leytan, qui mena aussi quant & foy quelques Peres de la Compagnie, l'un desquels voyant les ennemis obstinez à tenir bon, & qu'ils ne pouuoient estre forcez, comme il sçauoit parler leur langue, il s'en va tout seul vers eux, & faulte par dessus leur pallissade, se mettant en grand danger d'estre tué: mais se confiant en l'assistance diuine, il entre dedans, & tenāt les bras ouuerts; commence à leur prescher la paix, disant en leur langue: Paix, Paix, soyons amis, & plusieurs autres paroles douces & amiables, lesquelles eurent telle force enuers ces barbares, que soudain ils mirent les armes à bas, iettans à terre leurs arcs & fleches, & les bras croisez, se rendirent volontairement aux Portugais, avec tout le païs, là ou bien tost apres on commença de faire plusieurs engins à sucres; & par ce moyen les Huguenots en estā deboutez, laisserent libre aux Portugais le trafic du bois de Brasil, d'oū ils tirent beaucoup de profit. Cela estant fait, on depart en villages les Paraybas, & ceux de la Compagnie se mettēt à leur prescher l'Euangile, & firent si bien que l'an 1591. ils en auoient desia baptizé vnze cens, lesquels faisoient paroistre en diuerses occurrences, combien ils auoient engraué dans l'ame ce qu'on leur auoit enseigné, cōme ie pourrois mōstrer par beaucoup d'exemples: mais cestuy-cy suffira. Il y auoit vn Portugais, lequel desirant se venger d'un sien ennemy, le vouloit faire tuer, & assassiner par l'un de ces Chrestiens: mais cestuy-cy luy dit tout à plat, qu'il n'en feroit rien, parce qu'il auoit ouy dire au Pere, que cela

Les Pa-
raybas se
rendent
aux Por-
tugais.

1100.
d'iceux
conuertis
à la foy.

estoit mal fait, & qu'il ne pourroit iamais s'oublier de ses instructions. Au demourant le Capitaine des Portugais, qui gouvernoit lors en ces quartiers, voyant le grand profit que les Peres de la Compagnie faisoient en l'instruction des Paraybas, pretendoit faire en sorte, qu'on y bastit & fondaist vn College d'iceux, pour endoctriner la ieunesse de ces barbares: mais cōme il estoit sur le poinct d'en escrire au Roy d'Espagne, vn autre Capitaine vint pour luy succeder en sa charge: lequel pour toute recompense des bons seruices qu'ils auoient faits à la couronne, luy gagnans ce peuple là, comm' a esté dit, au lieu de les y establir, il les en chassa: & y mit d'autres Religieux en leur place, non pour autre occasion, si non parce que les Peres deffendoient tant qu'ils pouuoient les Paraybas, contre les torts & iniures, que luy & quelques autres ses semblables leur faisoient. D'ou s'est ensuyui que ces pauvres gens ont demeuré long temps sans aucune instruction, à cause que ceux qu'on auoit mis au lieu des Peres de la Compagnie, n'entendoient pas leur langage: & de ceste sorte le culte diuin est bien souuent empesché par l'animosité & auarice de quelques vns. Voyla ce que nous auons peu sçauoir iusqu'a present des Paraybas.

Quant aux Petiguares, qui sont limitrophes des Paraybas, & habitent en seize villages, ou ils pourront estre en tout quelques quinze ou seize mil ames, ceux du College de Pernambuco y sont encore allez souuent, mesmes au commencement, lors qu'ils estoient en guerre contre les Portugais: bien que depuis qu'on a baillé la charge d'iceux à quelques autres Religieux, ils n'y osent pas aller. Toutesfois comm' ils virent que ces pauvres gens croupissoient encore ez tenebres de l'infidelité, à faute de quelqu'un qui leur prestast la main pour en sortir, & qu'ils auoient demeuré trois ans, sans qu'aucun les endoctrinast, & leur conserast le baptisme, qu'ils desiroient & demandoient avec grande instance, à cause que ceux, à qui ils auoient esté donnez en partage, ne sçauoient pas parler leur langue, ils s'hazarderent, nonobstant les considerations susdictes, d'y faire vn voyage, auquel ils baptizerent tout aussi tost soixante personnes, de celles seulement, qui estoient malades à la mort: car ils ne voulurent pas donner le baptisme aux autres, n'ayant pas le moyen de s'arrester là, pour les maintenir en la foy. D'ou l'on peut colliger combien d'ames se seront perduës dans ces trois ans, esquels ils n'ont eu personne,

qui les assistat.

Mais d'autant que lesdits Peres auoient moyenné la paix entre eux & les Portugais, & leur auoient persuadé de bastir des Eglises, leur donnant bonne esperance de les aller instruire, ils se plaignoient modestement de ce, qu'ils ne venoient plus les voir, disant que puis qu'ils estoient allez vers eux, lors qu'ils estoient en guerre avec les Portugais, sans crainte d'estre meurtrys d'iceux, maintenant qu'ils viuoient en paix, & qu'ils auoient basti des Eglises, comme ils leur auoient conseillé, ils sembloient les auoir abādōnez & du tout oubliez. L'un des principaux de ces bourgs leur feit ceste complainte: Vous me persuadaistes (dit-il) de sortir de mon païs, pour m'en venir icy, afin d'estre Chrestien. Je le fy tout aussi tost, suyuant vostre conseil, & depuis vous ne vous estes plus souuenus de moy. Je quittay & abandonnay tout instant mes terres & possessions, pour m'arrester icy, & y bastir vne Eglise. Je la feis moy mesme, sans que personne m'enseignast, pensant que j'aurois quelques Peres, pour instruire moy & mes enfans. Puis donc que vous nous auez mōstré le bien, il faut que vous nous y conduisiez, & ameniez à la iouyssance d'iceluy. Voyla ce que disoit cestuy-cy. Les mesmes propos leur tenoient plusieurs autres, tant du menu peuple, que des principaux. Au reste l'accueil qu'ils leur faisoient, quant ils arriuoïent en quelque village, estoit plaisant. Car premierement les ieunes hommes alloient au deuant d'eux, sortans en plusieurs bandes des bois, ou ils s'estoient cachez, comme en embuscade, & sonnans de leurs fifres & tambours fort gayement. Apres cela les hommes faits venoient aussi au deuant d'eux, assez loing du village, & quand ils en estoient prez, les plus anciens & les principaux de tous sortoient du bourg, pour les accueillir & bien-veigner. Et lors qu'ils y entroient, les femmes sortoient de leurs maisons, & les saluoïent à leur façon accoustumée, monstrans tous vne grande ioye & allegresse. Si tost qu'ils auoient mis le pied dans le village, l'on sonnoit les cloches, & le peuple s'assembloit dedans l'Eglise. Car jaçoit qu'ils ne fussent pas encor baptizez, ils auoient neantmoins des Eglises, & en icelles des cloches, & d'ornemens pour les Autels, voire des Images. Si grād estoit le desir qu'ils auoient d'estre Chrestiens, que mesmes auāt de l'estre, ils en prenoïent les marques, & faisoient le mesme que ceux qui desia le sont de long temps: voire sembloïent ils les surpasser. Car n'ayant point d'argent pour

achepter des cloches ny d'ornemens d'Eglise; afin d'en recouurer pour cest effect, ils s'alloient louer aux Portugais pour trauailler à leurs metairies, ou engins de succe; & apres acheptoient des mesmes Portugais ces choses, leur rendant l'argent qu'ils auoient gaigné au trauail. Brief les Peres disent, qu'ils n'ont encore trouué aucun peuple au Brasil plus desireux de son salut que cestuy-cy, ny plus enclin à la pieté. Mais reuenons à nostre propos: Si tost que les Peres estoient arriuez en quelque village, ils s'en alloient tout droit à l'Eglise là ou le peuple s'assembloit, & apres auoir prié Dieu quelque peu de temps, l'un d'iceux faisoit vn petit mot d'exhortation à ces bonnes gens, les louant de ce qu'ils auoient desia basti vne Eglise, & du desir qu'ils auoient de se rendre Chrestiens, adioustant qu'ils estoient venus là tout exprez pour leur prescher la foy de IESVS-CHRIST. Cela estant fait tout le peuple sortoit de l'Eglise, & chascun alloit querir son present, qu'il apportoit aux Peres dans l'Eglise: & n'y auoit aucun si mesquin, qui ne leur donnast quelque chose.

L'un de ces bourgs, ou il auoit y plus de trois mil ames, appartenoit à vn des principaux Seigneurs de ces Petiguares, nommé Bois-sec, lequel ayant grand desir d'estre Chrestien demanda le premier de tous permission aux Peres de bastir vne Eglise en son bourg. Ce que luy ayant esté accordé, tous les autres Chefs ou Seigneurs des autres bourgs en firent autant ez leurs; & pour ce lors que les Peres firent ceste visite, ils en trouuerent par tout. Mais ce bon Seigneur Bois-sec, qui auoit esté le premier à faire bastir son Eglise, ne peut pas iouyr du bien qu'il esperoit: car il deceda quelque temps auant que les Peres n'y arriuasent, & mesmes sans baptisme, à cause qu'il n'y eust lors personne, qui le luy sceut donner. Mais ses enfans, ayant ouy la venue des Peres, les allerent attendre en chemin, & son frere aussi; lequel demeura apres luy Seigneur de ce mesme bourg, & accompagna tousiours les Peres dez le premier village, ou il les alla recueillir, iusques au troysiesme, leur faisant toutes les caresses, dont il se pouuoit aduiser: & monstrant vn grand desir de les voir logez & arrestez parmy eux, afin d'estre instruit luy & tout son peuple en la loy diuine. Mais cela n'estant possible, à tout le moins pour encore, pour les causes cy deuant dites, ils leur donnoient bonne esperance, qu'ils seroient bien tost secourus ou par eux, ou par quelques autres: & cependant ils baptiserent le petits en-

fans avec la permission de leurs pere ou mere, & ceux qui estoient si malades, qu'on n'esperoit pas, qu'ils en eschappassent de sorte que plusieurs d'iceux s'en allerent en paradis bien-tost apres le baptisme, & les Peres s'en retournerent à Pernambuco, laissant ces bons Petiguarez fort alterez des eaux de vie.

Depuis le P. Pierre Rodrigues estant Prouincial de ladite Compagnie y voulut luy mesme aller avec quelques autres Peres, lesquels furent aussi receus de ce peuple avec vne ioye incroyable: de façon qu'on leur venoit au deuant deux lieuës loing avec grande feste & resiouyssance. Entre autres vint les accueillir d'assez loing vn des principaux desdits Petiguarez, appellé Metarouba; lequel estant interrogé des Peres, pourquoy il prenoit tant de peine sil leur repart fort gentiment, puis qu'eux l'auoient bien prise à faire vn si long voyage, pour l'amour de luy, & des siens, qu'il estoit bien raison, qu'il en print autant ou d'avan-

*Arrai-
sonne-
mis d'un
barbare
avec le
P. Prou-
vincial.*

» tage pour l'amour d'eux. Cestuy-cy pria instamment le P. Prou-
»vincial de luy vouloir laisser quelques vns des Peres, pour cate-
»chiser ses enfans, & les baptiser puis apres. Quât à moy (disoit-il)
» ie ne desire autre chose en ce monde, que viure en paix, &
» mourir dans la bergerie de l'Eglise, & pour ceste seule cause
» suis-je sorty de mon pays: ie ne veux plus voir ny targues ny ron-
»delles, ny me seruir de fleches, que pour la chasse. Je m'en vins
» icy laissant incontinent toutes mes possessions, pour suiure les
» traces des Peres, qui me vindrent semondre: & s'adressant à l'vn
» d'iceux; Le me souuiens bien (dict-il) que vous me vinstes voir en
» mon pays, & deslors ie mis vos parolles en mes oreilles, & dans
» mon cœur pour m'en souuenir, en ma langue pour les dire, en
» mes mains & en mes doigts, brief en tous mes membres & sen-
»timens pour les executer. Maintenant ie voudrois, que le Pere
» me tint promesse de ce que ie le priay, & qu'il ne me fist si lon-
»guement attendre, pour me donner quelqu'un, qui enseignast la
» loy diuine à moy & à mes enfans. Le mesme demanderent fort
» instamment au Pere Prouincial, tous les principaux de ce peu-
»ple. Ce que toutesfois on ne leur osa pas accorder, pour ne don-
»ner aux autres Religieux occasion de se plaindre, combien qu'en
» ce voyage ils feirent vn Baptisme solemnel de soixante quatre
» personnes, mais tous estoient ou malades, ou petits enfans. Car
» on ne voulust pas baptiser les autres, n'ayant moyen de demeu-
»rer parmi eux, pour les entretenir en la foy, qu'ils auroiēt receuë.

*Baptes-
me solem-
nel de
64. per-
sonnes.*

Cecy neantmoins apporta beaucoup de consolation à ces bons gens, qui veirent la celebrite, avec laquelle on conferoit ce Sacrement : de façon qu'un chascun apportoit ses enfans aux Peres, pour les faire baptiser. Voyla ce que nous auons peu recueillir du fruit qui s'est faict en la conuersion des Brasiliens, depuis qu'ils ont commencé d'estre esclairez de la lumiere de la foy, iusques à l'an 1599. Je ne doubte pas qu'il n'y ait beaucoup d'autres choses fort remarquables, mais elles ne sont encorës venuës à nostre notice. Si nous en pouuons recouurer les memoires, nous ne serons pas eschars à les communiquer, pour la gloire de Dieu, & la consolation qu'en reçoient plusieurs, voyans vn si grand changement en ceste nation, depuis qu'elle a esté arrousee des eaux de la loy de grace. En quoy se void clairement accomplir le dire du Prophete Isaye. Le loup (dict-il) habitera avec l'agneau, le leopard couchera avec le cheureau, le veau, le lion, & la brebis demeureront ensemble, & vn petit enfant les conduira, parce (adiouste-il vn peu apres) que la terre a esté remplie de la cognoissance du Seigneur, c'est à dire, que les hommes auparauant cruels & farouches, comme des loups, des leopards, & des lions, deuiendront si doux, & si traictables, qu'un petit agnelet, & autres telles bestes; & ce par le moyen de la loy Euangelique, qui leur sera annoncée, ainsi que l'explique S. Hierosme avec les autres Docteurs, & l'experience nous le monstre en ce peuple-cy, lequel estoit au parauant si barbare, & si desnature, que son plus grand plaisir n'estoit que de manger les hommes, & maintenât ceux qui ont embrassé la foy de IESVS-CHRIST, se sont rendus si humains, & si dociles qu'un petit enfant, par maniere de dire, les conduiroit. Telle est la vertu de l'Euangile de nostre Sauueur, lequel il faut prier de vouloir donner accroissement à cest oeuvre, puis qu'il en est le principal auteur & le premier moteur.

Jf.ii.

Fin du troisieme Liure.

LIVRE QVATRIESME
DE L'HISTOIRE
 DES CHOSES PLUS MEMORABLES,
 aduenues tant és Indes Orientales, qu'autres
 païs de la descouuerte des Portugais,
 en l'establissement, & progresz
 de la foy Chrestienne
 & Catholique.

*Et principalement de ce que les Religieux de la Compagnie
 de I E S V S y ont fait, & enduré
 pour la mesme fin.*

A V A N T - P R O P O S .



E n'est pas sans cause, que trois des *Plutar.*
 plus renommés Philosophes par- *l. 2. de*
 my les anciens, Pythagoras, Pla- *placit.*
 ton, & Aristote, ont estimé la par- *philos.*
 tie droicte du monde estre l'O- *6.2.*
 rient, & la gauche l'Occident. Car *Aristot.*
 bien qu'a parler proprement il n'y *l. 2. de*
 ait au ciel costé droict, ny gauche, *culo c. 2.*
 ou autre diuersité de position, veu
 qu'il est de figure ronde, vniforme, & par tout semblable; si est-ce
 que comme ez animaux parfaicts, & mesmement en l'homme,
 l'on appelle la partie droicte celle d'ou l'animal commence à se

*Quelle
est la par-
tie droi-
te ou
gauche
du ciel.*

*Subiect
de ce li-
ure.*

mouuoir, ou à changer de place; qui est d'ordinaire celle où est le foye, tant à cause de la chaleur d'iceluy, que pour la solidité & fermeté des muscles, qui est (selon Galien & Aristote) plus grande de ce costé là, que de l'autre. De mesme au ciel ces Philosophes ont nommé la partie droicte l'Orient, tant parce que le premier mobile, qui entraîne quant & soy tous les autres cieux inferieurs, prend sa carrière du Leuant, & se va rendre au Couchant: comme aussi parce que les influences celestes ont, ce semble, plus de force & de vigueur, pour produire des effects plus nobles ez pais Orientaux, qu'elles n'ont ez Occidentaux; ainsi que l'experience nous le monstre, & nous verrons plus claiement en ce quatriesme liure. Auquel il nous reste à traicter des Royaumes d'Ormuz, du grand Mogor, & de la Chine, tous trois Orientaux, & fort renommez, pour leurs grandes richesses. Et bien que nous ayons parlé au premier & second liure de plusieurs autres pais Orientaux; ç'a esté entant qu'ils sont compris en ce que l'on appelle Indes Orientales. Mais le Royaume d'Ormuz est partie en la Perse, partie en l'Arabie heureuse. La Chine est par delà les Indes. Quant à celuy du grand Mogor, ores qu'il soit en la vraye Inde, enclos entre ces deux tant fameuses riuieres Indus & Ganges: toutesfois, parce que c'est vn pais, que ce Prince a conquestité de nouueau, & non d'ou il est extraict (car il vient des Tartares, de la race du Grand Tamerlan, comme il se dira en son lieu) nous n'auons quasi rien dit iusqu'à present, de son Empire, ny de propos deliberé, comme nous faisons, Dieu aydant, en ce liure. Mais commençons par le Royaume d'Ormuz, qui est le plus proche de l'Europe.

*De la ville & Royaume d'Ormuz: & comme les
Portugais s'en emparerent.*

CHAPITRE I.



*Gerun
ou Or-
muz. Is-
le.*

ORMUZ, ou, comme l'on disoit jadis, **ARMUZ**, est vne ville des plus marchandes & renommées, qui soient en Leuant. Ell' est située en vne petite Isle, que les vns appellent Gerun, & les autres Ormuz. Il en y a qui disent, que c'est l'Ogyris des anciens; & se fondent sur des raisons assez pertinentes. Cest Isle est plantée tout auprez de l'encouleure ou destroit du golfe Persique, esloignée

de la terre ferme du costé de l'Arabie, qu'on appelle heureuse, dix lieuës, & du costé de la Perse, trois seulement. Elle n'a que quatre lieuës de circuit. La ville d'Ormuz, qui est au 27. degré de hauteur Septentrionale, prend son nom, selon l'aduis de quelques graues auteurs, d'une ville fort ancienne, qui estoit en la terre ferme de Carmanie, appelée jadis Armuzia, dont la memoire s'est perduë avec le temps. Et ceste-cy, qui n'estoit qu'une colonie ou peuplade de l'autre, a retenu le nom un peu diversifié. Ainsi vont les choses de ce monde caduque, se changeant de temps en temps. Ceste-cy donc est maintenant la capitale d'un Royaume, nommé pareillement Ormuz, qui commande non seulement à une bonne partie de l'Arabie heureuse, mais encore aux meilleures Isles du golfe Persique; & outre ce comprend ceste partie de Perse, qui est arrosée des riuieres Tabo, Tissindo, & Druto. Le terroir de l'Isle est si maigre, & si sterile, qu'il ne produit rien du tout, non pas mesme pour la nourriture des oyseaux ou autres bestes. Il n'y a ny riuere ny fontaine d'eau douce en toute l'Isle; mais seulement trois puis creusés, & encor assés loing de la ville; d'ou l'on tire quelque peu d'eau, bonne à boire. Les habitans partie se seruent de ceste-cy, partie de l'eau des cisternes, qu'ils ont: mais plusieurs s'en font porter de la terre ferme, ou des Isles plus proches, comme aussi le reste des viures. Ceste grande sterilité & seicheresse est causée du chaud extreme qu'il fait en cest Isle, mesmes durant l'Estä: lequel est si grand, que les habitans n'y scauroient viure, s'ils n'usoient de plusieurs inuentions, pour se garantir de ceste incommodité. L'en rapporteray une tant seulement. Durant les nuicts de l'Estä, il y fait un si grand chaud, qu'on ne peut guere reposer sans quelque artifice, mais plusieurs tiennent sur les toits des maisons, qui sont faits en platte forme, certains vaisseaux de bois, ou petites cuues semblables à une maist ou l'on paistrift. Elles ont autant de largeur, qu'un ou deux hommes y peuuent demeurer tous couchés, & de longueur suffisante, pour s'y estendre comme dans un lit. Quand donc ils se veulent aller coucher, ils font emplir ces cuues d'eau fresche, & se plongent là dedans iusques au col, demeurans ainsi toute la nuict à la frescheur du serain, afin de pouuoir prendre un peu de repos. La cause de ceste grande chaleur est en partie le terroir mesme, car outre qu'il est fort sablonneux, il y a encore une montagne, d'un costé de laquelle se tire grande quantité de soulfre,

Ormuz
ville.Ormuz
Royaume.Sterilité
& seiche
resse du
terroir
de l'Isle.Chaud
extreme
qu'il y
fait.Causes
de ceste
chaleur.

*Ville
d'Or-
muz biē
peuplée
& habi-
tée.*

*Pour-
quoy ell'
est tant
fréquen-
tée.*

*Ormuz
l'estape
du Le-
uant.*

& de l'autre force pierres de sel. L'on dit aussi que jadis ceste Isle brulla l'espace de sept iours continuels : & de fait l'on y voit encore quelques marques de cest embrasement : car la terre des montagnes est toute rougeastre, de façon qu'il semble que le feu y ait passé. Celle encore des vallées est si spongieuse, que l'on diroit que c'est de la cendre, ou de la chaux viue; tellement qu'elle boit tout aussi tost l'eau, qui tombe dessus. Les terre-trembles encor y sont fort frequents, & espouventables. Mais nonobstant toutes ces incommodités, la ville d'Ormuz est peuplée & habitée d'une infinité de gens : & si bien pourueüe de viures, qu'il n'y a manque de rien, non seulement de ce, qui est necessaire pour la vie humaine, mais encore de toutes les delicatesses, qu'on trouue ailleurs. Car il n'y a fruiçts, ny autre viande delicieuse, soit en Perse, soit en l'Arabie, ou en l'Inde, & autres regions, d'ou les nauires puissent aborder à Ormuz, qui ne soit apportée là, s'il est possible. Aussi les gens y sont fort addonnés aux plaisirs & voluptez. Quant à la beauté de la ville, les habitans en ont bien telle opinion, que c'est un commun dire entr'eux : Que si le monde estoit une bague, Ormuz en seroit le Diamant. De fait ell' est fort gentile, & tres-bien compassée. Les rues sont fort larges & droictes, les maisons magnifiques, basties à plusieurs estages, & avec un bel ordre, & concert. Brief il semble qu'il n'y peut auoir rien de mieux aligné : & c'est une des causes, pour lesquelles, nonobstant les incommoditez susdictes, elle est tant habitée & fréquentée. Quelques uns aussi disent, que c'est à raison des mines d'or, qu'il y auoit jadis, d'ou ils pésent, qu'on l'a appelée Ormuz, pour l'abondance de l'or : toutes fois i'estime plus vray semblable, que ce nom luy est demeuré de l'ancienne ville d'Armuzze, ainsi qu'a esté dit. Mais ce qui la rend si hantée des marchands estrangers est la commodité du trafic, & l'abord des nauires, qui viennent là de toutes parts, tant à cause de la situation, que pour raison de deux haures fort assurez, qu'il y a tout aupres de la ville ; l'un du costé d'Orient, l'autre d'Occident, separés l'un de l'autre, avec une petite langue de terre, qui s'estend assez auant dans la mer, de sorte que chascun desdits ports est comme un petit sein. Or comme cest' Isle est sur l'emboucheure du golfe Persique, elle reçoit commodément les nauires des Indiens, Perses, Arabes, Ethiopiens, & autres de ces contrées là ; si bien qu'Ormuz est comme l'estape de toutes les marchandises du Leuant.

Car les Indiens vont là vendre leurs perles, diamans, rubis, esmeraudes, & autres pierres precieuses: le poiure, la canelle, les cloux de girofle, avec tout le reste des espiceries, drogues, & simples de medecine qui se trouuent en Orient. Et les marchans d'Europe & d'Afrique, y vont achepter ces denrées, hormis ceux, qui s'en pouruoient par le moyen des Portugais, depuis qu'ils ont estably leur domination en l'Inde. Tellement qu'on trouue dans Ormuz non seulement des Persans, Arabes, Ethiopiens, Armeniens, Tartares, Turcs, Mores, & autres Mahometains: mais encore plusieurs Italiens, François, Allemans, Anglois, Polonois, & autres Europeans, qui y vôt par la mer Mediterranée, comme nous dirons bien tost. Quant aux Portugais ils y ont vne citadelle, qui les rend maistres de la ville, & par mesme moyen ils ont pour tributaire le Roy d'Ormuz. Des Espagnols il n'en y va guere: parce que les Portugais ne permettent pas, qu'ils y aillent du costé de l'Ocean: & les Turcs ne les laissent pas passer du costé de la mer Mediterranée, par les terres qu'ils tiennent entre cette mer & le sein Persique: combien qu'il en y a qui y vont sous le tiltre & habit de quelque autre nation.

Or d'autant que c'est vn voyage fort celebre, ie le descriray icy briuelement, pour donner plus de lumiere à ce que nous dirons cy apres. Les marchans donc Venetiens, François, Anglois, & autres, ayans vogué sur la mer mediterrannée, s'en vont aborder à Tripoli de Surie, & de là font trois journées de chemin par terre iusques à Alep, ou se faict vne assemblée de marchans & autres, qui veulent entreprendre ce voyage deux fois l'an, c'est à sçauoir au mois d'Auril, & de Septembre. Cette troupe de gens, qu'on appelle communement Carauane, ou Cassila, est conduite par vn Capitaine Turc, & quelques cēt Ianissaires, lesquels font corte aux marchands, & autres voyageurs, qui arriueront quelquesfois à cinq ou six mille personnes. Car outre les marchands & soldats de garde, vn grand nombre de viuandiers suit la Carauane, & autres telles gens, qui menent des chameaux, dromedaires & cheuaux, tant pour la voicture des viures, que des personnes: vn chameau en porte deux ordinairement dans des corbeilles ou paniers, qui luy pendent d'un costé & d'autre. La cause pour laquelle ils se fournissent ainsi de viures est, parce qu'il leur faut passer les deserts de la Surie, là où ils ne trouuent ny hostelleries, ny autre logis, où maisons: & pource il est necessaire de

*Voyage
d'Or-
muz fort
celebre,
comme
on le
sait.*

porter des provisions, si l'on ne veut mourir de faim & de soif. Ils marchent tousiours en rang de bataille: & chascque soir ils s'arrestent pour reposer dans leurs tentes, faisans toute la nuit bonne sentinelle: car les Arabes, qui ne viuent que de larcins & voleries, sont bien souuent aux aguets, pour surprendre & deualiser les marchands, s'ils ne sont bien sur leurs gardes. Ils employent quarante iours à passer ces deserts, & s'arrestent en certains lieux de 3. en trois iournées, ou de 4. en 4. ou ils sçauent qu'il y a des puis creusez pour abbeuuer leurs chameaux, & autres montures, & se pouruoir d'eau douce. De ceste sorte ils arriuent pre-

*Voyez
le tbré-
sor d'Or
sellins
V. Ba-
bylon.*

mierement à la ville de Bagdad, ou Bagadad, qui est selon quelques vns l'ancienne Babylone de Surie, tant renommée dans l'écriture sainte, & autres anciens auteurs. De Bagadad, ils vont à la ville de Bassora, sise en l'Arabie heureuse sur l'orée des riuieres Tigris, & Euphrates, apres qu'elles se sont ioinctes ensemble: & là les Ianissaires ou soldats de garde s'arrestent, ou s'en retournent à Alep. Mais les marchands s'embarquent pour aller de Bassora par le Golfe Persique à la ville d'Ormuz: ou ayant expedié leurs affaires, ils s'en retournent à poinct nommé à Bassora, pour delà reprendre leur chemin avec la Carauane, qui part aussi de Bassora à temps prefix & arresté vers Alep, d'où chascun prend sa route à la part ou il luy plaist. Et par ceste voye tous les Europeans se pouruoient iadis des marchandises du Leuant, sinon depuis la nauigation des Portugais aux Indes: & encore maintenant plusieurs font le mesme voyage: parce qu'il n'est pas si long, ny si dangereux, que celuy des Portugais. D'où l'on peut voir cōme la ville d'Ormuz, est de plus grand trafic, que null' autre quasi du monde. Or comme il aduiet d'ordinaire, que ces vil-

*Mœurs
des babi-
lons
d'Ormuz*

les de grand abord, sont aussi fort debordées en leurs mœurs, celle d'Ormuz n'est pas exempte de ce malheur. Car (pour dire quelque chose des mœurs des habitans) ils sont fort addonnez au luxe, aux delices & voluptez. Ils ayment la musique, & s'accoustrent pompeusement. Ils lisent volōtiers les histoires: & sont estat des hōmes doctes, lesquels ils honorēt & escoutent volontiers, tenans à grand honneur d'estre leurs auditeurs. Les personnes ont pour l'ordinaire la face bien faite, & vn bel entre-jent. Les femmes vont par les rues le visage voilé, pour n'estre veuës des hommes, qui sont là fort lubriques. La mesdisance est vn vice commun parmy eux; ils ont des loix assez bonnes, toute

sorte de marchandises & autres choses presque se vendent au poids, & celuy qui vse de tromperie en cela, est estimé ennemy capital de la societé humaine. Leur Gouvernemēt est Monarchique, & les Rois font leur demeure ordinaire à Ormuz, ou ils ont vn palais non seulement commode pour loger, mais aussi fort & bien muni pour se deffendre de la violence des ennemis. Les enfans succedent au pere à la Royauté: mais celuy qui est Roy faiēt creuer les yeux à tous ses freres, & autres de la race Royales: afin qu'ils ne puissent pretendre à la couronne: (car les aueugles en sont forclos) & les tient enserrez comme en prison toute leur vie, avec leurs femmes & enfans, bien qu'ils soyent entretenus là delicieusement. Les Roys d'Ormuz ont esté iadis fort puissans & riches: car ils auoyent amassé de grands thresors du reuenir des ports & peages: & par ce moyen s'estoyent tellement agrandis, qu'ils ont commandé à beaucoup d'Isles, & de villes, qu'ils n'ont pas à present, & ce par leur setardise & nonchalance. Car ils commettoient tous les affaires tant de paix que de guerre à leurs Capitaines & Lieutenans, sans se soucier d'autre chose, que de iouyr de leurs voluptez & plaisirs. Mais ceux-cy voyans leurs Princes tous fondus en delices & oyfueté, apres s'estre enrichis, & auoir acquis vne grande puissance, s'vsurperent peu à peu leur auctorité, ne leur laissant que le nom & tiltre de Roy: car ils auoyent le maniement non seulement des affaires, mais encore des finances, & pour faire court gouuernoient tout le Royaume à leur poste & profit. Cela fust cause que les forces de l'estat vindrent à se diminuer: de sorte que n'ayans le moyen de faire teste à leurs ennemis, comme auparauant, ils se rendirent tributaires, premierement du Roy de Perse, & puis des Portugais, comme nous allons dire tout à cest' heure.

*Roy
d'Ormuz
& leur
puissance.*

Les Portugais donc trouuerent à leur arriuee aux Indes Zei-
fadin 2. Roy d'Ormuz encore ieune enfant, sous la tutelle d'un
Eunuque esclaue de son pere, nommé Atar, ou Cogear, hom-
me de grand entendement, mais fort desloyal à son Prince & pu-
pille: car ces desseins ne visoyent à autre but, qu'à retenir, tant
qu'il viuroit, le gouuernement & la puissance de toutes choses
par deuers soy, laissant à son pupille le seul nom & couronne de
Roy. Or il estoit desia paruenue à vne si grande puissance & or-
gueil, qu'il estoit insupportable, & enuie de tous. En ce temps-là
vint Alphonse d'Albuquerque surnommé le Grand, lequel se-
Deffier

*Zeisadin
2. Roy
d'Ormuz
ieune &
pupille.*

*d'Alfise
Albu-
querque.*

*Les ex-
ploits
qu'il fit
auant
qu'arri-
uer à
Ormuz.*

*Somme
Zeifadi
de se re-
dre tri-
butaire
au Roy
de Por-
tugal.*

chant; que le Roy de Portugal Emmanuel desiroit merueilleusement auoir ceste place pour boucher l'entrée du Golfe Persique aux Turcs, & autres Mahometains, qui alloient par là trafiquer aux Indes, afin de transférer tout ce commerce en Portugal, & ôster aux ennemis de la foy le moyen de s'enrichir par là, il resolut d'entreprēdre de se rendre maistre de la ville d'Ormuz, ou d'y bastir vne citadelle. Ayant donc esté laissé avec vne flotte de six nauires, & quatre cens septante Portugais, pour commander sur toute ceste mer, qui baigne la coste de l'Arabie heureuse, depuis l'Isle de Socotora, iusques au sein Persique, & iugeant que ce seroit denigrer son honneur, s'il faisoit le mestier des Pyrates, il va ietter les yeux de l'esprit sur cete haute entreprise, que de renger sous la puissance des Portugais le Royaume d'Ormuz. Pour paruenir à cela le 20.iour d'Aoust de l'an 1507. il fist voile de l'Isle susdite de Socotora, tirant droict vers le cap de Rosalgate, & l'ayant doublé il voulust aller prendre port à Calajaté (premiere ville du Royaume d'Ormuz de ce costé là) pour se fournir de viures. Les habitans effrayez d'une si soudaine & inopinée arriuee des Portugais (le nom desquels estoit desia fort redouté en toutes ces contrées) de peur qu'ils eurent d'endurer quelque plus grand dommage, ils accepterent la paix, qu'Albuquerque leur presentoit, & pourueurent sa flotte de viures. De là il s'en alla mouiller l'anchre à vn' autre ville aussi de la Seigneurie d'Ormuz, nommée Curiaté, où il trouua les habitans fort dissemblables à ceux de Calajate, car ils aimerent mieux se deffendre par armes, qu'accepter l'amitié qu'on leur offroit. Mais mal leur en print, d'autant que les Portugais estans incontinent descendus à terre, forcerent leur tranchée & rampart, avec vne telle furie, qu'ils mirent soudain en fuite les habitans, & entrerent dans la ville desnuee de soldats: laquelle ils pillerent, & apres y mirent le feu, ensemble és nauires, qu'ils trouuerent au port. Le mesme quasi seirent-ils aux villes de Mascaté, & d'Orfazan, qui estoient aussi du domaine d'Ormuz, iajoit qu'elles fussent bien munies de tranchées, & d'un bon nombre de soldats. Finalement estans arriuez deuant Ormuz Albuquerque enuoye vn Ambassadeur au Roy Zeifadin, & à ses tuteurs pour leur signifier, que le Roy de Portugal Emmanuel son Prince, auoit comme par droict successif iuré la guerre perpetuelle & irreconciliable contre les ennemis du nom Chrestien, & principalement contre

contre les sectateurs de Mahomet (tels que le Roy & ses tuteurs estoient) que s'il vouloit se rengier sous son obéissance, & luy payer certain tribut annuel, à l'exemple de plusieurs autres Roys de l'Afrique & de l'Asie, il s'en iroit de là sans luy faire aucun dommage: mais s'il refusoit ce party, qu'il luy feroit la guerre à feu & à sang. Le Roy effrayé des choses qu'il auoit ouy auoir esté faictes par Albuquerque en chemin, & craignant qu'il ne luy aduint pis, fist semblant de vouloir accepter la paix: neantmoins par le conseil de ses tuteurs, il différoit de iour à autre de faire response à Albuquerque, attendant quelques troupes, qu'il auoit enuoyées leuer en la terre ferme de Perse. Lesquelles estant arriuées, il luy fit dire: Que les Roys d'Ormuz ne payoient point de tribut aux estrangers: ains auoient accoustumé d'en leuer. Que si les Portugais vouloient trafiquer à leur port, ainsi que les autres nations, il le leur permettroit avec les mesmes conditions, & franchises: mais s'ils entreprenoient de faire quelque tort & iniure, qu'ils experimenteroient de combien les Arabes & Perses estoient meilleurs hommes de guerre, que les Caffres à demy nuds, & les Æthiopiens sans discipline. L'Eunuque Cogear auoit sous ses enseignes plus de vingt mil hommes, partie desquels il laissa dans les grands vaisseaux, qu'il fit arrester & rengier au long du bord: & montant sur d'autres plus legers, il s'elargit en haute mer: afin que si Albuquerque accrochoit ceux du bord, il peut inuestir tellement la flotte des Portugais, que tout demeurast enucloppé dedans ses reths. Toutesfois Dieu assista si bien Albuquerque, qu'apres vn tres-aspre conflict, ou il mourut vn grand nombre des Barbares, & des Portugais seulement dix, il se rendit maistre de tous les vaisseaux des ennemis: la plupart desquels il fist brusler ou mettre à fond. Le Roy voyant qu'il auoit faict vne si grande perte, & que sans les nauires les habitâs de l'Isle ne pouuoient subsister, enuoye soudain vn Ambassadeur à Albuquerque, le priant de luy pardonner la faute passée, & de vouloir faire la paix. Ce qu'Albuquerque luy accorda, donnant pouoir d'esteindre cependant le feu, qui brusloit les autres vaisseaux: & le lendemain ils firent l'accord avec les conditions suivantes. Que le Roy d'Ormuz seroit desormais tributaire du Roy de Portugal, & luy payeroit de tribut annuel quinze mille Serafs, qui est vne espeece de monnoye d'or, laquelle vaut quarante sols de la nostre. En outre qu'il bailleroit à Albuquerque vn lieu

*Respoce
de Zei-
sadin.*

*Zeisadin
2. Roy
d'Ormuz
se rend
tributai-
re au Roy
de Por-
tugal.*

Est contraint de la laisser imparfaite. tel qu'il voudroit, pour y bastir vne forteresse, & fourniroit ce qui fairoit de besoing, pour le bastiment d'icelle. Or comme la forteresse se bastissoit, & qu'Albuquerque hastoit la besoigne, le plus qu'il luy estoit possible, voyant bien que de là dependoit l'assurance de ceste conquête, les Capitaines & soldats Portugais, qu'il faisoit trauailler à cest œuvre, se mutinerēt contre luy, fâchez de ce qu'il les tenoit là comme attachez, ou plustost de ce qu'ils ne pouuoient pas (comme ils souloient avec d'autres) aller butiner les nauires des Sarrazins, qui voguoient sur le golfe Persique. Brief ils en vindrent à tels termes, que trois Capitaines de la flotte le quitterent tout à plat, amenans quant & eux leurs soldats en l'Inde, sans luy demander congé, ny luy dire adieu. Albuquerque voyant qu'on luy arrachoit des mains vne si belle conquête, qui estoit presque assurée, en fut grandemēt fâché: Toutesfois il fallut qu'il cedat au temps, & suyuiſt les autres: car il ne pouuoit avec vne si petite troupe, cōm' estoit celle qui luy restoit, tenir en bride tout ce Royaume. Mais cōme il fust quelques années apres constitué Lieutenant general pour le Roy de Portugal ez Indes, il mit fin à ceste entreprise, apres auoir conqueſté les villes de Goa & de Malaca, ainsi qu'a esté dict au 1. & 2. liure. La chose donc passa en ceste sorte.

Seconde conquête d'Ormuz. L'an 1515. ayant fait equiper vne flotte de 22. gros nauires, avec plusieurs autres petites vaisseaux, il part de Goa faisant courir le bruit, qu'il alloit assieger la ville d'Aden, sise sur l'entrée du golfe Arabique, afin que ceux d'Ormuz ne se doubtaſſent de ce, qu'il pretendoit faire. Estant arriué à Mascaté, il rebrouſſe chemin, & s'en va tout droit à l'Isle d'Ormuz. Ce qui donna vne grande espouuante au Roy & aux habitans de la ville, là ou les affaires depuis le depart d'Albuquerque auoiēt esté fort brouillées: car l'Eunuque Cogearar estoit mort, & le Gouverneur de la ville appellé Nordin, auoit fait mourir par poison le Roy Zeïfadin 2. les enfans duquel il auoit priué de la royauté, & subrogé en leur place vn frere de Zeïfadin, nommée Toro, ou Terunxa, comme quelques vns l'appellent. L'ayant obligé par ce benefice, & plusieurs autres, il inanioit comm' il vouloit, le Roy & le Royaume, mesmement à cause des seruiteurs & soldats de garde qu'il luy auoit baillez, lesquels estoient tous à sa deuotion: & entre autres trois freres, ses proches parens, qui estoient tousiours avec le Roy, & les plus aduancés en dignité & puissance

aupres de luy. Mais sur tous vn nommé Hamed, ieune homme de 35. ans haut à la main, & fort semblable à Cogecatar, tant en la conuouitise de dominer, comm' ez ruses & finessees dôt il vsoit, pour faire venir le tout à son profit. Or cestuy-cy auoit tellemēt manié les affaires, qu'il s'estoit rendu maistre de la personne du Roy : de sorte que le pauvre Prince n'osoit pas bailler, par maniere de dire, sans le consentement de Hamed. Nordin mesme, qui l'auoit introduit là, estoit peu prisé au respect de luy. Et bien que le Roy fut grandement fâché de se voir captiué en ceste maniere, si n'osoit il pourtant s'en plaindre, ny rien entreprendre contre l'autre ; de peur qu'il ne luy creuast les yeux, & luy ostast encore la vie. Il est vray que quant à l'alliance faicte avec le Roy de Portugal, l'on ne bougeoit rien : ains le legis estoit ouuert aux Capitaines Portugais, quand ils passoient par là, & le tribut estoit payé fidellemēt au Roy Emmanuel. Toutesfois comm' il n'y auoit point de forteresse pour tenir en bride les Ormusiens, il pouuoit aisémēt estre depossédé, & le Roy avec le Royaume distraict de son obeissance, dont on se craignoit fort : car desia le Roy Toro auoit esté contrainct, à la persualion de Hamed, de recevoir le bonnet, que le Roy de Perse Ismaël Sophi luy auoit enuoyé, ensemble les prieres & articles de la doctrine de Hali, que les Persans tiennent pour leur Prophete, qui estoit comme vne recognoissance enuers le Roy de Perse. *Albuquerque s'empare derechef d'Ormuz.* Albuquerque estant informé de tout cecy, resolut de deliurer le Roy Toro de ceste seruitude, en laquelle ce meschant garnement le tenoit, & le mettre du tout en la protection du Roy de Portugal. Si tost dōc qu'il fut arriué deuant Ormuz, il fait encerner l'Isle de ses vaisseaux, afin qu'il n'y peut entrer aucun secours de soldats, ny de viures. Apres ce il enuoye dire au Roy, qu'il estoit venu là pour faire des nouuelles conditions d'alliance, entre le Roy de Portugal & luy. Toro bien estonné de ceste flotte, enuoye vn' Ambassade vers Albuquerque fort souple, pour sçauoir ce qu'il vouloit de luy. Albuquerque demande, outre le tribut qu'on payoit au Roy de Portugal, que certaine place fut donnée aux Portugais, pour y bastir vne forteresse, & quelque maison dans la ville, pour y faire leurs negotiations. Le Roy qui auoit belle peur, oëtroya soudain tout ce, qu'Albuquerque demanda : & l'accord fust passé, & iuré entre eux, avec grande solemnité. Cependant que la forteresse se bastissoit au mesme endroit, qu'elle auoit esté

Acheue de bastir la forteresse

commencée, sept ou huit ans auparavant. Hamed voyant bien qu'il alloit perdre sa puissance, si les affaires des Portugais réussissoient, mettoit par dessous main tous les empeschemens qu'il pouuoit, à ce que la Citadelle ne s'acheuast pas. Albuquerque aduertie de cela, & de la subiection, en laquelle il tenoit le Roy, ensemble des trahisons, qu'il luy brassoit, resolut de le faire tuer par ses Capitaines. Ce qu'ayant esté executé, il vint facilement à bout de ce qu'il pretendoit: si bien que pour bastir la forteresse, outre la grande diligence, qu'il y apporta, le Roy mesme fournist des materiaux, & autres choses nécessaires. Apres ce, il oste aux Ormuziens toute l'artillerie qu'ils auoient, laquelle fut mise dans la Citadelle, & trente Princes de race Royale (qui auoient esté aueuglés avec vn fer chaud, afin qu'ils ne pretendissent à la couronne, & estoient nourris aux despens du Roy d'Ormuz) furent par le commandement d'Albuquerque menez à Goa, de peur qu'à leur occasion on ne brouillast les affaires, avec commission aux Thresoriers generaux, de leur pouruoir abondamment de tout ce, qui seroit requis pour leur viure & entretien. Brief le Roy & les habitans d'Ormuz iurerent fidelité au Roy Emmanuel, & les mains d'Albuquerque: lequel apres auoir si bien estably les affaires de ceste ville, s'en retournât à Goa, comme il estoit desia arriué au port, il rendit l'ame à Dieu. Voila comment les Portugais se sont emparez d'une place si importante, qui depuis leur a tousiours esté subiectée, au grand profit de la couronne de Portugal. Venons maintenant à ce qui est de la Religion.

*Enuoyé
ceux de
la race
royale à
Goa.*

Comme le Pere Gaspar Barzé de la Compagnie de Iesus fut enuoyé à Ormuz: & de ses parens, estudes, voyages, & occupations auant qu'il y arriua.

CHAPITRE II.



FIN que l'on entende mieux l'occasion, pour laquelle le P. Gaspar Barzé fut enuoyé à Ormuz, & le fruit qu'il y a fait, il est nécessaire de cognoistre la dispositiō, en laquelle estoit ceste ville, quand il y arriua. Il faut donc sçauoir, que la ville d'Ormuz estant d'un si grand abord que nous auons dit, l'on y trouue ordinairement des gens quasi de toute sorte de Religion, comme de Chrestiens, Latins, Grecs, Georgiens, Abyssins, & autres; des Iuifs,

des Sarrafins, tant de la secte des Turcs, que de celle des Perses: finalement des Payens & Idolatres, qui viennent là des Indes, & tous ceux-cy ont l'exercice libre de leur Religion en icelle ville. Les Mahometains, outre plusieurs autres Mosquées, y auoient vn des plus fameux Alcorans de route l'Asie, & de l'Afrique: là ou tous les Vendredis ceux de telle secte auoient accoustumé de s'assembler: car cest le iour qu'ils festent, comme nous le Dimanche. Les Iuifs y auoient aussi vne Synagogue, là ou ils solemnisoient leur Sabbat chasque Samedy. Les Gentils faisoient leurs assemblées en leurs Pagodes chasque Lundy. D'ou l'on peut colliger, quels pouuoient estre les Portugais & autres Chrestiens, dans vne ville tant meflangée. Car tout ainsi qu'avec les courbeaux l'on apprend à crouasser (selon le commun dire) de mesme, suyuant la corruption de nostre nature, il n'est que trop aisé de se laisser couler és pechez & abominations que l'on void en ceux avec lesquels on conuerse, principalement quand il n'y a personne qui nous monstre ce qui est de nostre deuoir. Or ce malheur estoit propre aux Portugais d'Ormuz, car ils auoyent demeuré fort long temps sans aucun Prestre, qui leur dict la Messe, & leur administrait les Sacremens. Et bien qu'apres ils en eurent quelques vns: toutesfois ceux-là, ou n'estoyent pas si sçauans, qu'ils eussent peu prescher, ou s'il en y auoit qui l'eussent peu faire, ils estoient aussi vicieux que le reste, & plus eschauffez à leur profit temporel, que zelez au salut des ames. Ce n'est pas donc de merueille si les ronges & espines des vices auoyent tellement creu en ce champ de nostre Seigneur, qu'elles estouffoyent toute la bonne semence qu'il y iettoit par ses diuines inspirations. De là se deriuoyent comme des sources, les enchantemens, sacrileges, incestes, meurtres, adulteres, & plusieurs autres pechez qui regnoient parmy eux, si qu'o eust diét à les voir qu'ils estoient plustost Payens ou Sarrafins, que Chrestiens. Car mesme ils en estoient venus iusqu'à là, que plusieurs d'iceux s'estans mariez avec des femmes Mahometaines, Iuifs, Persanes, ou Payennes, ils ne se soucioient pas qu'elles esleuassent leurs enfans en leur secte de perdition; tellement qu'il aduenoit bien souuent, que les fils des Portugais estoient Payens, Iuifs, ou Sarrafins, comme leurs meres, sans que les Peres s'en souciaissent beaucoup. Quant aux vsures, monopoles, & autres telles meschancetez, & iniquitez controuuées pour desrober le bien d'au-

Corruption des mœurs des Portugais d'Ormuz

truy, ce n'estoit qu'industrie à leur opinion & aduis. Tel donc estoit l'estat des Portugais habitans de la ville d'Ormuz, quand le B.P. François Xavier arriva es Indes l'an 1542. lequel entendant ces choses, comm' il fust de retour des Moluques, auoit vn grand desir d'y aller luy mesme, pour desfricher ceste terre: mais l'entreprise qu'il auoit en main du Japon, comme chose de plus grand' importance, l'en destourna. Toutesfois il y enuoya vn autre fort semblable à soy, mesinement quant au zele du salut des ames, & en plusieurs autres vertus & graces surnaturelles, c'estoit le P. Gaspar Barzé, Flamend de nation, duquel parce que nous deuõs traicter icy fort amplement, nous raconterons briueuement l'extraction, & ce qu'il fit auant qu'arriuer à Ormuz: à celle fin qu'on cognoisse, comme Dieu le disposoit à exploicter des choses si grandes, que nous verrons qu'il a fait cy dessous. Il estoit donc natif d'un village nommé Gouza, qui est en l'Isle de Zelande; son pere s'appelloit François, & sa mere Agnes, n'ayans autre noblesse, que celle que leur a donné ce fils tant annobly de Dieu, qu'il peut à bon droit estre mis au rang des plus illustres personages de nostre temps. Ils luy firent apprendre en leur village les rudiments de Grammaire, & de là il fut à Louvain pour estudier aux facultez plus hautes de Philosophie, & de Theologie. Puis il s'en alla pour certaines occasions en Portugal, ou il demanda d'estre receu en la Compagnie de Iesvs: & l'ayant obtenu apres auoir esté bien esprouué es exercices d'humilité, charité, & autres vertus, il fust enuoyé aux Indes l'an 1548. en compagnie de sept autres de la mesme Societé. Il s'embarqua avec trois d'iceux (desquels il estoit Superieur) dans le nauire ou commandoit Louys de Mendoza: & le P. Antoine Gomes, avec autres trois dont il auoit charge, monta sur vn autre. Or le Pere Gaspar auant tout autre chose, tascha de gagner la bonne grace du Capitaine, afin qu'il permissit, que l'on enseignast tous les iours le Catechisme aux esclauers, & autres gens de basse condition, & qu'on dict publiquement les Litanies chascue iour, pour appaiser l'ire de Dieu, par l'intercession & priere des Saints. Ayant obtenu cela, il se met en disposition de corriger peu à peu les vices, qui regnoient en ce nauire. La chose sembloit estre bien difficile, car outre les matelots, & vn grand nombre de serfs, & esclauers, il y auoit enuiron quatre cens soldats, plusieurs desquels estoient si accoustumez aux ieux, blasphemers, iuremens, mesdi-

P. Gaspar Barzé.

Son pais & extraction.

Ses études.

S'en va aux Indes.

fances, querelles, & à toute sorte de vilainie & impudicité, qu'il estoit bien mal-aisé de les en diuertir. Neantmoins le Pere ne perdit pas courage, ains mettant toute sa confiance en Dieu, & se souuenant des comportemens du B.P. Xavier, lors qu'il faisoit le mesme voyage, il commença de leur prescher plustost par exemple, que par parole. Aussi n'y eust-il pas manque d'exercer sa charité, ny de faire esprouue de sa patience. Car tout au commencement de la nauigation, ses compagnons estans tombez malades d'un grand deluoyement d'estomach, qui aduient d'ordinaire aux nauigeans, le P. Gaspar leur seruoit, non seulement d'infirmier, mais aussi de cuyfinier, faisant cuire les viandes au foyer commun en présence de tous: de façon que plusieurs pour cet acte d'humilité, le tenoyent au commencement pour un homme de peu. Et les lacquais ou autres seruiteurs, le rencontrans auprès du foyer, ne se cōtentoyent pas de luy dire vilainie, se mocquans, & gaudissans de luy: mais encore luy cassoyent bien souuent le pot, qu'il auoit mis au feu pour les malades, ou le luy desrobboyent, lors qu'il estoit occupé à autres choses. Encores y en auoit-il de si meschans & outrecuydez, que sans auoir esgard ny à la dignité de Prestre, ny à l'habit de Religieux, osoyent bien avec leurs mains sacrileges, luy dōner des soufflets, ou des coups de poing, bien qu'il ne leur feit aucun tort, ny dommage. Mais la plupart de ceux, qui le vilipendoyent de la sorte, ayans bien tost apres recogneu leur faute, & la vertu du Pere, commencerent de l'auoir en admiration, & à luy porter un grand respect. Les autres aussi du nauire, qui auoyent veu & considéré de près son humilité, sa charité, & de bonnairété, l'en estimoyent & aymoyent d'auantage: si qu'ils luy aydoient, ou luy faisoient ayder à leurs seruiteurs à preparer les viandes pour les malades. Lesquels venus à conualescence se meirent aussi à prescher & instruire les autres, empeschant le plus qu'ils pouuoient les blasphemés, renie-mens, querelles, & autres offences de Dieu: & pour cela ne faisoient pas de s'employer à servir les malades, & exercer semblables actes de charité & humilité, qu'ils voyoient faire au P. Gaspar. D'où s'ensuiuiſt un tel changement és mœurs des soldats, passagers, matelots, & autres gens semblables, qu'on eust dict que c'estoit plustost une famille Religieuse, qu'un ramaz peste-mêlé de tant de diuerses sortes & conditions de personnes.

Le premier de tous qui feit son profit du bon exemple & do-

*Gaigne
le Capi-
taine du
navire à
la deuo-
tion.*

*Et un
marchād
fort ri-
che.*

*Ce qu'il
fit au
Mozam-
bique.*

étrine du P. Gaspar, fut le Capitaine du navire, Louys de Mendosa, lequel non cōtent de luy declarer le plus secret de son ame en la confession, voulut encore estre priuēment instruit par luy mesme és exercices spirituels, lesquels il fist avec vne singuliere consolation de son ame, & vn tres-grand profit. Car deslors on le remarqua tout autre, qu'il n'estoit auparavant en ses actiōs, & parolles. De façon que s'il trouuoit occasion d'entremesler quelque bon propos de deuotion, ou des choses spirituelles, estant en compagnie avec les autres, il le faisoit fort dextremēr, & mesme la cherchoit bien souuent. Il renga premicrement sa famille & son train, de sorte qu'on n'y voyoit point de superfluité ny de luxe : & ce qu'il employoit autrefois en cela, estoit appliqué à la nourriture des pauures, ou gens necessiteux. Apres ce il mit ordre à ce que tous ceux du navire fussent contenues en leur deuoir ; ce qui ne fust pas fort difficile, tous estans grandement esmeus par son exemple, aux actes de vertu, & nommēment de la liberalité : car il en y eust plusieurs lesquels à son imitation entreprendrent de nourrir certain nombre de pauures, qu'il y auoit au navire, à leurs propres cousts & despens. Entr' autres vn marchand de grands moyens, lequel ayant recogneu la vanité & inconstance des richesses de ce monde, tant par les exhortations publiques que le P. Gaspar faisoit à tous, que par les propos familiers qu'il tenoit souuent en particulier avec luy, non seulement vloit de grande liberalité enuers les pauures qui estoient là ; mais aussi print tellement à desdain les biens de la terre, qu'il resolut de les quitter du tout, & les donner aux pauures, pour imiter plus parfaictement N. S. & deslors se mit entre les mains du Pere, pour estre regy & gouuerné par luy en tout & par tout : puis estant arriué à Goa, il fust receu en la Compagnie de Iesus. Or estans occupez en ces choses, apres auoir doublé le Cap de bonne esperance assez heureusement, bien que ce ne fust sans danger à cause de deux grosses tourmentes qu'ils eurent là auprès, finalement ils arriuerent au Mozambique, sans auoir perdu aucun de tous ceux, qui s'estoyent embarquez à Lisbone. Chose qui est fort rare, & avec tāt de maladies & incommoditez qu'ils eurent, fust estimée de la pluspart miraculeuse, attribuant le tout apres Dieu, à la vertu, prieres, & saintes occupations du P. Gaspar. Au Mozambique ils s'arrestèrent l'espace de quinze iours, là ou plusieurs se retirerent és hostelleries, pour se desennuyer, & reposer

& reposer vn peu. Mais le P. Gaspar & ses compagnons, plus soigneux de la santé des autres, que de la leur propre, renouuellerēt leurs labeurs, seruans auec grande serueur, diligence, & charité, aux malades de l'hospital, ou ils s'allerēt retirer. Car jaçoit qu'on leur offrist gratuitement des bons logis, & qu'il y eust plusieurs des habitans, qui les priaissent de se vouloir seruir de leurs maisons; toutesfois comme leur plus grand desir n'estoit, qu'endurer beaucoup pour l'amour de nostre Seigneur, & ensuyure les traces & vestiges du B. Pere Xavier, ils ne voulurēt onques prendre autre logis que l'hospital: ou apres auoir apporté les malades de leur nauire, ils se retirerent aussi, pour s'employer derechef auec le mesme soing qu'auparauant, à leur faire seruice, & les secourir, tant es necessitez spirituelles, que temporelles. Il y auoit en tout six vingts malades en ce nauire: mais au mesme temps en arriua vn autre de la mesme flotte, dās lequel estoiet embarquez deux Religieux de l'Ordre de S. Dominique, qui monstrerent aussi leur vertu & charité, auec grande edification d'vn chacun, seruans fort soigneusement les malades dans ce mesme hospital. En fin ils arriuerent à Goa, le 4. Septembre de la mesme année *Arriue à Goa.* 1548. là ou le P. Gaspar se mit à trauailler auec vne nouuelle serueur, desirieux d'ayder tout le mōde à faire le salut de son amē. Il preschoit quasi tous les iours, tantost aux esclauēs par les ruēs ou places de la ville, tantost aux prisonniers, maintenant au peuple en diuerses Eglises, ores à la Noblesse au Palais du Vice-roy, & ce auec vn si grād zele & profit de ses auditeurs, qu'il n'y auoit quasi personne qui s'en retournast de son sermon, sans en rapporter quelque bon desir, ou d'amander sa vie, ou de s'auancer en la vertu. Mais le bien qu'il y feit pour lors, ne se peut mieux cognoistre, que par les changemēs des mœurs & de vie qu'il y eust presque en toute sorte & qualité de gens. On vid dans peu de temps les plus delicats & voluptueux de la ville se chastier eux *Le fruit qu'il y fait par ses predication.* mesmes, & faire vne griesue penitence de leurs excēs. Vn' infinité de personnes induictes par ses remonstrances, s'alloient ietter aux pieds des Prestres, pour faire vne bonne confession de leurs pechés: plusieurs faisoient restitution des biens acquis iniustement. Brief c'estoit vne chose merueilleuse de voir le changement, que ceste dextre du souuerain operoit tous les iours par son moyen. Il feit aussi quelques disputes contre les Brachmanes de l'Isle de Goa, & conuinquist en vne d'icelles le chef & prin-

*conuer-
tit à la
foy vn
Brach-
mane.*

cipal de tous appellé Locu, de sorte qu'il se rendit finalement à la verité, & fut baptizé avec sa femme, & vn sien nepueu fils de sa sœur. Ce baptisme fut festoyé dans la ville de Goa huit iours durant, avec vne telle ioye & allegresse, qu'on n'entendoit pendant ce temps là, que carrillons de cloches, musiques, haut-bois, cornets à bouquin, & autres semblables instruments. L'on ne voyoit que feux de ioye, esbats, & autres tels signes de resiouissance. Le iour qu'il fust baptizé, l'on para les ruës, par lesquelles il debuoit passer, des plus riches tapisseries, qu'il y eust dans la ville, entre-meslées de Palmes verdoyantes d'une belle façon. Les Catechumenes monter à cheual, & accompagnés d'une belle troupe de Gentils-hommes, & autres gens de marque, furent conduits à la grande Eglise, là ou l'Euesque & le Vice-roy se trouuerent, qui les tindrent sur les fonts de baptême. Le Brachmane fut appellé Luc Sala, sa femme Isabeau, & son nepueu Antoine. Et parce que le Vice-roy cognoissoit telle estre la volonté de son Prince, il octroya plusieurs priuileges, & feit des grandes faueurs à tous ceux de ceste maison & famille, pour inciter les autres Brachmanes à suyure leur exemple. Cecy aduint du temps que le Pere Xavier visitoit les Chrestiens du cap de Commory, apres qu'il fut de retour des Moluques: lequel voyant par les effects, les grandes graces, que nostre Seigneur auoit communiquées audit Pere, il l'enuoya à Ormuz, luy donnant ces aduertissemens, que nous auons mis au premier liure. Durant sa navigation, il reprit la mesme façon de faire, qu'il gardoit en venant de Portugal; & pendant ce temps là, il conuertist à la foy quelques passagers Infidelles, qui estoient au mesme nauire, & quelques Lascaris aussi, qui sont des soldats Indiens, que les Portugais soul-doyent, lors qu'ils n'ont pas assés de leurs gens, soit pour la guerre, soit pour la deffence des vaisseaux qu'ils menent. Estant allé mouiller l'anchre au port de Mascaté, qui est en l'Arabie heureuse, il y trouue vn taz de gens perdus & desbauchez, bannis ou fugitifs de diuers quartiers, tant de l'Inde que del'Europe, qui s'estoient retirez là, comme en vn lieu de refuge, craignans le supplice que meritoient leurs forfaits; gens en fin (comme l'on dit) de sac & de corde: car c'est l'asyle de telle racaille. Estant donc arriué là, il tasche durant ce peu de temps qu'il y seiourna, de les exciter à penitence, & de reduire à la foy Chrestienne ceux, qui l'auoient reniée. Il leur prescha deux foix, ainsi qu'il dit en vn

*est en-
uoyé à
Ormuz
par le B.
P. Xa-
uier.*

*Ce qu'il
fit en ce
voyage.*

lettre, sous vn arbre, ou bien en quelque lieu couuert de fucillage verd, & les esmeut de telle sorte, que plusieurs d'iceux se confesserent à luy, apres auoir demeuré parmy les Sarrazins l'espace de dix ou douze ans. Il en amena quelque vns avec soy, remedi-
 ant à leurs necessités, & en laissa d'autres en dispositiō de prendre quelque voye de salut. Au reste le fruiēt qu'il fit là, conformément au peu de temps qu'il y arresta, luy fut si agreable, qu'il ne se pouuoit saouler par apres, de remercier Dieu de ce qu'il l'auoit conduit en ce lieu, pour le bien des ames qu'il luy auoit gaignées. De là il vint aborder au port qui est proche de la ville d'Ormuz, là ou si tost qu'on entendit la nouuelle de son arriuée, le Vicaire de l'Euesque s'en alla avec tout le Clergé pour le recevoir, estant encore dans le naui-
 re : d'ou il fut mené en procession iusques à la forteresse, pour voir le Capitaine, qui estoit lors Emmanuel de Lima, duquel il fut reçu honnorablement & humanement. Le Capitaine vouloit retenir le P. Gaspar à toutes forces, pour demeurer chés luy tout le temps, qu'il seroit en ceste ville là : mais le Vicaire s'y opposoit fort & ferme, alleguant, que puis qu'il estoit Ecclesiastique, cela luy appartenoit, que de loger le Pere en sa maison ; tellement qu'il suruint entr'eux vn sainct debat, chacun taschant de l'auoir avec soy. Mais le Pere les osta tous deux de peine : car ayant remercié l'un & l'autre, de la bonne affection, qu'ils luy monstroient, il leur feit entendre, que son logis accoustumé, c'estoit l'hospital des pàuures malades : & de fait il s'en y alla de ce pas, les laissant tous deux fort estonnez, & bien edifiez.

Emmanuel de Lima
Gouuerneur d'Ormuz

Comme le P. Gaspar Barzé tascha d'ayder spirituellement toute sorte de gens, qu'il trouua en Ormuz ; mais principalement les Portugais : & de quelques choses merueilleuses, qui aduindrent là dessus.

CHAPITRE III.



LE Pere Gaspar sçachant l'estat miserable de la ville d'Ormuz, pour la dissolution estrange, qu'il y auoit en toute sorte de vices, resta comme pasmé, & sans aucun courage, ny enuie de rien faire, sinon que de pleurer, ainsi qu'il dit en vne de ses lettres, desquelles la plus grand part de ce que nous dirons d'ores-en-auant,

Penitences & oraisons du Pere Gaspar.

*Il com-
mence à
faire la
guerre
contre
les vices
par ces
d'humili-
té.*

*Ensi-
gne le
Cate-
chisme,
& le
fruiſt
qu'il fait
en cela.*

a esté tiré. Il passoit donc bien souuent les nuicts entieres en oraison & priere, espandant des larmes en abondance, & chastiât son corps avec des longues abstinences, aspres cilices, & rudes disciplines: afin de satisfaire pour les grands excès & desbordemens qui regnoient en ceste ville; & par ce moyen appaiser l'ire de Dieu contre icelle. Apres cela il commence la guerre contre Sathan, selon sa coustume, & celle du B. Pere Xavier, par les actes d'humilité, seruant aux pauvres de l'hospital, visitant les prisonniers, & enseignant la doctrine Chrestienne aux petits enfans, esclaves, & autres pauvres gens, lesquels il assembloit chaque iour avec vne clochette, qu'il alloit sonnant luy mesme par la ville. L'on ne scauroit croire combien il profita par ce moyen: car les petits enfans, les esclaves, & le menu peuple apprindrét avec telle affection les oraisons du Catechisme, & l'explication des articles de la foy, les commandemens de Dieu, & autres choses de nostre Religion, qu'ils ne faisoient que les chanter par tout, avec vn singulier goust & plaisir, au lieu des chansons impudiques & lasciuës, auxquelles ils estoient accoustumés auparavant. Il constitua pareillement des prix à ceux, qui reprendroient les blasphemés & iurements publics, & demandoit compte à vn chacun deuant tous, de ce qu'ils auoient fait en cela, recompensant ceux, qui s'y estoient bien comportez, & tanzant doucement les autres. Au commencement plusieurs des habitans venoient au Catechisme, comme si c'eust esté vne farce, ou quelque ieu d'enfans. Car c'estoit pour lors vne chose fort nouuelle dans Ormuz, & la pluspart y alloient plustost par curiosité, que pour y profiter. Mais il aduenoit bien souuent, qu'ils y estoient pris: car iacoit qu'il enseignast principalement les enfans, & les gens rudes: neantmoins il faisoit avec cela des discours sur la laideur des vices, & beauté des vertus, avec vn tel zele, que plusieurs s'en retournoient tous changés; ayant conçu en leur ame vne grande douleur & repentance de leurs pechez, resolu de faire vne bonne confession, & d'amander leur vie. Par ce moyen il gaignoit tantost les vns, tãtost les autres; si qu'en peu de temps l'on recogneut vn grand changement en la ville: car les propos qu'on y tenoit de iour, les musiques, qu'on y chantoit de nuict, les assemblées, qu'on y faisoit, estoient fort differentes de celles qui souloient estre auparavant. Les enfans & filles racontoient à leurs peres & meres ce, qu'ils auoient appris au Catechisme,

les esclaves à leurs maîtres, les petits enfans Chrestiens, aux autres Sarrafins ou Payens de mesme aage; Brief lors que le Diable y pensoit le moins, il se trouua debouté de son ancienne demeure. Il n'y auoit place, ny ruë, ou l'on n'entendist resonner les noms de **IESVS** & de **MARIE**, non seulement de la bouche des Chrestiens, mais aussi des Payens & Sarrafins. La les disciples de la doctrine Chrestienne estoient tous autres qu'au parauant. Car il y auoit plus grand nombre d'hommes & de femmes, de toute sorte & qualité, que de petits enfans ou d'esclaves. Les Eglises se remplissoient de monde, & ce au plus grand chaud de l'Esté. les personnes mesmes de qualité, s'estimoient honorées que le Pere les interrogeast, & leur demandast quelque chose de la leçon du Catechisme. Luy voyant vn commencement si heureux, ne relasche pas pourtant ses penitences & oraisons: afin de conseruer les faueurs de la diuine grace, tant en foy qu'à l'endroit de ses auditeurs. Cela faict, il se delibere d'attaquer en particulier *Il attaq* chasque vice de ceux qui regnoient le plus en ceste ville, & par *ue chas* mesme moyen d'ayder toutes sortes de gens, qu'il y auoit dans *que vice* Ormuz. A ces fins il distribua ses sermons de telle maniere, que *en parti* les Dimâches & autres iours de feste il preschoit aux Portugais, *culier.* les Lundis aux Gentils, les Vendredis aux Sarrafins, & les Samedis aux Iuifs, parce que c'estoyent les iours esquels telles gens faisoient leurs assemblées. Il employoit le reste du temps à conuerſer avec les Portugais, instruisant les vns, ouyant les cōfessions des autres, & en choses semblables; mais pour cela il ne laissoit passer aucun iour, qu'il n'enseignast la doctring Chrestienne, voyant le grand fruct qui s'y faisoit.

Quand il preschoit aux Portugais, & autres Chrestiens es iours de Dimanche & autres festes que l'Eglise celebre, il dresseoit la batterie de la parolle de Dieu, principalement contre les vices qui regnoient dauantage parmy eux. Et le premier fust cet infame desbordement, qu'il y auoit es Portugais, s'accouplis avec des femmes Payennes, Iuïfues, ou Mahometaines, encore qu'elles ne voulussent quitter leurs superstitions: d'où venoit que ce n'estoit point mariage, mais vn concubinage, & que les enfans qui naissoient de là estoient illegitimes, & bien souuent suiuoient les superstitions de leurs meres, sans que les Portugais s'en donnassent de peine. D'auantage plusieurs ne se contentoient pas d'une seule, mais en tenoyent plusieurs à la façon des Payens ou

*Grands
abus des
maria-
ges des
Portu-
gais cor-
rigés*

Sarrasins, & ce publiquement, & sans aucune honte. Le Pere voyant de si grands abus, les reprit avec vne tres-grande force, & vehemence, tant d'esprit, que de parolles, menaçant ceux qui en estoient coupables, de la vengeance diuine, puis que les homes ne se soucioient de chastier tels desordres. Brief il fit tant par ses aduertissemens & remonstrances, que plusieurs se recogneurēt, & quitterent celles, qu'ils ne pouuoient retenir sans enfreindre les loix diuines & humaines. Il aduisa pareillement ceux qui auoient charge du gouuernement, soit temporel, soit spirituel, que Dieu, le Roy de Portugal, & les Prelats leur demanderoient compte de ce qu'ils enduroiēt & permettoiēt ces abominations, ainsi publiquement, au grand scandale tant des Chrestiens, que des Iuifs, Sarrasins & Payens. Il semble que nostre Seigneur voulut cooperer avec le bon zele du Pere, & confirmer les menaces, qu'il leur faisoit de la vengeance diuine. Car au mesme temps aduindrent des tremblemens de terre, si terribles & espouuantables, que tout le monde estoit en frayeur. Et iacq̃oit que d'autres fois en fussent arriuez de semblables; neautmoins ceux cy venans en vne telle saison, lors que le Pere les menaq̃oit des punitions que l'ire de Dieu deschargeroit sur eux, s'ils ne s'amendoient, furent de telle efficace, qu'on recogneut bien tost apres vn notable amandement en plusieurs, pour regard de ce vice. Il aduint aussi qu'un certain Portugais se monstrant obstiné en ce peché, fut puny de Dieu fort griefuement, & à son grand dommage; mais au profit de plusieurs autres. C'estoit le Colonel de l'infanterie Portugaise, le peché duquel à raison de sa charge, estoit plus scandaleux. Or il tenoit publiquement trois femmes Mahometaines, & les trainoit par tout ou il alloit, comme s'il eust esté marié avec chascune d'icelles legitiment, & en face de l'Eglise. Les admonitions, les reprehensions, les menaces de l'ire de Dieu qu'on luy faisoit, luy seruoient autant, que si on les eust faictes à vne ame damnée, & desia logée aux enfers, là où à peine entend-on de plus horribles blasphemes, que ceux qu'il vomissoit de sa bouche detestable, dès le matin iusques au soir. Le P. Gaspar n'auoit plus grand ennemy que cettuy-cy, ny aucun qui s'opposast dauantage à ses desseins: car non seulement il ne se laissoit accoster de luy, mais encore peruertissoit les autres, & les empeschoit tāt qu'il pouuoit de suiure les saincts conseils & bōs aduis du Pere. Son heure toutesfois arriua: car s'en

*Tremble-
mens de
terre es-
pouuan-
tables à
Ormuz.*

*Punition
horrible
d'un pe-
cheur
obstiné.*

estant allé battre l'estrade, avec quelques soldats de sa compagnie, voila que soudain au milieu de la campagne, & à la veüe de tous ses compagnons, il tōbe roide-mort: & au mesme instant l'air, qui auparauāt estoit clair & serain, se couure de nuées si grosses & espesses, que la seule veüe d'icelles cauſoit horreur à vn chacun. Mais ce qui s'en ensuiuit, donna bien plus grande terreur aux assistans: car aussi tost suruint vn tel orage de vents, de pouſſiere, & de tonnerres, qu'ils ne se peurent voir les vns les autres, l'espace d'vne demie heure: de façon qu'ils s'estimoyent tous perdus. Mais nostre Seigneur se cōtenta de la mort de cet Impie blasphemateur, & de cauſer aux autres telle frayeur, pour leur engraouer dans l'ame la crainte de ses diuins iugemens. Ceste punition fust aussi cause, que plusieurs de ceux, qui estoient semblables à ce malheureux, quant au peché de lubricité, furēt grandement effrayez, voir mesmes les Sarrasins & Payens, qui ne font pas estat de telles choses. Mais des Portugais, les vns en renuoyèrent les concubines, desquelles ils abuſoyent; les autres se marièrent legitiment avec elles, & ceux qui tenoyent cela à deshonneur, taschoyent de leur trouuer quelque honneſte party: de façon qu'elles euſſent moyen de viure chasteement, en l'estat de mariage. Mais plusieurs, non contens de cela, faiſoyent encore de grieues penitences, & se chastiroyent eux mesmes fort rigoureusement, pour les excès passez. Il en y auoit qui se disciplinoyent publiquement aux portes des Eglises és iours de feste, & lors qu'il y auoit plus grād concours de peuple: d'autres qui alloient de iour ou de nuict par les ruës & carrefours de la ville, demandās à haute voix pardō à Dieu de leurs pechez, & au peuple du mauuais exēple qu'ils leur auoyent donné. Es sermons du P. Gaspar on ne voyoit pas seulement espādre quelques gouttes de larmes, mais on y entēdoit vne lamentatiō vniuerſelle, quasi de tous les assistans. Les confessions estoient si frequentes, & la pluspart de toute la vie, ou à tout le moins de beaucoup d'années, qu'il n'auoit moyen de les ouyr toutes de iour; & pour ce il les entendoit bien ſouuent de nuict, ſans prendre d'ordinaire plus de deux ou trois heures de repos. Encore ne pouuoit-il ſatisfaire à tous; si qu'il en y euſt (mesme de gens de qualité) lesquels ſeirent ſemblant d'eſtre malades pour l'obliger à les aller ouyr en confession. Mais au contraire il en y euſt deux, lesquels voulurēt reietter la grace diuine, qui par le moyē du Pere, leur eſtoit offerte

*blasphémateur
puny de
Dieu.*

Changement notable q'ē plusieurs causa cette punition.

Grand travail du P. Gaspar à ouyr les confessions.

l'un s'enfuyant de luy, & l'autre voulant l'intimider & l'effrayer, afin qu'il ne le tançast de sa meschante vie. Car le Diable tenoit l'un & l'autre attaché fort & ferme, à l'aue de la chair; & le second d'auantage, iaçoit que pour le regard de sa profession (estât Ecclesiastique) il fust plus obligé à garder continence. Il se craignoit fort que le P. Gaspar, ne vint à sçauoir ses deportemens: & afin qu'il ne les creust, si on les luy disoit, ou à tout le moins qu'il ne l'en osast reprendre, les sçachant, il se monstroit à l'exterieur son amy fort intime. Il ne manquoit iamais à ses sermons, il l'alloit voir souuent à l'hospital, & conuersoit familièrement avec luy: il luy enuoyoit force presents, & plusieurs delicatesses, comme confitures, & choses semblables, auxquelles neantmoins le Pere ne touchoit point, ains les faisoit distribuer incontinent aux malades de l'hospital. Il l'inuitoit souuent à prendre le repas chez soy, & lors qu'il y venoit, il luy faisoit grande feste, se gardant bien toutesfois que ses diables familiers, avec leur generation, c'est à dire ses concubines, & leurs enfans ne comparussent deuant luy. Au demeurant la table bien garnie, les mets bien apprestez, la vaisselle riche, la tapisserie belle, & tout le seruice magnifique, car il estoit bien pourueu (le miserable) de tout excepté de vertu. Ils furent quelque temps en ces feintes, cettuy-cy faisant semblant d'estre le plus honneste personnage, & le plus homme de bien du monde: & le Pere feignant de ne sçauoir rien de sa vie impudique, pour voir si par son exemple, & les bons aduis qu'il luy donnoit en particulier (sans toucher neantmoins à ceste corde) il le pourroit retirer de son bournier. Mais c'estoit parler à vn sourd, ou vouloir faire voir vn aueugle: si qu'il fust contrainct à la parfin de remonstrer en vn sermon, l'obligation que les Ecclesiastiques ont de garder cōtinence & chasteté. Or iaçoit que le Pere fist cela avec tout le respect qu'il luy estoit possible, & qui est deu à l'estat Ecclesiastique, neantmoins l'autre se ressentist si tres-fort, de ce que le Pere auoit presché, & ses cōpagnons aussi, tant en la profession qu'à mener vne mesme vie, desquels il estoit le chef en l'un & en l'autre, qu'apres la predication, lors qu'il voulut sortir de l'Eglise, estant tout seul (car il ne se retiroit pas, sinon apres que tout le peuple estoit party) ils le vôt accoster, & celuy d'entr'eux qui se sentoit le plus picqué; pour estre plus coupable que le reste, commence à l'attaquer avec des parolles si rogues, si hautaines, & si mordantes, qu'on eust

*conuer-
sion d'un
Ecclesi-
astique
mal vi-
uant.*

*Se sent
picqué
d'un ser-
mon du
P. Gas-
par.*

eust dit que c'estoit plustost quelque furieux soldat, qu'un homme d'Eglise. Brief il en vint là, que peu s'en fallut, qu'il ne luy mit les mains sur le collet, & luy fit plus grand mal que de parole. Le Pere voyant cest homme si alteré, se met à genoux deuant luy, & les autres aussi, leur demandant humblement pardon, bien qu'il n'eust point commis de faute. Cest acte de patience & d'humilité appaisa tellement leur courroux, qu'il ne s'en ensuyuiſt aucun scandale, cōme il estoit à craindre; & fut cause (peut estre) que nostre Seigneur luy donnaſt par apres l'entiere victoire du principal autheur, luy faisant changer de vie, d'une façon fort merueilleuse, comme nous allons raconter. Iceluy donc se trouuant le lendemain au sermon du Pere, avec la mesme dissimulation qu' auparauant, lors qu'il y pensoit le moins, voicy les rayons de la grace diuine entrer dans son ame, qui la penetrerent si viuement, qu'il luy fut impossible de tenir les larmes tout le temps, que le Pere prescha: & soudain apres qu'il fut descendu de chaire, il s'en va le trouuer, se iette à ses pieds, la face contre terre, & luy demande pardon de son hypocrisie, & du tort qu'il luy auoit voulu faire, ensemble du scādale & mauuais exemple, qu'il auoit donné à toute la ville, promettant de mener à l'aduenir vne meilleure vie, comme il fit aussi. Car dez ce iour là, il s'addonna à bon escient à la penitence & à la vertu, perseuerant en icelle avec très-grande edification. Voyla pour l'un. L'autre duquel nous disions auoir voulu fuir le Pere, estoit vn vieux soldat, non moins emuilly és vices qu'és armes. Cestuy-cy estant allé quelquefois ouyr les sermons du Pere, n'en retournoit iamais, qu'il ne fut grandement esmeu à changer de vie, par la force & vehemence de ses parolles. Mais comm' il ne vouloit endurer qu'on le tirat du feu, dans lequel, bien qu'il bruslat, il se plaisoit, les sermons qu'il entendoit, luy seruoient d'autant de bourreaux, qui gehennoient sa mauuaise conscience: d'oū il conceut vne telle horreur & crainte du Pere, qu'il eust mieux aimé, ainsi qu'il dit à plusieurs, combattre la mort mesme, que se confesser au P. Gaspar, ou bien l'accōster. Mais preuoyant que s'il demeurait plus long temps à Ormuz, il seroit contrainct de le rencontrer en quelque part, & de parler à luy, il se delibera d'en partir, & de fait se va embarquer tout exprés, pour s'en retourner en l'Inde. À peines auoit il mis le pied dans le nauire, qu'il fut soudainement faisy d'une fièvre chaude, & violente, accom-

La patience & humilité du Pere Gaspar le gagnent.

Conversion d'un vieux soldat.

La crainte qu'il auoit de se rencontrer avec le Pere.

*Tombe
en telle
frayeur
qu'il se
craint de
sous.*

pagnée d'une melancholie & tristesse si grâde, qu'il luy sembloit à tout coups, que l'ire de Dieu deschargeoit sur luy les punitions & chastimens, qu'il auoit deserui: si que le moindre bruiet, qu'il entendoit, le faisoit trembler de crainte, quand on tiroit quelque coup d'artillerie, il s'estimoit emporté, & mis en pieces: brief il en estoit venu là, qu'il se craignoit de ses amis mesmes, tourmenté de perpetuelles craintes & frayeurs. Mais comme Dieu pretendoit plustost guerir son ame malade, que chastier son corps, il luy laissa le iugement entier pour se souuenir, & se fier du medecin, qu'il fuyoit & redoutoit tant. Il prie donc ceux, qui luy assistoient, de luy appeller le P. Gaspar: lequel estât venu il commence de respirer, comme si vne partie de son mal estoit passée, & le regardant d'un œil tout autre qu'auparauant, il se iette entre ses bras, & le prie de l'ouyr en confession; laquelle ayant faite, il se trouua tout allegé, & bien tost apres fut guery, receuant la santé du corps, avec celle de l'ame. Et non content de ce, si tost qu'il se porta bien, il commence à faire penitence de ses pechez, ayant au prealable chassé d'aupres de soy les causes de sa meschante vie. De ces deux cas on peut iuger de plusieurs autres semblables, qui aduindrēt sur ceste mesme matiere. Voyla quant au peché de la chair. De là il vint à combattre contre l'auarice, qui regnoit encore d'auantage dās Ormuz, & sur tout les vsures, monopoles, & autres telles meschancetés. Car vne bonne partie des habitans d'Ormuz, ne viuoient d'autre trauail ny trafic, sinon de l'argent qu'ils tenoient en banque, le multiplians avec tant de changes & rechanges, prests, ou transports, & autres semblables inuentions, que le mesme Pere escrit en vne lettre, qu'il ne pouuoit entendre la subtilité & finesse d'icelles. Mais en fin l'iniquité arriuoit iusqu'à là, que de dix escus qu'une personne auoit prestez, il en tiroit par diuers changes ou rechanges, sa nourriture, & de toute sa famille, le principal demeurant tousiours en son entier. Pour destourner les Portugais d'un si grand & enorme larcin, qui se commettoit publiquement, sans aucune honte ny vergongne, outre ce qu'il en disoit souuent en ses sermons ordinaires, poursuyuant ce peché à toute reste; il faisoit encore tous les Samedis un sermon en forme de leçon, sur le peché d'auarice & de ses branches, ou il traicta ceste matiere avec vne telle clarté & efficace de raisons, avec tāt de sentences & auctorités de l'Escripture & des Saints Peres, avec tant de beaux exemples, brief

*Le Pere
Gaspar
attaque
le peché
d'auarice.*

*Meschancelé qui
regnoit
en Ormuz.
pour les
vsures,
&c.*

avec telle ferueur & vehemence d'esprit, & de parolles, & ce qui est le principal, avec telle perseuerance & assiduité, qu'assisté de la diuine grâce, il arrachâ ceste yuraye du champ de nostre Seigneur, de telle sorte, qu'on recogneut en cecy autant ou plus d'amandement és Portugais d'Ormuz, qu'en autre chose. Car tout ainsi qu'auparauant, si tost qu'ils estoient leués, le premier voyage qu'ils faisoient, c'estoit d'aller à la place, qu'ils appellent Bezoar (peut estre par ce qu'on y vend beaucoup de pierres de Bezoar, fort souueraines contre le venin) & estans là assemblés avec les Iuifs & Sarrazins, ils se mettoient à prester verbalement, ou *Amē de-
ment d
ce vice.* mentalement les gains des prests & vsures, & doubloient ainsi ou triploient auant main les changes de l'argent presté. Au contraire apres que le P. Gaspar eut remonstré l'iniquité de ce gain, & l'obligation qu'il y auoit à restituer ce, qui auoit esté acquis en ceste façon, le premier voyage qu'ils faisoient chasque iour, dès le matin, c'estoit d'aller à l'Eglise, qui se remplissoit de gens, quasi autant les iours ouuriers, que les Dimanches, & festes: là ou ils entendoient la Messe deuotement, puis s'en alloient à ladiète place, non pas pour accroistre les gains des vsures, cōme auparaũt; mais pour discourir & disputer entr'eux de ce, qu'il falloit garder aux contrats de prest, de change, & autres semblables, selon les loix diuines, comm' ils auoient appris du P. Gaspar; tellement qu'on eut dit, que c'estoit plustost vn' eschole de Theologie, ou l'on enseigne ces matieres, que non pas vne place de marchands. Or cest exercice ne consistoit pas seulement en parolles, mais passoit encore au faict: car des lors les Portugais d'Ormuz quitterent du tout les vsures; & ce qui est plus, firent tant de *Restitu-
tions no-
tables.* restitutions, & de si grosses sommes, qu'outre ce qui fut rendu à ceux, qui auoient esté interessez, desquels on estoit certain, & as-
seuré, seulemēt de ce qui resta, pour ne scauoir les vrais maistres, l'on en maria plusieurs filles orphelines, & l'on secourust beaucoup d'autres necessiteux, jaçoit qu'une bonne partie de cest argent fut employé aussi à pouruoir de meubles l'hospital, qu'ils appellent de la misericorde. Cecy edifia grandement tous les infidelles & meseroyans, principalemēt les Iuifs, & Mahometains, lesquels estoient fort esmerueillez de voir vne chose si saincte & si nouuelle parmy eux. Il y eut quelques marchands, qui mon-
strerent entre autres le grand desir, qu'ils auoient de faire leur salut: car ils s'allèrent presenter au Pere, & se jetterent à ses pieds

*Contra-
gense re-
solution
de cer-
tains
mar-
chands.*

la larme à l'œil, le supplias de vouloir voir leurs comptes, & conformémēt à ce qu'il iugeroit qu'ils estoient obligés de restituer, qu'il satisfeist à ceux à qui ils auroient faict du tort, luy mettant entre les mains tous leurs moyens, qui estoient grands, tant en argent qu'en marchandises, esclaves, maisons, nauires, & autres choses; brief ils luy laisserēt la disposition de tout ce qu'ils auoient en ce monde, afin que sans auoir aucun esgard à leur interest, il retranchat tout ce, qu'il iugeroit estre possédé par eux iniustement: adioustans que si les moyens qu'ils luy mettoient en main, n'estoient bastans pour satisfaire, qu'ils estoient prests de le payer sur leur propre corps, en faisant vne si dure & si aspre penitence, que les delices & voluptez de leur vie passée meritoient. Avec tels desirs & bons propos, plusieurs se confesserēt & reformerent leur vie, de sorte qu'on les vid tousiours despuis viure fort honnestement, & en bons Chrestiens. Mais outre les restitutions que les Portugais feirent de ce, qui appartenoit à autrui, ils donnerent d'aumosne de ce, qui estoit à eux, force milliers d'escus, tant pour subuenir aux necessitez des pauvres, que pour autres ceuures pies. L'adiousteray à ce que dessus, comme le P. Gaspar osta certain abus, qui regnoit parmy les Chrestiens de la mesme ville. C'est qu'ils ne faisoient pas consciēce de vendre, ny de transporter aux Turcs ou Sarrazins du fer, du soulfre, & autres especes de marchandise, qu'il est prohibé & desdendu de vendre aux ennemis de la foy Chrestienne, sous peine d'excommunication, portée par la Bulle de nostre S. Pere, qu'on appelle *in caena Domini*: parce qu'elle a accoustumé de se publier chasque année, le iour du Ieudy Saint. Mais apres que le Pere leur eust faict entendre la griesueté de ce peché, & les peines qu'ils encoüroient en ce faisant, ils quitterent desormais ce trafic: & ceux qui estoient tombez en l'excommunication, furent par luy absous, selon le pouuoir qu'il en auoit de nostre S. Pere, auquel l'absolution de ce cas est reseruée.

*Autre a-
bus esté
par le P.
Gaspar.*

*Assoupit
les que-
relles &
inimi-
ties.*

Après qu'il eut gaigné de si belles victoires sur l'ennemy de nostre salut, & qu'il l'eut debouté de ces deux citadelles de L'ubricité, & d'Avarice, dans lesquelles il tenoit bon, & d'où il battoit en ruine la ville d'Ormuz; il attaque la troisieme, c'est à scauoir les inimitiez & rancunes, que ce serpent infernal y auoit semé: & les entretenoit, attisant tousiours le feu de dissension, entre ceux de mesme foy, nation, & profession. Ayāt donc battu.

là dessus quelque temps, il fit en sorte par ses predications ou remonstrances, que toutes les discordes, qu'il y auoit parmy les Portugais, cessèrent, faisant pardonner à plusieurs les offences qu'ils auoyent receuës, & à d'autres demander pardon des torts & iniures, qu'ils auoyent fait à leur prochain. Nous en mettrôs quelques exemples des plus signalez. Il y auoit deux certains personnages, qui se guettoient pour s'entretuer l'un l'autre: mais apres auoir ouy quelque sermon du Pere, ils se vindrent accoler en signe d'amitié à la porte de l'Eglise, au grand contentement & edification d'un chacun. Ce qui s'ensuit est encore plus remarquable. En la citadelle y auoit vn Capitaine, ou Porte-enseigne, noble de sang voirement, mais qui entendoit fort peu en quoy consistoit la vraye noblesse, pensant que ce fust à se venger de ses ennemis: de sorte qu'il ne vouloit endurer rien de personne, bien qu'il y eust beaucoup que souffrir de luy: car c'estoit vn homme si superbe & querelleux, qu'à peines y auoit-il aucün des Portugais, soit dans la forteresse, soit dans la ville, auquel il n'eust fait quelque tort ou iniure; de façon qu'il estoit hay, & mal voulu quasi de tous. Plusieurs qui ne luy cedoyent point ny en courage, ny en vaillance, pourchassoyent d'auoir raison des outrages, qu'il leur auoit fait. Le P. Gaspar se peina fort, pour gagner cettuy-cy: mais tout vn long temps il se trouua en vain. La ville estoit en paix lors qu'il en estoit absent; mais soudain qu'il y rentroit, tout estoit en bis-bille. Le Pere voyant vn si grand changement en la ville à l'arriüee ou sortie de cettuy-cy: A la mienne volöte (dict-il) que Dieu touchast de sa puissante main le corps de cest hōme avec quelque grieue maladie, afin de luy addoucir le cœur, & de guerir son ame. Ceste priere ne fust pas sans effect, car bien tost apres vne fiebre chaude & maligne at-
*Reconci-
liatiō de
deux qui
se vou-
loyent
entre-
tuer.*
*Un sol-
dat que-
relleux
& vin-
dicatif
est ama-
doui &
humilié.*

taque ce soldat querelleux, & le touche si viuement, qu'il pensoit estre à la derniere periode de sa vie: si que pensant ny auoir aucune esperance aux remedes humains, il resoult de pouruoir au salut de son ame, & prie instamment ceux qui estoient auprès de luy, d'aller querir le P. Gaspar pour l'ouyr en confession. Le Pere estant venu, trouue son homme du tout changé: car au lieu qu'il estoit auparavant fier, arrogant, & vindicatif, lors on eust dict que c'estoit vn doux agnellet: & de ceste sorte de remede se sert Dieu bien souuent, pour guerir les maladies de nostre ame, nous enuoyant des afflictions du corps, comm' il fist à ce

soldat, lequel ayant fait vne bonne confession de ses pechez, recouura la santé spirituelle, & corporelle tout ensemble. Dieu voulant monstrier par là, pour quelle cause il luy auoit enuoyé la maladie. Estant guery le Pere le mene par la main à ses ennemis, afin qu'il leur demandast pardon, au moins à ceux qu'il auoit offencez. Or bien qu'il y en eust plusieurs, qui auoyent grand' enuie de se venger des torts qu'ils auoyent receus de luy; toutesfois comme ils le voyoient accompagné du Pere, ils n'eurent pas la hardiesse de luy nuire, ains s'accorderent d'un bon cœur, receuans en leur amitié celuy, duquel vn peu auparauant ils eussent voulu voir la mort.

Obstinacion d'un soldat, qui ne vouloit pardonner à ses ennemis.

Mais l'obstination d'un autre en semblable matiere eust vn' issue plus defastreuse. Il estoit non seulement aussi superbe, querelleux & vindicatif, que celuy duquel nous venons de parler: mais outre ce, il auoit cela de plus, que sa bouche maudite ne faisoit que debagouler vne infinité de blasphemies horribles, à tout propos. Il fut pareillement touché de la main vengeresse de Dieu, qui luy enuoya lors, que moins il y pensoit, vne griesue maladie, pour le faire recognoistre, & reuenir à soy. Le Pere Gaspar cuydant faire son profit de cett' aduersité s'en va le voir, afin d'essayer s'il le pourroit reconcilier premierement avec Dieu, par le moyen du saint Sacrement de Penitence, & puis avec son prochain. Mais ce miserable ne s'esmeust aucunement pour toutes les remonstrances, que le Pere luy sceust faire: ains se mist à crier comm' vn homme forcené, qu'on luy ostast de deuant cet homme (parlant du P. Gaspar) & qu'il ne le vouloit voir ny ouyr: & moins faire ce qu'il luy disoit: voire (ce qui est encor plus horrible) il protestoit, qu'il ne vouloit point entrer en Paradis, iusqu'à ce qu'il se seroit vengé de ses ennemis: & ne vouloit (chose detestable) que Dieu luy pardonnast ses pechez, si cela luy deuoit tant couster. Le Pere entendant ces parolles, comme s'il eust esté heraut de la diuine iustice: Hé! quoy (dict-il) en est-il ainsi? Or sçachez, qu'auant que trois iours passent, vous appellerez plusieurs fois le Confesseur, & il ne viendra pas, ayant dict cela, il se retire. Le lendemain auant que l'heure de midy fust venuë, ce pauvre homme fust surpris d'un tel symptome, qu'il se trouue aux abbois de la mort. Lors se voyant proche de l'heure, à laquelle il luy falloit aller comparoistre de-

uant Dieu, il se met à crier comm' vn homme effrayé, & pour-
suiuy d'vn autre, qu'on luy appellast le P. Gaspar pour l'ouyr de
confession: mais ny le P. Gaspar, ny aucun autre Prestre ne se
peust lors trouuer; tellement que ce miserable mourut ainsi sans
cōfession. Ce qui en estonna plusieurs, qui iugerent que c'estoit
vne punition de Dieu euidente.

Voicy vn autre cas dissemblable, quant aux succes, mais au-
tant remarquable que le precedent. Il y auoit en Ormuz vn
Gentilhomme Portugais de grand pouuoir & autorité, tant à
raison de sa charge, que pour sa grande noblesse, suiuant l'opi-
nion du monde, combien que deuant Dieu il fust de bas alloy,
parce que c'estoit vn homme d'vne vie fort desbordée, & de
tres-mauuais exemple: qui trauailloit merueilleusement ses sub-
iects, & les malinoit à guise d'vn Tyran: & pource estoit-il
mal voulu de tous. Le Pere l'aduisa en particulier souuentes-
fois, & luy donna de bons conseils: mais l'autre ne tenoit aucun
compte d'iceux; ains (ce qui est encore pis) soupçonant que
le Pere le tançoit publiquement en ses sermons, lors qu'il repre-
noit les vices en commun, il se declara ouuertement son enne-
my, faisant contre luy le pire qu'il pouuoit. Mais tous ces mau-
uais offices, ne refroidissoyent pas la charité du Pere, comme
au contraire les seruices, que le Pere luy faisoit, n'adoucissoyent
pas l'amertume de l'autre. Il importoit neantmoins pour le
bien public, que ce personnage reuint à soy. Le Pere cognois-
sant bien cela, resolut de conduire l'affaire par autre voye, que
des remonstrances, soit priuées, soit publiques. Il commen-
ce donc à faire des longues, & seruentes oraisons; à celle
fin qu'il pleust à Dieu esclairer cest' ame de sa diuine lumie-
re, & la conuertir à soy. Il se met aussi à faire tres-aspre peni-
tence pour la mesme intention, chastiant son corps avec disci-
plines, ieunes, & cilices plus que de coustume, passant
quelques fois les nuits entieres en prieres & oraisons: & of-
frant à Dieu souuent le saint sacrifice de la Messe. Cecy du-
ra huit ou neuf iours, au bout desquels, tandis que ce
Gentil-homme reposoit dans son liét, sur les deux heures
apres minuiét, il luy sembla voir deuant soy, le Pere Gas-
par tout resplandissant, mais avec vne lueur au visage, & aux
mains plus remarquable, qu'en tous les autres mēbres du corps.

*Moyens
pour ob-
tenir de
Dieu la
cōuersion
d'une
ame.*

*Belle vi-
sion.*

Outre ce il sentoît vne si bonne odeur, qu'il n'en auoit iamais experimenté de si agreable. Il voyoit pareillement à costé du Pere vn personnage de grande majesté (peut estre que c'estoit son bon Ange) lequel adressant à luy ses parolles : Que fais-tu (luy dict-il) miserable pecheur? Que trouues-tu de mal au P. Gaspar? ou que doubtes-tu de te fier en luy, & te mettre entre ses mains pour la guerison de ton ame? Ne vois-tu pas qu'elle grace & beauté Dieu luy a donnée? Le Gentilhomme, qui durant cette vision estoit en veille, comme luy mesme a confessé, voulut embrasser le Pere, esmeu de ce qu'il voyoit, & entendoit dire de luy: mais il disparut là dessus, dont luy fust fort marry. Or l'autre, qui s'estoit aussi apparu avec le Pere, demeura là, & dict au Gentilhomme, qu'il ne s'estonnast pas de ce que le Confesseur s'enfuyoit de luy, puis qu'il l'auoit fuy vn si long temps; mais qu'il estoit à ceste mesme heure à l'hospital, s'apprestant pour dire la Messe aux malades, & qu'on l'y trouueroit, s'il l'enuoyoit querir; à la poincte du iour. Soudain apres ceste vision disparut. Luy cependant passe le reste de la nuit en pleurs & gemissemens, qu'il tiroit du plus profond du cœur, pour la grande douleur qu'il auoit de ses pechez: & tout incontinent qu'il fust iour, il enuoye vn de ses seruiteurs à l'hospital, pour prier le Pere de le venir trouuer: tellement qu'auant la fin de la Messe, le seruiteur arriva à l'hospital, & feit le message que son maistre luy auoit enchargé. Le Pere s'y en va tout aussi tost: & cōme il entroit par la porte de la chambre, le penitent iette vn grand cry & fort lamentable, puis se prosterne à genoux deuant luy, avec telle douleur & repentance, qu'il y eust pour lors plus de contrition, que de confession. Mais peu de temps apres voulant faire vne reueuë generale de toute sa vie passée, il se retire durant quelques iours des affaires du monde, sans traicter avec autre personne qu'avec le P. Gaspar, & s'employa pendant iceux en la consideration de ses pechez, & à quelques autres meditations, que le Pere luy donna propres pour l'esmouuoir à vne vraye douleur & repentence d'iceux: d'où il sortit tellement changé, que les gens, qui l'auoyent veu auparavant, estoient tous esmerueillez de sa douceur, modestie, patience, & du zèle qu'il auoit de l'honneur de Dieu, & sur tout de sa charité enuers les pauures, ausquels il distribua dans peu de iours, la somme de cinq mil & tant d'escus.

*Admirable
change-
ment d'un
hōme de
marque.*

De quelques autres amours merueilleses, que le P. Gaspar fit en Ormuz, & comment Dieu punis vne troupe de soldats frondeux, qui n'auoient pas voulu suivre le conseil, qu'il leur donnoit, de se confesser auant qu'aller au siege de Alonajan.

CHAPITRE IIII.



PRES auoir raconté les victoires signalées, que le P. Gaspar Barzé obtint contre les principaux pechez, qui regnoient dans Ormuz; il reste maintenant à parler de quelques autres choses remarquables, qu'il y fist, lesquelles ne se peuuent pas commodément rapporter à ce que dessus. La premiere sera d'un certain personnage; qui souloit assister d'ordinaire aux sermons du Pere, jajoit que le Diable tint son ame enuelpée dās ses filets, il y auoit desia long temps. Et bien qu'il souhaitast sortir hors de ceste miserable seruitude, si est-ce qu'il n'osoit aller se confesser au P. Gaspar, iusqu'a ce que ledit Pere voulust s'en retourner en l'Inde, craignant la honte qu'il auroit, s'il venoit à le rencontrer, apres luy auoir deseouuert ses abominables pechés. Crainte que le Diable a de coustume de mettre en l'ame de plusieurs, afin de les tenir tousiours enlancez en ses reits, & les emporter quant & luy finalement es enfers: combien que ce soit vne crainte du tout vaine. Car tāt s'en faut que le Confesseur ait mauuaise opinion de ceux, qui luy deseouurent entierement leur ame, que de la plustost il les en estime d'auantage; pour grands pecheurs qu'ils soient, à raison de la victoire qu'ils ont gaignée sur eux mesmes en cela. Le Pere donc cognoissant bien la ruse de Sathan, & la honte de ce pauvre homme, le va accoster, & luy oste ces fantasmes de la teste: brief il sic en sorte que l'autre se resolut de jeter hors tout le venin de peché qu'il tenoit caché en son amē. Or comme il eut continué quelques iours à faire sa confession (car en ce subiect il estoit besöin de plus long temps, que de l'ordinaire) le matin, auquel il debuioit estre absous, pendant qu'il accomplissoit vne partie de la penitence, que le Pere luy auoit enjoincte, pour le disposer & pendant à vne vraye contrition; voyla qu'il luy semble voir entrer dans sa chambre, vne grande multitude d'animaux vilains, hy deux, & espouuantes. Il luy chöit

Crainte de confesser ses pechés pour cause de la honte vaine.

Prison espouuanteable des Diables.

aduis, qu'ils remplissoient quasi toute la chambre, & s'approchâs de luy, l'environnoient de tous costez, faisans semblât de le vouloir deuorer, ou mettre en pieces. Les cheueux se dressoient en teste au pauvre homme, il trembloit de tout le corps, & se sentant coupable d'une infinité de pechés, il pensoit que ce fussent des malins esprits, qui le vinssent querir, pour l'emporter tout vif en enfer. Estant en ces angoisses, il ne scauoit de quel costé se tourner: toutesfois se rassurant vn peu, il arrache vne image de nostre Sauueur, qui estoit attachée contre la paroy de la chambre: & l'embrassant estroictement avec les deux bras, se met à crier tant qu'il peut, inuoquant l'ayde diuin. Et aussi tost il luy semble que toute ceste troupe de phantômes sort de la chābre, avec vn tel bruiet & tintamarre, qu'on eust dict que la maison se debuoit abyssmer. Apres cela, le penitent sentit vne si grāde paix & tranquillité en son ame, qu'il luy sembloit estre comme en la gloire celeste. Il mena depuis vne vie tant exemplaire, que tout le monde n'en fut pas moins edifié, qu'il auoit esté scandalizé de la passée.

*Cōuersiō
remar-
quable
d'un pa-
cheur.*

Ces guerisons sont spirituelles, mais en voicy de corporelles. Vn ieun' enfant fils d'un Portugais demeurant à Ormuz auoit esté abandonné des Medecins, apres luy auoir appliqué plusieurs remedes, pour le guerir d'un vlcere, qu'il auoit à vn œil, accompagné d'une grosse fièvre. Desia la tumeur s'estoit creuée, & la matiere commençoit à se vuyder, de façon qu'on n'estimoit pas, qu'il y peut iamais voir de cest œil, ny eschapper la vie sauue. Le pere de l'enfant voyant qu'il n'y auoit aucun' esperance aux remedes humains pour la guerison de son fils, s'en va trouuer le P. Gaspar, & le prie instamment de vouloir dire vne Messe de nostre Dame pour la santé d'iceluy. Le Pere luy promet de ce faire, & au plustost accomplit sa promesse. Le mesme iour comme il acheuoit d'offrir ce diuin sacrifice, le malade reçut entiere guerison, se trouuant non seulement libre de sa fièvre, mais, ce qui est encore plus admirable, avec la veüe aussi entiere, que deuant sa maladie. Car au mesme temps tomberent de l'œil mal affecté, quelques grosses escailles; tellement qu'il resta aussi beau, & aussi clair que l'autre. Le pere de l'enfant quasi hors de soy, pour la ioye incroyable, qu'il reçut d'une si merueilleuse guerison, fit soudain appeller le P. Gaspar, & luy monstre son fils deliuré de l'une & de l'autre maladie, le remerciant infiniment,

*Guerisō
miracu-
leuse
d'un en-
fant.*

d'auoir rendu la vie & la veuë à son fils. Le Pere luy repart, avec vn visage graue & modeste, que c'estoit à Dieu & aux prieres de la benoïste Vierge, à l'honneur de laquelle il auoit dit la Messe, que les graces deuoient estre rendues. Despuis le pere & l'enfant estans venus en Portugal, ont raconté le faict ainsi qu'a esté dit au P. François Gouca, par le moyen duquel nous l'auons sçeu. Il n'y eut pas moins de merueille au recouurement de la vie & santé d'un autre grand amy du Pere, pour lequel aussi il dit la Messe, lors qu'on pensoit qu'il s'en alloit mourir tout à faict; mais incontinent qu'elle fut paracheuée, le malade se trouua du tout guery. Il y auoit pareillement vne bonne Dame, qui estoit fort tourmentée du malin esprit: car il l'espouuentoit avec des visions horribles, & l'affligeoit de telle sorte, qu'elle en vint quasi à l'article de la mort. Son mary ne trouuant à son mal aucun remede humain, se va adresser au Pere: & le prie humblement de venir à sa maison, pour dire le saint Euangile sur la malade: mais c'estoit à vn temps que le Pere n'y pouuoit aller, à cause des grandes occupations, qu'il auoit pour lors: toutesfois afin de contenter cest honneste homme, il escriuit sur vn peu de papier quelques parolles prinſes de l'Euangile de S. Iean, avec lesquelles l'Eglise conclud d'ordinaire le saint Sacrifice de la Messe, & dict au mary de ceste femme, qu'il luy mit ce papier dessus. Car s'ils auoient telle foy, qu'il falloit, il esperoit que Dieu la deliureroit de ces phantomes, & luy rendroit la santé. L'autre executa soigneusement, ce que le Pere luy auoit ordonné; aussi l'effect s'en ensuyuit tel qu'il desiroit. Car si tost que le papier ou estoient escrites ces diuines parolles, fut pendu au col de la patiente, le Diable disparust, & elle se trouua aussi saine, & avec les mesmes forces, qu'elle auoit auant cest'affliction. Le bruiet qui couroit par la ville d'Ormuz, de telles & semblables guerisons, & autres merueilles, que Dieu faisoit par le moyen du P. Gaspar, accreut de telle sorte l'opinion & l'estime, qu'on auoit de luy, que plusieurs le reueroient & l'honnoient comme vn Saint. Ce qui estoit cause qu'il estoit tant suiuy, non seulement en ses predications, mais aussi lors qu'il faisoit la doctrine Chrestienne, par les places ou carrefours de la ville. Quelques ieunes hommes espris de l'amour de la vertu, & desirieux de luyure la façon de viure du Pere, se vindrent joindre à luy, prests à l'accompagner iusques aux plus barbares nations du monde, pour leur annoncer l'Euan-

*Autre
d'un a-
my du
P. Gas-
par.*

*Vne fé-
me deli-
urée des
visions du
Diable
par les
parolles
du S. E-
uangile.*

*Le Pere
Gaspar
acquiert
grâces
dit par
ses au-
nres.*

*Il as-
siste
ble des
compa-
gnons.*

gile de **IRVVY-CHRIST**: & si besoing estoit, esandre leur sang pour la deffence d'iceluy. Or parce que la conuersion de quelques vns de ceux-cy a esté fort remarquable, nous en toucherons quelque chose, comm'en passant. L'un d'iceux iouant vn iour en la place publique avec quelques autres, comme le ieu ne luy disoit pas, selon qu'il cust desiré, il se met à renier & blasphemer le nom de Dieu, avec vn grand scandale de ceux, qui estoient presents. Le P. Gaspar se rencontrant là par cas fortuit, le rançe de son peché: l'autre r'entre incontinent en foy mesme, & se iette aux pieds du Pere, le suppliant avec beaucoup de larmes, de le vouloir admettre en sa compagnie: car il estoit resolu de quitter le monde, & ensuyure sa façon & manière de viure. Son changemēt ne fut pas fait à la legete, comm' auoit esté sa fureur, car des cest' heure là il mena vne fort sainte vie. Vn autre, apres auoir ouy vn sermon de la Croix de nostre Seigneur, s'en va ietter aux pieds du Pere, deuant tout le monde, le priant avec grande instance, & abondance de larmes, de le vouloir mener avec foy parmy les Infidelles, afin qu'il peut esandre son sang, pour l'amour de nostre Seigneur; ou bien s'il n'y pouuoit aller, de l'enuoyer à luy en Perse, avec vne Croix sur les espaules, pour prescher aux Persans la foy Chrestienne, & l'adoration de la Croix; afin que s'ils ne le vouloient croire, ains luy dōner la mort, il peut mourir en Croix, à l'exemple de son Sauueur. La perseuerance encore de cestuy-cy en la vertu, monstra que sa ferueur n'auoit pas esté fondée sur le sable. Mais il en y eut vn autre, qui deuant ça tous ceux-cy: car en sortant d'ouyr le sermon du Pere, il se depouilla en la place publique de ses riches accoustremens, & les donna à vn pauvre: puis distribuant tout ce qu'il auoit des biens de ce monde, il resta sans logis, sans accoustremēs, & sans moyens de maniere qu'il se nourrissoit seulement des aumosnes qu'il demandoit pour l'amour de Dieu. La nuit il s'en alloit coucher au pied d'vne Croix, & employoit quasi tout le iour au service des pauvres malades en l'hospital. Et bien que faisant telles choses, il fut estimé fol de plusieurs, & tenu communément pour vn homme de foible cerueau: toutesfois il estoit (comme escriit le P. Gaspar) vn homme de bon iugement, & remply de vraye sagesse, illuminé d'en haut, & appelé par vne grace speciale de Dieu, à tres-grande perfection. Cestuy-cy vint encore se ioindre au Pere, avec le mesme desir que les autres, dont a esté parlé.

*Commen-
sion re-
marqua-
ble d'un
ioueur &
blasphé-
mateur.*

*Remarquer
notable
d'un ieun-
n'homme.*

Brief il assembla de ceste sorte vne douzaine de ieunes hommes, seruens & courageux. Lesquels, bien qu'ils ne fussent pas reçeus pour Nouices de la Compagnie de Iesvs, viuoyent neantmoins comme s'ils l'eussent esté : car ils s'occupoyent chascun iour quelques heures durant en la meditation des choses diuines & celestes: ils faisoient leurs examens de conscience; s'addoñoient à la mortification de leurs passions, au seruice des pauues malades de l'hospital, & des prisonniers : frequentoient les Sacrements de la Confession & Communion de huiët en huiët iours, & par tels & autres semblables exercices de pieté, non seulement ils s'eschauffoyent eux mesmes en leurs saincts desirs : mais aussi enflammoient de telle sorte en deuotion les habitans d'Ormuz, *Enflamment en deuotion la ville d'Ormuz* qu'on ne voyoit que processions, tantost des petits enfans, qui alloient de iour & de nuict, chantans par les rues la doctrine Chrestienne, tantost des hommes faictz, qui alloient visitans les Eglises, & chantans les Litanies: plusieurs en habit de penitent, marchoyent de dix en dix, se disciplinās eux mesmes avec grande rigueur, les vns par la ville, les autres par les champs. Il en y auoit qui passoyent tout exprés par les rues des Sarrazins, ou pour les esmouuoir à penitence, ou pour endurer d'eux quelque affront. Mais tant s'en faut qu'ils leur feissent aucun tort ou iniure, que plustost ravis d'admiration de voir vne chose si nouuelle, ils les accompagnoient par honneur, & les suiuyent comme les Chrestiens ont accoustumé de faire par deuotion. Or estant toute la ville, ainsi qu'auons dict, embrasée en vne saincte ferveur, voicy arriuer deux cens soldats, que le Gouverneur de l'Inde Garcia de Sâ enuoyoit à Ormuz, pour certaine entrepryse, *Change-ment soudain de la ville en mal.* qu'il auoit proiectée. Ceux-cy n'ayans rien veu de ce qui auoit esté faict en Ormuz, suiuyent le mesme train & dissolution que deuant: de sorte qu'avec leur mauvais exemple ils renuerserent en un moment sans dessus dessous, presque tout ce que le Pere y auoit secu faire depuis son arriuée, comme si ç'eust esté un esquadron infernal, qui fust venu de renfort à Sathan, pour se maintenir encore dans la forteresse. Car, si tost qu'ils furent arriuez, ils commencent avec quelques autres, qui auoyent hyuerné la mesme, à remoueller les querelles, les desfis, les ieux, & consequemment les blasphemés, & renicmens. Le vice de la chair reprend la vogue, l'vsure se remet en pied; brief tous les pechez, *Les pechez se remettent en vogue:* qui sembloient auoir esté fanez ou sechez, reuerdisseient : & au

*Remon-
strances
du Pere
Gaspar.*

Gal. 3.

*Sermon
du vray
amour
du pro-
chain.*

Pf. 82.

contraire les processions, le concours aux Eglises, & aux sermons, la frequentation des Sacrements, & autres œuures de pieté, viennent en decadence. Le Pere extremement marry de voir, que le diable retournoit vn' autresfois prendre possession des tours & bouleuards, dont il l'auoit chassé, recommence de nouveau la batterie, & quelquesfois il exhortoit ses auditeurs à perseuerer en la vertu, leur remonstrant le grand danger qu'il y auoit, que le diable reprenant son ancienne demeure n'admenast quant & soy sept autres esprits malins, plus meschans que luy, & que par ce moyen leur recheute ne fust plus dange-reuse. D'autres il les tançoit & reprenoit aigrement (comme l'Apostre saint Paul faisoit à l'endroiçt des Galates) de ce qu'ils se laissoient enforceler & piper ainsi au diable, & à ses complices; & toumoyent si tost le dos à nostre Seigneur. Mais voyant que cela ne profitoit pas beaucoup, & que tout ce qu'il auoit rebasty en vne sepmaine, estoit dans vn iour mis par terre, par les membres de Sathan, il redoubla ses penitences & oraisons, faisant faire le mesme à ses disciples. Il se voulust aussi seruir de l'ayde du Gouverneur de la forteresse, le priant de vouloir faire loger hors de la ville ces scandaleux & meschans soldats. Mais il n'aduança rien en cela, pour crainte qu'on auoit qu'il ne s'en ensuiuit quelque plus grand mal. En fin il s'aduisé, pour dernier remede de faire vn sermon du vray amour & charité, que nous deuons porter à nos prochains, monstrant en quoy consiste cet amour, qui est principalement & en premier lieu, pour leur desirer & procurer le salut de leur ame, concluant qu'il estoit loisible de souhaitter & demander à Dieu, qu'il enuoyast des afflictions & calamitez à nos prochains, si cela estoit expedient pour le salut de leur ame, & prouua cecy avec beaucoup d'exemples & d'autoritez prises de l'escriture sainte, & des Docteurs. Là dessus il entre en vne ferueur extraordinaire, & parlant avec nostre Seigneur, repetoit souuent ces parolles du Psalmiste. *Imple facies eorum ignominia, vt quarant nomen tuum:* Emplissez leur face de confusion & de honte, à celle fin qu'ils cherchent vostre nom, priant Dieu avec grande abondance de larmes, qu'il voulut auoir pitié de tant d'ames, qui se perdoient si obstinément, & mesme de ceux qui estoient cause de la perte des autres, ne tenans compte des remonstrances qu'on leur faisoit, & qu'il voulut mettre la main à la lancette, les piequant à l'endroiçt, ou il leur cuiroit dauantage, fust-ce à l'hon-

neur, ou aux richesses, ou à la vie mesme, si c'estoit à la plus grande gloire, & pour leur bien. Ses auditeurs estoient tous esbahis entendans ces choses, & beaucoup plus lors qu'à la fin du sermon le Pere pria le peuple de dire trois fois le *Pater noster*, & l'*Aue Maria*, afin qu'il pleust à Dieu enuoyer ces punitions, ou quelques autres maux temporels à ceux qui en auroient de besoin pour le salut de leurs ames. Ces oraisons & prieres ne furent pas faictes en vain: car bien tost apres on vid venir du ciel la despesche d'icelles, au grand estonnement de toute la ville. Mais pour entendre mieux la chose, il faut sçauoir qu'il y auoit vne forteresse de grande importance en la terre ferme de Perse, appartenant au Roy d'Ormuz, appelée Monajan, laquelle auoit esté vn peu au parauant liurée à l'ennemy, par ceux qui estoient dedas en garnison. Ceste perte tât plus inopinée qu'elle fust, tant plus aussi apporta-elle d'ennuy & de fâcherie au Roy, & à tous ses alliez. Pour recouurer ladite place, il fist assembler des forces, & mist soudain en campagne cinq mil soldats Persans. On luy bailla aussi, suiuant le pacte d'alliance faicte entre le Roy de Portugal & luy, quatre cens Portugais, esquels entroyent ces deux cens freschement venus de l'Inde. Leur Capitaine estoit vn fort honnestes Gentil-homme nommé Pantaleon de Sâ, frere, ou parent de celuy qui estoit lors Gouverneur des Indes, appelé Garcia de Sâ: cettuy-cy auant que partir alla trouuer le Pere Gaspar, pour prendre congé de luy, & receuoir (comm' il disoit) sa benediction. Le Pere l'ayant accueilly avec l'honneur qu'il meritoit, luy dist auant de se despartir, qu'il se craignoit, que Dieu ne chastiait ses gens, pour tant de pechez qu'ils commettoient, & pour le peu de soing qu'ils auoyent du salut de leur ame: D'autant qu'ils ne s'estoyent voulu confesser auant d'aller à ceste expedition, bien qu'ils en eussent esté semonds de luy, & fussent obligez à ce faire: puis que, probablement parlant, il leur faudroit combattre, & partant s'exposer au peril de la mort; auant lequel tout Chrestien, qui se sent coupable de quelque peché mortel, est obligé de se reconcilier à Dieu par le Sacrement de Penitence en ayant le moyen. Or de tous ces 400: à grand' peine en auoit-il peu gaigner 20. tous les autres, ou s'en-estoyent moquez, ou n'en auoyent tenu aucun cōpte; Aussi la vengeance diuine ne tarda pas lōg temps à tomber sur leurs testes. Car apres auoir mis le siege deuant ladite forteresse, & l'auoir battuë l'espace de plusieurs iours, voulās dōner l'assaut ils furent bien repoussez, si qu'ils s'en

*Monajâ
forteres-
se du Roy
d'Ormuz
prise.*

*Les Por-
tugais y
vūt pour
la reprê-
dre.*

*Letargie
quelle
maladie
c'est.*

*Retour-
nent à
Ormuz.*

*Deman-
dent se
confesser
au Pere
Gaspar.*

retournerent plus viste que le pas. Quelques vns y moururent sur la place. Il y en eust cent de blesez, & les autres furent contraincts de se retirer à leur courte honte: mais ce ne fust pas tout. D'autant qu'apres cela il se fourra parmy eux vne certaine maladie qu'on appelle Letargie, qui laisse le patient sans memoire du passé, & engendre vn grand endormissement & assoupissement de tous les sens. Quelques quarante cinq Portugais moururent de ceste letargie: mais le plus deplorable estoit, que les malades gisoient parmy les champs, comme des fouches ou trôcs de bois, sans ayde ny secours d'aucun, & mesme sans auoir personne, qui se souciait de faire enseuelir les morts: car chascun auoit l'œil tant seulement à soy-mesme, & laissoit ses compagnons estendus sur la place, comme s'ils fussent esté des bestes. Ceux qui estoient restez, voyans vne telle despesche de leurs compagnons, & craignans eux aussi le mesme, plient vistemment bagage, & s'en retournent, comme ils peuuent, à Ormuz bien humiliez, n'ayans autre chose en la bouche, ny en la pensée, que la confession de leurs pechez, laquelle si tost qu'ils furent arriuez, ils demanderent de faire au P. Gaspar. Il se trouua au port lors qu'ils y arriuerent, & les y attendoit avec ses disciples, & autres deuotes personnes, afin de porter les malades à l'hospital. Ce qu'ils feirent avec grande charité & compassion: mais non contents de ce, ils s'en allerent par la ville leur chercher des medicamens, & des aumosnes pour remedier à leurs necessitez. Le Pere Gaspar s'employa principalement à ayder, par le moyen des Sacremens, les ames. On faict venir tous les Prestres, qu'il y auoit en la ville, pour entendre leur confession: car il y auoit beaucoup de malades, mais aucun d'iceux ne voulut descouurir les playes de son ame à autre qu'au P. Gaspar, de façon qu'il ne se scauoit de quel costé se tourner: parce qu'en ayant vn entre les bras qui rendoit l'ame, l'autre croioit qu'il s'en alloit mourir sans confession, s'il ne venoit vistemment l'entendre: si qu'il estoit quelquefois contrainct d'ouyr en mesme temps la confession de l'un, & exhorter l'autre, qui s'en alloit mourir. Il les aduisa biē plusieurs fois qu'en l'article de la mort, tout Prestre a esgal pouuoir, & qu'ils estoient obligez en tel poinct, de ne se mettre pas en danger de mourir sans confession, pour contenter leur indifferere deuotion. Mais il n'aduança rien pour cela; fust-ee ou par vne iuste punition de Dieu, ou par la ruse & astuce de Sathan; si qu'il y en eust quel-

ques

ques vns, qui pour ceste cause, moururent sans confession. Ce qui luy causa vne grande douleur & tristesse. L'un d'iceux estant tombé en frenesie, se leua du liect, print son espée, & se la vouloit planter dans l'estomach : mais on la luy arracha des mains. Apres cela il se iette avec grande furie sur le Pere, le prend par le gosier, & l'estraignoit desia si fort; que si on ne fut venu bien tost le luy tirer des mains, il l'alloit estrangler. Mais on y accourut vistemēt: & aussi tost que le frenetique eut lasché prise, il rendit l'ame. Plusieurs estimerent que ç'auoit esté par l'instinct de ce loup infernal, lequel extremement fasché de ce que le Pere luy ostoit des griffes tāt d'ouailles de nostre Seigneur, taschoit, par le moyē de ce frenetique, luy oster la vie. Mais pour cela il ne desista pas de trauailler comm' auparauant, pour luy en arracher d'auantage; si bien que l'espace d'un mois, il ne reposoit presque ny nuit ny jour, estant tousiours occupé avec les malades, pour ouyr leur confession, ou les ayder à bien mourir.

*Fureur
Diabolique d'un
frenetique contre le
Pere.*

Pendant ce temps là, comm' ils'employoit ainsi pour le salut des ames, il receut de nostre Seigneur des consolations si grādes, qu'il ne sentoit point quasi le trauail. Il pleust aussi à Dieu témoigner par œuures miraculeuses, la force & l'efficace du Sacrement de penitence. Car il aduint à plusieurs, qu'estans à l'article de la mort, ils se leuerent sains & gaillards, si tost qu'ils eurent fait leur confession. A raison de ces choses les Chrestiens d'Ormuz furent tres-bien edifiez : & ce Sacrement fut parmy eux en plus grand' estime que deuant. La deuotion aussi se remit en vogue, voire avec plus de ferueur qu' auparauant. Seulement restoit ils affligez de la perte de Monajan, & du mauuais succès de ceste guerre. Le Pere voyant bien que ce defastre n'estoit aduenu, que pour chastier les pechés de ces scandaleux, & de quelques autres encore, estima qu'il y falloit proceder, non tant par armes, que par prieres & penitences; afin d'appaiser l'ire de Dieu. A ceste cause il exhorta les Chrestiens, de faire des processions à vne Chapelle de nostre Dame, qui est à cinq cens pas de la ville. Le Clergé y alla, suiuy de beaucoup de gens, la plus-part pieds nuds, & plusieurs encore se disciplinans iusques au sang, tous en fin crians à Dieu misericorde, avec vne voix lamentable. Leurs oraisons & penitences ne furent pas sans effect; car peu de tēps apres la nouuelle vint, que Monajan estoit rendu, non par force d'armes, mais par composition. Dieu ayant tellement disposé les

*Miracles de
la confession.*

*Monajan
est rédu.*

volontés de ceux, qui la tenoient, qu'ils la rendirēt avec des conditions fort aduantageuses pour le Roy d'Ormuz. Ceste nouuelle autant heureuse qu'inopinée, acquit vn grand credit au Pere Gaspar; car on estimoit, qu'un si bon succès se debuoit, apres Dieu, rapporter à ses bonnes remonstrances, & aux prieres qu'il auoit faict faire; tellement qu'on conçeut plus grande opinion que iamais, de sa sainteté & vertu.

Ce que le P. Gaspar fit, tant pour la reduction des Schismatiques ou Heretiques, que pour la conuersion des Iuifs, & Sarrazins d'Ormuz.

CHAPITRE V.

*Force
Schisma-
tiques &
Hereti-
ques re-
duits.*



ANDIS que le P. Gaspar s'employoit (comm' à esté dit) à l'ayde spirituel des Portugais, & autres Catholiques, qui estoient dans Ormuz, il ne laissoit pas pourtant de traualier à la reduction des Schismatiques ou Heretiques, qui demeuroient en ladiète vil-

le, ou y venoient trafiquer: plusieurs desquels esmeus de ce qu'ils auoient veu s'estre passé, conçurent vne si grande opinion de sa vertu & doctrine, qu'ils se mirent du tout entre ses mains, pour estre instruits en la vraye foy, & reconciliez avec l'Eglise leur mere. Ainsi gaigna-il plusieurs Abyssins, Armeniens, Georgiens, Moscouites, Polonois, Hongres, Allemans, & autres, que la conuoitise des biens terriens, ou le desespoir auoit ietté parmy les Turcs & Sarrazins. Il en y eut vn entre autres, lequel minuant sa retraicte avec le Pere, fut descouuert & martyrizé par les Turcs.

*Conuer-
sion d'un
yeun'hō-
me Alle-
mā qui
s'estoit
fait
Turc.*

Et d'autant que la chose est fort norable, & digne d'estre sçeuë, ie la raconteray icy vn peu au long. C'estoit donc vn ieun' homme natif de la ville de Cologne en Allemagne, nommé Iean: son pere auoit assés biē de quoy pour l'esleuer, & entretenir; mais le ieun'hōme fut contraint de s'esloigner d'aupres de luy, pour certains accidens, qui luy suruindrēt; & s'en alla courir par le monde. Il y auoit desia dix ans, qu'il seruoit de maistre fondeur d'artillerie, & faisoit la poudre à canō en vne forteresse, que les Turcs ont sur le bord du golfe Persique, du costé de l'Arabie heureuse, nommée Catifa, vis à vis de l'Isle Baharen, là ou on pèche les plus fines perles du monde, qui est cent & dix lieuës loing d'Ormuz, plus au dedans du golfe. Le pire estoit qu'il s'estoit faict

circoncire, & se portoit en tout & par tout comme Sarrazin. Or
 estât le bruiet des choses grandes & merueilleuses, que le P. Gas-
 par faisoit en Ormuz, venu à ses oreilles, Dieu luy toucha le
 cœur si viuement, qu'il print resolution de retourner au gyron
 de l'Eglise. Mais d'autant que l'affaire estoit fort dangereux, &
 qu'il ne le pouuoit traicter par le moyen d'un tiers, il se seruit de
 sa poudre à canon, destrempee avec de l'eau au lieu d'ancre, pour
 escrire au Pere vne lettre; laquelle il dressa en trois langues, c'est
 à sçauoir en Latin, en François, & en Flamand, ne sçachant pas
 que le Pere les entendist toutes trois. Le subiect de la missiue
 estoit, qu'il desiroit extremement se retirer à Ormuz, pourueu
 que le Pere luy obtint vn sauf-conduit des Portugais, & l'asseu-
 rant qu'il auroit chés eux la vie sauue, & nō pour autre occasion,
 que pour se reconcilier avec Dieu, & r'entrer en son Eglise, pour
 le salut de son ame, resolu de faire tres-griefue penitence de ses
 pechés, & ne seruir plus à autre maistre, qu'à IESVS-CHRIST,
 son vray Sauueur & Seigneur. Le Pere ioyeux au possible d'une
 si bonne nouuelle luy rescriuit, qu'il s'en vint hardiment à Or-
 muz: car sa venue luy seroit tres-agreable, & aux Portugais aussi.
 Ceste responce fut surprise par le Capitaine de Catifa, l'on ne
 sçait si par la trahison de celuy qui la portoit, ou par quelque au-
 tre accident. Le Capitaine cognoissant par ceste lettre, ce que
 ledit Iean pratiquoit, le mande venir deuant soy, & l'interroge
 en qu'elle loy il viuoit, si en celle des Chrestiens, ou des Maho-
 metains; l'autre respond franchement, & avec grande constance,
 qu'il estoit Chrestien, & tout prest d'endurer pour la foy de I-
 ESVS-CHRIST, toute sorte de tourmens: adioustant qu'il n'estoit
 tant marry d'aucune chose, que d'auoir feint par le passé d'estre
 Mahometain. Les Turcs & Sarrazins, qui estoient presens, enra-
 geoient de cholere, luy entendant dire ces choses; tellement
 qu'ils ne se peurent tenir, que soudain ils ne se ruaient sur luy,
 & le missent en pieces à l'heure mesme. Voyla comment il mou-
 rut pour la confession de la foy de N. Seigneur. On luy couppa la
 teste apres qu'il fut mort, laquelle fut attachée au bout d'une
 lance, & posée sur le mur de la forteresse. Mais la diuine justice
 ne tarda pas longuement à prendre vengeance de la cruauté, que
 ces barbares Turcs auoient executé sur ce sien martyr, n'y a ren-
 dre à iceluy l'honneur, qui luy appartenoit. Car peu de temps
 apres, arriua vne grosse flotte de Portugais à la ville d'Ormuz, de

*Escrit au
P. Gas-
par pour
se remet-
tre à l'E-
glise.*

*La res-
ponce sur-
prise par
les Turcs*

*Est mar-
tyrisé.*

*Flotte de
deux mil
le sol-
dats Por-
tugais.*

laquelle estoit Admiral Antoine de Norogna, menant quant & soy deux mille soldats. Il estoit venu là, pour empêcher les courses des Turcs, & pour ruiner & destruire autant de lieux, qu'il trouueroit sur le riuage du golfe Persique, du costé d'Arabie, ou les Turcs s'estoient fortifiés. Si tost donc, que ladicte flotte eut abordé à l'Isle d'Ormuz, ils resolurent d'aller attaquer & ruiner la forteresse de Catifa, sans qu'ils sceussent rien de ce qui estoit arriué, touchant le martyre de Iean. Mais auant que partir, tous les soldats se voulurent confesser au P. Gaspar : car aussi tous les autres Prestres estoient en ce temps là malades : de façon que ce fut vn tres-grand trauail pour luy. Mais le singulier contentement qu'il receuoit en ces œuures de pieté, adoucissoit sa peine. Apres donc que les soldats eurent mis en bon estat leurs consciences, ils partent avec vn grâd courage, deliberez d'attaquer au plustost l'ennemy ; de maniere qu'ils arriuerent en brier à l'Isle de Baharen, d'ou soudain ils se vont ietter sur la coste d'Arabie, tout ioignant la ville de Catifa ; & estans sautés à terre, ils assaillent la

*Prendent
la ville
de Catifa, ou au-
noit esté
martyrisé ce ie-
u à l'homme.*

ville, la prennent, & la saccagent dans vn rien. Ils trouuerent entre autres choses au sac de la forteresse, dans l'escritoire du Capitaine, la lettre, que le P. Gaspar auoit escrite au martyr Iean, en response de la sienne, & cogneurent, tant par la lecture d'icelle, que par la relation de ceux, qu'ils prindrent prisonniers, comme il auoit esté martyrisé, selon qu'a esté dit cy dessus ; & à ceste occasion ils offerent la teste du Martyr du lieu, ou les Turcs l'auoient attachée, & l'emporterent avec grand honneur à Ormuz : ou le P. Gaspar la reçut avec tout le Clergé, & vne belle assemblée de gens, comme il appartenoit à vne relique si precieuse, chantans des hymnes & cantiques à l'honneur de Dieu, qui couronne ses Martyrs avec tant de gloire au ciel, & les honnore avec tant de magnificence sur terre. Voyla quant au martyr de ce ieune homme Allemand, & ce que le P. Gaspar feit, pour la reduction des desuoyés. Voyons maintenant, comme il s'employa pour convertir à la foy ceux, qui ne l'auoient encore iamais reçeue, & nommément les Iuifs & Sarrazins. Pour le regard des premiers, bien qu'il sceust ceste nation estre si fort obstinée en son ateu- glement, qu'a grand' peine est il possible d'en guigner quelqu'un, il tascha neantmoins de les ayder de tout son pouuoir. Et auant toute autre chose, il procura de se les rédre amis, & les affectionner à foy par beaucoup de bōs offices, qu'il leur faisoit, tellement

*Trouuent
la teste
d'iceluy,
& l'em-
portent à
Ormuz
avec tri-
omphe.*

*Ce que le
P. Gas-
par feit
pour la
conuersi-
on des Iuifs
d'Or-
muz.*

qu'esmés de ceste ardente charité qu'ils voyoient en luy, ils luy monstroyent aussi reciproquement plusieurs signes d'amour & de bien ueillance: si qu'ils le menoyent en leurs synagogues & assemblées, ou il leur preschoit tous les Samedys, leur prouuant par l'escriture sainte, que le Messie qu'ils attendent encore, estoit desia venu, & que c'estoit IESVS fils de la Vierge Marie, qui par son sang auoit racheté le monde. Il taschoit avec toutes ses forces, de leur persuader qu'ils le recogneussent, puis qu'en luy se trouuoient toutes les marques que les Prophetes auoyent predict du Messie. Or il les pressa tant, qu'en fin ils condescendirent à ce poinct là, que de vouloir vuyder le different par vne dispute, que le Pere entreprit contre deux grands Rabbins qu'ils auoyent là; L'un d'iceux estoit appelé Salomon, Espagnol de nation, & l'autre Ioseph, tous deux fort entendus es reserics & fables de leur Talmud. Ils traicterent principalement de deux poinets, à sçauoir si le temps de la venue du Messie, selon les Prophetes de Daniel, de Iacob, & de plusieurs autres, estoit arriué; là où apres que le Pere leur eust clairement monstre qu'il estoit passé; ils vindrent au second, qui fust s'il y auoit eu aucun autre depuis ce temps-là, auquel on peust donner à bon droit le tiltre de Messie, qu'à IESVS-CHRIST. Le Pere leur prouua, qu'il n'en y pouuoit auoir d'autre: & ce si clairement, que les Rabbins se voyans conuaincus, n'eurent autre chose que respondre, sinon qu'ils n'estoyent pas si bien versez aux saintes lettres, que le Pere. Voulans par là donner à entendre, que la victoire qu'il auoit emportée sur eux, deuoit estre rapportée plustost à sa doctrine, qu'à la verité: mais ils disoyent cela, ne trouuans autre eschappatoire, & couuerture de leur malice. Au demeurant tous ceux qui assisterent à ceste dispute, tant Chresttiens que Sarrafins, cogneurent bien la fausseté de ceste secte, & qu'elle ne pouuoit estre soustenuë que par opiniastrise. Apres ce, comme le Pere les pressast, ou de quitter leur erreur, ou de luy monstre sur quoy ils doubtoient, ils luy proposoyent quelques auditorices de l'escriture, mais si tost qu'ils auoyent mis en auant quelque passage d'un Prophete, il leur expliquoit non seulement ce lieu là, mais aussi tout le reste du chapitre, avec grande facilité & clarté. Finalement apres auoir esté si souvent battus, qu'ils en estoyent las, & en auoyent honte, ils vindrent à confesser, que la loy de IESVS-CHRIST estoit la vraye: mais qu'ils ne la rece-

*Conuain-
quist 2.
de leurs
Rabbins
en vne
dispute..*

*Opinia-
stris des
Iuifs..*

uroyent point, parce qu'on les obligeroit à quitter les vsures, & restituer tout ce qu'ils auoyent acquis par ce moyen; aymans mieux croupir en leur auenglement & infidelité, pour retenir les biens de la terre iniquement possédez, que sortir des tenebres d'erreur, & iouyr de la lumiere de verité: afin de gagner les biens celestes & eternels. Et ce seul respect (dict le Rabbin Ioseph) retient au Iudaïsme vn' infinité de gens, qui cognoissent bien la fausseté de cette secte: mais ne veulent la quitter pour la cause susdite. C'est pourquoy le Pere ne fist pas grand fruit enuers ceste maudite nation, pour estre tant attachée aux biens de ce monde. Voyons ce qu'il aduança avec les Sarrafins, ausquels il preschoit chascun Vendredy de la sepmaine: car c'est le iour qu'ils solemnisent, & font en iceluy leurs assemblées. Or il y auoit dans Ormuz vn grand nombre d'Arabes, Mores, Turcs, Perses, & d'autres nations, qui suyuent le faux Prophete Mahomet, desquels neantmoins le Pere Gaspar estoit parlant en general fort honoré & respecté. Il auoit acquis tant de reputation & estime principalement à cause du mespris des biens terriens, & de la pauureté volontaire, qu'ils voyoyent en luy: car pouuant, comm' ils iugeoyent, acquerir beaucoup de moyens par sa doctrine, & l'autorité qu'il auoit parmy les Portugais, ils le voyoiēt neantmoins porter d'ordinaire vne robbe rappiccée, & viure tousiours à l'hospital en grande pauureté. Il gagna encore beaucoup de credit enuers eux pour la debonnaireté, & affabilité qu'il monstroït à tous ceux qui l'accostoyent. Mais ce qui affectionna plus les Sarrafins enuers luy, fust d'auoir faict venir le scrupule de conscience aux Chrestiens, de restituer ce qu'ils auoyent acquis par les vsures, & autres contractz iniques. Car plusieurs desdits Sarrafins estoient souuent participans de ces restitutions, & pource ils ne cessoyent de louer sa vertu & doctrine. Finalement les œuures merueilleuses, & les conuersions & guerisons du tout furnaturelles, qu'ils voyoiēt deuant leurs yeux, luy acquerirent vne si grande reputation auprès des Sarrafins, qu'ils l'appelloyent communément le grand Caçiz, c'est à dire, le grand Prestre des Chrestiens, ou bien le grand Baptiste fils de Zacharie, fust-ce ou pour parangonner son zele & sa ferueur, avec celle de saint Iean, ou bien parce que peut estre ils croyoyent, que l'ame de saint Iean Baptiste, (suyuant l'opinion fabuleuse qu'ils tiennent du transport des ames, comme jadis les Pytha-

Les Sarrafins ont grande opinion du P. Gaspar.

L'appellent le grand Baptiste, et pourquoy.

riciens) eust passé au corps du Pere Gaspar. Quoy qu'il en soit, ils luy bailloyent ce nom : & en consequence de ce, luy faisoient des faueurs les plus signalées, & inusitées, qu'ils ayent (peut estre) iamais faict à aucun Chrestien. Car ils le menoyent sur la minuiet, à cause des chaleurs excessiues du iour, au plus grand & plus magnifique temple de Mahomet, appellé Coran, ou Alcoran : ce qui signifie en langage Arabique vne chose sacrée, & pource appellent-ils leur Loy Alcoran, & donnoient à ce temple le mesme nom ; parce que c'estoit le plus saint & sacré à leur iugement, qu'ils eussent en tous ces quartiers. Or il n'estoit pas permis à aucun Chrestien, ny à autre qui ne fust de leur secte, dy mettre le pied dedans : & si quelqu'un eust esté si osé que d'y entrer, il ne luy en alloit pas moins que de la vie. Mais ils voulurent faire cette faueur au Pere, que de le mener dans ledit temple, voire de le faire monter au sommet d'iceluy, accompagné de leurs principaux Caziques, & des plus honorables Sarrafins de la ville, lesquels faisoient porter deuant luy, grand nombre de flambeaux & cierges allumez, & luy bailloyent à tout propos, tantost la main, tantost la robbe, si grande estoit la reuerence & le respect qu'ils luy portoyent. Le Pere ne fist pas difficulté d'entrer en ce temple, afin de cognoistre mieux les ceremonies & superstitions de ceste secte, pour en pouuoir parler comme tesmoin de veuë, & les refuter avec plus d'efficace. Mais sur tout il pretendoit en cela gaigner leur bonne grace ; afin d'auoir plus aisément entrée en leurs ames, pour les conuertir à IESVS-CHRIST. Voyant donc que pour venir à bout de son dessein, il estoit necessaire d'entreprendre quelque dispute avec les principaux Docteurs de leur secte, afin de monstrer la fausseté & absurdité d'icelle, il taschoit par tous moyens de les y attirer. Eux au contraire n'en voulans point goustier se retiroient & fuyoient tant qu'ils pouuoient, maintenant sous pretexte de Religion ; car ils disoient leur estre tres-expressément deffendu en leur Loy, de disputer ou reuouer en doute aucun point d'icelle ; tantost sous quelque autre couleur, alleguans qu'ils estoient meilleurs soldats que Docteurs. Ce neantmoins comme ils virent, que s'ils continuoient à esquiuier de la sorte, ils sembleroient se condamner eux mesmes, auant l'examen de leur loy, & se deffier de leur cause auant qu'elle fust debattuë, & iugée, ils y condescendirent à la parfin :

*Le me-
nent à
leur tem-
ple avec
grand
honneur.*

*Il tasche
de les
faire ve-
nir à la
dispute.*

Un grand & pour se mieux asseurer, ils firent venir tout exprès vn braue
Philosophe Per- champion desia bien aduancé en aage, Perse de nation, & fort
san est estimé parmy eux, tant à raison de sa grande abstinence, & so-
appelé briété, que pour sa rare doctrine & erudition : car il estoit bien
pour dis- versé non seulement en la secte de Mahomet, mais encore en la
puter cõ- doctrine d'Aristote, ayant bien leu & estudié les anciens inter-
tre le P. pretes d'iceluy, nommément les Arabes, tellement qu'il estoit
Gaspar. bien entendu en la Physique, en l'Astrologie, & en la faculté de
 Medecine. Cestuy-cy donc estant venu au lieu ou la dispute se
 deuoit faire, proposa au Pere Gaspar, auât touz' autre chose, qu'il
 n'estoit ia besoin de debattre par parolles, pour cognoistre quel-
 le estoit la vraye loy : mais qu'il y falloit proceder par ceuures; &
 partant qu'ils allassent eux deux seuls sur vne montagne de cest'
 Isle, la plus seiche & sterile de toutes, sans porter avec eux chose
 aucune, ny pour boire, ny pour manger, & que des Chrestiens &
 Sarraïns, autant d'un costé que d'autre, les gardassent nuict &
Ruse du jour, pour empescher que personne ne leur feit tenir en cachet-
Persan. tes quelque prouision de bouche. Au reste que la loy de celuy,
 qui pourroit plus longuement endurer la faim & la soif, fust te-
 nuë pour la meilleure, & la plus fauorie de Dieu. A cela le Pere
Est des- repart qu'il n'estoit ja besoin de têter Dieu, & que la sainteté &
conuente verité d'une loy ne se deuoit pas iuger par la cõplexion du corps
et rebut ou plus robuste, ou plus foible de ceux qui la professent; ains par
sés par la raison, que Dieu auoit donnée aux hommes, pour cognoistre
le Pere. le bien & le mal; les ayant aussi doiëz de la parolle, pour pou-
 uoir expliquer ce qu'ils auoyent conceu : Concluant qu'il falloit
 au prealable disputer par viues raisons; & que si par ceste voye
 l'on ne pouuoit s'esclaircir de la verité, ny cognoistre quelle des
 deux loix estoit la meilleure, il estoit content de faire par apres
 telle esprouue qu'on voudroit. Le Philosophe ayant ouy ceste
 responce, commence premierement à rougir de honte, puis à
 pâlir de crainte, & se deffiant d'un costé de pouuoir prouuer &
 deffendre sa secte, & de l'autre ne voulant se mettre en danger
Le Persa d'estre confondu deuant tant de gēs, il chercha quelque eschap-
demãde patoire, pour faire en sorte que la dispute fust remise à vn autre
delay. saison. Mais sa retraicte ne fust pas sans perte : car il y laissa ce
 qu'il aymeroit le plus, d'autant que sa femme, & sa fille qui se trou-
 uerent là presentes, furent gaignées à IESUS-CHRIST. Elles es-
 toient toutes deux d'un bel esprit, & yssuës de fort noble race
 parmy

parmy les Sarrazins. Car la mere estoit de la famille de Zaïde, nepueu de Hocén, qui descendoit de Mahomet par la ligne d'Alé. Ayant donc ces Dames assisté à ceste premiere entreueuë, & considéré d'un costé la constance & fermeté du P. Gaspar, & de l'autre l'estonnement & crainte de son aduersaire, elles iugerent, qu'il n'y auoit point de solidité ny de verité en leur loy; si que diuinement inspirées elle se resolurent de quitter la secte de Mahomet, & d'embrasser la foy de IESVS-CHRIST. Voyant donc *sa femme & sa fille se rendent Chrestiennes.* qu'il n'y auoit aucune esperance, que l'autre se conuertit, elles pensent aux moyens de faire leur salut, & par l'entremise de quelques personnes, s'adressent au P. Gaspar, le priant de leur vouloir conferer le baptême. Le Pere estant aduertý de leur resolution, en fut extremement aise, & ayant esgard à leur honesteté & noblesse, les fit retirer chés vn Portugais, homme d'honneur & fort deuot, afin qu'elles fussent là en compagnie de la femme dudit Portugais, & de ses filles, pour les pouuoir aller instruire, & catechiser plus commodément auant le baptême. Mais il fit clore du tout les portes de la maison, qui respondoient à la rue: afin que les Sarrazins ne les enfonçassent, & retirassent de là par force ces Dames. Ceste conuersion fascha merueilleusement les Sarrazins, mesmement à cause de la qualité des personnes, & cuyda causer beaucoup de garboutes dans la ville d'Ormuz; de façon qu'il y auoit occasion de craindre quelque mutinerie. Mais d'un costé le respect, qu'ils portoient au Pere Gaspar, & de l'autre la crainte qu'ils auoient de la forteresse des Portugais, & de l'artillerie, qui estoit toute braquée, les destourna de forcer la maison, ou estoient ces Dames. Le Persan voyant, qu'il n'y auoit moyen de les recouurer par force, poussé du regret qu'il auoit de les perdre, s'en va trouuer le P. Gaspar, & commence à se plaindre de luy, disant beaucoup de choses, que sa passion luy suggeroit, plustost que la raison, & entre autres, que c'estoit vne chose inique, & contre toute loy, tant diuine que humaine, de ne vouloir rendre la femme à son mary, ny la fille à son pere.

Le Persan les veut r'auoir.

Après qu'il eut dit tout ce qu'il vouloit, le P. Gaspar luy monstre, qu'on ne luy faisoit aucun tort. Car ces Dames desirant faire le salut de leur ame, s'estoient adressées à luy de leur propre mouuement, & l'auoient prié de les vouloir instruire en la foy Chrestienne, pour estre puis après baptizées. Que c'eust esté meschamment fait de les esconduire, & leur refuser vne si iuste de-

mande. Mais en fin comm' ils eurent longuement debattu par parolles sur cela, le Pere luy offre, que s'il vouloit rejoindre la dispute encommencée, & qu'il demeurat victorieux en icelle, il luy feroit rendre sa femme & sa fille : mais si le contraire aduenoit, non seulement qu'il les larroit suyure leur desir, mais aussi qu'il se rendroit luy mesme Chrestien avec elles. Le Persan monstra qu'il n'acceptoit pas volontiers ceste condition; neantmoins l'affection qu'il portoit à sa femme, & à sa fille, le contraignit de ne la refuser pas. Le iour donc assigné pour la dispute estât venu, ils inuitent d'une part & d'autre, plusieurs personages d'honneur & de qualité, pour estre spectateurs du combat, & juges de la victoire. Le Vicaire de l'Euesque se trouua là, & plusieurs autres Portugais, nommément Garcia de Pena interprete du Roy d'Ormuz (qui le debuoit aussi estre en ceste dispute) personnage fort experimenté en tel office, & qui auoit grande cognoissance, tant de la langue Latine, que de la Persienne. Ils eurent aussi vn Notaire ou Greffier, pour coucher fidelement par escrit toute la dispute. Les personnes susdictes & beaucoup d'autres estans assemblees dans vn conclaue, l'on commence le duel, lequel il faisoit beau voir, parce que l'un & l'autre combattant estoit bien versé en la Dialectique; tellement qu'on ne iettoit pas des coups à la volée, comme il aduient entre les clerics d'armes, ou ieunes apprentifs : mais chacun se tenoit en ses demarches pied-coy, comme soldat bien aguerry, & long temps exercé en tels conflits. Ils disputerent en premier lieu de la nature diuine, laquelle le Mahometain disoit estre solitaire, soustenant que Dieu n'auoit point vn fils engendré de sa mesme nature, esgal à luy en tout & par tout. Car telle est la doctrine de Mahomet, puisée de l'heresie de Cerdon, & autres vieux heresiarches. Le Pere Gaspar luy monstra par viues raisons, que ceste nature, qui donne la fecundité à toutes les autres, n'estoit pas infecunde ny sterile : & fit à la parfin confesser au Persan, qu'il y auoit trois personnes diuines & vne seule Deité, comme l'Eglise Catholique l'enseigne. En second lieu fut proposée la These, à sçauoir si IESVS-CHRIST estoit vray Fils de Dieu. Car les Mahometains disent, qu'il a esté engendré seulement de l'haleine diuine, & conçu de la Vierge Marie; de sorte que bien qu'ils aduoient qu'il a esté vn grand Prophete : toutesfois ils nient, qu'il soit Dieu, & qu'il ait enduré mort & passion pour le salut du genre humain. Le P. Gaspar luy

*L'offre
accep-
tée, la
dispute
se com-
mence.*

*Nature
des
quelles
ils trai-
tent.
1. point
de la 1^{re}
ité.*

*2. de l'In-
carna-
tion.*

prouua au contraire par plusieurs raisons, & propheties, que IESVS-CHRIST estoit vray Dieu & vray homme tout ensemble, ayant ces deux natures vnies en vn mesme supposit. D'auantage il monstra, que non seulement il auoit esté conçu du S. Esprit, & estoit né de la Vierge Marie, mais aussi qu'il auoit chargé sur ses espauls le pesant fardeau de nos pechés, non pas qu'il en eust esté souillé, mais afin de satisfaire au Pere eternal, pour les hommes, qui estoient coupables d'iceux: & pour ceste cause, qu'il auoit enduré volontairement de tres-griefs tourmens, & la mort mesme de la Croix. Quant aux fables & resueries, que les Sarrazins content de leur paradis, & nommémēt ce qu'ils constituent la beatitude & le souuerain bien en l'orde & sale volupté du corps, & au chatouillement des sens; pareillemēt ce qu'ils feignent de certains corps desmesurés & enormes en grandeur, qu'ils disent que les Anges ont, & de leurs ministres vilains & deshonestes, le P. Gaspar rembarra tout cela avec des raisons si claires, & si preignantes, que les Sarrazins, qui estoient là presens, auoient honte de l'absurdité & bestialité de leur Loy. Brief il mena battant son aduersaire iusqu'à là, qu'il luy fit aduoüer la tres-saincte Trinité, & que la loy de Mahomet ne pouuoit estre receüe ou suyue sans grande folie, ny defendüe sans opiniastrété. Au contraire luy opposant la beauré & la saincteté de la Religion Chrestienne, il luy fit confesser qu'elle meritoit d'estre embrassée de tout homme d'entendement. Le Pere ayant conduit son homme à ce poinct là, saisy d'une lieffe extraordinaire: Voy-la qui va bien (ce fit il) à ce que ie voy: vous n'estes pas fort loing du Royaume de Dieu. Apres comme il luy fit instance, de ratifier de nouueau ce qu'il auoit accordé, & d'exprimer plus claiремēt ceste mesme confession, l'autre tout confus & troublé, n'ayant encore secoüé le ioug du Diable, commence à se retirer, ne voulant pas aduoüer ce qu'il auoit desia concedé, ains bien marry de s'estre tant esgaré de son Alcoran, eust bien voulu que telles responses ne fussent pas sorties de sa bouche: mais il ne les pouuoit nier, car tout cela estoit escrit. Finalement pour faire croire, qu'il n'auoit pas esté vaincu: & que la cause pour laquelle il s'estoit ainsi esgaré, ne deuoit pas estre rapportée à son insuffisance, ou à la fausseté de sa loy, il dit qu'on l'auoit prins au pied leué, & en vn temps ou ses affaires domestiques ne luy donnoient pas loysir de prendre ce qu'il luy faisoit de besoing, pour la dispute; jaçoit

3. du pa-
radis de
Maho-
met.

Le Per-
san con-
fesse la
verité de
la foy
Chrestien-
ne.

Se repēt
d'auoir
concedé
cela.

*Demãde
encorde-
lay &
s'enfuit.*

que pour ne manquer à sa promesse, il l'eust en fin acceptée: mais qu'il luy falloit fueillerer encore quelques autres liures, afin d'estre mieux préparé, & que lors il retourneroit au combat, requerrant qu'on voulut surseoir le iugement de la victoire iusqu'à vn autre seance. On accepta son offre, mais on cogneut bien que le delay, qu'il demandoit, n'estoit qu'un eschappatoire; tellement que la victoire fut, par le bruiet commun, adiugée au P. Gaspar. Le Persan s'estant retiré, s'en va à vn grand Seigneur de sa secte, qui se tenoit bien près de là, pour consulter avec luy de son affaire. L'autre l'ayant repris à bon escient, de ce qu'il auoit esté si outrecuydé, que de disputer avec cest enchanteur (ainsi appelloit il le P. Gaspar) luy baille soudain quelques Chameaux, le faisant conduire bien auant dans la terre ferme de Perse. Les Caziques ou Ministres de la secte de Mahomet, reçurent là vne grande escorne & insigne affront; car on leur disoit communément, que leur Docteur se voyant confus, s'en estoit allé cacher de honte. Cependant sa femme & sa fille, apres auoir esté bien instruiçtes en la foy, furent avec grande pompe & magnificence, conduiçtes par les plus nobles & apparens des Portugais, iusques à l'Eglise: là ou elles furent baptizées avec vn grand concours & affluence de gens de toute sorte de nations & ordres, qu'il y auoit dans Ormuz; & avec vn singulier plaisir & contentement des gens de bien. Le Capitaine ou Gouverneur de la Citadelle fut leur parrin, & quelques Dames Portugaisés les marrines. La mere fut appellée Marie, & la fille Catherine; toutes deux estoient vestuës de toile d'argent blanche, & accompagnées tant en allant, qu'en retournant, de deux bandes d'arquebuziers & picquiers, qui marchoient d'un costé & d'autre de la rue, pour plus d'assurance, faisans vn beau salué d'arquebuzades, auxquelles on respondoit de la forteresse avec des coups de canon. Quelque temps apres, toutes deux furent mariées, par le moyen du P. Gaspar, avec deux Chrestiens, fort honnestes hommes, ayant

esté dorrées au prealable chascune de sept cens escus
par la liberalité des Portugais. Mais voyons
quel effect cecy causa és autres
Mahometains d'Ormuz.

*De la conuersion de plusieurs Sarrafins à la foy de IESVS-CHRIST,
 & comme le Roy d'Ormuz y estant presque gaigné par le P.
 Gaspar, en fust destourné: ensemble de la closture
 de l'Alcoran.*

CHAPITRE VI.



A dispute avec ce Docteur Persan, & la conuer-
 sion de ces Dames, causa diuerses affections &
 mouuemens és Sarrafins d'Ormuz : car les vns vo-
 yans de si heureux succès pour la Religion Chre-
 stienne, auoient peur d'y estre attirez par magie, &
 enchantemens: tellement qu'ils s'enfuyoient du P. Gaspar d'aussi
 loing qu'ils le voyoyent, par la persuation de leurs Caziques, qui
 leur faisoient entendre que c'estoit le plus grand enforceleur du
 monde, & non seulement auoient-ils horreur de le voir, ou de
 l'entendre prescher: mais encore d'ouyr sonner la clochette de
 la doctrine Chrestienne; de sorte qu'ils se bouchoyent les oreil-
 les pour ne l'ouyr pas, estimans qu'au son d'icelle, y auoit quel-
 que force de piper les gens. Mais d'autre part plusieurs touchez
 du doigt de Dieu en leur ame, se conuertissoient à bon escient à
 nostre foy, laissant le Mahometisme: si que l'on en voyoit quasi
 tous les iours receuoir le baptême. Aucuns d'iceux asseuroyent
 que la Sacrée vierge Marie s'estoit apparue à eux, & leur auoit
 conseillé d'embrasser la loy de son fils; d'autres disoyent auoir
 veu nostre Sauueur mesme, qui leur auoit comandé de le suy-
 ure: a quelques vns il sembloit auoir entendu de nuit certaines
 voix, qu'ils croyoient estre des bons Anges, les exhortans de se
 ioindre à la foy Chrestienne: brief il en y auoit qui se persua-
 doient auoir veu des Anges reuestus d'une grande lueur & clar-
 té, qui les auoyent semonds à se rendre Chrestiens. Mais quoy
 que c'en soit de ces visions, au moins les effects en estoient grâds:
 car par ce moyen le Diable perdit beaucoup d'ames, non seule-
 ment du simple peuple, mais encore des plus nobles & illustres
 familles, qu'il y eust en ces quartiers là. Entr' autres fust vne
 niepce du Xarife de la Meque, qui s'intituloit Roy d'Arabie, & se
 disoit estre parent de Mahomet. Ceste Dame estoit mariée à un
 grand Seigneur de Perse, lors Ambassadeur à Ormuz pour le
 Xatamas, ou comme nous l'appellons communément le grand

*Plusieurs
 Sarra-
 fins te-
 noient le
 P. Gas-
 par pour
 un en-
 châteur.*

*Conuersiō
 de plu-
 sieurs
 Sarra-
 fins.*

*D'une
 Dame
 fort no-
 ble.*

Sophy, Roy de Perse. La conuersiõ d'icelle causa d'un costé beaucoup de ioye aux Portugais, combien que d'autre part elle euyda leur donner de l'affaire, comme nous dirons bien tost. Mais il n'y eust chose aucune, qui apportast pour vn temps, plus de contentement d'esprit à iceux, & au P. Gaspar, que l'esperance, qu'on conceut de gagner aussi le Roy d'Ormuz à la foy, comme de fait il en fust bien prés, ainsi que maintenant nous allons dire. Le

*Le Roy
d'Ormuz
desire se
rendre
Chrestien.*

Roy donc d'Ormuz, esmeu tant des choses passées, que des predications du Pere, que quelques fois on luy rapportoit, le manda venir vn iour à son Palais, desirant traicter avec luy (comm' il disoit) de quelque affaire d'importance. Le Pere y alla soudain, & fust receu de sa Majesté avec vn grand honneur. Apres les salutations, reciproques, le Roy commande à tous ses courtisans de sortir hors de la chambre, ou ils estoient, de façon qu'ils demurerent tous deux seuls, avec son interprete Garcia de Pegna. Lors il descouure au Pere ce qu'il auoit dans le cœur, à sçauoir vn grand desir de se rendre Chrestien : & luy demande conseil, quel expedient il pourroit prendre, pour contenter les plus grands de son Royaume ; car il se craignoit qu'ils ne vinssent à se souleuer, & luy causer vne reuolte generale de tout le peuple, pour ceste cause. Le Pere entendant ces propos du Roy, loüa fort son bon desir, & tascha de le confirmer en iceluy avec peu de parolles, mais plaines d'efficace : puis il s'efforce de luy oster la crainte qu'il auoit, luy remonstrant, qu'il deuoit beaucoup plus esperer de Dieu, que se craindre des hommes, & que pour empescher la reuolte de ses subiects, dont il se doubtoit, il n'y auoit meilleur moyen, que de gagner premierement les plus grands Seigneurs du Royaume, qui estoient ceux qui la pourroient causer, que pour ce faire il ne trouuoit expedient plus propre, qu'une dispute qui se fist en sa presence, & de tous les principaux Seigneurs, entre luy & les Caziques, tant de Perse que d'Arabie : car il esperoit, que si la secte de Mahomet estoit vne fois conuaincüe de fausseté, & qu'on eust monstré au iour l'absurdité, & meschanceté d'icelle, il n'y auroit homme d'entendement qui n'eust honte de la suyure. Ces choses ne peurent estre tenuës longuement en secret, comme aussi on ne les auoit pas traictées pour estre tousiours cachées : mais aussi tost qu'on eust entendu à la Cour, que le Roy auoit pourpensé de se rendre Chrestien, la plupart des courtisans & du peuple, sembloient en estre fort aises, voire

mais il en y auoit vn grand nombre qui pensoyent suiure son exemple ; non seulement des gens de basse estoffe , mais encore des plus grands Seigneurs : lesquels mesmes auoyent desia fait le choix des noms , qu'ils vouloyent prendre au baptisme , & les parrains aussi. Neantmoins il n'y eust pas faute de l'autre costé de plusieurs , qui se voulurent opposer à ces bons desseins , & notamment à celuy du Roy , voyant bien que de luy dependoit le reste. Ils y voulurent proceder au commencement par flatteries , & douces parolles : mais , comm'ils veirent que cela n'estoit pas bastant pour rompre vne si forte resolution , ils le menaçent d'une reuolte generale de tous ses subiects , & du courroux du grand Sophy de Perse , lequel ne se ressentiroit pas peu du deshonneur , qu'il alloit faire à leur commun Prophete Mahomet. Mais ces menaces n'ayant fait aucune bresche dans le cœur noble & genereux du Roy , ils se voulurent ayder des Caziques , leur persuadant d'aller remonstrer à sa Majesté , l'iniure & l'affrôt qu'il alloit faire à leur loy , s'il la quittoit , & embrassoit celle des Chrestiens , comm' il estoit en deliberation : & que si le Roy ne vouloit les escouter , qu'ils taschassent au moins de l'intimider , ou de faire soufleuer le peuple contre luy. A ces fins ils leur conseillerent de s'aller ietter aux portes du palais , & là qu'ils se missent à crier à pleine teste : qu'il estoit temps desormais d'empescher l'affront qu'on pretendoit faire à Mahomet. Car c'estoit à leur aduis , le vray moyen de faire prendre les armes aux Sarrafins , cōtre le Roy sous pretexte de Religion. Ceste ruse aussi ne leur succeda pas , comme ils pensoyent : car le Roy ne voulust ny voir , ny ouyr les Caziques : & entendant qu'ils ne faisoient que braire à la porte du Palais , il les en fist chasser à coups de pierres , & les bannist à perpetuité de son Royaume ; iacoit qu'ils voulussent desister de leur entreprise , ayans mieux quitter la deffence de leur loy , qu'abandonner leur pais : bien dissemblables aux martyrs Chrestiens , lesquels endurerent non seulement l'exil : mais encore le feu & le glauiue pour soustenir la foy de IESVS-CHRIST. Iustques icy le Roy monstra beaucoup de constance & fermeté en sa resolution : mais en fin les pleurs & les larmes de sa mere , qui vint à luy toute esplorée , pour le detourner de son bon propos , aduancerent plus en son endroit , que n'auoyent fait tous les efforts des plus grands Seigneurs du Royaume. Car elle luy sceut tellement depeindre & exprimer les guerres ciuiles ,

*sa mere
en fin le
gaigne.*

*Le Pere
Gaspar
tasche de
remettre
le Roy.*

les tumultes, & reuoltes de ses subiects, la ruine & perte de son Royaume, & autres malheurs qu'elle craignoit, comme femme, luy deuoir arriuer, que finalement elle le gaigna, & luy fist changer de volonté. A l'exemple du Roy les autres pareillement se retirerent. Le P. Gaspar voyant cela, le cœur luy fendoit de douleur; mais n'ayant pas encore perdu toute esperance, il tasche de remettre le Roy par trois moyens en ses premieres erres. Il en escriuit au Gouverneur des Indes, qui estoit lors George Cabral, le priant de vouloir encourager le Roy par ses lettres. Ce que ledit Gouverneur fit, escriuant au Roy, & luy promettant de la part du Roy de Portugal tout ayde & secours, non seulement pour l'assurance de son estat, si quelque reuolte aduenoit, mais aussi pour l'accroissement d'iceluy. Sur tout le Pere s'adressa plus particulierement à Dieu, renouellant ses ieunes, disciplines, cilices, & autres penitences, s'addonnant plus que de coustume à icelles, & principalement à la priere. Il recommanda aussi le mesme, tant à ses disciples, qu'à d'autres deuotes personnes: & fist faire des processions publiques, à ceste intention: ou plusieurs marchoyent couuerts de sacs, se disciplinans par les rues: & pour plus grande confusion des Sarrafins, ils passoyent par leurs rues, châtans à haute voix les Litanies, & autres oraisons pour implorer le diuin secours, contre leur damnable pretension. Or ces prieres, & austeritez, ne furent pas sans effect, car quelque tēps apres le Roy enuoya querir le P. Gaspar, auquel il fist plus d'honneur que iamais: luy allant au deuant, comme il montoit les degrez, & luy prenant la main droicte, pour là luy baiser les genoux flechis en terre. Mais comme il fust venu au propos de sa conuersion, il s'excuse enuers le Pere de ce qu'il n'auoit encor accompli ce qu'il luy auoit promis; & luy remonstre le danger, auquel il se mettoit, & son Royaume ensemble, s'il continuoit à traicter de son baptisme, luy mettant deuant les yeux les guerres, tant ciuiles qu'estrangeres, qu'il craignoit s'en deuoir ensuiure, & beaucoup d'autres inconueniens. Partant qu'il auoit esté d'aduis de ceder au tēps, car il valloit mieux aller tout bellement en cet affaire, que de mettre en hazard, & le tēporel, & le spirituel tout ensemble; l'assurant neantmoins, que si vne fois ceste bourrasque estoit passée, & que le beau temps reuint, qu'il ne manqueroit à ses promesses, ny au desir, que le Pere auoit monsté de son salut: & cependant qu'il feroit tout ce qu'il pourroit en sa
faueur,

faueur, & pour la manutention & accroissement de la foy Chrestienne, autant que les affaires & le temps le luy permettroient. Le Pere entendant ceste responce, tira vn grand souspir du profond du cœur, monstrant la grande douleur, qu'il sentoit en son ame, de se voir ainsi frustré de son esperance; & en peu de mots exhorta le Roy, de mettre toute sa confiance en Dieu, auquel il n'y a rien d'impossible, & de luy recommander de cœur & d'affection cest affaire. Finalement il print congé de luy avec vn grand regret, de n'estre venu à bout de sa conuersion. Il ne desista pas pourtant de continuer ses penitences, oraisons, & autres deuotions, qu'il auoit commencées: ains s'eschauffa d'auantage en icelles, encourageant les Portugais à faire le mesme, pour obtenir de Dieu par force de prieres, ce que le Diable auoit empesché par ses Ministres. Voyla donc les processions qui recommencent, les petits enfans de la doctrine Chrestienne, qui vont chantans par les ruës les Litanies, & autres oraisons & cantiques propres à ce, qu'on desiroit obtenir de Dieu, les disciplinans aussi marchotent iusques au nombre de 50. & se fouiettoient sur le dos à bon escient. Somme qu'on n'eut veu, ny ouy autre chose, quasi parmy les Chrestiens, que actes de penitence, & de deuotion, qu'ils faisoient à la persuasion du Pere.

Fait faire des processions publiques aux Chrestiens.

Mais d'autre part les Caziques enorgueillis, de ce que le Roy auoit esté detourné de son dessein avec tous ceux, qui le vouloient suyure, inciterent les Sarrazins à s'addonner tout de mesme au ieusne & à la penitence, selon qu'ils ont accoustumé. Les Caziques aussi faisoient des incisions sur leur chair avec des razors tranchants, & ordonnoient qu'on s'assemblast à la priere, non seulement dans le plus grand temple de Mahomet: mais encore en tous les autres plus petits oratoires, & là inuquoient à pleine teste leur faux prophete. Le P. Gaspar fut grandement indigné de voir qu'on vouloit contrequerer à IESVS-CHRIST l'impie Mahomet, & ce en vne ville ou les Portugais estoient les maistres, estimant que c'estoit vn trop grand deshonneur aux Chrestiens de permettre, que le mensonge combatrist quasi à pair avec la verité, si bien qu'espris d'une ferueur extraordinaire, il entreprit vne chose, qui eust semblé de premier abord temeraire, mais l'effect monstra que l'esprit de Dieu le poussoit à cela. Il feit donc faire vne si grande Croix, qu'à grand' peine deux hommes la pouuoient porter, & la va planter sur vne montagne, ou il

Les Caziques font des incisions sur leur chair.

Hardie entre-prise du P. Gaspar.

y auoit vn temple de Mahomet. Apres cela il feit faire autres cinq Croix, & prend avec soy vne troupe de petits enfans, qui marchioient apres les Croix, chantans la doctrine Chrestienne. Muny de telles armes, & accompagné de tels soldats, il s'en va assieger, ou plustost prendre le plus celebre temple de Mahomet, appelé Coran ou Alcoran; là ou estant arriué, incontinent que les Sarrazins apperçurent l'estendard de la Croix, ils furent tellement esblouis de son seul regard, & si fort estonnés, qu'ils se mirent tous en fuite. Le Pere demeurant victorieux & maistre de la place, y plâta soudain l'enseigne de IESVS-CHRIST; avec laquelle il a vaincu la mort, le Diable, & l'enfer: puis estant allé trouuer le Roy, luy demande congé de faire clorre les portes dudit temple à chaux & à sable, afin que les Sarrazins n'y entraissent iamais plus. Le Roy luy accorda volontiers cela, & en outre fit inhibitions & defences, sous griefues peines, que personne de là en auant, n'inuoquast publiquement Mahomet en toute l'Isle d'Ormuz. Ceste closture de l'Alcoran fut l'un des plus grands affronts, que les Sarrazins eussent peu receuoir. Car ce temple, ainsi qu'a esté dit, estoit l'un des principaux qu'ils eussent en Perse & en Arabie, si qu'il estoit visité d'un grand nombre de Pelerins. Voyans donc que non seulement il auoit esté profané, à leur aduis, par les Croix qu'on y auoit plantées, mais encor qu'il auoit esté fermé à chaux & à sable, ils creuoient de despit. Or les principaux Seigneurs du Royaume voyans cela, estoient en deliberation d'assembler vne armée, & faire la guerre au Roy pour ceste cause: estimans que les Sarrazins pour auoir receu vne telle iniure en Ormuz, s'en iroient trafiquer ailleurs, au grand dommage de l'estat. Ils feirent entendre ces choses au Roy par personnes interposées, afin de l'intimider. Mais le Roy ne fait aucun compte ny de leurs menaces, ny de ces raisons, & plusieurs autres, qu'on luy apportoit. Les Sarrazins voyans cela, s'en vont faire leurs plaintes à plusieurs Princes & grands Seigneurs de Perse, qui auoient leurs terres près d'Ormuz, & finalement le font entendre au grand Sophy de Perse, le sollicitans d'ordonner à ses Capitaines, qui tenoient garnison en plusieurs places frontieres du Royaume d'Ormuz, qu'ils allassent venger le deshonneur fait à leur commun prophete Mahomet par ces Franques, comme ils disent: car ainsi appellent ils en ce pais là, & en beaucoup d'autres endroicts de l'Orient, non seulement les Portugais, mais aussi

*Plante
des Croix
dans le
plus ce-
lebre tem-
ple des Sar-
razins, &
le fait
clorre.*

*Les Sar-
razins
résistent
de faire
r'ouvrir
ce tem-
ple..*

tous les Europeans de l'Eglise Latine, leur baillant le nom des François, à cause qu'ils n'auoient cognoissance d'aucune autre nation de deça, sinon des François, pour ce qu'ils ont fait jadis, tant en la prise de Hierusalem, comme en plusieurs autres contrées du Leuant. Outre ce, l'Ambassadeur du Roy de Perse, la femme du quel auoit esté baptizée à Ormuz contre son vouloir, ainsi qu'à esté dit, estant de retour à la Cour du grand Sophy, feit ses plaintes au Roy, disant qu'on luy auoit rauy sa femme, & qu'elle auoit esté baptizée par force à Ormuz, adioustant beaucoup d'autres mensonges, pour faire mettre en cholere le Roy. De fait le Sophy commanda, entendant ces choses, qu'on retint comme prisonnier vn Portugais qui estoit en sa Cour, nommé Henry Macédo, enuoyé là par le Gouverneur des Indes George Cabral, pour conclurre la paix & alliance entre les Portugais, & les Perses. Et si escriuit au Roy de Lara, & au Seigneur de Carman, qui sont ses vassaux (les terres desquels auoyfinét le Royaume d'Ormuz) qu'ils feissent la guerre aux Portugais, habitans de ceste Isle, & qu'ils missent leur forteresse rez pied rez terre, s'ils ne vouloient rendre la femme de son Ambassadeur. Le Gouverneur de la forteresse d'Ormuz estant aduisé de cecy par lettres d'Henry Macédo, feit mettre en deliberation au conseil de guerre, s'il estoit expedient de restituer ceste Dame audit Ambassadeur. Il fut conclud & arresté que non, & ce à cause d'une sentence de N. Seigneur, que le P. Gaspar (qui estoit là present) apporta de l'Euangeliste S. Matthieu au chap. 7. ou il est dit, *Nolite dare* Mat. 7.
sanctum canibus, nec mittatis margaritas vestras ante porcos, ne forte conculcent eas pedibus, & conuersi dirumpant vos. C'est à dire, Ne vueillez pas donner les choses sainctes aux chiens, & ne ietez point vos perles deuant les pourceaux : de peur que par aduanture, ils ne les foulent aux pieds, & que se tournans contre vous, ils ne vous deschirent. Car souuentesfois (adiouste le Pere) lors qu'on abandonne les affaires du culte diuin, & qu'on laisse profaner aux impies & sacrileges les choses sainctes, pour crainte de perdre l'estat, il aduiet qu'on pert & l'estat & la Religion tout ensemble. Les Portugais donc resolurent de mourir plustost, que de liurer ceste Dame Chrestienne aux Sartazins : & Dieu voulut que les affaires prindrent autre ply, qu'on ne pensoit ; car en fin ledit Macédo s'en retourna avec tres-bonnes despeches, rapportant la paix concludé & arrestée, sans qu'il fût ez

Les Latins appelles Fräques ou François en Orient.

Ceux qui mettent en risque la Religion pour cesser l'estat, perdent l'un & l'autre bien souvent.

articles d'icelle, parlé vn seul mot de rendre la femme de l'Ambassadeur, ny de remettre l'Alcoran d'Ormuz en la puissance des Sarrazins; voire mais (selon le rapport qu'en feit Henry Macédo) le grand Sophy auoit esté bien ayse, qu'on eut fait cest affront aux Mahometains d'Ormuz, parce qu'ils sont pour la plus part de la secte des Turcs, contre lesquels les Perses ont presque tousiours guerre, tant pour l'estat, que pour la Religion. Or comme les Sarrazins d'Ormuz virent, qu'ils n'estoient peu venir à bout de leur prétension par ces voyes là, ils s'aduifent d'un autre moyen plus fin & cauteleux; c'est qu'ils taschent d'attirer à leur cordelle quelques Chrestiens de nom, plustost que de fait, lesquels tenans la pecune pour leur Dieu, ne se soucioient quasi d'autre chose, que de remplir leur bourse. Ceux-cy gaignent par mesme moyen le nouveau Capitaine de la forteresse, qui auoit succédé à Emmanuel de Lima, & luy promettent vne grosse somme d'argent, s'il faisoit ouurir, & rendre l'Alcoran aux Mahometains. Le Capitaine, qui estoit de sa nature plus enclin à la paix, qu'à la guerre, se laissa facilement gaigner, tant aux promesses, qu'à leurs raisons colorées; toutesfois il n'osa rien faire, sans en auoir au préalable parlé au P. Gaspar. Et pource il le conuia vn iour à dîner à la forteresse, là ou estans à table, il commence à luy ouurir le propos de remettre ce temple entre les mains des Sarrazins. Et pour le luy faire trouuer bon, il luy allegue quelques raisons d'estat, pour lesquelles il luy sembloit estre expédient que cela se feist, Adioustant que plusieurs autres estoient de mesme aduis; neantmoins qu'il desiroit que le tout se feist avec son bon plaisir, & le prioit de ne s'opposer pas à l'exécution de ce qui auoit esté arresté. A grand' peyne auoit acheué le Capitaine de proposer ses raisons, auant mesme que le Pere eut ouuert la bouche pour y respondre, qu'un soudain defailement de cœur le surprend, de sorte qu'il demeura quelque temps sans pouuoir aucunement parler. Il deuint aussi palle qu'un corps mort, & l'on ne recognoissoit en luy aucun sentiment ny mouuement: mais en fin il reuint à soy, & cogneut que c'estoit vne punition que Dieu luy auoit enuoyée, pour auoir voulu rendre ce temple aux Mahometains. Le mesme iugerent ceux, qui se trouuerent presens à cest accident. Et ce qui les confirma d'auantage en leur opinion, fut, que tous les autres, qui auoient sollicité pour les Sarrazins, finirent leur vie peu de iours après, d'une mort defaistreuse; ou

Quelques Chrestiens gaignez par argent, veulent faire rendre aux Sarrazins leur temple.

Punition diuine aduenue à ceux qui prétendoient cela.

bien il leur survint quelque grande perte, ou autre accident, qui les mist à la besaige, & les rendit misérables pour toute leur vie. Le Capitaine voyant ces choses, & recognoissant que Dieu avoit pour agreable, ce que le Pere Gaspar avoit fait en cela, s'offrist de faire mettre à bas ce temple, si le Pere en estoit d'advis; mais il luy respondist qu'il se contenoit, que les affaires demeurassent au mesme estat, auquel les avoit laissées le Capitaine Emmanuel de Lima son predecesseur. Cecy fust cause d'une nouvelle ferueur de deuotion parmy les Portugais, & autres Chrestiens: mais au contraire les Sarrafins furent si abbatuis, & humiliez d'un tel succez, qu'ils n'osoyent leuer la teste: & plusieurs se convertirent à ceste occasion.

La renommée du Pere Gaspar, & le bruiet des choses, qu'il faisoit à Ormuz, s'espandit par tout ce pays là, de sorte qu'il arriua bien auant dans la terre ferme de l'Arabie heureuse, & singulierement à une certaine nation, qu'il y a entre le Cap de Rosal-*Ammonites*
gate, & celuy de Mocandon. Les Arabes appellent ce peuple *peuples de l'Arabie.*
Hyaman ou Aman, & quelques vns pensent que ce sont les *Gen. 29.*
Ammonites, desquels parle l'escriure sainte. De fait ils rapportent leur origine à Loth, nepueu d'Abraham, qui engendra Ammon pere des Ammonites, comme il est raconté au Genese. Ils ont quatre villes fort anciennes, qui furent les premieres que Mahomet infecta de son venin, bien qu'ils eussent encore un temple de Jupiter dès le temps qu'ils estoient Payens. Ils sont gens assez simples de leur nature: mais forts & robustes de corps. Ce peuple donc esmeu du bruiet qui courroit des merueilles que le Pere Gaspar faisoit à Ormuz, luy escriuit & enuoya vers luy d'un commun consentement deux Ambassadeurs, *Desirent*
pour le prier de leur vouloir aller enseigner le chemin de salut: *estre in-*
car ils auoyent grande enuie de le cognoistre pour le suivre. *struits en*
Ceste nouuelle apporta d'un costé une tres-grande consolation *la soy*
au Pere, voyant qu'au milieu de la Barbarie, il y auoit une na- *P. Gas-*
tion si desiruse de son salut. Mais de l'autre il fust bien marry de *par.*
n'y pouuoir aller: car le Pere Xavier cognoissant bien la ferueur, & craignant qu'il ne s'allast fourrer parmy les Turcs & autres Infidelles, pour endurer le martyre, duquel il estoit extremement desirux, luy auoit expressément deffendu de ne partir de trois ans de l'Isle d'Ormuz, sans son congé exprés,

N'y pou
uât aller
il cate-
chise &
baptise
les Am-
bassa-
deurs.

ou celuy du Recteur de Goa, ayant plus d'esgard au bien public, & profit spirituel de plusieurs, qu'à sa deuotion ou inclination particuliere. A ceste occasion le P. Gaspar, bien qu'il fust allé volontiers annoncer l'Euangile à ces Ammonites; neantmoins sçachant que l'obeyssance vaut plus que le sacrifice, il s'en porta: se contentant de baptiser les deux Ambassadeurs, apres les auoir deuëment instruits; puis les en renuoya, s'excusant de ce qu'il ne pouuoit les aller trouuer sur les occupations, & affaires qu'il auoit en main, si les exhortoit de perseuerer en leur bon desir, & adioustoit que s'ils luy enuoyoient des disciples capables & idoines, pour apprendre les mysteres de nostre foy, qu'il tascheroit de les instruire, si bien que par leur moyen les autres pourroyent apprendre ce qui estoit necessaire pour leur salut. Mais ceste belle & riche moisson n'ayant esté cucillie en son temps pour faute d'ouuriers, vint à se flectir, & à se perdre du tout. Or c'est assez parlé de ce que le P. Gaspar fist pour la conuersion des Sarraïns d'Ormuz: voyons maintenant comment il s'employa pour celle des Gentils & Idolatres.

De la conuersion miraculeuse d'un Iogue, tenu pour un Saint des Payens, & autres Infidelles d'Ormuz: du retour du P. Gaspar à Goa, & de son trespas.

CHAPITRE VII.



Iogues
d'Ormuz
& quel-
le vie ils
menoyent.

NOus auons dict cy deuant comme le Pere Gaspar preschoit chasque Vendredy de la sepmaine en l'assemblée que les Payens, ou Gentils faisoient ce iour-là en leur Pagode. Mais voyât que s'il pouuoit gaigner les chefs, c'est à dire ceux qui les entretenoyent en leur superstition, & lesquels ils auoyent en plus grand'estime, le reste suyuroit facilement, il resolut d'attaquer les Iogues qu'il y auoit en Ormuz. Or ces Iogues sont, comme nous auons dict ailleurs, vne certaine espeece de Brachmanes (mais plus religieux que les ordinaires) qui menent vne vie fort austere. Ceux-cy d'Ormuz n'estoyent pas inferieurs aux autres, qu'on trouue en l'Inde quant à ce poinct, & si les deuançoient en quelques autres choses, principalement en la chasteté & pauureté volontaire, dont ceux-cy faisoient plus d'estat que de tout le reste. Car ils tenoyent que par le moyen de ces deux vertus, l'ame se

rendoit plus idoine à contempler l'essence diuine, qui est tres-pure, & esloignée de toute souilleure. Ils estoient aussi fort adonnez à la contemplation, & singulierement à la consideration de la mort, & à la meditation des perfections diuines: car ils auoyent quelque notice d'icelles, voire mesme de la Tres-saincte Trinité, attribuant comme nous la puissance au Pere, la sagesse au Fils, & la bonté au S. Esprit. De façon que le P. Gaspar estimoit, qu'ils auoyent puisé ceste cognoissance des Chrestiens. Mais quoy que ce soit, ils auoyent avec cela beaucoup d'erreurs, & superstitions. Car ils adoroient les Pagodes, comme les autres Idolâtres de l'Inde, & tenoyent pour vrayes plusieurs opinions fort sottes & absurdes. Ils estoient neantmoins fort estimez & honnorez du peuple, à cause de la sainteté de vie qu'en apparence ils sembloient mener, laquelle les plus simples mesurent à l'aune de l'austerité extérieure. Ils auoyent pour leur loge ou retraicte quelques grottes ou cauernes en vne montaigne bien près des faux-bourgs de la ville, ou estoit basti vn Pagode, ou temple d'Idoles, auquel ils s'assembloyent de nuict, au son d'une cloche qui les appelloit, pour s'y donner à la contemplation, tout de mesme que font icy les Ecclesiastiques, pour dire les matines. Car le diable faict aussi bien là du singe comm' ailleurs. Le matin sur l'aube du iour ils faisoient quelques sacrifices à leurs Idoles, durant le iour ils sortoyent de leurs cachots, pour aller à la queste; & demander l'aumosne, afin de se pouuoir nourrir: car ils n'auoyent point d'autre reuenue. Quelques fois ils s'acheminoyent à la ville tout exprés pour prescher au peuple: & en leurs sermons, les vns parloient de la mort, les autres discouroient des perfections diuines; chascun selon qu'il s'estoit imaginé. Ils alloient tous couuerts de cendre, & vestus d'un aspre & dur cilice; brief on eust dict à les voir, que c'estoient des grands Saints. Le Pere Gaspar les alloit voir souuent, partie pour gaigner leur bien-veillance, partie pour cognoistre mieux leurs principes, afin de les battre par apres plus à son aise. Eux aussi se plaisoyent fort avec le P. Gaspar; & luy parloient familièrement, luy descouurant les plus secretes choses de leur secte, sans penser à ce que le Pere pretendoit. Il leur mettoit aussi quelquesfois la puce à l'oreille, comme l'on dict, & taschoit de les gaigner à nostre Seigneur, leur remontrant comme ils trauailloyent en vain, & affligeoyent leurs corps avec tant d'austeritez sans aucun profit. Veu que:

*Le diable faict
par tout
du singe.*

*Le Pere
Gaspar
oynt des
Joques.*

*Prelat
des To-
gues, es-
timé vn
saint
homme.*

cela ne leur seruoit de rien pour la vie eternelle, sans la cognoissance & culte du vray Dieu. Plusieurs d'iceux prindrent tel goust à ces propos, qu'ils monstroyent auoir enuie de suiure son conseil: toutesfois il s'en remettoient à leur Prelat: car il y auoit vn d'entr'eux, qui estoit le Superieur des autres, auquel tous obeyssoyent, & n'osoyent faire rien de consequence sans le luy communiquer. Or ce Prelat estoit pour lors allé faire la visite de quelques autres Hermites, qui se tenoyent és montaignes d'Arabie. C'estoit à la verité vn homme de grande austerité de vie, & qui auoit par le moyen d'icelle acquis vne telle reputation de sainteté, que plusieurs Gentils souloyent boire par deuotion de l'eau, avec laquelle il auoit laué ses pieds, & les luy baïser, voire mesme le Roy d'Ormuz, cōme disent quelques graues autheurs, bien qu'il fust Mahometain. Estant donc retourné d'Arabie, le P. Gaspar l'alla voir: & luy gaigna tellement le cœur, qu'en peu de iours ils furent grands amys. Tous leurs propos & deuis estoient de l'excellence & beauté des vertus, & particulièrement de la chasteté, que ce Iogue prisoit sur toute autre. Par ce moyen le Pere le mena petit à petit à ce qu'il vouloit, luy remonstrant comme ces vertus & autres, ne peuuent estre solides, si elles ne sont fondées sur la cognoissance & le culte du vray Dieu, & de celuy qu'il a enuoyé pour le rachapt du monde, nostre Sauueur & Redempteur IESVS-CHRIST. Par tels & semblables discours, il luy fist venir l'enuie d'entendre plus à plein l'explication des mysteres de la foy Chrestienne, & par apres Dieu luy donna vn grand desir de l'embrasser; toutesfois il n'acheuoit pas de se determiner. Estant donc en perplexité s'il changeroit de Religion, & façon de viure ou non, le Pere luy monstroït par beaucoup de raisons, qu'en vne chose sainte & si claire, il ne faillloit pas tant tarder. En fin le Iogue luy demande trente iours de terme pour se resoudre; le Pere les luy accorda volontiers, & luy dict qu'il inuouast durant ce temps-là de tout son cœur & affection, l'ayde de la diuine grace, priant ce Soleil de Iustice, de le vouloir eclairer des rayons de sa lumiere celeste: & afin d'impetrer plus aisément sa requeste, il luy conseilla de se donner chaque iour cinq coups de verge ou de discipline sur le dos, en souuenance des cinq playes, que nostre Sauueur receut en son corps pour l'amour de nous; le suppliant par les merites de sa mort & passion, de luy vouloir faire entendre quelle estoit la vraye Loy,

*Le conseil qu'il
luy dōne
pour im-
peter la
diuine
lumiere.*

& celle

& celle qu'il debuoit suyure, pour estre sauué. Le Iogue promist de ce faire, & l'accomplit aussi. Or il luy aduint vne nuit, qu'estant en la consideration des perfections diuines, & des thesors infinis de ceste souueraine bonté, il va entendre vne voix qui luy dit ces paroles: *Que fais tu? pourquoy ne suis tu le chemin qu'on te monstre? Il n'y en a point d'autre, qui conduise à salut, sinon celui, que tiennent les Chrestiens.* Et aussi tost il luy sembla voir des tres-beaux ornemens d'Eglise, des riches chasubles, pluuiaux, & autres vestemens sacrez, dont nos Euesques se seruent quand ils officient, ou celebrent en Pontifical, avec des mitres reluyssantes en or & en pierreries, des croces d'argent surdoré, esmaillées & enrichies d'un bel artifice. Brief il luy estoit aduis qu'il voyoit vn autel paré de riches ornemens, & couuert de nappes de fine toile, blanche comme la neige: & là aupres vn riche buffet, avec plusieurs vases d'or & d'argent bien rangés, les vns d'une façon, les autres d'une autre: mais le tout fort magnifique. Il semble que Dieu luy vouloit monstre par ceste vision, la beauté & majesté de la Religion Chrestienne. Et de fait il se sentit des lors si embrasé en l'amour d'icelle, qu'il print tout aussi tost resolution de se rendre Chrestien, sans aucun delay. Doncques le lendemain matin le Roy d'Ormuz estant allé à sa grotte pour le veoir (ainsi qu'il auoit accoustumé souuent) le Iogue aduertit de cela, & ne voulant point le veoir, se cache; & quand le Roy fut party, il s'en va trouuer le P. Gaspar, & luy raconte tout ce qui s'estoit passé, ainsi qu'a esté dit, le suppliant de luy vouloir conserer le baptême tout à l'instant. Ce que le Pere luy accorda volontiers, pour ce qu'il l'auoit auparauant suffisamment instruit. Il luy bailla à nom Paul, puis qu'il auoit imité l'Apostre Sainct Paul en sa conuersion, qui fut l'une des plus signalées, qu'on ait entendu estre aduenue en ce temps là, & d'où s'ensuyuit plus de bien pour l'exaltation & l'accroissement de la foy Chrestienne: car premierement tous les autres Iogues ses disciples esmeuz de l'exemple de leur maistre & superieur, quitterent leurs superstitions, & se rengerent avec luy sous l'enseigne de IESVS-CHRIST, si bien qu'eux mesmes brusloient ou mettoient en pieces les Idoles, qu'ils auoient en leurs grottes. Et le P. Gaspar apres auoir plâté vne Croix au sommet de leur Monastere, pour seruir comme de trophée de la victoire, que nostre Seigneur auoit gagnée contre Sathan, dedia ce mesme tēple, qui leur seruoit de Pagode,

*Visite du
Prelat
des Iogues.*

*Se res-
sente à
estre
Chre-
tien.*

*Est bap-
tizé &
appelé
Paul.*

*Leur mo-
nastere
conuert
en Egli-
se.* à l'honneur de IESVS-CHRIST, & de sa sainte Mere. Il y eut encore plusieurs autres Gentils, qui laisserent le culte des Idoles, & se conuertirent à la foy Chrestienne, incitez par ceste conuersion, qui fut estimée si admirable, qu'on ne faisoit qu'en parler en Ormuz, & autres quartiers d'alentour tout vn long temps.

*Paul de-
sire aller
à Rome.* Apres cela le mesme Paul desirant veoir de ses propres yeux cest appareil magnifique, qui luy auoit esté representé en vision, & contempler en sa source la beauté & pureté de ceste fontaine de vie, à sçauoir de l'Eglise Catholique, il voulut aller à Rome: & à ceste occasion passa d'Ormuz à Goa, & de là en Portugal avec la flotte, que menoit Emmanuel de Lima, qui estoit Gouverneur de la forteresse d'Ormuz, au mesme temps que ce logue fut conuert, lequel il presenta au Roy de Portugal Iean troisieme, qui en fut extremement ayse, l'estimant pour l'une des plus rares merueilles de l'Asie. Mais comme il estoit sur le point de

*Meur
en Portu-
gal fort
sainte-
ment.* l'enuoyer à Rome, nostre Seigneur appella à foy ledit Paul, lequel fit vne tres-belle mort, donnât des grands signes, qu'il estoit non seulement du nombre des appelez, mais aussi des esleuz pour la vie eternelle. Telles furent les occupations du P. Gaspar Barzé en Ormuz l'espace de trois ans ou enuiron, qu'il y fut: lesquels n'estant encore du tout expirez, il reçut vne lettre du B. P. Xa-

*Le Pere
Gaspar
est ap-
pellé à
Goa.* uier, par laquelle il estoit appelé à Goa, pour aller de là au Iapô, ou à la Chine, ainsi qu'il pensoit. Ceste nouuelle resiouïst merueilleusement le P. Gaspar, pour le grand desir qu'il auoit d'endurer beaucoup d'incommoditez, disettes, persecutions, & la mort mesme, pour l'amour de nostre Seigneur, oublié de tous les traux, qu'il auoit souffert à Ormuz, & se disposant pour en subir d'auantage. Il tasche donc de se retirer tout bellement de l'Isle sans en faire semblant: car il sçauoit bien, que si les Chrestiens d'Ormuz estoient aduertis de son depart, ils feroient tout ce qu'ils pourroient, pour empescher qu'il ne leur eschapaît. Mais il sçeuât si bien faire que, sans estre apperceu d'aucun, il s'en va rendre au port, & prent vne fregate, avec laquelle il se va ioin- dre à la flotte d'Antoine de Norogna, qui estoit en haute mer, & s'embarque avec luy, d'ou il arriue heureusement à Goa, quel- que mois auant le retour du Japon du B. P. Xavier. Or inconti- nent que le P. Gaspar fut abordé à Goa, il commence à prescher non seulement les Dimanches, & iours de feste, mais six & sept fois la sepmaine, voire quelquefois dix ou douze, avec vn tel co-

cours, & affluence de monde, qu'il estoit souuent contrainct de prescher en vn grand champ, ou en quelque autre lieu vaste: car il n'y auoit aucune Eglise, qui fut capable de receuoir tant de gens. Les mouuemens & affections sainctes, qu'il cauſoit ez cœurs de ses auditeurs, n'estoient pas moindres, que celles qu'il auoit esineu à Ormuz, & encores à Goa la premiere fois qu'il y fut: car il n'auoit pas lors moins de serueur n'y d'autorité qu'au parauant. Les larmes & les pleurs, qu'on espandoit en son sermon, & sur tout le changemēt de mœurs, qu'il y eut en beaucoup de personnes, qui menoient vne vie fort desbordée, monstroient assez les grandes graces, que Dieu luy auoit communiquées. Mais ce qui declara d'auantage le profit qu'il y faisoit fut, que la ville voyant combien il importoit pour son bien, de retenir vn tel personnage, fit si grande instance au P. Xavier, quand il fut de retour du Japon, afin qu'il le leur laissast, que le Pere iugea estre pour le plus grand seruice de Dieu, qu'il y demeurast: & partant il le leur accorda. Car il voyoit bien que le fruit qu'on fait es villes capitales d'un estat, se deriue par tous les mēbres d'iceluy, à cause du concours des gens qui y abordent de toutes parts: & le mesme en est il des lieux ou les Roys & Princes tiennent ordinairement leur Cour. Doncques le P. Xavier fit deffence au P. Gaspar, de sortir de l'Isle de Goa, l'espace de trois ans, comm'il luy auoit fait de sortir de l'Isle d'Ormuz, quand il y alla, & ce pour la mesme cause. Il le constitua pareillement Recteur du College de Goa, & encore vice-Prouincial de tous ceux de la Compagnie, qui estoient en l'Inde, en son absence. Or comme chose aucune n'eust sceu aduenir moins preueuë ou attendue du P. Gaspar que ceste cy, il ne luy en eust aussi sceu arriuer, qui luy vint plus à contre-cœur; tant à cause de sa profonde humilité, que du desir qu'il auoit, d'aller espandre la lumiere du Sainct Euangile, par toutes ces contrées du Leuant, & son sang mesme, pour la deffence d'iceluy. Neantmoins il se vainquit & surmonta soy mesme de telle sorte, qu'il est croyable que la victoire, qu'il emporta sur soy en ce poinct, luy fut d'autant de merite, & peut estre de plus, que s'il eust conuertiy tout l'Orient à la foy de IESVS-CHRIST, & eust emporté la couronne du martyre. Là dessus le P. Xavier partit de Goa, pour aller à la Chine, & le Pere Gaspar commença de rechef à s'addonner avec plus de serueur & de zeile que iamais, tant à sa propre perfection, & de ceux de

estat de retour à Goa y presche avec grand serueur & profit.

Les habitants le demandent incessamment au P. Xavier.

Ille leur accorde.

Les occupations du Pere

Gaspar,
& ce
qu'il in-
stitua à
Goa.

Devote
& sain-
te cou-
stume.

Le tres-
pas du
P. Gas-
par Bar-
zé.


Ceux de
la Com-
pagnie qui
luy ont
succédé à
Ormuz.

la Compagnie, qui luy auoient esté baillés en charge, qu'au salut & aduancement spirituel des habitans de Goa: parmy lesquels il institua quelques coustumes fort bonnes & vtils, qui durent encore, au grand profit des ames. Entre autres il donna commandement à ceste-cy. Tous les Védredys de l'an on faict vn sermon de la Passion de nostre Seigneur en l'Eglise de la Compagnie, & sur la fin d'iceluy, lors que tout le monde est plus esmeu à deuotion, pleurant amerement ses pechés, qui ont esté cause des douleurs que IESVS-CHRIST endura en sa mort, l'on monstre vn grand Crucifix au maistre autel: & pendant que l'on chante le Pseume *Miserere mei Deus*, les lumieres esteintes, plusieurs se disciplinent à bon escient. Cela se faict sur le tard, & cause de grands mouuements de contrition & repentée des pechés comme tesmoignent les larmes, que les assistans espandent. Or apres que le P. Gaspar eut institué ceste bonne coustume, & quelques autres semblables, cōtinuant tousiours à traualier pour la gloire de Dieu, & le bien des ames, affligeant continuellemēt son corps desia lassé, & affoibly, par tant de labeurs & penitences, vn iour estant en chaire, comm' il preschoit avec vne serueur extraordinaire, il luy suruint vn soudain defailemēt de cœur, si qu'il tomba dans la chaire mesme: toutesfois il reuint à soy, & on le porta au College de la Compagnie. Là ou tout aussi tost vne grosse fièvre le saisit, qui l'accabla dans peu de iours de telle façon, qu'il rendit l'ame à Dieu le 18. d'Octobre 1553. iour dedié à la feste de l'Euangeliste S. Luc, duquel non seulement il auoit fait l'office, preschant le S. Euangile, avec vn si grand zele, mais aussi imité les vertus, portant continuellement en son corps, la mortification de la Croix. Aussi faut il croire, que nostre Seigneur l'a recompensé de tant de trauals, qu'il auoit endurez en sa vie, pour son honneur & seruice, luy donnant vne tres-riche couronne de gloire. Voyla quant au P. Gaspar Barzé, la memoire duquel est encore si agreable parmy les habitans d'Ormuz & de Goa, qu'ils n'en peuuent parler sinon avec grande loüange, & admiration de sa vertu, & des choses merueilleuses, qu'il a fait en sa vie. Au reste quant à la ville d'Ormuz, apres que le P. Gaspar en fut party, le P. Gonzale Rodrigues de la mesme Compagnie y fut enuoyé, pour continuer ce, qui auoit esté si heureusemēt commencé: mais parce qu'il estoit fort maladis, on l'en tira quelque tēps apres, & en sa place y vint le P. Antoine Eredea. Finalement les

Pereş Aires Brandan & Alexis Diaz y furent enuoyez, & avec les aumosnes des gens de bien y bastirent vne Eglise, & vne maison pour loger ceux de ladite Compagnie, qui se tiendroyent là. Mais depuis on a quitté le tout aux Peres de l'ordre de S. Dominique, ou comme disent quelques vns à ceux de S. Augustin, auxquels a esté assigné ce champ de nostre Seigneur, pour estre cultivé par leur sainte doctrine & bons exemples. Et il faut croire, qu'ils l'ont si soigneusement fait, que beaucoup d'ames ont esté gagnées à nostre Seigneur par leur moyen, bien que nous n'en ayons pas des memoires en particulier, sinon de la conuersion de la Roynie d'Ormuz, qui aduint l'an 1586. combien qu'elle s'alla faire baptiser à Goa, menant quant & soy vn sien petit frere, qui receut aussi le baptisme avec elle, & de là fust conduit en Portugal par Matthias d'Albuquerque (lequel auoit esté au parauant Gouverneur d'Ormuz) pour estre présentée au Roy d'Espagne Philippe 2. La Roynie se maria depuis avec vn Seigneur Portugais, nommé Antoine d'Azeuedo Coutigno : mais ayant vescu demy an ensemble, en grande paix & concorde, comm' il s'en voulut aller à Ormuz leuer les rentes de la Roynie sa femme, la laissant à Goa cependant, elle conceut vne si grande tristesse de l'absence de son mary, qu'elle en mourut le mesme iour qu'il sortit du port de Goa. Sa mort fust grandement regrettée de toute la ville, à cause que c'estoit la premiere de tous les Roys ou Roynes d'Ormuz, qui eust embrassé nostre foy. Mais à tant de ce païs, passons maintenant en l'Inde.

*De l'Empire du grand Mogor ; de sa puissance, richesses,
& autres qualitez.*

CHAPITRE VIII.

 EST belle, riche, & ample Prouince, que les Romains appelloient iadis *India citerior*, ou *India intra Gangem*, l'Inde de deça le Ganges, & à present nommée *Indoita*, est maintenant possédée (au moins pour la plus grande partie) par vn puissant Monarque, qu'on appelle cōmunément le grand Mogor, à cause que les habitans du premier païs, que ses deuiens ont gagné en l'Inde, se nomment Mogores. Il descend de la race de ce grand Tamerlan, ou Tamberlan, appelé le fleau de Dieu, Roy des Tartares, lequel faisant la guerre contre l'Empe-

reur des Turcs Bajazet premier de ce nom, le vainquit en bataille rangée, & l'ayant fait prisonnier le menoit tousiours quant & soy, enfermé dans vne cage de fer, à guise d'un oiseau, & lors qu'il prenoit son repas, luy iettoit quelques reliefs de table, comme si ç'eust esté vn chien. De mesme quand il vouloit monter à cheual, il luy faisoit prester le dos, & s'en seruoit comme d'un marche-pied, pour prendre aduantage, le trainant de la sorte par tout ou il alloit, attaché à vne chaisne de fer, ou bié d'or, comme quelques vns disent. De cestuy-cy donc estoit yssu par droicte ligne masculine, teluy duquel nous parlerons en ce lieu. Il estoit sixiesme nepueu de Tamberlan, ou comme parlent quelques autres, le huitiesme Roy apres luy, qui reuiet tout à vn. Il nasquist en la Prouince de Chaquata, qui cōfronte du Midy avec l'Indostan; du Ponant avec les Perses; du Leuant avec les Tartares, combien que les habitans semblent plustost Turcs, que Tartares ou Perses: car ils parlent (au moins pour la plus-part du peuple) le langage Turquesque; non pas toutesfois si poly & si naïf, que les mesmes Turcs. Mais les Gentils hommes & autres, qui suyuent la Cour, vsent de la langue Persienne: bien qu'en la prononce ils soyent vn peu differens des Perses, & en quelques mots aussi. Ce Roy auoit vn frere, qui estoit Prince ou Roy de Cabul, qui est vn Royaume par dessus celuy de Cambaya vers le Nort, entre la Perse & l'Inde. Les anciens l'appelloient Arachosia, ainsi qu'estiment quelques vns. Et ça esté le seul païs, que les successeurs de Tamberlan ont tousiours retenu, ayans esté deboutez de tous les autres Royaumes, Prouinces, & Seigneuries, que leur ayeul auoit conquesté: combien que par apres ils en ont recouuré quelques vns, & en ont gaigné d'autres, qu'ils possèdent à present de la façon qui s'ensuit.

Chaquata Prouince & ses confins.

Cabul Royaume

Nepueux & successeurs de Tamberlan & leurs aduerses. Les nepueux & successeurs du grand Tamberlan, ne respondans pas à la prouesse & vaillance de leur ayeul, furent tellement guerroyez par les Patanes (qui sont les mesmes que les Parthes) qu'en fin ils furent despouilleez de tout ce, que leur ayeul auoit acquis, excepté de la Prouince ou Royaume de Cabul. Les arriere-nepueux & successeurs du mesme, se voyas acculez à vn si petit coing de leur ancien domaine, tourment visage à l'ennemy, & luy font teste, si bien que non seulement ils ont fait retirer les Parthes du païs, dont ils les auoyent deboutez, mais encore se sont enparez de tout ce qu'on appelle maintenant le Royaume

du grand Mogor. Ce fust le Roy Baburxa ayeul de celuy duquel nous parlerons, qui enuahist ceste partie de l'Indostan, chassant de là les Parthes, & les confinant iusques aux Isles de Bengala. Mais apres la mort de Baburxa, ils reprindrent courage, & feirent la guerre fort & ferme contre son fils, nommé Emmaupaxda, lequel ils pourfuyirent si viuement, qu'ils luy feirent prendre la fuite avec deshonneur, vers son ancien patrimoine, le Royaume de Cabul. Lors Emmaupaxda voyant qu'il n'auoit pas assez de forces, pour resister à des ennemys si puissans, eust recours au Roy de Perse, pour l'ayder à se remettre en ses estats & Seigneuries. Le Persan luy promet ce secours, moyennant qu'il voulust embrasser la Loy de Mahomet, selon l'explication de Haly, que les Perses suyuent. Emmaupaxda ayant accepté ceste condition, le Roy de Perse luy enuoye plusieurs milliers de soldats, avec l'ayde desquels il reprint tout ce que son pere Baburxa auoit possédé, chassant du tout les Parthes du Royaume de Mogor. A cestuy-cy a succédé celuy, duquel nous faisons icy mention: lequel s'appelloit de son propre nom Echebar, ou comme quelques autres disent, Achebar; neantmoins il s'intituloit en ses lettres Royaux Mahumet Zelabdin Echebar; comme nous verrons cy apres.

Donques Echebar continuant la guerre, que ses deuanciers auoyent eu contre les Parthes, ou Patanes (comm'on les appelle maintenant en l'Inde) enuahist en les chassant le Royaume de Bengala, duquel ils s'estoyent emparez, & les enferma en quelques Isles d'iceluy: combien que depuis ils luy ont encor donné beaucoup d'affaire, ainsi que nous dirons bien tost. Apres cela il eonquist le Royaume de Cambaya, & depuis plusieurs autres de l'Indostan, continuant tousiours, tandis qu'il a vescu ses conquestes: de sorte qu'il estoit desia arriué bien près des terres des Roys de Narsinga, de Calécut, & autres, qui tiennent la coste de la mer: voire-mais de l'Isle de Goas; si qu'il estoit fort redouté en tout ce pais là. Il auoit d'ordinaire en sa Cour plusieurs Roys, partie desquels il auoit soubmis à son Empire par force d'armes, partie qui s'estoyent rendus à luy volontairement: de peur qu'il ne leur ostast leurs Royaumes. L'on y en a compté quelques fois iusques à vingt, qui auoient tous droit de porter couronne, & estoient aussi puissans pour le moins, que celuy de Calécut. Outre ceux-cy il en y a d'autres, qui se tiennent ordinairement en leurs Ro-

*Babur-
xa con-
queste
une par-
tie de
l'Indo-
stan.*

*Echebar
fils d'Em-
mau-
paxda
cōqueste
plusieurs
autres
pays.*

*Vingt
Rois en
sa Cour.*

yaumes: & pour estre exempts du service personnel, que les autres font au Roy, ils payent vn plus gros tribut, que ceux qui suivent la Cour. Quelques vns de ces Roys sont Payens, & les autres Mahometains: mais Echebar se fioit plus de ceux-là, que de ceux-cy, bien qu'il professast, au moins à l'exterieur, le Mahometisme. Quant aux bornes de son Empire, on ne les peut encore bonnement assigner; car durant sa vie il a tousiours fait des nouvelles conquestes: & il est mort le 27. d'Octobre 1605. Toutesfois ce qu'il possedoit l'an 1582. estoit borné du costé d'Occidēt par le fleuve Indus, & les confins de Perse plus Septentrionaux: de l'Orient il auoit les mesmes limites, que le Royaume de Bengala, duquel il estoit maistre; au Septentrion il auoit la Tartarie, & au Midy la mer Oceane, qui arrouse les costes de Cambaya: mais par delà il n'auoit rien du riuage de la mer, sinon en Bengala: parce que les Roys Malabares, les Portugais, & le Roy de Narsinga, avec quelques autres, occupent tous les ports de mer, & quelques pieces encore de la terre ferme de l'Indostan: le reste est au grād Mogor. L'on faisoit estat, que ce qu'il possedoit alors tout à vn tenant, auoit six cents lieuës de longueur, & quatre cēt de largeur: mais depuis il s'est emparé du Royaume de Caximir, & de quelques autres. Le païs est (pour la plus-part) fort plantureux & abondant en viures: car entre ces deux riuieres tant renommées Indus & Ganges, qui avec plusieurs tours, & retours, arrousent quasi tout ce terroir à guise d'un iardin, il en y a encore neuf autres, qui se vont rendre dans ces deux: c'est à sçauoir Taphy, Heruada, Chambel, Tamona, qui se perdent dans le Ganges: puis Catamel, Cebcha, Ray, Chenao, Rebeth, qui s'engolfent dans l'Indus, appelé des habitans Schind. D'où l'on peut iuger, qu'elle doit estre la fertilité de ceste Region, & combien grande la richesse du grand Mogor. Car tous les Royaumes ou Prouinces qu'il conqieste, luy sont appropriées de telle sorte, qu'encore qu'il constitue ses Capitaines, ou les Rois mesmes, à qui il les a ostez, ses Lieutenans esdits païs, il retire neantmoins la troisiēme partie du reuenu d'iceux: & le reste est pour l'entretienement de leur personne, des soldats, cheuaux & elephans, qu'ils doiuent tousiours auoir prests, pour les occurrences qui se peuuent presenter. D'auantage ses Royaumes & Prouinces sont encore fort riches, à cause du grand trafic & commerce qu'il y a, tant en drogues, espiceries, perles, & autres pierres precieuses, comme en

Les bornes de son Empire.

Riuieres de l'Indostan.

Richesses du grand Mogor.

ciuette,

ciuette, en toiles de cotton, draps d'or, draps de laine, tapis, velours, & autres draps de soye. Brief en toute sorte de metaux. Ils ont aussi grande quantité de cheuaux, qu'ils font venir de Perse & de Tartarie. Mais sa puissance en guerre est encore plus grande: car il tient en diuers endroicts de ses terres, plusieurs Capitaines souldoyés, qui ont chascun les douze ou quatorze mille cheuaux: lesquels ils sont obligés d'entretenir du reuenu des Prouinces que le Roy leur baille, ainsi qu'a esté dit. Il en y a d'autres moindres que ceux-cy, qui ont les sept ou huit mille cheuaux, & chacun d'eux a pareillement beaucoup d'Elephans duiçts à la guerre. Le Roy nourrist en ses escueries cinq mille de ces Elephans tout prests à marcher, quand il voudra. Mais comptant ceux qu'il a en tout son Royaume, l'on estime qu'il peut mettre en campagne cinquante mil Elephans tous bien armez, de la façon que nous dirons bien tost. En vne guerre, que cest Echebar feit contre son frere le Prince de Cabul, qui venoit contre luy avec grande puissance, outre beaucoup de milliers de soldats à cheual & à pied, qu'il laissa ez lieux de garnison, & autres endroicts de son Royaume moins assurés, il mena cinquante mille hommes à cheual tous gens d'eslite, & cinq mille Elephans de combat, outre l'Infanterie qui estoit presque innombrable. Quand il veut faire la guerre, il amasse ses troupes de tous les peuples de son Royaume, comme des Mogores, des Coronans, des Parthes, des Torquimaches, des Boloches, des Guzarates, & autres Industans, qui sont partie Payens, partie Mahometains. Il mene à la guerre vn grand nombre de pieces d'artillerie: lesquelles il a accoustumé de mettre à l'auant-garde, & les Elephans à l'arriere-garde, qui sont armés en ceste sorte. Ils portent sur le front vne lame de fer ou de cuir tres-dur, pour parer les coups. On leur attache à la trompe des espées, & aux deux longues dents, qui leur sortent hors de la bouche, à chascune vn poignard. Ils portent sur leur dos quatre petites tourelles de bois, & autant de soldats, qui tirent delà tantost des arcs, tantost des arquebuzes ou mousquets. Celuy qui gouuerne l'Elephant est armé ou de cuyrassé, ou de lames de fer faictes à escailles. Ils ne mettent pas les Elephans ainsi armés à l'auant-garde, partie afin de n'empescher aux soldats la veuë de l'ennemy, partie aussi afin que si on les blesse, ils ne rompent pas les rangs des soldats, & ne causent quelque desordre en l'armée. Mais ils les tiennent à l'ar-

Sa puissance en guerre.

Elephans duiçts au combat.

Comme sont armez les Elephans.

Pour quoy ils ne les mettent à l'auant-garde.

riere-garde, afin que si l'ennemy vient iusqu'à là, on luy iette en face ceste grande troupe d'Elephans, pour l'arrester. Car ces bestes, bien qu'elles ne soient armées, font vn grand carnage avec la seule trompe, prenant avec icelle ceux, qu'ils rencontrent des ennemis, & les ayant iettés en l'air, si haut qu'ils peuuent, les font tomber à terre, & puis les foulent aux pieds, ou bien heurtent à guise de moutons du front, qu'ils ont garny de fer, contre ceux qu'ils rencontrent.

L'habitation ordinaire du grand Mogor.

L'anciēne demeure du Roy de Mogor souloit estre au Royaume d'Industā, en la cité de Deli, mais Echebar la chāgée premierement à vne autre appelée Agra : & parce que deux enfans luy moururent là, il en fit bastir vne nouuelle qui estoit tres-belle, nommée Pateful ou Fatefur. Mais depuis qu'il a conqūesté le Royaume de Lahor, il fait d'ordinaire sa residence en la ville de Lahor, capitale de ce Royaume. L'an mil cinq cens quatre vingts & deux, qui fut lors que les premiers Peres de la Compagnie al-

Son vestement.

lerent à sa Cour, il estoit aagé de 40. ans, ou enuiron, homme robuste, & de mediocre stature : il portoit des accoustremens entretissus de fil d'or, & vn Turban à la teste. La robbe de dehors ne passoit pas les genoux, les hauts de chausses luy alloient iusqu'aux talons ; & aux pieds il portoit vne chaussure faicte à nostre mode : mais la façon de ses souliers estoit particuliere : car il l'auoit inuentée de sa teste. Sur le front il portoit plusieurs rangées de perles ou pierres precieuses. L'habit des Europeans luy agreoit fort, & quelquefois il prenoit plaisir à se vestir d'vn accoustrement de soye noire, faict à la Portugaise ; mais c'estoit seulement en priué, & non en public. Il auoit quasi tousiours l'espée au costé, ou pour le moins si pres de luy, qu'il y pouoit soudain mettre la main dessus. Les gardes de son corps, qu'il auoit continuellement aupres de soy, se changeoient chascue iour de la sepmaine, comme aussi tous les officiers, & gens de seruice ; de telle façon neantmoins, que de huit en huit iours, les mesmes

Ses qualitez.

venoient à le seruir à leur tour. Il estoit homme de grand esprit & entendement, accord, prudent, & aduisé, mais sur tout fort humain & debōnaire, & avec ce tres-magnanime & courageux, pour entreprendre & executer des grandes choses. Il se mōstroit fort affable, courtois & familier aux grandes personnes, combien qu'avec cela il gardast tousiours la majesté & grauité conuenable à sa personne. Il sembloit estre bien enclin à la vertu, & porter affe-

ction aux estrangers, principalement aux Chrestiens, estant bien aise d'en auoir tousiours quelques vns aupres de soy. Il estoit fort curieux & desireux d'apprendre diuerses choses, & se monstroit bien entendu, non seulement en ce, qui concerne le faict de la guerre, & du gouuernemēt des affaires, mais encore en plusieurs arts mechaniques. Il prenoit grand plaisir à voir fondre des canons & pieces d'artillerie, si que dans son propre palais il faisoit faire toute sorte de pieces, ou bastons à feu. Brief il auoit la congnouissance de beaucoup de choses, & sçauoit discourir des loix de diuerses sectes: car il estoit curieux de s'informer de cela principalement. Et combien qu'il ne sçeut ny lire, ny escrire, il se plaisoit neātmoins de traicter avec gens doctes, & en auoit tousiours aupres de soy vne douzaine, qui propoisoient deuant luy plusieurs questions: lesquels il entendoit volontiers discourir, tantost d'une matiere, tantost d'une autre, & notamment lors qu'ils racontoient quelques histoires, estimant qu'avec cest exercice ordinaire, il pourroit suppleer au defaut des lettres. Il estoit melancholique de sa nature, & subiect au mal caduc, tellement que pour se tenir ioyeux, il s'entretenoit en diuers exercices plaisans & recreatifs, comme à voir combattre des Elephans, des Chameaux, des Buffles, ou mesmes deux cocqs s'entrebattre, ou deux montons cottir & hurter de la teste & des cornes l'un contre l'autre: pareillemēt à voir iouer à l'escrime. Quelquefois aussi il faisoit combattre deuant soy à la façon des anciens Romains des gladiateurs, ou escrimeurs à outrance, iusques à s'entretuer les vns les autres. Il auoit encor des Elephans & des Chameaux, qui estoient apprins à dancier à la cadance de certains instrumēs, & à faire tout plein d'autres gentilleffes: mais au milieu de tous ces esbats (qui est vne chose remarquable) il despechoit beaucoup d'affaires, mesme de consequence. Il alloit souuēt à la chasse des bestes sauuages, qui foisonnent en ces quartiers. Et pour les prendre il se seruoit de Pantheres, au lieu de chiēs de chasse: car en ce pais là on en appriuoise quelques vnes, & les apprend on à chasser comme nous faisons icy les chiens. Il ne se plaisoit pas beaucoup à l'oïselerie, combien qu'il eust des faucons, & autres tels oyseaux de proye, tres-bien duiets à cela, & des maistres aussi fort expers à chasser. Mesmes il en auoit quelques vns, qui estoient si bons archers, & qui tiroient si droit, qu'ils ne manquoient guere souuent vn oyseau, auquel ils visassent: jaçoit qu'il

Ses exercices.

Ses passe-temps.

Ses fa-çons de chasser.

volast en l'air, & que leurs fleches ne fussent pas enplumées. Pour prendre des cerfs sauuaiges il auoit d'autres cerfs priués, qui portoient des lacqs és cornes, avec lesquels les cerfs sauuaiges, qui vouloient hurter de la teste & des cornes contre les appriuoisés, estoient enlaçez, & soudain les veneurs, qui estoient aux aguets, y accouroient, & les prenoient. De mesme en allant à la guerre, il auoit accoustumé de chasser en ceste sorte. Il faisoit enuironner quelque grande forest par trois ou quatre mille soldats, de façon qu'ils se tenoient les vns les autres par les mains, puis en faisoient entrer d'autres dans la forest, afin qu'ils fissent sortir les bestes sauuaiges, iusques aux extremités du bois, & lors ceux qui estoient tout à l'entour vers ces endroiets, les prenoient : ou si elles leur eschappoient, on leur en faisoit porter la peine, selon qu'estoit la faute. Voyla quant à ses exercices recreatifs. Pour le regard des plus serieux, afin qu'on peut traicter avec luy des affaires d'importance, il sortoit deux fois le iour en public, pour donner audience à toute sorte de personnes. A ces fins il auoit dans son palais deux belles & grandes basse-cours, & en chascune d'icelles vn throne haut esleué de grand prix & valeur. En la premiere entroit toute sorte de gens, & là il prestoit l'oreille à ceux, qui vouloient luy faire entendre quelque chose : mais en la seconde, personne n'entroit, sinon les Capitaines & grands Seigneurs de son Royaume, avec les Ambassadeurs, qui venoient de la part des Roys estrangers, pour traicter avec luy de quelques affaires de consequence. Il tenoit aupres de soy huiet personnaiges fort experimentez, & de bon iugement: lesquels il auoit departy pour tous les iours de la sepmaine: tellement qu'un chacun d'iceux auoit son iour destiné, pour introduire les personnes, qui vouloient parler au Roy : & ceux-cy prenoient leurs memoires, & encore leur seruioit comme de maistres de ceremonies, pour les instruire, mesmement s'ils estoient estrangers, comment ils deuoient faire la reuerence au Roy, & se comporter tandis qu'ils estoient deuant luy. Car en cela ils vsent de beaucoup de ceremonies, & entre autres ils ont accoustumé de baïser les pieds du Roy, quand ils le saluent. En donnant audience il a aupres de soy quelques Secretaires, qui escriuent & remarquent soigneusement tout ce qu'il dict, & ce qu'il conclud: qui est vne façon de faire fort vsitée entre les Princes de Perse, & autres de l'Orient. Pour le faict de la Iustice, & de la Police, il a des Magistrats, qui

*Comment
il donne
audience.*

iugent en dernier ressort, & d'autres aussi du iugement desquels on peut appeller: mais tous prononcent leur sentence de vive voix, sans la coucher par escrit. Or ce Roy, duquel nous traictōs, auoit grand soing de faire administrer iustice à vn chacun. Il estoit neantmoins fort reserué à donner le chastiment, mesmes quand c'estoit de mort. En la ville ou il se tenoit personne n'estoit executé à mort, qu'il n'eust esté au prealable aduertý, voire iusques à trois fois, comme disent quelques vns. Les supplices qu'il faisoit donner, n'estoyent pas d'ordinaire cruels. Il est bien vray qu'il fist exposer quelques vns, qui auoyent cōspiré sa mort, aux elephans, pour estre tuez d'iceux. Aussi faisoit-il quelques fois empaler les mal-faicteurs à la mode des Turcs. Les larrons, ou escumeurs de mer, s'ils ne tuoyent pas les gens, auoyent le poing couppe: mais les meurtriers, voleurs, & adulteres estoyent ou estranglez, ou esgorgez, ou attachez en croix, selon la qualité de leur forfait. Ceux qui auoyent commis des fautes plus legeres, apres auoir esté fouettez, estoyent renuoyez libres. Brief on voyoit reluire en ce Prince vne grande clemence & debónaireté, mesmes enuers ceux qui l'auoyent offensé. Il pardonna vne & deux fois à vn de ses principaux officiers, qui auoit esté cōuaincu d'vne trahison & conspiration contre sa propre personne: & le remit en sa bonne grace se seruant de luy comme au parauant. Mais l'autre s'estant oublié iusqu'à là, que de rechoir pour la troisieme fois en la mesme faute, le Roy le fist mettre en croix. Rarement entroit-il en cholere: mais quand il s'y mettoit, c'estoit à bon escient, combien que son courroux ne fust pas de longue durée. Auant qu'entreprendre quelque affaire de consequence, il en consultoit avec ceux de son conseil: mais il prenoit de soy telle resolution que bon luy sembloit. Aucunes fois il declaroit à ses Conseillers d'estat, ce qu'il iugeoit estre expedient de faire, pour voir s'ils le trouueroient bon; & s'ils l'approuuoient, ils luy respondoient ainsi: Paix soit au Roy nostre Sire; mais s'il en y auoit quelqu'un, qui luy proposast là dessus des difficultez, il l'escoutoit volontiers, & respondoit à ses obiections, rendant raison de son aduis: il changeoit aussi quelques fois de resolution, pour les raisons qu'on luy proposoit. A sa Cour on parle communement le langage Persan: toutes fois les gens doctes & les Prestres de Mahomet, parlent l'Arabique. Voila ce que nous auons trouué

*Commēt
il fait
admini-
strer ius-
tice.*

*Les pei-
nes con-
stituees
aux mal-
faiteurs.*

*sa ele-
mēce &
iustice.*

des choses de ce grand Monarque, & de son estat. Voyons maintenant comme la foy Chrestienne luy fust annoncée.

A quelle occasion le grand Mogor enuoya querir à Goa des Peres de la Compagnie de I E S V S la premiere fois, & ce qu'ils firent pour le gaigner à I E S V S-CHRIST.

CHAPITRE IX.



AFIN d'entendre mieux ce qui esmeust le grand Mogor d'enuoyer querir à Goa des Peres de la Compagnie, il faut sçauoir que l'an 1578. le Vice-Roy de la couronne de Portugal en l'Inde, luy enuoya vn Ambassadeur nommé Antoine Cabral Portugais, accompagné de quelques autres de mesme nation. Or tandis qu'ils furent en sa Cour, il espia & considera soigneusement leurs mœurs, & maniere de viure, faisant iugement par là, quels pouuoient estre les autres Chrestiens, dont il auoit ouy souuent parler. Et il se pleust tellement à leur façon de proceder, qu'il monstra auoir vn grand desir d'entendre qu'elle estoit leur loy, & croyance, de façon que l'Ambassadeur fust contrainct de luy declarer le mieux qu'il sceust les principaux poincts de nostre foy, luy donnant encore cognoissance des Peres de la Compagnie, qui là preschoyent en l'Inde. Le Roy auoit aussi oüy parler de deux Peres de la mesme Societé, qui estoient allez l'an 1576. au Royaume de Bengala, & on luy auoit fait entendre, qu'il en y auoit en l'Inde plusieurs autres du mesme ordre qui faisoient profession d'annoncer la loy de I E S V S-CHRIST par toutes les contrées du monde. Finalement vn certain Portugais nommé Pierre Tauero homme d'entendement & de moyens, ayant demeuré plusieurs années en sa Cour, luy declara plus particulièrement quelques choses de la loy Chrestienne, & ce fust la cause pour laquelle ayant esté aduertý qu'en son Royaume de Bengala y auoit vn Prestre des Chrestiens homme de sainte vie, il le fist appeller tout exprés, pour s'informer de luy plus à plain de la loy qu'il professoit. Ce bon Prestre (le nom duquel ie n'ay pas trouué) estant arriué enuiron le mois de Mars de l'an 1578. à la ville de Pateful, ou le Roy tenoit sa Cour, fust tres-humainement accueilly de sa Majesté, & quelque temps apres le Roy luy fist entendre l'occasion, pour laquelle il l'auoit appelé, qui estoit à son

Le Roy
fait ap-
peller vn
Prestre
Chrestien.

dire , pour s'esclaircir de quelques doubtes , qu'il tenoyent suspens à iuger quelle loy estoit la meilleure, ou celle des Chrestiens, ou celle de Mahomet. Le Prestre luy declare briefuement les principaux articles que nous croyons , & luy faict voir à l'œil le peu de suc & de substance , qu'il y auoit en la loy de Mahomet. Le Roy monstra estre fort content d'auoir entendu ces choses:& fust tellement esmeu à quitter sa loy , qu'un soir parlant aux Ministres de la secte de Mahomet , qu'ils appellent Caziques , ou Mullas , il leur dict franchement qu'il estoit deliberé de faire ce que ce bon Prestre luy conseilloit, à sçauoir de prier Dieu qu'il le voulust esclaire de sa lumiere , pour cognoistre la verité , & le chemin de salut. A ce propos se trouua present son Soldan de la Mecque , qui estoit le principal de tous ses Mullas ou Caziques , lequel prenant soudain la parole de la bouche du Roy , vostre Majesté (dict-il) tient vne bonne loy , & n'a point occasion de doubter d'icelle, ny d'en chercher d'autre. Le Roy entendant cela , se leue tout incontinent du lieu ou il estoit assis , disant par deux fois, *Dieu nous vueille ayder, Dieu nous vueille ayder*, De façon qu'il sembloit par là declarer , qu'il n'estoit pas fort content & satisfait de sa loy , & qu'il desiroit auoir la cognoissance de quelqu'autre meilleure. Peu de iours apres il pria ce mesme Prestre de luy enseigner à parler Portugais : car il desiroit fort (à ce qu'il disoit) sçauoir cette langue , afin de pouoir mieux entendre la loy des Chrestiens qu'il luy enseignoit. Ce que ledit Prestre commença de faire avec tous le soing & diligence possible, & la premiere parole qu'il luy enseigna fust le tres-doux nom de IESVS. Le Roy print si grand plaisir à ce nom tres-sacre, qu'il ne faisoit que le repeter à chasque pas allant par la maison.

*Est en
doute
de sa
loy.*

Vn soir ce mesme Prestre disputant avec les Mullas , le Roy estoit aux escoutes dans sa chambre (car cela se faisoit en l'antichambre) & comme ce bon Prestre en disputant eust dict , que la loy de Mahomet estoit toute farcie de menteries & faussetez , les Mullas s'altererēt de cela si fort , qu'ils luy eussent mis la main dessus , si le Roy ne fust sorti de sa chambre , pour les en empêcher:& lors afin de les appaiser il leur dict , que c'estoit vne chose ordinaire à ceux qui disputent , de tenir leur opinion pour vraye , & la contraire pour fausse. Or entr'autres propos , que ce Prestre tint au Roy , il luy dict vn iour , qu'en la ville de Goa y auoit des Peres fort doctes & vertueux , qui auoyent espandu la cognois-

fance de la foy de IESVS-CHRIST en plusieurs endroits de l'Inde, & que s'il cōmunicoit avec eux ses doubtes, ils luy donneroient encore plus de satisfaction de ce qu'il desiroit sçauoir, touchant la loy Chrestienne, d'autant qu'ils estoient mieux versez que luy és saintes lettres. Ces propos firent venir enuie au Roy de voir & cognoistre ceux, desquels il luy parloit; tellement qu'il despecha bien tost apres vn Ambassadeur, & l'enuoya en l'Inde, avec vne lettre adressée aux Peres de la Compagnie residans à Goa, laquelle traduite en nostre langue, est de la teneur qui s'ensuit.

Lettre du Roy de Mogor aux Peres de la Compagnie. Forman Zelabdin Mahemet Echebar. Venerables Peres de l'ordre de S. Paul, Je vous fais sçauoir, comme ie vous suis fort affectiōné, j'enuoye Ebadola mon Ambassadeur, & Dominique Briz son interprete, pour vous prier de m'enuoyer deux Peres, qui soyent bien versez aux lettres, & qui portent avec eux les principaux liures de la loy, & les Euangiles: parce que j'ay vn tres-grand desir de cognoistre ceste loy, & la perfection d'icelle: vous priant bien fort de ne laisser de venir avec les mesmes Ambassadeurs, si tost qu'ils seront arriuez par deuers vous. Car ie vous fay sçauoir, que les Peres qui viendront icy, seront receus de moy avec tout honneur: & ie prendray vn singulier plaisir de les voir. Que si apres auoir esté bien informé de leur loy, & de sa perfection, selō que ie desire, s'ils s'en veulent retourner, ils le pourront faire quand bon leur semblera; & ie les en renuoyeray avec beau-coup d'honneur, & de courtoisie. Qu'ils ne doutent pas donc de venir: car ie les prens sous ma protection & sauuegarde. Voyla ce qu'il leur escriuit.

Enuoyer quelques uns d'eux. L'Ambassadeur, & son interprete estans arriuez à Goa donnerent la lettre du Roy aux Peres de ladite Compagnie, demeurans au College de S. Paul, lesquels furent extremement aises d'entendre de si bonnes nouuelles, estimans que nostre Seigneur vouloit descouurir à ce grand Prince les thresors de sa misericorde, & bonté: de maniere qu'un chacun d'eux desiroit auoir cet heur, que d'y estre enuoyé. Mais le P. Prouincial apres auoir recommandé par beaucoup de prieres & oraisons, cet affaire à Dieu, choisist & nomma pour cest effect les Peres qui s'ensuyuent; à sçauoir le Pere Rodolfe Aquaiua, qui estoit fils legitime du Duc d'Atria, frere du Cardinal Aquaiua, & nepueu du R. P. Claude Aquaiua General à present de la mesme Compagnie: l'autre fust le P. Antoine

Pere Antoine de Mōserrāt, qui a esté enuoyé par apres en *Æthio-*
pie, & faict esclaue des Turcs, selon qu'a esté raconté au troisi-
 eme liure, & le Pere François Henriqués. Or estans partis tous
 trois de Goa, en compagnie dudit Ambassadeur, & de son Inter-
 prete, dans vingt iours ils arriuerent à Surraté, qui est vn port de
 mer du Royaume de Cambaya, pardeça la ville de Daman, le-
 quel appartient au grand Mogor. Et apres beaucoup de trauaux
 & de dangers, ils arriuerent finalement à sa Cour, qui estoit en-
 core lors à Pateful, le 18. Feurier de l'an 1580. ayans demeuré en
 tout le chemin quarante trois iours. Le Roy pendant ce temps
 là, auoit si grand desir de les veoir, qu'il comptoit souuent (à ce
 qu'on leur dit depuis) les iours, qu'il estimoit leur rester de che-
 min, & demandoit chascque fois à ses gens, quand ils viendroient.
 De façon qu'incontinent qu'il sceust leur arriuée, il les manda
 venir à son Palais, là ou il leur fit vn tres-amiable accueil, & apres
 les entretint en diuerſes demandes, iusques à ce, qu'il fut nuict
 close. Mais auant qu'ils prinsſent congé de luy, il fit apporter
 grande quantité d'or & d'argent, pour leur en faire present: tou-
 tesfois ils le remercierent bien humblement, & n'en voulurent
 iamais rien prendre, s'excusans honnestemēt sur leur profession,
 & que quant à leur nourriture, pour laquelle le Roy les pressoit
 de recevoir ce qu'il leur presentoit, ils luy dirēt, que ce leur estoit
 assés d'estre en ses bonnes graces, & qu'ils esperoient, que Dieu
 les pouruoirroit de ce, qui leur seroit necessaire. Le Roy s'edifia
 fort de ce, qu'ils n'auoient voulu prendre cest argent, & ne par-
 loit tout vn long temps d'autre chose avec les Courtisans, que
 de cecy, monstrant en estre fort esmerueillé, & bien edifié.

*L'ac-
 cueil que
 le Roy
 leur fit.*

Trois ou quatre iours apres les Peres le furent encore voir, &
 il leur feit le mesme accueil qu'auparauant. Or d'autant qu'il
 auoit demandé, qu'on luy feit voir les liures de la loy du Crea-
 teur (entendant parler de la Sainte Escriture) les Peres luy ap-
 porterent tous les tomes de la Bible Royale, en quatre langues,
 bien reliez & surdorez, & luy en firent present. Le Roy reçeut
 ces liures sacrez avec tres-grande reuerence, prenant en main
 chacun d'iceux l'un apres l'autre, & le baisant; puis le mettoit sur
 sa teste, qui est vn signe parmy eux de grand honneur & respect.
 Ce qu'il faisoit en presence de tous ses Courtisans & Capitaines,
 qui estoient pour la plus part Mahometains. Il demāda par apres
 en quel de ceux là, estoient les Euangiles; & luy ayant esté mon-

*Ils luy
 presen-
 tent la
 S. Bible,
 & avec
 quel re-
 spect il
 la re-
 çeut.*

suré, il le regarda de rechef, avec vne particuliere attention, & le baïsa vn'autre fois, puis le mit sur sa teste, de mesme qu'auparauât:& apres les baïlla tous à ses gens, pour les porter en sa chābre, ou il fit faire vn bel armoyre tout expres pour les tenir. Les Peres luy firent encor present de deux beaux portraicts, l'vn qui representoit le Sauueur du monde, l'autre la glorieuse Vierge Marie sa saincte Mere. Cestuy-cy estoit faict à l'imitation de celuy, qui est à Rome, en l'Eglise de nostre Dame la Maieur. Le Roy print entre ses mains le portraict du Sauueur,& avec grand honneur & reuerence, le baïsa premierement, puis le fit baiser à ses enfans, qui estoient là aupres, & à plusieurs de ses Courtisans. Finalement il le remit en sa place. Quelque temps apres il appella de rechef les Peres, & fit aussi venir ses Mullas ou Caziques, afin qu'ils disputassent ensemble deuant luy, pour veoir quelle estoit la vraye Escriture saincte, & à laquelle il falloit adiouster foy. Les Peres prouuerent avec beaucoup de raisons, l'auctorité & certitude de l'Escriture saincte, contenuë au vieux & au nouveau testament, & ensemble monstrerent les faussetez & men songes, dont l'Alcoran est farcy. Les Mullas furent en ceste premiere dispute si mattez, qu'ils n'eurent que repartir; tellement qu'ils demurerent muets, sans pouuoir respondre vn seul mot. Le Roy sembla estre fort content & satisfait de ce, qu'il auoit entendu en ceste conserance, de façon qu'il diët par apres aux Peres, que leur loy luy sembloit bonne: mais qu'il desiroit qu'on luy declarast le mystere de la tres-saincte Trinité, & cōme Dieu auoit vn Fils, lequel se fut fait homme: car c'estoient les plus grandes difficultez, qu'il eust en nostre croyance. Les Peres luy rendirent raison de ce, qu'il auoit demandé, & il monstra pour lors en demurer satisfait aucunement; combien que non pas du tout. Car apres il les aduisa d'estre bien sur leurs gardes,quād' ils parleroient deuant les Sarrazins, à cause(disoit-il)qu'ils ne sont pas capables d'entendre vne si saincte doctrine, comme est celle, que vous preschés.

Les images de N. Seigneur, & de N. Dame luy sont offertes.

Dispute sur la vraye Escriture Saincte.

Des difficultés du Roy.

L'Alcoran de Mahomet confuté en trois disputes.

Les Peres auoient apporté l'Alcoran de Mahomet traduit en langue Portugaise, afin de pouuoir mieux rembarre ses faussetés, & monstrier euidentement les menteries, & contradictions, qu'il y a. Ce qui leur seruit de beaucoup, car ils les balottoient tres-bien, par l'entremise de leur interpreté. Trois iours apres la premiere dispute, ils en firent vne autre sur le Paradis, que la loy

Mahometaine promet à ceux, qui la suyuent : en laquelle les Peres renuerfêrēt cest infame, & brutal Paradis de Mahomet, avec des raisons si claires, & si euidentes, que les Mullas en rougissoiēt de honte, ne sçachās que respondre. Le Roy voyār qu'ils estoient au roüet, voulut prendre leur cause en main : mais aussi peu sçeust il se despêtrer des absurdités, qu'on luy monstroit à l'œil. Le Ieudy ensuyuant, ils attacherent encore la dispute avec les Mullas, pour la troisiēme fois, & traictèrent de l'orgueil & superbe de Mahomet, de sa meschante vie, & mœurs detestables, contre-quarrans à tout cecy l'humilité, & la pureté de vie de **IHSVS-CHRIST** : pareillement la verité de sa doctrine, la multitude des miracles, avec lesquels ell' a esté confirmée, & la saincteté de ceux, qui l'ont annoncée par tout le monde; aux fables, mensonges, & absurditez de la loy de Mahomet : laquelle n'a esté plantée qu'avec le fer & la lance. De ceste dispute les Mullas sortirent avec vne telle honte & confusion, qu'ils n'eurent depuis la hardiēse de comparoistre pour conferer avec les Peres. Le Roy cependant cōtinuoit tousiours de leur monstrier les mesmes signes de bien-veillance qu'auparuant.

*Confusio
des Mullas
ou
Ministres de
Mahomet.*

Quelques iours apres les Peres voulurent sonder, quel profit auroient fait en son endroiēt les disputes passées, & s'il estoit en deliberation de se rendre Chrestien. Ils l'allerent donc trouuer à ceste fin dans son Palais, prenans occasion de le vouloir visiter, ne l'ayans veu de quelques iours. Il les reçeut avec son accoustumée de bonnairété & bien-vueillāce. Or apres qu'ils eurent tenu ensemble quelques propos communs, les Peres le prierēt de leur vouloir donner audience à part. Ce qu'ayans obtenu, le Pere Rodolfe Aquauiuua, qui estoit Superieur des autres, commença son discours en ceste sorte. Vostre Majesté (Sire) escriuit vne lettre à nostre R. P. Prouincial, par laquelle il luy demandoit quelques Peres de nostre Compagnie, qui luy declarassent la loy de Dieu. Il nous a enuoyés tous trois vers V. M. & quant à nous ce nous a esté vn singulier plaisir, considéré comme ce grand Dieu nous a conduicts si heureusement deuant vn Prince si puissant, & si desirieux de cognoistre sa sainte loy. Ceste ioye s'accreuſt encore d'auantage, lors que vostre Majesté nous feit entendre, qu'elle ne desiroit aucune chose en ce monde tant, que de cognoistre quel le estoit la vraye loy, afin de l'embrasser. Cecy nous a obligez de penser iour & nuict aux moyens de paruenir à la fin, pour laquelle

*Pour
parler
des
Peres
avec le
Roy.*

„ le nous sommes venus : & apres auoir bien consideré le tout, &
 „ recommandé l'affaire à Dieu par prieres, & autres deuotions, il
 „ nous a semblé, que pour le bien & profit tant spirituel, que tem-
 „ porel de V.M. pour la conseruation de sa vie, & accroissement de
 „ ses estats ; pour l'assurance de sa conscience, & le salut de son
 „ ame, & de plusieurs autres, il seroit conuenable, qu'elle print du
 „ temps, pour entendre l'explication de la loy diuine : & cognois-
 „ sant comme c'est la vraye, & qu'il n'y en a d'autre, en laquelle on
 „ puisse estre sauué, qu'il luy pleust aussi la suyure, & donner con-
 „ gé qu'elle fut preschée en tous ses Royaumes, & Prouinces. Le

*Responce
du Roy.*

Roy ayant ouy ces propos, respondit que tout cest affaire estoit
 en la main de Dieu : lequel estoit puissant de faire ce qu'ils desi-
 roient, & que de son costé il ne souhaitoit rien en ce monde tant
 que cela. Il donna à entendre par son discours, que pour lors il
 auoit des raisons pertinentes à son aduis, pour lesquelles il ne se
 rendoit pas si tost Chrestien. Vne autrefois le mesme P. Aqua-
 uiua l'alla voir, pour luy donner les bonnes Pasques, d'autant que
 c'estoit la veille de la Resurrection de nostre Seigneur, dont le
 Roy monstra estre fort content, & fit beaucoup d'honneur au
 Pere, le retenât mesme pour parler ensemble, iusqu'à ce, qu'il fut
 nuict close. Il luy fit lors plusieurs questions, principalement sur
 le mystere de la Resurrection : & outre ce, luy demanda, quelle
 formule gardoient les Chrestiens, quand ils faisoient oraison à
 Dieu. Ce que luy ayant esté déclaré apres quelques autres de-
 mandes, il le congedia fort humainement.

*Autre
pour par-
ler.*

*De la grande esperance qu'on auoit de la conuersion du Roy, & d'une
 reuolte, qui suruint là dessus, & le fit refroidir.*

CHAPITRE X.



QUELQUES temps apres ces disputes & visites, le Roy
 scachant que la maison, ou les Peres logeoient, n'e-
 stoit guere propre pour eux, à cause du grād bruiet
 & tintamarre, que le brouillis & tracas du monde,
 qui passoit pardeuant icelle, caufoit, il commanda qu'on leur en
 baillast vne autre, fort commode, dans le pourpris mesme de son
 Palais. Ce qu'il fit aussi tout expres, pour les auoir plus près de
 soy, afin de les pouuoir aller voir plus souuent, ou les faire venir
 à soy, quand il voudroit, & seroit de loysir.

*De Roy,
fait lo-
ger les
Peres
dans son
Palais.*

doibt estre adoré avec toute sorte d'adoration. Apres ce, il s'assit à terre sur des tapis, & des cuyssins, comme c'est leur coustume. Les Peres s'assirent aussi de mesme, & lors il leur fist entendre, qu'il ne doubtoit aucunement que nostre loy ne fust la meilleure de toutes, & qu'il cognoissoit bien, que la vie & les miracles de IESVS-CHRIST estoient choses plus qu'humaines: mais qu'il ne pouuoit comprendre comme Dieu auoit vn fils.

*Estime
la loy
ebre-
siene la
meilleu-
re de
soutes.*

Vne autre fois apres plusieurs propos, il leur dict ces parolles: Peres, vous m'avez faict entendre beaucoup de choses de vostre loy par vos discours, qui m'aggreēt plus que tout ce que i'ay peu apprendre des autres loix, soit des Sarrafins, soit des Gentils: & quant à moy i'estime que celle des Sarrafins est la pire de toutes. Huiet iours apres il retourna voir leur oratoire, accompagné de ses trois enfans masles, & des principaux Seigneurs de sa Cour. Il fust tout vn long temps à regarder & considerer à part, chascune chose de celles, qui estoient en la chappelle, les loüant & prisant toutes, deuant ses Courtisans: puis il commande tant à ses enfans qu'aux autres de sa suite, d'oster les souliers des pieds, comme il fist luy mesme, selon qu'est la coustume des Mahometains, quand

*Le re-
spect
qu'il por-
toit aux
images
de X.^s.
& de
N.^e Dame*

ils entrent en leurs mosquées. Il sembloit porter grāde reuerence non seulement aux images de nostre Sauueur, & de la Benoisite Vierge: mais encore à celles des autres Saints. Tellement qu'il ordonna à ses peintres de luy en tirer des pourtraicts semblables de X.^s. à ceux, que les Peres auoyent en leur chappelle. Il donna aussi charge à vn orfeure, de luy faire vn reliquaire d'or, de la façon qu'estoit vn de cuyure, qu'auoyent porté les Peres avec les images de nostre Sauueur, & de la Vierge, grauées sur la couuerture d'un costé & d'autre. Finalement il leur dict auant que partir de là, que leur loy luy aggreoit fort: mais qu'il ne pouuoit comprendre deux articles d'icelle, à sçauoir de la Trinité, & de l'Incarnation: que s'ils faisoient en sorte qu'il peust bien entendre l'un & l'autre, qu'il se feroit Chrestien: voire (dict-il) si besoin est, ie quitteray mon Royaume pour ceste occasion. Or jasoit qu'il ne se resolut pas du tout, si est-ce qu'il procuroit avec grand soing, que tous ses vassaux s'affectionnassent à la loy Chrestienne, & luy mesme la preschoit, & haut loüoit à tout propos, monstrant qu'il estoit fort desireux que plusieurs l'embrassassēt, & ne faisoit quelques fois autre chose de tout le iour, que disputer contre la loy de Mahomet avec ses Mullas, qui sont fort ignorans, & ne

ſçauent pas meſme deffendre leur faux Prophete , ny rendre raiſon des choſes eſcriptes en ſon Alcoran. Ils admettent & reçoient pour eſcriture ſaincte les liures de Moyſe , les Pſeaumes de Dauid , & les Euangiles. Mais ils ne les ont point , ny ne leur eſt permis de les lire : parce que Mahomet le leur a deſſendu tres-expreſſement ; ſi bien que les Peres les conuinquoient par leur propre bouche. Car ſi voſtre Alcoran (leur diſoyent-ils) eſt eſcriture ſaincte , auſſi bien que les liures de Moyſe , les Pſeaumes de Dauid, & les Euangiles, ainſi que vous eſtimez, il ſ'enſuit qu'il n'y doibt point auoir de repugnance entre voſtre Alcoran & l'eſcriture ſaincte , que vous admettez , autrement ſ'il y a de contradiction , il eſt aſſeuré que l'une ou l'autre eſcriture eſt fauſſe. Or c'eſt vn grand blaſpheme, ſelon voſtre opinion meſmes , de dire qu'és liures de Moyſe, és Pſeaumes & Euangiles, il y ait de la fauſſeté, doncques il faut neceſſairement conclurre, que voſtre Alcoran, ou il y a tant de choſes repugnantes auſdites eſcritures, ſoit faux & menſonger. Le Roy donc penetrant bien ces raiſons, n'auoit plus aucune opinion de la loy de Mahomet , ny de ſes Mullas, & ainſi le diſoit-il ouuertement deuant tous. Au contraire, il ſembloit porter grande affection à la loy des Chreſtiens, leſquels il fauoriſoit en tout ce qu'il pouuoit : car ſçachant meſme qu'il y auoit en ſes terres quelques vns, leſquels eſtans faits ſerfs & eſclaves de ſes ſubiects, auoyent renié la foy Chreſtienne pour ſe voir libres, (d'autant que bien ſouuent les Sarraſins promettent liberté aux Chreſtiens, qu'ils prennent, pourueu qu'ils vueillent quitter leur foy) comme il fuſt aduertty qu'ils deſiroient ſe remettre à leur premiere Religion , & afin de pouuoir faire plus commodement profeſſion d'icelle, demandoient congé à ſa Maieſté, de ſe retirer à leur païs, pour viure parmy les autres Chreſtiens, ſa Maieſté le leur oſtroya fort volontiers : & à l'un d'iceux , qui ayma mieux demeurer là, non ſeulement il permist de viure , & d'aller veſtu à la mode des Chreſtiens : mais encore le receut pour ſeruiteur en ſa maiſon. Outre ce, comme enuiron ce meſme temps il y mouruſt vn Portugais qui ſuyuoit la Cour, le Roy à la ſollicitation des Peres, permist qu'il fuſt enſeuely publiquement à la mode des Chreſtiens , c'eſt à ſçauoir en portant la croix deuant, & des cierges allumez en main , que tous les Portugais auoyent, marchans de ceſte ſorte par le milieu de la ville , avec grande admiration des infidelles: pluſieurs deſquels eſtoient ſi bien edifiez

La contradiction grande qu'il y a en l'Alcoran.

Le Roy n'auoit aucune opinion du Mahometiſme.

Faiſoit grandes faueurs aux Chreſtiens.

*Pour-
quoy il
n'embras-
soit la
foy Chre-
stienne.*

de la charité & pieté des Chrestiens enuers les trespassez : qu'il y auoit mesmes des Sarrafins, lesquels prioient Dieu pour le defunct, & se presentoient pour ayder à l'enterrer. Or iacoit que cès actes sembloient monstrer que le Roy auoit grande opinion de la Religion Chrestienne, il y auoit neantmoins beaucoup de choses, qui le destournoient de l'embrasser. La premiere estoit de ce, qu'il ne vouloit croire les articles de la Trinité, & de l'Incarnation, s'il ne les entendoit : & de ceste sorte il alloit tousiours chancellant en sa croyance, ne sçachant à qui adiouster foy. Car les Gentils (disoit-il) estiment que leur loy est bonne, les Sarrafins de mesme, & les Chrestiens pareillement. A qui donc croirons-nous ? Voyla le peccadillo de ce Prince, & de plusieurs autres Athées, qui ne veulent captiuer leur entendement sous l'obeissance de la foy, estimans qu'il n'y a rien de vray, sinon ce qui peut entrer dans le petit pourpris de leur courte capacité, & voulans mesurer à l'aune d'icelle, les choses immenses, & qui surpassent tout entendement humain.

*Peccadillo des
Athées
1. empes-
chemēt.*

*Multitude d'affaires
2. empes-
chemēt.*

L'autre empeschement qu'il auoit estoit la multitude d'affaires & occupations, esquelles il estoit ordinairement si plongé, qu'elles ne luy donnoient point loisir de penser quasi à foy mesme : tellement qu'on ne pouuoit trouuer la commodité de luy declarer les poincts de nostre foy si amplement, & si exactement, qu'il eust esté de besoin. Pour oster cet obstacle, les Peres luy apporterent l'exemple de quelques Roys & Princes du Japon : lesquels n'ayant pas loisir durant le iour de se faire catechiser & instruire en la foy, employoient en cela vne bonne partie de la nuit. Il monstra bien quelque signe de vouloir faire de mesme : toutesfois il ne le fist pas. Aussi auoit-il vne coustume fort mauuaise, c'est que lors qu'on luy expliquoit quelque chose, de laquelle il s'estoit enquis, soudain il en demandoit vne autre, auant qu'on luy eust bien déclaré la premiere : tellement qu'il n'auoit pas la patience d'escouter attentifuiement, les vnes apres les autres. Car comme il estoit si auide de sçauoir, il vouloit apprendre tout à la fois, de mesme que ceux qui ont grande faim : lesquels voudroient aualer force viande tout en vn coup. Mais ce qui le

*Pluralité de femmes
3. empes-
chemēt.*

destournoit d'auantage, selon l'aduis de plusieurs, estoit la multitude des femmes qu'il auoit, selon que la loy Mahometique luy permettoit : car il tenoit en son ferrail iusques à cent femmes, lesquelles on doutoit si on luy pourroit faire quitter horsmis vne seule,

seule, avec laquelle il vesquist en toute pudicité coniugale, selon que la loy Chrestienne commande. Brief il auoit vn grand desir de voir faire quelque miracle, si que par deux ou trois fois il proposa aux Peres, qu'il seroit bon d'esprouuer quelle des deux loix estoit la meilleure, ou celle des Chrestiens, ou celle des Sarrazins par tel moyen: Que les Peres entraissent dâs le feu avec les saincts Euangiles en main, & pareillement ses Mullas avec leur Alcoran; & que ceux, qui ne se brusleroient pas, auroient la vraye loy. Mais on luy monstra par raisons, que ce seroit vne presumption de faire cela, sans vne speciale inspiration de Dieu: & que ce n'estoit autre, que vouloir tenter Dieu; de façon qu'en fin il acquiesça à la raison, & se deporta de ceste curieuse recherche.

*4. desir
de voir
faire
quelque
miracle.*

Nonobstant toutes ces choses, l'affection grande qu'il monstroist enuers les Peres, & à l'endroit des choses de la foy Chrestienne, esmeut beaucoup de gés à desirer de la cognoistre mieux: entre autres l'un de ses Prestres, nommé Abdulfasil, qui estoit comme son grand Chappellain, fort chery & aymé de sa Majesté; lequel voulut estre instruiet és choses de nostre sainte foy: combien qu'on ne sçait s'il faisoit cela pour l'embrasser, ou bien pour complaire au Roy, & en pouuoir parler deuant luy quand il viendroit à propos. Le Roy neantmoins ayant entendu, qu'il auoit ce desir, l'en aymoist d'auantage, & aduisa les Peres de traiter avec luy des affaires, qu'ils voudroient luy communiquer, aussi confidement qu'avec sa propre personne. Et de fait il fit beaucoup de bons offices aux Peres, côme nous dirons cy apres: Vn autre pareillement, qui seruoit au Roy de Medecin, monstra auoir le mesme desir: & ces deux icy fauorisoient les Peres en toutes les occurrences, qui se presentoient. Mais comme les Peres voyoient, que le Roy n'acheuoit pas de se refoudre, afin de ne perdre leur temps, ils se mettent en debuoir d'en gagner cependant quelques autres: & à ceste cause demandent congé au Roy de baptiser tous ceux, qui se voudroient rendre Chrestiens. Ce qu'il leur accorda volontiers: & leur enuoya dire par ledict Abdulfasil, qu'il estoit content, qu'ils en conuertissent autant qu'ils pourroient, & que s'il y auoit aucun, qui leur mit en cela quelque empeschement, qu'ils le luy fissent sçauoir, & qu'il le feroit punir selon son demerite. Il leur permit aussi de bastir vn hospital pour les malades, des aumosnes que les Portugais leur voudroient dōner. Car on a experimenté en beaucoup d'endroits,

*L'exemple
du
Roy es-
meut plu-
sieurs.*

*Le Roy
donne
congé de
baptiser
ceux qui
se vou-
droient
faire
Chre-
stiens.*

que plusieurs Payens & Sarrazins voyans ces œuures de charité parmy les Chrestiens, sont beaucoup plus esmeuz à suyure & embrasser la religion Chrestienne. Tels & semblables moyens, desquels on se seruoit pour aduancer la gloire de Dieu, & notamment l'affection que le Roy monstroit aux Peres, & aux choses de nostre foy, avec les faueurs, qu'il faisoit aux Chrestiens, furent cause, que plusieurs de ses vassaux eurent enuie de se rendre Chrestiens. Tellement que les Peres auoient assés à faire à catéchiser ceux, qui s'estoient enroolés au nombre des Cathéchumenes. Là dessus comme l'on estoit prest à cueillir vne belle moisson, le Diable, ennemy du salut des hommes, commence à faire des siénes, & à brouiller les cartes: de sorte qu'il fit souleuer contre le Roy les Parthes ou Patanes, qui auoient esté con-

Plusieurs se font catéchiser & instruire.

Les Parthes se reuolēt contre le Roy.

Le frere du Roy entre dās ses terres avec grosse puissance.

Le Roy se resioit dit en l'affection qu'il portoit à son frere foy.

finiez aux Isles de Bengala, selon qu'a esté dict. Ceux cy donc ayant entendu (selon qu'ils dirent par apres, pour excuse de leur reuolte) que le Roy vouloit quitter la loy de ses ancestres, à scauoir le Mahometisme, pour en prendre vne nouuelle, firent vne esmeute au Royaume de Bengala, en laquelle ils tuerent le Viceroy, ou Gouverneur, que le Roy y tenoit, & outre ce auoient, comme l'on pense, iintelligence avec le frere germain du Roy, le Prince de Chabul: lequel entra au mesme temps de l'autre costé dans les terres de son frere, avec vne grosse armée, & auoit desia gagné cent lieuës de pais. Ceste nouuelle estonna fort le Roy, & donna occasion à ses Mallas, qui auoient desia perdu quasi tout leur credit auprès de luy, d'interpreter ces euenemens sinistres à leur aduantage, disans que c'estoit en punition de ce, qu'il ne tenoit plus compte d'eux, ny de leur loy. Ces choses & plusieurs autres semblables, que ces Mallas luy cornoient tous les iours aux oreilles, firent vne telle impression en luy, qu'il commença de se retirer peu à peu des Peres, & par mesme moyen à se refroidir en l'affection, qu'il sembloit porter auparauant aux choses de nostre foy. Ce qu'il monstra clairement lors, que les Peres l'estans allé visiter, pour le consoler de la perte du Royaume de Bengala, il ne les voulut aucunemēt voir: & l'espace de plusieurs mois ne les fit point appeller, comm'il souloit auant cela. Cependant il va à l'encontre de son frere, menant cinquante mille cheuaux, & cinq mille Elephans de combat, avec vn nombre presque infiny d'infanterie. Son frere voyant vne si grosse puissance: venit contre luy, se retire petit à petit, & le Roy le va tousiours

poursuiuant iusqu'à ce, qu'il l'eust reserré dans ses terres, qui sont pardeça la riuere Indus. Apres ce, il appaisa aysément les tumultes de Bengala, excitez par les Patanes. Et comm' il fut de retour en sa ville Royale, toutes choses accoisées, les Peres luy firent sçauoir par son chappellain Abdulfasil, qu'ils desiroient sçauoir si sa Majesté estoit en volonté d'estre informée plus à plain des *Les Peres ne sont pas tant caressés de luy.* mysteres de nostre foy : car n'estant là venus pour autre fin, ils estimoient quasi perdu le temps, qui n'estoit employé à luy faire seruice, en ce qui concernoit son salut. Le Roy ayant esté aduertty de cela, les mande venir quelques iours apres. Mais tout son faict n'estoit, que leur proposer diuerses questions, pluost curieuses, que profitables. Les Peres luy firent pour lors entendre, que si sa Majesté n'auoit esté esclaircie par les disputes passées de la difference, qu'il y auoit entre la loy de IESVS-CHRIST, & la secte de Mahomet, qu'il luy pleust faire joindre de rechef vne dispute publique entre eux, & ses Mullas, à celle fin qu'elle se peust resoudre du tout à suyure la Religion, qui luy sembleroit la meilleure. Le Roy ne presta pas volōtiers l'oreille à cecy, craignant la confusion de ses Mullas, comm' il auoit experimenté auparauant : neantmoins comme les Peres luy en firent grande instance, il assigna le Samedy suyuant, pour la dispute. Ce iour *Dispute entre les Peres & ses Docteurs.* estant venu, les Peres s'en vont au Palais à l'heure arrestée, mais le Roy, qui n'auoit gueres d'enuie qu'on tint ceste cōference, allegua tout plein d'excuses, pour ne s'y trouuer pas : afin de rompre le coup. Toutesfois voyant par apres, qu'il auoit faict vne grosse faute, manquant à sa promesse, pour la couvrir & reparer, il ordonna que la dispute se tiendroient le Lundy prochain. Il se trouua luy mesme en icelle, accompagné de tous les Capitaines & autres Seigneurs de sa Cour, avec vn bon nombre de ses Mullas : lesquels voulans soustenir leur faux Prophete, furēt si estroitement serrés, qu'ils ne sçurent rendre raison de plusieurs choses, qu'il dict en son Alcoran, ny soustenir ce qu'ils auançoient, pour le deffendre; si bien que le Roy mesme entendant leurs inepties & absurdités, vouloit quelquesfois apporter en ieu ce qu'il sçauoit, pour deffendre ses Docteurs, & couvrir leur honte: mais il estoit aussi tost rembarré, de façon que la plupart des assistans cogneut bien la fausseté & impiété du Mahometisme.

Les Peres voyans qu'ils n'aduançoient rien auprès du grand Mogor, luy demandent congé de s'en retourner à Goa, & comme le Pere Aquanina fut retenu là tout seul, jusqu'au bout de trois ans.

CHAPITRE XI.

*Les Peres de-
mandēt
congē au
Roy de
s'en re-
tourner.*

PAR la dispute passée les Peres cogneurent bien que le Roy s'estoit fort changé, voyans qu'il deffendoit à bon escient la loy de Mahomet, & ses Ministres: de façon qu'ils furent d'aduis de luy demander congé, pour s'en retourner à Goa, d'ou il les auoit faicts venir. Ce que le Pere Rodolfe luy fit entendre fort dextrement. Car
 „ vn iour parlant à luy, il luy tint ces propos; le ne doubte pas Sire
 „ (fist il) que vostre Majesté n'ait bonne volonté d'entendre l'ex-
 „ plication de la loy diuine: & sçay aussi qu'elle a de bons desirs
 „ de l'embrasser: toutesfois pour ne donner l'alarme à ses vassaux,
 „ qu'elle ne les descouure pas encores; & pource il nous semble,
 „ que nos trauaux ne sont d'aucū profit & vtilité en sa Cour, com-
 „ me ils pourroient estre ailleurs. Le Roy entendit incontinent ce
 „ qu'il vouloit dire, & luy repart, qu'il estoit fort aise, qu'ils demeu-
 „ rassent en sa Cour, & que luy tenant tels propos, ce n'estoit que
 „ chercher quelque couleur, pour se retirer. Le Pere respond à ce-
 „ la, que sa Majesté cognoistroit par experience le desir, qu'ils
 „ auoient de luy faire seruice, & le singulier contentement, qu'ils
 „ receuoient de demeurer en ses terres, s'il luy plaisoit de se dispo-
 „ ser à ouïr avec quelque assiduité l'explicatiō de la loy diuine. Le
 „ Roy ne respondit rien à cela; mais se retira dans sa chambre, sans
 „ leur dire mot: monstrant estre fort fâché de ce, qu'ils s'en vou-
 „ loient retourner.

*Le Roy
monstre
en estre
suscité.*

*Pour-
quoy il
les de-
siroit
retenir.*

Or comme les Peres desiroient sçauoir la cause, pour laquelle le Roy vouloit, qu'ils demeurassent là, puis qu'il ne se resoluoit pas d'embrasser la foy Chrestienne, ils la demanderent à son Chappelain Abdulfasil, lequel leur fit entendre, que le Roy vouloit monstrer sa grandeur, & desirant sçauoir beaucoup de choses, estoit fort aise d'auoir en sa Cour des gens de toutes nations, & en particulier, qu'il se plaisoit fort avec eux, d'autant que leur façon de faire, & leur doctrine, luy agreoit plus, que toute autre. Il leur dit, aussi, que le iour auparauant il auoit prins la sainte

Bible, qu'ils luy auoyent donnée, & avec grande reuerence l'auoit mise sur sa teste. Ce qu'il n'auoit pas fait à vn liure de l'Alcoran, que le mesme iour on luy auoit offert, bien qu'il fust beaucoup plus richement garny. Les Peres ayans reconuré par ce recit quelque peu d'esperance cherchoyent tous les moyens, dont ils se pouuoient aduiser, pour l'affectionner derechef à la Religion Chrestienne: & s'estas apperceus que la fâcherie, qu'il auoit monstré lors qu'ils luy parlerent de se retirer estoit passée, ils luy feirent sçauoir s'il prendroit plaisir, qu'ils enseignassent de nouveau aux Princes ses enfans, la langue Portugaise. Il dict qu'il en seroit tres-content. Le Pere Antoine Monserrat print adonc ceste charge, qui fust vn moyen pour r'entrer en sa bonne grace: car à ceste occasion il venoit souuent voir ce qu'apprenoyent ses enfans, commençant derechef à monstrer beaucoup d'affection enuers les Peres. Il est bien vray que lors qu'ils luy mettoient en auant quelque propos de la loy diuine, il ne l'escoutoit pas avec tel goust & plaisir, qu'il auoit accoustumé deuant. Car les impressions que ses Mullas luy auoyent mis en teste, quand les Patanes se reuolterent en Bengala, l'auoyent fort esbranlé. Dauantage bien que d'un costé il fust desia conuaincu en son entendement, que la loy Euangelique estoit la meilleure de toutes; si est-ce que de l'autre ses meschantes mœurs & costumes avec la libéré de la loy Mahometaine, le tenoyent estroitement lié à icelle. Les Sarrafins encore cognoissans, qu'il estoit enclin à nostre Religion, auoyent enuie de se soufleuer contre luy. Brief sa mere, sa tante, & quelques vns des plus grands Seigneurs de son Royaume, qui estoient auprès de luy, faisoient tout le pis qu'ils pouuoient contre les Peres, & contre la loy qu'ils preschoyent: leur estant aduis que pour la deffence de leur secte, & pour son honneur, ils estoient obligez à ce faire. Outre que la haine qu'ils portent naturellement à nostre loy, les incitoit à ce dauantage: tellement qu'ils depeignoient au Roy la Religion Chrestienne, comme la plus chetive, & miserable du monde. Le mesme faisoit vn grand haras de femmes, qu'il auoit: lesquelles voyoient bien qu'elles seroyent repudiées toutes horsmis vne, si le Roy se faisoit Chrestien: & pour ce elles employoient toutes leurs mignardises & attraiets, pour l'en diuertir. Finalement ses longues promenades, & les esbats qu'il prenoit chaque iour, & de plus ses grandes occupations & affaires.

Les Peres ensergent derechef la langue Portugaise aux Princes.

Ce qui deslournoit le Roy de la Religion Chrestienne.

*Les Peres re-
çoivent
commandement
du P. Pro-
uincial
de s'en
retour-
ner.*

ne luy donnoyent ny le temps ny lieu, pour penser aux choses de son salut. Les affaires estans en tel estat, les Peres receurent vne lettre du P. Prouincial de l'Inde, par laquelle il leur commādoit de s'en retourner à Goa: parce qu'il auoit besoin d'eux, pour les employer en d'autres entreprises, pour l'aduancement de la gloire de Dieu, puis que là ils ne faisoient rien. Le Pere Rodolfe Aquauuia ayant receu ceste lettre, s'en va faire sçauoir au Roy le commandement, qu'ils auoyēt de leur Superieur, & Prouincial, de se retirer. Le Roy entendant ceste nouuelle, mōstra biē l'affection qu'il portoit au Pere Rodolfe, & le desplaisir qu'il receuroit de son depart: car il luy parla de ceste sorte, Pere (dict-il) ie t'ay-

me grandement: & suis fort aise de t'auoir aupres de moy. Car tu m'as fait entendre beaucoup de choses, qui me contentent plus, que tout ce que i'ay ouy des autres: & pource si tu t'en veux aller, ie ne te contraindray point de demeurer. Mais tu ne t'en iras aucunement à mon gré; & si tu me quittes & abandonnes en cet estat, ce peché tombera sur ta teste. Le Pere luy repart modestement, que d'autres Peres plus doctes, & plus vertueux que luy, viendroyent quand il seroit de besoing en sa place. Mais le Roy tout fasché luy replique en ces termes: Laisse, Pere, ces raisons à part: car ie ne consentiray en façon quelconque, que tu t'en ailles à tout le moins de ma franche volōté. A ces discours se trouuerēt presens quelques vns des principaux Seigneurs de la Cour; lesquels incitoient dauantage

*Le P. Rodolfe de-
meure,
& les
autres
s'en vōt
à Goa.*

le Roy de ne permettre point que le P. Rodolfe s'en allast. Le P. donc voyant que le Roy se monstroient estre si desplaisant de son depart, & que ces Seigneurs luy faisoient tres-grāde instance de demeurer, pour ne donner du desplaisir à sa Majesté, esperāt que nostre Seigneur en retireroit du profit pour sa gloire, apres auoir consulté l'affaire avec Dieu, & avec ses compagnons, il resolut de s'arrester encore là pour quelque temps, en attendant response du P. Prouincial. Mais les autres Peres s'en retournerēt en l'Inde, comme il leur auoit esté commandé. Le Roy estima tant ceste courtoisie que le P. en sa cōsideration fust demeuré, que de ce iour là il luy monstra vne plus particuliere affection, cōmençant derechef à luy parler avec autant de familiarité, qu'au parauant ces troubles: & mesmes il donna quelque esperance de vouloir entendre soigneusement l'explication de la foy Chrestienne, & par consequent aussi plusieurs Gentils-hommes &

Seigneurs de la Cour monstroient auoir desir d'ouïr la mesme exposition. Mais les Mullas, voyans que le Pere estoit r'entré si auant en la bonne grace du Roy, & craignans qu'il ne le gaignast à IESVS-CHRIST, avec les principaux Seigneurs & Capitaines de sa Cour, espioient les occasions de le mettre à mort couuertement, & en cachettes. Le Roy ayant sceu leur meschant desir, tint vn iour ces propos au Pere. Ces Mullas, dit-il, sont traistres & meschans, & pource ie te veux bailler de mes gens pour te garder, & accompagner par tout : à fin qu'ils ne te fassent aucun tort. Le Pere luy repart, que sa Majesté sçauoit bien, que lors qu'ils vindrent à sa Cour le Vice-Roy de l'Inde luy auoit demandé des hostages, pour leur assurance: mais qu'ils ne l'auoyent voulu permettre: d'autant que c'est nostre gloire (dict-il) que de mourir pour la verité que nous preschons. Et pource ie me crains, si vostre Majesté me baille des gardes, que la cōfiance que ie dōibs mettre du tout en Dieu, ne vienne à se diminuer. Certainement (dict le Roy) tu as raison en cela: mais ie pense aussi estre de mon deuoir, de pouruoir à ton assurance, puis que ie t'ay receu sous ma protection & sauuegarde. Le Roy quelque temps apres estant avec ses Capitaines & autres Courrisans, leur raconta ce que le Pere luy auoit dict, qu'il s'estimerait heureux d'esprendre son sang, pour la deffence de la loy qu'il preschoit, loüant fort son courage: & adioustant que ses Mullas n'auoyent garde de vouloir mourir pour la loy qu'ils leur enseignoyent.

Les Mullas veulent tuer le P. Rodolfe.

Le Roy luy voulloit bailler des gardes le P. les refuse.

Cependant le Pere Rodolfe taschoit de disposer le Roy, à ce qu'il prit vne ferme resolution, de se renger à la foy Chrestienne: car ses vassaux le voyans ainsi doubteux, & perplex, n'osoyent pas l'embrasser. Mais iacoit qu'il mist beaucoup de peinc en cela, si ne peust-il iamais le luy persuader: car il voyoit bien, qu'en ce faisant il estoit obligé à quitter tant de femmes qu'il auoit, & plusieurs autres vices, lesquels ne peuuent se compatir avec la loy Chrestienne. Au reste tandis que le Pere Rodolfe demeura là, mais principalement l'année dernière, qu'il y fust tout seul, n'ayant aucun de la Compagnie avec soy, il menoit vne vie fort semblable à celle des anciens Peres du desert: car il ne mangeoit qu'un peu de pain sec sans autre viande, & ne beuuoit que de l'eau pure: il couchoit sur la dure, & faisoit beaucoup d'autres penitences & austeritez, employant la plus-part du iour & de la

L'austerité de sa vie qu'il menoit.

nuict en prieres & oraisons, dressées pour la plus-part à cette intention, qu'il pleust à Dieu esclaire le Roy de sa lumiere celeste, & luy faire cognoistre son aueuglement. Auec ce il apprenoit la langue Perseane, pour pouuoir declarer plus aisement les choses de la foy Chrestienne au Roy. Et combien qu'il fust tousiours fort addonné à la priere : il l'estoit neantmoins d'auantage en ces derniers temps, qu'il fust parmy les Barbares. Aucunesfois il demeuroit les iours quasi entiers en oraison : car il ne sortoit de son logis, sinon lors qu'il luy falloit aller trouuer le Roy : & souuent il aduint que le soir s'estant mis en oraison, on le trouuoit le matin au mesme lieu continuant sa priere. Brief les traux, les penitences, & les incommoditez qu'il enduroit estoient si grâdes, qu'il tōba en vne si griesue maladie, qu'on pensoit qu'il en deust mourir. Mais de l'autre costé les consolations diuines qu'il receust là mesme, contrepesoyent bien à ses afflictions, & allegeoier tellement toutes ses peines, qu'il pouuoit bien dire auec l'Apostre S. Paul: *Cum infirmor, tunc fortior sum*, Quand ie suis malade & infirme, ie suis lors plus vigoureux : & de faict on luy a ouy dire souuent, qu'en ce temps-là principalement, il auoit vescu selon son desir, & qu'il auoit lors senty vne plus grande paix & tranquillité d'esprit, qu'en tout le reste de sa vie: de façon qu'il semble que nostre Seigneur le disposoit petit à petit à la gloire, qu'il luy reseruoit du martyre, lequel il obtint bien tost apres. Car il reuint de là, non pas comme du milieu de la barbarie : mais comme d'une eschole, ou l'on s'exerce en toute sorte de vertu. Aussi fust-il tousiours en grande estime parmy les Payens & Sarrafins, tant à cause de ses vertus, que pour les autres rares qualitez & graces que Dieu luy auoit communiquées: iàçoit que les Mulas le haïssoyent à mort, parce que il les rendoit tousiours muets, & confusés disputtes qu'ils faisoient deuant le Roy: lesquelles duroient quelques fois toute la nuict. Là ou le Pere monstroït tant de doctrine & de modestie, que tous estoient ravis en admiration, si que les Gentils mesmes, rappelloient Ange. Mais ces meschans Mulas luy tendirent plusieurs fois des embusches, pour le mettre à mort, combien que pour respect du Roy, ils n'osoyent pas faire tout ce qu'ils eussent bien désiré: car le Roy estoit si espris de ses vertus, & sur tout de son humilité, qu'il ne l'auoit pas en moindre estime, qu'il luy portoit d'affection; ores que ses vices & mœurs corrompus l'empeschassent,

*ses orai
sons assés
duës.*

*Tombe
griesue-
ment ma-
lade.*

*Est con-
soli de
Dieu.*

sent de fuyure les bons aduis, que le Pere luy donnoit, & sur tout sa superbe, ayant vn desir extreme d'estre estimé quelque Dieu ou grand Prophete. Le Pere donc voyant, qu'il ne pouuoit rien aduancer aupres de luy; aduise le Pere Prouincial de l'Inde, que c'estoit peine perduë, que de semer en vn champ si sterile, & qui ne rapportoit aucun fruit. Le Pere Prouincial entendant cela luy rescript, qu'il demandast congé au Roy de s'en retourner, & que l'ayant obtenu, il s'en reuint au plustost. Le Roy au commencement ne vouloit en aucune maniere le luy oëtroier, desirant le retenir aupres de soy, pour la douceur qu'il auoit expérimenté en ses mœurs: toutesfois à la parfin il le luy accorda, importuné de ses prieres. Mais auant que luy dōner ce congé, il luy fit promettre qu'ayant parlé au Père Prouincial, & obtenu licence de luy, il s'en reuiendrait à sa Cour. Ce que le Pere Rodolfe luy promit, & avec ce il l'en laissa aller, luy monstrant plusieurs signes extraordinaires de bien-vueillance & amitié. Il voulut à son depart luy faire present de beaucoup d'or & d'argent: mais le Pere n'en voulut iamais rien accepter, alleguant qu'il estoit Religieux, & qu'il auoit quitté tout cela avec le monde. Toutesfois il pria sa Majesté de luy vouloir oëtroier vn don, c'est à sçauoir de luy permettre d'en amener à Goa vn Chrestien Moscouite, avec sa femme & ses enfans, qui estoient là detenus depuis long temps en esclauage, & y auoient enduré beaucoup, voire à cause de la longue hantise, qu'ils auoient eüe avec les Sarrazins, ils estoient quasi deuenus Sarrazins. La Royne mere du Roy ne le vouloit point permettre, parce que ces gens là luy estoient vtils; toutesfois le Roy, pour monstrier l'affection qu'il portoit au Pere, les luy accorda, de façon qu'il les en ramena à Goa quant & soy, ou ils vesquirent depuis en bōs Chrestiens. Et voyla tous les thresors qu'il rapporta de la Cour de ce grand Monarque.

*Il demā-
de dere-
chef cō-
gé au
Roy pour
s'en al-
ler, &
l'obtient
avec grā
de diffi-
culté.*

*Les thre-
sors qu'il
en rap-
porta du
Mogor.*

Le grand Mogor enuoye pour la seconde fois querir des Peres de la Compagnie, lesquels ayans aussi peu aduancé en sa conuersion que les premiers, s'en retournent bien tost à Goa.

CHAPITRE XII.



EST ou huit ans apres que le Pere Rodolfe Aquaduina fut party de la Cour du grand Mogor, il sem-
ble que nostre Seigneur voulut esueiller de nou-
ueau ce grand Prince, du profond sommeil de son
obstination, luy dōnant des bonnes inspirations, salut.

*Dieux-
cite de-
rechecce
Prince à
faire son*

afin qu'il sortit hors des tenebres d'infidelité, & entra en la lumière de sa foy, la faisant par après publier en tout son Empire. Ce fut (à ce qu'on peut croire pieusement) par l'intercession de la sacrée Vierge Marie, enuers laquelle ce Prince s'est monstré tousiours fort affectionné. Tellement que l'an 1590. ayant sçeu que les Chrestiens celebroyent la feste de l'Assomption d'icelle, il la voulut pareillement solemniser à sa mode. Et à cest' occasion il fit dresser tout expres vn throne haut esleué, sur lequel il fit mettre l'Image de la bien-heureuse Vierge, que le P. Rodolfe luy auoit donnée, commandant à tous ses Princes, Capitaines, & Courtisans, de luy faire la reuerence, & puis de la baiser. Les principaux Seigneurs de sa Cour dirent, qu'il falloit que son fils aîné fut le premier, qui leur monstra l'exemple en cela. Ce qu'il fit promptement, & fort volontiers. Or ceux qui se monstrent ce iour là plus volontaires à faire honneur à la Vierge, furent passés Cheualiers. En ce mesme temps il fit mettre par terre tous les Alcorans de la ville, en laquelle il tenoit pour lors sa Cour. On appelle Alcoran non seulement la loy de Mahomet, mais encore certaines tours hautes, desquelles les Ministres de la secte de Mahomet reclamation à haute voix leur faux Prophete, & d'ou ils appellent le peuple pour venir faire oraison. Les Mosquées aussi, qui sont les temples du mesme seducteur, furent conuerties par son commandement en escueries de cheuaux ou d'elephans. Et d'autant que l'un des plus grands empeschemens qu'il auoit eu la premiere fois à se resoudre, auoit esté la multitude des femmes, il les quitta toutes hors-mis vne seule, mariât les autres avec quelques Seigneurs & Gentils-hommes de son Royaume. Il fit aussi publier à son de trompe, qu'aucun Mahometain n'eust deormais à faire circoncire ses enfans masles, auant qu'ils eussent atteint l'age de quinze ans, à celle fin qu'ils peussent faire choix de la loy, qu'ils voudroient suyure.

*Il fit
grand
honneur
à l'ima-
ge de N.
Pame.*

*Fait rui-
ner les
Alcorans
& con-
uertit les
Mos-
quées en
estables.*

*Quitta
toutes
les fem-
mes hors-
mis vne.*

*D. Leon
Grimon
Sous-
diacre
Grec.*

En ces entrefaictes arriua à sa Cour vn Sous-diacre Grec, nommé Leon Grimon, lequel s'en retournât en son pais, de buoi passer à Goa. Le Roy fut bien aisé de le voir, & de luy parler: parce qu'il estoit fort curieux de sçauoir ce qui se faisoit en diuerses contrées du monde: & quand quelqu'un venoit d'un pais estrange, il s'informoit de tout ce qu'il auoit veu, & ouy en son voyage. Ce Sous-diacre estoit homme d'entendement, & qui auoit veu beaucoup de choses: tellement que le Roy fut tres-content

de ses responces, & resolut de l'enuoyer pour son Ambassadeur ^{Enuoyé} vers le Vice-roy de l'Inde, le priant de luy enuoyer quelques Pe- ^{en Am-} res de la Compagnie de IESVS. Et à ces fins il escriuit audict ^{bassade} Vice-roy, & luy fit quelques presens. Il enuoya encor vne lettre, ^{par le} que ie mettray cy dessous, & quelques presens aux Peres de ^{grand} ladite Societé, nommément au P. Prouincial. Il voulut aussi ^{Atogor,} bailler cinq mil escus au mesme Soubs-diacre, pour les distribuer ^{pour fai-} aux pauures Chrestiens de la ville de Goa, & luy ayant esté re- ^{re venir} présenté par iceluy, qu'il vaudroit mieux que sa Majesté les di- ^{des Pe-} stribuast aux plus necessiteux de son Royaume, il respondit qu'il ^{des de} ne le vouloit pas faire, parce qu'ils estoient esclaves de Sathan. ^{Goa.} Mais le Soubs-diacre luy ayant derechef remonstré le danger, qu'il y auoit de porter sur soy vne si grosse somme d'argent en vn voyage si long, le Roy comanda qu'on luy baillast quelques pierres precieuses, & autres choses de valeur, qui ne pesassent pas beaucoup: le prix desquelles montast à la somme de deux mil escus, afin qu'il les portast plus aisément aux Chrestiens pauures de Goa. Ceste aumosne vint si à propos (à cause d'une grande famine, qu'il y auoit lors en la ville de Goa) que plusieurs qui estoient en extreme necessité, furent secourus par le moyen d'icelle. Or afin que les Peres, qui l'iroient trouuer, selon qu'il les en prioit, fussent conduicts avec toute assurance, il fit expedier des lettres patentes, adressées au Vice-roy de Cābaya, & aux autres Gouverneurs de ses terres, dont voicy la teneur.

Commandement du tres-haut Mahomet, grand Roy & Seigneur de la Fosliere, A tous les Capitaines, Vice-roys, Gouverneurs, Receueurs, & autres Officiers de mon Estat.

IE vous fay sçauoir, que j'ay beaucoup honoré & caressé Dom Leon Grimon, voulant & entendant que les Capitaines & autres Officiers de ma Couronne, fassent le mesme: d'autant que j'espere par son moyen, recouurer quelques autres Peres fort doctes, que j'enuoye querir à Goa: par le moyen desquels ie pense estre remis de mort à vie, avec leur sainte doctrine, tout ainsi que leur maistre IESVS-CHRIST estant venu du ciel en terre, resuscita plusieurs morts, & leur donna de rechef la vie. A ceste occasion fay ie appeller des plus doctes & vertueux Peres d'entre eux, par le moyen desquels ie veux estre esclaircy des choses,

qui concernent la loy des Chrestiens, & des chemins Royaux, par lesquels ils marchent droict à Dieu. Partant ie commande à tous mes susdicts Officiers, de faire grand honneur & caresses, tant à Dom Leon Grimon, qu'aux Peres que i'enuoye querir, en toutes les villes de mon Royaume, par lesquelles ils passeront: leur baillant escorte de soldats, qui les conduisent en assurance par tout leur voyage de ville en ville; les pouruoyant semblablement de tout ce, qui sera necessaire, tant pour leurs personnes, que pour leurs montures, & toutes autres choses, qui leur seront besoing, le tout à mes despens; & seront obligez à me les rendre sains & saufs, prenans garde qu'ils n'encourent aucun dommage ny perte des choses, qu'ils porteront quant & eux. I'oblige aussi mon Capitaine Canchena, de les mettre entre les mains du Capitaine Raizza, lequel, avec tous les autres Capitaines, fera le mesme, iusqu'à ce qu'ils arriuent en ma Cour. I'enioincts pareillement au Capitaine de Cambayetta, Giabiblica, de leur fournir tout ce, qui sera de besoing, tât pour venir, que pour s'en retourner. Ie deffends encore aux Officiers de mes doüanes, d'exiger ou demander chose aucune ausdicts Peres, pour les hardes qu'ils porteront quant & eux, les laissant passer exempts de toute sorte de tributs ou peages: & que tous les susdicts se gardent bien de contreuenir à ceste mienne ordonnance, ne molestant lesdicts Peres, soit en leurs personnes, soit en leur bagage. Que s'ils se lamentent de vous autres, mes Officiers, en façon quelcôque, nous vous ferons punir rigoureusement, & mesme trancher la teste. Partant ie veux qu'on accomplisse tout ce, qui est contenu en ce mien commandement, tant pour le regard de leurs personnes, que des hardes qu'ils porteront, afin qu'ils puissent passer librement par toutes mes villes, sans payer aucune gabelle, & qu'ils soient accompagnez de bõne & seure garde tout le long du chemin. Ils seront donc conduicts de Cambayetta à la ville d'Amanadab, & de là à celle de Paian, & d'icelle à Gelu; de Gelu à Guipar; de Guipar à Bicanel; d'ou ils viendront à Bitasser, de Bitasser à Multum; de Multum à Lahor, lieu de nostre residence. Car cest le chemin, par lequel ie veux, que lesdicts Peres viennent. Lesquels i'espere, avec l'ayde de Dieu, voir bien tost en ceste Cour, ou ils seront receuz de moy, & des miens, comme leur qualite merite. L'Ambassadeur Dom Leon Grimon, estant arriué à Goa, bailla premierement ses lettres au Vice-roy, & puis aux Peres de la

Compagnie, celle que le Roy leur escrivoit, laquelle traduite en nostre langue dict ainsi.

Au nom de Dieu.

LE Tres-haut & inuincible Echebar à ceux qui sont receuz *Lettre du grâd Mogor aux Peres de la Comp. à Goa.*
 En la grace de Dieu, & qui ont gousté de son saint Esprit, & aux obeissans à l'esprit du Messie, & qui acheminent les hommes à Dieu; Je dis à vous, Peres intelligens, les parolles desquels sont escoutées, & receuës d'un chascun, comme venant de personnes sequestrees du monde, qui auez quitté tous les honneurs, & grandeurs de la terre: Peres, qui marchez par les vrais sentiers. »
 Je say sçauoir à vos Reuerences, comme i'ay eu cognoissance de toutes les loix du monde, aussi bien des Gentils de diuerses sortes, comme des Mahometains, horsmis de celle de IESVS-CHRIST, qui est la loy de Dieu, & comme telle recogneuë & suyue de plusieurs. Or d'autant que ie sens grande inclination à l'amitié & conuersation des Peres, ie desire que par leur moyen ceste loy me soit enseignée. Maintenant vient d'arriuier en ceste nostre Cour, & Palais Royal, Dom Leon Grimon, personnage de grand estime & de bon discours; Je l'ay interrogé de quelques choses, & il m'a respondu fort à propos, dont moy & mes Docteurs sommes demeurez fort contens & satisfaits. Il m'assura, qu'on trouuoit en l'Inde plusieurs Peres de grande prudence, & doctrines; que s'il est ainsi, tout aussi tost, que vos Reuerences auront receu ces miennes lettres, vous vous en pourrez venir en ceste nostre Cour, avec toute assurance: à celle fin que disputans avec mes Docteurs, je puisse parangonner leur sçauoir avec le vostre, & cognoissant les qualitez des vns & des autres, voir l'auantage que les Peres ont sur ces miens Docteurs, que nous appellons Caziques, & que par ce moyen ils puissent entendre d'iceux la verité. Que s'ils veulent s'arrester en ceste Cour, ie leur ferai baftir des logis ou ils viuront avec plus grand honneur & faueur qu'aucun des Peres qui ait esté iusques à present en ce pays-cy: & quand apres cela ils voudront se retirer, ie les en lairray aller librement, & les en renuoyeray avec pareil honneur. Vous deuez donc accomplir cecy, d'autant plus volontiers, que ie vous en prie par la presente escripte au commencement de la Lune de Iuin.

*On luy
enuoye
quelques
Peres de
la Comp.
& cüm'il
les re-
out.*

Le Pere Prouincial, qui se trouua lors à Goa, quand cest Ambassadeur y arriua, ayant leu ceste lettre, & entendu par le rapport du mesme Ambassadeur, la bonne disposition, en laquelle estoit le Roy (ce luy sembloit) pour se refoudre du tout à se Chrestienner, fust d'aduis de faire le cōtenu de cette lettre. Il luy enuoye donc les Peres Edoüard Leïoton, & Christofle de Vega, avec vn' autre, qui n'estoit pas Prestre. Ils partirent tous trois de Goa, & arriuerent l'an 1591. à la ville de Lahor, ou le Roy tenoit lors sa Cour. Il les reçeut avec grande demonstration de bienueillance, les logeant dans son Palais, & leur faisant beaucoup d'honneur & de caresses. De là à peu il voulust qu'on dressast vne eschole, en laquelle ils enseignassent à lire & escrire en Portugais aux enfans des principaux Seigneurs & Capitaines de sa Cour, & mesmes à vn de ses enfans, & à vn sien nepueu ou petit fils. Ces Peres demurerent quelque temps à sa Cour entrete-

*Le Roy
ne se re-
soluant
pas, ils
s'en re-
tournent
à Goa.*

nus avec bonnes esperances de sa conuersion, tout ainsi que les premiers. Mais apres comm'ils veirent qu'il n'estoit pas bien resolu, ils s'en voulurent retourner à Goa: toutesfois le Pere Prouincial ordonna expressement au Pere Edoüard Leïoton, qu'il ne bougeast pas de là: mais le Pere Christofle de Vega s'en reuint par l'aduis du mesme Pere: combien qu'estant arriué à Goa, le Pere Prouincial fust en deliberation de l'y renuoyer. Car il auoit esté si agreable au Roy, qu'il n'auoit voulu luy permettre de partir, sans l'auoir au prealable fait iurer, qu'il retourneroit, si le Pere Prouincial le trouuoit bon. Mais en fin, comm' on vid qu'il ny auoit pas beaucoup d'esperance de la conuersion du Roy, & que les Peres ne faisoient pas là grand cas, estans necessaires ailleurs, on les manda tous venir.

Et de ceste sorte, ils se retirerent à Goa, sans auoir rien aduancé de ce qu'ils pretendoyent.

Comme le grand Mogor ayant demandé pour la troisieme fois
des Peres de la Compagnie, on luy enuoye le Pere Hierosme
Xavier avec deux autres: & de ce qui leur arriva
de remarquable en chemin.

CHAPITRE XIII.



OMBIEN que le Roy Echebar monstraft d'un costé
porter grande affection à la foy Chrestienne, & à ceux
qui la preschoyent, conuaincu desia, comm' il est à
etroire, par la verité cogneuë; d'autre part neantmoins ses mau-
uaises inclinations & coustumes deprauées, luy tenoyent le
pied sur la gorge, de façon qu'il ne pouuoit encliner sa volonté,
pour faire ioug à vne si sainte loy: si qu'on luy pouuoit (ce
me semble) bien approprier le dire du Prophete: *Venerunt filij* Is. 37.
usque ad partum, & virtus non est pariendi. Les enfans sont ve- Le grâd
nus iusques au point de sortir du ventre de la mere: mais elle n'a Mogor
pas eu des forces pour les mettre dehors. Toutesfois quel- enuoye
ques années apres le depart des derniers Peres, à sçauoir l'an pour la
1594. il enuoya vn autre Ambassadeur à Goa, demandant pour 3. fois
la troisieme fois des Peres de la mesme Compagnie, pour estre querir
instruict (comm' il disoit) en la loy diuine. Et en escriuist au des Pe-
Vice-Roy de l'Inde avec tels termes, & qui monstroient vn si res de la
grand desir, que le Vice-Roy fist promptement appeller le Pere Comp.
Prouincial, & le pria de vouloir octroyer à ce grand Prince, ce
qu'il requeroit & demandoit si instamment. Mais comme le
Pere Prouincial auoit veu que desia par deux fois les autres Pe-
res y estans allez, n'auoyent rien profité en son endroict, &
s'en estoyent retournez sans aucune esperance d'y rien faire, il
n'estoit pas fort porté à cela. Toutesfois sçachant que le R. P.
General de la mesme Compagnie desiroit, qu'en la Cour d'un
tel Monarque, y eust tousiours quelqu'un des Peres, tant
pour ayder les Chrestiens qui y sont, que pour plusieurs autres
considerations, en fin il y condescendist, apres auoir consulté Le Pere
le tout avec les plus graues Peres qui estoyent à Goa. Et fust Hieros-
nômé pour ceste Mission, en premier lieu le P. Hierosme Xavier me Xa-
Nauarrois, & nepueu du B. P. Xavier. Il estoit lors Superieur de la uier avec
maison des Profes à Goa, & quitta volontiers ceste Superiorité, deux au
tres y est
enuoyé.

pour embrasser l'entreprise qu'on luy mettoit sur les bras, & qu'il auoit preueü long temps deuant luy deuoir tomber dessus (comm'il diët lors) sentant en son ame, vn grand courage, que Dieu luy donnoit, pour supporter tous les trauaux, qu'il seroit necessaire: tellement qu'il accepta ceste charge, comme venant du Ciel. On luy bailla pour son soulagement deux autres de la mesme Compagnie: lvn fust le P. Emmanuel Pignero Portugais, & l'autre vn frere Coadiuteur, appellé Benoist Goës ou de Gois. Ils eurent pour leur guide vn Armenien, qui auoit conduit les Peres Rodolfe Aquaiua, & les autres, qui y furent enuoyez la premiere fois. Ainsi donc accompagnez & pourueus des choses necessaires, ils partët de Goa dans vne galere, qui cingloit vers Daman, & de là passent au Royaume de Cambaya ou Guzarate: là ou N. Seigneur commença de leur donner quelque auant-goust du fruiët, qu'ils esperoyent recueillir en ceste Mission. Car il leur communiqua vne si grande consolation spirituelle, qu'il sembloit les vouloir payer auant-main des peines & trauaux, qu'ils deuoyent endurer pour son seruice. Ce fust enuiron les festes de Noel de l'an 1594. auquel temps ils arriuerent à la cité de Cambaya, autrement nommée Cambayetta, capitale de ce Royaume: & comme ils veirent, que ceste grande solemnité de la naissance du Sauueur du monde s'approchoit, ils resolurent de la celebrer en ladite ville; à cause qu'il y auoit quelque centaine de familles de Portugais. Ils agencerent donc, & accommoderent vne belle & grande sale du logis, ou ils demeuroyent, pour leur seruir de chappelle, là où ils dresserent vn autel pour y dire la S. Messe, & l'ornerent si bien, que les Payens & Infidelles mesmes y accouroyent à grande foule, pour la voir. Les Portugais sur tout furent grandement consolez de ceste demeure des Peres, parce qu'ils se confesserent tous, & se communierent avec vne grande consolation & profit spirituel de leurs ames: nommément d'vn d'iceux, lequel ayant demeuré long temps en ce pays là, s'estoit rendu logue, le Diable le tenant empesté & enucloppé en beaucoup de grands & enormes pechez. Mais il pleust à Dieu le toucher au cœur si viuement, qu'il se recogneust, & se remit en la voye de salut, avec vne tres-grande repentance de ses fautes, & vn ferme propos de mieux faire deormais, si que soudain il se prepara pour s'aller tenir parmy les Chrestiens, avec sa femme legitime qu'il auoit quittée. Telles & semblables

*Arriuent
à Cam-
baya, &
ce qu'ils
firent là.*

semblables choses leur apportoiēt vne si grande consolation, que l'vn des Peres, à sçauoir le P. Pignero, escript en vne de ses lettres, n'auoir iamais en sa vie senty tant de deuotion comme lors, bien qu'il fust au milieu de la Barbarie & Infidelité. Ils preschoient aux Portugais à la bassecour du logis, & disoient la Messe tous les iours, pendant le temps qu'ils s'y arressterent. Or comme la Chappelle n'estoit pas assés grande, pour contenir tous les Portugais à la fois, les vns entendoient la premiere Messe, & les autres la seconde; de façon que quand les vns en fortoient, les autres y entroient, & de tout le iour il n'y auoit faute de gens. Les Peres sejournerent là pres de trois sepmaines, tant pour ce qu'a esté dit, qu'a raison de ce qu'au mesme temps, le second fils du grand Mogor, appellé le Soldan Morad, arriua là avec vne grosse armée, qu'il menoit au nom de son pere contre Melique, Roy de Decan. Sçachant donc que les Peres estoient arriués à Cambaya, le iour ensuyuant, qui fut la veille de Noel, il leur enuoya dire, qu'ils l'allassent trouuer au chasteau de ladiete ville de Cambaya, car il se rendroit là, & les y desiroit voir. Le chasteau estoit fort pres du logis, ou les Peres se tenoient: & pour ce aussi tost qu'ils sçeurēt que le Soldan Morad y estoit venu avec petite compagnie (ayant laissé le reste de son camp logé hors de la ville) ils le vont saluer dans la forteresse, là ou il leur fit vn accueil fort humain & honorable, leur monstrant des signes de bien-veillance, autant que son pere eust sçeu faire; & parce qu'il estoit desia nuiet, il ne s'arresta pas là d'auantage, ains partit bien tost apres, ayant au prealable tiré de la ville deux cens mille escus, partie en argent monnoyé, partie en lingots d'or. Il s'en alloit de là à Surraté, qui est vn port de mer du mesme Royaume, par-deça la ville de Daman.

Or estant vne lieue loing de la ville de Cambaya, il manda de rechef venir les Peres. Ce fut à trois heures apres minuiet, qu'on leur apporta ce message, qui leur fut vn peu fascheux, d'autant qu'ils pensoient ce iour là celebrer deuotemēt la feste de la Circōcision de nostre Seigneur propre de la Compagnie de I E S V S: neaumoins il fallut desloger, apres que l'vn d'iceux eust dit la Messe. Ils arriuerent au camp à la saison, que tous les Capitaines venoient donner le bonjour au General, le Soldan Morad, lequel se tenoit debout en vne tente haut esleuée; de maniere qu'il pouuoit estre veu de tous. Les Peres estans là venus, luy firent aussi

Le Soldan Morad 2. fils du grand Mogor arriue à Cābaya.

Est salué des Peres.

Les mrs. de venir à son camp.

la reuerence, de mesme façon que les autres; c'est à sçauoir en courbant la teste deuant luy, & apres se tindrent debout parmy les Capitaines, & autres Seigneurs, qui estoient là, comme des statuës, ayans tousiours les yeux fichés sur luy. Quelque temps apres ils montent à son pauillon, qui estoit posé sur vne platte-forme, qu'on auoit faicte tout expres, seruant comme de mur ou de boulevard, & au milieu d'icelle estoit plantée sa tente, ouuerte de toutes parts, avec vn petit liët. Là dedans il reçeut les Peres avec plus d'honneur & signes de bien-vueillance, qu'il n'auoit faict la premiere fois, s'entretenant à deuiser avec eux, vn bon espace de temps, & leur faisant plusieurs demâdes curieuses. Entre autres choses il s'enquestoit si en Portugal y auoit de neige, de glace, des bestes sauages, d'Ours, de Lieures, d'oiseaux de chasse, des Faucons, des Autours, & choses semblables. Les Peres luy respondans que tout cela s'y retrouuoit, il se tournoit vers ses Capitaines, & leur disoit: Il y a donc de ces choses en Portugal? Les Capitaines mettoient soudain les paulmes des mains contre terre, & puis sur leur teste, qui est parmy eux vn signe de remerciement de l'honneur, que le Prince leur faict, de vouloir parler à eux. Apres qu'il se fut enquis de telles & plusieurs autres bagatelles, les Peres s'aduancent pour prendre congé de luy iusques à vn petit terre, d'ou il debuoit monter sur vn Elefant. Comm'il estoit là prest à monter, on luy apporte quinze cens Manudes, qui est vne espee de monnoye de ces quartiers là, & pouuoit ceste somme valoir quelques six cens liures de France, ou environ. Lors se tournant vers les Peres: Je sçay bien (leur dit il) que vous ne prenez pas d'argent, ny autre present quelconque: mais parce que vous estes pauvres, & que pour faire ce qui reste de chemin, vous aurez besoing de quelqu'ayde, ie veux que vous receuiez cecy, que ie vous donne par aumosne. Aussi tost qu'il eut dit cela, il saute sur vn Elefant, & de celuy là sur vn autre plus grand, qui ressembloit à vne tour. Or d'autant qu'il se craignoît que les Peres ne voulussent pas accepter cest argët, il commande à ses gens de le bailler à l'Armenien, qui les conduisoit: de façon qu'estans de retour à leur logis, ils y trouuerent ces 1500. Manudes, & en outre trois charretes avec six bœufs, pour faire porter leurs hardes, & trois cheuaux, pour leur seruir de montures. Ce qui leur vint fort à propos, principalement l'argent, qu'il leur donna. Car l'Armenien n'auoit point de passe-

*Leur fait
beaucoup
de carref-*

61.

*Les pour
uoit d'ar-
gent &
de mû-
res pour
le reste
du che-
min.*

port pour les conduire par Cambaya, mais par le Schind; si bien que sans cela, ils eussent esté fort mal logés. Ce fils du grand Mogor menoit lors tant seulement quatre ou cinq mille cheuaux, mais on disoit qu'il en auoit desia enuoyé deuant vingt mille, avec quatre cens Elephans, sept cens Chameaux, quarante ou cinquante Dromedaires, quatre mille bœufs, quinze grosses piéces de canon, & quatre moyennes, avec quelques coleurines & faucones. Il s'en alloit à ceste guerre avec vn grand courage, & bonne esperance de s'emparer du Royaume de Decan; mais comm'il estoit encore peu experimenté, & se laissoit gouverner à des ieunes gens, ne se souciant pas de suyure le conseil des vieillards, son fait n'alloit gueres bien; d'ou les Peres prognostiquent, qu'il se perdrait, comme de fait il aduint, ainsi que nous dirons cy apres. Il estoit d'un naturel doux & humain, fort liberal, & de bonne complexion. Mais ces ieunes solastres, qu'il auoit aupres de luy, l'auoient desia gâté. Il ne tenoit pas grand compte des Mosquées de Mahomet, & n'y entroit presque iamais. Tout son plaisir estoit, ou à chasser, ou à faire l'amour, ou à se promener deçà & delà. Apres qu'il fut party, les Peres se disposent à poursuivre leur chemin; lequel ils ne peurent pas tenir par le Schind, selon le commandement du Roy, & comm'ils eussent bien desiré, parce que le Gouverneur de ce lieu estoit encore occupé en son ieusne: & quand ils font ce ieusne, il ne leur est point permis de vacquer à autre chose du monde, & quelques uns ieusnent l'espace de vingt ou trente iours: les autres quinze, ou huit tant seulement. Quant au voyage des Peres, il dura en tout cinq mois, iasoit que depuis Goa iusques à Lahor, ou estoit la Cour du grand Mogor, il n'y ait que deux mois de chemin. Ils firent quelques deux cens trente lieues par terre, marchans tousiours dans les pais de sa iurisdiction, mais avec beaucoup de peine: car depuis Cambaya iusques à Lahor, la pluspart du chemin n'est que deserts, & sablonnières seiches, hors-mis vingt lieues auant qu'arriuer à la ville de Lahor, ou le terroir est assez bon: mais pour le reste, l'on ny trouue gueres de fontaines ny de ruisseaux, ainçois force sable, lequel est quelquefois esleué en l'air par le vent, de maniere qu'il couure les personnes, & les enseuelit dans ses sablonnières pour iamais. Et tant pour cela que pour se defendre contre les voleurs, ceux, qui font ce voyage, ont accoustumé de se mettre en compagnie de plusieurs autres. Ce

L'apparat de son armée.

Le fastueux voyage des Peres.

*La fable
de mar-
cher des
Carava-
nes de ce
païs.*

qu'on appelle communement Casila ou Carauane. Ils elisent vn Capitaine de leur troupe, pour la conduire & gouverner, ainsi qu'a esté dit de ceux qui font le voyage d'Ormuz, & sont quel-quesfois plus de deux ou trois mille personnes. En celle cy que les Peres se mirent, il y auoit quatre cens Chameaux, cent charretes, & autant de cheuaux, sans compter beaucoup de pauures gens, qui suyuoient à pied les autres. Quant il est temps de partir, le Capitaine faict battre les tambours, & ce par trois fois, auant qu'on desloge. Au premier coup qu'on entéd sonner, tous mettent à bas leurs tentes & pauillons, ou ils reposent de nuit: au second l'on charge les Chameaux, & les charretes; & au troisieme la Carauane commence à marcher. Quand ils cheminent de nuit, afin de ne s'esgarer les vns des autres, les tambourineurs marchent deuant, & battent continuellement leurs tambours; lors qu'il faut s'arrester, ils en font aussi quelque signe. Ce qu'ils ont accoustumé de faire, non seulement la nuit pour reposer, mais encore és lieux ou ils scauent, qu'il y a des puyz creuséz, lesquels ordinairement sont profonds de quarante ou cinquante brasses: & pour en tirer de l'eau, ils se seruent des bœufs qui leur menent les charretes. L'vn des Peres escript, qu'ils eurent grande disette d'eau en ce voyage, car celle qu'ils trouuoient estoit aussi salée que celle de la mer. Ce que ie n'eusse iamais creu (dict il) si ie ne l'eusse experimenté moy mesme, veu que cela est si loing de la mer. Ils endurerent aussi vn grand chaud, & ne pouuoient trouuer des viures, à cause que cest vn païs desert. Ils arriuerent sur la my Mars à vne ville nommée Amadaba, ou ils virent trois choses remarquables: l'vne fut vn Iogue, qui se tenoit au milieu de la grande place de la ville, auquel vn' infinité de monde accouroit de toutes parts, pour le veoir. Car il estoit estimé vn grãd Saint parmy eux, à cause de l'austerité de vie qu'il menoit. Côme font aussi la plus-part de ces Iogues, au moins pour vn rēps, ainsi qu'a esté dit ailleurs. Or cestui-cy que les Peres virent à Amadaba, estoit si superbe & orgueilleux, que le fils du Roy le Soldā Morad, duquel a esté parlé cy dessus, l'ayāt mādē venir vers soy, l'autre n'y voulut point aller: ains avec vn grand faste & arrogance respondit à ceux, qui le venoiēt querir de sa part, disant, Que le Prince vienne luy mesme, s'il veut: car ma sainteté merite bien cela. Le Prince ayant entendu vne si sottē responce, le fit tres-bien fouetter, & puis le bānist de tout ce païs, ou il estoit

*Amadā-
ba ville.*

*Liv. I.
ch. 4.*

*Superbe
d'un Iog-
ue.*

pour lors, selon que meritoit sa presumption & outrecuydance. L'autre chose notable qu'ils y veirent, fust vn superbe edifice qu'ils trouuerent à vne lieüe & demye d'Amadaba. C'estoit vn cimetiere, auquel on auoit enterré vn Cazique, iadis maistre d'un certain Roy du Guzarate, qui fist bastir ceste fabrique, à l'honneur de son Precepteur, & luy avec trois autres estoient enseuelis à vne autre chappelle. L'œuvre estoit toute de marbre tres-beau, & bien poly: le paué aussi estoit de mesme matiere. Il y auoit trois basse-cours, en l'une desquelles ils compterent quatre cens quarante colomnes de marbre, chascune de trente pieds de haut, avec leurs bases & chappiteaux à la Corinthienne. Al'un des costez il y auoit vn estang plus grand, que n'est la place de Lisbonne appellée Rozzio, le tout elabouré avec vn artifice merueilleux, avec force belles fenestres, qui auoyent la veüe sur le dit estang, somme que c'estoit vn ouurage parmi les barbares, qui ne ressenoit point le barbare. Là mesme ils trouuerent force Mahometains & Mahometaines, qui s'en alloient en pelerinage à la Meque. Ils apprirent d'eux vne chose fort plaisante, c'est que leur faux Prophete Mahomet, ayât deffendu aux femmes qui ne sont pas mariées, de faire des pelerinages: neantmoins tant les ieunes que les vieilles font cettuy-cy de la Meque: mais toutes se marient deuant, pour ne contreuenir à leur loy: & apres qu'elles sont de retour, celles qui veulent quittent leurs maris. Reuenant au chemin des Peres, ils partirent d'Amadaba le 19. de Mars, & le 24. sur le tard ils arriuerent à vne autre ville nommée Patana. Or d'autant que le lendemain de leur arriüée, estoit la veille de Pasques, ils s'arrestèrent là trois iours, pour solemniser la feste. Plusieurs Chrestiens, qui suiuoyent la Carauane, se confesserent à eux: mais ils eurent bien de l'affaire avec quelques Armeniens, qui ne gardoyent pas le Calendrier Gregorien; toutesfois ou de crainte qu'ils eurent (à cause qu'ils deuoient repasser par les terres des Portugais) ou bien conuaincus de la verité, ils celebrerent la feste avec eux; horsmis vn vieux Docteur opinastre, qui disoit que les Peres se mescontoyent de cinq sepmaines; tellement qu'il fist la Pasque le Dimanche, qui est deuant la feste de l'Ascension. De là poursuiuans leur chemin ils rencontrerent force villes & gros bourgs: mais la plus-part estoient ruinez & destruits, principalement les Mosquées, qui ne se rebastissoient point. Finalement ils arriuerent à la ville de Lahor

*Edifice
merueil
leux par
my les
barba-
res pour
la sepul-*

*Patana
ville*

le 5. du mois de May l'an 1595. estans partis de Goale 3. Decembre de l'année precedente.

Les grandes caresses, que le Roy de Mogor feist aux Peres, & la bonne affection qu'il monstroït enuers la foy Chrestienne, leur donnant grand esperance de sa conuersion.

CHAPITRE XIII.

*L'accueil
que le
Roy feist
aux Pe-
res.*



LE Roy estant aduertý de la venuë des Peres, leur enuoya soudain vn de ses Capitaines, pour les bien veigner de sa part & leur declarer le cõtentement, qu'il auoit receu de leur arriüee. Bien tost apres les Peres l'allerët saluer, ausquels il feist vn accueil fort honorable & amiable: car il les embrassa tous trois avec demonstration de grande bienueillance, & le mesme feit le Prince son fils aisné, qui estoit lors aagé de trente vn an. Le Roy leur tesmoigna & par signes, & par parolles l'aïse & le plaisir, qu'il receuoit de les voir en sa Cour: & les fit loger en vne maison fort commode, en laquelle il s'estoit autresfois tenu, si près de la riuiera, qu'il n'y auoit pas plus de quinze pieds de leur porte iusques au bord d'icelle: & avec ce ils estoient si esloignez du tracas & brouillis du peuple, que personne ne pouuoit passer par deuant leur logis, sinon ceux ausquels les Peres le permettoient. Car les gardes du Roy empeschoyent qu'on ne passast par là, à cause que c'est au dessoubs des fenestres du Palais Royal. La nuit suiuaute apres leur arriüee sa Majesté les fist appeller, & leur monstra les images de nostre Sauueur & de nostre Dame, que le P. Rodolfe luy auoit données, les tenant luy mesme entre ses bras avec si grande reuerence, qu'un Chrestien auroit sceu faire. Soudain que les Peres veirent les Images, ils se mirent à genoux pour leur faire la reuerence, comm'il estoit conuenable. Quoy voyant le petit nepueu du Roy, fils du Prince son aisné se mist aussi à genoux, tenant les mains ioinctes. Ce qui aggrega fort au Roy, & s'adressant au Prince son fils, pere de l'enfant: Voyez (luy diët-il en se sousbriant) vostre fils. Il leur monstra par apres les liures, que les mesmes Peres luy auoyent laissez. Entre autres il y auoit ceux qui s'ensuiuent. La Bible Royale en quatre langues, les concordant-

*Les li-
ures qu'il
leur
bailla.*

ces, la Sømme de Theologie de S. Thomas en quatre volumes, & le liure contra gentes, avec vn autre contre les Iuifs & les Sarra-
fins du mesme aucteur. Soto, S. Antonin, l'histoire des Papes, la
Chronique de S. François, Syluestre, Nauarre, Caietain, & tous
ceux-cy doublez. Il y auoit encore les ordonnances de Portugal,
les cõmentaires d'Alfonse Albuquerque, les constitutions de la
Compagnie de Iesvs, les exercices spirituels du B.P. Ignace de
Loyola, fondateur de la mesme Societé, la Grammaire Latine
d'Emanuel Aluarez, & plusieurs autres. Il leur bailla tous ceux
qu'ils voulsirent pour s'en seruir, & ils prindrent ceux qu'auons
diët. Au reste non seulement le Roy, mais encore le Prince son
fils aîné leur faisoient des grâdes caresses, & mesmes on se print
garde, que le Roy ne deferoit à aucun de ceux qu'il auoit autour
de soy, tant d'honneur qu'à eux: bié que ce fussent les plus grâds
Seigneurs de son Royaume: car il faisoit tenir les Peres tousiours
fort près de soy, & ce qui est encore plus, les faisoit asseoir quel-
quefois sur le mesme cuissin ou oreiller, sur lequel luy seul & le
Prince son fils aîné, auoyent accoustumé de s'asseoir. Vn iour
cõm' il se promenoit par vne gallerie, qui se iette hors sur la bas-
se-cour du Palais, ou tous ses Gouverneurs, Magistrats, & Capi-
taines, s'assembloient pour luy parler, les Peres s'y trouuerent en-
core, estãs venus là tout exprés pour le visiter. Mais soudain qu'il
les apperceust il les fist approcher, & les accueillit avec grande
courtoisie, baissant mesmes la teste pour les saluër, & leur faisant
prendre vne meilleure place. Or cet honneur ne faisoit-il point à
pas vn des Princes, ny des Roys, qu'il eust auprès de soy: ny mes-
mes à ceux qui venoyent de nouueau à luy, pour se rendre ses
tributaires. Il en vint vn pour cet effect le 28. d'Aoust de l'an
1595. mais l'accueil, qu'il luy fist ne fust pas si humain, que
celuy des Peres. Car ce Roy estant entré en la sale, ou le grand
Mogor estoit assis, d'aussi loing qu'il le vid, il s'encline & baif-
se la teste, touchant des mains, & de la face contre terre, puis
s'approchant de luy petit à petit, luy faiët la mesme reuerence
plusieurs fois, iusques à ce qu'il en fust bien près: lors on le
fouille par tout, pour voir s'il portoit des armes, & apres cela;
ce nouueau vassal s'aduanee pour toucher le pied du Roy, le-
quel demeura immobile, sans luy monstrier autre signe d'amitié,
sinon qu'il luy mist la main sur le col, & c'estoit encore beau-
coup, eu esgard à ce qu'il faisoit aux autres.

*Riches
présent
offert au
Roi.*

Ce nouveau tributaire estant leué de terre, prend place entre les autres Princes, & Capitaines de la Cour, laquelle il retint de là en auant: & pour dire cecy en passant, il fist vn présent au grád Mogor, qu'on estimoit valoir deux cens mille escus. C'estoit vn paire de poignars avec leurs gaines, & ceintures de fin or, couuertes de pierres precieuses de grande valeur, comme rubis, ou escarboucles enchâssées en or: puis deux phioles mediocres toutes dor, & vn' autre de mesme matiere, mais plus grande; outre ce vn cheual fort richement harnaché. Car il auoit tout autour de son harnas force pierres precieuses enchâssées en or. Il luy donna encor autres cent cinquante cheuaux, dix iuments, & cinquante chameaux tous couuerts de velours verd & cramoisi; finalement il luy fist present de quatre tapis, chascun desquels coustoit deux mille escus, & si estimoit-il à grand' faueur, que le Mogor voulust accepter ce present. Apres cestuy-cy luy en vint vn autre, que son fils le Soldan Morad, estant lors au Guzarate, luy enuoyoit, lequel n'estoit pas de moindre valeur, que celuy qu'auons dict. Car il luy fist present de 50. elephans, qu'on estimoit cent cinquante mille escus, & d'un charriot d'or avec vn autre d'argent, & quelques belles pieces faites de nacre; brief de beaucoup d'autres choses, les plus precieuses qu'il auoit peu re-

*Autre
du Vice-
ce-Roy
de Ben-
gala.*

couurer. On luy apporta encore vn autre present du Vice-Roy de Bengala, qui fust eualüé à huiët cens mille escus; car il luy enuoya entr'autres choses trois cens elephans: & ce luy estoit vne chose fort ordinaire que d'en receuoir de semblables, de maniere que ceux qu'on luy faisoit dans vne sepmaine (ainsi qu'escriit le P. Pignero) montoyent quelquesfois à la valeur d'un million d'or; & principalement à vne feste, qu'ils appellent Neroza. Car pour lors on luy apportoit de toutes parts vne infinité de presés, & de grande valeur. Vn seul Capitaine luy en feit vn, qu'on estimoit valoir, pour le moins, cinq cens mil escus. D'où l'on peut colliger, combien grands deuoyent estre les thresors, que ce Prince auoit amassé. Mais laissant cecy à part; la deuotion, ou pieuse affection, qu'il souloit monstrier enuers les choses du Christianisme, donnoyent grande esperance aux Peres de sa conuersion. Car ayant recouuré quelques images de nostre Sauueur & de Nostre Dame, qui estoient des plus belles, qu'on apporte d'Europe, il les tenoit fort decemment, & avec grande reuerence: prenant vn singulier plaisir de les faire voir à ses plus intimes, luy.

luy mesmes les tenât quelquefois entre ses bras, iusques à ce qu'il venoit à se laisser : car elles estoient assés grandes. Il vint vn iour à vne feste, que les Peres celebroident, & se trouua present, quand ils recitoient les Litanies, se tenant tousiours à genoux, & les mains ioinctes, comme si c'eust esté quelque Prince Chrestien. Si fut long temps à regarder & considerer les Images, que les Peres auoient en leur Chappelle, s'enquerant des mysteres qu'elles representoient : & leur presta encore ses belles Images, pour la feste de l'Assomption de nostre Dame, luy en ayant esté touché vn petit mot ; mais outre ce il leur enuoya des tapisseries tres-riches de drap d'or, & de soye, avec lesquelles ils parerent magnifiquement leur Chappelle. Le Pere Hierosme Xauier en vne lettre, qu'il escriit au R.P. General de la Compagnie du 20. d'Aoust 1595. raconte ce que dessus, & adiouste que le Roy se monstroit particulièrement deuot, & affectionné à la glorieuse Vierge Marie. Le mesme (dit il) faisoit son fils aîné, lequel se fâcha fort contre celuy qui nous auoit cōduits, parce qu'il ne luy auoit apporté de Goa aucune Image de nostre Dame : & parlant à quelque autre, qui s'en alloit en ces quartiers, il l'enchargea de luy acheter quelques pieçes, qu'il desiroit auoir, luy recommandant sur tout de n'oublier pas quelque belle Image de nostre Dame. Or d'autant que les Peres auoient mené avec eux vn Peintre Portugais, auant toute autre chose le Prince se fit faire vn pourtrait de l'Image de la Vierge, que les Peres auoient portée. Ayant veu pareillement ce iour, qu'il vint à leur Chappelle avec le Roy son Pere, vne Image en bosse du petit enfant I E S V S, & vn' autre d'vn Crucifix, il commanda à ses ourriers de luy en tailler de semblables d'uoire. Il se monstroit aussi fort affectionné enuers les Peres, & obtenoit pour eux du Roy tout ce qu'ils vouloient. Le premier iour qu'ils luy parlerent, il leur promit de leur faire bailier tout ce qui leur seroit necessaire, pour bastir vne Eglise, & fit en sorte, que le Roy sō pere assignast vn lieu propre pour cela. Le mesme ratifia il depuis, & adiousta, qu'il dōneroit ordre, que son pere cōstituat quelques vns de ses Officiers, qui fissent executer la chose. Le Roy aussi dōna congé aux Peres de baptiser tous ceux, qui voudroient se rendre Chrestiens. Il a (adiouste le mesme Pere Xauier) bâny quasi tout à fait le culte de Mahomet de ce pais là ; tellement que dans la ville de Lahor, il n'y a maintenant aucun Mosquée, qui serue aux Satrazins. Car celles, qu'il y auoit ja-

Le Prince aussi semble estre bien affectié ne aux mesmes choses.

Le Roy dōne congé aux Peres de baptizer ceux

qui vou-
dront
estre
Chre-
stiens.

A fort
abbatu
le Ma-
hometif-
me en ses
terres.

Desire
estre te-
nu cōme
Saint.

Liure 2.
chap. 16.
sur la
fin.

dis, ont esté reduites par son commandement ou en escueries, ou en greniers publics, pour garder le bled, le riz, ou autres grains semblables. Leurs Alcorans aussi, ont esté mis par terre. Outre ce, le Roy chasque Vendredy (qui est le iour de la sepmaine auquel les Sarrazins choment) faict amener deuant soy vne quarantaine ou cinquantaine de pourceaux, lesquels on agace, de sorte qu'ils s'entrebattent à bon escient: puis il fait enchasser en or les dents de ces pourceaux. Ce qu'on estime qu'il fait tout expres pour faire plus de despit aux Sarrazins. Car ils detestent ces animaux sur tout. Avec telles & semblables inuentions il a osté à la loy de Mahomet beaucoup du credit, qu'elle auoit en ces quartiers là. Toutesfois l'on ne sçait bonnement, ce qu'il est: car bien qu'il ne soit pas Mahometain, comme ses œuures le monstrent assés, & qu'il semble plus enclin à la superstition des Payens, de façon que les Gentils sont beaucoup mieux venus aupres de luy, que les Mahometains; si est-ce qu'il n'est pas du tout Ethnique. Car il adore & recognoist le vray Dieu, Createur du ciel & de la terre, bien qu'avec cela il adore aussi le Soleil. Il en y a qui estiment (adiouste le mesme Pere) qu'il pretend forger vne nouuelle Religion, dont il veut estre le chef; & dit on qu'il a desia beaucoup de Sectateurs, mais que ce sont pour la plus part des flatteurs, ou gens corrompus par argent. Il est neaumoins assuré qu'il desire fort estre tenu & estimé comme vn Dieu ou quelque grand Prophete: & veut donner à entendre, qu'il faict des miracles, guerissant les malades avec l'eau, dont il laue ses pieds. Plusieurs femmellettes luy font des vœux, pour obtenir la guerison de leurs enfans, ou afin qu'elles en puissent auoir. Que si telles choses leur aduiennent, elles s'en vont luy porter les offrandes vouées comme à vn Saint. Et bien qu'elles soyent de petite valeur, il les estime neaumoins beaucoup, & les reçoit tres-volontiers. Voyla ce que le P. Xavier escrit de ce Prince, & ou l'ambition mene les hommes, quand ils ne sont retenus par la crainte de ce souuerain Monarque, qui depose les plus puissans de leur throne, & y esleue les humbles. Quelques vns pensent (ce dit le mesme Pere) qu'il suyt l'opinion des Vertéas (desquels nous auōs parlé au 2. liure.) Mais le plus probable est, qu'il va flottant ça & là, comme vn nauire sans gouuernail, ne sçachant à quel port de Religion se rendre. Il aduertissoit souuent les Peres d'apprendre soigneusement la lāgue Perseane, afin qu'il peult traicter avec eux

fans truchement : & vne fois leur fit dire par vn de ses gens , qui luy estoit fort intime , & duquel il se seruoit és choses appartenantes à la Religion, que s'ils entendoient la lāgue Perseane, ils luy desnoüeroient vn grand nœud, qui le tenoit bien fort serré. C'est pourquoy les Peres s'y estudioient autant qu'il leur estoit possible : mais cependant ils ouurirent les escholes , pour monstrier à lire & escrire en Portugais à tous ceux, qui voudroient l'apprendre , afin qu'ils peussent par mesme moyen leur enseigner la doctrine Chrestienne. Il y auoit plusieurs enfans des Princes & grands Seigneurs, qui venoient à ceste eschole , & entre autres trois fils d'un certain Roy , qui est vassal dudit Echebar. De ces disciples il en y auoit quelques vns , qui desiroient fort receuoir le baptisme , & desia l'auoient demandé instamment. Vn entre autres qui pretendoit non seulement se rendre Chrestien , mais encore Religieux ; & faisoit publiquement des actes d'un Chrestien. Car estant vn iour entré dans la Chappelle, il ietta son Turban à terre , & les genoux flechis deuant l'Autel , ou reposoit le S. Sacrement , se mit à dire tout haut ces parolles: O Seigneur IESVS-CHRIST fils de Dieu, ayés souuenance de moy. Vn autre de leurs disciples ayant esté repris d'un Sarrazin , qui venoit enseigner la lāgue Perseane aux Peres, de ce qu'il ne ieusnoit pas vn iour , que les Mahometains ont accoustumé de ieusner fort estroitement ; l'enfant luy respond, & qui a commandé ce ieusne? c'est Mahomet, diét le Sarrazin. Et qui est Mahomet (repart l'enfant) si non vn faux Prophete ; & imposteur. L'autre tout estonné se boucha les oreilles, pour n'entendre telles choses: mais il luy fallut aualer celle là en despit qu'il en eut; car l'enfant estoit de tel qualibre , que l'autre ne luy eust osé dire vn mot de trauers ; ains luy demanda pardon de ce , qu'il l'auoit tançé de ne ieusner pas. Or jaçoit que le Roy , & le Prince son fils aîné, eussent donné congé de bastir vne Eglise ; toutesfois les Peres pour certains respects, faisoient semblant de ne s'en souuenir pas: mais le iour de nostre Dame aux neiges, qui est le 5. d'Aoust de l'an 1595. le Roy leur dit derechef qu'ils bastissent vne Eglise, & baptisassent tous ceux , qui voudroient estre Chrestiens de leur plein gré. Mais comme les Peres le suppliasse de bailler vn escript signé de sa main, par lequel il peut apparostre , que telle estoit sa volonté ; il respondit, cela n'este necessaire au lieu, ou il demeueroit, d'autāt qu'il estoit l'escriture viuante. Ce neauuains

Les Peres dressent une eschole & la seruent de leurs disciples.

Le Roy donne congé aux Peres de bastir vne Eglise à Lahor.

*Donne
congé de
prescher
la foy en
vñ Royau
me de
Cābaya.*

quelque temps apres il fit expedier là dessus des lettres patentes fort belles & tres-amples. D'auantage comme le P. Xavier se souuenant de la bonne disposition qu'ils auoient trouué és habitans de Cambaya, pour receuoir la semence du saint Euangile, luy eust demandé des lettres patentes, par lesquelles il declarast, qu'il permettoit aux Peres de la Compagnie, d'y aller prescher la foy Chrestienne, & à ses subiects de la receuoir, le Roy le luy accorda fort volontiers, & en fit expedier des lettres Royaux. Ayant eu ces patentes, ils enuoyerent celles, qui estoient pour Cambaya, ou vne coppie d'icelles, au P. Prouincial de l'Inde, lequel destina quelques Peres pour y aller, ainsi qu'a esté dit au 2. liure, & eux en vertu des leurs, commencerent à prescher publiquement la foy de IESVS-CHRIST dans la ville de Lahor, & y firent tel frui&t, que desia au mois de Septembre de la mesme année 1595. il en y auoit quelques vns de baptizés, & d'autres qui se dispoisoient pour le mesme, bien qu'ils ne fussent pas des plus apparens, mais neaumoins c'estoient des ames, aussi bien racheptées par le sang precieux de l'Agneau sans macule, que celles des plus grands. Et pource les Peres en faisoient grand cas, veu mesme-ment que c'estoient les premices de ceste vigne nouuellement plantée, esperàs que celuy, qui luy auoit donné commencement l'accroitroit tousiours de plus en plus.

Le grand Mogor perseuerant en son obstination est puny de Dieu : & ce que les Peres de la Compagnie de IESVS ont fait & enduré en ses terres, pour l'aduancement de la Religion Chrestienne.

CHAPITRE XV.

*Encerti-
tude du
Roy en
la Reli-
gion.*

QUOMBIEN que le Roy semblast d'un costé faire grand estat de la Religion Chrestienne, ainsi que l'on peut voir par ce qu'a esté dit, & qu'en plusieurs choses il monstraist la preferer à toutes les autres, donnant mesme grande esperance qu'il l'embrasseroit; ce neaumoins il estoit d'autre costé si attaché à vne folle ambition, & desir qu'il auoit, d'estre estimé quelque grand Prophete, & comme vn demy-dieu en terre, qu'il n'y auoit moyen de le gagner à s'humilier & faire ioug à la loy de IESVS-CHRIST. Il est bien vray, qu'il n'auoit aucune opinion, ny estime de la loy de Mahomet: mais il estoit fort addonné à

l'adoration du Soleil, tellement qu'il luy faisoit oraison quatre fois le iour, sçauoir est au matin, quand il se leuoit: au midy, à son coucher, & encor à minuit. Et chascque fois il disoit en sa louange mil quarante & tant de noms, lesquels il comptoit avec des petites boules, faictes à la façon de nos paternostres: mais c'estoyent de belles pierres precieuses, enfilées de mesme que nos chappelets. On luy voyoit bien quelques fois faire la reuerence aux images de nostre Seigneur & de nostre Dame, & mesmes porter au col pendu vn beau reliquaire, attaché à vne chaisne d'or, lequel auoit d'vn costé vn Agnus Dei, & de l'autre vn' image de nostre Dame. Mais on le voyoit aussi se mettre tous les matins sur vne fenestre de son Palais, d'où il pouuoit estre aperceu d'vne grande multitude de gens: lesquels soudain qu'ils le voyoient, se prosternoient à terre, & l'adoroyent avec certaines ceremonies, que les Gentils ont accoustumé de faire à leurs faux Dieux, quand ils les adorent; outre ce que nous auons dict des vœux qu'on luy offroit, & qu'il aggreoit tant. Ces choses si contraires mettoient ses subiects en telle perplexité d'esprit, qu'ils ne sçauoyent de quelle secte ou Religion estoit leur Roy: & en y auoit, qui pensoient qu'il en voulust inuenter vne nouvelle, & que pour ceste cause il auoit faict venir à sa Cour beaucoup de gens doctes, & bien versez en toute sorte de loix, pour prendre de chacune d'icelles, ce que bon luy sembleroit. Car voyant que s'il embrassoit la foy de IESVS-CHRIST, il luy falloit quitter plusieurs vices, ausquels il estoit accoustumé de longue main, il vouloit, à ce qu'on estimoit, faire vne telle meslange de loix, ou les esprouuer toutes, pour voir s'il en trouueroit quelque vne qui luy ostast le remords de conscience, sans qu'il luy fallust changer de vie. Mais comm' il ne se peut faire, qu'on trouue vn vray repos & tranquillité d'esprit, hors de la vraye foy, il se trauailloit en vain. Or afin de luy oster de la teste ces illusions & tromperies du Diable, il semble, que ce bon Dieu, qui ne desire pas la mort du pecheur, ains plustost qu'il se conuertisse à luy & se sauue, voulust luy enuoyer quelques chastimens & pumitions, pour l'esueille du sommeil de son obstinatiō. La premiere fust la desfaite de son second fils le Soldan Morad: lequel, comme nous auons dict cy dessus, auoit esté enuoyé au Guzarate, avec vne grosse armée, pour faire la guerte au Melique Roy de Decan, auquel appartenoit jadis la ville de Chaul, que les Portugais tien-

*Adore &
prie le
Soleil.*

*Se faict
adorer
comme
Dieu.*

*Vult
sçager
vne nou
uelle Re
ligion.*

1. De la
mort de
son 2. fils

nent maintenant sur ceste coste de mer, esloignée de Goa quelques cinquante ou soixante lieuës vers l'Occident. Ce fils donc du Roy fust tué en ceste guerre, & avec luy le Roy perdit les plus braues Cappitaines qu'il eust. Il receust ceste nouuelle lors qu'il celebrôit la feste qu'ils appellent du nouueau iour, qui est quand le Soleil entre au signe du Belier de façon qu'il est croyable que Dieu luy vouloit par ce moyen faire entendre qu'il le chastioit pour ceste folle superstition d'adorer le Soleil. Toutesfoi il ne fist pas son profit de cela, ains ayant bien tost apres enuoyé vn autre de ses enfans, pour continuer la mesme guerre, luy baillant sa propre espée, & quatre cens mil escus pour son viatique, il continua tousiours en la mesme superstition. Partant nostre

2. De l'embrasement
de ses
thresors
& de son
palais.

Seigneur l'aduifa pour vn second coup avec vn autre chastiment, qu'il luy enuoya le iour de Pasques, de l'an 1597. enuiron le mesme temps, qu'il en aduint vn autre pareil au Roy de la Chine, comme nous dirons en son lieu. Or celuy du grand Mogor passa de ceste sorte. Comme il estoit sur la terrasse de son Palais, faisant (à ce qu'on dict) vne grande feste à l'honneur du Soleil, en présence du Prince son fils aîné, & de plusieurs grands Seigneurs & Gentils-hommes de sa Cour, voilà que le feu tombe du ciel, & se prend premierement au pauillon du Prince, qui estoit tres-riche, lequel fust bruslé entierement, sans qu'il y eust personne, qui osast aller esteindre le feu. Car tous estoient si estonnez, qu'ils n'auoyent le courage de s'en approcher. De là il saute aux autres tentes, qui estoient sur la mesme terrasse, & les embrasa pareillement toutes, avec les thrones, sieges, & autres choses de grand prix & valeur, qui estoient là. Entre autres il y auoit vn throne d'or massif, qu'on estimoit valoir plus de cent mil escus, lequel fust là ou fondu ou perdu. Mais ce n'est pas tout: car le feu gagna encore le Palais du Roy, tellement que la plus grand part d'iceluy fust reduicte en cendres: vray est qu'il n'estoit que de bois. Mais ce qui fascha plus le Roy, fust la perte de tous ses thresors, tant de ceux que ses deuanciers luy auoyent laissé, que des autres, qu'il auoit luy mesme amassé durant son regne, qui valoyent beaucoup de millions d'or: car le feu consumma presque tout, mesmement grande quantité de tapisseries de drap d'or & de soye, qu'il auoit là. On dict que l'or, l'argent, & les autres metaux fondus en cet embrasement, couroyent par les ruës, comme si ç'eust esté de l'eau. A raison de cest accident suruenu

en son Palais, il sortit incontinent de la ville de Lahor, combien qu'on dict qu'il l'auoit resolu auant que cela n'aduint: & s'en alla tenir durant l'Esté au Royaume de Caximir, ou comme d'autres le nomment, Cascimir, lequel il auoit conquesté peu de temps auparauant, ou il voulust que le P. Hierosme Xavier l'accompagnast auec Benoist de Gois, laissant le Pere Emmanuel Pignero à Lahor, pour acheuer le bastiment de l'Eglise, & maison, qui estoit desia commécé. Ce Royaume de Caximir est vn des plus beaux, & plaisans pais qu'il y ait en tous ces quartiers de l'Inde, & mesmement en Esté: car il est tout enuironné de tres-hautes montagnes, qui sont couuertes de neige la plus part de l'année, & tout le reste du Royaume est vne belle plaine, tapissée d'une gaye verdure, & diuersifiée de plusieurs boscages, vergers, iardins, fontaines, & riuieres tres-belles, & tres-commodes aux habitans. Le pais est vn peu froid, mesmes à cause de ces montaignes, combien qu'il soit plus temperé que le Royaume de Rebat, avec lequel il confine du costé du Leuant. L'on y void au mois de May, venir de ces montaignes froides de Rebat, vne multitude presque innombrable de Canars sauages, lesquels à grandes troupes se iettent dans les riuieres, qui coulent tout auprès de la ville de Caximir, capitale du Royaume, comme en lieu plus chaud. Enuiron trois lieues loing de la ville, il y a vn lac d'eau douce, si profond, qu'il peut porter de gros nauires; n'ayant pas toutesfois de circuit deux lieues entières, & demye de large. Au milieu de ce lac il y a vne Isle faicte par artifice, en laquelle le Roy a vn Palais, ou il se va recreer, quand il veut chasser aux canars: parce qu'il en y a là grande quantité. Sur le bord d'une riuiere qui passe par le milieu de ce lac, on trouue vn'espece d'arbres fort grandes, qui ont le tronc semblable aux feuilles de chastanier, mais ils sont fort differents d'iceluy; ce bois estant sec, représente les eaux ondoyantes; & est fort propre pour faire des petits cofrets, & autres choses semblables de menuyserie. Le pais est abondant en riz, en bleds, & autres grains propres pour la nourriture des hommes. Ils plantent les vignes aux racines des meuriers, tellement qu'on void pendre d'un mesme arbre des raisins & des meures. Il en y a qui disent, que ce Royaume a esté l'un des plus puissans de ces quartiers là: de façon qu'on pense que le grand Mogor ne l'eust iamais peu subiuguer, si n'eussent esté les partialitez, qu'il y auoit entre les habitans. Mais comme il sceust qu'ils

Secrets de Lahor, & s'en va au Royaume de Caximir

Description du Royaume de Caximir

Arbre qui represente les ondes de l'eau.

estoyent diuisez entre eux, & mispartis, il s'y achemina avec vne puissante armée, & s'en rendit maistre fort aisement. Au temps passé tous ceux de ce païs estoyent Gentils: mais depuis trois cēs ans ou enuiron, ils prindrent la secte de Mahomet, si que la plus-part d'iceux sont maintenant Sarraſins.

Le grand Mogor s'estant retiré en ce Royaume de Caximir, avec toute sa maison & famille, le P. Hierosme Xauier, qui l'auoit accompagné, le trouuant vn peu plus à loisir, resolut de luy parler de sa conuersion, prenant occasion de luy ramenteuoir d'vn costé les grands benefices, qu'il auoit receu de Dieu, & de l'autre les punitions & chastimens, que le mesme Seigneur luy auoit enuoyez, pour le faire recognoistre, esperant de l'induire par ce moyen à escouter de loisir, & non en passant, comm' il auoit faict iusqu'à lors, les choses, qui concernoyent le salut de son ame; afin qu'il se peust du tout refoudre à suiure sa sainte loy. Mais cōme ils furent arriuez là, le Pere va tomber en vne grosse maladie, qui luy dura l'espace de deux mois, pendant laquelle le Roy monstra bien l'affection qu'il luy portoit. Car non seulement il le faisoit pouruoir tres-abondamment de tout ce qui luy estoit necessaire, & luy enuoyoit souuentesfois son propre Medecin, mais encore l'alla visiter luy mesme en personne, qui fust vne tres-grande faueur: car il n'esouloit point aller visiter aucun. Or comme le Pere commençoit à se mieux porter, le Roy tombe aussi malade sur la fin de l'Esté. Durant sa maladie il mandoit quelque fois venir le Pere, & le faisoit entrer dans sa chambre mesme ou il couchoit, ce qu'il n'auoit point accoustumé de permettre aux plus grands Seigneurs de sa Cour. Voila comment le temps s'escoula en ces maladies, de façon que le Pere Xauier n'eust pas moyen de luy parler de ce qu'il auoit proposé iusqu'à pres son retour à Lahor. Mais tandis qu'ils furent en ce Royaume de Caximir il y eust en iceluy vne tres-grande famine, si que plusieurs meres n'ayans de quoy s'etretenir elles mesmes, ny nourrir leurs enfans, les exposoyent en la place publique pour les vendre. Le Pere voyant vn si piteux spectacle, esmeti de compassion enachepta plusieurs, lesquels apres auoir receu le S. Baptisme, rendoyent bien tost l'esprit à leur Createur. Vn Sarraſin voyant la charité dont le Pere vsoit enuers ces enfans, luy en presenta vn des siens, mais il le fist rendre à sa mere, luy baillāt certaine somme d'argent pour le nourrir. Et comme le Pere Xauier ne luy

cult

*Maladie du
P. Hierosme
Xauier
du
Roy.*

*Grande
famine
au Roy-
aume de
Caximir*

eust pas voulu donner le baptême, craignant que s'il suruiuoit, il ne peut pas mener vne vie Chrestienne en ce pais là, sa mere vint le lendemain sur la poincte du iour, hurter à la porte du logis, ou le Pere demouroit, le priant d'aller à sa maison, pour baptiser l'enfant, parce qu'il s'en alloit mourir. Le Pere accompagné de quelques Portugais, s'y en va, & le baptize avec le consentement de son pere, lequel neaumoins vouloit le circoncire, apres qu'il fut mort: mais le Pere ne voulut point le luy permettre, ains ensepuelit l'enfant à la façon des Chrestiens. Le mesme aduint à vn autre petit enfant de trois ans, lequel sa mere, qui estoit Mahometaine, auoit apporté au Pere, pour le baptizer: car soudain qu'il eust esté baptizé il mourut, & son ame s'en vola au Ciel. Mais reuenant à nostre propos; le Roy apres que l'Esté fut passé, voulut s'en retourner à Lahor, ramenant quant & soy le Pere, lequel luy demanda congé d'aller deuant avec son compagnon, afin de ne se mesler avec le tracas de la Cour. Ce que le Roy luy accorda volontiers.

Est cause du salut de beaucoup de petits enfans.

Ils endurerent en ce retour beaucoup d'incommodités, tant de la faim, que du froid, & du chemin, qui estoit fort fâcheux: parce qu'il falloit passer par des petits sentiers si aspres, & si estroicts, qu'il n'y auoit place que pour vn homme à cheual; si qu'ils estoient contraincts d'aller fort bellement, & s'arrester bien souuent, mesmes à cause de l'Elephant, qui portoit leurs hardes, lequel auoit grande difficulté à monter ces montagnes, tellement que ne se sentât pas assés fort de ses pieds, pour soustenir la charge qu'il portoit, il s'appuyoit sur sa trompe, s'en seruant comme d'un baston.

Elephant qui se sert de la trompe comme d'un baston pour se soustenir.

Finalement apres beaucoup de trauail, ils arriuerent le 13. de Nouembre à Lahor, d'ou ils estoient partis le 15. de May de la mesme année 1597. Les habitans de la ville monstrerent au Pere & à son compagnon, vn meilleur visage, qu'ils n'auoient fait iusqu'à lors: car auparauant ils souloient leur ruër des pierres, & leur faire beaucoup d'autres inciuilités: mais lors ils les reçurent avec beaucoup de courtoisie. Quelques iours apres leur venuë, le Roy arriua aussi avec le Prince, ayant perdu en chemin force chevaux, & Elephans, voire mesmes plusieurs de ses seruiteurs. Le Prince aussi fut en grand dânger de sa vie. Car estant allé à la chasse des Lyons monté sur vne femelle d'Elephant, qui n'auoit point de dents, & rencontrant des petits Lyonceaux, qui n'e-

*Furie
d'une
Lionesse
à qui ont
esté tuees
ses pe-
tits.*

stoient pas encor gueres faicts, & robustes, elle les auoit facilement tués avec sa trompe. Mais là dessus vint la Lionnesse leur mere, laquelle de rage & de furie, s'alloit ietter sur le Prince, si auant que d'y arriuer, il ne luy eust tiré vn coup de fleche, dont elle fut lardée, bien que la playe ne fut pas mortelle. Se sentant ainsi blessée, elle s'en va d'une grande roideur, tout droict à celuy qui l'auoit frappée, pour le deschirer avec les ongles & les dents; mais le Prince luy tira pour la secōde fois, vn coup d'arquebuz, & la perça d'oultre en oultre. Toutefois ceste fureiueuse beste ne se rendit pas encore; ains estāt plus irritée que iamais, se iette avec grande impetuositē sur l'Elephāt, que le Prince montoit, & s'approcha si près du Prince mesme, que l'escume, qui sortoit de sa bouche, le touchoit. Luy se voyant en tel danger prend le manche de l'arquebuz, & luy en baille vn si grand coup sur la teste, qu'il l'estēdit à demy morte sur la place; lors vn soldat vint avec son espée, & luy en donna vn coup, dont elle mourut tost apres, combien que deuant elle se vengea de celuy, qui l'auoit frappée le dernier, le deschirant à belles ongles. Peut estre que nostre Seigneur voulut preseruer le Prince de ce danger, afin de s'en seruir pour l'amplificatiō de son Eglise, & le salut de beaucoup d'ames, lors qu'il seroit paruenū à la couronne. Mais retournons sur nos brisées. La mesme année es festes de Noel, le compagnon du Pere Xauier, Benoist de Gois, dressā sur l'autel de l'Eglise, qu'on auoit nouuellement bastie, vne petite creche, pour représenter la naissance du Fils de Dieu, avec vne telle gentillesse, beauté, & deuote curiosité, que non seulement les Chrestiens, mais encore les Payens & Sarrazins y accouroient à grand' foule, pour le voir. Si bien que pour satisfaire à tout le monde, il fallut tenir l'autel ainsi garny iusques à l'octaue des trois Roys. La nuit de Noel on fit iouer vne Pastorale en langue Persique, sur le mysterē de la Natiuité de nostre Seigneur, y entre-meslant quelques dictions ou sentences industanes. Ce qui agrea fort aux originaires du païs, & mesmes aux Sarrazins, plusieurs desquels conçurent vne opiniō toute autre, qu'ils n'auoiēt des Chrestiens, & de leur loy. Quelques vns d'iceux se prosternoient à terre, & adoroient IESUS-CHRIST en son image, comme s'il eust esté gisant en la creche. Mais les Gentils monstroient plus de signes d'approuuer ces choses, que les Sarrazins: & mesmes il en y auoit d'entre eux, qui faisoient des vœux à nostre Dame, & luy offroient quelque don

*Petite
creche
dressée
sur l'au-
tel pour
repré-
senter la
naissance
de nos-
tre Sei-
gneur.*

ou present, chacun selon ses moyens. Entre autres vne certaine femme y ayant apporté vne offrande, on luy demanda pourquoy elle faisoit ce present. l'ay demandé (dit elle) à Bili Mariam, c'est à dire Dame Marie (ainsi appellent ils la glorieuse Vierge Marie) qu'elle me fit la grace d'auoir vn fils, ce qu'ayant obtenu, ie luy viens presenter ceste offrande, en recognoissance d'un tel benefice. Mais ce n'est pas le simple peuple seulement, qui monstre porter grande affection aux choses de nostre foy, ains encore les plus grands. Vn Prince entre autres vint offrir deux beaux cierges, longs de quatre pieds chacun, & si gros qu'à peine les pouuoit-on tenir avec les deux mains. Il print l'un d'iceux, & serrant les yeux, comme qui prie Dieu, ou medite, le bailla au Pere, pour le faire brusler à l'honneur du Seigneur IESVS-CHRIST, ainsi parloit il: de mesme façon bailla-il l'autre pour brusler à l'honneur de Dame Marie, comme il disoit. Finalement il donna la valeur de trente escus d'aumosne, lesquels furent distribuez par le commandement du Pere, aux Chrestiens les plus pauvres. Le Prince aussi fils aîné du Roy, se monstroit si affectionné envers la foy Chrestienne, que quand l'occasion s'en presentoit, il prenoit en main la defence d'icelle, & faisoit publiquement profession de la deuotion, qu'il portoit à nostre Seigneur & à nostre Dame: de maniere qu'il tenoit d'ordinaire en sa chambre leurs images, & se plaisoit grandement à les considerer. Quand les Portugais, ou autres Chrestiens, qui estoient en la Cour, pouuoient recouurer de l'Inde ou de Portugal, quelqu'une de ces images, qui fut bien faicte, ils luy en faisoient present. Car ils sçauoient que cela luy agreoit fort. Mais ce qui l'empeschoit d'embrasser nostre foy, estoit sa lubricité: si qu'il asseura vn iour, que si la loy Euangelique permettoit d'auoir plusieurs femmes, elle seroit reçeuë de plusieurs: parce que tout le reste (ce disoit il) qu'elle enseigne, est saint & conforme à la raison. Et n'est pas de merueille, s'il sentoient tant de difficulté à moderer ses appetits charnels: veu que n'ayant encor que 36. ans, il auoit espousé desia vne vingtaine de femmes. Mais c'est assés parlé du Prince, retournons au Roy.

En ces entrefaictes, le P. Prouincial de l'Inde luy escriuit vne lettre, laquelle il enuoya au P. Xavier, pour la luy presenter: & comme c'est la coustume du pais, de ne comparoistre iamais les mains vuides deuant telles gens, il luy offrist au nom du P. deux.

Vne femme infidele obtient un fils par l'intercession de Dame Marie.

L'affection que le Prince fils aîné du Roy manifeste envers les choses de la foy Chrestienne.

Images bien faictes, qui estoient venuës du Iappon : l'une representoit nostre Sauueur, & l'autre le B. P. Ignace de Loyola : lesquelles luy agreeerent fort, & principalement celle du B. P. Ignace, parce que c'estoit une chose nouuelle, & qu'il n'auoit encore veüe, demandant au P. Xauier, de qui estoit ce pourtraict. Le Pere luy raconte à ceste occasion l'histoire de la vie du B. P. Ignace, que le Roy escouta fort attentiuement, & pria le Pere de la voir loir coucher par escrit en langue Perseane, pour le bien & vtilité de ses subiects. Là dessus vint le Prince, lequel ayant veu ladicte Image, pria son pere de la luy prester, pour en faire peindre vn' autre semblable. Quelques iours apres, le Pere estant aussi allé saluer le Roy, sa Majesté luy baille la lettre, que le P. Prouincial luy auoit enuoyée, afin qu'il la leust publiquement & tout haut deuant ses Courtisans. Ce qu'il fit, la lisant en Portugais premierement, & puis l'explicant en Persean. Or comme le Pere la lisoit, le Roy monstra par signes d'estre bien aise de ce que P. Prouincial luy escriuoit, qu'il se sentoit fort obligé à sa Majesté, pour tant de faueurs & bien-faicts, que ceux de la mesme Compagnie receuoient de sa main Royale, & qu'il le faisoit recommander par tous ses subiects au Seigneur Iesus. Et comme le Pere prononceant ce sacré nom descouurit la teste, & la baissa avec grande reuerence, le Roy voulant rendre raison de l'honneur que le Pere auoit faict à ce tres-sainct nom, luy prend la main, & declare à ses Capitaines & autres Courtisans, qu'il auoit autour de soy, come les Chrestiens portoient vn grand honneur, & respect à ce nom sacré de Iesus, & que c'estoit la cause pour laquelle le Pere s'estoit descouuert en le prononçant : puis se tourne vers le Pere, & luy demande s'il n'estoit pas ainsi, le Pere respond que sa Majesté auoit bien dict. La lettre du Pere Prouincial estant acheuée, il luy leust aussi celle que luy escriuoit le Pere Monserrat, qui auoit esté à sa Cour la premiere fois avec le P. Rodolfe : & apres auoir demeuré six ans en captiuité, comme nous auons dict cy-dessus, estoit de retour à Goa. Le Roy voulant sçauoir la cause, pour laquelle il auoit esté pris, & si mal traicté des Turcs, le Pere Xauier luy respond, que les Sarrazins, & les Turcs, estoient ennemis iurez des Chrestiens, & notamment des Peres de son Ordre, leur faisant le pis qu'ils pouuoient, & ce à cause qu'ils estoient fort contraires à la løy de Mahomet ; bien qu'ils deussent les aimer, pour le desir qu'ils ont de leur faire cognoistre le vray che-

*Lettre
du Pere
Prouin-
cial de
l'Inde
au Roy.*

*Autre
du Pere
Monserrat, &
pour
quoy il
fut pris
des
Turcs.*

min de salut. A ce propos il luy raconta comm' vn peu au parauant ils auoyent massacré le P. Abraham George de la mesme Compagnie, qui s'en alloit en Ethiopie, parce qu'il n'auoit voulu renier sa foy, ny embrasser le Mahometisme. Ce discours offensa plusieurs Mahometains, qui estoient lors auprès du Roy, tellement qu'il en y eust vn lequel pour l'amitié qu'il portoit au P. l'aduifa, qu'il fust plus sur ses gardes, en traitant des choses de la loy de Mahomet. Car il n'y a (dict-il) icy aucun Sarrafin present, qui ne voulust boire vostre sang, lors que vous dictes mal de ceste loy, & moy mesme qui vous suis amy sincere & entier, toutes & quantes fois que ie vous entens parler contre nostre Prophete, il me vient enuie de vous mettre le poignard dans l'estomach, tant cela m'est desplaisant. Au reste le Roy, bien qu'il entendist volontiers les propos, qu'on luy tenoit des choses de la foy Chrestienne, il estoit neantmoins si attaché à sa folle superstition d'adorer le Soleil, qu'il auoit tousiours auprès de soy vn Idole d'iceluy, lequel il adoroit chascue matin à la poincte du iour: d'autre part il estoit si irresolu en sa religion, qu'il ne scauoit de quel costé pancher. Il raconta vne fois au Pere Xauier, qu'il y auoit près de vingt ans, qu'il fist prendre trente petits enfans auant qu'ils sceussent parler, & les auoit fait enfermer en vn lieu, mettant des gardes tout exprés, afin d'empescher, que les nourrices, qui leur donnoient à tetter, ne leur apprinsent la langue du païs, desirant par ceste experience cognoistre quel langage ils parleroyent, estans deuenus grands; car il vouloit (disoit-il) suiure les loix de ceste nation, de laquelle seroit le langage. Mais il se trouua bien trompé: car aucun de ces enfans, ne sceust en sortant de là, prononcer distinctement & intelligiblement vne seule parole, de façon que pour cela il ne voulust point changer de loy.

Or iagoit que là bien-vueillâce, que ce grand Monarque mōstroit enuers les Peres fust telle qu'auons dict: si est-ce qu'il ne manquoit iamais quelque bourasque, qui leur donnast à trauers. Ten raconteray vne qui leur aduint à l'occasion qui s'ensuit. Il y auoit à la ville de Lahor vn certain Armenien Chrestien de nom, mais des mœurs plustost Sarrafin ou Gentil, la femme duquel estant morte, il voulust se remarier avec la niepce d'icelle. Les Peres ne voulans consentir à cet incest, il tasche de faire en sorte, que le Roy les en priaist, ou leur oedonnast, qu'à tout le moins.

La haine que portent les Sarrafins aux Chrestiens.

*Трагедия
se qui
suruient
aux Peres.*

ils dissimulassent avec luy. Le Roy adonc les fait appeller. Eux se doubans bien de ce qu'il vouloit, s'y en vont armez non pas d'acier, mais de patience, & de la priere, qui est vne plus forte armeure, s'estans recoinmandez à Dieu fort soigneusement, selon que la briefueté du temps le leur permist, resolu de mourir plustost, que de consentir à vne telle meschanceté. Tous les deux Peres s'en vont au Palais, laissant à la maison leur compagnon Benoist de Gois: lequel bien qu'il fuyst là Cour tant qu'il pouuoit, desiroit neantmoins ce soir là leur tenir cōpagnie, pour estre participant avec eux de la couronne du Martyre, s'il aduenoit qu'ils fussent massacrez, pour la deffence de la iustice: toutesfois cela ne luy ayant esté accordé, tādīs que les Peres estoient au Palais, il assembla autant de petits enfans Chrestiens ou Carrechumenes qu'il peut, & leur fist vne longue exhortation, pour les encourager à mourir constamment pour la foy Chrestienne, apres laquelle s'ensuiuit la discipline, & vne deuote priere, tendant à ce qu'il pleust à Dieu donner courage aux Peres de resister virilement à tous les efforts des ennemis, à la sollicitation desquels le Roy les pressoit fort de consentir à l'inceste de l'Armenien: mais la chose passa plus doucement qu'on ne croyoit.

*Le Roy
les veut
faire cō-
sentir à
l'inceste
d'un Ar-
menien.*

Car bien que le Roy insistast fort, à ce que les Peres consentissent à vn tel mariage; toutesfois voyant qu'ils estoient resolu de perdre plustost la vie, que d'approuuer ce peché, il ne les en pressa pas dauantage: mais il fust vn peu fasché de quelque responce libre, que luy fist le Pere Xavier. Car le Roy luy disant quel mal y auoit-il de prendre deux sœurs à femmes, ou la fille de l'vne d'icelles, & d'embrasser sa Religion, d'autant que l'Armenien voyant ce qu'il desiroit ne luy estre permis en la loy Chrestienne, l'auoit quittée, se ioignant à celle du Roy: le P. Xavier luy respond que c'estoit laisser le chemin qui mene en paradis, & prendre celuy qui conduit en enfer. Tellement que l'Armenien, & tout autre, qui suiuiroit ceste loy seroyent damnez indubitablement, s'ils mouroyent en tel estat. Ceste responce dis-je, despleust

*Responce
libre du
P. Xa-
uier.*

au Roy, d'autant que par icelle la loy qu'il auoit forgée estoit condamnée, deuant tous ses courtisans. Si est-ce qu'il dissimula la fascherie, qu'il en auoit receüe, monstrant vn bon visage au Pere. Mais si cela despleust au Roy, il ne causa pas moins d'estonnement aux assistans, lesquels furent grandement esmerueillez de voir comme les Chrestiens estoient prests & appareillez

d'espandre le sang, pour la deffence de leur loy, veu que les Sarrafins ne voudroyent pas endurer la moindre incommodité que ce fust pour soustenir leur Alcoran. Cecy ayant esté rapporté au Prince, il fust fort fasché contrel'Armenien, pour auoir renié sa foy, & monstra qu'il auoit bonne enuie de le chastier, s'il n'eust redouté son pere. Mais au lieu de cet Armenien qui fist banque-
route à la foy de N.S. il y en eust ceste mesme année 1598. plu-
sieurs des mescreans, qui se conuertirent à icelle, dans la ville de *sont baptisez à Lahor.*
Lahor, & furent baptisez : combien que c'estoyent gens, qui auoyent perdu toute esperâce de viure d'auantage. Car l'on ne donnoit pas au commencement le baptisme à autres, de peur qu'ils ne vinsent à se fouruoyer de la foy, s'ils viuoyent plus long temps: car c'est vne nation fort variable & inconstante. Toutesfois il aduint que deux de ceux-cy, qui auoyent quasi la mort entre les dents, apres auoir esté baptisez, receurent avec la vie de l'ame la guerison du corps. Il y eust aussi quelques Sarrafins, qui apporterent leurs enfans à la ville de Lahor, pour les faire baptiser, lesquels apres auoir receu le baptisme, mouřurent bien tost, & s'en allerent peupler le Ciel. Vn Gentil-homme de ce pais là, ayant eu vn enfant la nuit de Noël, que sa femme auoit enfanté, à semblable heure que nostre Seigneur naquist, s'en vint le presenter à l'Eglise, deuant la creche qu'on auoit dressée sur l'Autel, & permit qu'il fust baptisé, voire mesme luy & sa femme se rendirent Catechumenes, commençans d'apprendre la doctrine Chrestienne, pour receuoir eux aussi le baptisme, quand ils seroyent bien instruits. Le sort d'une autre mere ne fust pas si heureux, iasoit que celuy de l'enfant le fust bien d'auantage. Ce fust qu'une certaine femme Mahometaine, s'estant accouchée d'un *Martyre d'un petit enfant innocent.*
enfant la veille de Pasques, s'en alla quelques trois sepmaines apres, prier instamment les Peres de luy donner le baptisme: mais comme ses voisines, & autres de sa parenté la picquoyent de parolles, & luy faisoient honte de ce qu'elle auoit vn enfant Chrestien, elle ne peut endurer tels reproches: de sorte que pour mettre fin à iceux, elle se delibere de mettre fin à la vie de l'enfant, & luy donne du poison avec le lait. Ce fust la veille de l'Ascension de nostre Seigneur de l'an 1598. qui estoit le 18.iour apres le baptisme, & le quarantiesme apres la naissance de l'enfant, lequel ayant enduré l'espace de dix sept heures qu'il suruesquist, des tres-griefues douleurs, & coullusions d'estomach,

qu'il declaroit assez par les cris, plaintes, & mouuements de tout son petit corps, il mourust en fin sur l'Autel de la Chappelle, ou il auoit receu le baptisme, confessant la foy de **I E S V S - C H R I S T**, non en parlant, ains en mourant pour icelle. Le P. Pignero escript qu'apres que ce petit innocent eust rendu l'ame, son visage resta si beau, & si resplandissant, qu'il sembloit que Dieu voulust monstrer en sa face, la gloire de laquelle son ame bien-heureuse iouïssoit en Paradis.

Le Roy s'en va à la guerre contre le Roy de Decā. Enuiron ce temps-là le grand Mogor estant retourné de Ca-

ximir à Lahor, & ayant enuoyé vn de ses enfans, pour continuer la guerre contre le Melique Roy de Decan, qui luy auoit tué son second fils le Soldan Morad, resoluist d'y aller luy mesme en personne, avec vne grosse puissance. Il part donc de la ville de Lahor, pour s'acheniner à celle de Agra, qui est la capitale d'un Royaume appellé de mesme nom, qu'il auoit conqueſté peu de temps au parauant. Ceste ville d'Agra est esloignée cent lieues ou enuiron de Lahor, vers le Midy ou il alloit. Car le Royaume de Decan est plus Meſidional. Or il marchoit avec vn tel arroy, que pour faire porter ses tentes & pauillons, huit cens elephās, & sept mille chameaux, n'estoyent pas quasi bastants. Ce qui ne doit pas estre trouué estrange, veu que son Secretaire menoit bien sept cens chameaux, & septante elephans pour foy tous chargez. Le P. Xavier voyant que le Roy s'en alloit vers ces quartiers là, s'offrist, si tel estoit son bon plaisir, à luy faire compagnie; & ce pour plusieurs considerations, mais principalement afin de l'entretenir tousiours en ceste bonne opinion, qu'il auoit de la Religion Chrestienne, & conseruer l'affection qu'il portoit à la Compagnie. Le Roy se pleust grandement à cette offre, que luy feist le P. Xavier de l'accompagner, & l'ayant embrassé fort humainement, luy dict qu'il en estoit tres-content: si commanda tout aussi tost qu'on luy baillast de l'argent, des cheuaux, des elephans, des chameaux, & tout ce qu'il voudroit. Le Pere luy dict, que ce seroit assez d'un chameau pour son compagnon & pour foy: mais on leur en fist prendre quatre par force. Ce voyage du grand Mogor, causa grande frayeur à tous les Roys d'alentour: & de faict ils auoyent occasion de se craindre d'un Roy si puissant, & qui menoit vne si grande armée, s'approchant mesmes si près de leurs terres. Toutesfois estant arriué à la ville d'Agra, ils y arresta plus d'un an. Cependant le P. Xavier ne perdoit pas son

son temps. Car il obtint cōgé du Roy, de faire venir de nouueau quelques Peres de la mesme Societé, pour demeurer à Lahor, afin de tenir compagnie au P. Pignero, qui s'estoit arresté là, pour maintenir les nouueaux Chrestiens en la foy, & pieté. Mais il sera bon de raconter vn pourparler, que le P. Xavier eut avec le Roy en la ville d'Agra le 16. du mois de Iuillet l'an 1599. Trouuant donc vn iour le Roy de commodité, il luy dit, qu'il auoit à traicter vn affaire avec sa Majesté, lequel il desiroit luy communiquer à parr, sans qu'aucun autre l'entendist, s'il luy plaisoit de luy prester l'oreille. Le Roy se retirant vn peu à l'escart du reste de la troupe des gens, qui l'environnoient, prend le Pere tout seul, & luy demande ce qu'il luy vouloit faire sçauoir.

Le Pere suyuant le commandement, qu'il auoit de son Provincial, luy tint lors ce propos. Sire (dit-il) nous auons reçu des lettres de nostre Superieur, de la teneur qui s'ensuit. Puis qu'il y a desia cinq ans, que vous estes aupres du Roy, pour apprendre la langue du païs, ie ne doubte pas qu'il ne vous puisse bien entendre. Partant vous le supplierez humblement, que puis qu'il vous a appellés, pour escouter la predication du S. Euangile, il aduise maintenant ce qu'il veut de vous autres : afin que par mesme moyen ie sçache, comment ie dois disposer de vous. Apres la lecture de ceste lettre, le Pere adiousta ce qui s'ensuit. Certainement, Sire, ce nous est vn grand tourment & ennuy, que de demeurer en vostre Cour, sans rien faire. Nous supplions donc bien fort vostre Majesté, de nous vouloir prester l'oreille, comme elle nous promet dès que nous arriuasmes en sa Cour, afin de luy pouuoir declarer ce qui est de son salut : car cela est necessaire pour entendre la verité, que V. M. dit & proteste vouloir cognoistre. Le Roy apres auoir ouy ceste plainte du Pere, luy respond en ces termes. Ie confesse voirement (fit il) que ie vous ay appellés, pour entendre & cognoistre la verité, afin de suyure & embrasser ce que ie trouueray plus conforme à la raison : mais à present ie m'en vay au Decan, & m'arrestteray bien près de Goa, ou ie m'expedieray de tous autres affaires, & prédray du loisir pour vous escouter ; puis poursuyuant son discours, il adiouste ces parolles : A ces fins vous ay ie appellés, & desire vous parler en particulier, & vous escouter. Helquoy ? vous semble il, que vous ayés peu profité en mon endroit ; veu que du temps que les Sarrazins auoient tant de credit en mes terres, il n'y auoit personne, qui

Pour-
parler
du Pere
Xavier
avec le
Roy.

38. Inſi-
dell
bapti-
zés à
Lahor.

oſast dire que IESVS-CHRIST estoit vray Dieu, que soudain on ne le mit à mort : & maintenant vous le pouuez dire, & prescher avec toute assurance ? Le Père aduoüa qu'il estoit ainſi, & en remercia ſa Maieſté, la ſuppliâ derechef qu'il luy pleuſt vouloir entendre à loisir l'explication de la doctrine Chreſtienne, tant pour ſon propre ſalut (lequel principalement ils pourchafſoient) que pour celuy de pluſieurs autres, & encore pour donner quelque ſoulas à leurs travaux. A quoy il reſpondit, qu'il le fairoit, & de ceſte ſorte ils mirent fin à leur propos. Mais retournons vn peu encore à la ville de Lahor, là ou depuis le depart du Pere Xauier, qui auoit ſuyui le Roy vers Agra, le P. Pignero baptiza trente huit Catechumenes, dont il en y auoit trois, qui estoient citoyens de la meſme ville, & auparauant Payens de ſecte, qui ſe monſtrerent fort courageux à ſurmonter toutes les diſcultés & obſtacles, que leurs parens & amys leur mettoient, pour les empeſcher qu'ils ne ſe rendiſſent Chreſtiens. Car ils faiſoient à ceſte occaſion des ſecretes aſſemblées, & conſpirations, craignans que ſi les autres faiſoient profeſſion publiquement du Chriſtianisme, cela n'apportast quelque infamie & deshonneur à leur loy. Mais ces bons Proſelytes firent ſi fermes & ſi conſtâs en leur reſolution, qu'ils emporterent la victoire contre Satan, & tous ſes ſuppoſts : tellement que le iour de la Pentecoſte de l'an 1599. ils furent lauez des eaux du S. baptême, en compagnie des autres. Ce qui fut fait publiquement, & avec grande magnificence. Car la rue par ou paſſa ce ſacré bataillon, estoit toute rapiſſée de verdure, tant de rameaux couppés, que d'arbres meſmes entiers, qu'on auoit plantés tout exprés, d'vn coſté & d'autre de la rue, pour faire ombrage. Ils ſortirent de la maiſon, ou estoient logés les Peres, tous en ordre comme en proceſſion, chacun portant en main vne branche de palme : & ceux qui estoient de ſia Chreſtiens, marchoiēt coſté à coſté d'vne part & d'autre de la rue. Deuant eux il y auoit diuers instruments de muſique, comme tambours, trompettes, clairons, fleutes, & autres, qu'on ſonnoit cependant qu'ils faiſoient vn tour par la rue, qui estoit auſſi toute parſemée de fleurs & de ramée, juſques à ce qu'ils vindrent à l'Egliſe. Là le P. Pignero les attendoit, reueſtu d'vn ſurplis, & d'vne chappe ou pluuiail. Il les reçut à l'entrée de l'Egliſe, ou ſ'aſſembla vne ſi grande multitude de Payens & de Sarrazins, que le Pere ne ſçauoit de quel coſté ſe tourner, ny comment fai-

Proceſ-
ſion des
Catechu-
menes.

re l'office, à cause du grand bruiet & tumulte qu'il y auoit. Car comme il estoit vne chose nouuelle, & non iamais plus veüe en ceste ville là, il y accourut si grande foule de monde, qu'on n'en pouuoit venir à bout. Mais en fin ayant paracheué les sacrées ceremonies, qui ont accoustumé de se faire deuant la porte de l'Eglise, il les introduisit dedans, & apres les baptiza avec tres-grande consolation, tant de son costé, que de ceux qui reçurent ce diuin Sacrement. Il y eust en cecy beaucoup de choses remarquables; mais pour faire brief, nous en dirons tant seulemēt vne, qui est du baptisme d'une ieune fille, laquelle n'auoit pas encore passé seize ans. Elle estoit venue là pour regarder les ceremonies, qu'on faisoit au baptisme, & voyant qu'on arrousoit d'eau la teste de ceux, qu'on baptizoit, elle se mesle parmy la troupe, & demande qu'on la baptizast aussi. Mais comme elle n'estoit pas enroollée au nombre des Catechumenes; le Pere pensant qu'elle ne fut pas suffisamment instruite, luy dict, qu'il luy falloit attendre encore, iusqu'à ce qu'elle eut appris ce, qu'il luy falloit sçauoir au prealable; & que sçachant la doctrine Chrestienne, elle obtiendrait lors, ce qu'elle demandoit. Et que me reste-il (dict elle) pour apprendre: car i'ay entendu l'explication du Catechisme, & sçay tout ce qu'un Chrestien doit sçauoir. Je veux donc estre baptizée avec ceux-cy, & ne partiray de l'Eglise, que ie n'aye obtenu ma demande. Le Pere voyant sa resolution, l'interroge ou elle auoit appris les choses de la foy. Elle respond que lors qu'on les enseignoit aux autres. De faict le Pere en ayant fait l'esprouue sur le champ, trouua qu'elle sçauoit bien son Catechisme; tellement que vaincu de ses prieres & importunité, il la baptiza avec le reste, & luy donna le nom de Grace. Or estant ladiete fille retournée en sa maison, ses pere & mere, se mettent à bon escient en cholere contre elle, luy disans mil iniures, de ce qu'elle s'estoit renduë Chrestienne, & en vindrent iusqu'à là, qu'ils la chasserent de leur maison, sans luy vouloir donner rien pour se nourrir; luy deffendant encor, d'entrer iamais plus dans l'Eglise, & la menaçans de la battre à bon escient, si elle rapportoit rien de cecy aux Peres. Là dessus vn Sarrazin, incité du malin esprit, pour la tenter d'auantage, luy dict, qu'il la vouloit espouser: pensant qu'elle y consentiroit volontiers, se trouuant ainsi reburée des siens. Mais la ieune fille luy dit resoluement, qu'elle estoit Chrestienne, & ne pouuoit, selon les loix diuines, se marier

Baptisme remarquable d'une ieune fille.

Endure pour la foy des grandes persecutions.

*Elle ap-
pellée
deuant
le Gou-
uerneur
pour es-
tre exa-
minée.*

avec luy. Cecy estant venu aux oreilles du Pere Pignero, il la fit incontinent appeller; afin de l'encourager à tenir bon, & l'asseurer, si elle chancelloit. Mais elle, avec vn grand courage, proteste deuant le Pere de vouloir plustost mourir, que quitter la foy, qu'elle auoit receuë au baptisme. Le Pere adonc assuré de sa resolution, l'enuoye à la maison d'un Chrestien, qui estoit marié. Cependant le Sarrazin, qui desiroit l'auoir à femme, ne faisoit que crier & tēpēster, avec grande rage & fureur; tellement qu'il eust bien estonné ceux, qui n'eussent pas cogneu la façon de faire des Industans. Les parens ayant veu, que toutes les menaces, qu'ils luy auoient fait, mettans en auant tantost l'autorité du Roy, tantost l'indignation de leur faux Prophete Mahomet, n'auoient rien profité, pour faire changer de resolution à ceste fille, ils se vont adresser au Gouverneur de la ville, & luy font leur plainte, accusans le Pere de ce qu'il auoit baptizée ceste fille, cōtre le sçeu & la volonté de ses parens. Le Gouverneur entendant leurs querimonies, enuoye vn homme expres au Pere, pour s'informer de la vérité du faict, & quant & quant ordonna, que la fille comparoistroit deuant luy, pour estre examinée. Le Sarrazin, qui vouloit l'espouser, ayant ouy la sentēce du Gouverneur, s'en va tout aussi tost, accompagné de force gens, à la maison, ou estoit la fille, pensant desia tenir la proye entre les dents; mais il en trouua de plus fins, que luy. Car le Pere sçachant cela, pour euitier les embusches, qu'on tendoit en chemin à la fille, l'enuoye avec bonne & seure garde, par vn autre chemin au Gouverneur: dont le Sarrazin fut extrêmement fāché. Cependant le P. Pignero, qui estoit demeuré à la maison, estāt aduertty qu'on obiectoit beaucoup de choses contre la fille; & qu'il estoit à craindre, que les Iuges ne fussent gaignés par les aduersaires, qui mettoient en auant, que ce faict là estoit contre leur Alcoran, & contre les ordonnances du Roy, il s'y en va, sans attendre d'auantage; & Dieu voulut qu'il y arriuaſt lors, que le Gouverneur examinait la fillē, luy faisant plusieurs demandes & interrogats. Mais elle luy respondit avec vn courage merueilleux: & entre autres responses: Je suis Chrestienne (dit elle) & ne recognois point cest homme, pour mon mary. Puis s'approchant du Pere, & le prenant par le manteau: C'est cestuy-cy (dit elle) que ie recognois pour mon Pere. Estant derechef interrogée, pourquoy elle auoit quitté la loy de Mahomet: elle respond, que c'estoit pour auoir

cogneu, qu'elle estoit fausse & plaine de mēteries; estant d'autre part asseurée que IESVS-CHRIST estoit vray Dieu & le Sauueur du monde. On voyoit les Sarraïns qui estoient là, tantost grincer des dents, tantost rougir de honte, ou passer de cholere, & changer à tout propos de contenance, à cause des responces de ceste ieune fille, estonnez de sa coustance & magnanimité. On eust dict à l'entendre parler, & rendre raison de sa foy, qu'elle l'auoit humée avec le laiët de la nourrice, bien qu'il n'y eust pas plus de quarante iours, qu'elle auoit commencé d'apprendre le Catechisme. Brief elle remporta la victoire contre Satan, & ses supposts avec grande gloire de Dieu, & confusion de ses ennemis. Car le Gouverneur ayant veu sa resolution, luy permit de suiure la loy qu'elle auoit embrassée, & aussi tost le Pere la ramena à l'Eglise, là ou elle fust espousée avec vn Chrestien fort honneste, combien que le Sarraïsin taschast d'empescher ce mariage par ses crieries: mais cela ne luy seruiſt de rien. Tel fust le succez de cet affaire: & en tel estat se retrouuoient les choses de la foy, és terres du grand Mogor sur la fin de l'an 1599. Depuis l'on a tousiours continué ceste Mission, & plusieurs se sont rengez à l'Eglise, dans la ville de Lahor, ou ceux de la Compagnie font leur residēce ordinaire. Mais on n'a peu venir à bout de ce qu'on pretendoit principalement, à sçauoir de la conuersion du Roy Echebar, lequel mourut l'an 1605. sur la fin du mois d'Octobre, en mesme estat que nous auons veu cy deuant; sans prendre resolution certaine d'embrasser la foy Chrestienne, au moins qu'on sçache. Les Peres auoyent bien deliberé de luy en parler à bon escient, lors qu'ils entendirent sa maladie derniere; & de faict y estoient allez tout expres: mais croyans qu'il n'estoit pas si mal qu'on peut craindre sa mort, si tost qu'elle aduint, ils differerent de luy tenir propos de cela iusqu'à vne autre saison: toutesfois ils n'eurent le moyen de le voir iamais plus. Car de là à vn ou deux iours, le poison, dont on croit qu'il mourut, se saisist du cœur si soudain, qu'il n'y eust remede de traicter avec luy vn affaire de si grand' importance. Ainsidelaisse Dieu bien souuent à l'heure de la mort, ceux qui l'ont delaisſé durant leur vie; ne voulans suiure les bonnes inspirations, qu'il leur a donné. Mais à tant de cecy, disons quelque chose de la descouuerte du Catay.

*Remporta
la vic-
toire.*

Comme le Pere Hierosme Xavier estant à la Cour du grand Mogor, eust cognoissance du Royaume de Catay, & ce qu'il en apprint.

CHAPITRE XVI



*Xetay
ou Catay
Royaume.*

*Xambalu ou Cambalu
ville capitale du
Catay & sa grande.*

*Marc Paulin.
1. de ses
voyages
c. 7.
Orsellius
en la
Tartarie*

VANT que le Roy partist de la cité de Lahor, pour s'acheminer à celle d'Agra, le P. Hierosme Xavier estant vn iour avec le Prince son fils aîné, voicy entrer dans le Palais vn riche Marchand, aagé d'environ soixante ans, & Mahometain de secte, lequel apres auoir fait la reuerence au Prince, interrogé d'iceluy, d'où il venoit, il respond, qu'il ne faisoit que venir du Royaume de Xetay, qui est le mesme, selon l'aduis du P. Xavier, que celuy qu'on nomme Catay, duquel font mention Marc Paul Venetien en ses voyages, & Ayton l'Armenien en son histoire: & apres eux quelques vns de nos modernes, le mettans en la Tartarie, ou tout apres d'icelle. Le Prince donc continuant son propos avec ledit Marchand, luy demande quel Royaume c'estoit, & combien de temps il y auoit demeuré. Le Marchand respondist y auoir esté l'espace de treize ans, & ce en la ville capitale du Royaume, qu'il appelloit Xambalu, qui est la mesme que celle que les auteurs (dont a esté parlé) nomment Cambalu, à laquelle les vns donnent 24. milles de circuit, & les autres 32. C'est aussi diët le Marchand, la ville ou le Roy fait sa residence ordinaire, lequel, à son rapport, est vn puissant Monarque. Car il a en son Royaume iusques à quinze cents villes, & aucunes d'icelles fort peuplées. Ledit Marchand asseuroit auoir veu souuentesfois le Roy, auquel on ne parle point (ce disoit-il) sinon par escrit, luy baillant vn memorial, de ce qu'on luy veut faire entendre, ou demander: & qu'il ne respondoit point aussi, que par l'entremise de quelqu'un de ses Eunuques, qui sont ses Courtisans. On demanda de plus à ce Marchand, comm'il auoit eu entrée en ce Royaume. A quoy il respondit y estre entré sous tiltre d'Ambassadeur du Roy de Caygaren: & nonobstant cela qu'il auoit esté retenu en la premiere ville frontiere qu'il rencontra par le Gouverneur d'icelle, iusqu'à tant qu'on eust donné aduis au Roy de sa venue. Ce qu'on feit apres auoir recogneu les seaux des lettres, qu'il

apportoit : car aussi tost on enuoya vn courrier au Roy, qui fut de retour dans vn mois, & apporta son congé pour aller à la Cour; comme il est aisé à faire (adiouste-il) encore qu'elle fut biē loing de là, parce que l'on change de cheuaux à chasque poste, comme en Europe: si que tous les iours on faict nonante ou cent coffes, qui respondent aux milles d'Italie, & seront vingt-cinq ou trente lieues de nos ordinaires. Si dit qu'en tout le chemin il ne luy auoit esté faict aucun tort, à cause que les Magistrats ont grand soing d'administrer iustice, & ne pardonnent aucunement aux voleurs ou larrons. Estant au surplus interrogé, qu'elle forme & entre-gent auoient les habitans du pais, il respondit n'auoir iamais veu de plus belles personnes, les preferant aux Rumes, c'est à dire aux Europeans (car ainsi les appellent-ils en Orient les Turcs Europeans de Constantinople & de la Grece, à cause des Romains, qui ont eu iadis l'Empire de l'Vniuers, & principalement de l'Europe.) Les hommes (disoit-il) portent communement vne longue barbe, & presque tous, tant hommes que femmes sont blancs de couleur. Quant à leur Religion, il dict qu'ils estoient pour la plus-part Isauites ou Iesauites, c'est à dire Chrestiens. Ainsi les appelle-on en ce pais là Iesauites du nom de IESVS, comme qui diroit Iesuites, tout ainsi qu'au commencement de l'Eglise, on les nomma Chrestiens du nom de CHRIST. Là dessus on luy demande si tous estoient Iesauites. Nenny (dict-il) ains il en y a plusieurs, qui sont Mussauites, c'est à dire Iuifs: car ils nomment ainsi ceux de ceste nation, parce que Mussau en leur langue signifie Moyse. Il en y a aussi (adiouste-il) beaucoup d'autres qui sont Mahometains. Et le Roy feist lors le Prince, est-il Mahometain? Non pas encore, respond le Marchand, mais on espere qu'il le sera bien tost. Le propos fust icy interrompu: mais le Prince, pour faire plaisir au P. Xauier, qui auoit esté bien aisé d'entendre ces choses, dict au mesme Marchand qu'il retournaist de là à quelque temps, luy assignant certain iour, parce qu'il desiroit sçauoir de luy quelques autres choses de ce Royaume. Toutesfois le Pere alla trouuer ce Marchand en son logis, auant le iour assigné, pour s'informer de luy plus particulièrement de quelle Religion ces gens-là faisoient profession. Le Marchand luy dict derechef qu'ils estoient Iesauites: pour la plus-part, & qu'il auoit familièrement traité avec quelques vns d'iceux, adioustant sur ce propos, qu'ils auoyent plu-

Les habitans sont Chrestiens pour la pluspart

*Ont des
Eglises,
& des
Images.*

ficiers Eglises, & quelques vnes, qui estoient fort grandes, esquel-
les on voit des Images, tant en bossé, qu'en plate peinture, & en-
tre autres, l'Image du Crucifix : ausquelles, selon qu'il disoit, ils
portent grãd honneur & respect. Et qu'en chasque Eglise y auoit
vn Prestre fort reueré de tous les paroissiens : lesquels, en signe de
reconnoissance, auoient accoustumé de luy faire beaucoup de
presens. Le P. Xavier demande pour lors, s'ils n'auoient point
d'Euesques; l'autre n'entendit pas bien, ce qu'on luy demandoit :
mais apres que le Pere se fut expliqué, il luy dit qu'il y auoit
voirement vn entre les Prestres, qui estoit Superieur des autres :

*Les Pre-
stres gar-
dés con-
tinence
perpe-
tuelle.*

adioustant que les Prestres gardoient continence & chasteté per-
petuelle; & qu'ils tenoient des escholes, esquelles ils enseignoient
les enfans, qui debuoient estre promeus au mesme degré de Pre-
strise. Or tous ceux cy (dit-il) sont entretenus & nourris aux des-
pens du Roy, lequel fait aussi bastir des Eglises, & reparer celles,
qui s'en vont par terre, à ses propres cousts & despens. Les Peres
(adiouste-il) c'est à dire les Prestres, sont vestus de robes noires,
& portent vn bonnet à la teste, fort semblable au vostre, cōbien

*Leur ac-
coustreu-
ment.*

qu'un peu plus grãd. Quand ils saluent quelqu'un, ils n'ostent point
le bonnet de la teste, mais ils ioignent les mains deuât la poictrine,
& entrelasent les doigts de l'une avec ceux de l'autre : puis les
portent sur la teste ainsi ioinctes. Ils se seruēt encore de mâteaux :
mais es iours de festes, ils vōt vestus de rouge. Quant aux autres
Chrestiens, qui ne sont pas Prestres, ils vōt aussi couuerts de noir,
pour la plus part : hors-mis les iours de festes, esquels ils se plai-
sent d'aller aussi accoustrés de rouge. Il dit encore, qu'il auoit veu
le Roy souuent aller à l'Eglise, parce qu'il estoit Chrestien. Et

*Ils ont
des Re-
ligieux
& Re-
ligieu-
ses.*

qu'il y auoit plusieurs Chrestiens, tant de l'un que de l'autre se-
xe, lesquels viuoient en des maisons retirées & séparées de la fre-
quence du peuple, sans iamais se marier, menans vne vie solitaire
& fort austere. Il en y auoit aussi d'autres, qui gardoient perpe-
tuelle chasteté & continence dans leurs maisons, sans iamais se
marier : que les gens du pais estoient pour l'ordinaire riches &
opulens, & qu'on trouuoit en ce Royaume force mines d'argent,
dont le Roy auoit tiré de grands thresors, lesquels il gardoit es
principales villes de son Royaume. Il tenoit tousiours prests qua-
tre cens Elephans duiets au combat, lesquels on luy amenoit de
Malaca. Il disoit encore, que plusieurs marchans du Pegu ve-
noient là traffiquer, & que ce voyage estoit communément de

six mois. Tout ce que dessus a esté tiré d'une lettre, que le mesme P. Xavier enuoya de la cité de Lahor au P. Prouincial de l'Inde, dattée du 26. Iuillet 1598. Mais depuis estant arriué à celle d'Agra, ou il auoit suyui le Roy, il s'informa derechef de quelques autres, qui auoient esté (comm'ils disoient) au mesme pais : & trouua le dire du marchand conforme à leur rapport: selon qu'il l'escruiuit au mesme P. Prouincial de la ville d'Agra, le premier d'Aoust de l'année suyuant 1599. Quant au chemin (adiouste-
Le che-
min pour
aller au
Catay.
 il) pour y aller, quelques vns disent, qu'il faut passer par Bengala, à sçauoir par le Royaume de Garagate, ou se termine l'Empire du grand Mogor : mais le plus aisé & battu des marchands est passant par Lahor, & de là à Caximir, puis au Royaume de Rebat (duquel le Roy est fort amy du grand Mogor) & par apres allant tout droit à Caygaren, d'ou il y a peu de chemin iusques à la premiere ville du Catay, qui est habitée des Chrestiens, au dire du marchand.

Ez mesmes lettres, le P. Xavier raconte le propos, qu'il tint là dessus avec le Roy, qui fut tel. Sire (dit-il) nostre Superieur a esté aduerty, comme au Royaume du Catay il y a plusieurs, qui font profession du Christianisme, desquels on n'a eu aucunes nouvelles certaines & assurées en Europe, il y a plus de trois cens ans: partie à cause, qu'ils sont si escartez du reste des Chrestiens, partie aussi à raison des guerres, qu'il y a eu és pais, par ou il faut passer, pour y aller. Il desiroit enuoyer trois ou quatre Peres, pour voir l'estat, auquel sont ces Chrestiens, & tascher de les ayder à faire leur salut. Car cest le propre de nostre vacation de voyager par tout le monde, sans faire estat d'aucun danger: & ce pour enseigner aux hommes le chemin de la vie eternelle. Le Roy luy dit lors en sa langue *Rahat met xoda*, c'est à dire, la benedictio
Le grā
Mogor
promet
son assi-
stance
à ceux
qu'on y
enuoye-
ra.
 de Dieu soit sur vous. Et apres adiousta quelques parolles hautloüant l'institut de la Compagnie. Le P. Xavier continuant son discours luy dit, que le P. Prouincial ayant sçeu, qu'il n'y auoit point de plus commode chemin, pour aller au Catay, que passant par ses terres, il desiroit sçauoir si sa Majesté auroit pour agreable, qu'il enuoyast à Lahor, quelques autres Peres, pour s'en aller là, sous l'aïlle de sa faueur. Le Roy respondit qu'ils vinssent à la bonne heure, & qu'il enuoyeroit quant & eux vn Ambassadeur, avec lequel ils y pourroient aller en toute assurance. C'est vne tres-belle commodité (adiouste le mesme Pere Xavier) car

tout ce qu'il y a depuis Cambaya iusques à Lahor, est possédé par le grand Mogor, & de là on entre au Royaume de Badaxa, le Roy duquel est vassal du grand Mogor, & auoit trois enfans à la ville de Lahor, du temps que les premiers Peres, qui furent là, enseignoient la langue Portugaise aux enfans des principaux Seigneurs, & Capitaines de la Cour, du nombre desquels estoient ces trois: tellement qu'ils auoient esté leurs disciples; & celuy qui regne maintenant à Baxada, est frere germain d'iceux: si bien que par son moyen, & avec les lettres dudit Prince, l'on peult aisément & avec assurance, arriuer au Catay, selon qu'a esté dit. Voyla ce qu'en escriubit de la Cour du grand Mogor l'an 1599. le P. Hierosme Xauier: mais depuis son compagnon, Benoist de Goïs, a esté enuoyé pour descouuitir ce pais là: toutesfois n'y estât pas encore arriué, qu'on sçache, l'on n'en peut rien dire d'asseuré. Au reste il en y a qui estimēt que le Catay n'est autre que le Royaume de la Chine: mais nous traicterons, Dieu aydât, plus amplement de cecy, en l'histoire de la Chine, que nous allons maintenant, entamer.

Du Royaume de la Chine, de sa situation, estendue & bornes: ensemble du nom, de la fertilité & richesses d'iceluy.

CHAPITRE XVII.



Es choses, que nous debuons raconter de la Chine, sont si grandes & si extraordinaires, qu'elles pourrout sembler à quelques vns plustost admirables, que croyables. Mais il y a tant de graues auteurs qui les assurent, que nul homme d'entendement n'a occasion, à mon aduis, suffisante de les mescroire; veu mesmes qu'il en y a, qui sont tesmoins de veuë, & gens Religieux. Le premier, que ie sçache, qui a de nostre temps escrit de ce subiect, est vn Pere de l'Ordre de S. Augustin, lequel a tiré ce qu'il en dit des memoires, que luy auoient laissé quelques Religieux de son Ordre, qui auoient esté audit pais, cōme nous raconterons cy apres. Et son liure a esté si bien venu, qu'il a esté traduit d'Espagnol en plusieurs autres langues, sous le tiltre d'histoire de la Chine. Il y a aussi vn traité des merueilles dudit Royaume, qu'on tient auoir esté escrit & enuoyé en Europe par le P. Alexandre Valignan Neapolitain, lequel pour sa rare vertu, prudence, & expe-

*Les auteurs
qui ont
escrit du
Royaume
de la
Chine.*

rience au fait du gouuernement, a esté plus de 25. ans Prouincial ou Visiteur de la Compagnie de IESVS en l'Inde, & cōme pour le deu de sa charge, il faisoit voile souuent des Indes au Japon, ou au contraire, passant d'ordinaire par la Chine, il s'informoit soigneusement de ce, qui appartenoit à ce païs là, & l'ayant couché par escrit, l'enuoya par deça. Finalement plusieurs autres Peres de la mesme Compagnie, qui sont entrez en ce Royaume là depuis l'an 1582. & ont voyagé au dedans d'iceluy fort auant, en plusieurs lettres, qu'ils ont escrites dès ce temps là, touchent beaucoup de choses des mœurs, coustumes, loix, police, & grandeur de cest Estat. Mais principalement le P. Jacques Pantoja, en vne qu'il escriuit de la ville de Paquin, ou est la Cour Royale, du mois de Mars l'an 1602. qui en traite de propos deliberé, & comme tesmoing de veuë. Car il a fait plus de six cens lieues de chemin au dedans du païs, & est entré dans le Palais du Roy fort souuent, priuilege qui n'est guere oëstroyé, mesmes aux estrangers. De ceux-cy, & des plus graues historiens de nostre temps, auons nous puyté tout ce, que nous dirons cy apres. Or afin de garder quelque ordre, nous reduirons le tout à quatre chefs: le premier sera de la situation, esté duë, fertilité, & richesses du païs: le 2. des Prouinces, citez, & villes, qu'il y a: du grād nombre d'habitans, de leur industrie, mœurs, & coustumes: le 3. de la puissance & richesses du Roy: de la police & forme de gouuernement, qu'il fait garder: & des vtilitez, ou inconuēniens qui s'en ensuyuent. Le dernier sera de la Religion des Chinois, ou nous verrons si la foy Chrestienne leur a esté autrefois preschée. Venons donc au premier.

Le Royaume de la Chine (comme on l'appelle maintenant) est le plus Oriental de tous ceux de l'Asie, & par consequent de l'Afrique, & de l'Europe. Il confine du Leuant à la vraye mer ^{Bornes de la Chine} Orientale. Car celle des Indes, que les anciens appelloient ainsi, ne l'est pas à parler proprement; veu que celle qui arrouse la Chine, est beaucoup plus Orientale, que l'Indique; laquelle au respect de ceste-cy, est plustost Occidentale. Vers le Sud il commence au cap, que les Portugais nomment de haute terre, qui est ^{Cap de haute terre.} à 18. degrés de latitude Septentrionale, viz à viz de l'Isle d'Aynan: près de laquelle se fait vne fort belle pesche de perles, & appartient au Roy de la Chine. Dès ce promontoire la coste de la mer se va estendant au Nort-est quarte d'Est, iusqu'à ce qu'on

*Cap de
Liampo.*

arriue à vn autre cap des plus renommez qui soyent, pour estre (à ce qu'on dict) le plus Oriental du monde. Communement on l'appelle le Cap de Liampo, bien qu'on deuroit dire de Nimpo: parce que c'est ainsi qu'on nomme la ville plus proche d'iceluy, d'où il est croyable qu'il a tiré son nom. De là le riuage de la mer, se destournant vers le Nort Noroest, va faire avec vne peninsule, qui est vis à vis de la Chine, vn golfe semblable à celuy de Venise, autrement appellé la mer Adriatique: car comme cestuy-cy separe l'Italie de l'Istrie, Esclauonie, & Albanie; aussi l'autre d'une façon non gueres differente, diuise la Chine d'un autre païs qu'on appelle Corai, là ou les Japonois faisoient la guerre, il y a quelques années, prétédans passer delà à la Chine, pour la conquérir. Ceste peninsule est vis à vis de la prouince de Nanquin, d'où le bras de mer, qui est entre l'un & l'autre riuage, s'appelle le golfe de Nanquin. Mais poursuiuant la coste de la mer, si l'on monte tousiours vers le Nort, l'on vient en fin à rencontrer les terres habitées des Tartares (que les Chinois appellent Taquis) lesquels ils ont pour limitrophes du costé du Nort, & du Ponant aussi en partie. Tous les Cosmographes modernes donnent d'estenduë à la Chine du Sud au Nort, depuis le 18. ou 19. degré de latitude Septentrionale, iusqu'au 52. ou 53. & mettent la cité Royale de Paquin au 50: mais le P. Iacques Pantoja estant en ladite ville, escrit auoir pris l'eleuation d'icelle, avec vn bon Astro-labe, & auoir trouué par deux fois qu'elle n'auoit que quarante degrés de hauteur, adioustant que de là iusques aux frontieres du Royaume, il n'y a pas trois iournées de chemin, qui seroyét deux degrez ou trois pour le plus; de façon qu'à ce compte, les confins de la Chine vers le Nort, seroyent à quarante deux ou quarante trois degrez, qui sont dix degrez moins que ce qu'on luy donne communement.

*Corai
Royaume.*

*Golfe de
Nanquin.*

*Geos
peuples
& leur
barbarie*

Or du costé que les Chinois confrontent avec les Tartares, ils ont basti ceste muraille si fameuse (de laquelle nous parlerons plus amplement cy apres) pour leur seruir de separation, & de rempar tout ensemble. Elle borne le Royaume de la Chine, du costé du Nort entierement: & du costé d'Occident en partie: mais de l'autre les Chinois sont limistrophes de certains peuples, qui sont au delà du Ganges nommez Geos, de mœurs & conditions fort barbares: car ils mangent la chair, & boient le sang humain. Ils se marquent tout le corps avec des fers chauds:

afin de paroistre plus beaux & plus gentils; faifans tout plein de figures d'oyseaux, & autres animaux sur leur chair; d'où il semble à quelques vns que ce sont les peuples, que Marc Paul Vénétien dict habiter en la Prouince de Cangigu: parce qu'ils ont les mesmes coustumes. Ces Geos habitent en des montagnes fort hautes & tres-afpres, d'où ils descendent pour piller & rauager tout le plat païs de leurs voisins: & combattent à cheual quelquesfois contre les Chinois: mais le plus souuent cõtre les Laos, ^{Laos peuples.} qui sont autres peuples plus meridionaux, avec lesquels aussi les Chinois confrontent vn peu plus bas vers le Sud, & sont separez d'iceux par des montagnes fort hautes, & de difficile accez. La campagne qui est par deçà lefdites montaignes est fort plantureuse, & porte grande abondance de fruiçts, tant par le soing & diligence des habitans, qui la cultiuent tres-bien, que de sa nature mesme: car ell'est arrousee d'vn des plus grands fleuves de l'Asie, appellé des Camboyans Sistor, & des Sianois Meçon, ^{Sistor ou Meçon fleuve tres-grand.} qui signifie en leur langue, Capitaine des eaux, duquel & des Laos aussi nous auons parlé au 2. liure. Finalement du costé du Sud la Chine est limitrophe de la Cochinchine qui aboutist à la mer, vis à vis quasi de l'Isle d'Aynan, d'où nous auons commencé nostre description.

Ce sont donc les bornes de la Chine, laquelle selon que les habitans mesmes la depeignent, est de figure presque quarrée: car elle cõtient de longueur (qui se prẽd du Sud au Nord) six cẽs lieuẽs rãgeãt la coste de la mer: mais si l'on prẽd par droiçte ligne, elle n'en a pas plus de quatre cens cinquante. Et quelques quatre cens de largeur, laquelle on prend du Leuant au Couchant. Ce qu'on a colligé de ce que les Chinois comprennent, depuis les montagnes, qui seruent de limites du costé d'Occident iusqu'à la mer Orientale, 64. *ichans*, c'est à dire iournées: dont chascune ne comprend que six lieuẽs & vn quart, de celles dont nous vfons, qui contiennent 4. milles d'Italie chascune: car tout ainsi que nous mesurons les chemins par milles, lieuẽs, & iournées: de mesmes eux par *lijs*, *pũs*, & *ichans*. Vn *lij* contient autant d'espace ^{Lij, Pũs, ichan, mesures des chemins en la Chine} que la voĩx d'vn homme poussée de toute sa force pourra estre ouye en vne plaine, & en vn temps coy: dix de ces *lijs* font vn *pũ*, qui comprend deux milles & demie d'Italie, baillant à chascun *lij* deux stades, ou deux cens cinquante pas: dix de ces *pũs* font vn *ichan*, qui est vne iournée des Chinois: & à ce compte chascun

theur Grec en son liure des villes, se nommoit iadis *Sina*, scôbien que Ptolomée l'appelle *Thina*, & Strabon encore: si est-ce qu'il me semble plus probable, que la ville capitale s'appellast *Sinæ*, & que de là selon la coustume du païs du Leuant, on a nômé tout le Royaume *Sinæ*, d'où s'ensuit qu'il faut corriger les lieux prealleguez de Ptolomée & de Strabon, par celuy d'Estienne. Mais d'autre costé, ce n'est pas sans raisôn, que maintenât plusieurs appell'ët ce Royaume *Chine*, & les habitans Chinois. Car biç qu'il en y a qui disent, que les Portugais ont corrompu ce mot, comme plusieurs autres, i'estime neantmoins qu'on ne les doit pas accuser de cela: car il est assëuré, qu'ils ont suiuy en cecy la façon de parler des peuples Orientaux, qui auoyët cognoissance de la *Chine*, long tēps auant qu'ils n'y trafiquassent. Or par tout l'Orient on appelloit (mesmes auant la venuë des Portugais) Chijs les Chinois, tellemēt qu'il y a plusieurs Isles en l'Archipelague Oriëtäl, qu'o nomme *Batechina*, qui veut dire terre des Chinois. D'autre part les habitans de l'Isle de Ceilan, ont esté appelez *Chingalas*, à raison de la messäge des Chinois avec les naturels du païs, qu'o nômoit *Gallas*, côme nous auons dict au 2. liure. Aussi les Perses appellët la canelle *Darchini*, qui signifie en leur langue bois de la *Chine*, & les Grecs *κιννάμωμον*, ioignäs le mot de *anomũ*, qui est vne espeece de bois aromatique, avec celuy de *cina*, pource (peust estre) qu'ils estimoyent que la canelle vint de la *Chine*. Mesme s'il est vray ce que raconte *Garcia ab Horto* en son liure des simples aromatiques, ou il dict, que iadis plusieurs nauires des Chinois aborderent au port d'Ormuz, pour vendre entr' autres denrées de la canelle qu'ils auoyent prinse de l'Isle de Ceilan, disäns que c'estoit d'un bois de la *Chine*, d'où vint que les Perses qui la leur acheproyët, l'appelloyët *Darchini*: & l'apportans par apres en Alexandrie pour la vendre plus cher, les Grecs qui s'en pour-
*Garcia
ab Hor-
to. l. 1. c.*
 uoyët, l'appellerent *cinnamomũ*, côme qui diroit bois odorif-
 rät de la *Chine*. Voila ce que dict cet auteur. Mais quoy qu'il en
 soit de cecy, au moins il est assëuré, que maintenant tous les peuples Orientaux les appellent Chijs ou Chinois, horsnis eux mesmes, qui se nomment *Toangins* ou *Tangins*, & leur pays *Toame* ou *Tame*, laissäns de prononcer la lettre o. Au reste il en y a qui disent, que le nom de Chinois leur a esté baillé, pour vne façon de faire qu'ils ont, quand ils se saluënt.

Car lors qu'ils se rencontrent les vns les autres, ils ioignent les mains de telle sorte, qu'ils serrent le poing de la main gauche, & le couurent avec la main droicte, puis les portent toutes deux ainsi ioinctes sur la poictrine, & baissant la teste & tout le corps, repetent plusieurs fois ces mots, *Chij, Chij*, voulans signifier qu'ils ont dans le cœur celuy qu'ils saluent. Et comme les estrangers ont veu ceste coustume si vsitée parmy eux, il est croyable (disent quelques vns) qu'ils les ont appelez Chinois pour ceste cause. Mais il en y a d'autres qui estiment ce nom leur estre venu d'une certaine ville de la Chine, qu'on nomme Chinchéo, qui est sur la coste de la mer, a 25. degrez de hauteur Septentrionale: car il est asseuré; que les habitans d'icelle ville, furent principalement ceux qui nauigerent iadis vers le Ponant, & le Midy, & conquesterent plusieurs Isles & pais aux Chinois: tellement qu'ils se rendirent maistres, quasi de toute la mer Indique, & des principaux haures & ports de mer qu'il y eust en l'Inde. Et pource les peuples Orientaux, qui n'auoyent cognoissance d'autres de ceste nation, que des habitans de Chincheo, baillerent à tous en commun, le nom particulier de ceux-cy, les appellans Chijs, ou ce comme nous disons Chinois, & leur Royaume China, comme il en y a qui les appellent Tabiencos, à cause de la cité Royale de Paquin qui se nomme aussi Taybin. Toutes fois il me semble plus probable que le nom de Chine est venu de l'ancien Sine, avec vn peu de variation, comm' il est arriué en vne infinité d'autres: mais c'est assez parlé de cecy, traictons maintenant des qualitez du pays.

*La Chi-
ne fort
planta-
reuse &
pour-
quoy.*

Le Royaume de la Chine, parce qu'il est pour la plus part situé en la Zone, que les Geographes appellent Temperée, est aussi non seulement d'un air fort doux & temperé; mais encore tres-fertile & abondant en fruiçts, & biens de la terre: de façon qu'en quelques lieux on y fait chascun année deux, voire trois recoltes de riz, & autres grains semblables. A quoy sert beaucoup la grande multitude, l'industrie & diligence des habitans: parce que comm' ils multiplient fort, & qu'il ne leur est loisible de sortir hors du Royaume, ny de demeurer oysieux, l'on ne treuve quasi en toute la Chine vn poulce de terre, qui ne soit cultiuée. Tellement que les montagnes mesmes, les rochers, & pierreries, leur apportent quelque profit. Ils plantent és montagnes des pins, des chastagniers, & autres bois semblables: és collines des vignes,

gnes, combien qu'ils ne fassent pas du vin des raisins, mais ils s'en seruent seulement comme des passes, ou d'autres fruiçts, les faisant seicher, & de ceste sorte les gardent presque toute l'année. Aux plaines & campagnes ils sement du riz, de l'orge, du froment, du millet, & autres sortes de grain. Mais de riz, plus que de tout autre, par ce c'est leur nourriture ordinaire, comme la nostre est le pain de bled: combien que les gens de plus basse condition, vsent aussi du pain de millet. Ils font cuire le riz simplement avec de l'eau, sans autre façon, & boiuent tousiours chaud soit eau, soit autre breuuage. Leur boison ordinaire est communément faicte avec du riz. Toutesfois ils en font vne plus excellente, en laquelle ils meslent vne certaine herbe, qu'ils appellent *Chia*, fort *Chia, breuuage des Chinois.* saine, & profitable au corps: de façon que les gens de qualité en prennent souuent, encore mesme qu'ils n'ayent pas soif: & en donnent à goustier par grande faueur à ceux, qui les visitent, si ce sont gens d'honneur. Ils ne se seruēt point d'huyle d'oliues: mais ils en font d'vne certaine herbe, que nous appellons *Iugioline*, ou *Huyle de Jugioline.* *Sisame*, lequel ils trouuent beaucoup meilleur, que celui d'oliues: ains ne peuuent goustier ny flairer celui-cy, si non avec difficulté. Au contraire l'on s'accoustume facilement au leur, bien qu'au commencement il ne semble pas si bon, que celui, dont nous vsons, comme dit le P. Pantoja, qui en a fait l'esprouue. Ils ont des pasturages fort gras, pour nourrir le bestail; & en leurs jardins & vergiers, qu'ils cultiuent fort soigneusement, on trouue plusieurs arbres fruiçtiers, partie semblables aux nostres, partie de differente façon, & que nous n'auons pas. Combien que selon la diuersité des Prouinces, les fruiçts aussi sont diuers. Car la Prouince de Canton, qui est plus chaude que les autres, produict quelques especes de fruiçt, qu'on ne void pas es pais Septentrionals, pour estre plus froids. Entr' autres il y a les meilleures oranges, qu'on ait encore veu. Car elles sont douces come du sucre, & on les mange avec la peau mesme. Ils ont aussi des melons fort exquis en faueur, & plus grands que les nostres. L'on y trouue encore vne certaine espece de prunes, qu'ils appellent *Lechias*, esquelles, outre le bon goust & faueur qu'elles ont, on *Lechias prunes fort rares.* remarque ceste propriété, qu'encore qu'on en mange en quantité, elles ne causent aucun desdain, ny n'alterent point l'estomach. Par tout le Royaume il y a tres-grande abondance de bois, comme faict soy la multitude incroyable des nauires & autres vais-

seaux, que l'on y void. Aussi y est-il à si bon compte, qu'on y bastira vn nauire à meilleur marché de la moytié ; qu'on ne feroit en ces quartiers. Quant aux herbes medecinales ou racines, Garcia ab Horto, tres-excellent Medecin Portugais, qui a demeuré à Goa plus de trente ans, & à esté Medecin de plusieurs Vice-roys, au liure qu'il a composé des simples aromatiques & medecinaux, qui se trouuent en Orient, dict auoir appris que tout le Rheubarbe, qu'on porte en l'Inde, en Perse, & en Europe, vient de la Chine. Car les Perses ou les Arabes le vont querir là, & le portent par la Tartarie, & par la Perse, iusques à Ormuz : d'ou par apres on l'enuoye à Alep, & à Tripoly, ou bien en Alexandrie d'Egypte, & puis à Venise, à Marseille, ou autres lieux de l'Europe. Et le mesme confirme le P. Pantoja en sa lettre. Ce simple aussi que les Medecins appellent racine de la Chine, si souueraine à certaines maladies, se trouue là tant seulemēt, comme beaucoup d'autres simples medecinaux, desquels leurs herboristes ont escript des gros liures. On y amasse aussi grande quantité de sucre & bien affiné : lequel y est à si bon compte, que pour neuf ou dix reaux d'argent d'Espagne, on en baille vn quintal. Ils ont encore du miel en grande abondance : car ils se delectent fort à nourrir des auettes & mouches à miel : & pour ce on le vend à fort vil pris, & par consequent aussi la cire. Il y a grande foison de chairs bonnes à manger, comme des bœufs, moutons, brebis, cheures, & autres : mais de pourceaux plus que de tout autre, parce que c'est la chair, qu'ils mangent plus volontiers. Ils ont aussi force gelines, oysons, & autre volaille, & sur tout vne infinité de canards, à cause qu'ils les font esclorre, & les nourrissent d'une façon, qui ne leur coïste presque rien, cōme nous dirons cy apres. L'on y trouue pareillement force venaison à vendre, soit d'animaux terrestres, comme cerfs, lieures, conils (lesquels ils prennent avec des espreuiers) soit d'oyseaux sauages, & tout à fort bon marché. Les Peres arriuerent à vne ville bien grande, là ou le bœuf, le mouton, & la volaille valoit autant l'un que l'autre ; à scauoir sept ou huit deniers la liure (car on vend là tout au poids) : & à Nanquin, bien que ce soit vne Cour Royale, la liure de la volaille ne se vendoit qu'un sol trois deniers, comptant à nostre façon. Or la liure de ce pais là est plus grande que la nostre : car elle contient vingt & deux onces, & la nostre 16. tant seulemēt. A Paquin, ou le Roy fait sa demeure, bien que toutes choses y

*Tout le
Rheubar-
be vient
de la Chi-
ne.*

*Le bon
marché
de viures
qu'il y
a en la
Chine.*

soient plus cheres, on aura vn lieure pour six blancs, ou trois sols, & ils sont aussi grands qu'icy. Le poisson y est encore à fort bon compte, non seulement és lieux, qui sont sur le riuage de la mer, ou des riuieres : mais encore aux autres endroits, qui sont plus auant en la terre : car ils ont de beaux estangs, ou ils en nourrissent à foison, pour toute l'année, & s'en pouruoient des riuieres fort commodément, de la façon qu'il sera dit plus bas. A Nanquin on vid acheter vn poisson, qui pesoit dix liures, pour vn real, & des grosses truites à six deniers la liure. Des œufs on en baille 10. 12. 16. 18. pour vn coduren, qui vaut sept ou huit deniers de nostre monnoye. Les fruiçts pareillement s'y vendent à fort vil prix : deux cens abricots furēt achetés pour vn sol huit deniers. Il y a sur tout force noix, chataignes, auclanes, pignons, & figes : bien que celles-cy, ne soient pas de mesme façon, que les nostres : mais elles sont aussi bonnes, ou meilleures. Les cheuaux qui viennent là, ne sont pas si grands que les nostres de par deçà : neantmoins ils sont autant forts & robustes, & marchent aussi bien, que ceux que nous auons. Or jaçoit que toutes ces choses se trouuent en la Chine, si est-ce, qu'il ne faut pas penser, que chascue Prouince les aye toutes. Mais ce qui manque à l'une, luy vient facilement des autres. Car ils ont grand commerce, & communicatiō de toutes choses entr'eux, à cause de plusieurs belles & grandes riuieres qu'il y a : par le moyen desquelles ils peuuent nauiger presque par tout le Royaume. D'autāt que non contents de ce que Dieu & la nature leur auoit donné, ils y ont adiousté beaucoup de leur industrie, faisant plusieurs canals, dans lesquels ils ont attiré vne partie de l'eau des plus grosses riuieres, pour la commodité du traffic. Juda-
srie des
Chinois.

Deux Peres de la Compagnie de Iesvs allerent l'an 1600. depuis la ville de Macao, qui est en la Prouince de Canton, iusques à la cité de Paquin, qui seront six cens lieues de chemin, tousiours par eau sur des riuieres nauigables, qui se deschargent l'une dans l'autre, excepté vne seule iournée de chemin, qu'ils firent par terre, pour euiuer vn trop grand circuit, qu'il leur eut fallu faire par eau. Bref il semble, que tout le Royaume n'est qu'un beau jardin, arrousé de toutes parts d'eau des riuieres, des lacs, des estangs, & des fontaines : desquelles aussi il y a vn fort grand nombre, tant des communes & ordinaires, qui donnent l'eau claire & fort bonne à boire; que de medecinales, qui passent par des

*Les Chi-
nois font
plus de
cas de
l'argent
que de
l'or, &
pour-
quoy?*

mineraux, & seruent pour la guerison de plusieurs maladies. Ils ont aussi beaucoup de mines tant d'or, & d'argent, que d'autres metaux, combien qu'ils n'estiment pas tant l'or comme nous: parce qu'ils ne s'en seruent pas pour vendre ou acheter, mais seulement de l'argent non monnoyé, & de laitton aussi de la façon que nous dirons. Il amassent grande quantité de perles au golfe d'Aynan, & font vne infinité de ces vases de terre, qu'on appelle communément Porcellaines, desquels non seulement les habitans de la Chine se seruent, mais aussi beaucoup d'estrangers, qui les vont acheter là des Philippines, de Malaca, & de la nouvelle Espagne. D'où par apres on les porte par toute l'Europe. Ils en font si grãde quantité, qu'on en pourroit charger chascque année vn nombre presque infiny de nauires. Ez montagnes, qui ne peuuent porter autre chose que du bois, il y a des forests tres-espoisses, ou l'on trouue force sangliers, dains, lieures, conils, & autre venaison bonne à manger; & encore des bestes farouches, comme des Lyons, Rhinoceros, Ours, Tygres, & autres semblables. Ils en ont sur tout deux ou trois fort rares & exquises, à sçauoir les Martes, & Ermines, des peaux desquelles ils font des fourrures excellentes: & en vendent aussi beaucoup aux estrangers. Outre ce il y a en la Chine, ou bien près de là, vn certain animal, duquel on fait le musc, qui est vne espee de senteur incogneuë aux anciens, tant Grecs, que Latins, neantmoins fort plaisante & agreable à l'odorat: & communément l'on tient que celuy de la Chine est le meilleur de tous. On le fait d'vne certaine beste, qui est de la grandeur quasi d'vn Renard, laquelle ils vôt chasser parmy les forests: car elle est sauuage. L'ayant prise, ils la battent à coups de verges, ou de bastons, par tout le corps, iusques à ce qu'ils la meurtrissent. Ce qu'ils font tout exprés: afin que le sang s'espãde par tous les membres. Apres cela, ils laissent pourrir & seicher le corps mort de ceste beste: & quand ils estiment, qu'il est du tout sec, ils le coupent avec la peau, & en font de petits sachets, que les Portugais appellent *Papos*. Toutesfois le P. Pantoja escrit auoir apprins, que le musc se tire du petit ventre, ou de la pance d'vn certain animal sauuage, qui est vn peu plus grand qu'vn chat, & que pour le luy couper, on le tuë. Il dict encore, que cest animal ne se trouue pas en la Chine, mais en vn país proche d'icelle. Je crois qu'il entéd parler de la Ciuette: ou que si c'est le mesme animal, que celuy dont nous auons

*Le musc
commet
se fait,
& d'où
il vient.*

dit que se fait le musc, il est croyable, que le meilleur se tire de la paucé d'iceluy, & que pour en auoir plus grande quantité, ils le tuent à coups de verges, afin que la mesme senteur s'espande par tout le corps. Au moins il est assuré que les Chinois le debitent aux Portugais, bien-que peut estre ils l'achèptent d'ailleurs. Ils ont aussi grande quantité de toile tant de lin que de coton, qui se vend à fort vil prix. Et les gens de basse condition vont ordinairement vestus de toile noire de coton. Outre ce il y a force laines, mais sur tout grande abondance de soye : car ils nourrissent vn nombre infiny de ces petits vers, qui la font, & la sçauēt assez bien accommoder, iagoit que non pas si bien que nos Europeans. Ils font des bons taffetaz, damaz, satins, & autres sortes de drap de soye: mais quant à la couleur qu'ils leur donnent, ores qu'au commencemens elle semble estre assez belle, toutesfois bien tost apres, elle perd son lustre. Les gens de qualité vôt communement vestus de soye : mesmes quand ils sortent hors de la maison pour faire quelque visite, ou assister à quelque acte public, où ils doiuent paroistre. Et bien qu'à la verité il y ait beaucoup de gens qui vont vestus de soye : non pas toutesfois tant comme disent quelques auteurs, ainsi qu'à remarqué le P. Parroja. Somme que c'est vn païs, qui semble n'auoir besoin d'aucun autre, ie ne dis pas seulement pour la nourriture ordinaire de l'homme, mais aussi pour les delices. Et partant il n'y a Royaume peut estre au monde, qui retire tant de richesses des autres que cestui-cy: à cause que les Chinois vendent toutes choses, & n'achèptent presque rien, horsmis du poiure, & d'un bois odoriferent pour faire le lambtis de leurs maisons, qu'on leur apporte de l'Inde: mais ils se pourroyent bien passer de cela, & par consequent du trafic & commerce des estrangers, si n'estoit vne conuioise insatiable qu'ils ont d'argent. C'est pourquoy ils traffiquent volontiers avec les Portugais & Espagnols : car ceux-cy leur apportent force argent des Philippines, & de la nouuelle Espagne, & ceux-là du poiure, & de ce bois odoriferant de l'Inde.

*Soyer de
la Chine*

Des Prouinces & villes de la Chine, du grand nombre d'habitans qu'il y a, & de l'industrie, mœurs & coustumes d'iceux.

CHAPITRE XVIII.

LEs Chinois diuisent ordinairement leur Royanme en treize Prouinces, & deux Cours Royales, à ſçauoir Paquin & Nanquin, qui ſont deux autres Prouinces ou Gouuernemens: mais ils les appellent Cours Royales: parce que le Roy tient maintenant ſa Cour à Paquin: & iadis la tenoit à Nanquin. En chaſque Prouince il y a vne ville, qui eſt la metropolitaine de toutes les autres, & bien ſouuent a le meſme nom, que toute la Prouince, comme Canton, Nanquin, & autres: iacoit que non pas touſiours. Le Vice-roy y demeure pour l'ordinaire, avec ſon conſeil, & les principaux officiers du Roy: combien qu'en la Prouince de Canton, il ſe tient à vn' autre ville nommée Xauquin. Quelques auteurs mettent le nombre des citez & villes murées qu'il y a en chaſque Prouince: mais ie n'en ay pas voulu faire icy le denombrement, tant pour ce que la choſe n'eſt pas ſi certaine, que pour n'énuyer le lecteur. Mais il eſt certain, que le nombre en eſt tres-grand, ainſi qu'on pourra colliger, parce que nous allons dire. Ils diſtinguent leurs villes murées en quatre ou cinq ſortes. Les vnes ils appellent *Fu*, ce ſont les plus nobles & principales de toutes, tant à cauſe de la iuriſdiction, qu'elles ont ſur les autres, & les preeminences ou priuileges, que le Roy leur a donné, comme pour raiſon de la multitude & nobleſſe des habitans. Il en y a de celles-cy en chaſque Prouince, comme huit, dix, ou douze, & l'une d'icelles eſt la capitale. On en compte en toute la Chine quelques cent cinquante. La ſeconde ſorte eſt de celles, qu'ils appellent *Chen*, qui ont auſſi leur reſſort, mais non pas ſi grand, que les premieres, & ſont quaſi auſant ou plus que les autres. En troiſieſme rang ils mettent celles, qui n'ont aucune iuriſdiction, bien qu'elles ſoyent aſſez grandes: Ils les appellent *Hien*, & en comptent onze cents vingt. Il en y a deux autres ſortes, qui ſont villes de guerre. Les vnes qu'ils nomment *Huy*, eſquelles ne demeure perſonne, ſinon les Capitaines & ſoldats de garniſon, avec leurs femmes & enfans, leurs ſeruiteurs ou eſclaues; enſemble quel-

Cinq ſortes de villes murées qu'il y a en la Chine.

ques marchans & artisans, qui sont nécessaires pour leurs usages: & de celles-cy ils en comptent cinq cens moins sept. Les autres qu'ils appellent *Iluy*s, sont incorporées aux villes frontieres, où autres au dedans du pais, esquelles pour l'assurance du Royaume on tient garnison, tellement que ce sont comme des citadelles unies avec les mesmes *Fus, Chens & Hieus*: & de celles-cy ils en comptent 2593. Mais parce qu'elles ne sont pas distinguées de ces autres trois sortes: l'on ne peut pas colliger d'icy le nombre des villes du Royaume. Or quand les Chinois nomment ces lieux murez, ils ont accoustumé d'adiouster à la fin du nom propre de la ville, ce mot de *Fu, Chen, Hieu, Huy*, ou *Iluy*, selon qu'est la ville, comme Cantonfu, c'est à dire, cité de Canton, & ainsi du reste. Le nombre des bourgs & villages, qui n'ont aucune enceinte de muraille; est presque innombrable: tellement qu'on n'en tient pas de compte, encore bien que plusieurs d'iceux soyent aussi grands que des villes qu'il y a. Toutesfois chascun de ces lieux a certaine ville, ou il va ressortir, tant pour payer le tribut au Roy, que pour auoir iustice, & recevoir les loix & ordonnances communes à toute la Prouince. Mais pour comprendre mieux la multitude & frequence des villes & villages, qu'il y a en la Chine, j'adionsteray icy vn chief de la lettre du P. Pantoja, ou il dict, que celuy qui n'a veu ce Royaume, mal aisement croira-il qu'il faille employer deux ou trois heures à passer deuant vne ville, nauigeant tousiours le long des murailles, & qu'après ceste-cy s'ensuyuent plusieurs autres, à veuë l'vne de l'autre, & que tout le chemin qu'il fist sur l'eau, depuis Macao iusques à Paquin, qui est de six cens lieues, fust de la mesme sorte, quasi tout bordé de villes ou villages d'un costé & d'autre.

De là on peut iuger du nombre des habitans qu'il y a en la Chine: mais voicy encore vn autre moyen de le cognoistre. Les Chinois ont vne liste, en laquelle sont contenus tous ceux qui payent tribut au Roy, car outre les tailles qu'il prend des terres, il a imposé aussi tribut sur chascun de ses vassaux, tellement qu'encore qu'ils n'ayent rien en ce monde, que leurs corps, ils sont contraints de payer certaine somme d'argent chascue année. A ces fins toutes les citez, villes, ou villages ont chascune vn roole de tous ceux, qui doiuent payer ce tribut. Duquel neantmoins sont exemptés premierement tous les officiers du Roy, tant ceux qui administrent la iustice, que les autres, qui ont charge de ses

La grā
nūbre de
villes ou
villages:
de la
Chine.

finances ; Secondement tous les Capitaines & soldats, avec leurs familles, le nôbre desquels est très-grand ; car quelques auteurs escriuent, qu'il arrive à plus de six millions, & sept cens mille. Finalement ils ne mettent point tous les habitans en ce compte : mais tant seulement quelques vns de chascque famille, comme par exemple de dix, trois, ou quatre. De sorte que dans ceste liste n'est pas contenue la troisieme partie des habitans, & toutes-fois l'on en trouue d'enroollez en leurs liures, plus de septante millions, deux cens, septante mille, ainsi que l'escriit le P. Alexandre Valignan, duquel a esté parlé cy dessus.

*Indu-
strie des
Chinois
pour le
faict des
eaux.*

Quant à leur industrie, elle se peut assez cognoistre en plusieurs choses, & mesmement en ce qu'ils rendent les lieux les plus steriles, & infructueux, fertiles ou profitables, leur faisant porter quelque chose, qui serue à la vie humaine. A cela leur sert aussi grandement l'abondance des eaux, qu'ils ont tant des fontaines, que des estangs, lacs, maraiz, & riuieres : ausquelles, deuant que s'engoulfer dans la mer, ils font faire beaucoup de tours & retours, par le moyen de plusieurs canaux, qu'ils ont caué tout exprés, partie pour arrouser d'auantage la terre, partie aussi pour la commodité du traffic. De façon qu'il n'y a quasi ville de consequence, à laquelle on ne puisse aller par eau, aussi bien que par terre. Pour le regard des lacs, maraiz, & autres eaux dormantes, ils ne les laissent pas non plus reposer ou croupir, ains leur donnent cours & vie, afin qu'elles soyent profitables à la terre, & n'endommagent pas la santé des hommes, ou autres animaux, infectant l'air. Aussi est-ce vn pays si sain, qu'il y a plus de deux mille ans, selon que leurs annales tesmoignent, qu'ils n'ont eu peste ny contagion en tout ce Royaume. On void les bords des riuieres tapissez d'une infinité de villes, villages & metairies, ou belles maisons champestres, qui appartiennent la pluspart aux Loytias, qui sont les lettrés de la Chine, ou autres gens de marque. Dont il en y a peu, qui n'ayent quelque maison aux champs, pour se retirer durant l'Esté : partie pour y estudier, quand ils sont de loisir, partie aussi pour iouyr des delices champestres. Somme que les eaux leur seruent & de plaisir & de profit. Que si elles occupent vne partie de la terre, ils leur en font bien payer l'vsure, les chargeant d'un nombre presque incroyable de batteaux, barques nauires, & galeres : de sorte que l'eau est autant quasi habitée que la terre. Il y a vne infinité de personnes, qui n'ont autre cheuâce en ce

en ce monde, qu'une de ces barques ou bateaux, avec ce qui est dedans : tellement qu'ils peuvent bien dire, comme Bias, *Omnia mea mecum porto*, car ainsi que celui là parloit de la sorte, à cause des biens de l'ame, qu'il auoit en soy: de mesme ceux-cy en peuvent dire autant des biens de ce monde, n'ayans rien plus que ce, qui est porté dans ce bateau. Et toutesfois ils vivent fort à leur aise, & les enfans, qui heritent ceste barque, avec ce qui est dedans, ont moyen de s'entretenir fort honnestement toute leur vie : d'autant que ces vaisseaux leur seruent non seulement d'habitation pour eux & leurs familles, mais aussi pour les estrangers, quand ils veulent aller par eau d'un lieu à l'autre : ou bien pour y travailler de leur mestier, comme de forgeron, charpentier, menuisier, & autres semblables: de mesme sorte, qu'en une boutique sur terre. Mais outre tout cela, ils y sônt encore force petites menageries. Car ils y nourrissent des poules, des canards, des oysons, & autre volaille : voire mesmes des pourceaux. Et ce qui est encore plus esmerueillable, ils y ont des iardins, & vergers, comme pendus en l'air, à l'enuy, ce semble, de la terre. Ils agençent ces iardins du costé de la prouë, faisans aduancer quelques ais ou tables fortes, & là dessus mettent des cuuiers pleins de terre, ou ils plantent des grenadiers, pommiers, orâgers, & tout plein de belles fleurs de bonné odeur, avec plusieurs herbes potageres, & autres pour leurs necessités: si bien qu'ils ne sont pas contraincts de sortir de leur barque, pour se pouruoir de ce, qui leur fait de besoing, soit pour le viure, soit pour le vestir: d'autant que ce qu'ils n'ont pas chés eux, leur est vendu par ceux, qui sont és autres barques. Tellement qu'on en trouue plusieurs, qui sont aussi rarement sortis de dessus l'eau, qu'il en y a d'autres qui y sont entrez. Or de ces barques les vnes seruent à porter les hommes, quand ils veulent aller d'un lieu à l'autre, ou bien les prouisions des villes, ou les marchandises. Il en y a aussi, qui sont anchrées, & demeurent quasi stables en un mesme lieu: lesquelles ils rengent de telle sorte, qu'on diroit, qu'elles sont une ville sur l'eau. Car les ayant dressées (ce semble) au niveau, les vnes aupres des autres des deux costés, ils laissent au milieu comme une rue, laquelle, quand la riuere est grande, est diuisée en plusieurs ruelles, qui passent à trauers, croisant la plus grande : & en chascune de ces rues sont assemblés tous les artisans d'un mesme mestier : ainsi qu'ils sont ez villes. Mais au milieu de toutes ces barques, il y a

*Villes
qui se
mouuent
d'un lieu
à l'autre
chaque
mois.*

comme vne grande place, là ou s'assemblent les marchands, ou autres qui viennent là pour trafiquer. Et cest l'explication de l'enigme, qu'un certain Portugais proposa là dessus disant, qu'entre autres raretés de la Chine, il auoit veu des villes flottantes sur l'eau, qui se mouuoient d'un lieu à vn autre à chascque nouuelle Lune. Il entendoit parler de ces barques, qui representent vne ville sur l'eau: lesquelles, parce qu'il y a chascque mois quelque foire, tantost en vn endroit, tantost en vn autre, s'en vont assembler là pour vendre leurs marchandises: car on tient la foire aussi bien sur l'eau, que sur terre. Mais afin de conceuoir mieux la grande multitude de ces barques, ie rapporteray ce qu'en escrit le P. Pantoja, en sa lettre. Il me souuiens (dit-il) que le matin, auquel nous entraimes dans la ville de Nanquin, il y auoit plus de cinq cens barques, qui alloient deuant la nostre, pour y entrer à la mesme heure (lesquelles il faisoit beau voir ayant les voiles desployées) & vne bonne partie d'icelles estoit chargée de diuerses denrées, pour la prouision de la ville. Puis il adiouste, que de tout le iour l'on ne faisoit qu'aller & venir de la mesme sorte. Voila quant aux barques des particuliers.

*Barques
faictes
au des-
pens du
Roy de
la Chi-
ne.*

Mais il en y a d'autres, qui sont faictes au despens du Roy, & ce de trois sortes. Les vnes seruent aux Mandarins, qui sont les Magistrats & autres officiers du Roy, tant pour les voyages, que selon le deu de leur charge ils doiuent faire, que pour s'aller esgayer sur l'eau, quand il leur plaist. Celles-cy sont fort grandes, & si belles, qu'il y a du plaisir à les voir. Elles ont de beaux fenestragés avec des ialousies & chassés, couuerts de voiles de taffetas, ou autre drap de soye, à guise de courtines. Il y a tout autour des galeries par dehors: & au dedans des sales & des chambres fort belles, peintes de diuerses couleurs, avec beaucoup d'or & d'argent: & toutesfois vernissées avec vne certaine liqueur, qu'on appelle Charan, qui reluit comme vn miroir: duquel aussi est brayé ou enduit tout le dehors de ces barques. Elles ont d'ordinaire des trompettes, & tambours, qu'on sonne lors, que les Mandarins passent deuant quelque ville: afin qu'on sçache leur arrivée, & que les autres vaisseaux, qu'ils rencontrent, fassent large, & donnent incontinent passage au leur. Elles sont communément aussi longues qu'une galere, & ont autant de largeur ou d'auantage: mais quant à la hauteur, qui est depuis l'eau iusques au bord, il y a bien difference. Car celles-cy sont beaucoup plus hautes,

*Celles
des Ma-
darins.
& leur
beauté.*

& on y peut faire entrer plus de charge. La seconde sorte de vaisseaux faicts aux despens du Roy sont ceux, avec lesquels on luy porte le tribut de chasque année, de certaines Prouinces. Car il en y a, d'ou l'on ne peut pas conduire par eau le tribut de riz, ou autres choses semblables, iusques à Paquin: & à ceste cause celles cy le payent en argent; mais toutes les autres l'enuoyent en mesme espeece, qu'il s'amasse, & principalement en riz, qui est leur prouision ordinaire. A cest effet chasque cité aura tant de vaisseaux de charge, qu'il sera besoing pour cela. Et quant vient le temps, auquel il faut partir, chasque Carauane de barques est conduicte par vn Mandarin. L'on tient (dit le P. Pantoja) que seulement des quartiers de Nanquin il y a dix mille vaisseaux, qui ne seruent qu'à cela: bien que tous n'y vont pas chasque année. Mais ils en ont plus grand nombre, pour les années plus fertiles, & aussi parce que plusieurs de ceux, qui sont partis vne année, ne peuuent pas estre de retour au tēps, qu'il faut partyr la suyuante, à cause de la longueur du chemin. Et parce que bien souuent l'eau leur vient à nianquer, mesmement en ceste riuere, qui coule depuis Nanquin iusques à Paquin, qui n'est pas naturelle, mais artificielle, l'on y a pourueu par le moyen de plusieurs escluses, qui sont comme des portes, lesquelles se haussent & baissent, quand on veut: & avec ce ils retiennent l'eau trois, quatre, ou six heures: & puis ouurant ces escluses, ils donnent passage & cours aux barques, iusques à ce, qu'elles arriuent à vn autre lieu, ou l'on fait tout de mesme.

Celles ou l'on porte le tribut au Roy.

La troisieme espeece des barques basties au despens du Roy sont celles, avec lesquelles on luy porte diuerses choses pour l'entretien & seruice de sa maison, ou de sa personne mesme: comme sont draps de soye, confitures, & viandes delicates, que le païs de Nanquin particulièrement luy fournit, & autres choses, qu'ils ont accoustumé de brusser és Sacrifices, qu'ils fōt aux trespassez, ou deuant les Idoles. Ces barques (qui montent iusques à mille, à ce qu'on dit) sont conduictes par quelqu'un des Eunuques, que le Roy tient à son seruice, iusques à la moytié du Palais Royal. Car la riuere, qui va de Nanquin à Paquin, porte les batteaux iusqu'à là. De ce que dessus l'on peut colliger le grand nombre de vaisseaux appropriez seulement à l'usage ordinaire du Roy, ou de ses officiers, Mais quand il arriue quelque cas extraordinaire (comme ces années passées, qu'il rebastissoit vne

Autres pour le seruice ordinaire de sa maison.

grande partie de son Palais, que le feu auoit consumée, selô qu'en son lieu nous raconterons) il en a bien d'auantage. Car il fait porter de bien loing les bois, les quarreaux, & autres materiaux pour bastir. Les Peres qui firêt le voyage de Paquin en ce temps là, trouuoient par le chemin vn'infinité de barques, chargées de ces materiaux: & outre ce, des grands radeaux, ou il y auoit des poutres longs de cent ou deux cens pieds, attachez l'un avec l'autre, & par dessus tous ces bois, on voyoit quelques loges, tant pour vn des moindres Mandarins, qui auoit charge de ceste conduite, que pour les Mariniers, lesquels aussi portoient quant & eux toute leur prouision, comme de pourceaux, de gelines, & canars; parce qu'ils demeurent quelquesfois vn an à faire leur voyage. De ce qu'a esté dit l'on peut aisément voir, que ce ne sont pas hyperboles, ce qu'on dict du nombre incroyable des vaisseaux, qu'on trouue en la Chine: puis que seulement pour le seruice du Roy, & de ses officiers, il en y a tant. Je ne parle pas maintenant des nauires de guerre, qu'ils tiennēt tousiours prests sur la coste de la mer, pour empescher les voleries & brigandages des courraires. Je ne mets point encore en ligne de compte, les nauires des marchands, qui trafiquent sur mer: mais j'ay tant seulement parlé des vaisseaux, qu'on voit ordinairement sur les riuieres, au dedans du Royaume.

Or puis que nous sommes en propos de l'industrie des Chinois sur l'eau, il faut adiouter à ce, qui a esté dict, vne façon plaisante, qu'ils ont de pescher avec des Cormorans ou Corbeaux pescherets, lesquels ils appruiuoient, & dnyent à la pesche, comme nous faisons les espreuiers à la chasse des oyseaux. Quand donc on veut faire pescher ces Cormorans, qui ont le col fort long, & le bec crochu, on leur serre le gosier, de maniere qu'ils puissent bien respirer, mais non pas aualer les poissons. Apres ce, ils les laschent, & ces oyseaux s'en vont incōtinent plonger dās l'eau, & y demeurent iusques à ce, qu'ils ont remply de petits poissons, tout ce qu'il y a de vuyde, depuis le bec iusqu'au iabor. Lors ils retournent vers leurs maistres, qui sont dans des petites nacelles à demy remplies d'eau: & là rendent gorge, c'est à dire versent tous les petits poissons, qu'ils ont au gosier, dans l'eau, qui est es barques. Que si le Cormorant rencontre quelque gros poisson, il le combat à coups de bec, & tant & tant le pourluit, qu'en fin il l'esleue en haut avec son bec. Ce que le pescheur

*Façon de
pescher
avec des
Cormo-
rans
qu'ils
ont en
la Chi-
ne.*

voyant, s'en va viftement avec sa nacelle, là ou est la proye : & mettant dessous vn petit filet attaché à vne verge, l'oiseau lâche la prise, & l'autre prend le poisson par en bas avec son ret. Et de ceste façon ils enleuent quelquesfois des poissons, qui poissent vne liure & demie. Apres qu'ils ont pesché de la sorte, enuiron trois heures, le pescheur leur oste ce qui les empeschoit d'aualer les poissons, & les renuoye dans l'eau, affin qu'ils peschent pour eux mesmes; dequoy ils ont bon besoing: car outre qu'ils ont pris grand peine durant ces trois heures là, on leur oste le iour auparauant leur ordinaire (qui est vn peu de millet) affin qu'ils peschent avec meilleur courage. Or apres qu'ils ont remply leur estomach de poissons, ils s'en retournent vers leurs maistres, qui les renferment dans les cages, iusqu'au troisieme iour, afin qu'ils se delassent : & apres ils les font pescher derechef de la mesme sorte. Mais cecy ne dure que trois mois de l'année seulement, à sçauoir Feburier, Mars, & Auriel: parce qu'en ce temps-là le poisson de la mer s'en va à mont des riuieres, pour se vider des œufs de leurs petits. Ceste pesche est non seulement fort plaisante & agreable à voir, mais encore tres-proffitabile, tant aux maistres des corbeaux, qui vendent par apres bien ce poisson, qu'au Roy mesme, qui a certain tribut imposé sur chascun de ces cormorants, & si est fort commode à tout le Royaume. Car on se pouruoit par ce moyen de poisson, és lieux les plus esloignez de la mer & des riuieres, d'autant que l'on porte ces petits poissons vifs avec de l'eau d'un lieu à l'autre : & puis on les met dans des estangs ou viuiers, que chascun presque a dans sa maison, là ou ils les nourrissent, iusqu'à tant qu'ils sont deuenus gros; tellement qu'on peut manger en tout temps du poisson frais, encore qu'on soit bien auant dans la terre, arriere de la mer, ou des riuieres. Aussi és banquets que les Chinois font, il y a presque tousiours chair & poisson. Mais l'industrie qu'ils ont à nourrir des canars, oysons, poulles, & semblable volaille, n'est pas moins remarquable. Car ils ne font pas comme nous, couuer les œufs aux femelles, ains les mettent dans le fumier, soit de bue, soit des canards mesmes, qui est fort chaud, ou bien en temps d'Hyuer ils les posent dans vne cage, sous laquelle ils font vn peu de feu de paille, ou autre matiere aisée à brusler, iusqu'à ce qu'ils cognoissent, que les petits se veulent esclorre, & lors ils cassent les œufs vn à vn, d'où sortent des petits poussins, oysons, ou canarçons, lesquels ils

Commodité & utilité de ceste pesche.

L'industrie des Chinois à nourrir de volaille..

nourrissent si dextrement, qu'il ne leur en meurt presque aucun. Apres cela ils les enferment dans vne grande cage, ou il y a des gros canars, qui sont accoustumez à couvrir, & coëtiuer les petits, dessous les aïles, & là on leur donne à manger, iusqu'à ce qu'ils se sçachent pourvoir eux mesmes par leur bec, & lors ils les font sortir dehors, pour aller herber aux prez, & aux terres ensemençees, avec les autres plus grands: de façon qu'on ne void point là des poulles qui glossent ou couuent: mais elles ne font que pondre toute l'année, dont ils retirent si grande quantité d'œufs & de volaille, que c'est vne chose presque incroyable.

*Comme
ils nour-
rissent les
canars.*

Or pour nourrir ces canars, il n'est pas besoing de faire beaucoup de frais, parce que dès qu'ils peuuent sortir aux champs, ils s'en vont paistre aux terres, ou l'on a semé du riz, & en ostent les mauuaises herbes sans faire aucun dommage; si que les maîtres des champs, en recognoissance de ce bien-faict, ont accoustumé de donner quelque present à ceux à qui sont les canards. Car ce sont pour l'ordinaire des pauures gens, qui s'entretiennent de ceste mesnagerie, & n'ont bien souuent autre chose en ce monde qu'une barque, ou ils ont des cages de rouseau aussi larges & longues, qu'est le couuert de la prouë de leur vaisseau. Mais ces cages sont quelquesfois si amples, qu'ils y peuuent tenir quatre mille canars: là ils les font retirer durant la nuit, & le matin, quand ils les veulent aller faire paistre, ils leur mettent vn pont de rouseaux, par ou ils vont à terre, avec telle viftesse, qu'ils passent volans les vns sur les autres, & tout le long du iour ils se promettent çà & là paissans par les champs au bord de la riuiere. Sur le tard on leur sonne la retraicte en leur barque avec vn petit tabourin, le son duquel ils discernent si bien, qu'ils ne manquent iamais à recognoistre leur giste, bien qu'ils soyent plusieurs ensemble de diuers vaisseaux. L'on leur tient alors le pont redressé pour les faire entrer en leur cage, & ils s'en volent tout aussi tost là dedans. Et d'autant que ceste sorte de nourrir les canards, est fort aisée, & a peu de frais, la pluspart du peuple se nourrit de telle viande, parce qu'elle est à fort bon compte, y en ayant si grande quantité.

Quant aux arts Mechaniques, il sçble qu'ès Chinois se veriffie l'opinion d'Aristote, qui dict, que les peuples Orientaux ont plus d'esprit & d'engin, que de courage & de force: car touchant l'art d'Imprimerie, l'on tient communement que long temps auant

*L'art de
l'impre-
merie il*

que nous ne l'eussions en Europe, elle estoit en vsage à la Chine, *a esté plusost à la chine qu'icy.* comme peuuent faire soy les liures qu'ils ont imprimez depuis plusieurs centaines d'années en ça: & toutesfois il n'y a pas deux cents ans qu'elle est en vsage en l'Europe, comme l'on peut voir dans Sabellicus, qui en rapporte la premiere inuention à vn certain Gentil-homme Allemand, nommé Iean Gutemberg. Vray est que leur façon d'imprimer n'est pas semblable à la nostre, qui se faict en accouplant les lettres de l'Alphabet diuerfement: car ils n'ont point d'Alphabet, ny de lettres comme nous: mais quand ils escriuent, ils ne font autre chose, que peindre quelques figures, comme les Egyptiens faisoient iadis leurs hieroglyphes, qui representoyent les choses mesmes, non pas les mots. Tellemēt que leur escripture est entenduë par toute la Chine, bien que les langues, dont ils vsent en diuerses Prouinces, soyent differentes. Ainsi que nous entendons les chiffres qu'on marque pour les nombres: iacoit qu'en France, en Allemagne & en Italie, l'on les prononce diuerfement. N'ayant donc point des lettres, leur Imprimerie aussi est bien dissemblable à la nostre: car en leurs impressions, ils ne font autre que grauer sur le bois, ou sur la pierre, les figures qu'ils veulent imprimer: puis en estampent autant de fueilles de papier qu'il leur plaist, comme nous faisons icy les peintures qui sont grauées sur le bois, ou sur le cuiure. Le Pere Pantoja dict, que pour chasque fueille qu'ils veulent imprimer, ils taillent les figures sur vn ais à toutes les deux faces, de sorte qu'à mesme temps s'impriment les deux faces, bien qu'en diuers papiers: puis ils tournent les fueilles pour les imprimer de l'autre costé: mais lors les lettres ou figures sont noires, & le chāp blanc. Ils impriment aussi des lettres blanches en champ noir. Ce qu'ils font en ceste maniere. Ils grauent les figures dans la pierre vn peu profond, & apres auoir humecté le papier, ils le mettent sur ladicte pierre, & frappent à petits coups tout doucement, avec quelque chose molle: tellement que le papier entre dans le vuide de la pierre, & les figures restent plus profondes que le champ: puis avec vne certaine ancre qu'ils font tout exprés, ils passent subtilement par dessus, de façon que les lettres demeurent blanches (parce qu'elles sont plus profondes) & le reste noir: Telle est donc la maniere d'imprimer des Chinois, d'où il appert combien la nostre est plus ingenieuse & industrieuse que la leur. Le mesme est-il de l'artillerie: car encore que depuis long temps ils

*Sabel.
lib. 6.
enn. 10.*

*Façon
d'imprimer
de
la Chine
fort
differente
de la
nostre.*

*L'inven-
tion de
l'artille-
rie est
des Chi-
nois.* en ayent l'usage, (si nous croyons ce qu'en ont escrit quelques
auteurs : entre lesquels il en y a qui estiment, que celuy qui en
apporta le premier l'inuention en Europe, l'auoit puisée de là)
*Voyez
l'histoi-
re de la
chine
part. 1. l.
3. c. 15.* si est-ce qu'il y a grande differēce entre la leur & la nostre. Parce
que leurs pieces sont fort courtes, & autant larges de la bouche,
que de la culasse: neantmoins quelques vns disent y en auoir veu
de fort bonnes, & tres-bien faictes. Mais quoy qu'il en soit, on
peut cognoistre par là, leur esprit & industrie. Car il n'est pas
probable, qu'ils ayent pris ceste inuention de nous, veu le peu de
communication qu'ils ont avec les estrangers, mesmes avec ceux
de l'Europe: & le peu de temps qu'il y a que nous l'auons, qui est
depuis l'an 1354. suyuant l'opinion de quelques vns, ou comme
disent quelques autres, depuis l'an 1380. Et si l'on doit adiou-
ster foy à leurs histoires, il y a plusieurs milliers d'années, qu'ils
en ont l'usage: car ils en rapportent l'inuention à leur premier
Roy, nommé Vitey, qui a esté, selon leur compte, fort long temps
deuant la naissance de nostre Seigneur. Si disent que celuy, qui
luy enseigna cet artifice, fust vn certain esprit, qui sortist de des-
sous terre, & ne faut pas doubter, que ç'ait esté autre que l'es-
prit maling, ennemy mortel de nostre nature, qui ait descouuert
cet instrument de guerre, si pernicieux & si dommageable aux
hommes. Aussi l'on dict que ce Roy estoit vn grand Magicien,
& il est croyable, s'il est vray ce qu'on en raconte. Mais c'est as-
sez parlé de cecy, continuons nostre propos de l'industrie des
Chinois. Ils sont passablement entendus en la peinture, combien
qu'ils ne sçauent pas faire les ombrages, mais il taillent bien en
bosse, & grauent aussi sur le cuiure assez proprement. Ils iettent
en fonte diuerses figures de cuyure, & font aussi l'esmail. Brief en
plusieurs autres sortes de manufactures, ils sont excellents. Et il
semble; que la nature leur ait donné vne subtilité d'esprit, &
promptitude particuliere, pour apprendre les arts mechaniques:
si bien que dans peu de temps ils s'y rendent maistres, & font ce
qu'ils ont apprins avec vne merueilleuse viftesse, & dextérité. Il
n'y a quasi aucun, pour malotru qu'il soit, qui ne sçache quelque
art ou mestier. Les aueugles mesmes, les boiteux, & estroupiats
sont contraincts d'apprendre quelque mestier, avec lequel ils
puissent gagner leur vie; & pource l'on y trouue bien peu de
mendians. Car les enfans dès leur ieun' aage s'appliquent au tra-
uail: & tous presque apprennent plusieurs mestiers, affin qu'ils
aduient,

aduiuent, qu'ils ne se puissent ayder de l'un, l'autre leur serue. De là vient que tous les ourages, mesmes les plus penibles & laborieux, sont à fort bon marché en la Chine. Et ceste dextérité, ce soing & diligence en la mesnagerie se void, tant en l'un, qu'en l'autre sexe. Il n'y a rié de si vil, que la terre ou la mer porte, qu'ils n'en fassent leur profit. Ce que les autres nations iettent comme inutile, est soigneusement ramassé des Chinois, comme sont les os des animaux, les espines des poissons, les noyaux des fruiçts, & choses semblables, dont ils font de petites boules, des anneaux, des Images, & autres telles bagatelles fort proprement & gentiment.

Sur tout les villes & citez sont basties avec vn grand artifice, ^{comme} & tres-belle proportion; la plus part sont sises sur des riuieres ^{font bas} na- ^{sies les} uigables; & toutes sont encintes d'un fossé profond & large, & ^{villes de} enmantelées de grandes murailles, qui sont de pierre de taille, ^{la Chi-} depuis le fondement iusqu'à vn certain espace, & de là iusques ^{ne.} au bout de brique blanche: laquelle est si forte, qu'à peine la peut on rompre avec des pics ou marteaux poinçtus. En quelques villes les murailles sont si espesses, que quatre hommes, & quelquesfois six, y peuuent aller de front. Elles sont ornées de beaux perrons au plus haut, & de galeries couuertes, ou les Gouverneurs se vont quelquefois promener, pour plaisir: afin de iouyr de la veüe des champs, & de la riuere. Il y a aussi des bouleuards à certaines traictes, & des tours encore, qui sont pareillement enuironnées de perrons & de galeries, avec les festieres fort bien faictes. Depuis la muraille iusques au fossé, il y a vne terrasse si large, que six hommes à cheual y peuuent marcher de front, & autant en y a il au dedans de la ville, iusques aux maisons, afin de pouuoir commodément faire la ronde & le circuit de la ville, sans aucun empeschement. Ils sont si soigneux de conseruer ces murailles, que jaçoit qu'on y en trouue, qui ont esté faictes depuis deux mille ans en ça, selon leurs annales ou traditiue, si est ce, qu'on n'y verroit aucune fente ny creuasse, ou autre manquement: ains l'on diroit, qu'elles ne viennent que d'estre faictes, tant elles sont belles & entieres. Aussi en chaque ville, il y a vn Magistrat deputé tout exprés, pour faire reparer les murailles, & autres bastimens publics, au despens du Roy.

Or la disposition de leurs villes est telle. Il y a deux grandes ^{La dispo} ^{sitiō des} ^{ruës.} ruës, qui se croisent au milieu de la ville, si larges que quinze hō-

mes à cheual y peuuent marcher de front, & si droictes, qu'on ne scauroit mieux les aligner, ou dresser au niueau. Elles sôt aussi longues que la ville: & au bout d'icelles, on voit les quatre portes principales. A trauers de ces grandes ruës, il en y a d'autres moindres, pour la separation & distinction des bastimens, tant publics que particuliers; & aux deux costés principalement des plus larges ruës, il y a des souspentes ou faillies des maisons, pour tenir à couuert le monde, & garantir de la pluye les boutiques des marchands ou artisans, qui se tiennent là; lesquels sont rangés de telle sorte, que tous ceux d'un mesme mestier, demeurent en vne ruë, si que voyant le premier, l'on peut cognoistre de quel art tous les autres font profession. On void encore bien souuent en ces ruës, de beaux arcs triomphaux, bastis de pierre de taille, avec grand artifice, à trois portes communément, enrichis de belles peintures & inscriptions, qui declarent le nom des Vice-roys, qui les ont faicts faire. Pour regard des bastimens publics, ils ont bien des temples fort grands & magnifiques avec leurs tours, qui sont faictes en poincte; mais ils ne sont pas si beaux, que ceux, que nous auons en Europe. Il y a pareillement en chascune ville vn hostel ou maison en vn lieu le plus celebre d'icelle, pour le Gouverneur, faicte aux despens du Roy: laquelle est fort ample, & de grand coust. Elle a des iardins bien entretenus, des grands estangs, pour nourrir du poisson, des belles fontaines, ou autres conduicts d'eau, tât pour la commodité de la maison, que pour la recreation des Gouverneurs. Ils y ont aussi des plaisans boscages, ou ils entendēt les gazouillis des oyseaux; & des parcs, esquels on trouue beaucoup de chasse, & de gibbier. L'on y voit encore des prez tapissiez d'une belle verdure, & en son temps esmaillés d'une belle diuersité de fleurs: des bois aussi, qu'on coupe & vignette avec mille & mille beaux ouurages. Somme que chascune de ces maisons, & nommément celles des Vice-roys, ont vne si grande enceinte, qu'elles semblent estre d'assez grandes villes. Les maisons des personnes priuées, n'ont d'ordinaire qu'une seule estage: mais elles sont fort iolies, & commodes: car elles sont toutes au dedans, ou peintes de diuerses couleurs, ou blanchies avec du charan. Or ce charan est vne espee de gomme, qui decoule de certains arbres, qu'on trouue, tant en la Chine, qu'au Iappon, en grande quantité, & ressemble à nostre verniz, faisant reluire comme vn miroir, tout ce qui en est enduit. On

*Comme
sont ba-
stis les
hostels
ou pa-
lais des
Vice-
roys ou
Gouver-
neurs.*

*Charan
espee de
gomme.*

le melle avec la couleur, qu'on veut, car il vient fort bien avec toutes : & quand c'est du bon, il ne pect point son lustre avec le temps. L'on s'en sert non seulement à blanchir les maisons au dedans, comme nous de la chaux (combien que le charan fait reluire les paroyz à guise de papier bruny) mais aussi pour les peindre de diuerfes couleurs, le mellant avec icelles. Car les Chinois se plaissent d'auoir leurs sales & châbres peintes de figures d'oyseaux, d'arbres, de fleurs, & autres telles choses. Ez nauires aussi, tant le dedans que le dehors, est peint avec du charan, principalement celles des Mandarins & officiers du Roy. Mais retournôs à nostre propos. A l'entrée des maisons, il y a tousiours vne basscourt, & à l'un des costés d'icelle vn paire d'armoires avec des niches, dans lesquelles ils tiennent les statues de leurs Idoles. Le fenestrage ne respond pas sur la ruë, mais au derriere de la maison vers le jardin : & là ils ont aussi leurs estangs ou petits viuiers pleins de poisson. Ils se seruient en leurs bastimens d'une sorte de bois, qui se polit merueilleusement bien ; & encore pour plus d'ornement, ils l'enduyent d'une certaine eau damassée, qui les rënd luy sans comme l'or, ainsi que disent quelques vns. Peut estre que c'est du charan, dont nous auons parlé. Quant aux toicts des maisons, ils sont encore tres-bien faicts, & aussi bien polys, que le dedans : mais tellement ioincts & espessis, que la pluye n'y peut auoir entrée. Si le feu ne s'y prend, telles couuertures dureront les siecles entiers. Pour faire escouler l'eau, ils ont des canaux de marbre, fort industrieusement elaborez. Deuant les portes des maisons, ils plantent des arbres à la ligne, qui seruent tant pour faire ombrage, que pour embellir les ruës. Ils ont pour se garder des vents, de bonnes fenestres : & durant l'Esté pour iouyr du frais, ils vlient d'une telle inuention. En leurs maisons ils fouysent sous terre vne grotte, côme nous faisons icy des caues, en quelque lieu propre & commode, pour receuoir le vent frais, par le moyen des fenestres & ouuertures, qu'ils luy donnent. Et quand ils veulent, ils font aller ce vent, par tout le logis, par les portes & conduicts qu'il y a : tellement qu'ils en reçoient autant & non plus qu'il leur plaist. Ainsi bastissent ils toutes leurs maisons. Car ils sont si conformes en faict de bastimens, que quiconque en a veu vn, peut iuger aisément du reste à peu près, & le mesme est il des villes à proportion. Il est vray qu'en quelques vnes qui sont sur le bord de la mer, il y a des canaux d'eau faicts à la main, pour

*Les mai-
sons par-
ticulie-
res com-
mēt sont
basties.*

*Pōts en
grād nō-
bre à la
Chine.*

donner entrée aux nauires bien auant dans la ville ; & aux deux costés d'iceux, des grāds quays bastis de pierre, comme l'on void en plusieurs villes d'Europe. Ils ont pareillemēt vn nombre pres- que infiny de ponts, tant de pierre, que de bois, non seulement és villes & villages, mais aussi parmy les champs : & quelques vns d'iceux ne cedent en rien à ceux, que jadis ont fait les Romains, lors qu'ils estoient Seigneurs de l'Vniuers. Les fleuues, qui pour leur largeur & profondeur, ou roideur, ne peuuent porter des pilotis ou arceaux, ont des pōts de barques attachées ensemble, & couuertes d'ais. Que si la riuiere viēt à s'engrossir, de maniere que le rang des barques se rompe, lors il y a des gens exprés, qui passent les gens gratuitement avec des bateaux, estans pour ce gagez du Roy.

*Chemins
publics
commēt
tenus.*

Quant aux chemins publics, les Chinois sont fort soigneux de les rendre cōmodes. Ils sont d'ordinaire tous pauerz, & tousiours bien entretenus au despens du Roy : tellement que ny les lieux marescageux, ny les eaux, quand elles se desbordent, ny autre semblable accident, ne leur donne aucun empeschement à voyager. Les montaignes aussi ne leur font pas grand ennuy. Car ils ont taillé des chemins au trauers des plus hautes & plus aspres qui soient, avec vn trauail & despense incroyable. Ils se seruent en voyageant de cheuaux & autres montures, de coches, litieres, chaires à bras, & de chariots, non seulement de ceux, qui sont trainez par des cheuaux ou autres bestes semblables, comme les nostres; mais encore (s'il est vray ce que plusieurs asseurent) d'autres, qui vont par les champs planiers à l'ayde des voyles, tout

*Chariots
qui vont
par les
champs
à l'ayde
des voi-
les.*

ainsi que les nauires vont sur mer : si bien qu'on trouue des cochers, qui ne sont pas moins experts à conduire les chariots avec les voiles & le gouuernail, que les pilotes, pour les nauires. Car haussant & baissant le pied ils font tourner les voiles, pour prendre le vent, comme ils veulent : & avec le gouuernail, ils conduisent le charriot, là ou il leur plaist. Cecy semblera peut estre incroyable à plusieurs, mais les naturels mesmes du pais l'asseurent : & l'on voit bien souuent és porcelaines, la peinture de ces chariots conduicts à voiles, outre qu'il y a des historiens bien graues de nostre temps, qui le racontent ainsi. Or entre les edifices, qu'ils ont basti avec grands cousts & despens, est ceste muraille tant renommée, qui est aux confins du Royaume, du costé qu'ils sont limitrophes aux Tartares, à cause desquels ils l'ont faicte, pour se

garantir de leurs assauts & pilleries. C'est vn œuure si admirable, mesmement en sa longueur, que toutes ces grandes fabriques des Pyramydes & Colosses, tant celebres des anciens, comme miracles du monde, ne sont rien au respect de cecy. Car ceste muraille, selon la plus commune opinion, dure prez de trois cēs lieues, ioignant par ce moyen deux montaignes tres-haultes, qu'il y a aux deux bouts. Elle est si forte, haute, & large, que tout ainsi qu'elle est au lieu des montaignes, suppleant leur deffaut, aussi les imite-elle de prez, quant à la largeur, hauteur, & forteresse. Elle a (comme quelques vns disent) sept brasses d'espaisseur, tant en haut qu'en bas : & à certaines traictes il y a des grosses tours, esquelles les Chinois tiennent perpetuellement garnison de soldats, pour la deffence d'icelle, & affin de resister aux premiers assauts des Tartares, cependant qu'on appreste vne grosse armée, pour leur aller au deuant. Il y a aussi prez de ladite muraille force petits chasteaux, ou se tienent les gens à cheual, qui sont là constituez comme en garnison, pour la mesme cause. Mais c'est assez parlé de l'industrie des Chinois, traictons maintenant de la disposition naturelle de leurs personnes, des habits, mœurs, & coustumes d'iceux.

Les enfans en leur bas aage sont fort beaux, & gētils : car beaucoup d'iceux sont aussi blancs que ceux d'Europe : tellemēt qu'en la Prouince de Canton, ils sont de mesme couleur que les Espagnols : & tant plus qu'on monte en hault vers le Septentrion, ils sont aussi plus blancs ; de façon que à Paquin, ils ressemblent fort aux Italiens, ou aux François. Or iagoit qu'estans petits ils soyent assez blancs, iolys, & bien proportionnez : si est-ce que commençans à se rendre hommes, ils deuiēnt plus laids & difformes, que les Europeans. Car presque tous les Chinois ont le visage large, les yeux noirs, & fort petits à proportion du visage, & le nez plat & camuz. Ils ont fort peu de barbe : car on n'en void que quelques poils aux deux costez du mēton pour l'ordinaire. Il en y a bien quelques vns qui ont les yeux grands, la barbe bien faicte, & le reste du visage bien proportionné : mais, ceux-là sont peu au respect des autres, & pource l'on pense qu'ils descendent des estrangers, qu'il y a eu en ce Royaume, lors qu'ils se cōmuni-
De la disposition naturelle des Chinois.
4

*L'habit
des Chi-
nois.*

sont là ou sont les pierres precieuses, & les thresors cachez. Or ils sont tellement aveuglez de l'amour propre, qu'ils ne trouuent pas beaux ceux, qui ne leur sont semblables: de sorte que pour peindre vn homme laid & difforme, ils le forment avec la barbe longue, le nez & les yeux grands, & vn habit court. Car ils vont tous vestus de robes longues, iusques aux soldats mesmes. Tous tant hommes que femmes, portent les cheveux longs: & les hommes les entortillent & nouent au sommet de la teste, puis les couurent avec des petits reths, qu'ils portent en forme d'escoffions faicts de poil de cheual avec grand artifice: mais au milieu ils laissent vn trou par lequel sort vn flocon de poil, qui ne leur viendroit pas mal, s'ils estoient femmes. Par dessus cet escoffion, ils portent des bonnets ou chapeaux de mesme estoffe, qu'est leur accoustrement: toutesfois quant à la forme il y a grande diuersité: car le Roy a vne façon de chapeau, differente du reste: pareillement les Mandarins; bref il est fait diuersement selon l'estat d'vn chascun. Les souliers sont de la mesme estoffe quel'accoustrement, avec beaucoup de laçets fort propres & iolys. La populace se vestit communement de toile de cotton, ou de lin teincte en noir. En Hyuer ils fourrent leur accoustrement de cotton, qui n'est pas filé. Mais les gens de moyen se seruent des capitons de soye, qui tiennent fort chaud, & ne coustent pas beaucoup, à cause qu'ils en ont à foison. Ils vsent de sayes (à la mode qui couroit en France le temps passé) à grands quartiers plissés, bien menu, & par dessus ils portent des longues robes, qui leur vont iusques à la cheuille du pied, avec des manches fort larges. Ces robes sont ouuertes par le deuant: mais les sayes se ferment au costé gauche. Les Princes du sang, & ceux qui sont constituez en quelque grande dignité, comme les Vice-roys, portent le saye recamé d'or ou d'argent par le milieu, à l'endroit de la ceinture, & les autres garni seulement aux bords. Ils vsent de hauts de chausses tres-bien faicts, & de botines & souliers de soye fort mignards. Durant l'Hyuer les plus grands ont leurs sayes & robes fourrées de peaux de Martes Zebelines, qui sont estimées si precieuses, & dont il y a là grand nombre. Ils mettent encore vne piece de ces peaux separée du reste à l'entour du col, pour se tenir plus chauds. Telle sorte d'habit leur aggréé si fort, qu'ils pensent n'y en auoir au monde aucun, qui soit si beau que le leur. Et à la verité il est fort graue & modeste, principalement celuy

des Mandarins, comme nous verrons cy apres. Or la raison pour laquelle les hommes mesmes portent les cheveux longs, est (à ce qu'on dict) parce qu'ils croyent deuoir estre plus aisément enleuez au Ciel par les cheveux, s'ils les portent longs, & c'est pourquoy leurs Bonzes n'en portent point du tout, ains se font raire la barbe & les cheutux. Car ils disent, qu'ils n'ont pas besoin de cela pour monter au ciel: d'autant que leurs bonnes œuures les y font entrer beaucoup mieux, que les cheveux des autres. On ne fait point de drap de laine en toute la Chine, bien qu'il y aye force laine. Je n'ay trouué aucun aucteur, qui rende la raison de cela: car il n'est pas croyable, que l'industrie pour ce faire leur manque, veu qu'ils l'ont pour faire les draps de soye, & autres choses plus difficiles. Ils achètent fort cher les draps de laine, que les Portugais vendent, comme aussi les camelots, & les toiles fines qui se font en l'Inde. Les miroirs encore, & toutes choses de verre y sont fort estimées, & y valent beaucoup. Quant à l'accoustrement des femmes, il est fort semblable à celuy des Espagnoles: elles ont sur tout vn grand soing de bien peigner & agencer leurs cheveux, lesquels elles entortillent au bout du chef, & les attachent avec des rubens de soye, enrichis de perles & pierreries, enchassées en or. L'ornement de tout le reste du corps est fort honneste, & n'est aucunemēt lascif. Vray est qu'on trouue quelquesfois des femmes vœstus de court, à la mode des hommes de ce pais là, sans qu'il y ait aucune differēce, horsmis à la teste & aux pieds: mais ce sont tant seulement les femmes de basse condition, & en certains endroicts seulement. Par toute la Chine, les femmes tiennent pour grande beauré, d'auoir les pieds petits: & à ceste cause dez leur tendre ieunesse on les leur serre avec des bandes fort estroictement. Ce qu'elles endurent patiemment, parce que celle qui a plus petits pieds, est estimée plus leste & damerette. On dict que les premiers, qui ont introduict ceste coustume, l'ont fait principalement, pour les rendre comme percluses, & presque impotentes des pieds: afin qu'elles ne soumissent guere souuent de la maison, & n'allassent trotter çà & là par les rues (comme font en quelques lieux plusieurs autres, & bien souuent au preiudice de leur honnesteté) afin aussi qu'elles fussent plus attentifues à la mesnagerie, & aux affaires domestiques. Et do fait l'on void rarement sortir hors de la maison les femmes de la Chine, sinon les artisanes, & autres de:

*Pour-
quoy ils
portent
les che-
veux
longs,
mesmes
les bon-
mes.*

*Habits
des fem-
mes Chi-
noises.*

*Les fem-
mes de
la Chine
ont les
pieds pe-
tits &
pour-
quoy?*

de moindre estat. Mais les femmes de qualité ne sont iamais veuës hors de la maison. Que s'il est necessaire qu'elles sortent quelquesfois pour aller visiter leurs parents, on les porte sur des chaires à bras, qui sont fermées de tous costez, de façon que personne ne les peut voir; combien qu'elles puissent voir ceux qui passent par des ialousies faictes d'yuoire, auec de fil d'or & d'argent, entrelassé fort espais. Leurs seruiteurs portent ces chaires, & le reste de la famille va tout autour. On ne les void point aussi iamais aux fenestres, ny aux portes de la rue, ains se tiennent tousiours recluses, comme des Nonnains: de façon qu'aucun estrangier ne les peut voir. Que si leur mary inuite quelqu'un à dîner, ou à souper, elles ne se monstrent point: & ne se sent aucunement à table, si celuy qui est inuité n'est leur proche parent. L'adultere est fort griefuement puny en la Chine. Les vsuriers aussi comme gens pernicieux à la Republique, y sont chastiez avec diuerses peines, & mesmement par la perte de l'argent presté à vsure. Seulement est-il permis aux pauvres aueugles ou estropiés d'exiger quelque chose d'interest, pour subuenir à leurs necessitez. Tous les marchands sont obligez de mettre vn tableau sur la porte de leur boutique, contenant le roolle des marchandises, qu'ils vendent, & le prix de chascune d'icelles. Les Apothicaires aussi doibuent mettre deuant leur porte, vne monstre de tous leurs simples, & les moindres Mandarins ont charge de les aller visiter souuent, pour voir s'ils en vendent des gastez ou falsifiez. Il n'est pas loisible de faire les compositions ou meslanges deidits simples, sinon quand la necessité le requiert, & n'est point permis de garder longuement ce qui est desia composé ou mellié. Il y a des gens qui nourrissent avec grand soing des oyseaux, qu'ils enseignent à chanter, & à faire tout plein de gentilleses, pour donner d'un passetemps, & puis ils les vendent couuerts ou peints de diuerses couleurs, outre la leur naturelle. Les Chinois comptent l'an de douze cours Lunaires: mais de trois en trois ans ils y en adioustent vn, pour esgaler le cours de la Lune avec celui du Soleil, comme nous faisons le Bissext de 4. en 4. ans. Ils commencent l'année à la nouuelle Lune de Mars: & ce iour-là ils font vne grande feste, pour celebrer leur nouuel an, avec toute sorte de ieux, & signes de resiouyssance. Ils s'emioient les vns les autres des presens, comme nous nous donnons les estreines au commencement de Ianuier. Ils font aussi des banquets somptueux

L'adultere & l'vsure punis.

Comme les Chinois comptent l'an, & quand ils le commencent.

prueux & manifestes, principalement de nuit, auxquels ils exhibent des Tragedies, Comedies, & autres ieux semblables, sur des matieres quelquefois prises de leurs histoires, & d'autres feintes, ou controuuées par le Poëte, pour donner du plaisir aux assistans. Les danseurs, farceurs, balleteurs, ioueurs de passe-passe, n'y manquent point : ny les instruments de Musique, tant de fleutes que autres, ny les voix aussi, qui s'accordent avec les instrumens. L'on fait durant le mesme temps, exhiber quelques ieux publics, avec grande magnificence. Les murailles & arcs triomphans sont tous couuerts de fueilles vertes, & de riches tapisseries. Les rues parsemées de fleurs & de ramées, les arbres, les fenestres, & galeries, reluysent de toutes parts, à force de salots, lanternes, & flambeaux, qu'on y met. Tout en fin resonne de voix & d'instrumens de Musique. Et c'est ainsi qu'ils festent leur an nouueau. Vn chacun aussi celebre en particulier le iour de sa naissance, avec grande ioye & allegresse, faisant des banquets, chacun selon ses moyens & commoditez.

Ils sont fort courtois & honnestes, principalement à s'entre-saluër, & à se visiter les vns les autres. En quoy ils vsent de beaucoup de ceremonies, qui sont diuerses selon la diuersité des personnes, & l'estat ou condition d'icelles. Quand les gens de qualité se saluent, ils ont accoustumé de mettre l'une des mains dans la manche de l'autre; car leurs manches sont fort larges: puis estendent en arcade toutes les deux mains ainsi ioinctes, & plient le corps iusques à terre, disant cependant force parolles de compliment. Quand ils se visitent, celuy qui est visité, donne la plus honorable main à celuy, qui le visite: laquelle en aucuns endroits est la gauche, & en d'autres la droicte. Comme ils sont entrez dans la sale, celuy qui visite, prend vne chaire, pour faire seoir le maistre de la maison: & cestuy-cy en prend vne autre pour celuy, qui le visite, chascun d'eux la mettant en lieu conuenable. Car celuy qui est visité, met la chaire de l'autre au lieu le plus honorable, qui est le milieu de la sale, & le plus esloigné de toutes les parois: prenant pour soy vne autre chaire, laquelle il met tout à l'opposite de l'autre, de façon qu'ils se puissent parler tous deux face à face. Apres qu'ils se sont dicts l'un à l'autre plusieurs belles parolles, l'on porte soudain d'un breuuage, qui est fait d'eau cuitte, avec certaine herbe qu'ils appellent *Chia*. Or ce breuuage ne doit iamais mâquer, autrement ce seroit vne gran-

*La fa-
çon de se
saluër.*

*Ce qu'ils
obseruent
en leurs
visites.*

de faute en fait de compliment. On doit porter de ce breuuege, pour le moins deux ou trois fois, auant qu'on se desparte, & avec ce on donne quelque peu de fruit, ou quelque confiture. L'on prend avec vn petit cuilier ce breuuege. Que si celuy qui visite, s'entretient vn peu d'auantage, l'on porte quelque chose de plus pour manger; mais avec tel appareil, que l'estat ou condition de la personne requiert, & que l'occasion le permet: dont toutesfois il ne prend que fort peu, si ce n'estoit à l'heure ordinaire du repas; car pour lors il mange d'auantage. Auant qu'ils se visitent, s'ils sont tant seulement amis, & non point parens, ils enuoyent tousiours deuant vn seruiteur, avec vn billet de papier, qu'ils appellent *Paître*, & signifie cartel de visite. En ce papier ils escriuent quelques lignes, par lesquelles ils font entendre leur venue à celuy, qu'ils vont visiter. Mais selon la diuersité des personnes, tant de celuy qui visite, que du visité, la maniere avec laquelle ils escriuent ce *paître*, est diuersé; c'est à sçauoir avec plus ou moins de submission. Apres que ce cartel ou billet a esté porté au logis de celuy, qui doit estre visité, & qu'on luy a fait le message, il s'appreste tout incontinent, pour receuoir l'autre, qui arriue de là à peu. Et quand ce sont personnes, qui ne se voyent gueres souuent, ils ne se seruent pas és visites de leurs habits ordinaires, mais de quelques autres faicts tout exprés, de forme assés differente. Que si par aduenture celuy, qui visite, est vestu de tel habit, & non de l'accoustumé, l'autre n'oseroit luy faire aucune courtoisie, ny mesmes le bien-veigner, auant qu'il se soit allé vestir de mesme sorte. Ce qu'il fait tout aussi tost, laissant là celuy qui le visite, sans luy rien dire, iusqu'à ce qu'il ait pris ses accoustremens de visite: & lors ils commencent à faire leurs compliments. Au despart celuy qui visite, marche deuant, & selon qu'est la qualité d'iceluy le visité l'accompagne ou plus loing, ou plus près de la porte, ou bien iusques à la rue. Et s'il vient iusqu'à là, il attend que l'autre soit monté à cheual, ou sur sa chaire: & lors tous deux haussant les bras, & mettant les mains dans les manches, prennent congé l'vn de l'autre. Soudain que celuy, qui a fait la visite, est arriué à son logis, il enuoye vn seruiteur à l'autre: & celuy qui a esté visité, en mesme temps en enuoye vn autre, pour faire les remerciemens reciproques, l'vn d'auoir esté visité, & l'autre d'auoir reçu vn bon accueil. Quand ils enuoyent quelque present à vn autre, ils escriuent dās vn *paître* tout ce, qui est con-

*Paître,
cartel de
visite.*

tenu en iceluy, avec force belles parolles; & soit que celuy, à qui il est enuoyé, le reçoive ou non, ou partie d'iceluy, tousiours il luy renuoye vn autre paître, avec des lignes rouges, & vne lettre par laquelle il remercie l'autre du present. Que s'il le reçoit, il donne au porteur d'iceluy quelque piece d'argent, & si demeure obligé à correspondre avec vn autre present, au moins d'esgale valeur, si non de plus grande.

Outre les visites & presens, ils se font encore force banquets, *comme ils si gouuernent les banquets.* esquels, s'ils sont plus magnifiques, ils mettent deuant chascun conuié deux tables, l'une de chair & de poisson, & l'autre de fruiets & de confitures. Mais quand ils ne sont pas si somptueux, ils mettent seulement vne table pour chascun, ou vne pour deux. Ils seruent en ces banquets grande diuersité de viandes fort bien apprestées & assaisonnées: lesquelles ils font mettre peu à peu sur la table, afin qu'elles se tiennent chaudes. L'invitation se fait avec vn paître, cinq ou six iours deuant, par lequel l'assignation est donnée, pour vn tel iour. Que si celuy qui est inuité ne peut, ou ne veut accepter le banquet, il fait son excuse avec vn autre paître. Mais s'il ne la fait pas, on entend qu'il l'accepte. Le iour destiné au banquet, celuy qui inuite, enuoye le matin à bonne heure vn seruiteur, pour semondre derechef l'inuité: & au temps du repas, il en enuoye vn tiers, priant le conuié de venir. Que si quelqu'un de ces trois messages manquoit, l'autre n'y iroit point. Apres qu'il est venu à la maison de celuy, qui l'a inuité, il fait beaucoup de ceremonies, principalement à refuser le lieu le plus honorable, ou on le veut faire asseoir: si qu'on demeure quelque fois bien long temps à pouuoir ranger les conuiez: vn chascun d'eux voulant, ou pour le moins faisant semblant de vouloir prendre le plus bas lieu. Ils ne mangent presque rien en ces banquets; de façon qu'ils semblent estre faicts plustost pour deuiser, que pour manger. Car ils ne prennent qu'un peu de viande, comme par compliment, & boient fort souuent avec des petits vases de porcelaine, qui ne tiennent pas chacun cinq ou six doigts de leur boisson, & tant en cela comme à parler ensemble, ils s'entretiennent les quatre ou cinq heures au banquet, s'en retournans affamez en leur maison. Le lendemain apres le banquet, chascun des conuiez enuoye vn seruiteur à celuy, qui l'a banqueté, avec vn paître, par lequel il le remercie de la bõne chere, qu'il luy a faicte. Voyla en quoy les Chinois pour la plus-part em-

*Leur fa-
çon de
manger.*

*Boivent
toujours
chaud.*

*Qu'ils
commen-
cent à
se
marier.*

ployent quasi la moytié de leur vie : c'est à sçauoir à faire des vi-
sités, des presens, & des banquets. Le temps, auquel ils s'occupent
plus en cecy c'est à leur nouuel an, & ceste feste dure 15. iours :
puis au iour de leur naissance : pareillement quand ils veulent
entreprendre quelque voyage, ou qu'ils en retournent : & pour
faire court, quasi durant toute l'année. Ils sont fort honnestes en
mangeant, car ils ne touchent iamais la viande avec les doigts :
& pour ce ils n'ont pas besoing de seruiettes, comme nous ; aussi
ne s'en seruent ils point. Toutes les viandes se mettent sur table
taillées en menuës pieces, & au lieu des doigts, ils se seruent de
deux brochettes d'or ou d'argent, d'yuoire, d'ebaine, ou de chose
semblable, avec lesquelles ils prennent fort dextrement toute
forte de viandes, pour si menuës qu'elles soiēt, qui est vne façon
de manger fort honneste, & plus aisée qu'il ne semble, mesmes
quand on s'y est accoustumé vn peu. Les tables, sur quoy ils mā-
gent, ne sont point couuertes de nappes, mais toutes peinturées
de diuers payfages, de chasse, de fleurs, d'oyseaux, & autres belles
varietez : quelques vnes aussi sont surdorées, & diuersifiées de
plusieurs figures, faictes avec de l'or, ou de l'argent. De chascue
costé d'icelles pendent iusques en bas, des pieces de soye, avec
leurs franges, & autres ornemens. Au reste les Chinois boient
toufiours chaud, & ne mangent pas beaucoup de fruiēt. Ce qui
les entretient longuement en santé, & les garantit de plusieurs
maladies & infirmittez. Il est vray qu'ils mangent volontiers des
salades d'herbes fresches, & force legumages : voire la plus grand'
part d'iceux ne se nourrist d'autres viandes : par ce quelles ne
coustent presque rien. Et il y a bien peu de gens (hors-mis les
Mandarins riches) qui mangent ordinairement de la chair, ou
du poisson ; jaçoit qu'ils aillent bien accoustrez. Leur principa-
le nourriture est de riz cuit seulement avec de l'eau, ou bien du
millet : & de cela ils se saoulent, comme nous icy de pain. Ils ont
bien du froment, mais ils n'en font pas du pain à nostre mode :
ains seulement des gasteaux ou souasses sans leuain, cuittes à la
vapeur de l'eau bouillante, & partant sans crouste. Nourriture
propre pour les vieillards & dentez. Ils sont ordinairement trois
repas le iour : l'un au matin, l'autre à deux heures ou enuiron
apres midy, & le troisieme sur le tard, quand il se fait nuit.
Mais lors ils mangent fort sobrement. Ils se marient communé-
ment en l'aage de quinze, dixhuiēt, ou vingt ans, avec vne seule

femme, & c'est leur legitime mariage. La femme ne dōne point de dot au mary, ains au contraire le mary à la femme : laquelle en peut disposer comme bon luy semble. Et d'ordinaire le donne à son pere, ou à sa mere : tellement que ceux qui ont plus de filles, sont estimez plus riches, & plus heureux, tout au rebours de ce qui est par deçà. Le iour des nopces l'espouse s'en va à la maison de l'espoux, portant publiquement, ou faisant porter devant soy, toutes ses robbes & meubles de maison. Outre ceste femme legitime ils en peuuent tenir d'autres, & ce autant qu'il leur plaist. Ils achèptent celles-cy ordinairement, & quand bon leur semble les vendent. Mais ils ne peuuent se marier avec les parentes d'icelles, ny avec quelque autre, qui ait le mesme surnom, bien qu'elle ne tienne en rien de parentage à l'autre qu'ils ont venduë. Si leur femme legitime a des enfans, ils succedēt les premiers à l'heritage du pere: mais si elle n'en a point, & que les concubines en ayent, les enfans d'icelles succedēt aussi bien, que s'ils estoyent legitimes: & d'estre enfans de concubine, ne blesse en rien leur honneur. La plus-part des Chinois vsent de tel libertinage: & c'est l'un des principaux empeschemens, qu'ils ayent à recevoir la foy de IESVS-CHRIST, notamment les Mandarins, & autres gens riches, qui sont plus addonnez à leurs plaisirs que le reste. Car il est besoing d'une particuliere assistance de la diuine grace, pour leur persuader qu'ils chassent hors de leur maison ces amorces de peché. Somme que les Chinois, parlant en general sont gens voluptueux, & addonnez à toute sorte d'impudicité: mesmes au peché qu'on appelle contre nature; si qu'ils n'ont aucune honte de le commettre: ains, qui pis est, s'en glorifient. De là vient qu'ils sont si desireux de prolōger leur vie, pour iouir plus long temps de leurs plaisirs charnels: n'ayans aucun soucy ny pensément des biens spirituels & eternels de l'autre vie. Plusieurs, mesmes des plus graues personnages, cuydans pouuoir par artifice prolonger leur vie, prennent à cet effect vne infinité de medecines, qui les aydent plustost à l'accourcir. Ils ont force liures escrits de la maniere de conseruer la santé, & plusieurs personnes d'autorité & de moyens, font profession d'enseigner cet art. Voire on en trouue qui se ventent, & veulent faire croire, qu'ils sont plus vieux qu'ils ne sont: affin de gaigner en cela plus de credit. Et de fait plusieurs leur prestent l'oreille, comme si c'estoyent gens descendus du Ciel: afin d'apprendre d'eux quel-

*Sus fort
volu-
pueux.*

*Taschèt
de pro-
longer
leur vie
par ar-
tifice.*

que recepte, avec laquelle ils puissent viure longuement. Car en cela mettēt-ils la pluspart de leur felicité. Il y a encore beaucoup de gens d'auctorité & de moyens, qui ont bien auant empreinte en leur teste vn' autre grande folie; c'est de s'estudier à trouuer l'art d'Alchimie, ou, comme nous disons, la pierre philosophale, pour pouuoir transmuier quelques autres metaux en or, ou en argent. On trouue force liures escripts de cela, & plusieurs y consument tout leur aage, & le peu d'argent qu'ils ont, frustrez de leur attente; mais non ja destrompez, ny persuadez de n'y pouoir atteindre: ains ils disēt, que le sort heureux de trouuer cet art, ne leur est encore escheu, à cause que leur heure n'est pas venue, laquelle ils attendent avec grande esperance, ieusnans à ceste occasion plusieurs années. Si grande est leur folie & auuglement. Vn chascun peut prendre ou exercer tel office ou estat que bon luy semble, sans estre obligé de suiure celuy de son pere, comme quelques vns ont voulu dire, & pource tous ceux qui veulent estudier, ou prennent tell' autre vacation qu'il leur plaist. Le seruice des chambrieres & des seruiteurs leur couste fort peu, à cause de la multitude de gens qu'il y a, tellemēt qu'on ne donne ordinairement qu'un escu l'an de salaire à vn seruiteur, avec la despence, sans le vestir. Les pauures gens (dont il y a tres-grand nombre) vendent bien souuent leurs enfans & filles, & ce à si vil prix, qu'un ieune garçon de douze ou quinze ans, n'ayant aucune defectuosité naturelle, s'achepte ordinairement pour trois ou quatre liures tournoises: & en temps de cherté encor à meilleur compte. Or c'est vne chose fort commune parmy les Chinois, que de se seruir d'esclaues, iasoit qu'ils les traictent assez bien, & les marient à leur temps.

*Des ser-
uiseurs
d'escla-
ues qu'ils
ont.*

Ils sont extremement curieux de sçauoir des nouuelles, lesquelles ils s'escriuent les vns aux autres, & les font imprimer bien souuent: de sorte qu'elles courent en peu de temps par toutes les Prouinces. Ils ont esté par cy deuant, & sont encore fort soigneux d'escrire leurs annales ou histoires: de maniere qu'ils en ont qui contiennent les choses aduenues depuis quatre mil ans en ça, ou d'auantage, selon leur compte. Combien que suiuant iceluy il faudroit dire que beaucoup plus d'années sont passées depuis le deluge (duquel ils ont quelque cognoissance) que nous n'y en mettons. Car ils comptent depuis le deluge vniuersel iusques à ce siecle de 1600. plus de six mil ans: & toutesfois ceux

*De leurs
histoires.*

qui en escriuent parmy nous, avec plus de probabilité, n'en mettent pas plus de trois mil neuf cens quarante cinq, & suyuant le calcul des 70. interpretes, qui est le plus lōg, il n'en y a que 4351. Au reste leur histoire celebre fort aucuns de leurs Roys, qui ont esté si gens de bien, que peust estre auront-ils esté sauuez en la loy de nature, veu les heroïques actes de vertu qu'ils ont faict, s'il faut croire à ce qu'on en trouue escrit en leurs liures. Car d'ailleurs on ne sçait point qu'ils ayent esté addonnez à l'idolatrie: ains plustost qu'ils ont faict profession de l'adoration d'un seul Dieu. De ceux-cy il en y a eu qui n'ont pas voulu laisser leur Royaume à leurs enfans: parce qu'ils iugeoyent n'estre pas capables de le bien regir & gouverner, aymans mieux le laisser à quelqu'autre le plus vertueux & idoine, qu'ils sçauoyent choisir. Ez ventes & achapts, les Chinois ne se seruent point d'or, bien qu'ils en ayent beaucoup: mais d'argent seulement, lequel ils ne battent pas en monnoye, ains en plaques: & quand ils veulent acheter quelque chose, ils en coupent, ce qui leur faict besoing, & le pèsent avec certains poids fort petits, semblables à nos trebuchets. A ceste cause, tous ceux qui veulent acheter ou vendre, portent tousiours quant & eux un de ces trebuchets. Ils ont aussi esgard de combien de carats est l'argent: car l'un vaut plus que l'autre, selon l'affinage d'iceluy. Ce qui a esté fort necessaire pour obuier aux fallaces & tromperies qu'ils y feroient autrement. Car ils sont pour la plus-part maistres passez en l'art de tromper. Ils se seruent aussi de monnoye de cuyure, auquel pareillement ils font distinction du plus fin, avec l'autre qui ne l'est pas tant: veu que par tout ils taschent de faire quelque meslage, ou deception. Mais à tant de cecy: parlons maintenant du Roy, & de sa façon de gouverner.

Roys de la Chine qui ont esté sort ver-tueux.

Des grandes richesses qu'a le Roy de la Chine, & de la police qu'il fait obseruer en son Royaume, avec les commoditez ou inconueniens qui s'en ensuyuent.

CHAPITRE XVI.

Le Roy de la



Le Roy de la Chine (si nous croyons à ce que la pluspart des auteurs en escriuent) est le plus riche Monarque qui soit au monde: voire (selon le dire du P. Alexandre Valignan, qui a veu les comptes, & les

Chine le plus riche Prince du monde.

roolles des tributs, que chasque ville luy paye) il a plus de reuenu que n'ont tous les Roys & Princes de l'Europe ensemble, encore peut estre (adiouste-il) qu'on y comprenne ceux de l'Affrique. Pour preuue de ce, il rapporte ce qu'il leue tant seulement de deux sortes de tribut, laissant le reste à part. L'un consiste en ce, qu'on paye par teste, qui est trois mazes de leur monnoye, dont chacun vaut dix sols de celle de France: tellement que ce sera trente sols tournois, que paye vn chacun de ceux, qui sont taillables: lesquels, selon le denombrement des habitans de la Chine, qui a esté fait cy dessus, montent à plus de septante millions; si que de ce seul tribut il reçoit plus de trente cinq millions d'or, selon ce compte. Toutesfois il en y a qui disent, qu'ils ne payent que deux mazes par teste, & suyuant cela le tout viendroir à vingt & trois millions, six cents soixante & trois mille escus, ou enuiron.

La seconde espèce de gabelle, qui se prend sur toutes les choses, ou que la terre porte, ou qui sont faites par la main des hommes, se monte, comme dict le mesme Pere, iusques à vingt & six millions, si bien que de ces deux sortes de tribut, il reçoit plus de cinquante ou soixante millions. Il laisse à part, ce que luy valent les douanes, les ports & peages: brief tout ce qu'on prend sur les marchandises, qui entrent ou sortent des villes. On tient que la seule Prouince de Canton, en laquelle les Portugais traffiquent, luy apporte tous les ans trois mille pies d'argent, qui valent sept milllons & quatre cents mille escus. D'où l'on pourra iuger ce qu'il peust retirer des autres Prouinces. L'obmets aussi ce qu'il tire des mines d'or & d'argent, ou d'autres mineraux, que nous auons dict y auoir, comme aussi de la pesche des perles, & de la pierrierie, de l'ambre gris, du musc, des porcellaines (qu'on trouue monter iusques à treze millions d'or) & de beaucoup d'autres choses, parce que l'on n'a peu sçauoir encore au vray le tout. Neantmoins eu esgard à ce qu'a esté dict de l'affluence du peuple, des marchandises & des biens de la terre; considéré aussi qu'en tout ce Royaume il n'y a personne qui leue aucun tribut, gabelle, ou peage, que le Roy seul, ny ayant point des Ducs, Côtes, Marquis, Barons, ou autres Seigneurs, qui ayent sous soy des vassaux; le tout calculé, ceux-là parlent avec beaucoup de reserue, qui disent le reuenu de ce grand Monarque arriuer à six

60 reue-
nu est de
320. ou
350. mil
liars d'or.

vingts millions d'or, qui est autant, que l'Empereur Vespasian durant

durant tout le temps de son Empire, bié que fort aspre à recueillir l'or & l'argent, peut laisser dans les coffres de l'espargne. Le P. Pantoja parlant de cecy en sa lettre dict ainsi. Le reuenu de ce Roy sans doubte est fort grand, & si nous ne l'eussions tiré de leurs liures, esquels il est marqué exactement poinct par poinct, ie n'oseroiy le dire: non pas que ie ne sçache que cela est ainsi, car d'autant plus qu'un homme cognoist des choses de ce Royaume, tât moins en doubte-il, mais parce qu'avec tout cela, il sera difficile de le faire croire à ceux, qui ne l'ont pas veu. Or tout compte fait, sans beaucoup de peine, l'un an portant l'autre, il arriue à cent cinquante millions d'or, soit en argent, soit en autres choses, combien que la plus grand part est en argent. Et celuy qui considere la grandeur de ce Royaume, & comme l'on paye tribut au Roy des personnes, des terres, des arbres, & de tant d'autres choses, & qu'aucun, hors-mis luy, n'en peut exiger, n'estimera pas qu'il y a de l'excés. Iusques icy sont ses parolles.

En la ville capitale de chasque Prouince il y a vne maison, ou l'on tient toutes les finances qui se leuent en ceste Prouince là: mais le principal thresor est à la ville Royale de Paquin, de laquelle il nous faut maintenant traicter, puis que c'est l'habitation du Roy ordinaire. Quelques vns estiment, que c'est la mesme que Marc Paul Venetien appelle *Quinsai*, qui signifie à son dire cité du ciel, luy donnant vne assiette de trente deux lieuës en quatre, huiët de chasque costé, qui est (ce disent-ils) la grandeur de Paquin, combien qu'à present ils estiment qu'elle est plus grande, que quand Marc Paul y fust: parce que depuis la Cour du Roy y a esté changée. Ils veulent prouuer leur dire par le nom de la Prouince, qui est Quincij. Car souuent les Chinois donnent le nom de toute la Prouince à la principale cité d'icelle, ainsi qu'a esté dit cy dessus. C'est donc l'opinion d'aucuns. Mais sauf meilleur aduis ie pense, que ce ne peut estre ceste ville là: parce que le mesme Marc Paul tesmoigne, que c'estoit lors la demeure ordinaire du Roy: & toutesfois les Chinois assurent, qu'il ne s'est pas changé à Paquin, si non depuis que les Tartares prindrent la Chine, qui fut lors, que Marc Paul y estoit. Et partant il faudroit dire, que c'est plustost Nanquin que Paquin. Mais quoy qu'il en soit de cela, il est au moins assuré que ceste ville de Paquin est à present autant ou plus grande que Nanquin, & que pour la traueser de porte en porte, il faut qu'un homme à cheual chemine

*Ville de
Paquin
& sa
gran-
deur.*

toute la journée, sans y comprendre les faux bourgs. Brief les Chinois en disent tant de choses, sans se contredire l'un l'autre (signe qu'ils disent vray) qu'on n'ose toutesfois les escrire, de peur qu'on ne les trouue incroyables. Le Roy a icy vn tres-grand & magnifique Palais, emmâtélé de trois enccintes de muraille tres-hautes & tres-fortes. Au dedans duquel il y a (comme disent quelques auteurs) quinze hostels, qui sont autant de Palais tous distincts, selon le nombre de Prouinces du Royaume. En chacun d'iceux (suyuant leur dire) outre le logis qui est fort magnifique, l'on trouue des vergiers, des parcs, des iardins, estangs, bois, & autres lieux de plaïssance: le tout representant le plus naïfvement, qu'il est possible, le país de chasque Prouince: afin que le Roy ait comme vn portraict, ou petit abbregé de tout son Royaume, dans l'enclôs mesme de son Palais. Ils adioustent encore, qu'on y compte en tout soixante & dixneuf sales fort belles & magnifiques, basties avec toutes les proportions & embellissemens de l'Architecture, qu'on puisse excogiter: mais quatre entre autres, qui surpassent le reste. L'une d'icelles a les parois & le plancher tout couuert de lames de cuyure, fort artistement elabouré d'une infinité de belles figures & fueillages. La seconde est toute reuestuë de lames d'argent tres fin, & bien ouuragé. La troisieme est semblable aux autres quant à la façon: mais les parois & le lambris sont tous couuerts de lames d'or esmaillé. La quatrieme & la plus riche de toutes est faicte à la Mosaique, & de marqueterie d'un prix inestimable. Car il y a une infinité de rubis, esmeraudes, & autres pierres precieuses, enchassées tout à l'entour des parois, & au plancher mesme. Ils adioustent encore, qu'en ceste cy il y a une chaire pour le Roy, de valeur incroyable. Car on y void des escarboucles & autres pierres precieuses si grandes, & si resplandissantes, qu'en la plus grande obscurité de la nuict, elles rendent la sale aussi lumineuse, que s'il y auoit plusieurs chandelles allumées. Or dans ces sales (ce disent-ils) le Roy a accoustumé de receuoir les Ambassadeurs des Roys & Princes estrangers: & là il leur donne audience, selon la qualité de ceux, de la part, desquels ils viennent, ou en la premiere sale, ou en la seconde, ou aux autres deux plus riches: de maniere que si l'embassade vient de la part d'un Roy, qui n'est pas si puissant, on luy donne audience en la premiere, & s'il a plus de pouuoir en la seconde, & ainsi consequemment. C'est ce qu'en ont escrit quelques auteurs,

*Quatre
sales
tres-
riches
qu'on dit
estre au
Palais
du Roy.*

mesmes des plus graues de nostre temps. Toutesfois le P. Pan-
 toja, qui a esté dans ce Palais mesme, non pas seulement vne fois, *Mas-*
 mais plusieurs, & en a veu vne grande partie, & ouy de ceux, qui *seus*
 y demeurent dedans, beaucoup de choses, assure, que ce ne sont *lib. 6.*
 que fables, & que iusqu'à present, il n'auoit ouy parler aux Chi- *hist.*
 nois de ces sales. D'ailleurs le Roy (dit-il) n'a point accoustumé *Ind.*
 de donner audience aux Ambassadeurs des autres Roys, ny se *Jeau*
 monstrer aux estrangers, voire encore ny aux siens, si non rare- *Gonzal.*
 ment. Car c'est vne maxime fort reçeüe entre les Chinois, que *lin. 3.*
 le Roy ne doit presque iamais se laisser voir : afin de conseruer *6. 2.*
 tousiours son auctorité & grandeur. Et de fait il ne se mōstre *p. 1.*
 qu'à quelques vns des plus grands Mandarins de sa Cour. Quant
 au Palais, il dict qu'à la verité il est tres-grand, & le mieux basty
 qu'edifice aucun qu'il ait veu encore en la Chine : combien que
 pour l'excellence de l'Architecteure, plusieurs bastiments de no-
 stre Europe le surpassent. Il est enuironné de trois murs en quar-
 ré : le circuit du premier sera aussi grand qu'une grosse ville : en-
 tre le premier & le second mur, sont basties tout autour force
 maisons, pour les Eunuques, qui seruent és offices les plus vils de *Descri-*
 la maison, comme des portiers, palefreniers, & autres semblables. *Palais*
 Entre le second & troisieme mur, il y a plusieurs corps de logis, *Royal.*
 qui sont fort hauts, & aussi longs qu'est la carriere d'un cheual.
 Ils n'ont point d'habitation par dessous : car ils sont appuyés
 sur vne grosse muraille de brique, qui est aussi longue & espaisse
 que le bastiment est long & large. L'on void là de belles portes,
 faictes de pierre de marbre fort bié taillées, pour passer d'un lieu
 à l'autre. Ceste muraille sera esleuée de terre huit brasses ou
 enuiron : & là dessus sont basties des chambres avec des galeries
 ou promenoirs, & quelques sales. Les galeries sont de bois, avec
 des jalousies, & embellies de peintures fort agreables à veoir. Le
 toict encore est tres-beau, & les tuyles mieux faictes, que ne sont
 les nostres, & si bien ioinctes, que le toict semble estre tout d'un
 seule picce. Elles sont enduictes d'un certain verniz de cou-
 leur iaune : parce que telle est la couleur du Roy. La riuierre pas-
 se entre ces murailles, & arriue insqu'au milieu de Palais : de fa-
 çon que toutes les prouisions de la maison Royale, se deschargēt
 dans le pourpris d'icelle : & pour passer de l'une part à l'autre, y
 a force ponts de marbre. Entre ces deux murailles sont les mai-
 sons ou demeurent les principaux Eunuques, qui seruent le Roy :

& plusieurs logent ensemble dans vne mesme maison, mais chacun à part, comme des Collegiats en vn College. Il y a encore entre ce second & troisieme mur des bois, des vergiers, & autres lieux de plaissance, là ou le Roy va quelquesfois prendre ses esbats; car l'espace est fort grand. Le P. Pantoja pour venir iusques icy, afin d'enseigner aux Eunuques, qui se tiennent en ce quartier, ce que nous dirons cy apres, passoit (ce dit il) huit grands Palais, & croyoit que de l'autre costé en y auoit autant ou plus. Apres cecy s'ensuit le troisieme mur, qui enuironne le Palais ou le Roy demeure avec ses femmes & enfans: ou autre personne n'entre, » que ceux qui le seruent immediatement. Et jaçoit (dit le mesme » Pere) qu'on tiennne que c'est vne tres-belle piece, & digne d'estre » veuë; toutesfois ie n'en puis rien assurer au vray, si non tant seu- » lement, qu'estant en la maison des Eunuques, qui estudient aux » Mathematiques, ie montay plusieurs fois sur vne grande tour, de » laquelle on peut veoir les toits du Palais du Roy, avec ses iar- » dins & vergers; d'ou ie iugeay, que c'estoit le plus grand Palais & » maison Royale, que i'eusse veu en ma vie. Voila ce qu'il en rap- » porte.

*La suc-
cession à
la cou-
ronne à
qui ap-
partient.* Le Roy n'a qu'une seule femme legitime, laquelle s'appelle Roynne; mais il a vn grand haraz de concubines, les enfans desquelles succedent à la couronne, si la Roynne n'en a point. Ce qui arriue souuentefois; & mesmes le fils aîné du Roy, qui regnoit l'ã 1600. bië qu'il ne fut pas de sa legitime femme, auoit esté déclaré successeur de la couronne. Or apres que quelqu'une de ces femmes est entrée dans le Palais du Roy, pour estre sa femme ou concubine, elle est si estroitement gardée, qu'il n'y a nonnain, parmy nous, si recluse, qu'elles sont. Car des-lors qu'elles y mettent le pied, toute esperance leur est ostée d'en sortir iamais, ou au moins, tandis que le Roy viura, & de voir leur pere, mere, freres, sœurs, & parents. On fait le choix d'icelles, ayant esgard seulement à la beauté exterieure, & aux bonnes mœurs; car pour la noblesse, il n'en faut point parler. Ils ont vne coustume fort barbare, pour le regard des enfans du Roy, qui ne luy doiuent pas succeder. C'est, qu'aussi tost qu'ils ont déclaré l'aîné successeur legitime de la couronne, faut que tous les autres vuydent du Palais: d'ou ils sont conduits es lieux, que le Roy leur assigne, & là ils sont seruis comme Roys, iusques à la troisieme generation; mais ils ne voyent iamais plus ny pere ny mere, ny leur

*Enfans
du Roy
qui ne
doibuent
succeder
à la cou-
ronne,
comme
traictés.*

frere aîné : de façon qu'il y a beaucoup de pleurs & de larmes, tant du costé des meres, que des enfans, lors qu'il faut faire ceste separation. Le Roy donne honnestement dequoy à ses enfans, pour viure à leur aise : mais ils n'ont aucun gouuernement ou maniement des affaires : (afin qu'ils ne puissent brouiller les chartes) bien que tous les Magistrats leur portent grand honneur & respect. Les descendans de ceux-cy sont tousiours tenus & estimez de sang Royal, encore que la pluspart soyent assez pauvres. Car l'aîné seulement succede à tous les biens paternels, & les autres n'ont qu'une legitime assez petite. Quant aux autres aliez, comme les maris des sœurs, filles ou parentes du Roy, iacoit qu'ils ayent ce qui leur faict de besoing pour viure honnestement, n'ont toutesfois aucune prerogatiue ny auctorité pour cela : & sont beaucoup moins que les Mandarins : de maniere qu'ils taschent de paruenir à quelqu'un de ces estats, par le moyen des lettres, ainsi que sont les autres : car ils n'en sont pas forclos, comme les enfans des Roys. En toute la Chine il n'y a point d'autre noblesse que ceste-cy, d'estre yssu de sang Royal, & si n'en fait-on pas grand compte : tellement que les enfans des Roys se marient puelle mesle avec les filles des Mandarins, & autres qui ne sont pas de noble race. Les seruiteurs tant du Roy, que de la Roynne, & des autres, qui demeurent au palais Royal, sont tous Eunuques. Service à la verité indigne d'un tel Prince. Car tous ces Eunuques, sans en excepter aucun, sont yssus de parens de basse condition, s'il en y a en tout le Royaume. D'autant que les peres ou meres ne pouans nourrir leurs enfans, pour estre fort pauvres, les coupent lors qu'ils sont encore ieunes, avec esperance qu'ils entreront vn iour au service du Roy : combien que souuent ils meurent en ceste cruelle incision, à cause de la douleur extreme, qu'ils endurent. Car ils les coupent tout rasibus la verge mesme.

*Le serui
ce du
Roy est
tout
d'Eunu-
ques.*

Or comme ces enfans ont esté mal nourris & esleuez, ils sont pour l'ordinaire gens d'un cœur vil & abiect : & quand ils sont montez à quelque grade d'honneur, ils sont superbes à outrance, & du tout insupportables. L'eslité d'iceux, à fin d'en subroger d'autres en la place de ceux qui meurent, se faict en ceste sorte. Comme l'on sçait par toute la Chine, le temps auquel cela se doit faire, ceux qui ont de tels enfans, les meinent à Paquin, tellement qu'il en y aura quelquesfois plus de vingt mille. Un Mandarin fort graue (auquel appartient de pouruoir à tout ce

qui concerne la personne du Roy.) & vn Eunuque des plus anciens & fauoriz d'iceluy, les considerent tous vn chascun à part, & regardent nommément s'ils ont vn beau visage, ou entrent, & la langue bien desployée: dont ils font l'espreue sur le champ, leur faisans prononcer deux mots, ausquels ils s'entre-couppent, s'ils n'ont la langue à leur commandemēt. Apres qu'ils ont choisi ceux qu'ils veulent, ils les menent au Palais, ou ils les mettent en diuers offices, mais de premier abord, ils les font seruir comme de laquais aux Eunuques plus anciens, qui sont bonne preue de leur patience, & celuy qui monstre auoir de l'esprit & de l'industrie, est apres quelques années poussé en auant, & employé en choses plus grandes. Il en y a de ceux-cy, qui s'estudient par le commandement du Roy aux Mathematiques, desquels le P. Pantoja, qui a souuent traité avec eux, diēt, qu'ils y sçauent fort peu: mais ils sont obligez de veiller toute la nuit, chascun à son tour, pour contempler les astres, & voir s'il apparostro de nouveau quelque comete, ou estoile non plus veüe au Ciel, pour en faire soudain le rapport au Roy, & luy en dire la signification, comm' ils la sçauent. Brief tous ces Eunuques seruent le Roy à guise d'esclaves, suiuaus en tout & par tout sa volonté, & faisans tout ce qu'il leur ordonne, soit bien, soit mal. Aussi les fait-il chastier comme serfs, & quelquesfois pour bien peu de chose fort rigoureusement, mesmes celuy qui regnoit l'an 1600. Car il estoit fort meschant & cruel, si qu'il en auoit fait mourir plusieurs, comme l'on disoit, à force des coups de fouët, qu'il leur faisoit doner, pour le moindre desplaisir qu'il en eust receu. Or bien que la pluspart de ces Eunuques soyent tels qu'auons diēt: si est-ce qu'il en y a d'aucuns qui sont fort honnestes gēs, & biē aduisez, dont le Roy se sert pour la despesche des affaires de plus grand' importance. Il ne leur donne pas grande chose pour leur entretenement; toutesfois avec cela ils vont fort braues, portans habits de soye, contrepoinctez & diuersifiez de plusieurs couleurs. La façon de leur bonnet est particuliere & differente de tout le reste. On tient qu'ils sont plus de seize mille dans le Palais Royal. Voila avec quelle sorte de gens le Roy de la Chine conuerse ordinairement, de façon qu'il n'est pas de merueille, s'il mene vne vie toute engouffée en delices, & si effeminée, puis qu'il n'a auprès de soy autres personnes que femmes, enfans, & Eunuques. Car il ne sort iamais de son Palais, ou à tout le moins

fort rarement. L'on diët qu'il s'est ainsi retranché, & comme cōdamné à perpetuelle prison, pour ne donner occasion d'attenter sur sa personne, ou bien afin que ses subiects l'honnorent, & le respectent d'avantage, craignant d'estre mespris d'iceux (cōm'il est croyable qu'il seroit) s'il se rendoit familier à eux. Car le cōmun proverbe, qui diët, que la trop grande familiarité engendre mespris, est d'ordinaire verifié és gens de peu de vertu, & de valeur: mais non pas en ceux, qui ont l'un & l'autre. Finalement il en y a qui estiment, que c'est pour faire paroistre plus sa grandeur: d'autant que les choses, que nous voyons rarement nous semblent plus grandes & admirables. Quand il est necessaire que quelqu'un parle au Roy, il n'entre point au lieu ou est sa Majesté: mais en un autre, proche de quelque sale ou chambre, dont le Roy le peut ouyr. Et lors il diët tout haut, ce qu'il luy veut faire sçavoir. Quelquefois le Roy luy respond par soy mesmes, d'autres par quelqu'un de ses Eunuques. Si quelque autre Prince ou Monarque luy enuoye vne Ambassade, le P. Pantoja diët que les Chinois n'admettent point celuy qui l'apporte comme Ambassadeur: car ils estiment qu'il n'y a Roy au monde, qui puisse traiter avec le leur, par voye d'Ambassade: (si grande est l'opinion qu'ils ont d'eux mesmes) mais ils le reçoient en tant qu'il porte à leur Roy quelque present, soit en don, soit pour recognoissance. Que s'ils y vont pour traiter de quelque effaire d'importance, comme firent les Japonnois ces années passées, quand ils l'allerent trouver pour faire paix & accord par ensemble, le Roy ne se laisse point voir, mais les affaires se traitēt par main tierce, à sçavoir par l'entremise de quelque Mandarin, qui rapporte au Roy, ce que les Ambassadeurs demandent, & la responce qu'il veut leur estre faicte. Toutesfois il en y a qui assurent, que les Ambassadeurs des autres Roys ou Princes, sont receus comme tels, avec grand honneur & courtoisie, & que le Roy leur donne audience en quelqu'une de ces quatre sales, qu'ils disent estre si magnifiques. Il est au moins assuré, que tous les Ambassadeurs qu'ils admettent dès qu'ils entrent au Royaume, sont desfrayez: au despens du Roy, & logez en ses hostels, qu'il y a en chaque ville, & s'ils viennent de la part de quelque grand Prince ou Monarque, ils ne parlent pas aux Mandarins à genoux, comme font les autres, qui sont enuoyez de la part de quelque Lieutenant de Roy, ou d'un petit Prince. Mais si tost qu'ils arriuent à la premiere

*Comme
traitēt
les Ambassa-
deurs avec luy.*

*Hist. de
la Chine
t. par. 1.
3. c. 2 52*

ville, tant les vns que les autres, sont là retenus par le Gouverneur, qui leur baille des gens de garde, les faisant au reste pourvoir de ce qui leur fait besoin, & cependant il aduertit le Viceroy de la Prouince, & cestuy-cy le conseil Royal, sans le congé duquel ils ne peuuent passer outre. Au retour ils sont pareillement desfrayez par tout le chemin, & ne payent rien ny pour la voiture des presens, que le Roy leur a fait, ny pour les marchandises qu'ils ont achepté (dont il y aura quelquefois plus de mille balles) comm' aussi celles qu'ils y ont apporté en venant ne leur ont cousté rien de port ny de peage: & pource les marchands se messent volontiers avec ces Ambassadeurs, pour le grand profit qu'ils en retirent.

Magistrats de la Chine appellez Mandarins sont de deux sortes. Nous auons veu iusqu'à present, ce qui concerne la personne du Roy & de sa maison; traitons maintenant de la police qu'il faiet garder en son Royaume, & premierement des Magistrats. Il faut donc sçauoir, qu'ils ont en la Chine deux sortes de Magistrats, qu'ils appellent Mandarins; l'une est des gens lettrez; l'autre des gens de guerre: entre lesquels il y a grande difference: car l'office des Lettrés n'est pas successif ny perpetuel, ains dure seulement trois ans pour l'ordinaire: combien que s'ils ont deüemēt exercé leur charge, ils sont promeus à vn plus haut degré: mais s'ils ne s'y sont pas bien comportez, l'on ne leur dōne point d'office: tellement qu'ils se retirent à leur maison, demeurās là comme

Quelle difference y a entre les Mandarins lettrez & de guerre.

personnes priuées. Mais au contraire les estats des Mandarins de guerre sont perpetuels, & ausquels on succede de pere en fils, ainsi qu'à l'heritage. En outre les Mandarins lettrez n'exercent point de charge en leur pays, de peur que la faueur des parens & amys ne les face fouruoyer du droict sentier de la iustice. Mais au contraire ceux de guerre sont ordinairement constituiez Capitaines en leur pays, à cause que l'amour d'iceluy encourage vn homme d'auantage à s'exposer aux dangers pour l' defence d'iceluy. Or ces Mandarins de guerre ne sont que de Capitaines, ayans commandement sur quelque nombre de soldats plus ou moins, selon que leur degré porte: mais ils sont soul-doyez du Roy, avec tous leurs soldats, soit en temps de paix ou de guerre. Toutesfois l'on n'en tient pas grand compte, principalement en comparaison des Mandarins lettrez, lesquels sont en la Chine cōme des Demy-Dieux. Il y a vn grand nombre de ces Mandarins lettrez en la Chine: mais les principaux sont huiet,

comme

comme disent quelques vns, ou six tant seulement, selon que d'autres escriuent. Ce sont les Presidés des six Conseils Royaux, ainsi appellés, parce qu'ils suyuent tousiours la Cour du Roy. *Six Presidés de*
 Le premier est celuy, auquel appartient d'establiir tous les Mandarins du Royaume, d'esleuer à plus haut degré ceux, qui le me- *seils.*
 ritent, & selon qu'ils le meritent; de chastier ou abbaïsser ceux, qui ne se comportent pas bien en leur charge. Et d'autant que cestuy-cy a vn si grand pouuoir, les Chinois l'appellent le Mandarin du ciel. Car c'est luy, qui propose au Roy ce qu'il luy plaist, touchant ces choses là, & le Roy les cōfirme toutes d'ordinaire, selon que cestuy-cy veut: tellement qu'il n'y a Mandarin en tout le Royaume, pour si petit qu'il soit, lequel ne soit pourueu par le Roy, selon le rapport de ce President. Le second a soing, du culte de leurs Idoles ou faux Dieux, & des Sacrifices qu'on fait tant à l'honneur d'iceux, que des trespassez: comme aussi des ceremonies, qui se doibuent garder és principales actions, qui concernēt la personne du Roy: comm' est à publier celuy, qui le doibt estre, & declarer successeur de la couronne le fils aîné du Roy, ou celuy à qui cela appartient: Item à marier l'un & l'autre, & choses semblables. Le troisieme est le President du conseil de guerre, auquel touche de proposer au Roy, quand il est question de faire la guerre à quelqu'autre Prince, ou d'enuoyer des flottes & armées contre les courfaires, ou voleurs. C'est luy aussi qui donne charge aux Vice-roys des Prouinces, & Gouverneurs des villes, de faire assembler ces flottes ou armées; brief tout ce qui concerne le faict de la guerre. Le quatriesme est comme le grand Maistre des finâces du Roy: qui a soubs soy tous les Thresoriers. Le cinquiesme a charge des fabriques, tant des Palais Royaux, & Hostels, qu'il y a en chasque ville pour les Vice-roys, Mandarins, & Ambassadeurs, que des murailles des villes, & bastimens publics. Le sixiesme est le President du Conseil de Iustice, auquel appartient de vuyder les causes criminelles, & à cōstituer des Viseurs par toutes les Prouinces, pour donner les sentēces de mort. Outre ces six Conseils, il y a seulement vn degré de Mandarins, lesquels parlant absoluēment, sont les plus grands de tous. Car le Roy consulte avec eux tout ce, qu'il doibt faire, tant en vne matiere, qu'en l'autre. Et c'est à mon aduis celuy, qu'on appelle le Conseil Royal. Or bien que ceux-cy soient estimés riches, & le soyent vrayement au respect des Chinois, si est-ce qu'aucun

*Conseil
Royal.*

d'iceux ne peut estre parangonné en richesses avec vn Seigneur de tiltre, comme est vn Duc, vn Comte, ou autre semblable de nostre Europe. Car la rente qu'ils ont du Roy est assés petite, & leurs seruiteurs sont gens de bas aloy, & de peu de lustre; mais ils sont fort respectés & obeys d'un chacun; & non seulement la simple populacc leur parle à genoux, mais encore tous les autres Mandarins. Quât à la multitude de ces Magistrats, c'est vne chose presque incroyable à ceux qui ne l'ont veuë: voicy ce qu'en escrit le P. Pantoja. Il y a (dit-il) vn grand nombre de Mandarins en toutes les cités, mais aux Cours de Nanquin & Paquin, c'est vne chose exorbitante. Car en ceste-cy, outre les Mandarins de guerre, desquels on ne faiët pas tât d'estime, & outre ceux qui y viennent continuellement de toutes les Prouinces pour des affaires, les Mandarins ordinaires de ceste Cour & cité de Paquin, seront plus de deux mil cinq cens, tous lesquels donnent audience deux fois le iour. Mais laissant à part ceux, qui sont à la Cour, parlons des principaux, qui sont dispersez par tout le reste du Royaume.

*Mandarins principaux
de chasque Prouince, & leur office.*

En chasque Prouince il y a vn Vice-roy, qu'on appelle *Tutan*: lequel à charge du gouuernemēt d'icelle, & y exerce toute puissance, comme Lieutenant de Roy. Il a la cognoissance de tout ce qui se faiët de consequence en sa Prouince, & decide beaucoup de choses de soy mesme, aduertissant le Roy par lettres de ce qui se passe. Apres cestuy-cy vient le Thresorier general des finances, qui est aussi des Mandarins lettrés, & tient le second rāg apres le Vice-roy. Il a charge de faire amasser & de garder les rentes & reuenus, que le Roy tire de toute la Prouince, ayant soubz soy vn' infinité d'Officiers, & de gens deputés à cela. Il est encore tenu de payer les pensions annuelles, que le Roy donne à tous les Mādarins, & les soultes des gēs de guerre, brief il a soing de tout ce qui appartient aux fināces. Le troisieme est celuy, qui iuge des procēs, tant ciuils que criminels, avec le conseil de ses Aïsseurs, condamnant les coupables aux peines, qu'il estime meriter, excepté qu'il ne donne point sentence de mort, mais c'est vn visiteur, duquel nous parlerons bien tost. Le quatrieme est celuy, qui a charge de maintenir la Prouince en paix, la garantir des voleurs ou coursfaires, & qui fait leuer les armées, equiper les flottes, quand il en est de besoing. C'est luy aussi qui a soing qu'aucun estrangier n'entre dans le Royaume, suyuant leurs loix, qui le deffendent estroictement. Cestuy-cy a soubz soy

plusieurs Capitaines, & entre autres vn, qui est cōme son Lieutenant general, lequel il enuoye aux expéditions de guerre, selon que l'occasion le requiert. Outre ceux-cy, il y a vn' infinité d'autres Mandarins moindres, pour diuerses fins, le tout tendant à l'observation de la police : lesquels il seroit difficile de specifier, veu le grand nombre d'iceux, & le peu qu'on a eu moyen d'en sçauoir iusqu'à present.

Or tous ces Mandarins lettrez sont merueilleusement respectez, & redoubtez de la populace, parce qu'ils ont puissance de faire souffetter tous ceux, qu'il leur plaist, sans autre forme de procès, comme ils font souuent, pour des fautes bien legieres. Ce que l'on craint grandement, à cause que c'est vn chastiment fort rigoureux, & duquel plusieurs sont meurtis sur le champ, ou rendus perclus des iambes. Car ils souffettent avec vn faisceau de cannes ou roseaux, qui ne sont pas vuides comme les nostres, mais remplis & durs : lesquels ils font passer par le feu, afin que cela cuyse d'auantage. Ce faisceau est gros & espés de quatre ou six doigts, & long d'vne brassée : ceux, qui les portent & souffettent avec iceux, sont appellés *Vpis* : & vont tousiours deuant les Mandarins, comme anciennement deuant les Consuls & autres Magistrats de la Republique de Rome ceux, qu'ils nommoient *Lictors*. Quand ils souffettent quelqu'un, ils l'estendent tout du lōg sur terre la bouche en bas, & luy attachent les mains par derrière, puis luy ostent les calçons de toile, que tous les Chinois portent ordinairement : & cependant que l'un le tient par la teste, & les autres par les pieds, deux de ces *Vpis* luy baillent avec ce faisceau, des grands coups sur les cuisses, & sur les iarrêts, l'un d'un costé, l'autre d'un autre, avec telle roideur & cruauté, que c'est pitié d'entendre crier, & hurler ces pauvres gens. Vn homme condamné à cinquante coups de souffet, en perd d'ordinaire la vie. Et c'est de ceste sorte, que les Mandarins font mourir beaucoup de gens. Car jasoit qu'il ne leur soit pas permis de donner sentence de mort : toutesfois ils font si cruellement souffetter les mal-faïcteurs, principalement les latrons, & voleurs, que tous les ans ils en meurtissent vn grand nombre, mesmes dās les prisons. Ils ne font pas donner communément plus de huit ou douze coups, mais c'est vn chastiment si ordinaire, qu'il ne se passe aucun iour, auquel plusieurs ne soient ainsi souffettez. Voire mais les Mandarins de moindre auctorité, sont bien souuent chastiez de

*Sāt tous
fort re-
doutez
de la po-
pulace,
& pour-
quoy?*

*Commē
on dōne
le souffet
à la Chi-
ne.*

*Les M.
darins
moin-
dres s'ôt
quelque
fois sou-
uerz.*

ceste maniere, par le commandement des autres, qui sont en plus grande dignité. Combien qu'il n'est pas loysible de les fustiger avec les marques de Mandarin, qui sont vne ceinture large de trois doigts, avec des bossètes d'or ou d'argent, & vn chappeau ou bonnet faict tout exprés pour eux: tellemēt que quand quelqu'un d'iceux doit estre soüietté, les Vpis luy ostent au prealable le bonnet & la ceinture, puis le couchent la bouche en bas, & luy en dessachent quelques ynes, qui ne tombent pas à terre. Apres cela, il reprent ses marques de Mandarin, sans que pour cela il ait rien perdu de son honneur. Quand il y a quelque debat ou querelle entre deux Chinois, & que l'un d'iceux se va plaindre au Mandarin; bien souuent sans autre procedure il les faict soüietter tous deux, mesmes s'il y a faute d'un costé & d'autre, & avec ce leur debat est appaisé. Ceste crainte des coups de soüet a engendré en l'ame des Chinois, vne si grande frayeur des Mandarins, qu'ils s'en fuyent d'aussi loing, qu'ils les voyent venir. Car si quelqu'un ne leur faisoit place, ou ne se mettoit à genoux, quand ils passent; ou s'il faisoit quelque insolence deuant eux, il seroit sans doubte fustigé. Et pour ce, quand les grands Mandarins vont par les ruës, quelques vns marchent deuant eux, faisans signe, ou avec la voix, ou avec quelque instrument, qu'on se retire, & qu'on leur face place. Ez cités particulieres, quand quelqu'un des grands Mandarins passe, tout le monde se cache, & s'en entre dās les maisons: les artisans mesmes laissent de trauailler. Le P. Pantoja dict auoir veu vne fois en certaine ville, soudain qu'un Mandarin commença de paroistre au bout d'une ruë de grand traffic, tout le monde dispaaroistre soudain, iusques aux chiens mesmes; de façon qu'il passa avec vn tel silence, comme s'il ny eust eu personne, si grande est la reuerence qu'on leur porte. Plusieurs d'iceux sont traishner deuant eux des chaines de fer, & autres choses semblables, qui menent bruiet, afin qu'on soit aduisé qu'ils passent: & quand ils vont sur l'eau, ils font sonner les trompettes, fleutes, ou haut-bois, qu'ils ont dans leur vaisseau tout exprés, lors mesmes, qu'ils passent deuant vne ville. Quand ils sont au lieu de leur Iurisdiction, s'il n'y a point de plus grand Mandarin en ceste ville là, ils marchent en ceste sorte.

*L'arroy
avec le-
quel ils*

Deuant eux vont les Vpis, qui sont comme leurs Sergens, & les autres officiers & seruiteurs deux à deux, laissans vn grand espace au milieu, afin d'occuper toute la ruë. Les vns portent

des massuës de fer estaimmées, les autres des banderolles ; Il en y a qui ont des mourions en teste , d'aucuns qui portent ces faulseaux de cannes , pour fouëtter : d'autres qui traignent par terre de grosses chaines de fer , quelques vns qui portent les marques de la dignité du Mandarin , & du pouuoir qu'il a. Outre ce ils ont des crieurs ou trompettes, lesquels avec vne voix estroyable crient ou font signe, que le Mandarin passe: afin qu'un chascun se retire. Finalement on void venir le Mandarin dans vne chaire, portée sur les espaules de deux ou quatre ou huit hommes , selon que sera sa dignité. Il tient là dedans vne telle morgue & grauité , qu'on diroit que c'est vne statuë : car il ne remue iamais la teste, ny ça ny là, ains la tenant tousiours roide, & les yeux baifsez, monstre en sa face, & en tout son maintien, vne seuerité plus que Catonique : & à cela s'accoustument-ils dès leur ieunesse. Apres luy viennent plusieurs autres gens de qualité, partie à cheual , partie sur des chaires à bras qui l'accompagnent par honneur. Avec vn tel arroy marchent les Mandarins de la Chine , és villes particulieres , ou ils ont iurisdiction , horsmis és Cours de Nanquin & de Paquin. Car bien que les Mandarins qui sont là, soyent des plus grands du Royaume: toutesfois lors qu'ils passent par la ruë , le monde ne s'enfuit pas , mais seulement se retire à costé, pour leur donner place: & plusieurs encore vont souuent à cheual : mais par tout ailleurs ils sont portez sur des chaires à bras. L'habit des Mandarins est du tout different des autres , & ressemble fort à celuy des Senateurs Venetiens. Ils portent vne robe longue close depuis le haut iusques en bas, avec des manches fort larges : laquelle ils ceignent avec vne ceinture de soye, large de trois doigts, garnie de bossètes d'or ou d'argent. Ils couurent la teste d'un bonnet assez haut, qui aboutist en forme de pyramide, à guise d'une demie mitre , avec deux fanons pendans, comme ont les mitres de nos Euesques, & c'est la marque propre des Mandarins. Ils sont tous nourris & entretenus au despens du Roy , & ont par tout vn hostel basti exprés pour eux, meublé & garny de ce qu'il faut , iusques aux seruiteurs & officiers mesmes : tellement qu'ils sont contraincts de se seruir de ceux , qu'a eu leur predecesseur , sans qu'il leur soit permis d'en choisir d'autres. Pource que quand ils vont à vne ville , pour estre Mandarins , ils ne portent point leurs meublès , & ne mènent point leurs seruiteurs , horsmis deux ou trois laquais ;

*L'habit
des Mā-
darins..*

car ils trouuent là, tout ce qu'il leur faiët de besoin. Aussi quand le terme de leur office est expiré, ils n'en ramencent que ceux-là, laissant toutes choses, comme ils les ont trouuées, pour seruir tout de mesme à leur successeur. Brief les Mandarins sont differents des autres, es habits, seruiteurs, logis, & vaisseaux, comme a esté dict. D'où l'on peut colliger qu'encore que le Roy de la Chine ait vn gros reuenue, il y a neantmoins force bouches qui le mangent, de façon qu'il n'en met pas grande quantité dans les coffres de son espargne.

Voila quant aux Magistrats ordinaires de la Chine : mais outre ceux-cy, le Roy depute tous les ans vn Visiteur en chasque Prouince, qui a charge d'aller par toutes les villes d'icelle, & voir tout ce qui s'y passe, pour punir ceux qui le meritent. A ceste fin il fait publiquement faire des informations sur la vie, & actions des Mandarins : afin de sçauoir comment ils se comportent en leurs charges, s'ils font des concussions, s'ils maluersent en leur estat, ou prennent des presents : car cela leur est tres estroictemēt deffendu, & sous grieues peines ; de sorte que s'il vient à la notice du Visiteur, que quelqu'un en ait receu, il le fait punir rigoureusement : & bien souuent le demet de sa charge, combien que dessous main ils ne laissent pas d'en prendre : & içoit qu'entre eux cela se sçache, le Visiteur ne'n est pas aduertý : car ils ne se deçellent pas les vns les autres, ains se prestent la main, comme les larrons en foire. Quant à ce que quelques vns disent, que le Roy enuoye outre ce des Visiteurs secrets, cela (diët le P. Patoja) a bien esté faiët d'autresfois : mais à present il n'est plus en vsage : & y a long temps qu'on n'en a veu. Le seul Visiteur peut donner sentence de mort, tellement que les delinquans, qui ont esté prins tout le long de l'année, doibuent attendre la venue d'iceluy, auant qu'estre condamnez à mort ; & pource il en y a plusieurs de ceux qui la meritent, lesquels pendant ce temps-là, meurent en prison, ou des coups de fouët, qu'on leur donne, ou de misere, & de calamité : beaucoup aussi se desfont, & se tuent eux mesmes de facherie & desespoir, içoit que les prisons soyent bien policées, & tenuës avec vn bon ordre. Car le lieu est si ample, qu'il semble estre vne ville, bien qu'il soit enuironné de tous costez de fort hautes murailles : mais là dedans on trouue force viures à achepter, y ayant des boutiques & artisans de diuers mestiers : si qu'il n'est pas necessaire enuoyer querir dehors

*Prisons
de la
chine
comment
policées.*

les viures ou autres choses, dont on a besoing. Les prisonniers sont visitez fort souuent, de peur qu'ils ne cachent des ferremens, pour rompre les parois, ou des cordes, pour monter dessus les murailles; & ce tant par les Geoliers, & gardes des prisons, que par vn personnage de grande auctorité, qui a soing de prendre garde à cela. Les procez ciuils se decident en ceste sorte. Le President assisté de plusieurs autres Iuges ou Conseillers, qui sont à ses costez, est assis sur vn parquet haut esleué, & là il donne audience matin & soir, prenant quelques heures de relasche sur le midy. Les officiers de la iustice sont tous debout prests & appareillez, pour executer ce qu'on leur commandera. Ceux qui demandent iustice, estants introduicts dans la sale par les portiers, se mettent soudain à genoux, & de loing proposent à haute voix leur requeste aux iuges, ou bien la baillent par escrit aux Greffiers: afin qu'ils la lisent tout hault. Le President apres auoir baloté la chose avec ses Conseillers, prononce la sentence, laquelle ayant esté escripte par le Greffier, il signe de sa main avec de l'encre rouge. Ils ne donnent point de sentence sinon en public, & en plaine audience, leurs officiers estans presents: afin qu'il n'y ait pas moyen de faire secrettement des iniustices. Ils n'ont pas beaucoup de loix, & parce ils decident les procez comm' il leur vient en teste. Sur vn mesme faict on donne bien souuent des sentences toutes contraires, d'où il s'ensuit que la pratique de leur gouuernement n'est pas en cela bien reglée. Car tous ceux qui sont propres à faire vne bonne composition, n'ont pas tousiours telle caboche, qu'ils puissent bien iuger d'un point de droict. Outre que c'est vne chose entr'eux fort ordinaire, que de dresser toutes les choses à leur proffit. Or d'autant que nous auons dict que les Mandarins montent à ces degrez d'honneur, par le moyen des lettres, il nous faut maintenant traicter de la cognoissance, qu'ils ont des sciences, car les Chinois sont fort addonnez à l'estude, voyans que de là depend tout leur honneur & richesses.

Ils n'ont point d'Alphabet comme nous, ny chose qui s'y rap-
 porte, leurs lettres sont toutes differentes, & arriuent pour le
 moins iusques à quarante mille, bien qu'il y en y a des vnes, qui
 sont composées des autres, de maniere que pour signifier cha-
 que chose, ils ont vne lettre à la façon des figures des anciens
 Egyptiens, que les Grecs appelloient Hieroglyphes. Leurs mots.

*Les Chi-
nois u-
sent de
lettres
hierogli-
ques.*

sont la pluspart monosyllabes, & ceux dont on se sert communement passeront le nombre de huiët mille.

La disposition qu'ils gardent en ces figures, lors qu'ils escriuēt, ou impriment quelque chose, est fort differente de toutes les autres de par deça. Car ils ne les rangent pas, commençans de la main gauche à la droiète, comme nous faisons, ny de la droiète à la gauche, comme les Hebreux, mais du haut en bas: de telle sorte qu'ayant escrit la premiere note au commencement d'une feuille, ils mettent la suivante dessous icelle, & non pas à costé comme nous. Ainsi poursuivans iusqu'à la fin, comm' ils sont arriuez au bout, ils recommencent vn' autre ligne en haut, & continuent iusques en bas. Ils ont deux sortes de langage; l'un qui est commun entre la simple populace (bien qu'en diuerses Prouinces il soit diuers.) L'autre qu'on appelle le lāgage Mandarin, qui est celuy dont se seruent tous les lettrez. Or bien que le peuple ne le sçache pas parler communement: toutesfois ceux qui sçauent lire, entendēt ce qui est escript en iceluy: parce qu'on se sert des mesmes lettres, pour signifier vne mesme chose, tant en

*Langage
Manda-
rin fort
difficile
à pour-
quoy?*

langage commun, qu'au Mandarin. Cestuy-cy est fort difficile à apprendre, à cause mesmement des equiuoques qu'il y a, parce qu'un mesme mot signifie quelquesfois plusieurs choses diuerses, de façon qu'on ne peut bonnement les distinguer, sinon par l'accent qu'ils leur donnent, ou par certains tons musicaux: si qu'il faut auoir l'oreille bien delicate pour les discerner, & que celuy qui parle prononce distinctement. Il arriua sur ce point vne chose plaisante à vn Pere Italien, lequel voulant faire entendre aux Chinois, qu'il y auoit en Europe des nauires aussi grands qu'une tour, il donnoit au mot, qui veut dire vn nauire, le mesme accent qu'à celuy qui signifie vne tuile, ou quarréau: dont les Chinois estoient fort esmerueillez, & ne pouuans bonnement le croire, luy obiectoient à quoy pouuoit seruir ce quarréau, & qu'il falloit que la fournaise, ou il auoit esté cuit, fust bien grande. Ceste diuerfité de tons traueille merueilleusement, & les estrangers, & les naturels mesmes: de sorte que pour euitier toute ambiguïté ils adioustent souuent deux ou trois mots qui signifient le mesme, pour se declarer mieux: & par fois s'expliquent par antitheses, & contrepositions, ou bien apportent quelque sentence d'un aucteur des leurs, ou tel mot est couché. Car ils en ont, qui ont laissé de fort beaux liures imprimez long temps deuant, que

nous n'eussions en Europe la cognoissance de l'Imprimerie. Entre autres ils font grand cas d'un ancien Docteur, qu'ils nomment le Confus, la doctrine duquel ils suivent tous unanimement, & sans contredit: & les interpretes d'iceluy pour auoir l'intelligence de ses escripts, rapportent d'autres sentences du mesme auteur, semblables à celle, qu'ils expliquent, conferans les diuerses leçons, voire qui plus est, comprans les paroles mesmes, comme si au nombre d'icelles il y auoit quelque mystere caché: brief ils ne sont pas moins soigneux de conseruer la doctrine de leur Confus pure & en son entier, que nous sçaurions estre du texte de la S. Bible.

Le Confus Docteur ancien, & fort estimé des Chinois.

Les enfans commencent d'apprendre à lire & escrire communément à l'age de sept ans. Ils escriuent avec des pinceaux; & on leur baille plusieurs liures, qui les innitent à estudier, avec esperance d'estre vn iour Mandarins. Ils n'estudient pas ordinairement en Philosophie, ny en Mathematique, combien qu'il en y a quelques vns qui s'appliquent aux Mathematiques, & d'autres qui s'addonnent à la Philosophie morale; car ils ont des liures qui traitent assés bien des choses appartenantes aux mœurs, & à la police; mais ils s'estudient principalement à la Rhetorique: à cause que la doctrine, par laquelle ils acquierent tant de credit & d'honneur, ne consiste en autre chose, qu'à sçauoir bien faire sur vn theme, ou vne sentence, qu'on leur donne, quelque beau discours, ou amplification, qui respond à celle que les Grecs ont appellé *χρεια*, dont traite Aphthonius le Sophiste. Brief ce n'est autre, que sçauoir faire vne oraison elegante, & iudicieuse, sur ce qui se presente. En quoy ils sont bien duiets & exercés: car comme ils ont vn bel entendement, & se peinent si fort à cela, sans s'appliquer quasi à autre chose, excitez par la recompense, qu'ils en attendent, ils s'y rendent excellents. La façon qu'ils ont pour estudier, n'est pas semblable à celle de nostre Europe, ou il y a des Vniuersitez communes, ausquelles on traite toute sorte de sciences; & y peut aller quiconque veut: bien qu'il en y a qui disent, qu'en chasque ville de la Chine, voire en plusieurs bourgs on trouue des Vniuersitez: mais le P. Pantoja assure, qu'il n'en y a pas vne en toute la Chine, en laquelle les Maistres soient saiez au despens du Roy, & qui lisent publiquement, comme font les Docteurs Regens en nos Vniuersitez. Mais ceux, qui ont des moyens, prennent en leur maison vn maistre pour instruire leurs

S'ils ont des Vniuersitez.

*Ont trois
degrés
qui cor-
respon-
dent aux
nostres.
de Ba-
achelier,
Licentié,
& Do-
cteur..*

enfants. Et pour les autres, qui n'ont pas la commodité de ce faire, il y a en chaque ville, & mesmes en plusieurs bourgs, des Regés, qui gaignent leur vie instruisant la ieunesse. Ils ont trois degres, qui respondent aux nostres de Bachelier, Licentié, & Docteur: & ceux qui pretendent obtenir le premier ou le second, s'en vont à certain temps à la cité Metropolitaine de leur Prouince, là ou de trois en trois ans on les confere à ceux, qui ont esté trouuez capables, apres auoir esté bien examinez. Or l'examen se fait en ceste sorte. On les fait composer vne oraison, ou quelque discours, sur vn argument, qu'on doime dans vne grande sale à tous ensemble: & communément c'est sur quelque affaire d'estat. Le Theme estant baillé, ils enserrent tous ceux, qui doibuent estre examinés, en vne maison fort grande, chacun dās sa chambre à part, sans qu'ils puissent se communiquer les vns aux autres. Car on donne à chacun vn homme de garde, pour empescher qu'ils ne se parlent. Auant qu'entrer là, ils sont fouilleez par tout fort soigneusement, afin qu'ils n'apportent quant & eux aucun liure, n'y mesme vn petit papier, de la longueur d'vn doigt: & en cecy vsent ils d'vne extreme diligence.

Là dedans on leur baille du papier, de l'ancre, & vn pinceau pour escrire: & encore des chandelles, pour veiller la nuit, s'ils veulēt, mais non autre chose. Ils ont vingt & quatre heures pour faire leur composition, lesquelles il en y a qui employent avec si grand travail & contention d'esprit, qu'ils en meurent quelques-fois là dedans, principalement si c'est l'examen du second degré. Les compositions estans faictes, ils y mettent leur nom propre, & de leur famille & païs; mais de telle sorte, que les Iuges qui doibuent faire l'esslite des meilleures, ne voyent pas leur nom. Car il y a force escriuains tous prests & appareillez pour copier lesdictes compositions, lesquelles on leur dicte, sans y apposer le nom de l'autheur. Cela fait, on prend les originaux, & on les serre dans des armoires bien fermés, seellés & gardés: baillant les coppies aux Iuges (qui sont tousiours des plus grands lettrés de la Prouince) afin qu'ils les voyent, & les examinent, sans sçauoir de qui elles sont, pour coupper broche à toute faueur. Ces Iuges ayant leu toutes les compositiōs, choisissent celles, qui leur semblent les meilleures, & les mettent à part. Apres ils tirent les originaux des armoires, & les confrontent avec les coppies; & par là on cognoit de qui sont les compositions, qu'on a choisi. De

*l'examen
pour le
premier
ou second
degré,
& com-
ment il
se fait.*

maniere qu'ils declarent publiquement ceux, qui ont le mieux composé, & leur conferent avec grande magnificēce, le premier ou second degré, selon qu'ils meritent. Combien que personne ne peut atteindre au second, qu'il n'ait esté gradué au premier. On se prend garde fort soigneusement, qu'il n'y ait point en cela de la tromperie. Car si l'on y en recognoist, celuy qui a fait la faute est griefuement puny: & encore que ce soit vn grand Mandarin, il perd son estat; bien que ce ne soit que le premier degré, qui est le moindre de tous: mais si c'est le deuxiesme ou le troisieme, l'on si comporte plus rigoureusē. Tous ceux, qui sont gradués, mesme du premier degré, acquirēt de grands priuileges & exemptiōs, & toute leur maison encore: mais ils sont aussi subiects à estre examinés de temps en temps, iusques à ce qu'ils aient obtenu le 3. & plus haut degré: afin qu'ils continuent à estudier. A quoy ceux qui n'ont point de degré, ne sont pas obligés: & souuentesfois il aduiēt, que pour n'estudier pas, ils perdent le degré à leur grand deshonneur. Plusieurs s'arrestent au premier, sans pouuoir passer outre: car pour monter au second, il faut subir vn examen beaucoup plus rigoureux, & auquel tous ceux qui se presentent, ne sont pas admis: ains seulement les plus braues du premier degré, ou ceux qui ont mieux profité depuis leur promotion. Et le nombre de ceux, qu'on esleue à ce second, est certain & attesté en chasque Prouince, selon le priuilege qu'elle a du Roy.

Priuileges & charges de ceux qui l'ont obtenu.

Après que quelqu'un est monté à ce degré, s'il ne veut passer plus outre, on luy donne soudain quelque office de Mandarin, combien que c'est des moindres, & beaucoup inferieur à ceux, qu'on donne aux autres, qui ont gagné le troisieme. Auquel ceux qui veulent atteindre, après auoir obtenu le second, doivent aller à la Cour de Paquin, pour estre là examinez & promeus. Et les Officiers du Roy sont obligez à leur fournir ce qui leur fait besoin, pour leur viatique. L'examen pour ce degré se fait aussi de trois ans l'un: & ceux qui ne l'ont peu gagner la premiere fois, y retournent la seconde, voire la troisieme, & quatrieme, ou d'auantage, iusqu'à ce qu'ils l'emportent, s'ils ne meurent deuant: ce que bien souuent arriue, ou qu'un homme est desia vieux, auant qu'il l'ait obtenu. Le nombre de ceux auxquels on le confere à chasque fois, ne passe pas de trois cens cinquante. Et c'est le plus haut faiste d'honneur, ou l'on puisse arriuer en la

L'examen pour le troisieme degré.

*Loytia
Gentils-
hommes
de la Chi-
ne, &
leur di-
gnité.*

Chine par le moyen des lettres. Car des lors ils sont mis au rang, qu'ils appellent des Loytias, qui sont comme les Gentils-hommes de ce pais: non pas qu'ils soient nobles de race, mais ils sont anoblis par ce degré; si qu'ils ne payent point de tribut, pour leurs personnes, comme font les autres. Et le Roy donne à chacun d'iceux, certaine pension annuelle, pour entretenir la dignité & grade d'honneur, qu'ils ont: L'on tire aussi tous les principaux Mandarins du Royaume du corps des Loytias. Le iour, auquel ils sont promeus à ce degré, se passe tout en festins, ieux, & autres signes de resiouissance. On mene lesdicts gradués par toute la ville, accompagnés des plus grands Mandarins d'icelle, eux montés sur des cheuaux bien harnachés, & suyuis d'une infinité de gens. Or entre ces trois cens cinquante, qu'on esleue à ce troisieme degré, il y a distinction de premier, second, & autres, selon que les compositions meritent: mais ils en mettent trois au premier rang, qu'ils choisissent entre tous, pour auoir mieux composé que le reste: & l'un d'iceux est encore honnoré du premier lieu.

*Preemi-
nences
des trois
premiers
gradués.*

Le Roy faict à ceux-cy de grandes faueurs, & des-lors (bien qu'ils soient ieunes) ils comencent d'estre Mandarins fort grands en la Cour. Au second ordre, ils en mettent quelques trente ou cinquante, qui ont deuancé les autres en la composition. Et ceux-cy encore sont faicts Mandarins de la Cour; mais non pas si grâds que les trois premiers. Les autres sont distribués par les Prouinces, pour exercer le mesme office. Car dès aussi tost qu'ils sont paruenus là, ils les font Mandarins sans aucun delay, & donnent à chacun quelque office ou en la Cour, ou hors d'icelle: & apres selon les informations, qu'on a de leurs deportemens, on les faict monter plus haut, & souuent aussi on les abbaisse, voire, qui pis est, on les priue de tout office. Chacun de ces gradués fait mettre deuant la porte de sa maison, qui est en leur pais, vn tiltre escript en grosse lettre, contenant en substance tels mots: Ceste maison est à vn Docteur: & pource on luy porte plus de respect, qu'aux autres. On plante aussi deuant leur porte plusieurs arbres, ainsi qu'en ces quartiers l'on a accoustumé de faire deuant les logis des Gouverneurs ou Capitaines au mois de May, d'ou nous les appellons Mays. De façon que chaque Mandarin de la ville, d'ou il est natif, luy enuoye vn May avec vne banderole y attachée: & ce May demeure là, iusqu'à tant qu'il soit pourry. Mais celuy qui a eu le premier rang des trois, que nous auons dit, est

bien plus honoré. Car on luy dresse vn arc triomphal fort magnifique, au lieu de sa naissance. Apres que ces Docteurs ont passé leurs degrez, les compositions qu'ils ont faictes, s'impriment avec leurs noms, & de leurs pere & mere, ensemble du país d'où ils sont natifs, avec beaucoup de louanges d'iceux. Les liures qu'ils lisent, & par lesquels ils estudent, sont de certains philosophes anciens, qu'il y a eu parmy eux depuis deux mil ans en ça, ou d'auantage, selon leur compte; car ils en ont eu plusieurs qui ont fort bien escrit des vertus morales, & du gouuernement de la chose publique, & quelques vns d'iceux sont estimez comme des grands Saincts: particulièrement ce Confus, dont a esté parlé cy deuant, duquel ils ont telle opinion, que tous les Lettrez, & les Mandarins mesmes luy font chascque année des sacrifices, cōme s'il estoit quelque Dieu, pour la grande vertu & doctrine dōt il fust doié en sa vie, & des liures qu'il a laissez à la posterité. Le Roy aussi nourrist à ses despens tous ceux de sa race, & leur donne de grands offices & dignitez, dont ils iouissent par succession de pere en fils, en memoire de ce grand personnage, duquel ils sont yssus.

*Quels li
ures ils
ont, &
par qui
cōposent.*

Or bien que cestuy-cy, & les autres Philosophes qu'ils ont, approchent en quelque façon de Platon & de Seneque: toutes-fois aucun d'iceux n'a tant escrit, ny si bien que ces deux icy. Et i'açoit qu'on trouue en leurs liures de fort bonnes, & belles sentences, si est-ce que les nostres les deuancent encore en cela: selon l'aduis de quelques Peres de la Compagnie, qui les ont leus, bien qu'il leur semble que le Confus, ores qu'il n'arriuaist pas à leur doctrine, ne leur cedit pas quant à la vertu & sagesse: si toutes-fois les choses, qu'on en trouue escrites sont veritables.

Ils impriment tous les ans vn grand nombre de liures, en quoy il n'y a ne choix ne examen: mais vn chascun met en lumiere ce que luy semble, & de quoy il luy plaist, soit biē, soit mal: & pour ce ils ont des liures imprimez de diuerfes matieres, beaucoup plus que nous n'auōs: si qu'on trouue des grandes librairies pleines de bōs liures, à achepter pour vil prix: car il y a tāt de lettrez en la Chine, & ils sont si cupides d'hōneur, que plusieurs se mettent à escrire, pour gagner du credit, de façon qu'ils ont traité fort exactement de toutes les choses naturelles, qu'on trouue en la Chine: comme des mineraux, des plantes, des animaux, & autres choses, voire des plus petites qui soyent. Mais ceux, des-

*Liures
imprimés
à la
Chine en
grand
nombre.*

quels on fait plus d'estat, sont les liures qui traictent des choses morales.

Quand il y a au Royaume quelque affaire de grande importance à vuidier, on le consulte avec les plus braues Lettrez qui soyent en la Chine, de la maniere qui s'ensuit. Ils font imprimer à Paquin les propositions desquelles on doubte, & les enuoyent par toutes les Prouinces au President de chascune d'icelles: lequel soudain qu'il les a receuës, en aduertist toutes les villes de son ressort, & chascune assemble les graduez, qui sont en son district: non pas tous, mais seulement la fleur d'iceux, les enuoyant à la ville Metropolitaine, ou tous les Esleus des autres villes se doibuent trouuer. Estans là tous arriuez, on les met dans vne maison (ou l'on fait l'examen, comme a esté dict) & là ils commencent à escrire leur aduis sur les cas proposez. Cela fait, le President regarde, & considere diligemment avec ses Assesseurs toutes les opinions, & choisissant les meilleures les fait imprimer en vn liure au nô de sa Prouince: puis les enuoye à la Cour de Paquin, ou tous les liures des autres Prouinces sont reueuz par le College des Lettrez, ou le conseil Royal. En fin ils les lisent au Roy, & determinent ce qui doibt estre fait ou tenu en cela. D'ou vient, que ce qui s'arreste à Paquin de telle sorte, est receu de tout le Royaume à yeux clos, comme s'il venoit du Ciel. Mais afin que l'on voye le grand nombre de Lettrez qu'il y a en la Chine, ie mettray icy ce qu'en rapporte de la seule Prouince de Canton, vn Pere de la Compagnie appellé Nicolas Lombard Italien, lequel en vne lettre qu'il escrit de Xauecho, ville de ladite Prouince, au R.P. General de la mesme Compagnie, dict ainsi.

» Pour la consultation Prouinciale, s'assemblent trois mille Let-
 » trez dans la cité de Canton, lesquels sont la fleur de tous ceux
 » qu'il y a es villes & terres de la Prouince, & ce avec telle reserue,
 » que de mille à peines en choisist-on trente, ou quarente, & pour
 » le plus cinquante. Prenant donc ce plus grand nombre de cin-
 » quante, & les esleus de ce conseil estans trois mille, comme ils
 » sont, il s'ensuit que les graduez de ceste Prouince seront pour le
 » moins 60. mille. Que s'il se trouue icy 60. mille Graduez, quel se-
 » ra le nombre des Lettrez, qui n'ont point de degré; & si en vne
 » seule Prouince en y a tant, que sera-ce de ceux qui sont par tout
 » le Royaume? Voila ce qu'en dict le P. Lombard, & comment les
 » Chinois s'addonnent aux lettres, non seulement ceux qui pre-

rendent à quelque dignité par le moyen d'icelles, mais aussi les autres. Car il adioust qu'il y a peu de gens, qui ne sçachent lire & escrire, mesmes des artisans, & laboureurs. Ce qu'ils font afin de pouuoir traffiquer plus aisement. Les Chinois se plaisent aussi naturellement à la Poésie, de façon que mesmes les gens graues s'y addonnent beaucoup, & s'entre-enuyent souuentefois les vns aux autres quelques poëmes par amitié. Ils estiment aussi fort (mesme les gens d'auctorité) de sçauoir iouer des instrumens, & s'addonnent encore à la peinture: bien qu'en cecy ils ne sont gueres experts. Car ils n'entendent point à faire les ombres, ny à peindre à l'huyle: mais ils sont assez bien duits à iouer des instrumens de musique, qu'ils sonnent fort grauement & posément: iacq̃ qu'en cela encore ils ne peuuent estre parangonnez à nos Européens. Les gens graues ne se seruent que d'un seul instrument, qui respond en quelque façon à nostre harpe; ores qu'il soit de differente forme, & qu'ils le sonnent d'autre maniere. Au demeurant comm' en toute la Chine il n'y a gens plus honorables que les Lettrez, aussi n'en trouue-on qui ayent plus honneste façon de conuerser. Car bien que plusieurs d'iceux auant d'estre Docteurs ou Mandarins, fussent personnes de basse condition: si est-ce qu'apres auoir esté esleuez à quelque degré ou dignité, ils se changent du tout, & prennent vne maniere de proceder fort honneste, & courtoise. Il en y a quelques vns d'entre eux, qui sont personages de grande constance & integrityté en leur office, comme l'experience l'a monstré ces années passées. Car nonobstant que le Roy soit tellement absolu Seigneur en tout son Royaume, qu'il puisse faire des plus grands Mandarins ce que bon luy semble, aussi bien que des plus petits compagnons: si est-ce qu'il en y a eu, qui se sont opposez à ses desseins iniustes: & ont eu la hardiesse de luy remonstrer ce qu'ils iugeoyent estre expedient pour le bien du public, mesmes à ce luy qui regne à present, appellé Vanlie 12. Auquel plusieurs ont fait des remonstrances par escript, de façon qu'un chascun les pouuoit lire. Et bien qu'il eussent occasion de craindre d'encourir son courroux, & par consequent quelque grand supplice, outre la perte de l'estat, qui estoit quasi assurée; toutesfois postposans leurs propres commoditez au bien de tout le Royaume, ils luy ont fait entendre ce qui estoit de son deuoir. Entre autres vn fort renommé par toute la Chine, pour sa rare vertu & pru-

La vertu & constance de quelques Mandarins.

dence:lequel escriuant au Roy, commença sa lettre en ceste sorte. Encore bien, Sire, que ie sçache pour tout assésuré, que la puissance m'attend pour y estre pendu, & que le feu est allumé pour me brusler, ie ne lairray pourtant de remonstrer à vostre Majesté les fautes que vous faiétes, & le mauvais exemple, que vous donnez à tout vostre Royaume. Et apres il deduisoit ce qu'il luy vouloit faire sçauoir si librement, qu'il feist estonner tout le monde. Le Roy, ce semble, porta quelque respect à son integrité & vertu, de sorte qu'encore qu'il le challiaist: si est-ce qu'il y proceda plus modérément qu'on ne pensoit. Vn' autre chose fort remarquable aduint sur ce mesme subiect, les années passées. C'est que le Roy ayant plusieurs femmes outre la legitime, les enfans desquelles (si ceste-cy n'en a point) succedent à la couronne, suiuant l'ordre d'aisnesse, & non pas selon le rang qu'elles tiennent, de seconde, troisiésme, ou quatriésme. (Car il y a quelque ordre entre elles, comme a esté dict.) Or il arriua n'a pas long temps, que le Roy n'ayant aucun enfant de la Royne sa femme legitime, il en auoit vn de la troisiésme, qui estoit l'aisné, & vn autre de la seconde, mais puisné. Toutesfois parce qu'il portoit plus d'affection à sa secôde, & à son fils, il le vouloit faire declarer pour successeur de la couronne, contre les loix & coustumes du Royaume, qui portent que l'aisné de tous ces enfans succede au pere. Le temps, auquel on deuoit declarer celuy de la troisiésme heritier legitime du Royaume, estant passé, sans ce faire (à cause que le Roy attendoit que le puisné feust en aage competant) il y eust plusieurs Mandarins, qui luy voulurent remonstrer, que cela ne se deuoit pas faire. Les premiers furent pour ceste cause priuez de leur office. Les autres voyans cela, & qu'il ne tenoit compte de faire declarer l'aisné son successeur, comme on luy requeroit, font vne consulte entre eux, ou ils arrestent de publier vn commandement à tous les Mandarins de la Cour (qui sont comme a esté dict plus de deux mille) sur peine de perdre leur estat, de soy trouuer à certain iour au Palais. Ce qui fust fait. Estâs là tous assemblez, avec les marques & liurées de leur dignité, ils presentent au Roy vn libelle, par lequel ils l'aduisoient, que puis qu'ils luy auoyent souuent remonstré vne chose si iuste, & si raisonnable, & neantmoins qu'il ne tenoit aucun compte de leurs remonstrances, qu'il luy pleust prendre en bonne part, s'ils deposoyent tous leurs offices, & quittoyent les marques de Mandarin: car ils estoient

*Grand
courage
des Mā-
darins
de la
Chine.*

estoyent resolus de se retirer en leurs maisons, pour viure priuément : & que sa Majesté en pouuoit pouruoir d'autres, qui fussent plus à son gré, & aymassent mieux luy complaire, que faire garder les loix du Royaume. Le Roy voyant vne telle resolution des plus grands personnages de toute la Chine, eust peur de perdre tant de bons seruiteurs : tellement qu'il leur enuoya dire par vn de ses Eunuques, qu'ils retinssent à la bonne heure leurs offices, & qu'il seroit ce qu'ils demandoient, comme aussi il fut fait. Voyla ce que nous auons peu sçauoir des Mandarins lettrés. Disons maintenant quelque chose des Mandarins de guerre, qui ne sont pas moins en nombre : combien qu'en dignité & honneur, ils soient inferieurs de beaucoup aux lettrés, puis qu'ils leur sont re-

*Des Mā
darins
de guer-*

subiects : & peuuent estre punis d'iceux. Il faut donc sçauoir que le Roy de la Chine, encore qu'il n'ait point de guerre ny dedans ny dehors le Royaume, entretient neantmoins & souldoye tousiours vn grand nombre de gens-d'armes, tant à pied que à cheual : lesquels sont distribuez non seulement par les garnisons, qu'il tient sur les frontieres du Royaume, principalement du costé de la Tartarie, dont il se craint d'auantage, & sur les costes de la mer : mais aussi és villes principales, qui sont au dedans du Royaume ; là ou ils mettent des sentinelles chascque nuit sur les murailles avec des corps-de-garde, & sont les rondes, comme s'ils auoient les ennemis à la porte, bien qu'ils iouyssent d'une tres-grande paix. Ils n'ont point de chasteaux ny de citadelles, sinon en la frontiere : mais aux villes & citez, qui sont dans le Royaume, les soldats tiennent leur garnison és portes, ou ils font vne bonne garde, tant de nuit que de jour. Ils ferment les portes auant qu'il soit nuit, & ne les ouurent qu'il ne soit Soleil leué. Quand on les ferme, le Gouverneur de la ville, ou le principal Mandarin d'icelle y viennent, ou y enuoyent quelqu'un avec leur cachet, & ayant fait mettre vn papier colé sur les ioinctures des portes, y apposent leur sceau : lequel auant que les ouvrir, ils vont ou enuoyét recognoistre, pour voir s'il est en son entier. Il y a aussi à chascque rue deux portes, lesquelles s'ouurent & se ferment à mesme temps, que celles de la ville. Ce qu'ils font pour obuier à beaucoup d'inconueniens, & afin que, si quelque meurtre ou autre meschâceté se commet, le mal-faïcteur soit plus aisément attrapé. Il n'est permis à aucun, excepté aux gens de guerre, de porter armes offensives ny des-

*On les
tiennent
garniss.*

fenfues, ains jaoit qu'il ne leur soit pas deffendu d'en auoir en leurs maisons, ils n'en y tiennent point d'ordinaire, voire les gens lettrés, estiment à des-honneur d'en auoir chés eux. Aussi n'y a il pourquoy; car il y a long temps, qu'ils n'ont point de guerre: & quant aux querelles particulieres, ils ne se battent iamais à coups d'espée, mais, au pis aller, se donnent quelques gourmades, & se descoiffent, ou descheuclent, mesmes les hommes, comme font icy les femmes. Ils ne tiennent pas pour grande iniure recevoir vn soufflet, ny vne dementie, ou autres semblables affrons.

Commēt ils sont esteus à ceste dignité. Mais retournons aux Mandarins de guerre: lesquels ne sont pas eueuz à ceste dignité, pour auoir fait quelque acte de vaillance, ou de prouesse: ains pour auoir composé quelque discours sur vn point de guerre mieux que les autres. Il est bien vray, qu'on leur fait tirer auant que leur donner cest estat, deux ou trois coups de fleche: mais c'est plustost par ceremonie, que pour voir s'ils tirent bien. Les enfans succedent aux peres en cest office, tout au rebours des Mandarins lettrés. Les soldats sont encore pour la plus part natifs des lieux, ou ils sont en garnison: & plusieurs d'iceux sont artisans ou autres gēs vils & mechaniques, ou qui ont accoustumé de porter sur les espauls les chaires des Mandarins, & autres gens d'authorité. Mais au temps qu'il faut faire la mōstre, pour recevoir leur soulte (laquelle leur est payée fidèlement chasque mois, au commencement de la nouuelle Lune) ils s'en vont tenir la place de soldat, pour estre payés. Aussi pour l'ordinaire sont ce gens de peu de valeur, & qu'on tient communément pour les plus vils & abiects de tous les Chinois, hors-mis les Bonzes. Leurs armes, tāt offensives que deffensives, dont ils se seruent, sont harquebuzes, piques, rondelles, espées, maleus, baguettes ferrées, & autres faictes en demie Lune, haches d'armes, dagues & cuyrasses..

Les armes dont ils usent.

Les gens à cheual portent quatre espées aux arçons de la selle, & s'aydent de deux ensemble, d'une en chasque main, fort dextrement. Mais à vray dire, la plus part de ces soldats, tant à pied que à cheual, sont peu courageux & exercés aux armes, tant à raison de la grande paix, dont ils iouissent, que pour estre tenus si fort en crainte sous la puissance des Mādarins. Combien que ceux, qui sont aux confins Septentrionaux du Royaume, pour estre proches des Tartares, sont mieux duiets aux armes, & ne cedent en rien à leurs ennemis, ny en prouesse, ny en courage.

Mais afin d'entendre pourquoy les Chinois se craignent tant des Tartares, & comme à leur occasion ils ont fait ceste grande mu-
 raille, de laquelle a esté parlé cy deuant, nous en raconterons
 briefuement le subiect, qui est tel. Il y'a quatre cens ans ou enui-
 ron, qu'un Roy des Tartares gaigna tout ce Royaume, ainsi qu'es-
 crit Marc Paul Venetien, qui se trouua en ceste prise, en la luyte
 du Roy Tartare: combien qu'il appelle ce pais *Mangi*, mais eu
 esgard à la situation, qu'il luy donne, le faisant mesmes aboutir à
 la mer, ce ne peut estre autre, à mon aduis, que cestuy-cy de la
 Chine. Les Tartares donc ayant conquis ce Royaume, le posse-
 derent l'espace de deux cens ans, ou quatre-vingts & tant, ainsi
 que d'autres disent. Quoy qu'il en soit, ils en furent chassés par
 un Bonze Chinois, homme de grand esprit, & courage: lequel fut
 depuis Roy, & regne iusques à maintenant en sa race. Car tous
 les Roys, qui ont gouverné depuis, ont esté yssus de luy. L'on
 trouue plusieurs traités & marques de son grand iugement &
 prudence, tant en ses dictés sententieux, qu'en les faits & resolu-
 tions, mesmes en choses fort difficiles & scabreuses; sur tout en
 ceste belle maniere de gouuernement, qu'il y a estably. Car cest
 luy qui a ordonné toute la police, qui se garde à present, laquelle
 a duré depuis qu'il l'a instituée, sans rien chager, ainsi que disent
 les Chinois, lesquels estiment debuoir estre perpetuelle.

*Les Tar-
tars se
rendent
maistres
de la
Chine.*

*Ils en
sont chas-
sés par
un Bon-
ze Chi-
nois.*

*Instru-
mens de
Mathe-
matique
excellens.*

Le Roy Tartare a laissé pareillemēt des marques de sa demeure au pais, qui durent encore, & mesmes en la ville de Nanquin, qui estoit l'ancienne habitation des Roys de la Chine; là ou aussi le Tartare se tenoit. Car l'on y void là quelques instruments de Mathematique faits de bronze, qu'on tient y auoir esté posés du temps que le Tartare y regnoit, ausquels (ainsi qu'escriit le Pere Pantoja, qui dit les auoir veus) il n'y a rien de pareil (peut estre) en toute l'Europe. L'un d'iceux est un globe, marqué de tous ses Meridiens, & Paralleles, avec leurs degrés fort exactement; l'autre est un Astrolabe, qui en comprend trois, le premier du Nort au Midy, le second du Levant au Ponant, & le troisieme est de l'autre costé, pour cognoistre la hauteur des Estoilles, les heures, & choses semblables. Le dernier instrument est une fort grande & belle Sphere, avec ses cerceles de bronze, & le tout si bié fait & compasé, qu'il semble n'y auoir rien à redire. Le Diametre de chacun de ces instrumens est d'une canne de long pour le moins. Maintenant ils sont posés sur des Dragons (qui sont les armoiries

Voleurs
de pyra-
tes fort
frequens
en la
Chine.

du Roy de la Chine) mais au reste si bien horizontés, qu'on peut aisément cognoistre par là, que quelque grand Mathematicien y a mis la main. Or pour reuenir à nos erres, les Tartares ayans esté deboutez de la Chine, n'ont pas perdu l'esperance de la recouurer; tellement qu'ils ont tousiours depuis donné beaucoup d'alarmes de ce costé là aux Chinois: lesquels pour ceste cause se sont, ainsi qu'auons dit, fortifiez contre iceux, du costé de la terre ferme. Mais du costé de la mer ils se sont aussi bien munis, & remparez contre les courses de Japonnois, & autres, qui les vont quelquefois molester. Car ils tiennent continuellement aux principaux haures & ports de mer, des grosses flottes, tant pour defendre leurs costes, que pour purger & nettoyer la mer des Corsaires, desquels il y a vn fort grand nombre en ce Royaume, & ce à cause que n'ayans moyen de demeurer oiseux, sans encourir grand blasme & chastiment, ceux qui n'ont pas enuie de travailler, s'en vont chercher ailleurs leur fortune: tellement que ces faineants s'assemblent quelquefois en grandes troupes, & se rendent ou voleurs sur terre, ou pyrates sur mer, & le plus souuent de ce dernier mestier, à cause qu'ils ne sont pas si assurés en terre. Or ceux-cy non seulement pillent les nauires des marchands, qu'ils rencontrent, mais encore se iettent bien souuent sur les villes, qui sont sur la coste de la mer, & saccagent tout ce, qu'ils y trouuent. C'est pourquoy l'on tiét tousiours en quelques haures des grosses flottes toutes prestes, pour s'en ayder au besoing: & si cela n'est bastant, on assemble dans fort peu de temps, vne armée de cinq ou six cens vaisseaux de guerre bien pourueus, & equipés.

Diuerses
sortes de
nauires
des Chi-
nois.

Ils ont plusieurs sortes de nauires. Celles qu'ils appellent *Tun-cos*, sont les plus grandes: & se conduisent à la voile tant seulement: mais il en y a de deux sortes, les vnes sont nauires de guerre, & celles-cy ont des tourelles fort hautes, tât en la prouë, qu'en la pouppe; les autres, qui seruent ordinairement pour le trafic, & à porter charge, sont vn peu plus basses de prouë & de pouppe, mais de pareille forme & grandeur, que les premieres. Il en y a d'autres vn peu moindres, qu'ils appellent *Lantéas*, & ont à chascun costé six rames, & à chascun banc six hommes, ou bien quatre pour ramer: mais celles qu'ils nomment *Bancons*, n'ont que trois rames de chascun costé, & quand au reste sont semblables aux *Lantéas*. Ils ont aussi de certains longs vaisseaux, faicés en

forme de Galere, excepté qu'ils n'ont point d'esperon, & s'en seruent pour voguer sur les riuieres, ou il n'y a pas tant d'eau. Aussi n'en ont-ils pas besoing de beaucoup: parce qu'ils sont tous plats au fond: de façon qu'on les peut faire aborder aisément aux ports: & de ceste forme sont ceux qui seruent aux Mandarins, comme a esté dict cy dessus, horsmis qu'ils sont plus beaux que les autres. Pour espuiser l'eau des Nauires ils ont des pompes, qui sont faictes de plusieurs pieces de bois, ou ils attachent force seaux, qu'ils agencent si proprement, & si commodement, qu'un seul homme estant assis, & remuant tantost l'un pied, tantost l'autre, vuidera dans peu de temps autant d'eau, qu'il y sçauroit auoir dans l'offec.

Voila ce que nous auons peu recueillir de la façon de gouverner, qu'obseruent les Chinois: voyons maintenant ce qu'il y a de bon ou de mauuais. En premier lieu donc la chose la plus digne de louange qu'il y ait en ce gouvernement, c'est la grande obéissance, subiection & subordination, qu'il y a entre tant de Mandarins & Officiers du Roy. Car à la verité c'est vne chose fort remarquable; considéré la grande multitude de telles gens, de voir neantmoins un si bel ordre, qu'on diroit (laissant à part ce qui est de leur Religion) que ce n'est pas vne communauté de Payens, mais de Chrestiens, la mieux réglée qui se trouue parmi nous. En outre, combien que le Roy soit Seigneur absolu non seulement des biens & possessions de ses subiects, en sorte qu'il n'y a personne en tout le Royaume, mesmes des Loytias, qui ne le recognoisse comme Seigneur du sol & fond qu'il possede, luy payant certaine rente tous les ans pour cela, mais aussi de la vie & de la mort de tous ses subiects, qu'il peut faire punir & chastier comme il veut, sans que personne luy osast contredire: si est-ce que ceste puissance si souveraine & si absolue est bridée par les loix, que les premiers Roys ont faict, & que ceux qui les ont suivis ont depuis quasi tousiours gardées, tellement qu'il ne faict pas tout ce qu'il veut: car suivant les loix & coustumes du Royaume, il doit escouter & suivre l'aduis de ceux de son conseil, qui sont d'ordinaire gens de grand entendement, vertu, prudence, & experience aux affaires, combien qu'ils soyent subordonnez au Roy, & ayent seulement voix consultiue, non definitiue; sinon entant qu'il plaist au Roy leur en donner. Mais à ceux-cy tous les Vice-roys des Provinces sont subiects, & les

*Utilitez
du gou-
verne-
ment des
Chinois.*

*D'y a-
voir vne
grande
subordi-
nation.*

Vice-roys ont la mesme puissance sur tous les Mandarins de leur Prouince, qui commandēt immediatement au peuple. De façon que le mesme pouuoir qu'ont les Mandarins inferieurs sur la populace, les Vice-roys l'ont sur les Mandarins de leur gouuernement, & le conseil du Roy sur tout les Vice-roys, & le Roy sur ceux de son Conseil; si bien que l'Inferieur peut estre chastié par son Superieur, tout ainsi qu'il a puissance de chastier & punir son Inferieur, & tous les Inferieurs parlent les genoux en terre à leurs Superieurs.

*D'ex-
cuser pro-
ptement
ce qui est
cōmādē.*

De ceste subordination si bien gardée, s'ensuiuent des grands biens: car premierement tout ce qui est ordonné par le Roy & son Conseil, est receu d'un chascun sans aucune replique, & tout ce qui se faict au Royaume, est fidellement rapporté au Roy: d'autant que les Mandarins inferieurs en aduertissent promptement les Vice-roys, ceux-cy le Conseil Royal, lequel faict incon- tinent sçauoir au Roy la chose. De là vient qu'ils mettent en execution ce qui leur est ordonné, avec vne promptitude & vi- stesse incroyable: car les inferieurs executent promptement ce que leur Superieur commande; de sorte qu'à peine la parolle est sortie de sa bouche, qu'aussi tost ils s'en vont effectuer ce qui leur est enioinct. Ils ont l'usage des postes comme nous: & afin que les cheuaux soyent tous prests, quand il en faut changer, ou bien les batteaux, lors qu'il faut passer quelque riuere, les Postil- lons sonnent un cornet, ou bien font entendre leur arriuée avec certaines clochettes, que portent les cheuaux attachées au col, ainsi que font les Muletiers par deçà: & avec ceste commodité les Vice-roys sont sçauoir au conseil Royal non seulement ce qui se passe d'extraordinaire en chascque Prouince: mais aussi tout ce qui y aduient d'ordinaire de consequence: car ils doibuent escrire chascque mois audit Conseil. Par ce moyen les Chinois assem- blent en peu de temps des puissantes armées; equipent des grosses flottes; bastissent des machines tres-grandes, & font en un rien, ce que ailleurs l'on ne pourroit faire en plusieurs années. A quoy leur sert beaucoup la bonne prouisiō qu'ils ont tousiours d'argent, de viures, & de materiaux, & les ouuriers, qui ne leur manquent point.

*D'estre
conduit
par gens
sastes.*

Le second bien qu'il y a en ceste façon de Gouuernement, est que comme les honneurs & dignitez se donnent à ceux qui excellent en science, il y a par consequent un grand nombre de

gens qui estudient, & qui se rendent doctes (selō le sçauoir qu'ils ont en ce païs là) ce qui leur sert de beaucoup : car quoy qu'ils n'ayent pas vne si parfaite cognoissance des sciences, que nous auons : si est-ce que l'esprit s'esueille fort par le moyen de l'estude, auquel ils sont tant assidus. & pource comme tout le Royaume est gouuerné par gens lettrez, il est necessaire que la police en soit bonne & bien réglée.

Le troisieme est qu'il semble qu'ils ont coupé broche à toutes les seditions & guerres ciuiles, qui pourroyēt soudre en leur estat: car pour le regard des enfans ou freres du Roy, il n'y a point d'occasion de craindre, parce que iasoit qu'ils ayent bien de quoy pour viure, mesmes delicieusement, ils n'ont toutesfois liberté de sortir du lieu, qui leur a esté assigné par le Roy, sans exprés congé d'iceluy, lequel il ne donne iamais : & d'ailleurs ils n'ont aucun maniement d'affaires, mais cela appartient seulement aux Mandarins; lesquels aussi ne peuuent rien remuer, ny causer quelque reuolte ou esmeute, d'autant que ceux qui sont perpetuels, comme les Capitaines ou Mandarins de guerre, sont subiects aux Mandarins lettrez, qui ne sont en office que pour trois ans. Et parce que d'ordinaire ils sont esleuez à ceste dignité par leur doctrine & vertu, ils sont pour la pluspart gens de basse condition, & qui n'ont point beaucoup d'appuy de leurs parens aliez & amis, & encore qu'ils en eussent en leur païs, cela ne leur seruiroit de rien : car iamais on ne les faict Mandarins es Provinces d'oī ils sont natifs. Somme qu'ils sont tellement distinguez, que ceux qui ont soing de la guerre, ne se meslent point du gouuernement des villes, & ceux qui ont charge de la police, n'ont que voir sur les finances, & les Thresoriers n'ont aucun maniement d'affaires, soit de paix, soit de guerre. Finalement comme les Magistrats ne peuuent se seruir d'autres Officiers, que de ceux qui leur ont esté assignez par le Roy, ils n'ont aucun moyen d'exciter des seditions, ou causer des guerres ciuiles dans le Royaume.

Quant aux estrangeres, ils y ont pourueu le mieux qu'il leur a esté possible, tant par les flottres qu'ils ont sur mer, & par les garnisons, qu'ils tiennent sur la frontiere, voire en plusieurs villes au dedans du païs, selon qu'a esté dict; que par la circonspection grande, dont ils vsent, pour ne permettre l'entrée du Royaume aux estrangers. Car ils ont des loix tres-rigoureuses, non seule-

*D'auoir
coupé
broche
aux guer-
res ciui-
les.*

*Et aux
eslra-
ngers le
plus
ont peu.*

ment contre les Chinois, qui mettroient dans la Chine quelque estranger, sans exprés congé des Mandarins : mais aussi contre les mesmes estrangers, s'ils y entroyent d'eux mesmes en cachettes ou autrement : de sorte qu'il n'y va pas moins que de la vie aux vns & aux autres, ou pour le moins d'une perpetuelle prison. D'ailleurs il y a deffence expresse, qu'aucun Chinois n'aille trafiquer hors du Royaume sans permission des Mandarins : laquelle s'ils obtiennent, ne leur est octroyée que pour un certain temps ; & encore doibuent-ils bailler caution de retourner dans ce tēps là. Ils n'admettent pas aussi les estrangers en leurs hautes pour y traffiquer sans le congé des Mandarins, qui le leur baillent par escript sur un ais plâtré, & ils le portent en la prouë de leur nauire, quand ils vont surgir à quelque port. Là ou il leur est bien permis de descendre à terre, mais non pas d'aller courir ça & là dans le Royaume. Ce qui s'observe si exactement, que les Portugais, bien qu'il y a long temps qu'ils traffiquent en la Chine, & plusieurs mesmes d'iceux, qui ont arresté leur demeure en une ville du Royaume nommée Macao, si est-ce qu'il ne leur est pas loisible de demeurer ailleurs, ny d'aller autre part que au port de Canton, & ce encore apres auoir eu congé du Mandarin, qui ne leur est donné qu'à certaine saison de l'année, & pour un temps prefix, & arresté, avec telle condition encore, qu'ils ne peuvent de nuit loger ny à la ville, ny aux faux-bourgs : mais il faut qu'ils aillent coucher dans leurs nauires : & durant le iour il ne leur est point permis d'entrer en la vieille ville, tant ils se craignent des estrangers.

Ne se soucient point d'accroistre leur domaine Ils ont encore une chose fort propre pour s'entretenir en paix, c'est qu'ils ne se soucient pas d'aggrandir & accroistre leur domaine, ny de gagner d'autres pais, ains il y a une loy, qui leur defend, sur peine de la vie, de faire la guerre à aucun peuple estranger, sans le consentement du Roy ou de son Conseil. Ils auoyent iadis conquis beaucoup d'Isles, comme celles du Japon, des Lequios, des Lussions, des Iauas, & autres sans nombre : voire-mais des Royaumes en la terre ferme de l'Inde, comme ceux de Cochinchine, Chiampa, Sian, Malaca, & encore (cōme disent quelques vns) les Royaumes de Coromandel, Narfinga, & Calicut, avec l'Isle de Ceilan : mais il se sont retranchés eux mesmes, & pour faire que le corps de leur estat fust plus sain & entier, ils en ont tiré le sang superflu, se despouillant de leur plein gré, de tous les

les autres Royaumes qu'ils possédoient, afin que cela n'apporlast du preiudice au leur, & qu'ils ne fussent contraincts de les aller secourir ou deffendre, quand quelqu'autre les voudroit enuahir. Et à ceste occasion ont ils quitté depuis peu de temps en ça le Royaume de Coraï, qui leur estoit assés commode pour estre fort proche: car il n'y a qu'un bras de mer entre deux, comme a esté dit, & encore l'on y peut aller par terre, parce que c'est tout à un tenant. Mais comme ces années passées les Japonois pre- *Ont quis*
tendans se rendre maistres de la Chine, y fussent entrés avec vne *se depuis*
armée de cent cinquante mil hommes, les Chinois, pour deffen- *pen le*
dre ce païs, qui estoit sous leur domaine, & pour uoir au dâger, *Roya-*
qui les menaçoit, assemblèrent promptement vne grosse puissan- *me de*
ce, avec laquelle ils firent teste aux Japonois: lesquels à raison *Coraï.*
de la resistance qu'ils trouuerent, furent contrains de se retirer, ayant perdu 50. mil hommes.

Or apres que la paix fut faicte, le Coraï estant demeuré aux Chinois, ils le retindrent encore deux ou trois ans: mais en fin ils l'ont du tout quitté, partie afin qu'ils ne fussent contrains d'amoindrir leurs forces pour le conseruer, partie à cause qu'on ne trouuoit aucun Mandarin, qui voulut aller gouuerner ce païs. Car ils estiment que c'est vne des plus grandes miseres, qui leur sçeut arriuer, que d'estre enuoyés hors de la Chine, encore que ce soit pour gouuerner un Royaume. D'auantage bien qu'il y ait encore quelques Isles & Royaumes, qui ont esté jadis possédés par les Chinois, auxquels pour ceste cause ils font hommage, & leur doibuent payer certain tribut: si est-ce que le Roy ne se sou- *Ne se*
cie aucunemêt, qu'ils le payent ou non, ny qu'ils luy fassent quel- *soucient*
que recognoissance. Comme l'on void és Isles de Luçon, main- *point que*
tenant appellées Philippines, à cause que les Espagnols s'en sont *leurs tri*
emparés du temps de Philippe 2. Roy d'Espagne. Car les habi- *butaires*
tans d'icelles faisoient jadis hommage au Roy de la Chine; mais *les reco-*
depuis que les Espagnols les tiennent, on ne luy enuoye point le *gnois-*
tribut, & il ne luy en chaud rien. Que si quelques autres conti-
nuent de le recognoistre, c'est plustost pour leur profit, que pour
celuy du Roy de la Chine. Car ceux, qui y vont pour luy faire
hommage, s'enrichissent grandement; tant à cause des presens,
que le Roy leur fait, que pour auoir moyen de bien vendre les
marchandises, qu'ils y apportent, & en retirer d'autres, qui leur
valét beaucoup: sans que le port des vnes ny des autres leur coste

*Mar-
chands
qui vont
à la Chi-
ne cōme
Ambas-
sadeurs.*

rien. Car y venās en tiltre d'Ambassadeurs, ils sont desfrayez, non seulement pour leurs personnes, mais encore pour le port de leurs hardes & marchandises par toute la Chine, tant en allāt, qu'en retour. Au moyen de quoy il y a plusieurs marchands Turcs ou Mahometains, qui se disent Ambassadeurs de diuers Princes, nommément du Roy de Perse, du grād Mogor, & d'autres, desquels les Chinois ont quelque cognoissāce, afin que sous ce pretexte ils puissent entrer en la Chine, pour vēdre bien leurs denrées, & en retirer plusieurs autres à leur grand aduantage. Ils feignent estre enuoyés là par leurs Roys, pour faire hommage à celuy de la Chine, avec quelques presens, qu'ils luy apportent: abusans de ceste sorte les Chinois, qui pensent que tous les Roys du monde, ou au moins les plus grands, font hommage au leur: cōbien qu'il en y a, qui n'ignorent pas que c'est vne fourbe; mais ne les en recherchent pas, à cause, qu'ils recourent par leur moyē des choses, qu'ils n'ont point en leur païs, & desquelles ils font grandes. Au reste ces Ambassadeurs, ou plustost marchands, si tost qu'ils sont arriuez à la ville Royale de Paquin, sont enserrez dans vne grande maison destinée tout exprez à cela; dou il ne peuvent point sortir, à cause des gardes qu'on leur baille, sinon quād ils s'en veulent retourner, si grand est le soing qu'ont les Chinois. pour empêcher, que les estrangērs ne cognoissent pas leurs choses, & ne se meslent parmy eux.

*Les in-
cōueniēts
qui pro-
cedēt du
gouuer-
nement
des Chi-
nois.*

*Le grād
pouoir
des Ma-
ndarins
cause de
beau-
coup
d'inim-
icitēs.*

Voilà à peu pres les biens & commodités, qu'il y a en la police & maniere de gouuerner, dont vsent les Chinois: qui neantmoins ont, comme pour contrepoids, d'autres maux & inconueniens, non gueres moindres, ce semble, qui procedent d'icelles. Comme il est quasi necessaire arriuer à ceux, lesquels estans destituez de la lumiere celeste, ne se guident que par la raison humaine, ou par des principes politiques, qui sont bien souuent fouruoyer les plus sages, mesmes en matiere d'estat, s'ils ne sont aydez d'une cognoissance plus que naturelle, & appuyez sur les maximes, que la loy diuine enseigne. Le premier donc vient de ceste trop grande puissance, que les Mandarins ont de faire punir & chastier toute sorte de gens, non seulement les faisant fouetter si cruellement avec ces rouseaux, qu'auons dit, qu'ils en meurent souuent; mais aussi les mettant en prison, les gehennant, & leur faisant autres iniures, afin d'auoir leurs moyens. Car ces pauvres gēs sont biē aisés de se pouoir redimer des coups de fouet,

avec des presens, qu'ils font aux Mandarins : & s'estiment bien-heureux d'eschapper ce supplice à quel prix que ce soit.

Le Roy a bien accoustumé d'enuoyer tous les ans des Visiteurs par les Prouinces, afin qu'ils s'informent si les Magistrats mal-versent en leur office, & font quelque tort à leurs subiects : mais comme ces gens là sont rusez & malicieux, ils s'entendent par ensemble, ou couurent tellement leur faict, qu'il ne peut facilement venir en euidence. Par ce moyen ils font vn grand amas de tout ce, qu'ils peuuent raffter ça & là, ou à tort, ou à droict, sous pretexte de leur office, ou autrement ; brief ce qu'ils emportent de leur Mandarinat vient d'ordinaire à faire vne grosse somme d'argët. Et pour ce, jaçoit que le pais soit si riche & opulent, qu'a esté dict, si est-ce que les païsans & ceux du menu peuple sont fort pauvres, tant à cause des gabelles, tailles, & autres impositions, que le Roy exige, comme pour raison des dons & presens, qu'il leur faut faire necessairement aux Mandarins, pour assouvir leur avarice, & se garantir de ces maux.

Vn autre inconuenient plus grand encore, ce semble, que le premier, & beaucoup plus dangereux, venant de la mesme source, est le peu de valeur, qu'ils ont au faict des armes. Car ceste crainte seruire, en laquelle ils sont entretenus tousiours, comme des petits enfans sous la serule, les rend si faillis de cœur, qu'on diroit que la nature ne leur a donné ny courage, ny mains pour combattre, n'y ayant soldats en tout l'Orient (comme disent les Portugais) qui soient plus poultrons & coïiards, que les Chinois. Ils executent leurs entreprises de guerre plustost par finesse, ou par multitude de gens, que par force & vaillance. Mais s'ils n'estoient entretenus toute leur vie en ceste crainte des Mandarins, & qu'ils s'exerceassent vn peu plus aux armes, il est croyable, qu'ils seroient braues soldats. Car ils ont vn bon corps, & assés grand, les membres bien formez, & sont pour la plus part gens vigoureux. Outre ce ils mangent beaucoup, & se nourrissent de bonnes viandes. Brief ils n'ont point faute d'esprit, ny de dextérité aux mains, si le cœur ne leur manquoit. Et de fait ceux, qui demeurent és garnisons proches des Tartares, sont estimés bons soldats, & repoussent vaillamment leurs ennemis, quand ils les viennent attaquer. Ceux aussi, qui demeurent sur la coste maritime de la Prouince de Chinchéo, se sont rendus beaucoup plus couragenx, depuis quelque temps en ça. Car les Japonois ayant

*Et du
peu de
courage
des Chi-
nois en
la guer-
re.*

ces années passées pris la coustume d'aller piller & fourrager tout le plat país d'alentour : tellement que cent ou deux cens d'iceux , mettoient en fuyte plus de deux mille Chinois , & en amenoient plusieurs captifs , avec vn grand butin ; maintenant , qu'ils y vont en plus grand nombre , ils n'en ont pas si bon marché , y estans bien souuent battus. D'autre part à raison du peu de communication , qu'ils ont avec les estrangers , ils s'estiment les premiers hommes du monde , comm'il arriue maintesfois à ceux , qui n'ont iamais perdu de veü le clocher du lieu , ou ils sont nez ; si qu'ils disent haut & clair , que toutes les autres natiõs sont barbares , & aueugles : & qu'eux seuls sont clair-voyans. Toutesfois depuis que les Portugais & les Espagnols trafiquent là , ils en ont faict autre concept , & disent qu'à la verité les Europeans y voyent bien d'un œil , mais que les autres sont aueugles de tous deux , & n'y voyent goutte en matiere d'estat , ou de police ; & n'ont point d'industrie pour faire les choses artificielles , comme eux. Sur ce il aduint vn plaissant traict à quelques Peres de la Compagnie , lesquels deuisans vn iour familièrement avec quelques Chinois gens d'auctorité , comm'ils leur racontoient le grand pouuoir que nostre S. Pere le Pape a sur tous les Chrestiens , & les Princes mesmes , adioustans que ceste dignité estoit donnée par election , il en y eut de la troupe qui leur dirent , que s'ils retournoient en Europe , on les feroit Papes : & la raison qu'ils en donnoient (bien que couuertement) c'estoit par ce qu'ils surpasseroient tous les autres hommes d'Europe , ayant estudié en leurs liures ; lesquels (à leur iugement) peuuent rendre vn homme parfait & consommé au gouuernement d'un estat : si grande est l'opinion , qu'ils ont d'eux mesmes. De la mesme source vient le peu d'humanité , & de courtoisie , qu'ils monstrent enuers le estrangers : si qu'il semble , que le droit d'hospitalité empreint en nostre nature , n'ait aucun lieu parmy eux. Tesmoing les Portugais , qui depuis si long temps trafiquent en leurs hautes ; & neantmoins ils les traictent , & les soubçonnent , comme s'ils estoient leurs ennemis.

La grande opinion qu'ils ont d'eux mesmes.

L'inhumanité des Chinois enuers les estrangers.

La source de beaucoup de maux en la Chine. Brief ce qui apporte beaucoup de mal-heurs à la Chine , c'est que plusieurs , qui ont crainte des prisons , ou des coups de fouet , soit pour auoir commis quelque crime , soit pour raison de quel-
qu'un de leurs parens , qui estant coupable se sera sauué (car tous les parens du refugé sont mis en prison , & là detenus miserable-

mêt, iusques à ce qu'ils ayêt représenté au Iuge le mal-faïcteur;) plusieurs, dy-ie, pour se garantir de tels maux, & n'ayans moyen de viure d'ailleurs, se rendent voleurs ou pyrates, de sorte qu'il y a vn grand nombre de telle racaille, mesmement és Prouinces, qui sont sur la coste de la mer. Ceux-cy donc pour trouuer quelque chose que piller & desrober, vont courir ça & là, se iettent à l'impourueu quelquesfois sur les Isles, d'autres sur les lieux maritimes de la Chine, qu'ils pillent & saccagent, emportans tout ce qu'ils trouuent, & avec ce commettent vne infinité de meurtres, violemens, & autres meschancetés. Et bien que les Mandarins de guerre vont à la chasse de ces pyrates avec les flottes, qu'ils tiennent tousiours prestes, pour cest effect; si est-ce que l'on re-^{Mescha.}çoit souuentefois autât, ou plus de dommage de ces flottes, que des mesmes coursaïres. Parce que si elles rencontrent quelques nauires de marchands, encore qu'ils ne soient ny pyrates, ny ennemis, on les attaque neantmoins, & les ayant prins on coupe la gorge à tous ceux, qui sont dedans, afin que personne ne puisse descouvrir le faïct: puis les soldats apportent les testes de ceux qu'ils ont ainsi volé & tué aux Mandarins de lettres, disant que ce sont des testes de Coursaïres, afin d'auoir le salaire qu'on a accoustumé de donner à tous ceux qui apportent la teste de quelque escumeur de mer. Mais (ce qui est encore plus detestable) les soldats de ces flottes descendent quelquefois à terre, & apres auoir pillé & saccagé quelque bourg ou village, qui sera près du riuage de la mer, ils couppent la gorge à tous les habitans d'iceluy, & emportent leurs testes, faisans accroire que ce sont des pyrates qu'ils ont tué: de sorte que non seulement ils pillent & tuent ces bonnes gens, mais encore reçoïuent recompense de leur meschanceté, qui est quelque piece d'argent. Ce sont les principaux inconueniens, qui se trouuent en ceste maniere de gouverner, quant à l'estat mesme: toutesfois le plus grand, & le plus pernicieux de tous est; que la Religion principale partie de la Iustice, leur est en moindre recommandatiō que le reste, ainsi que nous allons dire maintenant.

*De la Religion des Chinois, & si la loy Chrestienne leur a esté au-
fois annoncée: ensemble de la difficulté, ou bonne disposition
qu'il y a pour l'y planter.*

CHAPITRE XVI.

*Les Chi-
nois sont
pour la
pluspart
Athées.*



*Ils ne font
point cas
de leurs
Prestres.*

YANT à parler de la Religion des Chinois, ie ne
sçay bonnement qu'en dire, veu qu'ils semblent n'en
auoir quasi point. Car ils sont pour la pluspart A-
thées, c'est à dire sans croyance d'aucun Dieu, mes-
mement les gens lettrez; parce qu'ils voyent bien
par le discours de la raison, & l'estude des lettres, que ceux qu'on
leur propose communement pour Dieux & temples & ailleurs,
ne le peuuent estre; & d'autre part comm' ils n'ont point la co-
gnoissance du vray Dieu, ils se iettent à yeux clos dans le preci-
pice de l'Atheïsme, ne recognoissans aucune Deité, ny vraye ny
fausse: combien que tous quasi font semblant d'adorer les Idoles:
mais ils ne sont pas si deuotieux enuers icelles, que les Japonnois
Idolâtres. D'ailleurs comme ce sont gens tant addonnez aux
choses de l'estat, & si grands politiques, ils font plus de compte
de celles qui appartiēt à la police, que de celles qui touchent à la
Religion ou au culte diuin, tellement qu'ils ne frequentent guere
les temples de leurs Idoles: & quant à leurs Sacrificateurs, qu'ils
appellent *Bonxes*, (de mesme que les Japonnois) comme disent
quelques vns, ou selon d'autres *Hoxions*, ils en font si peu de cas,
cōtre la commune coustume des autres nations, mesmes Payen-
nes, qu'on les tient communement pour les personnes les plus
rauellées qu'il y ait en la Chine, & au mesme rang que la lie du
peuple. Car ils sont subiects aux Mandarins ou Magistrats secu-
liers, de sorte que le moindre d'iceux les peut faire fouëtter &
chastier tout ainsi que le plus vil & abiect de la populace. Ils
parlent aux Mandarins les genoux en terre, bien que aucunesfois
par grande faueur, on les faict leuer, & tenir en pied, lors qu'ils
traictent avec eux. Les autres aussi n'en font pas plus de compte,
pour l'opinion qu'ils ont, que ce sont gens peu honnestes, & du
tout ignorans, lesquels ne se mettent de ceste profession, que
pour gourmander certaine pension, que le Roy leur baille tous
les ans. Somme qu'il n'y a gens plus mesprizez en la Chine que
ceux-cy. Voila pourquoy les Peres de la Compagnie, qui desia

auoyent pris au commencement leur habit, pensans estre bien venus, s'ils se disoyent Bonzes ou Sacrificateurs du vray Dieu, furent tout vn long temps fort bassouëz, & peu ou quasi point hantez des gens de marque; parce qu'ils s'estimoient deshonnez de traicter avec des Bonzes estrangers, com' ils se disoyent, & beaucoup plus d'escouter ou receuoir leur doctrine: mais depuis qu'ils ont pris l'accoustrement des lettrez, qui est fort honnelleste, ils sont entgez bien auant en la bonne grace des lettrez, & ont acquis beaucoup de credit & reputation, ainsi que nous verrons cy apres. Or afin de reduire à certains chefs ce qu'on peut dire de la Religion des Chinois, nous traicterons premierelement des faux Dieux qu'ils adorent, & de la creance qu'ils ont: puis des sacrifices qu'ils leur font, & de leurs Sacrificateurs, ou autres personnes dediees particulièrement au culte des Idoles; Troisiemesment des sorts, dont ils vsent, quand ils veulent entreprendre quelque chose, pour sçauoir si elle leur reüssira bien ou mal; & finalement des ceremonies qu'ils gardent en leurs sepultures, & à l'enterrement de leurs peres & meres.

Les Idoles qu'ils adorent.

Quant à leurs faux Dieux, ils en ont vn nombre presque infiny. Car plusieurs adorent le Soleil, la Lune, & les Estoiles, voire tout le Ciel, estimans que de luy seul nous vient tout bien ça bas: mais outre ceux-cy ils ont vne infinité de statues & Idoles, faictes de diuerses matieres, qu'ils disent estre les Images de certains hommes Illustres, qui ont (à leur aduis) vescu fort sainctement, ou qui ont bien escript des choses morales. Ils mettent au mesme rang les inuenteurs de tel art que ce soit, & tous ceux desquels ils ont receu quelque signalé benefice, ou en public, ou en particulier. Tellement que plusieurs adorent comme Dieux leur pere & mere, ou autres parens & amis, & leur drescent des statues ou images, leur bastissent des temples, leur offrent des sacrifices, leur presentent de l'encens, & font tels autres actes, qui appartiennēt seulement au culte du vray Dieu. Mais (ce qui est encore plus detestable) ils deferent cet honneur non seulement à ceux qui sont desia trespasssez, ains souuentesfois aux viuans mesmes. Il en y a pareillement beaucoup, qui adorent les Demons & monstres infernaux, lesquels ils depeignent de la mesme façon que nous, avec des serpens & couleures entortillez tout au tour du corps, qui semblent vomir des flammes de feu par la bouche. Il les honnorent neantmoins en telle figure, & leur offrent des sacri-

*Mettre
leurs pa-
rens au
rang des
Dieux.*

fices, non pas pour en impetrer quelque bien, mais pour empêcher le mal qu'ils craignent recevoir d'eux. Car ils ont souvent des visions horribles des Demons, ce qui fait qu'ils les redoutent merueilleusement. Ils tiennent ceste multitude innombrable d'Idoles non seulement dans les temples & oratoires, tant publics que priuez, mais aussi en leurs maisons, és barques, és nauires & ailleurs, trainans par tout ou ils vont leurs Idoles particulieres, qui sont partie de relief, partie de platte peinture. Or bien que les Chinois, principalement les gens de lettres ne soyent pas d'ordinaire fort soucieux du culte de ces Idoles, ores qu'ils en tiennent tousiours, ainsi qu'a esté dict, à l'entrée de leurs maisons: toutesfois il est bien difficile de les leur oster, pour deux raisons: l'une est parce qu'ils possèdent ces faux Dieux particuliers, comme vn heritage qui leur a esté laissé de leurs peres, lequel ils ne peuuent alienier sans grande note d'infamie. Car s'ils font cela ils seront estimez ingrats, & desobeyssans à leurs pere & mere, (qui est le plus grand peché de tous, selon l'opinion des Chinois) à cause qu'ils recommandent fort ces Idoles à leurs enfans, afin qu'en toute la posterité se cōserue la memoire de leurs deuanciers. Que s'ils mettent si grand soing, à conseruer l'heritage des choses temporelles, que leur pere & mere leur ont laissé, qu'est-ce qu'ils ne feront pour perpetuer le culte de leurs Idoles? D'auantage, comme ils ont communement opinion, que la plupart de ceux-là, desquels ils adorent les statues, ont mené vne sainte vie, & plusieurs encor d'iceux ont fait des choses merueilleuses, ce leur semble vn paradoxe, si quelqu'un leur veut persuader qu'ils ont esté meschans, & semblables au reste des hommes. Que si l'on pouuoit leur obiecter les adulteres, rauissemens, & autres abominables pechez, comme l'on faisoit anciennement de ceux que les Grecs & les Romains adoroyent, ce seroit vn bon moyen, pour les retirer du culte d'iceux: mais l'on ne peust riē descouurir de semblable en leurs faux Dieux. Iacoiť donc que les Chinois soyent assez faciles à persuader qu'il y a vn Dieu, Createur & Seigneur de toutes choses, & que de fait plusieurs d'iceux le croient, & l'appellent le *Xanti*, c'est à dire le Roy souuerain, tellement qu'ils mettent volontiers son image parmy celles de leurs faux Dieux, & mesmes luy donnent la plus honorable place, estimans les autres comme ses vassaux & seruiteurs; toutesfois quand il est question de leur persuader qu'ils

*Plusieurs
croient
qu'il y a
vn Dieu
Createur
de l'Y-
niuers.*

iettent

iettent au feu ces Idoles, & ne les adorent plus; veu que Dieu ne veut point de compagnon, car cela leur fait vn grand mal au cœur, ainsi que les Peres de la Compagnie escriuent. Quant à leur croyance, ceux qu'on estime les plus sages d'entre eux, suyuent à peu pres les songes de Pythagoras, touchant le transport des ames d'un corps à l'autre: de façon qu'il en y a plusieurs, mesmes des pauvres gés, qui ieusnent l'og temps, afin d'obtenir ceste faueur de leurs faux Dieux, que de naistre derechef en quelque famille plus riche, & plus honorable. Pour la mesme raison aussi apres la mort de leurs pere & mere, ils ne tuent point aucune beste, de peur que l'ame d'iceux ne soit entrée en quelqu'un de ces animaux.

Plusieurs croyent bien, qu'apres ceste vie il y a des lieux remplis de tous delices & plaisirs, ou les ames de ceux, qui ont bien vescu, s'en vont resiouyr, & d'autres aussi pleins de toute misere, ausquels ceux, qui n'ont pas bien vescu, s'en vont, pour y estre tourmentés. Leurs liures parlent souuent de cela, & en toutes les cités presque, l'on trouue la figure de l'enfer taillée en bosse, & plusieurs Demons aussi laids & espouuentables, que nous le pei- *Qu'elle opinion ils ont de l'enfer.* gnons, lesquels bourrellent les hommes en mille façons & manieres. Somme que c'est vne chose tres-bien representée, mais fort mal creuë des Chinois, cela ne seruant que d'espouental, pour faire peur aux enfans. Que s'il y a quelqu'un qui croye ce que leurs liures en disent, à sçauoir qu'il y a vn lieu, ou l'on endure beaucoup de tourments; il croit aussi qu'apres certain temps, ou nombre d'années, les ames de ceux, qui y vont en sortent, & entrent dans le corps de quelque beste. Ils tiennent communément que le monde a esté fait d'eau, laquelle estant agitée avec grande violence, de l'escume d'icelle, les cieux furent bastis: mais les parties les plus grossieres & espesses, fournirent de matiere à la terre, l'eau se reseruant le reste pour soy. Que si on leur demande, qui est celuy, qui remua l'eau, ils respondent, que d'elle mesme proceda ce mouuement. Mais si on les presse d'auantage, de qui elle a receu ceste vertu & puissance de se mouuoir, ils se mettent à rire, comme voulans dire, qu'il ne faut point s'enquerir plus auant. Ils estiment que les premiers hommes, & les autres animaux, les arbres, & le reste des plantes sortirent de la terre, & qu'au commencement les hommes alloient vagabonds ça & là, se nourrissant du fruit des arbres, & de la chair creuë des ani-

Du commencement du monde.

maux, beuans le sang d'iceux; bref qu'ils menoiert vne vie du tout sauuage, & semblable à celle des bestes, iusqu'à ce qu'ils apprindrent, par la conduite de la raison, à semer des bleds, & se nourrir d'iceux, à bastir des maisons & des villes; là ou ils commencerēt à mener vne façon de vie plus sociable, & par le soing, & industrie de quelques hommes sages qu'ils reueroient & respectoient grandemēt, furent policez & enseignez à viure sous les loix, qu'ils leur establirent. Je laisse à part vne infinité de fables de quelques faux Dieux, ou Deesses, qu'ils racontent, ne les estimant pas dignes d'estre icy inserées.

*Quel
estat ils
font de
leurs
faux
Dieux
& Idoles.*

Or bien que la plus part des Chinois ne soient guere addonnés au culte des Idoles publiques & communes, si est-ce que tous ordinairement ont accoustumé à certain temps de leur rendre quelque espece d'honneur, & de recognoissance; mais c'est plus tost par coustume, que pour estimer qu'ils les faille adorer. Ceux toutesfois qui ont plus de croyance en icelles, brulent des papiers, de l'encens, ou autres odeurs deuant elles: quelques vns aussi tuent des animaux, dont ils leur font sacrifice. Mais quād ils veulent faire grande feste à quelque Idole, duquel ils estiment auoir receu quelque benefice, ils luy presentēt des pouilles, des canarts, & des oyes cuittes, & bien apprestées, avec du riz, & vne teste de pourceau (qui est le mets, qu'ils estiment le plus friand) avec vn grand pot de ce breuuage, dont ils vsent au lieu de vin: mais de toutes ces choses, ils choisissent le pire, pour presenter à l'Idole. Car des volailles ils ne prennent que les ongles; de la teste de pourceau, le groin, comme disent quelques vns, ou selō d'autres, le bout des oreilles, avec quelques grains de riz: puis mettans tout cela dans vn plat, l'arrousent de quelques gouttes de leur breuuage, & le portent sur l'autel deuant l'Idole. Eux cependant font bonne chere du reste, & banquettent deuant icelle, avec grande liesse & resiouyssance. D'oū l'on peut voir le peu de cas, qu'ils font de ceux, qu'ils tiennent pour Dieux. Ils ont vn nombre presque infiny de Bonzes, lesquels viuent tous en commun, & ne se marient point, faisans profession de viure chastement toute leur vie, combien qu'ils soient les plus vilains & abominables de tous. Ils ont vn nombre presque incroyable de Monastres, lesquels s'entretiennent partie des rentes, quelē Roy leur donne, partie des offrandes, que leur font les particuliers. Les femmes ont pareillement force Monastres, ou elles viuent en

*ont vn
grad
nombre de
bonzes.*

commun, à la façon quasi des Nonnains, qui sont de pardeça. Ainsi le Diable fait du linge, taschant par tout d'imiter les ceu-
 ures de Dieu. Elles sont regies & gouvernées par vne d'icelles, *Sûr fort
addition
au fort.*
 qui est comme leur Abbessé. Au reste les Chinois sont fort ad-
 donnés à rechercher curieusement les choses à venir; tellement
 qu'ils n'entreprennent iamaïs aucun affaire d'importance, com-
 me est de faire quelque long voyage, de se marier, ou choses sem-
 blables, sans auoir au prealable recherché par le fort, si cela leur
 doit succeder bien ou mal, & s'ils obtiendront ce qu'ils pre-
 tendent ou non. Or la façon avec laquelle ils iettent le fort est
 fort ridicule, s'il faut croire à ce qu'en rapportent des graues au- *Mess.
l. 6.*
 theurs. Car ils prennent deux petites demies boules, grandes
 comme deux demies noix, lesquelles ils passent dans vn filet, &
 les iettent fortuitement deuant l'Idole: si toutes deux se trouuēt
 le rond en haut, ou bien l'vne seulemēt en bas, & l'autre en haut
 (ce qu'ils tiennent pour vn fort mal-heureux) ils disent mille in-
 iures & outrages à l'Idole: mais par apres, comme s'ils se repen-
 toient du tort, qu'ils luy ont fait, ils taschèt par flatteries, vœux,
 & prieres de l'appaiser, & de se le rēdre propice: puis iettent de-
 rechef le fort, & si nonobstant cela, les demies boules ne se trou-
 uent pas toutes deux le plat en bas, ils prennent la pauvre Idole,
 & la traictent encore plus mal, qu'au parauant: car apres les pa-
 rolles viennent les coups: ils la fouettent; ils la iettent dans le feu,
 mais l'en retirent bien tost, si ell'est de bois; la plongent dans
 l'eau, comme s'ils la vouloient faire noyer. Mais apres ils taschent
 encore de l'amadoüer, par beaucoup de belles parolles & pro-
 messes qu'ils luy font, si le fort tombe tel qu'ils desirent. *Façon
ridicule
qu'ils
ont en
iettant
le fort.*
 Que si les deux demies boules s'arrestēt toutes deux le plat en bas, lors
 ils se mettent à chanter des vers à la louange de l'Idole, luy ren-
 dans graces du bon fort, qu'ils ont eu, & luy offrent des poulles,
 des oyes, des canarts, & la teste d'vn pourceau, ainsi qu'a esté dit.
 Voyla combien est grande la sottise de ceux, qui semblent faire
 quelque cas des Idoles. Mais les autres, qui n'ont pas tant d'opi-
 nion de ces faux Dieux, taschent de sçauoir ce qui leur doit ad-
 uenir en consultant les Deuins, qui sont tous des charlatans, ca-
 quetteurs, & menteurs, les trompans à chascun coup. Car bien
 souuent ils disent tout le contraire de ce qui aduient; encore
 qu'il en y ait qui predisent quelquefois les choses, selon qu'elles
 arriuent: mais c'est plustost par cas fortuit qu'autrement, ou

*Conful-
tēt leurs
affaires
avec les
deuins.*

selon que leur maistre le Diable le sçait. Car à ce qu'on peut col-
liger de plusieurs signes, ils ont intelligence avec luy. Or jaçoit
que les Chinois soient gens de bon esprit, & qu'ils cognoissent
bien que la plus part de ces donneurs de baliuernes les trompēt,
ne sçachant point au vray ce qu'ils disent, veu qu'ils les attrapent
à chaque coup en menterie; si est-ce qu'il en y a peu, lesquels
deuant qu'entreprendre quelque affaire d'importance, ne deman-
dent le succès d'iceluy à ces Deuins. Mais ce en quoy ils sont les
plus superstitieux, & sont plus de ceremonies, c'est en l'enterre-
ment de leurs peres & meres, à leurs tombeaux, & au dueil qu'ils
inent à leur mort: parce qu'en cela il leur semble, qu'ils mon-
strent l'amour & l'affection qu'ils leur ont porté durant la vie.

*Fût grād
cas de
l'honneur
enuers le
pere &
la mere.*

Car les Chinois sont sur tout autre nation grand estat du respect
& de l'honneur qu'on doit aux peres & meres: tellement qu'a
ceux, qui leur sont desobeyssans, sont constituées par leurs loix
des griesues peines. Plusieurs grands personnages, mesmes entre
les Mandarins, ont accoustumé de demander congé au Roy de
laisser leur office, pour s'aller tenir à leur maison avec leurs pere
& mere, alleguant qu'ils sont desia vieux, & qu'ils desirent les al-
ler seruir. Ceste demande est trouuée si iuste, qu'elle leur est
octroyée ordinairement. Apres que leurs pere & mere sont tref-
passés, tous leurs enfans & filles, depuis le Roy iusques au moin-
dre du peuple, portent le dueil trois ans durant. La couleur de
leur dueil est toute differente de la nostre. Car au lieu, que nous
vsons du noir, ils se seruent de toile blanche, d'où ils font tous
leurs acoustremens, iusques au bonnet mesmes. Les premiers
mois ils se vestent d'un sac fort rude, & se cœignent avec vne cor-
de, comme icy les Freres Mineurs. Vn chacun des Mandarins,
pour grand qu'il soit (hors-mis ceux de guerre) si tost qu'il a re-
çeu nouuelles de la mort de son pere, ou mere, doit quitter l'of-
fice ou dignité, & tout autre charge du gouuernement qu'il a,
voire mesme l'examen, pour acquerir quelque degré, & s'en aller
en sa maison, pour enseuelir sō pere ou sa mere, & porter le dueil
pour eux trois ans durant. Les gens de qualité, qui ont des logis
commodes, ne les enseuelissent pas incontinent apres leur mort:
mais les gardent deux ou trois ans en vne chambre de leur mai-
son, destinée tout exprès à cest effect, qui n'est pas la pire de tou-
tes: & ils vont là chaque iour, pour leur faire la reuerence, &
brûler des parfums deuant: ils mettent aussi quelques viandes

*ce qu'ils
font à
leur
mort.*

sur le cercueil, ou ils sont en depots. A certains temps ils appellent plusieurs Bonzes pour faire leurs ceremonies, & chanter ce qu'ils ont accoustumé, tandis que les enfans, les parens, & les femmes du trespasé se lamentent. En outre, ceux qui portent le dueil, non seulement changent d'habits : mais encore de toutes autres choses presque, dont ils se seruoient auparauât. Plusieurs ne s'asseoyent point sur des chaires, mais sur de petits bancs. Ils font peu de visites, & n'en admettent pas guere. Ils changent iusqu'au papier ou ils escriuēt, en couppant vne piece, & la peignāt d'autre couleur, en signe de dueil. Quand ils se veulent nommer soit es lettres, ou ailleurs, ils ne s'appellent point du nom qu'ils fouloyent, mais d'un autre, comme seroit desobeyssant, voulant signifier que pour sa desobeyssance enuers son pere ou sa mere, il a merité de les perdre. En ce temps-là ils ne se seruent point de du musique : & plusieurs changent leur viure ordinaire en viâdes plus grossieres. Le iour de l'enterrement ils inuient au conuoy leurs parens & amis, qui vont tous vestus de blanc, & un bon nombre de Bonzes (selon les moyens d'un chascun) qui chantent par les ruës, avec la voix, & quelques instrumens de musique, un chant fort lugubre : de façon que celui qui ne scauroit que c'est, voyant l'habit qu'ils portent, & les entendant chanter estimerait (ce dict le P. Pantoja) que ce sont de nos Prestres, ou gens d'Eglise, qui chantent à quelque mortuaire le plein chant. Ils font force petites chappelles, & statues de papier, ou de soye blanche, force guidons & enseignes, qu'ils portent audict conuoy. De là on peut voir comme le Diable contre-fait les enterreimens des Chrestiens parmy les Infidelles, comme aussi plusieurs autres choses de l'Eglise, pour s'esgaler à son Createur, & deceuoir le monde par la ressemblance de la Religion fausse avec la vraye. Mais retournons aux funerailles des Chinois.

La quaiſſe, ou ils mettent le corps du trespasé, est fort grande, faite d'ordinaire d'un bois le plus excellent qu'ils puissent recourir, & avec grand artifice. Car ils constituent vne grande partie de leur felicité apres ceste vie, principalement en deux choses : l'une est en la matiere, & en la forme du cercueil, dans lequel leur corps doit estre mis apres leur mort. De façon qu'ils n'attendent pas que quelqu'autre se leur face faire, & quand bien ils en lairroyent le soing à quelqu'un, le corps mort ne pourroit estre conserué si long temps qu'il faut, pour le faire avec la ma-

*Le conuoy
à leur
enterre-
ment.*

*Ils font
grâd cas
d'estre
ensepeli-
ez en un
bon cer-
ueil.*

nufacture & artifice qu'ils ont accoustumé, tellement qu'en cecy (comme en vne chose de grande importance) ils ne se fient pas à leurs enfans propres, ains cherchét eux mesmes à loisir durant leur vie (si la mort ne les surprend à l'impourueu) quelque bois incorruptible, ou le moins subiect à corruption, qu'ils puissent trouuer: les tables sont espesses de 4. 6. ou 8. doigts, & tant pour ceste cause, que pour estre lesdites quaiſſes bien bouchées, les corps se peuuent tenir en la maison, sans qu'ils rendent mauuaise odeur assez long temps. Il en y a qui despendent soixante dix, quatre vingts ou cent escus à cela, & s'estiment heureux s'ils peuuent rencontrer vn bon bois, & vn artisan bien expert pour le faire à leur gré: comme au contraire ils pensent estre fort disgraciez de se trouuer n'en auoir pas à l'heure de la mort. Ce qui n'aduient guere souuent.

Et du lieu de leur sepulture. L'autre chose de laquelle ils sont fort soigneux auant leur mort, est du lieu de la sepulture: car auant de faire le choix d'iceluy, ils iettent plusieurs fois le sort: & sont en cela si retenus & considerez, qu'on diroit que de là depend leur souuerain bien. Et de faict ils se persuadent que du lieu de leur sepulture, depēd le bon-heur tant d'eux mesmes, que de leurs successeurs: si qu'ils demeureront quelque fois vn an entier à se resoudre, si leur tombeau doit regarder le Nort, ou quelqu'autre partie du monde. Et les plus grands procez qui soyent, viennent du lieu des sepultures: lesquelles ils mettent tousiours hors de la ville, és champs ou és montagnes: là ou ils bastissent de brique ou de pierre vne grotte sous terre, dans laquelle ils mettent la quaiſſe ou est le corps, la bouchent tres-bien, & à certain temps ils y vont faire quelques ceremonies, & y apportent des viandes. On tient pour vn mauuais augure, que d'enseuelir vn mort dās vne ville: & s'ils scauoient que quelqu'un y fust enterré, bien que ce fust le premier homme de la Chine, ils l'en iroyent tirer, pour le mettre hors de la ville. Voila ce que nous auons peu scauoir des sepultures, & autres choses de la Religion des Chinois. Voyons maintenant si la foy Chrestienne leur a esté autresfois publiée.

Si l'Apôstre S. Thomas à presché en la Chine.

Xan. 6. p. 1. lib. 2. ep. 3.

Le B. P. François Xavier en vne lettre, qu'il escriuist de l'Isle d'Amboino, du 10. May, 1546. dict qu'estant à Malaca, il rencontra vn marchand Portugais, qui ne faisoit que venir de la Chine, & luy dict qu'estant là, il auoit esté interrogé par vn Chinois (qui sembloit estre homme d'honneur, & alloit bien

souuent à la Cour du Roy) si les Chrestiens mangeoyent de la chair de pourceau. Le Portugais luy respond, que les Chrestiens ne faisoient point difficulté d'en manger; toutesfois qu'il desiroit sçauoir pourquoy il luy demandoit cela. Le Chinois luy dict lors, qu'il y auoit vne certaine nation au milieu de la Chine, enclose de montaignes, fort differente en mœurs & coustumes des autres naturels, laquelle ne mängeoit point du tout de la chair de pourceau, & gardoit fort religieusement plusieurs festes. Je ne sçay (adiouste le Pere) si ceux que le Chinois descriuoit, estoient de ces Chrestiens, qui sont vne meslange de ceremonies Iudaïques avec la Religion Chrestienne, comme sont les Ethiopiens, qui demeurent auprès de la mer rouge, ou bien des Iuifs, qui sont dispersez par tout le môde. Car on tient pour tout asseuré, qu'ils ne sont point Sarrafins. Et vn peu apres il dict qu'il y en a, qui assurent que l'Apostre S. Thomas est arriué iusques à la Chine, & qu'il a conuertiy à la foy Chrestienne vn grand nôbre des habitans. Et plus bas il adiouste que telle estoit l'opinion de plusieurs Euesques, qui auoyent eu charge des Chrestiens de S. Thomas, comme l'vn d'eux assura aux Portugais, lors qu'ils vindrent au commencement és Indes.

A quoy fauorise beaucoup vn chef d'vne lettre, qu'escriit de l'onzième Decembre 1605. le P. François Ros de la Compagnie de Iesvs, à present Archeuesque d'Angamale, lequel fucillerant les liures escrits en langue Chaldaïque, dont se seruent les Chrestiens de S. Thomas, qui habitent és montaignes du Malabar, pour les nettoier des erreurs, que les heretiques Nestoriens y ont inferé, dict y auoir trouué, que l'Apostre S. Thomas institua huit Archeueschez en ces quartiers des Indes: desquels il'en y a aucuns qui se sont du tout perdus, & leur nom aussi. Car encore que les noms soyent escrits en langue Chaldaïque, toutesfois on ne sçait ce qu'ils signifient. De ceux, dict-il, dont nous auons quelque cognoissance, le premier est *Hendu*, c'est à dire Malabar, l'autre Socotora, l'autre Cambaya, l'autre Mogor, l'autre la Chine, & l'autre la grande Chine, qui doit estre le Catay (adiouste le mesme.) Or de ce qui a esté dict, l'on peut tirer la vraysemblance qu'il y a, que l'Apostre S. Thomas ait presché la foy de Iesvs-Christ en la Chine: outre qu'il y a au mesme pais d'autres coniectures: car on y void mesmes à present (ainsi que racontent d'autheurs dignes de foy) vne image en bossé d'vne

*A insi-
tué 8.
Arche-
ueschez
en l'In-
de, &
l'on est
de la
Chine.*

*Mari-
ques du
Christia-
nisme en
la Chine.
Maff. l. 6.*

Lucena
l. 10. c. 24

1. p. l. 2.
c. 1.

femme de grande stature, qui porte vn petit enfant entre les bras: deuant laquelle encore aujourdhuy ils allument des lampes, & luy portent grand honneur. Aucuns pensent probablement, que c'est l'Image de Nostre Dame, bien que les Chinois ne scauent dire que c'est. Il y en a aussi, qui assurent, qu'on y void les pourtraicts de douze hommes, qui portent les mesmes marques, que nous auons accoustumé de donner aux Apostres. Finalement l'on y trouue (à ce que rapporte l'auteur de l'histoire de la Chine) vne statuë que quelquesvns pésent représenter le mystere de la tres-saincte Trinité, bien qu'elle soit d'une estrange & prodigieuse facture: car elle n'a qu'un seul corps, avec deux mains, & deux pieds, mais des espaules luy sortent trois testes, qui se regardent l'une l'autre, & les Chinois disent que ces trois testes signifient trois distinctes personnes, qui n'ont qu'un mesme vouloir, tellemēt que ce qui plaist à l'une, plaist aussi aux autres: & au cōtraire, ce qui desplaist à l'une desplaist encore aux autres deux. Et il est croyable, que par là ils veulent représenter les trois diuines personnes, qui n'ont qu'une mesme substance, ayant retenu ceste cognoissance, ores que fort confuse de la predication de l'Apostre S. Thomas, comme l'on estime aussi des trois filets attachez à vn nœud, que les Brachmanes portent en l'Inde.

S'il y a
encore
des Chre-
tiens en
la Chine
Lucena
l. 10. c. 24

Quant à ce que le B. P. Xavier dict, qu'au rapport de ce Chinois, il semble y auoir encore des Chrestiens en la Chine, est cōfirmé par ce qu'en escrit le P. Lucena, qui dict que quelques Portugais ayans esté pris des Chinois (peut estre que c'estoyent des compagnons de Martin Alphonse Mello, duquel nous parlerons cy apres) comm'ils estoyent menez captifs, se trouuans plusieurs lieux au dedans du pais, ils vont rencontrer tout auprès d'un village, vne grande croix faicte de pierre bien elabourée, laquelle prosternerz à terre, ils adorèrent avec grande deuotion, & beaucoup de larmes. Ce qu'ayant veu les habitans de ce lieu, vindrent faire le mesme, & se mettans à genoux avec les mains leuées au Ciel, baisoyent le pied de la Croix, chantans en leur langue ces parolles, IESVS-CHRIST, IESVS-CHRIST, Marie tousiours Vierge le conceut, & Vierge l'efanta, & Vierge demeura. A quoy les Portugais repartirent que c'estoit la vraye foy, qu'il falloit suiure: dont les autres cognoissans qu'ils estoyent Chrestiens, les menerent à leur village, & les traicterent avec grande charité. Or ils leur conterent & leur monstrerent escrit en vn liure imprimé

primé il y a plus de deux cens ans, qu'un personnage de sainte vie nommé Matthieu Escandel Hongre de nation, & natif de la ville de Bude, apres auoir esté quelque temps Hermite en la montagne de Sion en Hierusalem, passa de là aux Indes, & entra par le Royaume de Sian iusques en ce lieu de la Chine: là ou ayant resuscité cinq morts, & fait plusieurs autres miracles, il gaigna à la foy de IESVS-CHRIST beaucoup de Chinois: mais en fin il fut martyrizé par les Bonzes, ainsi que ces Chrestiens là racontent: lesquels se disoient estre yssus de ces Chinois, qui auoient esté cōuertis à la foy par son moyen. Il y a encore d'autres Chrestiens, desquels parle le P. Emmanuel Diaz, en vne lettre qu'il escrit de Paquin du 15. Septembre 1602. en laquelle il raconte, que le P. Matthieu Ricci estant allé au Serrail ou l'on a accoustumé de loger les estrangers, qui viennent à la Cour de Paquin, il y trouua quelques passans Mahometains, qui luy dirent, qu'en la Prouince de Xenfi (la plus Septentrionale de toutes celles de la Chine) en vn lieu nommé Xuchéo, habitoient des hommes blancs de couleur, portans la barbe longue & espaisse: lesquels auoient en leurs bourgs des Eglises, avec des cloches, & adoroient Isa (c'est à dire IESVS-CHRIST) & Marie. On leur monstra vn Crucifix, leur demandant s'il y auoit encore de telles Images, & ils dirent qu'ouy. Si adioustoient que les Prestres de ces Chrestiens guerissoient de plusieurs maladies, sans aucune medecine; de façon que les Gentils mesmes les appelloiēt, quand ils estoient malades, pour les remettre en santé. Le P. Ricci entendant cela, resolut de leur escrire par la poste du Roy en langue Chinoise, (laquelle ils entendent) afin de sçauoir si cela estoit vray, & si c'est le Royaume de Catay, duquel a esté parlé cy dessus.

Mais ores quel Apostre S. Thomais ait presché le S. Euangile aux Chinois, & qu'il y ait encore en la Chine quelques vestiges du Christianisme, & peut estre aussi quelques vns, qui en font profession: si est-ce que par tout le reste du Royaume, la memoire de la foy & Religion Chrestienne, y est du tout esteinte: & il semble bien difficile de l'y remettre pour beaucoup de raisons. Car en premier lieu les Edicts du Roy y mettent vn grand obstacle, estant par iceux expressement defendu sousb griefues peines, de n'innouer aucune chose, specialement en la Religion: & comme les Chinois sont si obeysans à leur Prince, qu'ils n'osent pour la seuerité des peines, contreuenir au moindre de ses com-

Et Annales de l'année 1602. & 1603. en Italien.

Les emperes des Chinois à recevoir la foy.

mandemens ou deffences, il est aisé à voir la difficulté qu'il y a, d'establiſſir la foy Chreſtienne, meſmes auant que d'auoir gaigné le Roy: & pour ce le B. P. Xavier, & les autres Peres de la Compagnie ont eſtimé, qu'il falloit commencer par là, autrement qu'il n'y auoit rien d'aſſeuré. La difficulté encore d'auoir entrée en ce Royaume pour les eſtrangers eſtant ſi grande, qu'a eſté dit, & que nous verrons encore cy apres, il eſt bien mal-aisé de pouruoir de Predicateurs eſtrangers à vne nation ſi grande, que ceſte-cy. Combien que ſi vne fois les Chinois ont gouſté de l'eſprit de Dieu, comme ils ſont gens d'entendement, & addonnés aux lettres, ils pourront dans peu de temps ſeruir de Predicateurs, comme deſia il en y a qui le ſont; voire de Prelats & bons Eueſques, ſans qu'il ſoit de beſoing d'en aller querir ailleurs. L'on a toutesfois deſcouuert depuis peu de temps en ça vne autre grande difficulté, qui eſt de leur arracher les Idoles particulieres, & priuées, pour ce qui a eſté dit. La pluralité auſſi & multitude des femmes, qu'ils ont, eſt encore vn grand empeschement, & peut eſtre le plus difficile à oſter, que le reſte. Je laiſſe à part les autres voluptez, delices, & plaiſirs, eſquels ils ſont tous engoulſés pour la fertilité du païs, & l'aſſuance des commoditez & biens de la terre. D'ou s'enſuit en la plus part d'iceux l'atheïſme, duquel il eſt bien plus mal-aisé de retirer vn' ame, que de l'Idolatrie. Les Bonzes pareillement s'opposent autant qu'ils peuuent, au cours de l'Euangile, tourmentant beaucoup les Chreſtiens par leurs crieries, ruſes, meſchancetés, & embuſches: tant par ce qu'ils ne ſe trouuent plus à leurs feſtes & ſolemnités, que pour ne les appeller, comme ils ſouloient, en leurs infirmités ou mortuaires, ny à la naiſſance de leurs enfans, ou à leurs eſpouſailles, ny au commencement de quelque ſabrique, & ſemblables actes, d'ou les Bonzes retiroiēt beaucoup de profit. Finalement la preſomption qu'ils ont d'eux meſmes, leur ambition & orgueil, qui eſt choſe ſi ordinaire parmy eux, contrarient grandement à l'humilité, que **IESVS-CHRIST** noſtre Sauueur a enſeigné, & par exemples & parolles à ceux, qui le veulent ſuyre.

Voila les principaux empeschemens, que les Chinois ont, pour receuoir la lumiere de la foy: ſi grands qu'il ſemble que la Chine (comme quelqu'un a remarqué) eſt ceſte forte place, que l'ennemy de noſtre nature a remparée & ſi bien fortifiée, qu'il penſe n'en pouuoir eſtre debouté, fermant toutes les adueniës: afin.

que la grace celeste n'y puisse entrer. Mais ses boulevards & fortifications seront aisément mises par terre, si vne fois la lumiere de la foy, & la diuine grace y peuuent entrer. Car ce sont les armes avec lesquelles nostre Seigneur a deffait & vaincu le Diable, qui se tenoit aussi fort dans l'Empire Romain, luy faisant prestre ioug à sa sainte foy. Ains il est croyable que d'autant plus qu'il y a de la difficulté à l'y planter, d'autant mieux y prendra elle racine, & y croistra d'auantage pour beaucoup de qualitez, qui se retrouuent en ceste nation. Et premieremēt pour estre le Royaume si vny, que tous tant grands que petits, sont esgalement subiects à vn seul Roy & Monarque, lequel se tenant tousiours à Paquin, gouuerne à baguette tout son Empire, de mesme que si c'estoit vne petite villete. Que si l'on peut vne fois gagner la volonté du Roy, tout le reste suivra bien tost. D'auantage, comme il n'y a qu'un seul langage vniuersel, qu'on appelle Mandarin, qui a cours par toute la Chine, & que la plus part des gens entendent, quoy que tous ne le sçachent pas parler, cela facilitera beaucoup la publication de l'Euangile. Car l'ayant appris, bien qu'il soit assez difficile, on peut s'employer au salut de tant d'ames qu'il y a en vn si grand Estat. Outre ce les Chinois sont pour l'ordinaire fort bien complexionés, & doiēt naturellement d'une grande douceur & benignité. Ils gardent fort la decence en leur marcher, & autres mouuemens extérieurs. Ce qui monstre que l'esprit est reposé pour l'ordinaire, & partant plus capable de recevoir instruction. D'ailleurs comme ils sont si bien esleuez, qu'il n'y a quasi personne, qui ne sçache pour le moins lire & escrire, c'est vne grande commodité pour apprendre d'eux mesmes la doctrine Chrestienne, par le moyen des Catechismes, qu'on fera imprimer. Ils ont aussi force loix & fort bonnes, pour le gouuernement politique: & l'observation d'icelles y est tellement en vigueur, que si Platon reuenoit au monde, il diroit que le modelle de sa republique est mis en pratique en la Chine, ainsi qu'escriit le P. Nicolas Lombard. Pareillement l'oyssuete, origine de tous maux, & qui seule est suffisante pour ruiner & renuerser sans dessus dessous vn Estat le plus florissant qui soit, en est du tout bannie. Car ce n'est pas seulement pour le deshonneur qui l'accompagne, ou pour les reproches des parens & amis, qu'on la fuyt, mais aussi paroe qu'elle est punie & chastiee par les Magistrats, lesquels ont soing de faire travailler ceux mesmes qui sem-

*La foy
Chrestienne
ne si elle
est vne
fois re-
seuē à la
Chine,
est pour
s'y cōti-
nuer lō-
guemēt,
& pour-
quoy?*

*Le Pere
Nicolas
Lombard
en vne
lettre es-
crite de
la Chi-
ne l'an
1598.*

blent ne pouuoir rien faire. Car ils font tourner les roües des moulins aux aueugles : à ceux qui sont estropiés des jambes, ils baillent à faire quelque ouurage des mains, & ainsi du reste. Les gens lettrés, qui semblent estre moins affairés, ne sont pas toutes-fois moins embesoignez : car ceux qui veulent receuoir quelque degré, sont examinés avec grande rigueur, & apres qu'ils ont reçu le premier, ils sont encore obligez de subir tous les ans l'examen. Que si l'on trouue qu'ils ayent profité, ils sont aduancez, comme au contraire s'ils se sont oubliez de ce qu'ils sçauoient, on leur enjoinct de griefues penitences, les demettant par fois de leur grade; tellemēt que soit pour se maintenir en leur degré, soit pour passer à vn plus haut, ils estudient tousiours, avec telle attention, & assiduité, que plusieurs en deuiennent etiques, ou tombent en d'autres maladies. L'on void mesme des vieillards, qui ont passé leurs degrés il y a desia quarante ans, se trauailler neantmoins, & se tuer, par maniere de dire, à l'estude, apprenans par cœur les liures de leur faculté, tout de mesme que sont parmi nous les petits enfans de Grammaire, ou exerceans leur style. Brief les Chinois ont vn grand soing, non seulement des actions exterieures, mais encore des interieures, faisans estar d'orner & embellir leur ame des vertus morales. Car outre qu'ils font plusieurs œuures pies, comme donner l'aumosne aux pauures, fonder & dotter des hospitaux, & choses semblables, ils tiennent encore pour chose fort sainte de matter le corps, afin de pouuoir par ce moyen dompter les passions de l'ame. Ils ont aussi accoustumé de ieusner, quoy que d'une façon differente de la nostre. Car leur ieusne consiste à s'abstenir de chair, d'œufs, de lait, & de poisson : mais du reste ils mangent autant, & si souuent qu'ils veulent. Ils trouuent fort bon de n'auoir qu'une femme, & sont grand estat de celles qui ne conuolent pas à secondes nopces, viuans chastement en viduité; tellement qu'elles ont beaucoup de priuileges par dessus les autres. On trouue dans leurs liures fort particulierement recommandé, l'examen de conscience, & de toutes les actions que nous faisons; spécialement des interieures, & de celles qui n'apparoissent pas aux autres: parce que les hommes sont coustumierement plus nonchalans en icelles, n'ayans personne qui les en tance. A ceste cause ils louent fort les retraites que quelques vns font en leurs maisons champestres, ou autres lieux solitaires, pour vaquer à la contemplanation, & se resor-

*Les Chi-
nois s'ad-
donnent
aux ver-
tus mo-
rales.*

mer eux mesmes, se remettant au premier estat auquel (comme ils disent) ils furent creéz du Ciel. C'est pourquoy parmy eux fleurist beaucoup vne congregation de Lettrez, lesquels fuyans les distractions de la Cour, & les charges publiques, demeurent en repos chez eux, vacquans au susdit exercice, & s'assembtent entre eux bien souuent, pour faire quelques conferences à la façon des anciens Hermites de la Palestine & Thebaïde. Mais ce qui est encore plus remarquable en ce poinct, c'est qu'ils ont vn sommaire de six commandemens, que tous doibuent garder, ainsi que nous auons le Decalogue: & afin que personne ne s'en oublie, & que les enfans avec le laïc succent les preceptes & reigles de bien viure, ils ont des hommes gagez par toutes les villes, qui ont charge de les publier à haute voix en chasque rue, aux nouuelles & pleines Lunes, vn peu deuant Soleil leué. Ce sont ceux qui s'ensuiuent. Le premier, obeyr au pere & à la mere: le second, porter honneur & respect à ses majeurs, & superieurs: le troisieme, mettre d'accord ses voisins: le quatrieme, instruire ses enfans & nepueus: le cinquiesme, faire bien chascun son office: le sixiesme, ne faire point de tort à personne, comme tuer, paillarder, desrober, & autres choses, ou ils enferrent presque tous les commandemens du Decalogue, qui sont compris en la seconde table. Car le huietieme, neuuiesme, & dixiesme, se peuuent aussi tirer de leurs liures.

De ce qu'a esté dict, l'on peut aisément entendre, combien les Chinois s'approchent de la lumiere de verité: & comme ils sont disposez, à ce que sur tels fondemens l'on puisse dresser, Dieu aydant, l'edifice spirituel de la foy Chrestienne: s'il plaist à la diuine bonté ouurir la porte de ce grand & opulent Royaume, à beaucoup de semeurs de sa sainte parolle, pour l'y aller esandre, & qu'il donne accroissement à icelle, par sa toute puissance, au salut de tant d'ames, qui perissent en l'infidelité. Mais voyons

comme l'on a tasché de l'y
planter.

Ecce 3

Les Portugais commencent de traffiquer en la Chine, & quelques Religieux de diuers ordres procurent d'y auoir entrée, & s'y arrester pour y publier la foy de IESVS-CHRIST.

CHAPITRE XXI.



PRÉS que le grand Albuquerque fust decédé au port de Goa, retournant d'asseurer la conqueste d'Ormuz, ainsi qu'a esté dict cy deuant, Lopez Suarez, qui auoit esté enuoyé de Portugal quelque temps auparavant, pour luy succeder au gouuernement des Indes, entra en charge: & aussi tost qu'il eust renouvelé l'alliance de son Prince, avec les autres Roys voisins de Goa, il enuoya à la Chine, le Capitaine Fernand Perez de Andrada, avec huiët nauires, tant pour establir le commerce entre les Portugais, & les Chinois, que pour recognoistre le païs, & les mœurs des habitans, & par mesme moyé descouurir les Isles & regions d'alentour. Il enuoya quant & luy Thomas Peres, comme quelques vns l'appellent, ou Petreio, selon d'autres, en tiltre d'Ambassadeur du Roy de Portugal Emmanuel premier, portant des lettres de sa Majesté, avec vn riche present, pour donner à celuy de la Chine, à celle fin d'obtenir plus aisement son alliance. Or la premiere place d'importance de ce Royaume, qu'on trouue venant de Malaca, c'est la ville de Canton. Mais auant qu'y arriuer l'on rencontre quelques petites Isles deserttes, & à l'éboucheure d'une riuere (qui passe par deuant la ville de Canton) vne grosse flotte de nauires, mise là tout exprez, pour garder ce passage, & empescher que les estrangers n'aillent plus outre, sans congé des Mandarins. Andrada estant arriué à vne de ces Isles, nommée Tamou, s'y arresta quelques iours, iusqu'à ce qu'il eust permission d'entrer plus auant, & d'aller surgir au port de Canton: laquelle toutesfois ne luy fust donnée, sinon avec condition, qu'il n'y ameneroit que deux de ses nauires. Ce qu'il feic laissant le reste de sa flotte à l'Isle de Tamou. Si tost qu'il eust posé l'anchre au port de Canton, il se va presenter aux Mandarins, & avec leur adueu mit à bord l'Ambassadeur Peres, auquel selon la coustume du païs, fust donné vn logis, & des presens. Au reste Andrada se comporta si sagement, & si equitablement en ses negoces, que les Chinois en demeurrent fort contents, & fai-

*Andrada enuoyé à la Chine
establit le commerce
des Portugais
en Chine.*

lais le misme iugement des autres de ceste nation, leur accorderent sans difficulté le commerce, & laissèrent entrer l'Annois-fateur avec ceux qui l'accompagnoient dans le pais, pour s'acheminer à la Cour du Roy.

Andrada voulant s'en retourner d'ou il estoit venu, feit crier à son de trompe par toute la ville de Canton, que s'il y auoit quelqu'un, qui eust receu du dommage de luy, ou d'aucun des siens; & auquel on fust redeuable, tant par voye de prest, qu'autrement, qu'on le luy vint faire scauoir auant son despart, afin qu'il peut satisfaire à vn chascun. Cela confirma d'auantage les Chinois en la bõne opinion, qu'ils auoyent cõceüe de la loyauté des Portugais; tellement qu'ils estoient bien aises du commerce encommencé; lequel sembloit deuoir estre longuement continué, a grand profit & aduancement des affaires de Portugal. Mais la conuoirise, & outrecuydance de quelques autres, qui vindrent depuis, gasta tout. Car vn peu apres que Fernand Andrada fust party, son frere Simon Andrada y vint aussi de Malaca avec quelques autres Capitaines, lesquels allechez par l'esperance du gain, ayans ouy le bon accueil, qu'on auoit faict aux premiers, pensoient qu'ils y seroyent aussi bien venus & traittez qu'eux. Mais comme ils ne se comporterent pas si modestement que les autres, non seulement ils firent perdre aux Chinois la bonne opinion qu'ils auoyent, de la fidelité & vertu de la nation Portugaise, mais aussi cuyderent estre tous tuez, & mis à creux. Car bien tost apres leur venue, ayāt pris terre à l'Isle de Tamou, ils commencerent à y dresser vne forteresse de bois & de pierre, rangeans pour la deffence d'icelle l'artillerie, sans le congé des Mandarins; & non contens de ce, ils vouloyent s'vsurper, & s'approprier ce trafic à eux, priuatiuement à tous autres, si qu'ils ne permettoient qu'aucun autre marchand estrangier negociaſt en cet haure. Ils faisoient encore beaucoup d'autres iniures, tant aux estrangers, qu'aux mēsmes originaires. Ils forçoient leurs filles, ils acheptoient des hommes & des femmes de condition libre, que certains meschans garnemens, qui auoyent pris contre tout droict & raison ces personnes là, leur vendoyent: brieſ ils se comportoyēt en maistres, ou comme s'ils eussent esté Seigneurs absolus de ce pais, non pas en amys & estrangers.

Les Chinois ne pouans supporter vne telle audace & meschanceté, resolurent aussi de les traiter comme pyrates de mer,

*Si frere
y estant
par a-
pres al-
lé avec
d'autres
gasté
tout.*

Jean de Barros. & ennemys, selon qu'ils meritoient. Je sçay bien qu'un historien Portugais tasche de couvrir ces fautes, racontant la chose diuersement: mais d'autres l'ont repris en cela, & asseurent que le tout passa comme nous auons dict. Les Chinois donc ayant equipé, & armé promptement vne grosse flotte de nauires, outre l'ordinaire qu'ils auoyent là, enuironnent celle des Portugais de tous costez, de sorte que, parlant humainement, il leur estoit impossible d'euader, si Dieu ne les eust secourus. Mais vn des Capitaines Portugais, nommé Edoüard Coëllo (comme l'on trouue souuent des bons parmy les meschans) voyant le danger ou ils estoient, implore avec grande foy & deuotion l'ayde de nostre Dame (la Natiuité de laquelle on celebrait ce iour là) estant fort deuotieux enuers icelle: & nostre Seigneur voulust, que (par l'intercession de sa S. Mere) ils eschapperent de ce danger miraculeusement, ainsi que l'on peut voir en ce qui aduint. Car voicy qu'estans sur le point d'estre tous pris & ruinez, vne horrible tempeste s'esleue, qui fait escarter les nauires des Chinois deçà & delà, donnant libre passage à ceux des Portugais, qui s'en retournerent de la sorte à Malaca plus chargez d'argent, que d'honneur. L'issuë de l'Ambassade de Thomas Perez, n'eust pas vn tel succez: car ayant voyagé l'espace de quatre mois & d'auantage, comme il fust arriué à la Cour du Roy, il trouue les oreilles d'iceluy & de son Coesil, preoccupées des accusations, que ceux de Canton leur auoyent enuoyées: lesquelles outre ce donnoient à entendre, que Perez n'estoit point vn Ambassadeur de Roy, comme il se disoit estre, ains plustost vne espie de Cour-faires, & partant qu'il le falloit chastier comme tel. Le Conseil Royal sur ce rapport, feit arrester l'Ambassadeur Perez, avec ceux qui l'accompagnoient: & par apres les feit tous ramener à Canton, là ou ils finirent miserablement leur vie dans la prison, parmy les larrons & autres malfaiçteurs accablez de pauvreté, & de tristesse.

La flotte d'Alphonse Mello est desfaite par les Chinois. Cependant vn autre Capitaine Portugais, nommé Martin Alphonse Mello, ne sçachant rien de ce qui s'estoit passé, s'en vint à la Chine, avec vne flotte de six vaisseaux: dont les Mandarins ayans esté aduertis, font soudain commandement aux Capitaines de la marine, d'empoigner ces meschans & detestables brigands, ou de les mettre tous en pieces. Mello ne se doutant pour lors d'aucune chose semblable (bien qu'il eust esté aduertiy en general

en general de ne se tenir pas pour assuré) fut surpris à l'impour-
 ueu par la flotte des Chinois; ausquels il enuoya dire (les voyant
 venir en armes contre soy) qu'il n'estoit pas venu là pour leur fai-
 re la guerre: ains plustost pour confirmer l'alliance, qui auoit esté
 faicte avec le Roy de Portugal par le Capitaine Andrada. Mais
 les autres ne voulurent rien escouter de ce, qu'il disoit: ains l'as-
 saillirent de toutes parts, luy tirans vn' infinité de coups d'artille-
 rie, d'arquebuzes, & de fleches. Mello voyant que l'ennemy le
 pressoit de tous costés, & qu'il ne receuoit aucune mention de
 paix, se met en deffence; mais la partie n'estoit pas esgale. Car les
 Chinois surpassoient de beaucoup, tant en nombre de gens &
 de vaisseaux, qu'en pieces d'artillerie. Ayans donc attaqué furieu-
 sement la flotte des Portugais, ils desmembroient les vns à grands
 coups de canon; faisoient enfoncer les autres avec les nauires
 dans la mer, comm'il en aduint à celuy de Jacques Mello, frere
 de Martin Alfonse: brief ils en prindrēt prisonniers quelques vns,
 lesquels recreus du combat, & n'en pouuans plus, se rendirent à
 leur mercy. Il en y eust toutesfois d'aucuns qui eschapperent, &
 entre autres le Capitaine Alfonse Mello, lequel s'estant deffendu
 tout vn long temps fort vaillamment, se sauue en fin par vne spe-
 ciale faueur de Dieu; son nauire ayant passé à trauers toute l'ar-
 mée des ennemis; bien qu'il fut fort endommagé. Ceux qui se
 rendirent, estans menés à la ville de Canton, furent par le com-
 mandement des Mandarins, premierement mis en prison, là ou
 partie d'iceux mourut de la puanteur, ordure, & vilainie d'icelles;
 les autres furent condamnez à mort cōme pyrates & escumeurs
 de mer. Et quand ils estoient conduicts au supplice, les trompet-
 tes faisant vn cry public deuāt vne multitude infinie de peuple,
 qui estoit accouruë à voir cest spectacle, racontoient à haute
 voix les maux, que les autres auoient commis, comme si eux les
 eussent faicts: & adioustoient que nonobstant tout cela, ils auoient
 esté si outrecuydez, que de retourner avec main forte es hautes
 du Roy de la Chine, & en ses terres, esquelles peu auparauant ils
 auoient laissé tant de marques de leur meschanceté. Ces choses
 & autres telles estoient redigées par escrit, & souuent reitérées
 par vn trompette: afin qu'on ostast de l'entendement du peuple,
 l'opinion qu'il auoit conceuë de la vertu & loyauté des Portu-
 gais. Brief ces pauures gens furent meurtris à coups de fleches;
 & mis à quattiers, sans auoir mesfaict. Voyla combien de maux

*Il se sau-
 ue, mais
 d'autres
 furent
 faicts pri-
 sonniers.*

*Les pri-
 sonniers
 sont con-
 duits au
 supplice
 ignomi-
 nieuse-
 ment.*

*Sanchan
Isle ou
mourut
le B. P.
Xavier.*

apporta l'avarice, l'outrecuydance, & l'iniquité de quelques vns, estant cause non seulement du domage & de la mort des innocens; mais encore de la hayne, que les Chinois conçurent contre tous les Portugais: qui fut bien telle que depuis ils les ont tenus pour suspects, & ne leur ont voulu permettre tout vn long temps de passer plus auant, que ces Isles desertes: en l'une desquelles nommée Sanchan, qui est trente lieuës loing de la cité de Canton, ils les laisserent aborder quelque temps apres, pour estaller leurs marchandises dans des cabannes, qu'ils se faisoient de brâches d'arbres, & de gazons, sans vouloir permettre qu'ils y bastissent aucune maison, ny autre edifice: bien que l'Isle fut du tout inhabitée. En tel estat trouua les affaires le B. P. François Xavier, qui passa de ceste vie à l'immortelle en la mesme Isle l'an 1552. ainsi qu'a esté dit au 1. liure.

*Macao
ville de
la Chine
que les
Portu-
gais ont
basti.*

Or jaçoit que les Portugais fussent là fort incōmodez, neantmoins ils supportoient tout cela, voyant le grand profit qu'ils faisoient, trafiquant avec les Chinois: lesquels se r'asseuroient peu à peu de la desfiance, qu'ils auoient auparavant, par la frequentation d'iceux: tellement que les Portugais prindrent la hardiesse de s'approcher plus près, estallans leurs denrées à vne autre Isle, ou port de la Chine appelé Macao, qui est dix lieuës plus auant que Sanchan, & vingt lieuës loing de Canton: combien qu'ils n'eussent pas exprés congé des Mandarins pour ce faire. Toutesfois on leur permit de pouoir tous les ans vne fois venir au port de Canton, & s'y arrester trois ou quatre mois durant, pourueu que la nuit ils se retirassent dans leurs nauires: mais le iour il leur estoit loysible de sortir hors, & d'entrer mesmes dâs la ville nouvelle. Les Portugais voyans que petit à petit on s'asseuroit d'eux, & qu'on ne les recherchoit pas de si près, commencerent à bastir quelques maisons au port de Macao, à cause de l'incommodité, qu'il y auoit d'estre là si long temps, sans logis. Le nombre d'icelles accreust dans peu de temps de telle sorte, qu'il s'y est faicte vne assés grande & bonne ville: là ou il y a vn Capitaine Portugais, qui gouerne & maintient en seureté ceux, qui se font là domiciliez; avec vn Mandarin Chinois, qui a aussi charge de la ville au nom du Roy de la Chine; cōbien que les Portugais y soient les plus forts. Et c'est ainsi qu'ils demeurent à Macao, depuis trente ou quarante ans en ça.

Mais comme le zele de la gloire de Dieu, & du salut des ames,

n'est pas moindre és personnes deuotes, que le desir d'aquerir des richesses és mondains, il y a eu plusieurs bons Religieux, qui se sont enuoyagés à la Chine, tout exprés, pour y debiter leurs marchandises spirituelles, & pour annoncer la foy Chrestienne aux naturels: nonobstant toutes les difficultés, qu'il y a, pour auoir entrée. Le premier de tous, qu'on sçache, fut le B.P. Xauier, duquel a esté cy deuant parlé. Mais le temps, auquel Dieu vouloit esclaire ceste nation de la lumiere de sa foy, n'estant encore venu (peut estre pour les pechés d'icelle) il ne peut venir à bout de son dessein, ny trouuer personne, qui le voulut mettre dans la Chine; de façon qu'il mourut sainctement en ceste entreprise, comme aux portes de ce Royaume, selon qu'a esté raconté plus amplement cy dessus.

Depuis il y a eu plusieurs autres Religieux de diuers Ordres, qui ont pareillement tasché d'auoir accès en ce pais là, pour la mesme fin. Entre autres, deux Peres de l'Ordre de S. Augustin partirent l'an 1575. des Isles Philippines (ou ils estoient lors) à ceste intention. L'un d'iceux s'appelloit F. Martin de Herrada, Nauarrois, natif de la ville de Pamplone, capitale du Royaume de Nauarre, qui ne faisoit que sortir d'estre Prouincial de son Ordre esdictes Isles. Car ç'ont esté les Religieux de S. Augustin, qui ont porté les premiers la lumiere de la foy en icelles, & desia y auoient conuertie plus de cent mille ames à IESVS-CHRIST. Ce Pere estoit vn personnage non seulement de saincte vie, mais encore de grande doctrine. Il auoit vn tel desir de s'employer au salut des Chinois, qu'il s'estudioit tout exprés à leur langue, & s'estoit voulu donner pour esclau à certains marchands de la Chine, qui estoient venus pour trafiquer en ces Isles, afin qu'ils l'amenassent quant & eux audit Royaume, pour y pouoir entrer de ceste sorte: mais ils ne voulurent l'accepter. Avec luy fut enuoyé vn autre Pere du mesme Ordre, appelé F. Hierosme Marin, natif de la ville de Mexico en la nouuelle Espagne, homme aussi fort deuot, & sçauant. Pour faire ce voyage, ils rencontrèrent vne tres-belle commodité: laquelle ie deduyray icy le plus briueuement, qu'il me sera possible, me remettant en beaucoup de particularitez, qui ne sont pas si necessaires, à ce qu'en a fort amplement escrit l'auteur de l'histoire de la Chine.

Il faut donc sçauoir, que quelque téps auparauant vn fameux corsaire Chinois, appelé Limahon, rodoit tout à l'entour des

Le B. P. Xauier s'en va à la Chine pour y prescher la foy.

Deux Peres de l'Ordre de S. Augustin F. Martin Herrada & F. Hierosme Marin y vont aussi.

L'occasion de leur voyage.

Limahon corsaire fameux.

coltes de la Chine, avec quatre-vingts quinze voiles, qu'il auoit ramassé, pillant & saccageant les nauires des marchands, ou autres qu'il rencontroit sur mer, & les villes maritimes de la Chine, encore qu'elles fussent bien grâdes. A raison de quoy il estoit fort redouté en tous ces quartiers là. Le Roy de la Chine entendant les plaintes & doleances de plusieurs de ses subiects, qui auoient esté grandement interessés par cest Archipyrate, fait commandement au Vice-roy de ceste Prouince là, ou il faisoit ses courses, de luy attraper ce galand, & le luy enuoyer poings & pieds liez, ou pour le moins sa teste. Le Vice-roy fait promptement armer & equiper vne flotte de six vingts & dix gros nauires, ou il y auoit quarante mille combattans, pour luy courre sus. Le Courfaire sçachant cela, & redoutât vne si grosse puissance, se retire à vne Isle, qui est entre la Chine & les Philippines, là ou il se tenoit caché, sans qu'on sçeuſt ou il estoit: combien que cependant il ne laissoit pas d'exercer ses brigandages, enuoyant de ses gens avec plusieurs nauires, escumer les vaisseaux, qu'ils rencontroient sur mer. Or il aduint qu'ils en trouuerēt deux de certains marchands Chinois, qui venoient des Philippines, & apportoiēt quelque quantité de reales de quatre, qui valent 4. reaux d'Espagne, desquelles ils se saisirent, & s'enquerans des marchands, d'ou ils auoient eu ces pieces, ils leur dirent qu'és Isles de Lufson (ainsi appellent les Chinois les Philippines) il y auoit des Castillas, qui en auoient à foison. Si leur firēt entendre que la ville de Manille, ou ils se tenoient, n'estoit gueres bien gardée, & qu'il seroit aisé de la surprendre, mesmes alors, à cause que la plus-part des soldats ne se doutans d'aucun ennemy, estoient allés faire quelque nouuelle conqueste, & qu'à grâd peine y auoit-il soixante & dix personnes de deffence. Limahon entendant cela, prend aussi tost resolution d'y aller par la conduite de ces marchands; tant pour piller la ville, que pour se fortifier en ces Isles contre le Roy de la Chine, s'il le vouloit faire rechercher d'auantage. Prenant donc la route de Manille, il va surgir à l'anse de la ville, la veille de S. André l'an 1574. & met incontinent en des esquifs quatre cens soldats des plus vaillans, qu'il eut, pour descendre à terre: lesquels toutesfois n'y peurent aborder, à cause du vent contraire qu'ils eurent, iusqu'au matin, iour de S. André. Auſi tost qu'ils eurent pris terre, ils commencent à marcher en baraillon, vers la ville; & entrent dans icelle, sans aucune resistance: d'autant qu'on

*Vent
souque-
ster les
Philip-
pines sur
les Espa-
gnols.*

ne s'estoit apperceu, que fort tard, de leur venuë. De premier
 abord ils forcerent la maison du Maistre de camp, qui estoit la
 premiere de ce costé là, & le tuerent luy & plusieurs autres, qu'ils
 rencontrèrent: puis y mirent le feu. Quelques vns des Espagnols
 voulurent se sauuer, s'enfuyans vers la plage: mais ils furent sou-
 dain attrapez, & taillez en pieces. Les autres voyans cela, se r'al-
 lierent, s'encourageans les vns les autres à resister vaillamment à
 l'effort des ennemis, lesquels se sentans ja recreuz du travail, se
 retirèrent vers leur Capitaine, pour retourner le lendemain plus
 fraiz, & avec plus de forces, se promettans de se rendre bien tost
 maistres de la ville. Cepédant les Espagnols resolus de tenir bon,
 & de se deffendre iusques à la derniere goutte de leur sang, se re-
 tranchent en vn coing de la ville (car ils n'estoient pas bastans
 pour la deffendre toute) & font à la haste vn fort le mieux qu'il
 leur fut possible, l'environnans de tonneaux pleins de grauois, &
 braquans là dessus quatre bonnes pieces d'artillerie qu'ils auoient.
 Il leur vint aussi ceste mesme nuit vn secours inopiné d'un Ca-
 pitaine Espagnol, nommé Iean de Salsede, qui estoit Lieutenant
 du Gouverneur de la ville Fernandine, freschement bastie en vne
 Isle proche de Manille, lequel menoit 54. soldats. Car ayant veu
 passer bié près de la Fernandine ceste flotte de Limahon, & con-
 iecturant probablement, que ce seroient ennemis, qui alloient
 attaquer Manille, il resolut d'aller au secours, & preuenir les en-
 nemis passant par vn'autre chemin, afin d'aduiser les habitans de
 se tenir prests, pour resister à ceste flotte. Mais il n'y peut abor-
 der auant la venuë des autres: neantmoins il y arriva si a poinct,
 qu'apres l'ayde de Dieu, ce fut la principale cause de la conserua-
 tion de la ville. Car les habitans estoient d'un costé si harassé
 du travail, qu'ils auoient pris à repousser l'ennemy, & à se forti-
 fier; & de l'autre si abbatus de cœur, se voyâs en si petit nombre
 contre tant de gens, que ce renfort leur mit le cœur dans le ven-
 tre, comme l'on dit. Cependant Limahon ne manqua pas de ve-
 nir luy mesme le lendemain matin avec six cens soldats, & apres
 auoir fait mettre le feu à ce quartier de ville, qui auoit esté de-
 laissé, il donne l'assaut au fort: mais il y trouua plus de resistan-
 ce, qu'il ne cuydoit. Le combat dura quasi tout le iour: auquel il
 y eut deux cës des siës de tuez, & plusieurs de blesez; mais des
 Espagnols il n'en fut tué que deux. Limahon voyant qu'un bon
 nombre de ses gens estoit desia ou morts, ou naurez, & tous fort poust.

*Secours
 inopiné
 venu
 aux Es-
 pagnols*

*Limahon
 donne
 l'assaut
 à la vil-
 le de
 Manille,
 le, mais
 est re-
 poust.*

recreuz du travail, il fait sonner la retraicte, pour se retirer aux nauires, & recueillant tous les morts, les fit enterrer, deuant que partir de l'Isle, qui fut deux iours apres, reprenant la mesme route, qu'il auoit tenuë en venant. Mais comm' il fut arriué à 40. lieues de la ville de Manille, costoyant tousiours la mesme Isle, il va trouuer l'emboucheure d'vne belle riuiera, appellée Pâgasinan, & voyât que l'assiete du lieu estoit propre, pour s'y fortifier, il delibere de bastir vn fort à vne lieuë loing de ladiète emboucheure, allant par la riuiera contremont. Ce qu'il fit aussi tost, & l'ayant basti, exigeoit tribut des habitâs du pais d'alentour, comme s'il eut esté leur vray & legitime Seigneur. De là aussi il enuoyoit ses nauires escumer toute ceste mer, faisant courir le bruiet, qu'il auoit tué ou mis en fuyte tous les Castillas de Manille, & s'estoit rendu maistre de ces Isles. Les Espagnols qui estoient restez dans Manille, considerant que ce bruiet leur pouuoit beaucoup nuyre, à cause que les peuples circouoifins, qu'ils auoient assubiectis, plustost par la renommée de leur prouesse & vaillance, que par force d'armes, pourroient de là prendre occasion de se reuolter contre eux, & les aller vn iour tous esgorger, furent d'aduis de poursuyure le corsaire, & l'aller assieger dans son propre fort. A ces fins le Gouverneur de Manille, & de toutes les Philippines, qui estoit lors Guy de Labassare, ayant succédé à Michel Lopez Legaspi, qui conquesta ces Isles au Roy d'Espagne, mande venir à soy tous les peuples d'alentour: & donne aduis de ce, qui s'estoit passé aux Commendeurs ou Seigneurs de certaines Isles, qu'ils appellent *de los Pintados* (à cause que les habitans ont accoustumé de se peindre le corps de diuerses couleurs) ausquels il commâde aussi de venir le trouuer, avec le plus de vaisseaux & de gens, qu'ils pourroient amener, tant d'Espagnols que d'originaires. En quoy il fut promptement obey. Ces forces estant arriüées, on laisse pour la garde de la ville de Manille, les soldats, qu'on estima estre necessaires, & les autres furent enuoyez contre le Corsaire, en nombre de deux cens cinquante Espagnols, & deux mille cinq cens originaires, desquels fut constitué chef le Capitaine Salsede, qui auoit esté fait par le Gouverneur Maistre de camp, au lieu de celuy qui auoit esté tué au premier assaut de la ville. Salsede s'estant embarqué avec ses gens dans des petites fregates, qui estoient venuës des Isles, arriue en peu de temps à l'emboucheure du fleuve de Pangasinan, sans

*Servir
re à un
autre en-
droit ou
il se for-
sife.*

*Les Es-
pagnols
assi-
blés des
forces
pour le
desfi-
cher de
là.*

estre apperceu des ennemis. Estant là il fait boucher l'entrée de la riuere avec ses fregates, enchainées l'une contre l'autre, afin que le corsaire ne peut s'ensuyr ny receuoir aucun secours par mer. Puis il fait desbarquer vne partie de ses gens, avec quatre pieces d'artillerie, & en enuoye plusieurs par terre vers le fort de l'ennemy, par vn chemin couuert, afin qu'ils ne fussent point veus, iusqu'à ce qu'il faudroit attaquer l'ennemy. Il fait aussi aller cōtre-mōt l'eauē quelques fregates, avec vn' autre troupe de soldats, enioignant aux vns & aux autres de donner l'alarme de tous les deux costés à mesme temps. Ce qui fut executé si dextrement & vaillamment, que ceux de l'eau mirent le feu à la flotte des corsaires, & la firent toute brusler. Ceux aussi qui venoient par terre, estans entrez dans la palissade du fort, mirent le feu à icelle, & aux maisons, qui estoient dedans. Mais Limahon, soudain qu'il entendit le bruiēt, se sauue dedans le fort : & enuoye promptemēt plusieurs de ses gens pour repousser les Espagnols, lesquels ennuyez de la chaleur causée du feu, qui brusloit à mesme instant les nauires & la palissade, avec les maisons de dedans, & harrassez du travail, furent d'aduis de se retirer, voyans mesmement qu'il y auoit desia du desordre parmy eux. Ce qu'ils firent, n'ayant perdu que cinq Espagnols, & trente naturels, outre les blesez : des corsaires il en y demeura cent sur la place, & plusieurs furent faits prisonniers, & rendus esclauēs. Le lendemain matin le Maistre de camp met toutes ses gens en ordonnance de bataille, & se va camper à deux cens pas du fort, en intention de combattre l'ennemy, si l'occasion s'en presentoit : ou bien de forcer le lieu, ou il tenoit bon, s'il estoit possible. Mais il trouua que le Corsaire s'estoit biē fortifié durant la nuit, & qu'il y auoit du danger d'assaillir son fort, à cause de trois grosses pieces d'artillerie, qu'il y auoit toutes braquées, avec plusieurs autres canons & engins à feu. Voyant donc cela, & qu'il n'auoit que des petites pieces, & fort peu de munition de guerre, pour auoir esté employé le reste en la deffence de la ville, il iugea qu'il seroit mieux de tenir le Corsaire assiegé, tant par mer que par terre. Car il faisoit son compte qu'iceluy ne pouuant s'ensuyr par eauē, à cause que ses vaisseaux auoient esté tous bruslez, ny eschapper par terre, le tenant enuironné de tous costés, il seroit contraint dans peu de temps, ou de se rendre à mercy, ou de mourir de faim, pensant que ses viures eussent esté bruslez avec les nauires : mais il se

*Belle entre-
prise
de guer-
re.*

*Limahon
est assie-
gé dans
son fort.*

trompa, & le Courfaire fut plus fin que luy: tellement qu'il euada comme nous dirons cy apres. Mais laissons le là cependant assié-
gé, & voyons ce qu'on brasse tandis en la Chine.

Les chefs donc de l'armée, qu'on auoit leuée en la Chine contre Limahon, ne sçachans ou il estoit, enuoyerent vn Capitaine
Omoncō nommé Omōcon, avec vn gros nauire, pour en sçauoir des nou-
Capitai- uelles. Cestuy-cy venant près des Philippines, entendit par le
ne Chi- rapport tant de quelques Espagnols, qu'il rencontra en chemin,
nois en que d'un marchand Chinois, qui trafiquoit d'ordinaire à Manille,
noyé appelé Sinsay, tout ce qu'auons dit de l'Archipyrate. Mais ne
pour pouuant bonnemēt le croire, il le voulut aller voir luy mesme de
sçauoir ses yeux. Le Maistre du camp le reçeut avec beaucoup de cour-
des nou- toisie, & luy monstra comme il tenoit assié-
nelles de Limahon de telle
Limabō. forte, qu'il sembloit ne pouuoir eschapper de ses mains, luy pro-
 mettant qu'aussi tost qu'il l'auroit en sa puissance, il le luy liure-
 roit ou mort ou vif. Cependant il le prie de vouloir s'en aller à la
 ville de Manille, voir le Gouverneur de ces Isles, & se reposer là,
 tādīs qu'il mettroit fin à ce siege, par la prise ou la mort du Cour-
 faire, qu'il esperoit deuoir estre en brief. Omoncon accepta l'of-
 fre, & le Maistre du camp luy bailla vn de ses Capitaines pour le
 conduire, & vne de ses fregates, à cause que le nauire dans lequel
 Omoncon estoit venu, pour estre trop grand ne pouuoit pas cō-
 modement nauiger entre ces Isles; & pource il le laissa en vne
 d'icelles. Estāt arriué à Manille, il fut reçu du Gouverneur avec
 grandes caresses. Mais apres qu'il eut attendu quelque temps
 l'issuē du siege, craignant que s'il tardoit d'auantage, ceux qui
 l'auoient enuoyé, ne pēpassent, qu'il fut pery en mer, ou que quel-
 qu'autre defastre ne luy fut arriué, il voulut s'en retourner à la
 Chine, pour y apporter ces nouvelles du Courfaire. Et par ce que
 tandis qu'il estoit à Manille, le Gouverneur luy fit entendre, qu'il
 desiroit enuoyer quelques vns à la Chine, pour contracter allian-
 ce avec le Royaume, & encore quelques Religieux, pour y pres-
 cher nostre sainte foy; ores qu'il sçeut bien que les estrangers
 n'estoiēt pas bien venus en la Chine, n'y ceux, qui les y menoiēt;
 toutesfos il s'offrit au Gouverneur d'y faire entrer ceux, qu'il luy
 plairroit y enuoyer, s'assurant que les Mandarins ne le trouue-
 roient pas mauuais, veu les bōnes nouvelles du Courfaire Lima-
 hon, qu'ils luy apportoiēt, & les promesses qu'ils luy faisoient
 de le leur liurer entre les mains ou mort ou vif: & pour plus
 d'asseu-

*Voit
 comm'on
 le tiens
 assié-
 gé.*

d'assurance que ceux, qu'il luy bailleroit n'encourroient point de mal, il s'offrist de laisser tels ostages qu'il voudroit : mais le Gouverneur ne voulut point prendre des ostages, se fiant en sa parole. Si enuoya tout incontinent querir le Prouincial des Augustins, pour luy demander quelques vns de ses Religieux, qu'il peut enuoyer à la Chine. C'estoit vn venerable vieillard, & de tres-saincte vie, l'un de ceux qui auoient esté enuoyés par l'Empereur Charles Quint, pour descouurir la nouuelle Guinée, appelé Alphonse d'Aluarade, lequel fut si aise d'entendre cela, qu'il s'offrist d'y aller luy mesme tout vied qu'il estoit : mais le Gouverneur ne le voulut permettre, tant pour son aage, que pour autres bons respects. En fin ayant deliberé ensemble, on trouua bõ que ces deux Peres, qu'auons nommé cy dessus, y allassent, auxquels furent associés deux hommes d'espée, que le Gouverneur leur bailla : afin que si les Religieux estoient retenus aupres du Roy, pour luy annoncer l'Euangile, comme ils cuydoient, iceux s'en retournassent aux Philippines, pour en rapporter les nouuelles, & aduiser de tout ce qui se seroit passé. Le Gouverneur auant leur depart, fit de beaux presens à Omoncon, & au marchand Chinois Sinsay, qui debuait aller avec eux : donnant à Omoncon vne belle chaine d'or, & vn accoustrement d'escarlate rouge, qu'il estima fort, & fut encore plus prisé en la Chine pour sa rareté, & à Sinsay vne chaine d'or aussi, tant pour auoir esté tousiours bon amy des Espagnols, que pour luy gagner plus la volonté, afin qu'il ne mit empeschement à ce qu'on preten-

Les presens que le Gouverneur de Manille luy bailla.

doit. Outre ce il bailla audit Omoncon vn present, pour donner de sa part au Gouverneur de Chinchéo qui l'auoit enuoyé, & vn autre au Vice-roy de la Prouince. Brief il fit assembler tous les esclaves Chinois, qui auoient esté pris sur Limahon, & les donna à Omoncon, pour les ramener libres en leur país : commandant pareillement au Maistre de camp & aux autres Capitaines & soldats, qui estoient au siege, d'en faire autant de ceux, qui leur estoient demeurez, promettant de leur payer la rançon. Apres que tout fut prest pour leur voyage, ils partent de Manille avec vne petite fregate, & vn autre vaisseau Chinois, dans lequel estoit Sinsay avec les prouisions, & arriuerét à l'Isle de Bulian 40. lieues loing de Manille, ou estoit le grand nauire d'Omoncon, dans lequel ils debuient faire le voyage. Estans là le Maistre de camp, qui n'estoit qu'a sept lieues loing de Bulian, enuoye prier les

*Deux du
Maistre
du camp.*

*Arrive à
la Chine
avec les
Reli-
gieux,
qui vont
saluer le
Gouver-
neur de
Sbin-
chép.*

*Puis le
Vice-
roy de
la Pro-
vince.*

Religieux de le vouloir venir trouuer. Ce qu'ils firent, & il leur bailla tous les esclaves Chinois, sans vouloir prendre ny luy ny ses soldats aucune rançon pour iceux. Outre ce il enuoya des lettres, & quelques presens, tant au Gouverneur de Chinchéo, comme au Vice-roy de la Prouince par Omoncon, les aduisant comme il tenoit assiéger Linahon, & leur promettant de le leur enuoyer bien tost ou mort ou viu. Mais c'estoit, comme on dit, vendre la peau du loup, auant que l'auoir pris. Omoncon ayant receu ce que dessus, se met à la voile avec les Religieux & les autres, le 25. de Iuin, & le 3. Iuillet ils descouurirent la terre ferme de la Chine, ou le 5. ils aborderent, ayant fait à leur aduis environ 140. lieuës de chemin. Ils furent receus avec beaucoup d'honneur & de courtoisie, premierement à la ville de Tansuse, ou ils furent de premier abord, & puis à celle de Chinchéo, là ou estoit le Gouverneur, qui auoit enuoyé Omoncon, & auquel ils portoient des lettres & presens. Mais auant qu'ils luy parlassent, il leur fit dire, que puis qu'ils n'estoient pas enuoyés de la part du Roy d'Espagne, ains seulement d'un sien Lieutenant, s'ils vouloient auoir audience de luy, il falloit qu'ils luy parlassent à genoux: telle estant la coutume, qu'on observe en la Chine à l'endroit des Ambassadeurs, qui ne sont enuoyés de la part de quelque grand Monarque. Les Espagnols ayans admis la condition, bien qu'à regret, (principalement les seculiers) ils furent menez à l'hostel du Gouverneur, & luy parlerent à genoux, jasoit qu'il les fit bien tost leuer. Apres cela ils luy presenterent les lettres & presens, qu'on luy enuoyoit, & il leur fit aussi quelques presens, & un banquet fort somptueux: puis les enuoya au Vice-roy, qui estoit à la ville d'Auchéo, trente lieuës loing de là, ensemble le present qu'ils luy auoient baillé, pour la raison qui sera dicté cy apres. Ils furent par tout le chemin portez sur des chaires à bras, & fort bien traittez au despens du Roy; mais tousiours accompagnés d'une bonne & seure garde de soldats. Arrivez qu'ils furent à la ville d'Auchéo, ils s'en vont droit au logis du Vice-roy: & entrans par la porte de la ville, ils y trouuerent plusieurs gens-d'armes (qu'ils pensoient estre des Gentils-hommes) lesquels, apres les auoir saluez honnestement, cheminerent quant & eux vers l'hostel du Vice-roy, par vne rue longue & large, ou il y auoit un grand nombre de soldats, qui faisoient comme vne haye, depuis la porte iusqu'au logis susdit (qui est bien loing de là) d'un costé & d'autre, tous

rangés sous leurs Capitaines & enseignes. Les vns portoient des
 picques, les autres des arquebuzes, ou des espées avec des ron-
 delles, & chacun auoit sa liurée de soye, & des pennaches aux
 morions. Ils se tenoient tous de pied coy, & ne permettoient que
 personne occupast la rue, par ou les Espagnols passoient: lesquels
 en fin arriuerent à l'hostel du Vice-roy. Et parce qu'il n'estoit pas
 encore ouuert, ils attendirent vn peu, iusqu'à ce qu'on ouurist la
 porte: ce qui fut fait avec grande cereimonie: car on tira premie-
 rement quatre coups d'artillerie, apres on sonna assés lōg temps
 des trompettes, haut-bois, & tambours, & finalement les portes
 s'ouuerent avec vn grand bruiet & tintamarre. Ce qui s'observe
 tous les iours à l'ouuerture de la porte du Vice-roy, qui ne se fait
 qu'vne fois le iour. Brief ils saluèrent le Vice-roy: & luy donne-
 rent les lettres & les presens, qu'ils luy auoient apporté, le sup-
 plians de leur vouloir octroyer ce qu'ils demandoient, à sçauoir
 de faire alliance avec les Espagnols des Philippines, & de per-
 mettre aux Religieux de demeurer là, pour apprendre la langue
 du pais: afin de leur enseigner le chemin de salut. Le Vice-roy
 leur fit beaucoup de caresses, & des presens aussi, selon leur cou-
 stume. Il donna à vn chacun des Religieux six pieces de drap de
 soye, qu'on leur croisa en façon d'estole, & à chacun des soldats
 Espagnols quatre, autant à Omoncon & à Sinsay. Il bailla enco-
 re, tant aux vns que aux autres, deux bouquets d'argent, qui est
 vne recompense, de laquellē en la Chine l'on honnore ceux, qui
 ont exploité quelque grād faict d'armes. Outre ce il leur fit deux
 banquets fort magnifiques, ou il n'y eut pas faute de musique,
 ny de comedies, & autres tels passetemps: combien que le Vice-
 roy ne s'y trouua pas. Car c'est vne chose qu'on pratique en la
 Chine, que ceux qui font vn festin, mesmement si ce sont gens
 d'auctorité, ne s'y trouuent point, combien qu'ils deputerent d'au-
 tres, pour entretenir les conuiés. Apres toutes ces festes, comme
 les Espagnols voulurent traicter de leur affaire, le Vice-roy leur
 fit entendre, qu'il ne pouuoit en cela les resoudre sans l'adueu du
 Roy, auquel il promit de faire en brief sçauoir le tout. Ce qu'il
 fit, & enuoya ensemble à Paquin deuers le Roy & son Conseil,
 rāt le present du Gouverneur, que le siē: lequel il fit au prealable
 desployer en presence d'vn Notaire, & de quelques tesmoins, de-
 uant les Espagnols, leur demandant s'il y auoit riē plus. Ce qu'ils
 prenoient cōme pour reproche, estimans qu'il ne faisoit pas cas

*L'ouuer-
 ture de
 la porte
 du Pa-
 lais du
 Vice-
 roy com-
 me se
 fait.*

*Ceux qui
 font vn
 festin à
 la chine
 n'ot pas
 conuue
 de s'y
 trouuer.*

de leur present pour estre si petit: mais ce n'estoit pas cela, ains par ce que ils ont vne loy fort rigoureuse, qui deffend à ceux, qui sont en office de Mandarin, de recevoir aucun present, quel qu'il soit, sans le congé du Roy, ou de son Conseil, sur peine d'estre priuez de tous estats le reste de leur vie, & condamnez à porter des bonnets rouges, qui est en la Chine vne espeece d'infamie fort grande.

*Ce que
les Es-
pagnols
virent en
vn tem-
ple d'I-
doles.*

Or tandis qu'on attendoit la responce du Roy, les Espagnols ennuyez d'un si long sejour, pour s'entretenir cepédant en quelque chose, s'alloiēt promener, aucunesfois par la ville, acheptans ce qu'il leur plaisoit; les Religieux acheptèrent force liures en langue Chinoise, qui traictoient de diuerfes matieres, lesquels ils emporterent par apres aux Philippines. Ils alloient aussi voir les raretez & singularitez de la ville: nommément les temples des Idoles. En vn desquels, qui estoit fort somptueux, ils en comptèrent dans la maistresse chappelle, cent & vnze, outre plusieurs autres, qu'il y auoit és autres. Ces Idoles estoient tous taillez en bosse, fort bien faicts & surdorez: mais ils en virent trois qu'ils remarquerent particulièrement. L'un d'iceux auoit trois testes sur vn corps, qui se regardoient l'une l'autre: le second estoit d'une femme tenant vn petit enfant entre ses bras; & le troisieme alloit vestu de mesme façon que nous peignons les Apostres. Il en y auoit aussi quelques autres de figure fort monstrueuse: les vns qui auoient quatre bras, les autres six ou huiet. Or deuant plusieurs de ces Idoles, & particulièrement deuant les trois, que nous auons dit, on tenoit des lampes allumées. Apres cela il leur print enuie d'aller voir les portes de la ville. Ce qu'ayāt esté rapporté au Vice-roy, il soubçonna d'eux quelque sinistre intention: de sorte qu'il leur enuoya dire, qu'ils n'eussent point deormais à sortir du logis sans son congé: & aduisa le Capitaine de leur garde, qu'il ne les laissat point sortir, ny ne permit qu'on leur portast rien à vendre. Ils estoient neantmoins tousiours pourueus de viures en si grande abondance, qu'ils en auoient beaucoup de reste, le tout aux despens du Roy. Mais se voyans ainsi reclus & renfermez dans la maison, ils voulurent aller parler au Vice-roy, pour sçauoir la resolution de leur affaire, afin de s'en retourner: toutes-fois on ne voulut point les laisser entrer dans le Palais. Eux voyās cela, deliberent de luy enuoyer vne lettre, mais personne ne la vouloit escrire. Neantmoins Ormoncon l'escriuit en fin, combien

*S'it ren-
fermez
en leur
logis, &
pour-
quoy?*

qu'il n'osa pas la porter : finalement le Capitaine de leur garde la luy apporta : & le Vice-roy leur fit telle responce de bouche. Que quant à ce, que les Religieux demandoient de demeurer au Royaume, pour y prescher leur loy, cela ne se pouuoit faire sans la permission du Conseil Royal. Pour le regard de la lettre qu'ils luy auoient apportée du Gouverneur de Manille, qu'il y fairoit responce au plustost, & qu'avec ce ils pourroient s'en retourner aux Isles de Luzon ; & puis reuenir quand ils luy ameneroient Limahon ou mort ou vif. Que lors on pourroit traiter de l'alliance, qu'ils desiroient : & si telle estoit la volonté du Roy, les Religieux pourroient demeurer au Royaume. Voila en substance la resolution, qui leur fut donnée : laquelle ouye, les Religieux perdirent toute esperance de pouuoir s'arrester en la Chine : tellement qu'ils commencerent à se preparer, pour s'en retourner à Manille, acheptans plusieurs autres liures. Mais le Vice-roy entendāt cela leur enuoye dire, qu'ils ne se messent point en peine d'achepter des liures, parce qu'il leur en donneroit pour rien tant qu'ils voudroient. Toutesfois il n'accomplist pas sa promesse, fut ce ou par oubliance, ou autrement. Il leur enuoya bien demander quelques liures de ceux qu'ils auoient apportez : & apres les auoir veus les leur renuoya, les priant de luy faire voir quelque escriture de leur main. Les Religieux luy escriuirent le *Pater noster*, l'*Aue Maria*, & les dix commandemens de Dieu, d'un costé en Espagnol, & de l'autre en Chinois, l'un se respondant à l'autre, en quoy le Vice-roy prit grand plaisir.

Quelque temps apres il fit assembler tous les Gouverneurs de la Prouince à la ville d'Auchéo, pour deliberer encore mieux de l'affaire des Espagnols. On ne sçait s'il fit cela de son auctorité propre, ou par le commandement du Roy & de son Conseil. Estans là tous arriüés en brief, ils firent entre eux plusieurs consultations, & finalement ils appellerēt les Espagnols à vne assemblée, à laquelle toutesfois le Vice-roy ne se trouua pas : mais le Gouverneur de Chinchéo y presidoit. Lequel apres les auoir interrogez à quelle intention ils estoient venus là, & en quel estat ils auoient laissé Limahon, & autres choses semblables, leur donna la mesme resolution que deuant. Les Espagnols entendans cela, demanderent leur congé au Vice-roy, pour s'en retourner au plustost. Mais il les supplia d'attendre encore quelques dix iours, parce que le Visiteur de la Prouince deuoit arriuer dās ce tēps là :

*La resolution
qui leur
fut don-
née par
le Vice-
roy.*

*Se pre-
parent
pour le
retour.*

& il luy auoit escrit de ne les congédier pas iusqu'à sa venue, à cause qu'il desiroit les voir. Cependant il leur permut de sortir quelquefois de leur logis, pour s'aller promener, & pour voir quelques raretés du pais. Entre autres il leur fit voir vne montre de soldats, ou ils estoient 20. mille en nombre, & leur dit on que chaque mois & au mesme iour (qui estoit le premier de la Lune) il s'en faisoit autant par tout le Royaume. Comme le Visiteur fut arriué, ils l'allerent saluer à son Palais, ou ils le trouuerent assis sur vne chaire en vn haut parquet, tenant vne grande majesté, & ayant deuant soy vne table avec quelques papiers dessus, & le reste, qui est necessaire pour escrire. Car c'est la façon que gardent tous les Iuges de la Chine, quand ils donnent audience. Apres ce le Vice-roy leur fit vn banquet encore plus somptueux que les deux premiers, avec vne Comedie, qui y fut iouée; le Vice-roy estant absent du festin comme l'autre fois. De là ils furent conduicts au logis du Thresorier du Roy, qui leur fit vn fort honneste accueil, & leur bailla vn present, pour porter au Gouverneur de Manille, en recompense de celuy, qu'il auoit enuoyé au Vice-roy; c'estoit vne chaire à bras dorée, deux ombraires de soye, vn cheual, quarante pieces de soye, & vingt de bureau. Au-
 tant en enuoya-il au Maistre de camp, avec vne lettre pour chacun d'eux: qu'ils mirent chacune à part dans vne petite lauette, fort gentile, & bien enluminée. Il donna encore quarante pieces de drap de soye de diuerses couleurs, pour les partager entre les Capitaines & soldats, qui estoient au siege de Limahon, avec trois cens mantes noires, & autant d'ombraires. Finalement il donna à chacun des Religieux huit pieces de drap de soye, & aux gens d'espee, qui estoient avec eux quatre, avec deux ombraires, & vn bon chetial de voyage à chacun. Avec ce il les congédia, les aduisant de partir en diligence, car tout estoit prest pour leur voyage; mais que deuant ils allassent prendre congé du Vice-roy & du Visiteur, comm'ils firent, & le lendemain ils partirent vers Chinchéo, tous portés en des chaires à bras, iusques à leurs seruiteurs & esclaves, pour l'auoir ainsi commandé le Vice-roy. Les Religieux estoient portés chacun par huit hommes, les soldats par quatre, & les seruiteurs ou esclaves par deux: il y auoit encore autres 24. hōmes, qui portoient leur bagages; & vn Courrier, qui marcheoit deuant, pour les pouruoir de logis, avec vn autre, qui auoit charge de louer des hommes, pour porter les chai-

*Present
du Vice-
roy.*

res, & le bagage, parce qu'ils en changeoient à certaines traictes. En tel arroy ils arriuerent à la ville de Chinchéo, là ou toutesfois ils ne s'arrestèrent pas, parce que le Gouverneur leur enuoya dire, qu'ils passassent outre, sans s'arrestter, & qu'ils allassent tout droit à la ville de Tanuse, ou ils auriēt pris port en venant: car il se trouueroit là bien tost, comme il fit aussi: & le lendemain de son arriuée leur enuoya dire qu'ils s'embarquassent, nonobstant que les mariniers ne fussent pas encore prests, & ce à cause que c'estoit la nouuelle Lune: ayant ceste persuation superstitieuse, que les voyages, & autres affaires encommencez ce iour là, succedent heureusemēt. Il se trouua à la plage, lors qu'ils s'embarquerent, auec plusieurs Bonzes, qui firent des sacrifices à leur mode, pour l'heureux voyage d'iceux: & leur donna la collation, les seruant de sa main propre, & mangeant & beuuant avec eux. Estans embarqués dans la nau Capitainesse, les Bonzes firent de rechef vn sacrifice, qui dura iusqu'à la nuit, lequel estant paracheué, on lascha toutes les pieces d'artillerie des nauires, & les soldats leurs harquebuzes, avec vn grand bruiēt des tabourins & des cloches, qu'ils ont en leurs nauires. Toutesfois apres cela les Espagnols retournerent à terre, pour aller reposer à vn logis, & le lendemain le Gouverneur de Chinchéo leur fit vn banquet fort magnifique: auquel luy mesme se trouua. Ce qui est vne des plus grandes faueurs, que telles gens ayēt accoustumé de faire. Apres ce il leur bailla les presens, qu'il vouloit enuoyer au Gouverneur de Manille, & au Maistre de camp, en reuēche de ceux, qu'ils luy auoient faict. Au Gouverneur il enuoya quatorze pieces de foye, & au Maistre de camp dix. A chacun des Religieux il en donna quatre, & aux soldats deux: mais à leurs seruiteurs il donna des mantes peinturées: & de ceste sorte il les congedia avec force courtoisies, & plusieurs offres, qu'il leur fit, disant qu'il esperoit les reuoir bien tost de retour, quand ils ameneroient Limahon, & que lors s'amenderoient les fautes, qu'ils auoient faict à leur traictement. Sur ce le Gouverneur se retire, laissant avec eux cinq Capitaines, qui leur deuoient faire compagnie, avec Omoncon & Sinsay, qui s'estoient ce iour là trouuez au banquet, avec l'habit & les marques de Loytiās, que ledit Gouverneur leur auoit données le iour auparauāt, pour le seruice qu'ils auoient faict au Roy. Brief ils se mirēt à la voile le 14. Sept. de l'an 1575. Ils auoient deux nauires pour eux, & leurs gens, & bagage: & au-

s'embarquent à Tanuse.

Faueurs & presens du Gouverneur de Chin.

cbdo.

*Limahon
s'enfuyt
de se
suyre.*

tres huiet d'armaison, pour leur faire escorte, avec prouisiõ pour dix mois. Or afin qu'ils n'auigeassent plus assëurément & commodément, ils alloient aborder en diuerfes Isles, presque tous les soirs. Estans donc en vne d'icelles, appellée Plon, ils entendirent de quelques pescheurs, que le Coursaire Limahon s'en estoit fuy en quelques barques, qu'il auoit faict bastir secrettement dans son fort, par des charpentiers qu'il auoit, s'estant seruy des ais & fonds, qui estoient restez des nauires bruslez, que ses soldats amassoient de nuit par l'endroiect du fort, qui estoit proche de la riuierre. Ce qu'ils firent si finement, que les Espagnols ne s'en prindrēt point garde, iusqu'a ce que le Coursaire se fut mis en sauueté, se retirant à vne Isle assés loing de là, ou il calseutroit ses vaisseaux pour se mettre de rechef sur mer. Voila ce que disoient ces pescheurs, adioustans qu'il n'y auoit que huiet iours que cela estoit arriué. Ceste nouuelle attrista grandement les Espagnols, & les Chinois aussi, principalement Omoncon & Sinsay, lesquels ne pouuoient croire, qu'il n'y eut eu de l'intelligence entre Limahon & le Maistre de camp, combien que les Religieux leur remonstrentent, qu'il n'y auoit aucune vray-semblance en cela. Or voyans que l'Isle ou s'estoit retiré le Coursaire (à ce qu'on disoit) n'estoit qu'à douze lieuës loing de là, ou ils estoient, Omoncon & Sinsay vouloient aller luy courir sus, pensans qu'il seroit aisé de l'attraper. Mais le General de la flotte n'y voulut point condescendre, disant qu'il n'auoit point charge de ce faire, mais seulement de ramener les Castillas à Luffon, & d'en amener Limahon pris ou mort, s'ils le luy bailloient. Outre que les gens qu'il auoit, estoient plus propres à la marine, que aux armes. Pourfuyuans donc leur route, ils arriuent près de l'Isle de Bulian, ou ils entendirent, que ce qu'ils auoient ouy de Limahon estoit veritable. Ce qui donna plus de fascherie à Omoncon & à Sinsay, que la premiere nouuelle: parce qu'ils ne tenoient pas encore pour assëurée ceste fuyte. Et l'occasion de leur fascherie estoit, qu'ils se doubtoient, que s'ils n'amenoient Limahon, qu'ils seroient pour le moins priuez des honneurs & priuileges, qu'on leur auoit octroyés à ceste occasion. En fin ils arriuerent, apres auoir nauigé 45. iours, à Manille, ou le Gouverneur les caressa, & festoya le mieux, qu'il luy fut possible: & tant de luy comme du Maistre du camp ils entendirent, qu'il n'y auoit point eu de l'intelligēce avec Limahon: lequel on sceut depuis qu'ayant vn peu r'habillé les bar-

les barques, qu'il auoit fait dans son fort, & amassé les viures qu'il peut recueillir, s'estoit retiré à vne Isle fort escartée, ou il mourut de melancholie, se voyant reduit à si petit pied, apres vne si grande puissance, qu'il auoit eüe. Cependant qu'on entretenoit en festes & resjouissances le General de la flotte, qui auoit ramené les Espagnols, ausquelles il prennoit grand plaisir, on luy fit entendre quelques points de nostre foy: ou il sembla trouuer du goust, & dit que volontiers il se rendroit Chrestien, s'il ne scauoit pour tout asseuré debuoir encourir des grieues peines en son pais, imposées à ceux, qui reçoient vne religion differente de la leur. Mais il donna en secret quelques aduis au Gouverneur, pour faciliter l'amitié & alliance, qu'on pretendoit auoir avec le Roy de la Chine, & ensemble l'entrée des Predicateurs de la foy, les asseurant, qu'il ne seroit pas difficile de gagner à icelle les Chinois, si vne fois lon auoit gaigné la volonté du Roy. A quoy faire il estimoit estre vn moyen tres-propre, que le Roy d'Espagne enuoyast vne Ambassade à celuy de la Chine, luy demandant son alliance, & l'exhortant à embrasser la foy de IESVS-CHRIST. A ceste cause les Espagnols, qui demeurent és Isles Philippines, ont souuentefois prié le Roy d'Espagne, de vouloir enuoyer ceste Ambassade; tellement qu'à ces fins l'année suyuant 1576. ils enuoyerent au Roy Philippe 2. qui regnoit lors, la relation du voyage du P.F. Martin de Herrada, qui a esté couchée cy dessus: & sa Majesté resolut de faire ce qu'ils demandoient. Il nomma pour Ambassadeur vn Pere de l'Ordre de S. Augustin, appelé Iean Gonzales de Mendoza, aucteur du liure de l'histoire de la Chine, auquel on debuoir bailler force beaux presens, que le Roy d'Espagne enuoyoit à celuy de la Chine. Mais la chose ne reüssit pas comme lon desiroit. Parce que les presens ayans esté portés au Royaume de Mexique, le Vice-roy trouua quelque empeschement, pour lequel il renuoya le mesme Ambassadeur au Roy Philippe: tellement que ceste Ambassade fut pour lors differée à vn autre temps: & depuis on n'a point pouruiuy d'auantage cest affaire, Dieu, peut estre, ne voulant pas donner entrée à sa foy par ceste voye là, mais par vne autre, qu'il a preordonnée au conseil de sa diuine sapience.

*Mourut
en fin de
tristesse.*

*Moyen
qu'il estoit
propre pour
la con-
uersiõ de
la Chine.*

Quelques années apres ce voyage des Peres de l'Ordre de S. Augustin, il en y eut quelques autres de l'Ordre de S. François, qui voulurent essayer le mesme, & tascher d'auoir accès en ce

*Autre
voyage
fait à la
Chine*

*par quel
ques Re-
ligieux
de S.
Fran-
çois.*

Royaume, & permission des Mandarins de s'y arrester, pour y prescher le S. Euangile. C'estoient le P. F. Pierre d'Alfare, avec trois autres Religieux du mesme Ordre : mais de la Prouince qu'on nomme en Espagne de S. Ioseph : que plusieurs appellent Cappuccins, parce qu'ils gardēt quasi la mesme regle que ceux-cy, combien qu'ils ne portent pas l'habit du tout tel, quant à la forme ; mais pour regard de la rudesse d'iceluy, il n'y a point de difference. Ce bon Pere donc estant arriué d'Espagne à la ville de Manille le 2. de Iuillet l'an 1578. avec quatorze Religieux de son Ordre, desquels il estoit Superieur, ou, selon qu'ils l'appellēt, Custode, enuoyés là pour ayder les Peres de l'Ordre de S. Augustin, qui auoient vacqué seuls iusqu'à lors à la conuersion des originaires des Philippines, comme il estoit vn grand homme de bien, & fort zelé à l'amplification de la gloire de Dieu & de son Eglise, ayāt ouy parler, vn peu apres son arriué, de l'Ambassade, que le P. F. Martin de Herrada auoit fait en la Chine, & de ce qu'il y auoit veu, conçeut en soy vn grand desir d'esprouuer luy aussi, s'il y pourroit auoir entrée. A quoy il fut encore incité d'auantage, par les propos que luy tint vn Chinois jadis Bonze, qui auoit esté conuertty à la foy Chrestienne par quelques Religieux de son Couuent mesme, ou il fut baptisé avec vne ioye incroyable de toute la ville. Or comme il demanda souuent au Gouverneur des Philippines (qui estoit lors le Docteur François Sandy) permissiō d'aller à la Chine, le Gouverneur le remettoit d'vn iour à l'autre, luy donnant tacitement à entendre, que cela ne luy estoit guere agreable, tant à cause du peu d'effect, qui s'estoit ensuiuy de l'autre voyage, que pour crainte de rompre l'amitié encommencée avec les Chinois, qui estoit encore fort tendre. Mais ce bon Pere ne pouuant attendre d'auantage, se delibera d'y aller sans congé dudit Gouverneur, & prend avec soy trois autres Religieux du mesme Ordre, fort zelés comme luy, & trois soldats Espagnols, qui se ioignirent à eux, pour leur tenir compagnie. Ils menerent aussi vn ieune garçon Chinois, qui auoit esté pris sur Limahon, pour leur seruir de trucheman, & quatre naturels des Philippines. S'estans donc avec telle compagnie embarquez dans vne moyenne fregate, sans auoir aucun, qui fut guerres expert à la marine, ils arriuerent en peu de iours à la Chine, ou ils eurent entrée (ce semble) miraculeusement. Car bien qu'au destroit, par lequel ils passèrent, il y eut vne grosse flotte

*s'embar-
quēt iās
l'aduen-
du Gou-
uerneur
des Phi-
lippines.*

de nauires, pour garder ce passage, & empescher que les estrangers n'y entraissent; si est-ce qu'ils passerent à trauers, sans estre apperceus, ou à tout le moins empeschez d'entrer plus auant: si qu'il sembloit, que nostre Seigneur donnat l'espouuante à tous ceux, qu'ils rencontroient: car de si loing qu'ils les apperceuoient ils se mettoient en fuyte: comme si ceste fregate les eut pour-suyuis; jaçoit qu'il n'y eut aucunes armes, ny offensiuës ny defensiuës. Brief ils arriuerent au port de Canton, ne sçachans ou ils estoient, sans que personne leur eut dit mot, & (qui plus est) *Entrent dans la Chine sans difficulté.* entererent bien auant dans la ville, iusqu'au lieu ou l'on tient l'audiance, sans estre apperceus, ou au moins empeschés des gardes de la porte. Mais comme ils demurerent là assés de temps, environnez d'une grande multitude de gens, qui s'estoit assemblés pour voir l'habit & le port de ces estrangers, les gardes accourent incontinent vers eux, ayans grand peur qu'on s'aperçeût de leur mesgarde, & les mettent dehors, sans leur faire autre mal: si non qu'il leur commanderent d'attendre là, iusqu'à ce, qu'on eut esté aduertir le Gouverneur, & qu'il leur eust donné permission d'entrer en la ville. Quelque temps apres voicy venir à eux vn Chinois, qui sçauoit parler la langue Portugaise, & pensant qu'ils fussent Portugais, il leur demande ce qu'ils cherchoient. Ils luy respondent qu'ils estoient venus là, pour leur enseigner le chemin du ciel. L'autre entendant ces parolles, leur va querir vn autre Chinois, qui parloit fort bien le Portugais, & estoit Chrestien, parce qu'il auoit demeuré trois ans à Macao avec les Portugais. Cestuy-cy leur ayant demandé le mesme que l'autre, ils luy firent pareille responce: lors il s'enquiert, qui les auoit conduits à ce lieu là. Ils respondent que Dieu seul auoit esté leur guide. Le Chinois replique comment les auoient laissés passer les gardes, qui estoient au destroit. Ils luy dirent, qu'ils n'auoient veu aucune garde, ny personne, qui leur eust empesché le passage, dont l'autre fut grandement estonné; & leur dit qu'ils fairoient bien, à son aduis, de s'en retourner à leur nauire, & n'en bouger, iusqu'à tant qu'il eust esté aduertir les Mandarins de mer, de leur venue: afin qu'ils le fissent sçauoir au Gouverneur de la ville. Les Religieux creurent son cōseil, & se retirerēt dans leur fregate. Ayans esté là assés long temps, ils vont voir entrer vn Mandarin en vne maison proche du port, qui les manda venir par vn de sa fuyte, lequel portoit vn tablon plastré contenant le congé, que le Gouver-

Sont apperçus par deuant vn Mandarin.

uerneur leur donnoit pour descendre à terre, sans lequel il n'est permis aux estrangers de desbarquer. Ils s'en vont donc trouuer le Mandarin, qui tenoit vne telle grauité, qu'ils en furent tous estonnez, mesmes quand ils sçurent que ce n'estoit ny le Gouverneur, ny aucun des Iuges souuerains. Il portoit vn habit de la façon qu'auons dit cy dessus: & estant assis sur vne chaire, auoit deuant soy vne table, & ce qu'il faut pour escrire. A chasque costé il auoit vn rang de satellites, qui portoient chacun en main des longues cannes ou rouseaux, avec lesquels on fustige les delinquans, & en teste vn morion de cuir noir, avec des pennaches de plumes de Paon, & des medailles de fonte, qui sont les marques des executeurs de Iustice. Soudain que les Religieux furent entrez en la sale, ou estoit le Mandarin, on leur commanda de se mettre à genoux. Ce qu'ils firent, & s'estans approchés d'auantage, le Mandarin dit au trucheman, qui estoit ce Chrestien Chinois, qu'il leur demandast, de qu'elle nation ils estoient: ce qu'ils estoient venus faire au païs: & qui les y auoit conduicts. A quoy ils respondirent premierement, qu'ils estoient Castillas, c'est à dire Espagnols, car de ceste sorte sont ils appelez des Chinois: secondement qu'ils estoient venus là pour leur monstrier la voye de salut, & leur faire cognoistre le vray Dieu, Createur du ciel & de la terre: tiercement que Dieu seul les auoit guidez & menez sans aucun empeschement iusqu'à ce port, duquel mesmes ils ne sçauoient pas encore le nom. Le trucheman interpreta fidèlement la premiere & derniere responce: mais il falsifia la seconde, croyant que si le Mandarin entendoit qu'ils estoient venus là pour prescher vne loy differente de la leur, il les en renuoyeroit tout court, & partant il perdroit le moyen de gagner quelque chose sur eux: & peut estre aussi qu'il leur en aduiendroit du mal, & à luy encore; tellement qu'il respondit au Mandarin, comme de la part des Religieux: Qu'ils estoient gens dediez au seruice de Dieu, menans vne vie austere, & viuans en communauté, à la façon des Bonzes de la Chine: mais comm'ils s'en alloient de l'Isle de Luffon à celle des Illoques, vne bourasque les surprint, qui auoit fait enfondrer leur nauire, dont la plus-part de ceux, qui estoient dedans s'estans noyés, eux par vne speciale faueur du ciel, auoient eschappé le naufrage, dās ce petit vaisseau, qui estoit en compagnie du grand: & que leur dit vaisseau flottant ça & là à la mercy des vagues, n'ayant aucun pilote ny marinier pour

Les demandes
qu'il leur fit,
avec leurs
respon-
ses.

Les res-
ponses
sont falsi-
fiées,
par leur
trucheman.

le conduire, parce que tous s'estoient noyés, estoit en fin abordé à ce port, duquel ils ne sçauoient encore le nom. Là dessus le Mandarin leur demande, ou ils auoient pris ce Chinois qui estoit avec eux. Les Religieux respondirent, que l'ayant trouué à Lufson esclaue d'un Castillan, qui l'auoit achepté, ils luy auoiēt donné liberré, pour l'en emmener quant & eux, & leur seruir d'interprete. Mais leur trucheman falsifia encore cecy, disant que ce Chinois s'estant embarqué dans vn nauires, qui s'en alloit à Lufson, iceluy estant pery, il s'estoit luy seul sauué à la nage en vne Isle proche de là, ou il auoit esté detenu esclaue l'espace de huiët ans, iusqu'à ce que ce vaisseau estant venu faire aiguade en ceste Isle, il s'estoit mis dedans, sans sçauoir ou il alloit. Apres ce le Mandarin leur demande ce qu'ils auoient dans leur fregate. Ils respondent y auoir seulement vne quaiße & deux liasses de liures, avec quelques ornemens pour dire la Messe. Ce qui fut expliqué fidellement par l'interprete, car il sçauoit que l'experience s'en debuoit faire sur le champ. Le Mandarin donc enuoye soudain quelques vns de ses gens à la fregate, querir tout cela, & le fit desployer deuant soy : puis il y voulut aller luy mesme : & voyant qu'ils n'auoient aucunes armes ny offensives ny deffensives, ny or ny argent (comm'aussi ils luy auoient dit) il commença d'auoir bonne opinion d'eux, & à perdre tout mauvais soubçon: de sorte qu'il ne leur fit aucun desplaisir: mais seulement leur dit, qu'ils ne bougeassent de leur fregate, iusqu'à ce qu'ils auroient permission de ce faire. Apres cela vint vn autre Mandarin plus grand que l'autre, enuoyé de la part du Gouverneur, pour faire la mesme visite, laquelle il fit avec grande satisfaction de son costé: si qu'il donna au Gouverneur fort bonne information d'eux: & en consequence de ce le Gouverneur leur enuoya escrire sur vn tablon le congé de descēdre à terre, & d'entrer dans la ville. Ce qu'ils firent aussi tost, & s'en allerent loger à la maison de ce Chrestien Chinois, qui leur seruoit de trucheman, qui les traicta assés bien, leur promettant encore de s'employer pour eux; afin qu'ils peussent obtenir permission de demeurer en la Chine: mais il les aduisa de ne dire point qu'ils voulussent conuertir les Chinois à la foy Chrestienne, iusqu'à ce qu'ils y fussent mieux ancrés, & entendissent la langue du pais. Estans ainsi logés, ils agençent vn autel dans vne des chambres de la maison, ou ils demouroient, & là vn des Religieux offrist à Dieu:

*Ont cō-
gé de
desbar-
quer, &
d'entrer
en la vil-
le de cā-
ton.*

le S. Sacrifice de la Messe le iour de S. Iean Baptiste, en laquelle tous les autres communierent. Ce qui leur fust vne tres-grande consolation spirituelle, car depuis leur despart ils n'auoyent esté repeus de ceste viande celeste. Ce mesme iour ils furent appelez de la part d'un autre Iuge, qui leur feit les mesmes demandes, que les autres : mais il leur monstra plus de signes de bien-ueillance : & ayant touché l'habit des Religieux fust grandement estonné de l'aspreté d'iceluy. Ce Iuge entendist mieux que les autres l'intention des Religieux. Car le trucheman luy dict, qu'ils auoyent enuie de demeurer au pais, pour y seruir les malades & enterrer les morts. Le Iuge, oyant cecy, donne vn grand coup de la main sur la table, qu'il auoit deuant soy, & avec grands signes d'admiration, dict aux autres Iuges, qui estoient presens : O que voila de gens de bien ; ie serois tres-aise de leur accorder ce qu'ils demandent, si ie le pouuois faire de ma propre auctorité : mais nous auons des loix qui nous le prohibent fort estroictement. Apres les auoir ainsi examinez, il les en renuoye à leur nauire, leur promettant d'escrire en leur faueur au Viceroy, qui estoit à trente lieues de là. Il executa ce qu'il auoit promis, si bien, que le Viceroy commist l'affaire à l'Aytao, qui a charge de cognoistre du faict des estrangers. Cependant les Religieux commencerent à se trouuer en necessité, car le Chinois qui les auoit logez chez luy, voyant qu'ils n'auoyent plus d'argent, leur dict qu'ils se pourueussent d'ailleurs. Afin donc de pouruoir à leurs necessitez, ils alloient chascun iour deux à deux demander l'aumosne par la ville, chose fort nouuelle en la Chine ; n'y ayant là personne qui mendie. Les habitans leur donnoient volontiers l'aumosne ; mais le Gouverneur sçachant cela leur fist bailler tous les iours au despens du Roy certaine somme d'argent, avec laquelle ils se nourrissoient eux & les soldats, qui estoient en leur compagnie, & si en auoyent de reste. Ils receurent aussi quelques aumosnes des Portugais de Macao, qui les ayderent fort. Cependant le trucheman leur va dire, que l'Aytao auoit comandé qu'on les mist hors du Royaume : mais que, s'ils vouloyent, il leur feroit vne requeste, par laquelle ils supplieroyent les Iuges, qu'attendu que le temps n'estoit pas propre pour nauiger, & qu'ils n'auoyent point de vaisseau, pour faire leur voyage vers les Philippines, il leur pleust ordonner que quelque logis leur fust baillé pour trois ou quatre mois : pen-

*Se trou-
uans en
necessité
vont de-
mander
l'aumos-
ne.*

*Ruse de
leur tru-
cheman.*

dant lesquels ils pourroyent preparer ce qui seroit necessaire
 pour leur voyage. Adioustant que comme l'on verroit durant
 ce temps-là, que leur maniere de viure estoit bonne & exem-
 plaire, on les lairroit, peut estre, demeurer d'auantage au pays,
 & encore s'y arrester du tout. Les Religieux trouuerent bon cet
 expedient, & prierent le Chinois de leur dresser ceste requeste,
 & la presenter aux Iuges en leur nom. Ce qu'ayant esté fait,
 les Iuges les manderent venir, pour entendre d'eux mesmes, ce
 qu'ils vouloyent: & le plus grand de tous les interroge qu'est-
 ce qu'ils pretendoyent en demandant vn logis. Ils luy dirent que
 c'estoit pour apprendre la langue du pays: afin de leur pouuoir
 annoncer la loy de leur vray Createur & Seigneur. Le tru-
 cheman dict bien (comm'ils cogneurent par apres) que c'estoit
 pour apprendre la langue, mais non pas que c'estoit pour leur
 prescher la foy de nostre Seigneur. Or cōme le Iuge eust respon-
 du, qu'ils ne pouuoient leur octroyer leur demande, le truche-
 man, sans attendre ce que diroyent les Religieux, repart au Iuge,
 qu'ils ne demandoyent autre chose que de sejourner là, iusqu'a
 ce que les Portugais vinsent pour y trafiquer, qui deuoit estre
 en brieſ, & qu'ils s'en iroyent quant & eux estans tous d'une
 mesme loy. Là dessus le Iuge leur demande si les Castillas, & les
 Portugais estoient tous vns. A quoy le P. Alfare respōdit qu'en
 fait de croyance & de Religion, ils ne differoyent point: toutes-
 fois qu'ils estoient subiects à diuers Princes, qui estoient neant-
 moins fort proches parens. Leur demiere demande sembla au
 Iuge plus aisée à conceder que la premiere, si qu'il leur respon-
 dit, qu'il en escriroit au Vice-roy. Comm' il fist aussi, & luy don-
 na à entēdre quel estoit son aduis en cela, & celuy des autres Iu-
 ges ses assesseurs. La responce tarda beaucoup à venir: mais en
 fin le Vice-roy manda au Gouverneur, qu'il luy enuoyast ces
 Religieux, & qu'ils apportassent quant & eux, tout ce qu'ils
 auoyent en leur nauire. Le Gouverneur ayant receu ce mande-
 ment le fist sçauoir aux Religieux, lesquels partirent bien tost
 apres, dans des barques des Mandarins, qui sont fort belles, com-
 me a esté dit: & pour les conduire, on leur bailla quelques gens
 d'auctorité, qui les faisoient pourueoir par les chemins de tout
 ce qui leur estoit necessaire. Ils nauigerent de la sorte, à mont
 l'eau, quelques trente lieues, esquelles ils veirent des choses

Sont en-
 uoyez
 au Vice-
 roy.

fort remarquables durant les 4. iours de leur nauigation: car autant y employèrent-ils. Entr' autres ils veirent des buſſes, qui labouroient la terre: tellement qu'un ſeul buſſe tiroit la charruë, & un homme monté deſſus le conduiſoit avec vne corde attaché à un anneau, qui luy paſſoit par les nareaux, & luy ſeruoit comme de bride. Arriuez qu'ils furent à la ville, ou eſtoit le Vice-roy ils eurent audience de luy le lendemain, & il print un grâd plaisir à les voir, enſemble à ce qu'ils auoient apporté, nommément à vne pierre de Iaſpe noir, qui leur ſeruoit de pierre d'Autel, laquelle eſtoit ſi luifante, qu'on s'y pouuoit mirer dedans: pareillemēt à quelques images faiçtes de plumes de diuerſes couleurs, & tellement rapportées, qu'elles faiſoyent toutes les parties d'une Image, comme ſi on les euſt peintes avec des viues couleurs. L'un & l'autre auoit eſté apporté du Royaume de Mexique, ou l'on faiçt ces images, & force iaſpe noir ſe trouue de meſme qualité. Il print auſſi plaisir à voir les liures imprimez qu'ils auoyent. Brief entendant de l'interprete, qu'ils ne vouloyent que s'arreſter en la Chine deux ou trois mois, iuſques à la venue des Portugais, il leur fiſt dire qu'ils allaſſent trouuer ſon Lieutenant (qui eſtoit celuy qui deſpechoit tout ce, dont on le requeroit par eſcrit) & qu'ils conſulteroyent enſemble de leur affaire, leur donnant bonne eſperance, qu'il les expediroit à leur gré. Ils vont donc trouuer ſon Lieutenant, & comme il auoit eſté informé de meſme quē le Viceroy (le trucheman luy ayant diçt qu'ils ne vouloyent ſejourner au païs que deux ou trois mois, à cauſe que la ſaiſon n'eſtoit pas propre pour s'en retourner aux Philippines) il leur reſpondit, qu'ils ne ſe donnaſſent point de peine, ains ſe tiſſent ioyeux: car il leur feroit bailler vne maiſon pour ces trois ou quatre mois, avec deſſence que perſonne ne leur fiſt aucun tort ny deſplaiſir. Mais le trucheman leur fiſt entendre, que le Lieutenant leur accorderoit de demeurer en la Chine, tant qu'ils voudroyent: parce qu'ils luy ſembloyent eſtre gens de bō exemple, & viles à la Republique, & qu'ils pourroyent apprendre le langage des Chinois, pour leur preſcher la foy Chreſtienne. Ce qui reſiouïſt merueilleuſement les Religieux: car ils penſoyent eſtre venus au bout de leur deſſein. Et ſur ceſte opinion, ils prindrent congé du Lieutenant, avec grande allegreſſe, ſe retirans à leur logis, ou ils rendirent graces à Dieu, de ce qu'il auoit ſi bien acheminé leur affaire. Apres ce ils font quelques viſites: & ſi toſt qu'ils

*Sont ex-
pediez
(cōm' ils
croyo-
yent) à
leur gré.*

qu'ils eurent leur expedition du Lieutenant, ils s'en retournent à la ville de Canton, aydés des prouisions, qui leur estoient fournies par le chemin, suyuant l'ordonnance du Lieutenant. Arriués à Canton, ils s'en vont trouuer le Gouverneur, & luy presentent l'expedition, qu'ils auoient eüe. Le Gouverneur l'ayant leuë, leur dit qu'il estoit bien aise de ce, que le Vice-roy les auoit tant fauorisés, les assurant qu'en ce, qui dependroit de sa charge, pour l'exécution du contenu en leurs lettres, il s'y comporteroit conformément à ce qu'on luy commandoit; & afin d'y donner commencement, il leur assigna pour leur demeure vn hostel du Roy, dans les faux-bourgs, qui estoit à demy ruiné, ou ils furent logés, combien qu'avec deffence de sortir dehors, & d'entrer en la ville, sans permission expresse des Mandarins. Ils se tindrent donc leans plusieurs iours avec leur faulse persuation; s'estonnans neantmoins de ce qu'on ne leur donnoit congé de bastir vn Monastere, ny d'entrer en la ville, pour dōner ordre à ce, qu'ils croyoient leur auoir esté concedé. Mais en fin ils entendirent le stratageme de leur trucheman, qui n'auoit iamais fait entendre leur volonté aux Mandarins, dont ils furent tres-marris: & afin de remedier à ceste faute, ils tascherent de trouuer quelqu'un, qui declarast fidellement leur intention au Gouverneur; mais personne ne voulut entreprendre ceste charge. Voyans donc que le temps, qui leur auoit esté prefix, s'alloit escouler, ils firent entre eux vne consulte, pour deliberer de ce qu'ils debuioient faire. Il y eut en cecy diuersité d'opinions. Car le P. Pierre d'Alfare avec l'un des Religieux, furent d'aduis qu'il falloit se retirer à Macao, ville des Portugais, qui n'est qua vingt lieuës loing de Canton, ou ils estoient: parce qu'ils pourroient là plus aisément apprendre la langue Chinoise, & attendre cependant quelque commodité, pour entrer en la Chine, afin d'y prescher l'Euangile. Mais les soldats iugerent estre mieux, de s'en retourner aux Philippines, d'ou ils estoient partis, sans le congé du Gouverneur: & pour ce craignoient ils d'encourir quelque punition, combien qu'ils esperoient obtenir pardon de leur faure, s'ils y retournoient au plus tost; mais s'ils se retiroiēt à Macao ville des Portugais, ils auoiēt peur d'estre punis, comme traistres & desloyaux à leur Prince. Les deux autres Religieux suyurent le mesme aduis de se retirer aux Philippines, estimans que nostre Seigneur ne vouloit pas encore ouurir la porte de ce Royaume aux Predicateurs de sa foy.

S'en retournent à Canton ou on les enferme en vn logis.

Reconnoissent la ruse de leur trucheman.

*Se reti-
rent, les
uns à
Macao;
les au-
tres, aux
Philip-
pines.*

Or comme ils ne peurent pas se refoudre à ce coup, ils remirent l'affaire à vn autre iour, s'addonnans cependâr à la priere & oraison plus que de coustume: afin que Dieu leur fit la grace de cognoistre ce qui estoit le plus conforme à sa diuine volonté. Mais s'estans r'assemblés quelques iours apres, chacun d'eux persista en son opinion, & de meisme se delibera de l'executer: neârmoins pendant qu'ils attendoient la commodité de s'embarquer, l'vn des Religieux, qui de buoient s'en retourner à Manille trespassa à Canton. Car ils y seioumerent encore long temps, à cause que les Mandarins estoiet occupez, tant à l'examen de ceux, qui vouloient prendre leurs degrés, qu'en festins, ieux, & autres passe-temps, qu'ils font en ce temps là: de sorte qu'ils ne vacquerent quasi à autre chose l'espace de 45. iours. En fin ces festes estant passées, ils firent conduire chacun d'eux ou il voulut aller, les desfrayant par tout le chemin. Si que le P. Alfare avec son compaignon fut mené à Macao, là ou il bastit dans peu de temps vn Monastere de son Ordre, par le moyen des aumosnes, que les Portugais luy donnoient. Les autres aussi arriuerent à Manille le 2. de Feurier de l'an 1580. Telle donc fut l'ysuë de ces deux voyages: voyons maintenant ce qu'on y a fait depuis.

Comme le P. Michel Roger de la Compagnie de Iesvs fut enuoyé à Macao; d'ou allant avec les Portugais à Canton, il obtint congé des Mandarins d'y auoir vn logis.

CHAPITRE XXII.

*Macao
passage
pour al-
ler au
Japon.*

D'AVANT que les Isles du Japon auoient reçu la lumiere de la foy depuis l'an 1549. par la predication du B. P. Xavier, & autres Religieux de la Compagnie de Iesvs, l'on enuoyoit souuent quelques vns d'iceux audit pais, afin d'y continuer ce, qui auoit esté si heureusement commencé. Et par ce que venans de Malaca ou de Goa, ils alloient aborder à quelque port de la Chine, nommée-ment à celui de Macao, depuis que les Portugais y auoient arresté leur trafic; il arriuoit d'ordinaire, qu'auant de trouuer commodité pour faire voile de là au Japon, ils s'arrestoient plusieurs mois en cest haure, s'employans selon leur institut à la predication, administration des Sacremens, & autres exercices de piété, dressés au profit spirituel des ames. Et ce fut la cause, pour la-

quelle le P. Melchior Carnero Euesque titulaire de Nice, estant enuoyé au Japon par le Pape Pié V. pour y exercer sa charge, puis qu'il ne se pouuoit rien faire en Ethiopie, ou il auoit esté destiné, s'arresta en ce port quelque temps, attendant la saison propre pour cingler vers le Japon. Mais il pleut à Dieu l'appeller d'icy, pour le conduire au repos eternel, apres tant de trauaux, qu'il auoit enduré pour son seruice, comme a esté dit cy deuant. Apres son trespas, les Portugais de Macao desirans estre aidés és choses de leur salut, par les Peres de la mesme Societé (comm'ils l'estoient en plusieurs autres lieux de l'Inde) leur bastirent vne Eglise, & vne maison, pour les loger, tandis qu'ils seiourneroient là. Cecy donna occasion au P. Alexandre Valignan, qui estoit lors Visiteur de ladiète Compagnie és Indes Orientales, d'essayer s'il y auroit moyen de faire entrer dans la Chine quelques Peres du mesme Ordre, pour y prescher l'Euangile. A cest effect il en enuoya trois de Goa à Macao, pource s'y arrester du tout, & non en passant, comme les autres: afin qu'ils assistassent les Portugais de Macao és necessités spirituelles de leur ame, & apprinsent soigneusement la langue Chinoise, pour estre plus aptes & idoines, si l'occasiõ se presentoit, d'entrer audit Royaume, & d'y faire au plustost du profit en l'instruction des habitans. L'un de ces trois fut le P. Michel Roger, natif de la ville de Naples en Italie, lequel auant qu'entrer en ladiète Compagnie estoit Docteur és Loix, & auoit seruy son Prince en affaires d'importance, mesmes du gouuernement. Car il estoit homme de grande experience, fort prudent & aduisé. Ce Pere donc estant arriué à Macao l'an 1579. commença de s'addonner aussitost à l'estude de la langue Chinoise; mais comme il estoit desia vn peu aduancé en aage, il y trouuoit beaucoup de difficulté: si est-ce qu'avec le grãd trauail, qu'il y employa, il vint à l'entendre plus que moyënement. Mais pour apprendre le langage Mandarin, qui est plus courtisan, que le commun, & fort different d'iceluy, il s'en alloit chaque année de Macao à Canton avec les Portugais, que s'y transportoient, pour vendre leurs denrées, & trafiquer avec les Chinois, durant trois ou quatre mois. Or vn peu auant qu'il fit ce voyage, arriua vn cas, qui sembloit oster toute esperance, qu'aucun de la Compagnie y peult oncques mettre le pied dedans. Car l'année au parauant vn autre Pere de la mesme Societé, estant allé avec les Portugais à Canton, & ayant traité avec vn ieune homme

L'Euesque Melchior Carnero y decede.

Le Pere Michel Roger est enuoyé à Macao.

Chinois Bouze de profession, des choses de nostre foy, cestuy-cy print vn si grand goust à icelles, que dans vn mois apres que le Pere fust de retour à Macao, il s'en alla le trouuer, pour se faire baptiser. Mais les Peres qui estoient là considerans les inconueniens, qui s'en pourroyent ensuiure, furent d'aduis de l'enuoyer au Iapon, pour estre mieux instruit & catechisé plus secretement. Ce qu'il accepta volontiers, & apres auoir esté là quelque temps, il s'en retourna à Macao, ou il receut le baptême. Son pere estant aduertý de cecy s'en va plaindre aux Mandarins, disant qu'on luy auoit rauý son fils, & que les Portugais l'auoyent fait Chrestien par force. Les Mandarins firent tout aussi tost saisir les marchandises, que les Portugais auoyent dans la ville de Canton, & les aduiserent, que s'ils ne rendoyent bien tost ce ieune homme, & ne le mettoient entre leurs mains, qu'ils les ruyneroient tout a fait. Les Portugais qui traffiquoyent lors au port de Canton, escriuient soudain au Capitaine de Macao, qu'il enuoyast ce ieune homme : mais les Peres craignans que le neophyte ne fust pas si bien anchré en la foy, qu'il eust courage d'endurer pour icelle, n'estoyent pas d'aduis qu'il y allast : tellement qu'ils le mirent entre les mains de l'Euesque, afin qu'il disposast de luy, selon qu'il iugeroit estre plus conuenable, pour le salut de son ame. Le Capitaine donc estant venu trouuer l'Euesque, pour luy demander ce ieune homme, & l'enuoyer à Canton, l'Euesque luy fist entendre, qu'il ne le luy pouuoit bailler en bonne conscience. Car ce seroit (dict-il) mettre vne brebis en la gueule des loups: veu le danger auquel il l'exposeroit d'apostater de la foy, y estant encores si tendre & si nouueau : & qu'il estoit obligé de rendre compte à Dieu de son ame. Mais le ieune homme, ayât sceu la perplexité, en laquelle on estoit pour son regard, se presenta à l'Euesque, & luy dict qu'il estoit content de comparoistre deuant les Mandarins : & esperoit que nostre Seigneur luy donneroit la grace & le courage, de confesser librement son saint nom, encore qu'il y allast de sa vie. L'Euesque voyant sa resolution, luy permit d'y aller: mais il ne le voulust pas quitter en telle saison, tellement qu'il s'en alla avec luy à Canton. Or ayant comparu deuant les Mandarins il fust incontinent saisi au corps, & fustigé, de la façon qu'auons dict cy dessus, & autant en eussent-ils fait à l'Euesque, si les Portugais, qui se trouuerent là presens, ne l'eussent osté de deuant eux. Ce neophyte dōc receut lors pour l'amour de nostre Seigneur, vingt & quatre coups de

L'Euesque de Macao ne veut plus qu'il soit red.

Le Chinois est resolu de comparoistre.

fouët avec ces cannes & roseaux, dont ils se seruent pour cet effect, sans iamaïs monstrier aucune lascheté de cœur, ains plustost faisant esmerueiller les Mandarins, & autres assistans de sa patience. Il baïsoit deuotement la croix de son chappellet, tandis qu'on le fouëttoit, & auoit continuellement en bouche le saint ^{est fouët} & sacré nom de IESVS. Apres cela ils le mirent en prison : mais ^{te pour} il protesta tousiours, qu'il ne quitteroit iamaïs la loy, qu'il auoit ^{la cōfession de} embrassée, encor qu'il luy fallust pour ceste cause perdre la vie. Pendant le tēps qu'il fust en prison, on luy donna en diuerſes fois quatrevingts coups de fouët, persistant neantmoins tousiours en la confession de la foy Chrestienne. L'Euesque estant encor demeuré là pour voir l'issuë, l'alloit visiter en la prison toutesfois & quantes qu'il en auoit le moyen, & l'encourageoit à supporter constamment tous ces tourmens, pour l'amour de N.S. En fin les Mandarins, voyans qu'ils n'aduançoient rien, le bannirent du Royaume à perpetuité. Mais il ne se soucia pas beaucoup de ceste peine, ains s'en retourna avec l'Euesque à Macao, si contēt & si aisé qu'il tressailloit de ioye, pour auoir esté trouué digne d'endurer quelque chose pour le nom de IESVS-CHRIST: dont les Portugais & mesmement les Peres receurent vne tres-grande cōsolation : laquelle neantmoins fust bien tost destrempee parce qu'il s'ensuiuit. Car à l'occasion de ce fait le Gouverneur de la ville de Canton qu'ils appellent Aytao, ordonna que deormais on ne donnast point de logis en Cāton aux Peres, & deffendist expressement de les y laisser arrester en façon quelconque. Ce nonobstant apres que ce Gouverneur eust accōply le tēps de sa charge, le P. Roger estant allé accōpagner, comme a esté dict, l'année suivante les Portugais à Canton, & voyant qu'il auoit suffisante cōnoissance de la langue Chinoise, apres auoir soigneusement recomandé l'affaire à Dieu, resolut de sonder le gué, & essayer s'il pourroit auoir vn logis dans la ville ou auprès d'icelle. A ces fins il presenta vne requeste au nouveau Gouverneur, luy remōstrant cōme il ne pouoit faire le deu de sa charge, qui estoit de sacrifier à Dieu chasque iour, demeurant sur l'eau, ou dans le nauire, ^{Le P. Roger ob-} partant qu'il supplioit sa Seigneurie de vouloir permettre, qu'il eust vn logis dās la ville, pēdant le tēps, que les Portugais seiourneroyēt en ce port. L'Aytao ou Gouverneur ayāt veu la requeste ^{tient cō-} la iugea raisonnable, & ordōna qu'il luy baillast vn logis pour se ^{gé d'a-} retirer. Ayāt dōc esté prouueu d'une petite maisō, qui estoit prez ^{voir un} de la ville, il y agença le mieue qu'il peust vne petite chappelle, ^{logis à} Canton.

& en icelle dressa vn autel fort bien paré, & orné. Le brui& de cecy ayant esté espandu par la ville en peu de temps, tant de monde y accouroit, pour voir ce Bonize estranger (car ainsi nommoient ils pour lors le Pere) & l'ornement de sa chappelle, que de tout le iour ils ne cessoyent, les vns d'y venir, les autres d'en retourner. Et entre ceux-cy, il y auoit quelques vns des Mandarins, combien que c'estoyent des moindres: car les plus grands n'osoyent pas de premier abord y venir. Le Pere cependant taschoit de satisfaire à vn chascun, accueillant avec toute la courtoisie qu'il luy estoit possible, ceux qui le venoyent voir, & par ce moyen acqueroit la bonne grace de plusieurs. Brieu il gaigna de telle sorte la volonté de la pluspart des habitans, qu'ils sembloient estre fort marris, quand le temps venoit, auquel il s'en debuoit retourner à Macao avec les Portugais. Cela fust cause que l'année suiuant le mesme Pere y estant retourné, & ayant présenté la mesme requeste, elle luy fust interinée fort aisément, voire le Gouuerneur commanda, qu'on le pourueust d'un meilleur logis, que n'estoit le premier. Or quelques vns des Chinois voyans les faueurs que l'Aytao faisoit au Pere, vindrent à soupçonner, que les Portugais, ou bien le mesme Pere luy auoyent fait quelque present, & donné vne grande somme d'argent,

*Le Gou-
uerneur
est soup-
çonné d'a-
uoir re-
çu quel-
que pre-
sent.*

puis qu'il faisoit tant de choses en sa faueur, contre la desfiance expresse de son predecesseur. Ces brui&s & murmures estans venus aux oreilles de l'Aytao, il fist vn iour appeler le Pere, & luy demanda, s'il scauroit lire son escriiture. Le Pere luy respond qu'il pensoit le pouuoir faire. Lors il escriuit ce que nous dirons maintenant, dans vn papier, lequel il luy bailla afin qu'il le leust tout haut en presence des assistans. En ce papier estoit contenu, que puis qu'il se disoit seruiteur du Dieu de verité, il n'auroit point de honte, ny de crainte de dire franchement la verité deuant tous. Et partant qu'il le prioit de declarer, si luy, ou quelqu'un des Portugais, luy auoyent donné de l'argent, ou autre present quelconque: afin d'obtenir le congé qu'il auoit. Le Pere respond à cela tout haut, en presence des assistans, que c'estoit vne chose controuuée & esloignée de toute verité. Car ny luy, ny aucun des Portugais, n'auoyent baillé chose du monde au Gouuerneur, ny pour cela, ny pour autre faueur qu'il leur eust fait. L'Aytao demeura fort content & satisfait du tesmoignage que le Pere donna de son innocence, & peu de iours après luy

*Le Pere
Roger
rend tes-
moigna-
ge de son
innocence.*

& le Conchifu, qui est le second Mandarin apres le Gouverneur, & celuy qui a charge de la iustice de la ville, allerent tous deux, accompagnez de leur suite, voir le logis du Pere, & la chappelle ou il disoit la Messe: dont ils furent fort edifiez, & luy monstrerēt beaucoup de signes de bien-ueillance. Comme l'on sceut ^{et visité} par la ville la faueur, que l'Ay tao, & le Conchifu auoyent fait ^{des plus} au Pere de l'aller visiter en sa maison (qui est vne chose fort rare ^{grands} à telle sorte de gens) il y eust plusieurs autres Mandarins, <sup>Mandari-
vins.</sup> qui commencerent de le frequenter, montrans estre bien aises d'auoir son amitié. Le Pere aussi avec sa bonne façon, & l'honnesteté dont il vloit, accueillant les personnes, & les entretenant avec propos conuenables à vn chascun, gaigna tellement leur bonne grace, qu'ils se monstroient de iour en iour plus affectionnez en son endroict.

D'un voyage que feit le P. Alphonse Sanchez, des Philippines à la Chine, & comme à l'occasion d'iceluy, fust donné vn ample pouuoir au P. Michel Roger d'entrer en la Chine, & d'en sortir quand bon luy sembleroit.

CHAPITRE XXIII.

EN la mesme saison, que le P. Michel Roger estoit à Canton avec les Portugais, le Pere Alphonse Sanchez de la mesme Compagnie, vint de Manille à la Chine, pour quelque affaire de grande importance, que le Gouverneur & l'Euesque des Isles Philippines, luy auoyent baillé en charge, dont il sera parlé sur la fin de ce chapitre. Or afin qu'il ne fust prins pour espion, des gardes de la Chine, il pria ledit Gouverneur (qui estoit lors vn Gentilhomme Espagnol, nommé Don Gonzale Ronquille de Penanboza) de luy donner des lettres adressées à l'Ay tao de Canton, par lesquelles il rendit bon tesmoignage de luy, & le pria de ne vouloir point mettre empeschement à son voyage, declarant comme il estoit son Ambassadeur. Ces lettres furent escrites en langage Chinois, par vn Capitaine du pays, qui demouroit lors aux Philippines. Estant donc le P. Sanchez parti de Manille le 14. de Mars l'an 1582. apres auoir passé vne grande tourment <sup>Le P. Alphonse Sa-
chez de</sup> te, en fin le 6. Avril de la mesme année, ceux qui conduisoient la

voir luy, & son compagnon dans leur esquif. Ce qu'ils firent : & aussi tost les autres nauires Chinois vindrent aborder la fregate, & à la parfin arriua vn grand vaisseau, auquel tous les autres firent quelque signe de recognoissance, d'autant que dans iceluy estoit l'Admiral de la flotte, qu'ils appelloient *Supi*. Le P. Sanchez s'approchant plus près, luy met en main le passeport, qu'il auoit du Gouverneur des Philippines, la teneur duquel estoit telle. Capitaines & gardes de la Chine, si vous rencontrés ce Pere, laissez le passer, sans luy faire aucun dommage: car il est enuoyé de la part du grand Mandarin de l'Isle de Lussou en Ambassade, à l'Aytaa de la cité de Canton. C'est vn personnage qui fait estat d'enseigner la loy diuine, & tous ceux, qui sont avec luy sont honnestes gens: & ne portét point d'armes ny ne vont là, pour faire du mal. Le *Supi* ayant leu ce passeport, qu'ils appellent en leur langue *Chapa*, comme qui diroit lettre patente, demanda au Pere la lettre, qu'il portoit à l'Aytaa de Canton. Le Pere luy respôdit qu'il ne la luy pouuoit bailler, d'autant qu'elle estoit du grand Mandarin de Lussou, adressée à celuy de Canton, laquelle il auoit charge expresse de luy bailler en ses mains propres. Avec ce le *Supi* monstra estre content, & s'en retourne à sa nau Capitainesse, qui estoit par le dehors toute vernissée de charan noir, avec des lignes & ramages d'or. Quelques Capitaines s'arrestèrent là avec le Pere, pour l'entretenir tandis que le *Supi* prenoit ses habits de Mandarin, & bien tost apres le menerent dans le nauire d'iceluy. Or ces nauires, bien qu'ils soient fort grands, ne sont pas toutesfois si forts, qu'agrecables à voir. Ils ont dedans des belles & grandes sales, & au bout d'icelles vne chambre pour le Capitaine. Ceux donc, qui accompagnerent le Pere, le menerent dans vne de ces grandes sales, où ils trouuerent le *Supi* assis sur vne chaire, vestu d'vne robe de soye rouge, ayant sur la poitrine des Lyons en broderie. Deuant la chaire il y auoit vne table couverte d'vn drap de soye, avec des franges de tous costés. Les Capitaines & soldats, soudain, qu'ils furent entrés dans ceste sale, se mirent tous à genoux, deuant le *Supi*, & le P. Sanchez fit de mesme. Le *Supi* estant assis, avec grande auctorité, commence à l'interroger de diuerses choses, & apres le congedia fort humainement. Ceux qui l'auoient amené, l'accompagnerent tousiours iusqu'à tant qu'ils l'eurent laissé dans la fregate.

Vne heure apres, trois Capitaines vindrent pour faire l'ouen-

*Coustu-
me bon-
ne des
Chinois.*

taire de tout ce, qu'il auoit apporté, & qu'ils trouuerent dans la fregate, sans laisser chose aucune à escrire. Ce qui apporta du trouble tant au Pere, comme à ses compagnons: car ils ne sçauoient à qu'elle fin on faisoit cela. Mais quand ils sçeuvent l'occasion, ils s'assurerent, & perdirent toute crainte. Car on leur dit, que les Chinois ont accoustumé de faire tels inuentaires: afin qu'on ne puisse rien desrober aux estrangers. Et ils sont si exactes en cela, que iusques à vn vieux papier ou vne esguillette, ils mettent tout par inuentaie: lequel est enuoyé au Mandarin, avec qui l'est ranger doit traicter. Que si l'on treuue qu'il y ait à dire la moindre chose, ils sont chaitier fort rigoureusement le Capitaine, qui a eu charge de les conduire. Apres donc qu'on eut fait l'inuentaie, le *Supi* manda venir derechef le Pere; & apres luy auoir fait plusieurs nouuelles demandes, le licentia fort humainement, & commanda qu'on le traictast bien avec ses compagnons. A cest effect ils les mirent deux à deux en diuers nauires. Le Pere Sanchés & ses compagnons voyans cela, furent bien estonnés: car ils pensoient, qu'on les separoit de la sorte, pour les constituer prisonniers: mais ce n'estoit pas ce qu'ils pensoient: ains afin que les Capitaines leur fissent bonne chere, comme ils firent, leur donnans tres-bien à souper, & leur faisans la sentinelle durant toute la nuit. Or la façon de ceste sentinelle est telle. Ils ont en la nau Capitaineſſe vne grande cloche, & pareillement en tous les autres vaisseaux, mais beaucoup plus petites. Quand donc ils font ceste sentinelle, incontinent que la grande cloche de la nef de l'Admiral a frappé vn coup, toutes les autres luy respondent: & au mesme temps on sonne aussi les tâbours de tous les nauires. Que s'il y a grande multitude de vaisseaux, le bruiet qu'on fait avec cela, est fort grand: & toute la nuit on renouuelle d'heure en heure le mesme signal, afin qu'on entende, qu'ils sont tousiours en veille. Le P. Sanchés ayant passé toute la nuit sans reposer, comme le iour fust venu, il s'en voulut retourner avec ses compagnons visiter le *Supi*, pour le remercier du bon traictement, qu'ils auoient reçu. Le *Supi* leur parla ceste fois avec plus de courtoisie, que le iour precedent: & les entretint en diuers propos vn bon espace de temps, leur faisant plusieurs demandes; puis les congedia pour ce iour là fort gracieusement. Le lendemain, qui estoit le Dimanche des Rameaux, tous les nauires se monstrerent dès la poincte du iour, chacun avec quatre enſei-

*Paſſé de
faire la
sentinel-
le des flot-
tes.*

gnes, & plusieurs banderolles: & quelque temps apres les soldats descendirent à terre, & se rangerent deuant vn fort, qu'il y auoit là basti de pierre de taille. Ils portoient chacun leurs liurées à la façon des gens de guerre du pais, qui sont certaines petites robes de soye iaune, & avec vn bel ordre & concert ils firent là deuant la monstre, laschans force coups d'arquebusade. Le *Supi* voulut, peut estre, faire ceste feste en faueur des estrangers, tant pour monstrier la grandeur de son office & dignité, que la dextérité de ses soldats, ou bien c'estoit par aduanture le iour deputé à tel acte. Car ils font par tout le Royaume ces monstres au commencement des Lunes, ainsi qu'a esté dit. La reueüe estant faicte, trois Capitaines vindrent dire au Pere, que le *Supi* les auoit des-
Le *Supi*
congedie
le Pere.
péchés: mais auant que les congedier, voyant qu'ils estoient trop à l'estroit dans leur fregate, il leur fit bailler trois autres vaisseaux, pour estre plus au large. Ils voguerent donc toute ceste nuit, & le lendemain encor iusques au soir. Mais lors le Capitaine, qui les conduisoit, les fit descendre à terre: afin qu'ils se rafraichissent en certains iardins fort plaisans, qui estoient bien près du riuage: puis ils tournerent s'embarquer, & nauigerent iusques au Mercredy Sainct sur le tard. Lors ils vont descouurir vn port beaucoup plus grand, que celuy, par lequel ils estoient entrés, & mieux remparé. Car il estoit enuironné de tous costés de montaignes fort hautes: & dans iceluy y auoit vn'autre flotte beaucoup plus grande, & plus belle, que n'estoit la premiere. Neantmoins avec le mesme appareil de guerre, que l'autre. Incontinent que la fregate & les vaisseaux, qui l'accompagnoient, furent entrez dans ce port, tous les soldats, qui estoient là, commencerent à lascher leurs arquebuses, pour saluer les estrangers; lesquels furent soudain menés dans vn grand nauiue, ou estoit vn Mandarin, qui leur fit force caresses, & encore plus de demandes. Apres ce il leur commanda de descendre à terre. Or en vn coing de ce port il y auoit vn gros bourg, avec vne tres-belle forteresse, là ou faisoit sa demeure ordinaire le *Chumpin* (ainsi appellent ils le grand Admiral de la Chine, qui commande à toutes les flottes, qu'on tient sur mer) pour estre ce port le meilleur de tous. Je croy que c'est le port de Chinché. Ceste forteresse est esloignée du riuage, ou ils desembarquerent, deux ou trois ieûs d'arquebuse: & tout ce chemin estoit bordé d'vn costé & d'autre de soldats, armés les vns de piques & de coutelas, les autres d'arquebuses: desquelles

*Chum-
pin grād
Admi-
ral de la
Chine.*

ils tiroient à mesure, que le Pere & ses compagnons passoient. De ceste sorte furent ils salués, & menés iusques à la porte de la forteresse. Si tost qu'ils furent entrés dans la premiere basse-cour, les *Ypis*, qui sont les executeurs de la Iustice, conformément à leur coustume, commencerent à ietter de tels cris, qu'ils sembloient se vouloir arracher les entrailles du corps. Ce qu'ils font principalement lors, que quelque estranger vient parler aux plus grands Mandarins. En ceste premiere basse-cour il y auoit deux rangs de gens-d'armes, & de mesmes en la seconde, combien que ceux-cy estoient en meilleur equipage, que les premiers. En la troisieme ils y trouuerent deux autres rangs composés de Mandarins de guerre, ou de Capitaines, & autres hommes de commandement, lesquels portoient des coutelats à la ceinture, & des mourions en telle, avec quelques autres marques de leurs offices. Le *Chumpin* estoit quelques soixante & dix pas plus auant, comme dans vne Chappelle, appuyée sur quatre colonnes noires, enduites de leur charan, ou vernis. Dès l'entrée de ceste troisieme basse-cour, iusqu'à ladicte Chappelle, il y auoit vne grande sale, & aux deux costés d'icelle deux promenoirs, esquels on voyoit des sieges à guise de parquets de Iuges. Personne ne passoit par le milieu d'icelle, hors-mis le *Chumpin*. Tous les autres entroient ou sortoient par les deux costez.

Le Pere & ses compagnons entrans dans ceste sale, les Capitaines, qui estoient deputés pour les presenter, se mirēt à genoux: & après auoir touché de la teste contre terre, dirent au *Chumpin* que ces estrangers desiroient luy parler. Lors il commanda qu'on les fit approcher, & comme ils furēt à quinze ou vingt pas loing de luy, on les fit mettre à genoux. Là dessus arriva vn trucheman, lequel estoit si peu versé en la langue Espagnole, qu'il n'entendoit presque rien de ce que le Pere, ou ses compagnons luy disoient, ny eux aussi ce qu'il vouloit dire. Le *Chumpin* voyant cela, se mit en cholere, & commence à crier fort haut, & à frapper de la main sur la table, qu'il auoit deuant soy. Plusieurs des gens-d'armes ou Capitaines, qui estoient là presens, y accourent soudain, pour voir ce qu'il vouloit, se mettrant à genoux deuant luy, & baissans la teste; mais incontinent qu'ils luy auoient dit vn mot, ils s'en retournoient vistement à leur place. Vn peu apres ils firent venir vn originaire des Philippines, que le Pere auoit amené, lequel entendoit quelques mots Chinois: mais comme il ne

Le Pere
Sanchez
parle au
Chum-
pin.

conceuoit pas bien ce qu'on luy demandoit, il se trompoit aussi en respondant. Le Pere cognoissant cela s'approche de son interprete, pour scauoir dequoy on l'interrogeoit: mais comme le Chumpin veid qu'ils parlementoyent ensemble, il va soupçonner quelque chose de mal, & iettant vn cry donna vn grâd coup de la main sur la table. A ce signe, tous ceux qui estoient en la basse-cour accoururent à luy, les coutelas au poing, & prenans avec grande rudesse le Pere, & son trucheman, les ietterent tous deux hors de la sale. En cela le Pere cogneust, que le Chumpin estoit entré en quelque soupçon & deshance d'eux: & pour luy oster cela de l'entendement, il monstre les clefs de son bahu, ou il auoit son passe-port, faisant signe qu'on l'allast ouuir, & qu'on trouueroit là dedans, ce qui leur donneroit à cognoistre qu'elles gens ils estoient. Le bahu estant ouuert, apres que le *Chumpin* eust leu le passe-port du Gouverneur des Philippines, il fust appaisé, & leur enuoya dire, par le premier trucheman, qu'il estoit content d'eux, ayant cognu par ces lettres, qu'ils estoient gens de bien, & promit qu'il les despescheroit le lendemain, & les enuoyeroit à Canton. Il estoit desia nuit, quand ils sortirent de la forteresse, & comme ils furent de retour à la mer, on les mist en diuers nauires de la flotte, pour leur faire semblable traictement, que leur auoit fait le *Supi*. Le iour estant venu, on leur bailla les despaches du *Chumpin*, qui leur enuoya dire par vn homme exprés, qu'ils s'en pouuoient aller à la bonne heure, & que pour leur viatique il leur enuoyoit du riz, & vn porc fraiz, avec vn panier plein de pastez, & vn autre d'oranges. Il commanda aussi qu'on leur baillast trois autres nauires, pour les conduire iusques au port de Canton.

Ils partirēt le Lundy matin apres la feste de Pasques, & s'estans autresfois desembarquez près d'une ville nommée Auchéo, ils se presenterent à vn Mandarin, qui les despacha par terre, le mardi suiuant. En ce port s'arresterēt le pilote, & les matelots qu'on leur auoit baillez, & ceux aussi que le Pere auoit menez de Manille, & il print avec soy trois de ses compagnons seulement, & vn Capitaine Chinois, avec quelques soldats qu'on luy bailla, pour le conduire. En telle compagnie il s'embarqua derechef sur vne autre belle riuere, en laquelle ils voguerent l'espace de quinze iours, & autres trois ou quatre iours ils marcherent par terre, iusqu'à ce qu'ils arriuerent à vn autre fleuue fort celebre,

qu'on appelle du sel. Ayant nauigé quelques iours sur ce fleuve, ils arriuerent à vne ville, qui n'est qu'à vne iournée & demie de Canton. Icy se presenterēt derechef quelques autres difficultez. Mais apres que le Mandarin se fust informé de ceux qui conduisoient le Pere, & ses compagnons, qu'elles gens c'estoyent, & d'où ils venoyent, il les despescha avec beaucoup de courtoisie, leur baillant encore des gardes, pour les accompagner iusques à Canton, là ou ils pensoient trouuer l'Aytao, qui est la seconde dignité de toute la Prouince: mais en chemin ils entendirent, qu'il n'estoit pas à Canton, ains à vne autre ville, qui estoit sur le chemin, nommée Tanquen, là ou on reserre tous les auirons & gouuernaux des nauires, quand ils ne nauigent point, & l'on y en faict aussi grand nombre. Le Mandarin, qui alloit avec le Pere, s'aduança, pour entrer pluſtoſt que luy dans la ville, afin d'informer cependant l'Aytao de sa venue. Il le trouua se recreant sur la riuere, qui passe par deuant la ville de Tanquen, dans vn beau vaisseau tout vernissé de charan noir, avec des lignes d'or par le dehors. d'où l'on entēdoit vne fort douce musique de fleutes ou autres semblables instrumens. Le P. donc s'approche du costé ou il croyoit, qu'estoit l'Aytao (car on ne le voyoit pas, à cause qu'il estoit couuert d'vne courtine de soye rouge, par laquelle il voyoit sans estre veu) & s'estāt mis à genoux selon la coustume du païs, il cōmēce à luy parler. L'Aytao fait incōtinēt courir la courtine, & lors se descouurit vne tres-belle chambre, ou il estoit assis en sa chaire, vestu d'vne robe de couleur de pourpre. Il receut la lettre du Gouverneur de Luçon, & apres l'auoir leuë, il congedia le Pere pour ce iour-là, luy monstrant beaucoup de signes de bien-ueillance. Cependant il continue à se promener, & esgayer sur la riuere: & apres qu'il fust de retour à la ville, il despescha le Pere, ce soir mesmes, le renuoyant au Conchifu de Canton, (qui est comme le Iuge Maje, ou le President de la Prouince) & ordonna qu'on luy baillast vn autre Mandarin, pour l'accompagner iusqu'à là. Il partit donc le lēdemain de la ville de Tanquen, & arriua à celle de Canton le 2. de May, ayant vogué sur vne riuere fort grande, qui passe près de la mesme cité. Le Mandarin qui cōduisoit le Pere, luy diēt, qu'en ceste riuere là y auoit des Portugais, & qu'aux faux-bourgs de la ville demouroit vn autre Pere, comme luy, que s'il luy donnoit quelque piece d'argent, il le meneroit là, ou il estoit. Le P. luy promist de faire en sorte, que

*Tanquen
ville, ou
il trouue
l'Aytao.*

*Arriue à
la cité
de Cāō,*

les Portugais le contenteroyent : car il n'auoit point pour lors beaucoup d'argent : l'autre monstra, qu'il se fioit en sa promesse ; tellement qu'il le mena là ou estoient les nauires des Portugais : lesquels recognoissans que c'estoyent gens d'Europe, sortirent incontinent dans vn esquif, pour les receuoir & bienueignier, accompagnés du P. Michel Roger, qui se trouua lors avec eux.

Les deux Peres se voyans ensemble, en pays si loingtain s'em-
 brassèrent avec grande consolation, tant d'une part que d'autre. *Rencon-
 tre le P.
 Roger.*
 Toutesfois le Mandarin qui auoit charge de conduire le P. Al-
 fonse, ne permit pas qu'ils iouissent longuement d'icelle : car il
 pressa tellement le Pere, afin qu'il allast vitemment se presenter au
 Conchifu, qu'ils n'eurent le moyen de traicter par ensemble des
 affaires : si que le P. Roger estoit en grande peine, ne sçachant s'ils
 estoient menez comme prisonniers, ou autrement. Tous neant-
 moins les accompagnerent iusques à l'hostel du Conchifu, là ou
 ils furent contraincts de les quitter ; car personne n'entre dans ces
 maisons, si on ne l'y appelle. Or le P. Alfonse & ses compagnons
 estans entrez au lieu, ou l'on donne audience, les portes furent
 tout incontinent fermées : & là on les feit attendre plus d'une
 heure & demie, auant que les appeller. Car c'est ainsi qu'ont ac-
 coustumé de faire ces Mandarins, pour monstrier leur autorité
 & grandeur, principalement enuers les estrangers. Apres cela le
 Conchifu estant assis en son siege, le Pere luy alla faire la reue-
 rence : & le Conchifu le receut avec vn bon visage : car c'estoit vn *Se pre-
 sente au
 Conchifu
 de Cātō.*
 ieune homme fort humain, & courtois, tellement que les Portu-
 gais mesmes en disoyent force bien. Or comme il estoit sur le
 point de bailler ses despêches au Pere, on luy donna aduis que le
 Chayen, c'est à dire le Visiteur de la Prouince venoit. Et quand
 ces Visiteurs arriuent en quelque ville, tous les Mādarms d'icelle
 luy vont au deuant pour le recueillir : & apres qu'il est entré on
 tient les portes de la ville serrées l'espace de trois iours. Partant
 soudain que le Conchifu entendit que le Visiteur arriuoit, il cō-
 gedia le Pere & ses compagnons, commandant à vn autre Man-
 darin de les loger. Cestuy-cy les mena à la maison, ou le P. Roger
 se tenoit : lequel estoit en grand soucy de ce qui seroit arriué au
 P. Alfonse. Mais le voyāt chez soy, il le receut avec vne ioye nōpa-
 reille : & rāt l'un que l'autre furent fort cōsolez de se voir ense-
 mble dans ceste pauvre maison. Pendāt le tēps que le P. Alfonse se-
 journa à Cātō, il fist entēdre au P. Roger l'ocasiō de son voyage ;

& de ce qu'il deuoit traicter avec les Portugais de Macao, qui estoit de faire recognoistre le Roy d'Espagne Philippe 2. pour Roy de Portugal, apres le trespas du Cardinal Henry, qui auoit succedé au Roy Sebastien; luy monstrant les papiers & le contenu de tout l'affaire. Toutesfois les Portugais qui estoient lors à Canton n'en sceurent rien, ny les Chinois aussi: ains pensoient tous que le P. Alphonse n'estoit venu là, que pour visiter ceux de la Compagnie, qui estoient à Macao. Les trois iours, apres la venue du *Chayen* estans passez, les portes de la ville furent ouuertes, & lors le *Conchifu* fist appeller le P. Alphonse & ses compagnons, pour scauoir qui ils estoient, & pour quelle cause ils estoient venus là. Cependant que le Pere rendoit raison de ce qu'on luy demandoit, voicy entrer vn des Mandarins, qui auoit examiné le Pere, & veu ses patentés en l'vne des Citez, par ou il estoit passé, lequel dict au *Conchifu*, qu'il n'y auoit en quoy faire difficulté, d'autant que le Pere & ses compagnons estoient gens de bien, & qu'ils n'estoient point venus là pour faire du mal, ainsi que leurs patentés monstroyent. Au moyen de quoy le *Conchifu* donna sa sentence en telle forme. Ceux-cy sont des Pères, qui vont à Macao, pour voir quelques autres de leur Ordre,

» ils ne portent point d'armes, & ne font aucun mal à personne,

» partant ils peuuent librement passer: seulement meritoient-ils

» quelque chastiment pour auoir apporté au Seigneur Aytao, vne

» lettre en vn peu de papier, & n'auoir traicté avec luy de ce qu'ils

» demandoient par forme de requête, cōme avec leur Supérieur:

» toutesfois parce qu'ils sont estrangers, & ignorent nos loix, ils

» doiuent estre pardonnez. La mesme sentence fust par apres confirmée par l'Aytao: mais d'autant qu'il estoit aussi besoin, qu'elle fust encore ratifiée par le *Tatan*, ou Vice-roy de la Prouince, ils la luy enuoyerent vistement à la cité de Xauquin, ou il demouroit: & cependant le Pere s'arresta à Canton, iusqu'à ce que la despeche fust venue, pour s'en aller à Macao. Mais il attendist plus qu'il ne pensoit: car en ces entrefaictes les affaires furent embrouillees pour l'occasion qui s'ensuit.

Est bien
expedié
du con-
chifu.

Le Vice-roy auquel on auoit enuoyé la sentence du *Conchifu*, pour la signer, ayant esté nouuellement promu à ceste dignité, s'alloit informant en la mesme faison des Portugais, pour scauoir avec quel pouuoir & auctorité ils residoyent au port de Macao. Là dessus comm'on luy bailla la sentence du *Conchifu* pour l'approuuer,

prouuer, vn certain Ghinois, qui souloit seruir de trucheman aux Portugais, qui trafiquoient à Canton, se trouua present, ayant esté appellé par le Vice-roy tout exprés, pour l'informer de ce qu'auons dit. Or comme le Vice-roy luy demanda quelles gens estoient ceux là, qui alloient maintenant de nouueau à Macao, le Chinois pour auoir esté mal informé, ou pour haine qu'il portast aux Espagnols, respondit que c'estoient certains Castillas larrons, voleurs & espions, qui estoient venus là (comme l'on disoit) pour recognoistre les ports de la Chine, & autres choses à ce propos. Le Vice-roy entendant cecy, comme c'estoit vn homme aduisé, enuoye soudain vn Mādarin à Macao, avec commandement au Capitaine des Portugais, de s'en venir le trouuer au plustost, pour rendre compte de soy & des autres de sa nation. Les Portugais de Macao furent bien estonnés d'vne telle nouuelle, & entrans en conseil sur ce qu'ils deuoient faire, ils resolurent en fin qu'il n'estoit aucunement expedient, que le Capitaine y allast : mais bien l'Auditeur, c'est à dire le Iuge de Macao, avec le P. Roger, qui estoit lors à Canton; & ainsi il fut fait. Arriuez dōc qu'ils furent à Xauquin, ils s'allerent presenter deuant le *Tutan*, lequel les reçeut avec grande auctorité & majesté, estant enuironné de beaucoup de gens-d'armes, & leur parla avec vn peu de rudesse, les reprennant de ce que sans le congé des Vice-rois, ils s'estoient arrestés en ce port là, & y auoient basti des maisons & des Eglises. A quoy le P. Roger & le Iuge respondirent humblement, que les Portugais de Macao auoient tousiours esté, & estoient encore fideles seruiteurs du Roy de la Chine, & qu'ils recognoissoiēt son excellence pour leur Seigneur & protecteur : partant qu'ils le supplioient de les vouloir assister de son ayde & faueur. Le Pere Roger respondit de ceste sorte, cognoissant bien l'humeur des Mādarsins, qui sont fort aises qu'on recognoisse leur puissance & auctorité. Pource auant qu'aller là il auoit traité avec le Iuge de Macao de ce, qu'ils debuoiēt respōdre, & comme ils deuoient proceder en vn affaire si scabreux & si importāt. Ce qui fut tres-bien aduisé & mieux executé. Car le *Tutan* ayāt ouy vne responce si humble, fut changé de telle sorte, qu'il se mōstra des-lors fort fauorable en leur endroit, comme nous verons cy apres, & leur dit sur le champ, qu'il vouloit estre de là en auant pere des Portugais. Brief il fit à tous deux beaucoup de faueurs. Entre autres il donna des lettres patentes au P. Roger,

Le Vice-roy mād- de venir le Capitaine de Macao.

Le P. Roger & le Iuge de Macao vnt parler au Tutan.

Luy gagnent le cœur avec vne humble respōce.

Obtien-
nent de
luy de
grands
prieile-
ges.

Et la des-
peche du
P. Al-
fonse.

Ils ar-
riuent
tous à
Macao.

par lesquelles il luy permettoit d'entrer dans la Chine, & d'en sortir, quand bon luy sembleroit, sans que personne luy mit aucun empeschement, ou destourbier. Chose qui auoit esté tant désirée & pourchassée, mais sans effect iusqu'à lors. Outre ce il luy donna congé d'auoir vne maison dans la ville mesme de Canton, ou il peut tenir vne Chapelle ouuerte à tous ceux, qui voudroient y aller. Finalement il luy octroya, qu'il peut aller à la ville de Xauquin, pour visiter le *Tutan*, quand bon luy sembleroit. Le Pere Roger voyant le Vice-roy si bien disposé, apres l'auoir remercié de tant de faueurs, qu'il luy faisoit, le supplia de vouloir encore permettre aux Castillas, qui estoient à Canton, de s'en aller à Macao. Le *Tuian* luy respond, que s'il vouloit se rendre pleige pour eux, & aussi pour ceux, qui estoient demeurés au port d'Auchéo avec la fregate, qu'à leur occasion il n'adiendroit aucun mal ny dommage, qu'il luy octroyeroit volontiers ce qu'il demandoit. Le Pere dict, qu'il estoit content de se rēdre caution pour tous ceux là. Et aussi tost le Vice-roy donna permissiō au P. Alphonse & aux autres Espagnols de s'en aller à Macao, signant la sentence du *Conchifu*. Le Pere Roger & l'Auditeur estans de retour à Canton, apporterent au *Conchifu* les despesches, qu'ils auoient obtenues du *Tutan*, pour le P. Alphonse & ses compagnons: mais ils le trouuerent si mal informé d'eux, qu'il ne vouloit en façon quelconque les expedier, iusqu'à tant que le P. Roger s'estant mis à genoux deuant luy, l'eüst assuré que c'estoient des Religieux de son Ordre, qui alloient enseignās la loy diuine d'une part & d'autre. En fin le *Conchifu* addoucy par ces parolles, signa les lettres, que le Vice-roy leur auoit bail-
lé. Car sans cela ils n'auoient rien fait: si qu'ils partirent tous ensemble du port de Canton le Vendredy apres le Dimanche de la Trinité: & arriuerēt à Macao sur la fin du mois de May l'an 1582. Ils trouuerent là le P. Alexandre Valignan, qui estoit encore lors Visiteur de la Compagnie de Iesvs en l'Inde: auquel le P. Sanchez auoit fait entendre par lettres l'affaire, pour lequel il estoit là venu: afin que par sa prudence il disposast les Portugais en sorte, qu'ils ne trouuassent pas estrange ce, qu'il leur vouloit dire. Et pour ce le P. Alexandre leur faisoit entendre tout bellemēt, qu'il se pourroit faire, que la couronne de Portugal eust esté vnīe à celle de Castille. Ce qu'au commencement sembloit à plusieurs Portugais de fort dure digestion, & ne pouuoient bonnement

croire que cela se peut faire: mais peu à peu ils s'allèrent persuader, qu'il pourroit estre, que Dieu l'eust ainsi ordonné. Là dessus arriva le P. Sanchez, lequel commence à declarer à quelques vns des principaux ce, qui s'estoit passé, les faisant iurer au préalable de n'en dire rien à personne, iusqu'à ce que l'affaire seroit decouvert à tous ensemble. Or comme il veid que ceux là se conformoient à la volonté de Dieu, disposant ainsi les affaires, il fit assembler vn iour sur le tard en la maison de la Compagnie, tous ceux, qu'il auoit aduisez en particulier: là ou se trouua aussi l'Euuesque de Macao, le P. Alexandre Valignan, & quelques autres Peres de la mesme Compagnie, ensemble le Capitaine Maje de la ville, & les quatre Esleus, qui sont comme les Consuls d'icelle, avec quelques vns des plus anciens & principaux habitans. Le P. Sanchez declare pour lors à tous ensemble, comme les deux couronnes de Portugal & de Castille estoient vnies en la personne du Roy d'Espagne Philippe 2. touchant en brieif comme le tout s'estoit passé, sans faire mention d'aucune guerre. Il leur monstra pareillement certains papiers, lesquels faisoient foy, comme les principaux chefs de Portugal auoient rendu obeissance au Roy Philippe, adioustant que cela luy appartenoit de droit, selon le iugement qu'en auoient donné force gens doctes, & les Vniuersités plus celebres de l'Europe. Bref il apporta là dessus quelques raisons, pour leur faire cognoistre combié cela leur estoit conuenable; de sorte que tous se monstrent estre cõtents de ce, que Dieu auoit ordonné en cela: & adioustoient eux mesmes des nouuelles raisons, pour preuuer qu'il leur estoit profitable d'auoir vn si grãd Monarque pour Roy: si que tous d'un commun consentement arresterent de luy iurer obeissance. Cela fait, le premier iour de feste ensuyuant, le Pere Alexandre Valignan preschant au peuple, declara la resolution, qui auoit esté prinse, & apporta quelques raisons, pour la faire trouuer bonne à toute l'assemblée. Le mesme fit en vn autre sermon le P. Recteur du College de Macao. Et finalement le P. Alфонse Sanchez: tellement que les Citoyens iurerent obeissance à leur Prince. Apres cela le P. Sanchez retire acte de ce, qui s'estoit passé, & s'en retourne aux Philippines. I'ay voulu inserer icy ce voyage, tant par ce qu'il contient beaucoup de choses remarquables, touchant les v&z & costumes de la Chine, que pour auoir esté donné à l'occasion d'iceluy au Pere Roger vn si ample pouuoir, qu'a esté dit:

*Traicté
de l'Es-
que de Macao,
& quelques autres
Peres de la mesme
Compagnie, ensemble
le Capitaine Maje
de la ville, & les
quatre Esleus, qui
sont comme les
Consuls d'icelle,
avec quelques vns
des plus anciens
& principaux
habitans. Le P.
Sanchez,*

*Les Portugais de
Macao iurent
obeissance au Roy
d'Espagne.*

qui fut le commencement de l'entrée & demeure en la Chine des Peres de la Compagnie : lesquels s'y sont depuis ancrés d'avantage, comme nous verrons en ce qui s'en suit.

Comme le P. Roger obtint congé du Tutan pour luy & quelques autres de la mesme Compagnie, de résider en la cité de Xauquin; d'où ayant esté congediés pour quelque temps, ils y furent rappelés.

CHAPITRE XXIII.



PRES que le P. Roger & l'Auditeur furent de retour à Macao, & que le Capitaine Maje avec les autres habitans d'icelle ville, eurent entendu les faueurs, que le Tutan leur auoit fait, ils furent d'aduis, que le mesme Auditeur retournast visiter le

Les Portugais de Macao enuoyèrent vn present au Tutan.

Et le P. Roger des lunettes.

Le Tutan enuoya querir le P. Roger.

Tutan, luy apportant vn present au nom de la ville, & que le P. Roger l'accompagnast, puis que le Vice-roy luy auoit monstté tant d'affection. Mais le Pere n'y peut aller : car ainsi qu'il s'apprestoist pour partir, il tombe en vne grosse maladie : & partant il fallut que l'Auditeur fit ce voyage tout seul : neantmoins le Pere desirant s'entretenir en la bonne grace du *Tutan*, luy enuoya par le mesme Auditeur des lunettes, dont ils font grand cas en la Chine, luy promettant qu'il l'iroit voir si tost qu'il se porteroit mieux, pour luy faire present d'vn horloge, qu'il luy auoit gardé tout exprés. Le *Tutan* ayant sçeu par le rapport de l'Auditeur, que le Pere se trouuoit mal, monstra en estre fort marry, & aggrea beaucoup la souuenance, qu'il auoit de luy; si chargea l'Auditeur, quand il s'en voulut retourner, de luy dire de sa part, qu'aussi tost qu'il se trouueroit mieux, il ne faillist de le venir voir à Xauquin : mais quelque tēps apres que l'Auditeur fut party, le Vice-roy voyant que le Pere tardoit encor à venir, escriuit vne lettre au P. Alexandre Valignan, le priant que si tost que le P. Roger seroit releué de maladie, il le luy enuoyast : car il desiroit fort le voir. Avec ceste missiue il bailla vne *chapa* ou patēte, pour seruir de passeport audit Pere, escriite sur vne lame d'argent, longue de deux espans en forme d'escusson, donnant par icelle puiffance au P. Roger d'aller & venir de Macao à Canton, & à Xauquin, sans que les gardes luy missent aucun empeschement. Reçeu qu'on eust ces lettres à Macao tous furent d'aduis, qu'il ne

falloit pas laisser perdre vne si bonne occasion, laquelle il sembloit que nostre Seigneur enuoyast pour donner commencement à la mission de la Chine. Il fust donc resolu, que le Pere Roger partiroit au plustost. Or estant tout prest pour desinarder, voicy arriuer au port de Macao vn nauire Chinois de la part du mesme Tutan, pour conduire le Pere à Xauquin. Il partit donc dans ce vaisseau le dixhui&iesme Decembre de l'an 1582. menant quant & soy le Pere François Pasio, & vn troisieme de la mesme Compagnie, qui n'estoit pas encore Prestre, ensemble quelques ieunes hommes Chinois, & arriuerent tous à Canton le Lundy matin, veille de la Noel: là ou ils s'arrestèrent le reste de ce iour, & le lendemain encore, pour celebrer plus deuotement ceste sainte feste, & dire leurs trois Messes: esquelles ils recommanderent à Dieu fort affectueusement l'heureux succez de ce voyage. Estans partis de Canton, ils arriuerent à Xauquin le troisieme iour apres, & soudain qu'ils furent descendus à terre, ils s'en vont trouuer le Secretaire du Tutan, lequel fust fort ioyeux de la venue du Pere: mais il luy demanda, pourquoy il amenoit deux autres avec soy, puis que le Tutan n'auoit enuoyé querir que luy seul. Le Pere luy respond, qu'estant Religieux, il n'auoit point accoustumé d'aller seul, sinon en cas de grande necessité, & pource qu'il auoit amené deux de son ordre, l'un afin qu'il l'accompagnaist, quand il iroit visiter le Tutan, ou autre part: & le second afin qu'il demeurast cependant en la maison, pour les occurrences qui se pourroyent presenter. Le Secretaire demeura satisfait de la raison, que le Pere luy donna, & le lendemain les mena tous trois deuant le Tutan, qui estoit pour lors en la basse-cour de son Pretoire, ou du lieu auquel il donne audience, à ceux qui ont affaire à luy. Les deux Peres s'approcherent pour luy faire la reuerence se mettans à genoux, comme est la coustume du pais, mais il leur commanda tout aussi tost de se leuer, & s'approcher plus près de luy. Puis il demanda fort familièrement au Pere Roger comment il se portoit, car il paroissoit encore fort debile, adioustant quelques autres propos, en vn desquels il leur dict, qu'il estoit bon amy des Portugais, & auoit commandé à l'Aytaa, & aux Mandarins de Canton, qu'ils les assistassent en ce qu'ils auroient besoing de leur ayde.

Les Peres le remercièrent tant de cela, que des autres faueurs qu'il leur faisoit, & prenaient congé de luy pour ce iour-là, il leur

Le P. Roger & autres de la Comp. arriuent à Xauquin

S'en va visiter le Tutan avec le P. Pasio.

môstra des grâds signes de bienueillance. Apres ce ils allerent de-
 rechef visiter le Secretaire qui leur faisoit de bons offices, & leur
 monstroit de iour en iour plus d'affection. Il luy donnerent à en-
 treditre, cōme estans logez sur la riuere dans vn nauire, ils ne pou-
 uoyēt faire le deu de leur charge, qui estoit de sacrifier au Dieu
 du Ciel chasque iour, comme ils auoyent accoustumē à Macao.
 D'auantage qu'ils auoyent apporté vn horloge à rouēs, pour dō-
 ner au Tutan, & qu'afin de le pouuoir monter, il estoit necessaire
 qu'ils fussent en terre; partant qu'ils le supplioyent de vouloir
 parler au Tutan, à celle fin qu'il luy pleust leur faire bailler vn lo-
 gis, auquel ils peussent se retirer. Le Secretaire fist volontiers ce
 que les Peres luy demanderent, & le Tutan commanda incontine-
 nent, qu'on les pourueust d'une maison. Ce qu'ayant esté faict;
 ils dresserent en icelle vne chappelle, & le premier iour de l'an

*Demanderent vn
 logis
 pour se
 retirer.*

*Il leur
 est bail-
 lé, & ils
 y dres-
 sēt
 vne chap-
 pelle.*

1583. y dirent la Messe. Ce mēme iour le Tutan leur enuoya vn
 present, qui fust vn panier de farine, & vn autre de ris, avec vne
 piece de pourceau frais, & deux poulles, avec autant de canards.
 Le Secretaire aussi leur enuoya quelques confitures ou massé-
 pains, & vn autre iour les mena dīner à sa maison. Apres que les
 Peres furent logez dans Xauquin, ils monterent l'horloge qu'ils
 auoyent apporté, & delà à quelques iours le presenterent au Tu-
 tan, par l'entremise du Secretaire. Le Tutan se pleust grandemēt
 à voir l'engin & artifice d'iceluy, & le vouloit payer en draps de
 soye, ou en argent: mais les Peres n'en voulurent rien prendre, di-
 sans qu'ils luy faisoient ce present en signe d'amitié, & pour re-
 cognoissance des biens faicts receus de luy. Seulmēt luy requere-
 roient-ils que ce fust son bon plaisir, qu'ils eussent vne petite
 maisonnette asseurée dans la ville: afin de pouuoir mieux appren-
 dre les sciences & coustumes de la Chine, & auoir moyen de
 communiquer pareillement aux Chinois celles, qu'ils auoyent
 apprises en Europe. A cecy le Tutan respondit, qu'ils luy presen-
 taient vne requeste là dessus, & qu'il feroit ce qu'ils desiroient.
 Les Peres ayans dressé leur requeste, la presenterent au Secretaire
 à l'heure qu'il leur assigna, & la substance d'icelle estoit telle.
 Que comme ils estoient gens, qui faisoient profession de seruir
 Dieu, & d'apprendre diuerses sciences, ayans entendu en leur
 païs, que les habitans de la Chine estoient gens d'entendement,
 & auoyent de bonnes loix & coustumes, ensemble beaucoup de
 liures, qui traictoyent des sciences, & contētoient de bons ad-

*Furent vn
 present
 d'un hor-
 loge au
 Tutan.*

uis, pour bien viure, ils auoyent eu enuie d'apprendre ces choses, & cognoistre les autres raretez de ce Royaume, & qu'à ceste cause ils auoyent quitté leur pais, pour s'en venir à la Chine, employans trois ans à faire le voyage, & passans beaucoup de dangers sur mer. Mais parce qu'en la ville de Macao ils ne pouuoient si bien faire cela, ils supplioyent son Excellence de leur donner cōgé de demeurer parmy eux dans le Royaume.

Le Tutan ayant leu ceste requeste, estima que c'estoit vn grād honneur aux Chinois, que telles gens eussent abandonné leur pais, & feussent venus de si loing, pour demeurer parmy eux: & partant leur octroya aisement tout ce qu'ils demanderent. A ce-
*Obtien-
nent per-
mission de
demen-
rer en la
Chine.*
 cy ayda encore beaucoup, qu'il entendit, que c'estoyent gens let-
 trez, & qui auoyent cognoissance de la Philosophie, & des Ma-
 thematiques, esquelles ils se plaisoit fort. En outre qu'ils estoient
 pacifiques, & ne faisoient aucun tort à personne, ains se cōpor-
 toient avec tous fort honnestement & amiablement. En conse-
 quence de ce il ordonna, qu'il leur feust baillé vn meilleur logis,
 que le premier, & si leur donna permission de faire venir encores
 deux autres Peres à Xauquin. A ceste occasion le Pere Mitthieu
 Ricci vint de Micao, avec vn autre qui n'estoit pas Prestre: de sa-
 çon qu'ils se trouuerent à Xauquin cinq de la Compagnie: & en-
 tre ceux-là y auoit trois Prestres, sçauoir est le P. Michel Roger,
 le Pere François Pasio; & le P. Matthieu Ricci, qui auoyent esté
 tous trois ensemble esleuez au College de Rome.

Peu de iours apres croissant de plus en plus la bien-ueillance
 du Tutan enuers eux, il leur donna vne autre patente, par laquelle
 il les declaroit, & vouloit qu'ils fussent tenus de là en auant, pour
 manans & habitans de la Chine, ordonnant que cela fust publié
 par toute la ville à son de trompe, & cry public. Mais non contēt
 de ce, il voulut encor les venir visiter en leur logis. Ce qu'on esti-
*Sont de-
clarez
manans
& habi-
tans de
la Chine.*
 ma pour vne faueur du tout extraordinaire; car les Vice-roys de
 la Chine tiennent autant, ou plus de rang & de grauité, que les
 Roys de nostre Europe: & sont honnōrez & respectez es lieux
 de leur iurisdiction, autant que le Roy mesme sçauoit estre.
 Neantmoins cestuy-cy voulut s'humilier iusqu'à là, que d'aller
 voir des estrangers en leur logis: ce qui feist grandement estor-
 ner & esmerveiller tout le monde. Or l'equipage & arroy, avec
 lequel il y vint, estoit tel. Il portoit vn accoutrement de soye
 rouge, & au bört de sa robe pendoyent plusieurs clochettes.

d'or ou d'argent. Il auoit sur la teste vne couronne d'argent surdoré. Tous les Mandarins, qui se trouuerent lors à la ville, l'accompagnoient vestus de leurs liurées. Les Peres ayant esté aduertis de ceste visite dès le iour auparauant, pour ne manquer en rien de leur deuoir, s'informerent du Secretaire, s'il falloit qu'ils allassent au deuant de luy, pour le receuoir, ou en quelle façon & maniere ils deuoyent se comporter. Le Secretaire leur dict, qu'ils se tinssent coys dans leur maison : car le Vice-roy prendroit plus de plaisir à cela. Ce qu'ils firent aussi. Doncques le Tutan estant venu le lendemain avec toute sa suite, iusques à l'auant-portail du logis, ou les Peres se tenoyent, comme il eust mis pied à terre, & que tous les Mandarins luy eussent fait la reuerence, comme si ç'eust esté le Roy mesme, il entra dans la maison, accompagné des autres Mandarins : & ayant salué les Peres, avec beaucoup de courtoisie, il deuisa avec eux tout vn long temps fort familièrement. Apres qu'il eust veu le reste de la maison, il entra dans la chappelle, laquelle ils auoyent ornée le mieux qu'il leur auoit esté possible. Brief s'estant entretenu vne bonne piece de temps, à voir les choses qu'ils auoyent, il s'en retourne avec la mesme suite, & majesté qu'il estoit venu.

Et des autres Mandarins. Les autres Mandarins de la ville, voyans l'honneur & les faueurs que le Tutan faisoit aux Peres, commencerent eux aussi à les hanter, & les tenir en estime. Au mesme temps arriua à Xauquin, le *Chumpin*, qui est le grand Admiral de toutes les armées sur mer de la Chine, selon qu'à esté dict. Les Peres, estans aduertis de sa venue, l'allerent saluer, dõt il fust tres-aise, & leur monstra beaucoup de signes de bien-ueillance, enuoyant mesmes à leur logis vn present de fruiçts. Peu de iours apres vn des principaux Man-

Vn des principaux Mandarins. darins de ce pais là, feist vn banquet à deux autres Mandarins, & au Secretaire du Tutan, à vn iardin qui estoit proche de la maison des Peres, lesquels il enuoya prier de vouloir eux aussi estre du nombre des conuiez. Les Peres y allerent, principalement pour gaigner la bonne grace de ce Mandarin, qui estoit des plus grands, afin de pouuoir par son moyen & des autres aussi, donner au plustost commencement à la predication de l'Euangile, dans la Cité de Xauquin, comme ils desiroyent. Or bien que ce Mandarin fust l'vn des principaux de la ville : toutesfois il festoya les Peres, avec autant d'honneur & de courtoisie qu'il fist aux autres Mandarins, les faisant asseoir sur des chaires semblables aux leurs :

leurs: & quant il fust temps de se retirer, il donna à chacun d'eux vn esuentoir doré. Car en la Ghine tous portent d'ordinaire en main vn esuentoir, iusques aux villageois mesmes. Bref il monstroist estre fort aise qu'ils eussent esté declarés manans & habitans de la Chine: & promit de leur prester tout aide & faueur, en ce qu'ils auroient besoing de luy. Vn autre Mandarin aussi des principaux les enuoya visiter par vn sien fils, assés petit, auquel les Peres firent toutes les caresses, dont ils se peurent aduifer. Le pere del'enfant s'en monstra si recognoissant, qu'il les en enuoya remercier, leur faisant dire qu'ils cognoistroient, cōme il sçauoit aussi honorer & faire du bien à ceux, qui honnoroient & faisoient estime de ce, qui luy appartenoit. Ce qu'il monstra par œuures, comme nous verrons cy dessous.

Les Peres s'occupoient cepēdant à l'estude de la langue Mandarine, dont les personnes d'auctorité se seruent, à celle fin de pouoir plus commodément conuerser avec ces gēs là, desquels despend la conuersion de tous les autres; ils taschoient aussi de les bien edifier, avec l'exemple de leur bonne vie, honorans & respectans vn chacun, selon son degre, & se montrans enuers tous fort affables & courtois, pour gagner de plus en plus leur bien-vueillance.

Occupations des Peres.

Durant ce temps là le P. Roger composa vn Catechisme en langue Chinoise, & tourna la vie des Saints, estimant quē ce seroit vne chose tres-vtile, pour donner à cognoistre la sainteté de la Religion Chrestienne à ce peuple. Mais comme ils estoient sur le point de commencer à prescher publiquement la foy de nostre Seigneur en la cité de Xauquin, les affaires se changerent de telle sorte, qu'ils furent contraincts de partir de là, & se retirer à Macao, pour vn temps. L'occasion en fut telle. Le Vice-roy, qui les fauorisoit tant, deuant sortir de charge, fut d'aduis qu'auāt son desparr, ils s'en retournassent à Macao, & laissassent pour vn temps la ville de Xauquin, estimant que de ceste façon ils s'y anchreroient d'auantage, comme de faict il aduint. Mais pour en rendre mieux la cause de cecy, il faut sçauoir, que c'est vne coustume des Vice-roys de la Chine, qu'auant de sortir de charge, ils font escrire au liure de leurs Annales, toutes les choses remarquables, qui sont arriuées en leur temps: & l'vne des premieres choses que fait celuy, qui entre de nouueau en office, c'est de lire ce, qui est aduenir du temps de son predecesseur: afin d'auoir

Sont cō-gediés de Xauquin, & l'occasion pour quoy.

plus de cognoissances des affaires. Doncques le Vice-roy, qui sçauoit bien que son successeur se debuoit formaliser, s'il trouuoit ces estrangers à Xauquin, & feroit vne exacte recherche, pour sçauoir comment & à quelle occasion ils auoient esté inthronisez dans le Royaume; & bien que ce ne fût que pour auoir esté mis là par son predecesseur, qu'il les en chasseroit, vfa de ce stratageme, que de les congédier luy mesmes, auant que sortir de charge, faisant escrire dans le liure des Annales: Comme certains personnages de sainte vie, fort prudens, & bien entenus aux sciences, tant humaines que diuines, estoient venus des parties du Ponant, tout exprés pour apprendre les loix & coustumes de la Chine, & qu'il les auoit tolerés pour vn temps dans Xauquin; mais que bien tost apres il les auoit congédiez, pour ne laisser des estrangers au Royaume, contre les loix d'iceluy. Les Peres donc s'en retournerent à Micaio fort tristes & desolez, pour auoir esté contrainctz de quitter ceste place, ou ils esperoient faire vn grand fruct. Toutesfois ils ne furent pas long temps en ceste destresse: car le nouveau Tutan estant arriué, comme il eust leu les choses, que son predecesseur auoit laissé par escrit, touchant les Peres, il fut espris d'un grand desir de les voir & cognoistre. Aussi quelques Mandarins des principaux, qui'estoient amis du Tutan passé, luy firent croistre ceste enuie, confirmans ce qui en auoit esté escrit, & y adiousta encor beaucoup d'autres choses en la louange des Peres: lesquels estoient pour lors à Macao, & ne pensoient à rien moins qu'au retour. Mais là dessus voicy arriuer vn nauire, dans lequel venoit vn Mandarin avec quelques soldats de la part du nouveau Tutan, portant lettres d'iceluy, pour supplier les Peres de s'en retourner au plustost en la ville de Xauquin, & entre autres choses il disoit, qu'encores que le Tutan passé les en eust tenuoyés, ne les traitant pas, comme ils meritoient, ils ne deuoient pas craindre cela de luy. Car il vouloit les retenir auprès de soy, & leur bailler vne maison, Eglise, & tout ce, qui leur seroit necessaire. Ceste nouuelle si bonne, & si inopinée, apporta à tous les Portugais de Micaio, & nommément aux Peres de la Compagnie, vne telle consolation, que l'on peut penser. Et sans delayer d'auantage deux d'iceux (à sçauoir les Peres Michel Roger, & Matthieu Ricci) s'embarquent, pour aller à Xauquin: Là ou estans arriuez, ils furent receus fort amiablement du nouveau Tutan; lequel ordonna soudain, qu'on leur baillast vn logis, &

*S'it rap-
peller
par le
nouveau
Tutan.*

*Retour-
nent à*

quelque lieu propre, pour y bastir vne Eglise, leur donnant en-
 cor des lettres patentes Royaux, pour pouuoir demeurer en la
 Chine, & aller & venir par tout le Royaume, comme manans &
 habitans d'iceluy. Il fit aussi publier par la ville, que de là en auãt
 ils ne fussent point tenus pour estrangers, ains comme naturels
 du Royaume. Les affaires estans si bien disposez, qu'on ne pou-
 uoit souhaiter vn Vice-roy plus fauorable, voila qu'au mesme
 temps le Roy l'appelle à soy, peut estre, pour l'esleuer à quelque
 plus grande dignité, car il s'en alloit pour ne retourner plus à la
 Prouince de Canton. Avec son despart les Peres demurerent
 en la mesme crainte que deuant, ne sçachans, si celuy, qui deuoit
 luy succeder, les renuoyeroit de Xauquin, ou les y maintiendrait.
 Or il y auoit vn des principaux Mandarins, qui auoit esté *Con-*
chifu, c'est à dire Iuge-maje de la ville, lequel affectionnoit par-
 ticulierement les Peres; mesmes depuis qu'ils auoient fait tant
 de caresses à son fils, car c'est luy duquel nous auons parlé cy
 deuant. Ce Mandarin donc portant grande affection aux Peres,
 auoit incité le plus de tous le dernier Vice-roy, afin de les faire
 s'appeller: & quand le troisieme vint prendre la charge de l'aut-
 tre, il fit en sorte qu'il ne mit point en deliberation, s'il les deuoit
 retenir dans Xauquin, ains par son industrie & diligence, obtint
 de luy la confirmation des patentes, qu'ils auoient eu des Vice-
 roys passés. Car ce Mandarin estoit homme de grande auctorité
 & credit, ayant esté fait vn peu auparauant de *Conchifu*, *Lanci-*
tau, qui sont deux degres plus auant en dignité. Il semble que
 Dieu voulut pouruoir les Peres de l'auctorité d'un tel personna-
 ge, lors mesmement qu'ils en auoient plus de besoing, tant pour
 les deffendre, que pour leur fournir les choses necessaires à la vie
 humaine. Car ce Mandarin non content de les mettre en credit
 enuers les autres, disant beaucoup de louanges d'iceux; leur fai-
 soit aussi des bonnes amosnes; voire qui plus est, leur fit bastir à
 ses propres cousts & despens, l'Eglise & maison ou depuis ils lo-
 gerent, laquelle estoit tout contre la ville sur l'orée d'une belle
 riuere, en vn lieu enuironné de force arbres, ou il y auoit plu-
 sieurs estangs d'eau, qui rendoient l'habitation fort plaisante.
 Tout le bastiment estoit fait de chaux & de tuile, à deux estages:
 mais l'Eglise estoit à vn corps de logis tout à part. Au dessus de
 la porte il y auoit vne tour avec des galeries, qui respondoient
 sur la riuere: & auoient vne fort belle veüe. Le bastiment estant

*Vn grand
Manda-
rin leur
fait beau-
coup de
bons of-
fices.*

*Leur fait
bastir vne
Eglise & mai-
son.*

Fait
mettre
deux es-
critteaux

paracheué, le *Lancitao* y fit mettre deux escriteaux, en l'un desquels estoient contenuës en langue Chinoise ces parolles: *Le y demeurrent des sainctys personages, qui sont venus du Ponant: Et en l'autre: Icy se presche la vraye Loy du Dieu des Cieux.* Or comme tout le mode scauoit que ces escriteaux auoient esté là affichés par le commandement du *Lancitao*, & qu'il se prisoit que ce bastiment fut à luy, monstrant par là quelle affection il portoit aux Peres, & l'opinion qu'il auoit d'eux; plusieurs autres Mandarins & gens de qualité les alloient visiter; les honnoroient & fauorisoient en ce, qu'ils en auoient le moyen. Et luy mesmes conuersoit si familièrement avec les Peres, qu'il les aduisoit comment ils se debuoient comporter avec le Vice-roy, & autres Mandarins: afin de pouuoir faire leurs fonctions paisiblement, & sans offencer personne. Avec l'appuy du Tutan & du *Lancitao*, force gens commence-

Vn grand
Lettré
Chinois
se resault
d'estre
Chre-
stien.

rent de frequenter leur maison: entre autres il y eut vn Lettré, qui estoit tenu pour vn homme fort docte parmy eux, ayât esté gradué au 3. degré en la cité de Paquin. Cestuy-cy s'accostant quelque fois des Peres, prenoit vn singulier plaisir à traicter avec eux des choses de nostre foy. Il affectionnoit particulièrement le Pere Roger, lequel ayant composé (comm'a esté dit) vn Catechisme en langue Chinoise, mais non pas si elegante, comme ce Lettré eust bié desiré, il entreprint de le coucher en meilleurs termes, afin qu'il fut mieux venu, & leu plus volôtiers des Mandarins. Tandis qu'il s'occupoit à cela, nostre Seigneur luy cōmuniqua si grāde grace, & luy esclaira l'entendement de telle sorte, qu'il se rendit fort capable des verités, qu'il lisoit dans ce liure: & comme il estoit homme d'un beau discours, & d'un iugement fort solide, il les penetra si bien, qu'il en discouroit tres-pertinément, faisant esmerueiller tous ceux qui l'entendoient, voire mesmes les Peres. Car il apportoit plusieurs nouuelles raisons, & belles conuenances, qu'il descouuroit és mysteres de nostre foy, lesquelles on ne luy auoit iamais enseignées: & si prenoit encore plus grand plaisir & contentement d'esprit en les meditant. Brief il se resault de l'embrasser, & commence à demander instamment le baptisme: mais les Peres le luy dilayerent tout vn temps, pour quelques iustes cōsiderations, l'une desquelles estoit, qu'iceluy debuant estre le premier, qui receuroit le baptisme en la Chine, il estoit conuenable qu'il fust bien instruit; de sorte

Demāde
instam-
ment le
baptis-
me, mais
on le luy
dilaye,
pour
quoy.

qu'il peut rendre raison de sa foy, à ceux qui la luy demando-
 roient. Car estant homme tant cogneu, à cause de sa doctrine,
 c'estoit vne chose asseurée, que les Mandarins voyans qu'il faisoit
 profession d'une loy si nouvelle parmy eux, luy en demando-
 roient la cause. En outre l'on vouloit introduire tout doucement,
 & sans faire grand bruiet, la foy Chrestienne audict Royaume:
 parce que, comme les Mandarins sont d'ordinaire gens soupçon-
 neux, ils se fussent parauenture esmeus & alterez, s'ils eussent veu
 si tost, que le monde couroit apres ceste Religion nouvelle par-
 my eux, mais ancienne quant à foy, & pource ils estimerent, qu'il
 seroit mieux de faire plustost imprimer ce Catechisme, qu'auons
 dict en langue Chinoise, selon la traduction, que ce Lettré en au-
 uoit faict, & vost comment il seroit receu. Estant donc imprimé
 ils en donnerent des exemplaires aux principaux Mandarins, & à
 plusieurs autres. On distribua aussi vn grand nombre de fueilles,
 ou estoient imprimez à part les commendemens de Dieu. Ce
 qui fust vn moyen tres-propre, pour donner à ce peuple là quel-
 que cognoissance de la sainteté & excellence de la foy Chre-
 stienne, sans faire grand bruiet. Les Mandarins ayant veu ce petit
 eschantillon, disoient haut & clair, que c'estoit vne loy toute ce-
 leste & diuine, & ses commandemens si conformes à la raison,
 qu'il n'y auoit rien à redire; concluans qu'il n'estoit pas possible,
 que ce fust vne inuention des hommes, mais vne chose venue
 du Ciel.

*On faict
à im-
mer un
Catechis-
me en
Chinois.*

Les Peres sçachans la bonne disposition, qu'il y auoit es habi-
 tans de Xauquin, pour ouyr avec fruiet l'explication de la doctri-
 ne Chrestienne, commencerent à la déclarer publiquement dās
 leur Eglise. Et d'autant que ce Lettré auoit la langue mieux à
 son commandement (comme luy estant naturelle) & qu'il estoit
 assez bien instruit es choses de la foy, ils furent d'aduis qu'il fist
 aussi quelques exhortations. Car avec le credit & auctorité qu'il
 auoit, il attireroit plus de gens à venir ouyr les sermons. Mais a-
 uant que ce faire, ils en aduertirent le Lancita, pour luy deman-
 der non seulement conseil, ainsi qu'ils faisoient en toutes autres
 choses de consequence, mais encores congé de prescher. Car il
 estoit le premier Mandarin de la ville, le Vice-roy n'y estant pas.
 Luy ayant communiqué leur dessein, il l'approuua fort, & leur
 dist, qu'ils pouuoient hardiment publier leur loy en l'Eglise, &
 instruire tous ceux qui voudroyent l'apprendre & la suiure. Ce

*L'on com-
mence à
prescher
la foy
dans
Xauquin*

*Vn Let-
tré Chi-
nois Cate-
chumene
la pres-
che.*

Lettré donc commençea à faire quelques exhortations : & parce qu'il estoit fort habile & bien versé en leurs sciences, vne infinité de gens le venoyent ouyr. Il prechoit avec vne telle ferveur, qu'il faisoit esmerveiller les Peres mesmes : s'excitant soy mesmes, & ses auditeurs, à la detestation des pechez & des en-
 teurs, esquels ils auoyent vescu iusqu'à lors. Quelquefois faisant des exclamations, il disoit : O auengles Chinois, qui avec la lumiere de verité en vos maisons, & me la voyez pas. Il en y eust d'aucuns, qui furent si esineus par ses predicatiōs, qu'ils s'enrool-
 lerent au nombre des Catechumenes, lesquels on alloit instrui-
 sant petit à petit pour les baptiser, quand il en seroit temps : car iusqu'à lors on n'auoit donné le baptisme à personne, combien qu'il y en y eust plusieurs, qui desiroient le recevoir : & beaucoup d'autres, qui se monstroyent bien affectionnez enuers les choses de nostre Religion : de sorte que plusieurs voyans au faiste de la maison, ou logeoient les Peres, vne grande croix haut esleeue, encores qu'ils fussent idolatres, passans par là luy faisoient la se-
 uerence : & il en y auoit mesmes, qui disoyent de là nous est venu nostre salut ; d'autres venoyent à l'Eglise & prennoient de l'eau beniste : car ils ont par tradition ancienne, qu'un saint personnage passant par la Chine donnoit de l'eau beniste, qu'ils appellēt eau sainte, avec laquelle il guerissoit les malades, & faisoit beaucoup d'autres miracles. Or ils croyoient, que celle-là & ceste-cy des Peres n'estoit qu'une mesme chose. Voila comme peu à peu, & fort bellement on commença de donner quelque cognoissance de la foy de Iesus-Christ en la ville de Xauquine & de là elle s'espandist en plusieurs quartiers de la Chine :

*Eau be-
niste en
usage en
la Chine.*

parce que c'estoit le lieu ou le Viceroy de la Prouinte de Canton tenoit sa Cour.

Mais voyons ce qui aduint
là dessus.

*Comme le Pere Alfonſe Sanchez eſtant venu de rechef des Philip-
pines à Macao, voulut aller trouver les autres Peres à Xauquin;
mais ne luy ayant eſté permis, il s'en retourna à Manille,
non ſans encourir des grands dangers : & du
premier baptême, qui fuſt donné
à la Chine.*

CHAPITRE XXV.

LE Pere Roger auoit eſcrit au Gouverneur, & à l'E-
ueſque des Philippines, enſemble au Pere Sanchez
l'heureux ſuccès de leur entree en la Chine, & l'eſ-
perance qu'il y auoit d'y planter la foy Chreſtienne;
les priant d'eſcrire au Roy d'Eſpagne; afin qu'il fauoriſaſt cette
entrepriſe, enuoyant vne Ambaſſade à celuy de la Chine. Car il
eſtimoit que c'eſtoit le vray moyen pour obtenir permiſſion de
la preſcher en tout ſon Royaume. Or il aduint en ce temps-là, *Occaſion*
qu'un nauire eſtant party des Philippines, auquel y auoit quel- *du voyage du*
ques deſpeches de grande importâce, pour la nouuelle Eſpagne, *P. Sanchez à la*
& vne bonne partie des biens des Eſpagnols, qui demeuroyent *Chine.*
en ces Iſles, le Pilote & le Maiſtre du nauire avec quelques au-
tres, qui eſtoient là dedans, reſolurent de ſe les vſurper tellement
qu'au lieu d'aller à la nouuelle Eſpagne, ils prirent la route de
la Chine, & vindrent ſurgir au port de Macao. Le Gouverneur
des Philippines aduertty de cela, deſpeche promptement le Fa-
cteur du Roy, nommé Iean Baptiſte Romain, afin qu'il ſe faiſiſt
des coupables, & les chaſtiaſt comme ils meritoient, réparant
le mieux qu'il ſeroit poſſible le dommage, que les autres auroyent
encouru. Il fuſt auſſi d'aduiſ que le Pere Alfonſe Sanchez acô-
pagniaſt ledict Facteur, tant parce que, comme il eſtoit cognu des
Portugais de Macao, il ſeroit plus aiſé de recouurer ce qui auroit
eſté vendu ou engagé d'iceux, comme auſſi afin qu'il peuſt trai-
cter avec les Peres de Xauquin, des moyens qui ſeroient propres
pour acheuiner ce qui eſtoit ja commencé de la conuerſion des
Chinois à la foy. Eſtans donc partis des Philippines, ils arriuerent
heureuſement à Macao, & bien qu'au commencement il y euſt
de la difficulté touchant la punition des malſaſteurs, & reſtitu-
tion des biens vſurpez: néanmoins à la perſon le Capitaine de

*Desire
aller
trouver
les au-
tres Pe-
res à
Xau-
quin.*

Macao liura les delinquants entre les mains du Facteur, lequel ayant fait châtier les plus coupables, & accommodé les affaires le mieux qu'il peut, enuoya de là auant le mesme nauire à la nouuelle Espagne. Il restoit pour s'en retourner, de conclurre l'autre affaire de l'entreueüe & pour parler du P. Alonse avec les Peres, qui estoient à Xauquin, pour lequel le Facteur fut content d'attendre encor à Macao tout le temps, qu'il seroit de besoing. L'on chercha beaucoup de moyens, pour faire en sorte qu'il fut permis au P. Sanchez d'aller à Xauquin: mais en fin le P. Sanchez se resolut d'escrire au P. Roger, l'aduissant qu'il seroit bon de faire entendre au Vice-roy, qu'il y auoit à Macao quelques Peres de Castille, qui desiroient le visiter, pour sçauoir de luy, si le Roy d'Espagne porroit enuoyer à celuy de la Chine quelque present: car il desiroit le sçauoir avec assurance.

*Ne luy
est point
permis.*

Le Tutan renuoya cest affaire à l'Aytao de Canton, & cestuy-cy au Mandarin, qui estoit constitué Gouverneur de Macao pour le Roy de la Chine, luy ordonnant qu'il s'informast de ce, qu'il y auoit en cecy. Le Mandarin apres auoir bien examiné le P. Sanchez respondit à l'Aytao, qu'il tenoit cest affaire pour suspect: d'autant que les Castillas n'estoient là venus pour autre fin, que pour châtier quelques vns, qui s'estoient emparés & saisis de quelques marchandises, qu'ils portoient pour autrui en vn autre païs, & que vouloir parler au Vice-roy, c'estoit plustost chercher quelque pretexte, pour entrer dans le Royaume, que pour chose d'importance, qu'ils eussent à traicter avec luy. Ceste response fut cause qu'on refusa tout à plat au P. Sanchez le congé, qu'il demandoit d'aller à Xauquin. Mais comme il estoit expedient, que le P. Roger & luy conferassent ensemble, & que d'ailleurs il estoit necessaire, que quelqu'un des trois Peres allast à Macao, pour parler au P. François Cabral Prouincial de l'Inde, qui estoit aussi arriué pour lors à Macao, le P. Roger demanda congé au Lancitao de s'y transporter, alleguant pour raison, qu'il luy falloit aller receuoir quelques aumosnes, que les Portugais luy vouloient faire; & par mesme moyen il le pria de vouloir donner des patétes pour le Pere Prouincial, afin qu'il peust venir à Xauquin: parce qu'estant leur Superieur il vouloit, comme il estoit de raison, visiter ses subiects, & voir comment ils se comportoient: luy promettant qu'aussi tost qu'il auroit mis fin aux affaires, qu'il auoit là, qu'il s'en retourneroit à Macao. A cecy luy repart le

Lancitao

Lancitao en tels termes : Voys Pere, combien que tu ayes dit au
 cōmencemēt, que tu venois pour apprēdre la langue & les cou-
 stumes de la Chine ; & de ceste sorte l'ay ie dit aux Mandarins,
 toutesfois ie sçay bien, que tō dessein n'est autre, que de publier
 la loy diuine, dont ie suis bien aise : & n'est besoing que tu te re-
 celes de moy en cecy, ains ie te donne permission de baptiser ce
 Lettré, que tu as à la maison, & tous les autres, qui voudrōt estre
 Chrestiens. I'ōtroye aussi congé à ce Pere, que tu dis, de venir
 icy : & souhaite que tu diuulgues ta loy par toute la Chine. Car
 ie l'ay veuë & monstrée à d'autres, & elle nous plaist fort, & ne
 contrarie point à nostre police, & maniere de gouverner. Le Pe-
 re Roger ayant obtenu ce qu'il demandoit, part incontinent vers
 Macao, là où il traita à loisir des affaires, qu'il auoit à commu-
 niquer avec le P. Sanchez, & apres s'en retourna à Xauquin, avec
 le P. Prouincial. Mais le P. Sanchez reprit la route des Philippi-
 nes, auquel voyage il encourut de grands dangers : dont toutes-
 fois nostre Seigneur le deliura par son infinie bonté & misericor-
 de : tellement qu'il arriua sain & sauue à Manille, combien que
 ce fut long temps apres estre party de Macao : ayant esté porté
 par la tempeste iusques à Malaca, ou il sejourna quelques trois
 ou quatre mois, afin de radoubier son vaisseau, & attendre la sai-
 son propre, pour faire voile aux Philippines. Quant au P. Prouin-
 cial, il arriua sans aucun destourbier à Xauquin, moyennant le
 sauf-conduit, que luy auoit donné le Lancitao. Or comme l'on
 sçeut à la ville, qu'il estoit Superieur des autres Peres, plusieurs
 des Mandarins & Lettrez vindrent le visiter : vsans de leurs ac-
 coustumées ceremonies. Mais le P. Prouincial alla saluër & visi-
 ter, deuant tout autre, le Lancitao, menant quant & soy le P. Ro-
 ger. Ils le trouuerent en son parquet, tenant audience avec l'au-
 thorité, que les principaux Mandarins, comme luy, ont accou-
 stumé. Toutesfois comme les Peres arriuerent, il descendit de
 son siege, & les fit approcher près de soy, qui fut vne faueur que
 raremēt ces Mandarins font, lors mesmes qu'ils sont en l'audian-
 ce. Il demeura avec eux vne bonne piece de temps, les interro-
 geant de plusieurs choses avec plus grande courtoisie & affabili-
 té, qu'il ne souloit faire à l'endroit d'aucune autre personne. Et
 comme il fut de retour à son logis, il enuoya vn Capitaine de
 marque, pour bien-veigner le P. Prouincial de sa part, & luy of-
 frir vn present, qu'il luy faisoit. Apres que les visites plus neces-

*Le Pape
Prouin-
cial ar-
riue à
Xau-
quin.*


*De l'Obi-
nous Let-
tré re-
çoit le
baptême
avec
un au-
tre.*

saïres furent faïctes, les Peres resolurent de donner le baptême à ce Chinois Lettré, qui auoit attendu quelques mois, perseuerant avec vn extreme desir de le receuoir. Et d'autant que c'estoit le premier, qu'on donnoit en ce pais là, ils le voulurent conferer avec toute la solemnité possible. A ces fins ils ornerent & parerent l'Eglise le mieux, qu'ils sceurent: & firent les ceremonies, qui s'obseruent en tel cas, avec toute la maiesté & magnificence qu'il se pouuoit, eu esgard au temps & au lieu. Ce Lettré donc fut baptisé le 18. Decembre 1584. & eut à nom Paul. Le mesme iour aussi on baptisa vn autre personnage de qualité, de la mesme ville, qui fut celuy, qui logea dans sa maison les premiers Peres, lors qu'ils vindrent au commencement à Xauquin. Il y eut si grand concours de Gentils, pour voir les sacrées ceremonies du baptême, qu'ils ne pouuoient tous demeurer dans l'Eglise: & la plus-part de ceux qui les veirent, en furent tres-bien edifiez. Il y en auoit quelques autres, qui desiroient encor estre baptisés: mais on les entretenoit en esperance pour quelque temps, partie afin qu'ils fussent mieux instruits en la foy, & qu'ils estimassent d'auantage vn si grand benefice: partie aussi d'autant que l'on vouloit voir, si les Mandarins prenoient en bonne part le baptême de ces deux; & afin qu'ils ne s'alterassent, comme peut estre ils eussent fait, s'ils en eussent veu plusieurs ensemble se rendre Chrestiens. Mais il n'y eust personne, qui se formalisast de ce, qui auoit esté fait: ains les Mandarins mesmes se conjoüissoient avec les Peres de ce, qu'un si grand Lettré auoit receu leur loy. Les voisins aussi de l'autre Chrestien, qui fut baptisé avec Paul, luy en faisoient le proficiat, & monstroient, qu'ils auoient eux aussi enuie de suyure son exemple. Bien tost apres le neophyte Paul s'en retourna à son pais, avec vn grand desir de conuertir à la foy sa femme & ses enfans; brief l'enseigner à tous ses compatriots: & à cest effect il emporta quant & soy quelques liurets du Catechisme. Au reste les Peres estoient fort visités & honorés des Mandarins de toute la Prouince de Canton: parce que suyuant la coustume, qu'on garde en toute la Chine, chascun Mandarin va visiter le Tutan de sa Prouince, pour le moins de deux mois l'un. Et le mesme sont ceux, qui sortent de charge, & les autres qui y entrent de nouveau. Or presque tous ceux, qui venoient à Xauquin, alloient voir la maison & l'Eglise des Peres, comme chose nouvelle en la Chine. D'où s'ensuyuiſt qu'on eust en plu-

seurs lieux cognoissance d'iceux & de la loy qu'ils preschoient. Car les Peres donnoient à chacun quelques liurets du Catechisme, imprimé en leur langue, lequel ils emportoient quant & eux, & le communiquoient à d'autres. Cependant le P. Prouincial apres auoir acheué sa visite, s'en retourne à Macao, laissant à Xauquin le P. Michel Roger, avec ses compagnons.

D'un voyage que firent au dedans du païs de la Chine les Peres Michel Roger, & Antoine d'Almeida, vers la Prouince de Chiquion.

CHAPITRE XXVI.

MMES les Peres, qui demeuroident à Xauquin, desiroient Les Peres desireroient re- recognoistre mieux le païs, & sçauoir quelle disposition re- il y auroit és autres quartiers de la Chine, pour recevoir re- la loy de grace, voicy que nostre Seigneur leur presente vne belle re- commodité, pour ce faire. Car ayant communiqué leur desir re- au Lancitao, il promist de leur faire voir la Prouince de Chi- re- quion, d'ou il estoit natif, par le moyen de son frere, qui s'en y re- deuoit aller bié tost. Ceste Prouince de Chiquion est limitrophe de celle de Nanquin, esloignée de celle de Canton quelques deux cens lieues. Le P. Roger le remercia humblement, & accepta l'offre : le priant aussi de vouloir permettre, que deux autres Peres de la Compagnie vissent de Macao à Xauquin : afin que l'un d'iceux demeurast à la maison avec le P. Matthieu Ricci, & l'autre allast à Chiquion quant & soy. Ce que le Lancitao luy accorda volontiers; mais avec condition, qu'il n'en vint point d'auantage que deux : afin de ne donner occasion à quelqu'un de s'en formaliser. Le P. Roger ayant obtenu ce congé, en donna aussi tost aduis aux Peres de Macao, & deux d'iceux; à sçauoir le P. Edoüard de Sandé, & le P. Antoine d'Almeida vindrent à Xauquin. Cependant le frere du Lancitao, qui demouroit à la ville de Canton, estant delibéré d'aller voir son pere, en la Prouince de Chiquion, le Lancitao luy escriuit, qu'il menast avec soy deux des Peres, & leur fit tout le meilleur traictement, qu'il pourroit, tant par le chemin, qu'en leur païs. Ce que son frere promit de faire, & l'accomplit encore mieux, comme nous verrons cy apres. Incontinét que les Peres de Macao furent arriuez le Pere Roger Sont menés à la Prouince de Chi- partit de Xauquin avec le P. Almeida, pour aller trouuer à Can- quion.

ton le frere du Lancitao, laissant dans la maison de Xauquin le P. Matthieu Ricci, & le P. Edoüard de Sandé, pour maintenir en deuotion ce peu de Chrestiens, qui auoyent esté baptisez; & en instruire d'autres, qui s'apprestoyent pour receuoir le baptisme. Arriuez qu'ils furent à Canton, ils s'embarquerent avec le frere du Lancitao le 29. Nouembre 1585. & nauigerent avec luy sur ceste grande riuere qui passe par deuant Canton, iusques au 7. de Decembre, rencontrans par le chemin vn grand nombre de villes & citez, force bois & forests, & autres choses semblables, qui monstroyent assez la bonté & fertilité du país. Ceste riuere a son cours entre des montaignes tres-hautes, iusques à vne ville qu'on appelle Modin, là ou elle perd son nom. A l'entrée de Modin il y a vn pont fermé avec des chaisnes de fer, qui ne s'ouurent point sans exprés commandement du Mandarin, qui gouuerne la ville: mais comme l'on sçeust, que le frere du Lancitao de Xauquin estoit là, on l'ouurist incontinent, pour faire entrer son vaisseau. Despuis Modin ils allerent par terre iusques à vne autre cité appellée Faquen qui est à huit lieuës de là. Or en ce voyage, ils apperceurent l'industrie des Chinois, & la bonne police qu'ils gardent és chemins: car iasoit que depuis l'vne ville à l'autre, le chemin soit tout montagneux, & si on n'y eust apporté de l'industrie eust esté fort mal aisé: neantmoins ils l'auoyent rendu si beau & si commode, qu'on y cheminoit, comme si on eust esté en vne belle plaine. Il estoit tout paué d'vn bout à l'autre, & au sommet de la montaigne y auoit vne arcade, portant vne inscription, qui contenoit le nom de celuy, qui auoit dressé ce chemin. Il estoit tellement frequenté, qu'il sembloit qu'on ne feist qu'aller & venir d'vne foire: car entre ces deux villes il y a grand commerce, & ont vne telle correspondance l'vne avec l'autre, que si vous auez baillé vos hardes entre les mains de l'hoste, ou vous aurez lögé dans Modin, quand vous arriuez à Faquen, vous les trouuerez à l'hostellerie, que vous deuez prendre: & le mesme hoste a charge de fournir des montures pour les valets, & pour les maistres des chaires à bras, qui sont si legeres, que deux hommes en courant portent dessus vne personne fort aisément, quelques trois ou quatre lieuës. Ceux qui vont dedans pour se garentir de la pluye & du Soleil, portent en main certains petits ciels ou pauillons, qu'on leur baille tout exprés. De ceste sorte furent portez les Peres avec le frere du Lancitao de l'vne à l'autre

*Modin
& Fa-
quen vil-
les de la
chine.*

*Ont vne
belle cor-
respon-
dence en-
semble.*

ville; & les seruiteurs estoient montez sur des cheuaux. Au milieu du chemin ils changerent de chaires, & de gens: tellement que ceux qu'ils prindrent icy, les porterent iusques à l'hostelerie ou ils deuoyent loger, sans donner rien à ces portechaires, que ce que nous appellons le vin: parce que le reste se paye à l'hoste, *comme: dit de voyager en la Chine.* pres qu'il a rendu les hardes. Le prix de ces chaires, est quasi le mesme qu'en ces quartiers d'une monture, & on y va beaucoup plus à son aise. Tout le chemin est bien pourueu d'hosteleries pour les passans. Ils arriuerent le mesme iour qu'ils estoient partis sur le soir à la ville de Faquen, ou ils s'arrestèrent deux iours, pendant lesquels ils eurent tant de visites qu'ils ne pouuoient estre en repos: si que pour s'en despetter le troisieme iour ils s'embarquerent derechef sur vne autre grande riuere, ou ils nauigerent quinze iours durant, voyans d'un costé & d'autre du riuage des lieux fort plaisans, & quelques citez aussi grandes que celle de Canton. Le 15. iour ils arriuerent à vne autre uille beaucoup plus grande que Canton, en laquelle le Tutan de la Prouince de Chianfi demeure. Par le milieu de la ville passe la riuere, en laquelle y a un pont faict de barques, qui leur fust ouuert tout à l'instant, & ils passerent sans qu'on fouillast les hardes qu'ils portoyent, comme ils ont accoustumé de faire aux autres, & sans demander le peage des marchandises, que leur conducteur menoit: à cause qu'il estoit frere du Lancitao. Les Peres se doubtoient qu'ils seroyent icy appelez de quelque Mandarin, pour scauoir qui ils estoient, & ou ils alloient: mais on ne leur demanda rien, parce que hors du pays de Canton, l'on n'vse pas de si grande rigueur enuers les estrangers. Vne demie lieuë par delà le pont, il y a vne autre riuere qui s'assemble avec celle dont a esté parlé, *Ex pais de cite-ranées: l'on n'est pas si humain enuers les estrangers.* pres auoir baigné la ville d'un autre costé, & pareillement un gros bourg, qu'il y a tout auprès de la ville, lequel faict la troisieme partie d'icelle. Là ils firent leurs prouisions necessaires & apres poursuiuirent leur voyage sur ce beau fleuve, l'espace de cinq ou six iours; durant lesquels ils rencontrerent sept ou huit villes fort belles & marchandes avec vne infinité de grosses forests, & de grands amas de bois: prouision bien necessaire pour le froid qu'il fait en ce pais là. Finalement la veille de Noel ils arriuerent à la grande Cité de Chianfi, & y celebrerent ceste sainte nuit *Chianfi ville.* de la naissance de nostre Sauueur: durant laquelle se leua un vent de Nort, qui les fist arrester là tout le iour de Noël, sans pouoir

recouurer de l'eau claire, d'autant que ce vent (contre lequel ceste riuiera à son cours) la rend ordinairement fort trouble: mais le lendemain ils passerent le long de la ville, laquelle ils ne veirēt que par le dehors, & leur sembla plus grande que Lisbonne. Vne journée par delà, ils arriuerent à vn lieu ou deux riuieres se croissent dont l'une mene à la cité de Nanquin, & l'autre à celle de Chiquion ou ils pretendoyent aller. Laissant donc la volte de Nanquin, qui estoit vers le Nort, ils tirerent vers le Nordest, contre le courant d'une autre riuiera. Mais sous la faueur d'un vent propice, ils faisoient les quinze & vingt lieues par iour. En ce temps-là ils passerent par vne ville, ou se font ces vases de terre si estimez, qu'on nomme Porcelaines. Là ou ils trouuerent la temperature du pais fort differente de celle des autres, que iusqu'à lors ils auoyent veu audit Royaume. Car le froid alloit croissant de iour à autre, tellement qu'une matinée ils veirent tout couuert de neige. Et parce que la riuiera estoit fort basse, & n'auoit guere d'eau, le frere du Lancitao fist despartir ses balles de marchandise dans neuf ou dix barreaux plus petits, que ces trois qu'il menoit. De ceste sorte voguerent-ils seulement deux iours, durant lesquels ils passerent par vne grande ville, qui auoit vn pont basti sur vne quarantaine ou cinquantaîne de barques, peintes de diuerses couleurs, qui leur fust ouuert tout à l'instant.

*Goulin
ville.*

Le cinquieme de Ianuier ils arriuerent à la ville de Goulin, là ou ceste riuiera perd son nom: ils s'arrestèrent en icelle quelques iours, pendant lesquels les Peres furent visitez de plusieurs personages de qualité de la ville. Entre autres d'un certain homme de marque, qui auoit en sa maison vn grand nombre d'Idoles & autels, laquelle pour ceste cause estoit fort frequentée des Bonzes, qui alloient là faire leurs superstitions. Les Peres ayans esté iquitez à prendre le repas chez luy, y allerent & disputerent avec les Bonzes, qui se trouuerent là presens, leur faisant voir à l'œil le peu de suc & de substance qu'il y auoit en la loy qu'ils professoient. Finalement ils laisserent à leur hôte vn liuret du Catechisme: afin qu'il le leust à loisir, n'ayans la commodité pour lors de luy declarer plus amplement les mysteres de nostre foy. De là ils furent portez par terre sur des chaires à bras, comme la premiere fois, quelques six ou sept lieues par des chemins fort beaux & plaisans. D'où par apres ils entrèrent en la Prouince de Chiquion, & sejournerent en vne ville, qui est à la frontiere d'icelle,

nommée Cuixone, quelques trois iours; pendant lesquels ils furent visitez de tant de gens, qu'ils n'estoyent quasi iamais sans compagnie. Car l'on y accouroit, comme si s'eust esté à voir quelque prodige. De là ils s'embarquerent sur vne autre riuere, qui commence à porter dés ladite ville: & bien qu'elle n'aye pas guere d'eau au commencement, mesmes durant trois ou quatre iournées de chemin, neantmoins apres ell' est quasi aussi grosse, que celle de Canton: & a le courant fort doux. En ce chemin ils rencontrerēt huit ou neuf villes, & des grandes montagnes, couvertes de neige; lesquelles portoyent force bois, qui se iette & s'enuoye par la riuere en bas. Le 22. Ianuier ils passerent par vne cité fort celebre, & plus grande que Canton vne fois & demie; à ce qu'on leur dict: car ils ne peurent voir que quelques tours, à cause des broüillars, & des neiges, qui empeschoyent la veüe. Sur le tard ils arriuerent à vn bourg, qui est sur le bord d'une autre riuere, esloignée de celle, qu'ils auoyent laissé d'un iect d'arc: là où ils fretterent quelques autres vaisseaux: & ayans vogué sur icelle toute la nuit à la lanterne, ils se trouuerent au point du iour à la porte de la maison, ou ils debuoyent loger en la ville de Chiquion, chez le pere du Lancitao. Telle donc fust l'issuë de leur voyage commencé le 20. Nouembre 1585. & finy le 23. Ianuier 1586.

Or ceste ville de Chiquion est comme vn pourtraict de Venise ^{Chiquion ville de serbie} (comme disoit le Pere Roger qui y auoit esté.) Car on va par les rues, tantost par terre, tantost par eau; avec des petites barques ou gondoles. Les bastimens y sont sans comparaison plus beaux, que à Canton, & les ruës embellies de maintes arcades de pierre bien & proprement taillée & elabourée. Les gés aussi sont beaucoup plus affables & courtois, que ceux de Xauquin ou de Canton. Il n'y a ville en Portugal, qu'on puisse apparier à ceste-cy: attendu qu'elle est plus grande que toutes, horsmis Lisbone, comme dict le Pere Antoine d'Almeida, qui estoit compagnon du Pere Roger, & a escrit tout cecy. Estans donc arriuez là, le pere du Lancitao les receut avec demonstration de grande bienveillance. Il les logea en vne maison tres-commode, qui auoit deux yssuës: l'une sur la ruë publique, & l'autre sur la riuere. Au dedans il y auoit deux chambres, vn iardin, & vn lieu fort propre pour y dresser vne chappelle. Or comme l'on sceust à la ville les grandes caresses, que le Lancitao de Xauquin leur faisoit, tous les princi- ^{Les Portugais y arriuent.}

*Sont fort
careuses
de plu-
sieurs,
mesmes
des Man-
darins.*

paux presque de Chiquion, tant Mandarins, que autres gens let-
trez, viendrent les bien-ueigner, & mesmes quelques vns des plus
grands Mandarins les inuiterent à dîner chez eux. Entre autres
il y en eust vn, qu'on disoit surpasser de deux degrez en dignité le
Lancitao. Cestuy-cy enuoya prier le P. Roger de se vouloir trou-
uer aux funerailles de sa mere, qui estoit trespassee : mais le Pere

s'en excusa honnestement, alleguant que les prieres des Chre-
stiens ne seruoyent de rien à ceux, qui n'auoyent serui durât leur
vie le Createur & Seigneur de tout le monde : & prenant occa-
sion de là, il commence à remonstrer à ceux qui estoient presens,
comme la loy de Dieu estoit necessaire à salut, & surpassoit tou-
tes les autres en sainteté. Ce qu'ils sembloient escouter avec
grand plaisir. Ce mesme Mandarin inuita vn autre iour ledit Pe-
re à prendre le repas chez luy ; & le fist asscoir au plus haut bout
de la table, bien que le Pere fist grande resistance. Mais voyant
l'importunité que le Mandarin luy en fist, il ne peust moins faire
que de luy condescendre. Apres le repas le Mandarin l'accompa-
gna iusques à la porte, qui est vne chose fort extraordinaire en la
Chine, mesmes à telles gens. Pareille affection & bienueillance
leur monstroyent aussi les Bonzes de la mesme ville, & quelques
vns d'entr'eux leur demandoient de l'eau beniste, pour la raison
qu'auons dict cy dessus. Mais ils ne iugerent pas estre seant ny
conuenable de leur en bailler : pour ne donner aux chiens les cho-
ses saintes. Plusieurs aussi, mesmes de ceux qui demeuroyent
auprès de leur logis, venoyent entendre quelques exhortations,
qu'ils faisoient de la doctrine Chrestienne. En quoy ils prenoyent
vn si grand plaisir, qu'ils y employoient vne bonne partie de la
nuict. Brief auant que partir de là, il en y auoit beaucoup, qui
desiroient receuoir le baptesme. Mais comme les Peres n'auoyent
pas intention de s'arrester là, ains tant seulement de recognoistre
le païs, ils ne baptiserent personne, horsmis celuy qui les auoit

*Baptis-
te le pere
du Lan-
citao,
leur
bapt.*

logez en sa maison, à sçauoir le pere de Lancitao de Xauquin,
qui estoit vn venerable vieillard, orné de plusieurs vertus mora-
les, & de grande science, selon qu'on la trouué parmy eux. Il e-
stoit aagé de soixante dix ans, lors qu'il fust regeneré par les eaux
du S. Baptesme, qui luy fust donné le iour de la Resurrection de
nostre Seigneur, apres auoir esté instruit & catechisé durant
quatre mois. Ils baptiserent encore le fils d'un Lettre, qui estoit
tenu pour vn homme fort prudent & sage, & des plus sçauans
du païs.

du païs; cest enfant estoit deuenu ectique, & se portoit si mal, que son pere ayant essayé tous les remedes humains, dont il se peut aduiser, avec les superstitions & prieres des Bonzes, & ne trouuant ny en l'un ny en l'autre aucun allegement, pour le mal de son fils, eust à la parfin recours au P. Roger, le priant de vouloir luy conserer le baptesme. Ce que le Pere luy accorda fort volontiers, pensant qu'il ne suruesquist pas long temps, veu le peril, auquel il estoit. Mais bien tost apres qu'il eut receu le baptesme, il commença à se trouuer mieux, & de là à peu de iours fut entierement guery, selon que l'escriuit le mesme Pere Roger en vne lettre dattée du 8. Nouembre 1586. Ayant donc demouré luy & le P. Almeida quatre ou cinq mois en ladiete ville de Chiquion, ils s'en retournerent à leur Residence de Xauquin; là ou ils trouuerent quarante nouueaux Chrestiens: lesquels pour estre en la Chine ils estimoient beaucoup, tant pour raison de la difficulté, qu'ils auoient eu d'y entrer: comme aussi pour l'esperance, que nostre Seigneur leur donnoit, que ceste petite Eglise nouuellemēt plantée se multiplieroit, & estendroit ses rameaux au long & au large, dans peu de temps, moyennant l'assistance de celuy, qui luy auoit donné commencement.

S'en retournent à Xauquin.

Comme le Pere Roger fut enuoyé en Europe: & d'une grande persecution suscitée par les Anciens de Canton, contre les Peres, qui reslerent à Xauquin.

CHAPITRE XXVII.



Es Peres Visiteur & Prouincial de la Compagnie de IESVS en l'Inde, entendans de si bonnes nouuelles de la Chine, & conceuans vne grande esperance de la cōuersion de ce Royaume à la foy Chrestienne, iugerent qu'il estoit expedient & nécessaire, d'en donner aduis à nostre S. Pere, & au Roy d'Espagne: afin qu'ils y aidassent par leur auctorité & puissance, donnant des moyens, pour faire en sorte qu'on eut entrée au Roy de la Chine, pour luy demander permission de prescher la foy de IESVS-CHRIST, en tout son Royaume; & que cela ne dependist pas seulement de la volonté des Vice-roys, & autres Mandarins, lesquels se changeans de trois en trois ans, si on n'auoit ce congé du Roy, tout le fruiet, qu'on auroit fait en plusieurs années, courroit risque de se per-

Occasion du voyage du P. Roger en Europe.

*De Pere
Alfonse
Sanchez
yva auf-
se.*

dre en vn moment. Or pour leur dōner ces aduis, on estima qu'il n'y auroit aucun si propre, que le mesme P. Roger, lequel sçauoit mieus que tout autre, les coustumes de ce pais là, & cognoissoit le naturel des habitans plus parfaitement que les autres Peres, ayant desia long temps demeuré parmy eux. A cecy aida encor qu'on sçult, que le P. Alonse Sanchez debuoit faire voile au mesme temps des Philippines en Espagne, & l'on pensoit que si ces deux Peres se rencontroient, ou alloient ensemble en Europe, ils pourroient donner plus claire cognoissance des affaires, tant à sa Sainteté, qu'au Roy Catholique. Il y eut toutesfois grande difficulté de faire sortir de la Chine le P. Roger, pour cause de l'affection, que les Mandarins luy portoient. Mais il les paya tous si bien de raisons, qu'ils le laisserent faire selon sa volonté. Deux Peres seulemēt resterent pour lors à Xauquin; à sçauoir le P. Mathieu Ricci, & le P. Antoine d'Almeida: car le P. Edoüard de Sandé, à cause de son indisposition, fut contraint de s'en retourner à Macao. Doncques le P. Michel Roger estant party de la Chine l'an 1588. arriva en Espagne vn an apres le P. Sanchez, n'ayant pas eu si heureuse nauigation que luy: neantmoins chacun d'eux informa premierement le Roy d'Espagne Philippe 2. & puis nostre Saint Pere, qui estoit lors Sixte 5. de ce qu'ils desiroient leur faire sçauoir: combien que depuis on n'a veu aucun effect de ce voyage. Mais laissons cependant le P. Roger en Europe: & retournons à la Chine.

*Persecu-
tion sus-
citée con-
tre les
Peres de
Xau-
quin.*

Les Peres, qui estoient demeurés à Xauquin, continuans leurs exercices accoustumés, gaignerent à la foy de nostre Seigneur autres quarante Chinois: tellement que les Chrestiens de Xauquin estoient desia plus de quatre-vingts en nombre. Or l'esprit malin ne pouuant endurer cela, & ontré de douleur de voir la porte de ce Royaume ouuerte à la foy Chrestienne, laquelle il auoit tenuë si long temps & si soigneusement fermée, commença à broüiller les cartes (comme l'on dit) vsant de ses ruses accoustumées, pour empeschier le cours de l'Euangile. Et afin de suffoquer plus aisément ceste diuine semence, qui ne faisoit que germer, il tasche de faire chasser de la Chine ceux, qui la cultiuiēt, à sçauoir les Peres de la Compagnie qui estoient à Xauquin, & ce par l'entremise de quelques Mandarins de la ville de Canton, & des Anciens d'icelle, lesquels estans venus deuant le Visiteur de la Prouince, luy presenterent vne requēste dont voicy la te-

neur. Nous les Anciens de la cité de Canton, faisons sçauoir à vo-
 stre Seigneurie, comme selon les loix du Royaume, il nous est
 permis de luy représenter ce qui peut estre profitable ou dom-
 mageable à toute la Prouince. Partant vostre Seigneurie sçaura,
 que dans la cité de Xauquin il y a certains Prestres forains, qui
 sont venus de Macao, desquels il se peut ensuyure beaucoup de
 dommage à tout le Royaume, & du trouble aux habitans d'ice-
 luy; & pource il est besoin de couper broche au mal, auant
 qu'il passe plus auant. Outre ce dans Macao s'est fourré vn tas
 d'estrangez de diuers Royaumes, qui se sont là inthronisez con-
 tre nostre volonté. Iadis nous ne leur permettions pas mesmes,
 qu'ils descendissent à terre: ains seulement que se tenans dās leurs
 nauires ils trafiquassent, & puis s'en retournassent à leur païs.
 Mais à ceste heure ils ont bally des maisons fortes & hautes, es-
 quelles ils habitent comme des formis, ou abeilles. Ce qui don-
 ne grande occasion de craindre à tous tant que nous sommes.
 Leurs Prestres ont aussi trouué vne nouuelle inuention, qui est
 de demander l'aumosne pour le bastiment d'vne tour, qu'ils font
 dans la cité de Xauquin, & sous ce pretexte ils sont là pour don-
 ner entrée aux autres. Il est fort à craindre qu'ils soient là venus
 pour espier nostre païs, & qu'ils se ioignent par apres avec les gēs
 seditieux & remuans de nostre nation: d'ou s'ensuyuroit vn grād
 mal au Royaume. C'est ce que nous signifient nos liures, quand
 ils disent: Vous aués semé des espines dans vn beau champ: vous
 aués inuité les serpens & les viperes pour boire avec vous. De
 souffrir que les Portugais demeurent à Macao, c'est admettre vn
 incōuenient tel, que seroit vne maladie aux pieds ou aux mains:
 on peut bien y remedier avec le temps. Mais d'endurer que ces
 Prestres facent leur nid dans la ville de Xauquin, c'est mettre du
 venin mortel en l'estomach, & permettre que le poison s'empa-
 re du cœur. Et pource il est necessaire d'y mettre ordre de bon-
 ne heure, & ietter vislemēt hors de ladicte ville telles gens. C'est
 ce que nous requerons & demandons à vostre Seigneurie, au
 nom de toute la Prouince de Canton, laquelle luy sera grande-
 ment obligée pour vn tel benefice. Voila le contenu de leur re-
 quete, laquelle n'eust sçeu estre, ce semble, plus subtilement &
 malicieusement couchée pour venir à bout de ce qu'ils preten-
 doient, encore que le Sathan mesme l'eust forgée. Aussi est-il
 croyable, que ceste piece estoit sortie de sa boutique. Mais voicy

*Requête
présentée
au Prince
leur par
les an-
ciens de
Canton
cōtre les
Peres.*

*ce qui
s'ensuy-
uit de
cette re-
queste.*

ce qui s'en ensuyuit. Le Visiteur ayant veu ceste requeste, ordonna que l'Aytaa de Canton, & le Conchifu aussi, qui est comme le Iuge-maje de la ville, prissent cognoissance de ceste cause, leur ordonnant d'enuoyer ladiete requeste au Lancitao & Conchifu de Xauquin, afin qu'ils respondissent là dessus, ce qui leur sembleroit. Doncques le Conchifu de Canton enuoye incontinent au Conchifu de Xauquin ceste requeste, luy faisant commandement de la part du Visiteur, de faire information des Prestres, qui residoyent à la ville de Xauquin. Il n'y auoit lors que les Peres Matthieu Ricci, & Edouard de Sandé, (qu'y estoit retourné deux iours auparauant) & ne pensans à rien moins qu'à cela, s'esioüissoient ensemble de se voir dans ce Royaume, ou l'on auoit eu tant de difficulté d'entrer. Ils eurent neantmoins bien tost le vent de ceste requeste, & en recouurerent vne coppie, ensemble du commandement, que le Conchifu de Canton faisoit de la part du Visiteur à celui de Xauquin, par le moyen de son

*Commā-
dement
du Con-
chifu de
Canton à
celuy de
Xau-
quin.*

„ Secretaire, qui estoit tel; Seigneur Conchifu, aussi tost que vous
„ aurés leu le contenu des presentes, vous ne manquerez de faire
„ l'information & enqueste qui vous est ordonnée, comme vous
„ iugerés estre necessaire, & avec telle diligence qu'il appartient,
„ & me fairés sçauoir par apres, tout ce que vous aurés trouué: afin
„ que suyuant la volonté du grand Chayen (ainsi appelle-on le Vi-
„ siteur) ie puisse contenter les Mandarins de Canton avec toute
„ equité & droiture. Les Peres donc ayans leu ces choses, furent
„ grandement estonnez: car ils sçauoient biē que tous les Visiteurs
„ auoient accoustumé d'estre, selon leur charge, fort rigoureux en-
„ uers ceux, qui auroient attenté d'innouer quelque chose contre
„ les loix de la Chine; & que cestuy-cy qui estoit lors venu, selon
„ le bruiet commun, surpassoit tous les autres en cela: estant esti-
„ mé l'un des plus seueres du Royaume. D'ailleurs ils estoient in-
„ formés, que les plus habiles Mandarins de Canton luy auoient
„ soufflé aux oreilles beaucoup de choses contre eux: de façon
„ qu'il leur estoit ennemy mortel, & s'en fallut de bien peu, qu'il
„ ne les condamnast, tout sur le champ, à sortir au plustost de la
„ Chine, sans plus longue information; mais Dieu voulust qu'il y
„ procedast par forme de iustice, comme nous auons dit. Car ce-
„ pendant les Peres eurent loisir de pouruoir à leurs affaires. Ils s'en
„ vont dōc soudain trouuer leur grād amy & protecteur, à sçauoir
„ le Lancitao de Xauquin, qui leur dit tout à l'entrée, qu'il iugeoit

*Les moy-
ens que
prendrēt
les Peres
pour se
garātir
de celi
orage.*

n'estre pas expedient qu'ils fissent plus long séjour à Xauquin, veu les menées qu'on dressoit contre eux, qui monstroyent assez qu'on ne leur apprestoit rien de bon. Il leur dict encores qu'il estoit memoratif, comme le P. Roger auoit eu des lettres patentes du Vice-roy, pour demeurer en la Chine, & qu'il seroit d'aduis qu'ils se seruissent de ces lettres, en cas qu'il en seroit de besoing. Ce conseil ne leur semble pas mauuais; toutesfois ils ne s'en seruirent point: mais ils vserent d'un autre expedient, qui leur sembla plus court & plus asseuré. C'est de recommander à Dieu cet affaire le plus deuotement qu'il leur seroit possible. Ils commencent donc à faire force penitences & austeritez, à dire plusieurs Messes, à s'addonner beaucoup plus que de coustume à l'oraison & priere; supplians humblement nostre Seigneur, & sa sainte mere la sacrée vierge Marie, avec tous les autres saints & saintes de Paradis, de les vouloir assister en ce danger. Ces actes de deuotion ne furent pas inutiles & sans fruit. Car outre le merite, qui leur en demeura, ils n'eurent pas plustost fait leur deuoir en cecy, qu'ils commencerent à tressaillir de ioye en leur cœur, ne sçachans pourquoy, ny comment leur aduenoit vn tel changement: sinon par apres, qu'ils cogneurent, que ç'auoit esté vn bon presage, que Dieu les assisteroit, comme il fist en la maniere que ie m'en vay raconter. Les informations estant faites, le Conchifu de Xauquin fist appeller le Pere Matthieu Ricci, lequel se trouua à l'heure en grande perplexité: car il voyoit bien l'heure qu'il y alloit: mais il ne sçauoit s'il en retourneroit. Ceux aussi, qui le vindrent querir, luy faisoient de telles grimaces, qu'ils sembloient desia le tenir entre leurs mains, pour le deschirer, & mettre en pieces. Ce nonobstant parmy tout cela, *Erat cor eius fiduciam habens in domino*, comme dict l'escriture de la chaste Susanne: *Son cœur estoit plein de confiance en Dieu*. Estant donc interrogé par le Conchifu, il respondit si pertinemment à tout ce qu'il luy demanda, qu'il le rendist content & satisfait. De sorte qu'apres l'auoir tenu assés long temps, il luy parla en tels termes: Je ne suis (dict-il) iamais entré en desiance ny en mauuais soupçon de vous autres: tout ce que i'en ay fait n'a esté, que pour m'acquitter de mon deuoir. Au reste vous aués couru fortune, & s'en est peu fally, que vous n'ayez perdu la vie. Si i'eusse creu simplement le mal qu'on disoit de vous, vous seriez desia despeschez, i'en seroy bien marry, non seulement pour »

*Le Con-
chifu de
Xau-
quin m'a
de venir
deuant
say le P.
Ricci.*

Luy par-
le fort
humai-
nement.

Luy don-
ne bon
courage.

l'amour que ie vous porte, mais encore pour mon regard : car la chose me touche autant, ou plus, qu'à vous. Les Maudarins de Canton ont tasché de desnigrer mon honneur en la requeste, qu'ils ont présentée contre vous. Ils veulent, ce semble, empieter sur mon Gouuernement. Que si ma loyauté n'eust esté assez connueë, & si le grand Chayen n'eust esté de mes amis, i'estoy par leurs impostures tenu pour vn meschant homme, & indigne de gouuerner iamais aucune ville. Car ils ont voulu faire entendre, qu'il n'y auoit point d'ordre en Xauquin: que tout y alloit pêle-messe: que la racaille des vaueants y estoit bien venuë: brief que ma negligence seroit cause de la ruine de toute la Chine. S'estât ainsi monstré alteré là dessus, il dict au Pere Matthieu qu'il luy apportast vn memorial de ce qu'il luy auoit respondu, & qu'il eust bon courage. Le Pere s'en estant retourné à la maison fort aise, & content, raconta comme tout s'estoit passé à son compagnon: & tous deux remercierēt Dieu de la grace, qu'il leur auoit faicte, chantans le *Te Deum laudamus*. Cependant le Pere Matthieu ne fallist pas de bailler sa deffence en forme de placet au Conchifu, le requérant bien humblement de vouloir estre son protecteur, comme il auoit esté iusqu'à lors, contre ceux qui le calomnioyent si meschamment, & si iniquement. Or en ce memorial il declaroit comme il estoit Religieux natif du Royaume de Trincico, c'est à dire des cieux (car c'est ainsi qu'appellēt les Chinois l'Europe.) Il racontoit par apres comme il auoit voyagé l'espace de trois ans passant de grands dangers, tant sur mer que sur terre, & qu'en fin il s'estoit venu retirer à Xauquin, pour y viure en repos, lequel il n'auoit peu trouuer ny à Macao, ny aux autres places maritimes: & d'autant qu'il ne pouuoit point offrir à Dieu sacrifice chaque iour, comme son deuoir portoit, demeurant dans les nauires, esquels les Portugais venoyent trafiquer à Canton; le Tutan passé en auoit eu pitié, & luy auoit donné quelque ponce de terre à Xauquin, avec permission d'y baltir vne petite loge, comme il auoit faict par le moyen des aumosnes des gens de bien. J'ay (dict-il) faict dresser vne petite cabane, pour ma retraicte: car ie suis comme les petits oiseaux qui volent d'un costé & d'autre, cherchans leur mieux, & puis se retirent dans leur nid, pour y prendre vn peu de repos. Quant à moy ie ne suis ny marchand, ny trafiqueur de mon estat, pour gaiguer la cheuance de ce monde, mon office n'est autre, que de

prier ce grâd Dieu, Createur du Ciel & de la terre, qu'il se veuil-
 le monstrier clement & benin enuers le Royaume de la Chine. „
 Tout ce que ie say, & ce que ie pense, se rapporte à cela: & ne me-
 messeray iamais d'autre chose. De ce (Monsieur) si vous ne „
 me croyez, vous pourrez estre esclaircy & acertainé par le rap- „
 port de mes voisins, & de plusieurs autres Chinois, avec lesquels „
 i'ay conuersé familièrement, qui vous pourront declarer com- „
 ment ie me suis comporté iusqu'à ceste heure, & qu'elle vie i'ay „
 mené: Ils vous tesmoigneront, ie m'assure, que despuis que ie „
 suis par deça, ie me suis accommodé aux mœurs & à la façon „
 du pais, aussi bien que si i'y eusse esté toute ma vie. Voila en brief „
 ce qu'il donna par escrit au Conchifu pour sa descharge. Le Cō-
 chifu despecha quant & quant à l'Aytaa de Canton ceste lettre: *Lettre*
 Honorable Seigneur, i'ay fait soigneusement la recherche sur ce *du Con-*
 qui estoit contenu en la requeste des Anciës de Canton: mais ie *chifu de*
 n'ay rien trouué de ce qu'ils aduancent: car c'est le Magistrat & *Xan-*
 le peuple de ceste ville, qui a erigé la tour, pour laquelle ils font *quin à*
 tant de bruiet. Bien est-il vray, que lors qu'on bassussoit ladite *l'Aytaa*
 tour, ces Prestres estrangers s'adresserent au Tutan, qui pour *de Can-*
 lors commandoit en ces quartiers, & le supplierent de leur don-
 ner quelque ponce de terre, avec permission d'y edifier vne mai-
 son, pour leur demeure, & vne Eglise, en laquelle ils peussent in-
 uoquer leur Dieu. Cela leur ayant esté accordé, ils y ont des-
 puis tousiours demeuré sans iamais auoir fait ny attenté chose
 aucune, qui fust preiudiciable à l'estat commun, ny à aucun des
 bourgeois en particulier. De dire qu'ils ayent introduict quel-
 ques seditieux ou vauncants en ceste ville, croyés, Monsieur, que
 ce sont des bayes. Il n'y a personne par deça, qui en ait ouy rien
 dire. Je ne sçache, quant à moy, cause, pour laquelle on les doie
 priuer du droict, que le Tutan leur a donné; si ce n'est que sous
 vn pretexte tel quel, on les vueille harasser comme des chiens.
 Au reste ie me soubmets à ce que le grand Chayen en ordon-
 nera: si c'estoit à moy, ie les lairroy iouyr du droict qu'ils ont,
 puis qu'un tel personnage le leur a donné, & qu'il n'y a point de
 cause legitime pour le leur oster.

Par ceste lettre l'Aytaa de Canton (qui a la surintendence des
 estrangers par toute la Prouince) fust tellement changé, qu'il
 se monstra des lors grand amy des Peres; si qu'il donna vne sen-
 tence fort fauorable pour eux, contenant en substance ce qui

„ s'ensuit : Il faut tenir pour bon , ce que le Tutan passé a faict &
 „ ordonné à Xauquin, signamment en ce qui est icy debattu. Puis
 „ donc qu'il a permis à ces Prestres forains , de demeurer parmy
 „ nous, qu'ils y demeurent à la bonne heure , s'il leur semble bon.
 „ Je ne iuge point qu'ils doibuent estre inquietez en aucune ma-
 „ niere , veu mesmement qu'ils ne se meslent point de telles cho-
 „ ses, que font les marchands estrangers, qui sont à Macao. Partant
 „ si quelqu'un se veut rendre partie contre eux, il est de raison, que
 „ l'un & l'autre soit ouy , aussi bien les deffendeurs que la partie
 „ aduerse. Sur la fin il estoit ordonné, que ceste sentence seroit ap-
 „ portée au Conchifu de Canton: afin qu'iceluy l'ayant veüe peut
 „ respondre & satisfaire au grand Chayen. Voila comment s'ap-
 „ paisèrent pour lors ces tourbillons de persecution , qui sem-
 „ bloient menacer les Peres de leur bannissement. Car le Visiteur
 „ voyant de si fauorables sentences pour eux, tant de la part du
 „ Conchifu de Xauquin, que de l'Ay tao, iugea bien que ce que
 „ les Anciens de Canton, luy auoyent donné à entēdre en leur re-
 „ quēte, n'estoit pas tel qu'ils disoyent ; de façon qu'il ne print
 „ point aucune resolution pour lors, ains dilaya l'affaire iusqu'à
 „ son arriuée à Xauquin, & apres renuoya le tout par deuers le Tu-
 „ ran, qui vint de nouueau, lequel y proceda bien plus rigoureu-
 „ sement, comme nous verrons maintenant.

*Les Peres de la Compagnie sont chassēz de la ville de Xauquin, par
 le Vice-roy de la Prouince de Canton: & renuoyēz à vne autre
 ville de la mesme Prouince, nommée Xauecho.*

CHAPITRE XXVIII.

Nouuel-
 le persē-
 tion
 aōtre les
 Peres.



N CORE les Peres n'estoyent pas du tout hors des
 lacqs & pieges qu'auons dict, qu'on leur en dresseoit
 d'autres aupres du nouueau Tutan, qui vint pour
 prendre le gouuernement de la mesme Prouince,
 apres le decez de celuy, qui les auoit tāt fauorisēs.

Car lors que la requeste des Anciens de Canton arriua à Xau-
 quin, le Tutan qui auoit maintenu les Peres à Xauquin, estoit
 mort : & apres on en auoit prouueu d'un autre. Or si tost que
 cestuy-cy fust arriuē en la premiere ville de son gouuernement,
 attendant que les preparatifs luy fussent faicts à Xauquin, ou
 selon

selon la coustume des autres Turans, il debuoit faire sa residence ordinaire, les mesmes Anciens & Mandarins de Canton s'en vont le trouuer là, pour l'informer les premiers, comme ils voulurent, contre les Peres, qui demeuroient à Xauquin, luy faisans acroire vne infinité de bourdes. Car ils disoient, qu'il y auoit vn tas de Prestres forains, qui estoient venus de Macao faire leur demeure à Xauquin, & qu'ils auoient basti vne Eglise aupres de la grande riuere, ou ils tenoient tousiours preste vne barque, pour espier d'vn costé & d'autre tout ce, qui se faisoit en la Chine: afin d'en donner aduis à ceux de Macao; adioustâs que ces Prestres estoient gens d'entendement, & qu'ils enseignoient certaine doctrine, à laquelle ils attiroient peu à peu le monde, & leur faisoient adorer le Dieu, qu'ils honnoient. D'auantage qu'ils auoient vne cloche pendue en l'air, laquelle sonnoit les heures d'elle mesme, sans que personne y touchast: & que ceux, qui entendoient le son de ceste cloche, estoient incontinent charmez.

Le Tutan ayant eu ces aduis, escriuiſt soudain au Gouverneur de Xauquin, qu'il eust à faire information sur toutes ces choses, & que les ayant bien examinées, s'il trouuoit que la cloche de ces Prestres sonnast d'elle mesme, ou que le son d'icelle charmast, ou que les susdicts Prestres fussent aucunement coupables de ce que dessus, qu'il les renuoyast faire leurs enchantemens à Macao, ou à la maison de Nangoa, qui est vn monastere de Bonzes, comme nous dirons cy apres. En somme qu'il les fit sortir de Xauquin. Le Gouverneur & les autres Mandarins de Xauquin, qui fauorisoient les Peres, se trouuerent en grand trouble, ayant receu ce commandement du Tutan. Car ils auoient donné vne sentence fort fauorable pour eux vn peu auparauant: & voyans qu'ils estoient contrains de la casser, s'ils obeissoient au commandement du Tutan, cela leur estoit fort grief: toutesfois ils n'osoient s'opposer à la volonté d'iceluy. Ils conseillerent donc aux Peres de se retirer tout doucement, sans attendre qu'on les y contraignist, & s'en aller au susdit monastere de Nangoa. Mais les Peres ne trouuerent pas bon ce conseil: ains prièrent instamment le Gouverneur & les Mandarins de Xauquin, de vouloir faire information sur les articles mis en auant, & s'enquetter s'il y auoit de la Magie, & des enchantemens en leur fait. Cependant il y eust dixhuiſt personnes, tant hommes que femmes, qui embrasserent la foy de nostre Seigneur, & furent baptisés, non-

*Accusa-
tions faul-
ses des
Anciens
de Cātō
cōtre les
Peres.*

*Commā-
dement
du Tutā
au Gou-
uerneur
de Xau-
quin cō-
tre les
Peres.*

*18. Chi-
nois bap-
tisés de
nouveau*

obstant toutes les bourasques, qui sembloient menacer les Peres. Or tandis que le Gouverneur & les Mandarins de Xauquin faisoient les informations, le Tutan arriua à la ville, combien que ce ne fust pas pour s'y arrester: tellement que les Peres eurent encore vn peu de temps pour respirer: d'autant que le Tutan partist bien tost après, pour aller à Canton, ou il debuoit faire equiper vne flotte contre quelques escumeurs de mer, qui s'estoient emparés freschement de l'Isle d'Aynan, ou se fait la pesche des perles. Le P. Matthieu Ricci, se seruant de l'opportunité presente, laissa le P. Antoine d'Almeida seul à Xauquin, & luy, fit vn tour à Macao, pour prendre conseil, de ce qu'il deuoit faire, avec le Pere Visiteur, qui estoit arriué là des Indes depuis peu de iours. Le Tutan ayant despesché ses affaires dans peu de temps, s'en reuint de Canton à Xauquin. Les Mandarins de la ville auoient bien grand desir de fauoriser les Peres: & s'essayèrent de les mettre en la bonne grace du Tutan, entrās de loing en propos d'eux avec luy, sans faire semblant de leur porter affection. Mais il reuint de Canton si mal informé d'eux, à cause de quelques des-plaisirs qu'auoient reçu des Portugais certains habitās de Canton, & des faux bruiets, desquels les Anciens de ladicte ville l'auoient abreué, qu'il ne voulut point entendre les raisons, que le Gouverneur & les autres Mandarins de Xauquin apportoiēnt en leur faueur: ains leur commanda tout à l'instant d'approuuer vne sentence contre eux, qu'il auoit luy mesme dressée, disant qu'il la vouloit signer par apres. Les Mandarins n'osèrent repliquer à cela; tellement qu'ils furent contraincts d'approuuer ceste sentence, & ne manquoit autre chose, pour l'execution d'icelle, que le signé du Tutan. Mais en ces entrefaictes voicy arriuer aux Peres vn masque de faueur humain, qui les amusa pour vn temps, leur donnant quelque esperance, bien que courte, descha-per de ce labyrinthe. Car en la mesme saison le Chayen ou grād Visiteur de la Prouince, estant venu de Canton à Xauquin, pour voir le Tutan, il y fust festoyé l'espace de dix ou douze iours le plus magnifiquement, qu'il estoit possible: & voulant s'en retourner à Canton, le Tutan avec les principaux Mandarins de Xauquin l'allerent conuoyer. Le Vice-roy estoit avec le grand Chayen dans vn grād vaisseau, avec vne musique fort melodieuse de haut-bois, clairons, trompettes, & autres instrumens à leur mode: estans suyuis de tous les Mandarins, & autres gens de qua-

*Le Tutan
fait vne
sentence
contre les
Peres.*

lité de la ville, avec vne infinité de seruiteurs, estafiers, & autres gens. Or comme ils descendoient le long de la riuiera, passant pardeuant le logis, auquel les Peres demeuroient (car il respon-
 doit sur la riuiera) il leur print enuie de l'aller voir : & soudain
 enuoyerent deuant quelques Mandarins, avec plusieurs de leurs
 seruiteurs, frapper à la porte, faisans commandement qu'on ou-
 urist de la part du Vice-roy & du Visiteur, qui venoient les voir.
 Les Peres ouurirent incontinent, & sortirent pour les receuoir
 le plus honnorablement, qu'il leur fut possible. Les autres ve-
 noient avec vn tel arroy, & si grande majesté, qu'on eust dit, que
 c'estoient deux grands Princes. Car ils estoient portés chacun
 dans vne chaire à bras par huit hommes, qui estoient si magni-
 fiquement vestus, qu'ils sembloient des Gentils-hommes. Les
 Peres firent à tous deux la reuerence accoustumée, se mettans à
 genoux, & frappans trois fois de la teste contre terre ; puis les
 menerent par la maison, & leur monstrerent quelques petites
 chosettes, qui en Europe ne valent pas beaucoup, mais là sont
 fort estimées, pour leur rareté. Entre autres ils leur firent voir vn
 billot de verre triangulaire, representât vne infinité de couleurs,
 lesquelles apparoiſsoient à trauers ce verre, dont ils resterent fort
 esmerueillés. Ils regarderent aussi l'artifice de leur horloge, &
 comme ceste cloche sonnoit les heures d'elle mesme, ou le Tu-
 tan pensoit auoir de l'enchantement, iusqu'à ce qu'il l'eust veuë.
 Apres ce ils trouuerent quelques liures Chinois, que les Peres
 fucilletoient, de quoy ils montrerēt estre bien aises. Finalement
 on les mena à la Chapelle, ou ils veirent vne tres-belle Image de
 nostre Dame, qui estoit sur l'Autel : dont ils furent fort esmer-
 ueillés. Aussi estoit ce vne piece tres-bien faicte. Au bout de ce-
 la ils s'assirent sur des chaires, & prindrent vn peu de collation,
 que les Peres leur presenterent, suyuant la coustume du païs : &
 apres ce ils se retirerent dans leur vaisseau, monstrans par signes
 & par parolles, qu'ils estoient fort contents de ce, qu'ils auoient
 veu. La plus-part des habitans de la ville, & mesmes les plus
 grands amis des Peres, estimoiēt que ceste visite auoit esté com-
 me vne abolition de tout ce, qui s'estoit passé, & leur en faisoient
 le proficiat. Eux aussi estimoiēt qu'on ne les recherchoit pas
 d'auantage. Le Conchifu mesmes cuyda se fascher contre vn
 Greffier, qui luy demanda s'il ne falloit pas presenter au Tutan
 la sentence donnée contre eux. Car il luy dit, comme en cholere,

*Le Tutan
& le
Visiteur
vnt voir
la maison
des Peres
à Xadu-
quin.*

*On leur
monstre
quelques
raretez
venues
d'Europe.*

*L'on pū
seque les
Peres sūt
hors de
danger.*

*Le Tuiā
ordonne
qu'ils
sortent
de Xau-
quin, &
qu'ils leur
donne de
l'argent.*

*Les Pe-
res refu-
sent l'ar-
gent, &
pour-
quoy?*

Tays toy, ne me parle point de cela, si ie ne t'en demande com-
pte. Mais cōme cecy n'auoit esté qu'une simple curiosité, pour
voir les raretés, qu'on leur auoit fait entendre, que les Peres
auoient en leur maison, peu de iours après le mesme Tutan, qui
les estoit allé visiter avec telles monstres de bien-veillance, signa
la sentence, & commanda qu'on la mit en execution, ordonnant
que les Peres sortissent incontinent de Xauquin, tant par ce qu'ils
estoyent estrangers, que pour prescher vne doctrine contraire à
celle des Bonzcs. Quant à leur maison, il ne iugea point qu'elle
leur deust estre payée, attendu qu'elle auoit esté bastie d'aumos-
nes: toutesfois afin qu'ils n'eussent aucune occasion ou pretexte
d'y rentrer, il commanda qu'on leur rendit 60. Taës. Les Peres
alleguoient bien leur innocence, disans qu'ils n'estoyent pas sem-
blables aux estrangers de Macao, & que n'ayant point mesfait,
ils ne debuoyent estre renuoyés, mesme au Royaume de Trinci-
co, d'ou ils estoient venus avec tant de trauaux & dangers. Car
autant vaudroit (disoient ils) qu'on nous fit mourir tout à fait,
que de nous renuoyer si loing, veu les perils, qu'il nous conuient
subir en vn si long voyage. Mais en fin toutes ces raisons ne leur
seruiroient de rien. Le Conchifu eust charge de leur bailler l'ar-
gent, & de les faire embarquer. Eux voyans qu'il n'y auoit autre
remede, se monstrerent obeïssans à tout, hors-mis à prendre l'ar-
gent, suyans en ce l'aduis que le P. Visiteur leur auoit donné:
afin qu'aduenant quelque changement de Vice-roy, ils eussent
droit de redemander ce, qu'ils leur auoit osté. Le Conchifu les pria
de luy bailler pour sa descharge vn mot d'escrit, par lequel ils de-
clarassent comme il leur auoit offert l'argent. Ce que les Peres
furent volontiers, & apres s'embarquerent, pour aller à Canton,
& de là à Macao, comme il leur auoit esté commandé, avec es-
corte de soldats, pour les conduire tout le long du chemin, ius-
qu'à ce, qu'ils seroient hors de la Chine. Mais estans arriués à
Canton, comme ils attendoient quelque commodité, pour s'en
aller à Macao, voicy arriuer vn contremandement du Vice-roy,
qui leur ordonnoit de retourner à Xauquin. Eux s'en y vont aussy
tost, croyans probablement qu'il les y vouloit reestabli: mais ce
n'estoit que pour sçauoir d'eux, s'ils auoient refusé l'argent, qu'il
auoit cōmandé leur estre baillé. Ce qu'ayant entendu auoir esté
fait; Je ne veux point (leur dit il) que vous vous en alliés sās auoir
de quoy vous conduire; autrement quel honneur me seroit ce?

Les Peres luy respondirēt, qu'ils auoyent assez d'argent, pour aller de là à Macao, & apportoyent plusieurs raisons, pour lesquelles ils refusoient de prendre cest argent. Mais le Tutan s'en facha de telle sorte, qu'il vouloit faire souëtter leur trucheman, qui estoit Chinois (car encore bien que les Peres sceussent passablement parler le langage du païs; toutesfois quant ils traitoyent avec les plus grands Mandarins de choses d'importance, ils se seruoient d'interprete, afin d'exposer plus proprement ce qu'ils vouloyent dire.) Le P. Ricci voyant que le Tutan entroit à bon escient en cholere, pour ce refus, tascha de l'appaiser: disant que puis que sa Seigneurie auoit compassion d'eux, ne voulant permettre qu'ils s'en retournassent en vn païs si loingtain, sans viatique, qu'ils la supplioient bien humblement de leur faire tant de faueur, que de leur donner quelque petit coing en la Chine, ou ils eussent moyen de se retirer, & ne les vouloir enuoyer à Macao: car aussi n'y pourroyent-ils demeurer longuement. Le Tutan leur dict pour lors, qu'il estoit content qu'ils s'arrestassent en vne autre ville de la Prouince, moyennant que ce ne fust ny Canton, ny Xauquin. L'vne pour estre la Metropolitaine de toute la Prouince, & l'autre le lieu ou il tenoit sa Cour, & ou tous les Mandarins de la Prouince abordoyent. Mais pourquoy (dict-il) ne prenez-vous l'argent que ie vous donne: » car il vous pourra seruir à bastir vne autre maison là ou vous irez? Puis qu'il plaist ainsi à vostre Seigneurie (dict lors le Pere Ricci) à cela ne tienne, que nous ne demeurions en vostre bonne grace. Tellement qu'ils receurent l'argent, duquel il estoit question. Mais le Tutan resta fort estonné de voir, que des estrangers s'arrestoyent si volontiers en la Chine, voire contre le gré des naturels, ne sçachant pas comme l'amour de Dieu à plus de force esames, qui sont esprises de ce feu celeste, que l'affection qu'on porte naturellement à son païs. Au reste il fust si aisé de ce que les Peres auoyent receu cet argent, & luy auoyent obey en cela, qu'estant en la mesme saison venu vn Mandarin de la ville de Xuachéo, pour le visiter, il luy dict, qu'il en amenaist quant & soy les Peres, & leur donnast vn bon logis en la ville de Xuachéo. Ce que le Tutan faisoit, parce que bien près de là il y a vn grand monastere de Bonzes: & il luy sembloit que les Peres ayans quelques coustumes ou façons de faire semblables à celles des Bonzes, comme par exemple de se faire raire la barbe, & de

*Les Peres in-
struisent
les Chre-
tiens de
Xau-
quin de
ce qu'ils
deuoient
faire.*

n'admettre point des femmes en leur logis; ainsi qu'ils s'accor-
moderoient aisement avec eux, ou a tout le moins qu'ils se-
royent esloignez du concours & frequence des Mandarins, qui
venoyent le trouuer. Les Peres donc dirent à Dieu aux Chre-
stiens, qu'ils auoyent baptisez dans Xauquin: leur enseignans ce
qu'ils debuoyent faire, pour se maintenir en la foy, & leur lais-
sans vne image de nostre Sauueur, les exhorterent de s'assembler
souuent, pour prier Dieu, principalement és iours de feste, les-
quels afin qu'ils pussent cognoistre, ils leur dresserent vn Ca-
lendrier en langue Chinoise, avec tel artifice, que l'an Chinois
respondoit au nostre. Or ces bons Chrestiens estoient si soi-
gneux d'apprendre ce qu'ils debuoyent faire, qu'ils employe-
rent toute la nuit à s'informer de leur debuoir, espandans beau-
coup de larmes, pour se voir si tost priuez de leurs maîtres &
pasteurs. Toutesfois les Peres tascherent de les consoler, leur
donnant à entendre, que nostre Seigneur auoit accoustumé
d'enuoyer aux siens de telles afflictions, pour leur apprendre,
qu'ils n'ont point en ceste vie de cité permanente: & que c'est
tant seulement en la celeste Hierusalem, ou ils doibuent preten-
dre d'auoir vne demeure ferme & arrestée. Bref ils les exhorte-
rent à estre constans en la foy, & endurer volontiers, pour l'a-
mour de nostre Seigneur, toutes les aduersitez, qui leur pour-
royent aduenir, pour son nom: s'estimans bien heureux de pou-
uoir patir en ce monde quelque chose pour son seruice; afin d'e-
stre participans avec luy de la gloire en l'autre. Voila en quoy ils
employèrent toute la nuit auant leur despart: & le lendemain
matin ils s'embarquerent avec le Mandarin, qui auoit charge de
les conduire à Xauchéo, ville de la mesme Prouince: mais plus a-
uant dans le pais vers le Nort quelques quarante lieues loing de
Xauquin. Ils apportoyent des lettres patentes signées du Tutan,
& du Conchifu, pour prendre possession de la place, qui leur se-
roit assignée à Xauchéo. Le Mandarin qui les menoit, enuoya
deuant vn messager, pour aduertir les Bonzes de ce monastere,
qui est tout auprès de la ville de Xauchéo, appelé Nangóa: à
celle fin qu'ils fissent leurs apprests, pour receuoir en leur mai-
son les hostes, qu'il leur amenoit de la part du Tutan. Cecy don-
na occasion à vn bruiſt, qui courut incontinent par la ville de
Xauchéo, que les Peres alloient estre Mandarins ou Superieurs
des Bonzes de Nangóa, & qu'ils deuoient auoir le maniement

*S'en vint
à Xau-
cheu, 40.
lieues de
Xau-
quin.*

de leurs reueus, lesquels estoient fort grands. Les Bonzes mesmes estoient en ceste opinion, tellement que les principaux d'iceux se trouuerent au bord de la riuiere, quand les Peres desembarkerent: & leur firent vn accueil fort honorable; puis les menerent à leur monastere, qui est de fort grande estenduë. Il est dédié à l'Idole d'un certain Chinois, qui fust aucteur d'une secte particuliere, que ces Bonzes suyuent. Leur temple est fort grand & magnifique. En vne seule chappelle d'iceluy, les Peres comptèrent iusques à quatre cens Idoles tous surdorez, dont le principal auoit plus de quarante lampes allumées deuant. Brief ils feurent grandement esbahys de voir la grandeur & magnificence de ce lieu. Mais les Bonzes ne les feurent pas moins, voyant comme ils marchoyent en vn temple si saint (à leur opinion) sans faire semblant de luy porter aucun honneur ou respect, & moins encor à leurs Idoles. Apres qu'ils eurent veu tout le monastere, ils s'en vont à la ville pour visiter les Mandarins, & nommément celuy, auquel ils auoyent esté recommandez, qui les receut fort humainement, & leur demanda si ce lieu qu'ils auoyent veu, ne leur plaisoit pas, & s'ils ne seroyent pas contents d'y demeurer, ou bien là auprez: car s'il ne leur aggreoit pas, il chercheroit quelque autre lieu pour les loger. Les Peres le prièrent bien fort, qu'il luy pleust leur donner quelque place plus proche de la ville. Ce que le Mandarin promist de faire avec grande affection, desirant leur donner en cela tout contentement: & bien tost apres il leur fist voir vne petite metairie, qui estoit près de la ville, & d'une autre maison de Bonzes, laquelle leur sembla propre pource qu'ils pretendoyent d'autant qu'il y auoit moyen d'y bastir vne chappelle, & vne maison assez commode. Le Mandarin fust bien aise, que ceste place leur aggreast: & supposant que le tout seroit approuué par le Vice-roy, il leur donna eongé d'y bastir ce qu'ils voudroyent. Plusieurs de la ville voyans les faueurs, que le Mandarin leur faisoit, commencerent à les visiter, & à leur monstrier beaucoup d'affection. Car les gens du Xauchéo sont plus courtois & humains, que ceux de Canron ou de Xauquin: & pource ils esperoyent y faire vn grand fruit, moyennant l'ayde de Dieu. Mais le malin esprit, non content de les auoir fait sortir de Xauquin, par l'entremise de ses supports, taseha de les chasser aussi de Xauchéo, ou à tout le moins, leur faire perdre le credit, qu'ils commençoient d'y gagner, afin

On leur offre d'y demeurer, ce qu'ils reussent.

Sont logez en vn lieu pres de la ville.

*Leur mai-
son est
volée par
12 lar-
rons.*

*Les lar-
rons sont
pris.*

que leur doctrine ny fust pas si bien receuë: leur suscitât vne autre persecution, dont l'occasion fust telle. Les Peres ayant agencé leur petite maison & chappelle, au lieu qu'a esté dict, de sorte qu'ils pouuoient passer avec cela, & commencer d'exercer leurs fonctions, quelques vns penserent qu'ils auoyent beaucoup d'argent, puis qu'ils auoyent basti si promptement vn logis. Cela donna occasion à douze larrons natifs du país, d'espier la commodité pour entrer vne nuit dans la maison, pour desrober l'argent, qu'ils pensoient y trouuer. Mais y estans entrez, & n'ayans pas trouué, tout ce qu'ils croyoient, afin de ne s'en retourner les mains vuides, ils en emporterent la plus grand part des meubles, tant de l'Eglise, que de la maison. Les Gouverneurs de la ville, qui estoient quatre, seurent incontinent aduertis de cecy, bien que les Peres ne leur en eussent dict mot, ny ne s'e fussent plaints à personne: mais les Gouverneurs l'ayant sceu d'ailleurs, tant pour le deu de leur charge, comme aussi parce que les Peres auoyent esté enuoyez là par le Tutan, firent diligente recherche des auteurs de ce larcin, & en fin prirent tous les douze larrons, les mettant sous bonne & s'eure garde. Peu de temps apres voicy arriuer à Xaucheo le Chayen, ou Visiteur de la Prouince, auquel seul appartient de donner sentence de mort, à laquelle ces larrons deuoyent estre condamnez, selon les loix du Royaume. Eux sçachans l'arriuée du Visiteur, & tenans quasi pour assuré, que si les Peres (qui auoyent esté interessez) demouroient là, ils ne pourroyent eschapper la mort, se resolurent de presenter vne requeste contre eux, disans qu'ils estoient forains, & auoyent beaucoup d'intelligence hors du Royaume: partant qu'il estoit conuenable de les bannir de Xauchéo. L'un des quatre Gouverneurs, qui portoit bonne affection aux Peres, les aduifa de ceste requeste, laquelle les mit en grande perplexité d'esprit. Car ils voyoyent, que si le Visiteur (qui est le Iuge souverain de toute la Prouince) les faisoit sortir de là, il ne leur restoit aucun remede humain, pour s'arrester en la Chine. Mais nostre Seigneur les deliura bien tost de cest' alarme. D'autant que la requeste debuant passer par les mains des quatre Gouverneurs, auant qu'estre présentée au Visiteur, iacqoit quel l'un d'iceux tint le party des prisonniers, & fust d'opinion qu'on la luy presentast; neantmoins les autres trois furent de contraire aduis, & partant l'autre ne peust venir à bout de ce qu'il pretendoit. Le iour d'oc

que

que la sentence de mort debuoit estre prononcée contre ces larrons, le Visiteur enuoya querir le P. Ricci, pour voir s'il vouloit accuser ces gens là. Le Pere luy respond, que non seulement il ne vouloit les accuser, ains qu'il le prioit instamment de les vouloir eslargir, sans qu'ils encourussent aucune peine, ou note d'infamie. Le Visiteur fut grandement esmerueillé de cela, & en receut vn singulier plaisir, pour n'estre contraint de condamner à mort tant de gens. Voyant donc qu'on ne les accusoit point, il ne les condamna pas aussi à perdre la vie, suyuant la rigueur de la loy; combien qu'il les fist tres-bien soüetter. Au reste cest acte des Peres fut si bien pris, & tant estimé, qu'on ne faisoit qu'en parler par la ville: voire encore les larrons avec leurs parens & amis les en vindrent remercier, adioustans que la raison vouloit, & que leur vertu meritoit, qu'on les retint au pais, puis que pour le mal, ils rendoient le bien. Les Peres pensoient qu'avec ce la bourasque fut passée: mais comme l'autheur d'icelle estoit Satan, qui ne desiroit, & ne pourchassoit rien tant, que de les voir hors de la Chine, il tourne inciter ces larrons avec leurs parens & amis, de sorte que mettans en oubly le benefice passé, & se resouuenans seulement de la peine, & de l'ignominie, qu'ils auoient receuë, ils voulurent essayer vn autre coup, voire encore pour la troisieme fois, s'ils pourroient faire bannir les Peres de Xauchéo. Ils vont donc presenter au Visiteur la requeste, que les trois Gouverneurs auoient reiettee: mais iceluy voyant leur ingratitude & meschanceté, les renuoya tout court, sans les vouloir escouter. Voila pour le premier essay. Voicy le second.

Sont deliurés par l'intercession des Peres de la mort.

Autre essay des larrons pour faire chasser les Peres.

Quelque mois apres, il aduint que le principal des quatre Gouverneurs, qui auoit tousiours fauorisé les Peres, eust à faire vn voyage à la Cour, & en son absence le second Gouverneur, qui auoit tenu le party des larrons, debuoit commander en premier rang. Les larrons assistés de leurs parens & amis, voyans que le temps leur fauorisoit, presenterent à ce Gouverneur vne requeste, par laquelle ils le supplioient de faire vider ces estrangers de la ville. Ce que l'autre s'en alloit faire le lendemain, comme il l'auoit resolu; si nostre Seigneur, qui a vn soing particulier des siens, ne l'eust empesché luy enuoyant la mort la mesme nuit, auant qu'entrer en charge. Et de ceste sorte tous leurs desseins s'esuanouirent comme fumée. Le principal Gouverneur estât de retour de la Cour, & ayât sçeu le danger, auquel auoient

Troisieme essay.

Les Peres sont miraculeusement deliurés.

*Se qu'ils
ont fait
pour la
gloire de
Dieu à
Xau-
obco.*

eût les Peres en son absence: & comme Dieu les auoit miraculeusement, ce semble, garantis d'iceluy, les fauorisa de là en auant plus que iamais: de façon qu'il les alloit visiter à leur logis quelquefois, & les assistoit de son ayde & faueur en tout ce, qui se presentoit. Avec son appuy ils commencerent à prescher la foy Chrestienne en la ville de Xauchéo, combien que ce fust avec beaucoup de circonspection, comme il estoit conuenable: afin de ne donner occasion, tant aux Bonzes, que aux autres Mandarins, de troubler derechef les affaires. Et par la grace de Dieu ils auoient desia au mois de Septembre l'an 1594. baptizé quelques vns des habitans, & entre ceux là vn Lettré, fils d'un homme de marque d'icelle ville; outre beaucoup d'autres, qui s'apprestoient pour le mesme, jaçoit que les Peres procedoient en cela fort bellement, ainsi qu'ils auoient fait à Xauquin; n'admettant point au baptesme, sinon ceux, qu'ils auoient bien instruits, & esprouuez; afin que s'il aduenoit qu'on les chassast aussi de là, les Chrestiens se peussent maintenir d'eux mesmes, assistez du diuin secours, durant leur absence & persecution. Neantmoins depuis ce temps là, ils ont tousiours demeuré à Xauchéo iusqu'à present, continuâs de cultiuer & prouigner ceste nouuelle plante de nostre Seigneur: auquel ils ont acquis beaucoup d'ames, & tous les iours luy en acquierent de nouueau. Mais voyons comme ils ont tasché de gagner pais, & porter la lumiere de l'Euangile en d'autres quartiers, & principalement és meilleures cités de la Chine.

Le P. Matthieu Ricci sous la faueur d'un grand Mandarin, entre bien auant dans la Chine, & voulant s'arrester en la cité de Nanquin, il en est empesché.

CHAPITRE XXIX

*Un grand
Manda-
rin allui
à la Cour
passe par
Xau-
obco.*



Les Peres, qui residioient à Xauchéo, ayans grand' enuie d'entrer plus auant dans le pais, & s'introduire peu à peu dans la cité de Paquin, ou le Roy tient sa Cour, ils trouuerent pour ce faire vne tres-belle comodité au mois d'Auril de l'an 1595. Car vn des principaux Mandarins de toute la Chine, appellé le Xeyé, estant mandé du Roy, alloit en Cour, pour estre du conseil de guerre: & passant par la ville de Xauchéo (ou on luy fit vn fort hōnorable accueil)

comme il s'arresta là quelques iours, il luy fut dit, qu'il y auoit en ceste ville quelques Prestres estrangers, qui sçauoient beaucoup de choses. Ce qui luy fit venir enuie de les voir, esperant qu'ils luy donneroient quelque remede pour vn sien fils, qu'il menoit avec soy fort malade. Les Peres ayant sçeu qu'il desiroit les voir, l'allerent trouuer. & il les reçeut avec plus de courtoisie, qu'il n'auoit accoustumé d'vser enuers les Mandarins mesmes. Or apres qu'ils eurent traité ensemble de diuerses choses, le Xeyé leur fist entendre la maladie de son fils, & les pria de luy vouloir appliquer quelques remedes, s'ils en sçauoient, leur promettant, qu'il les fauoriserait en tout ce, qui luy seroit possible. Le P. Matthieu voyant vne si belle occasion, pour aller à la ville de Paquin, ou à quelque autre des principales de la Chine, sous l'ombre d'un Mandarin si puissant, luy feit responce, qu'il y apporteroit de son costé tout ce qu'il pourroit. Mais que ceste maladie ne se pouuoit guerir en si peu de temps, qu'il debuoit s'arrestera Xauchéo: neantmoins que s'il luy plaisoit, il l'accompa- *Le Pere Ricci s'offre de l'accompagner, & pour quoy?* gneroit iusques à Paquin, & que tant par les chemins, que là mesmes, il auroit vn soing particulier de la cure de son fils. Le Xeyé fut bien content de cela, pour l'extreme desir qu'il auoit de la guerison de son enfant. Il commande donc au Gouverneur de Xauchéo, de bailler au Pere les lettres patentes, qui luy estoient necessaires, pour passer avec assurance. Ce qui fut fait tout aussi tost. Le Xeyé partit avec ses gens deux iours apres, & le Pere le suyuit dans vne barque, accompagné d'un ieune homme Chinois, bien accord & entédu aux affaires, laissant à la maison de Xauchéo le P. Lazare Catanio, qui estoit venu peu de temps auparauant de Macao, à cause que les autres deux compagnons du P. Ricci estoient morts à Xauchéo. Le Xeyé faisoit son voyage, tantost par terre, tantost par eau, selon les commodités qu'il trouuoit: & parce que le Pere ne le pouuoit suyure avec sa barque par le mesme chemin, il luy enuoya dire, qu'il le rencontreroit en la premiere ville, qu'on trouue de la Prouince de *Xangā-su ville.* Chiansi, appellée Nanganfu. Or pour y aller, il faut passer par vne autre, qui s'appelle Namo: & d'autant que la riuere fait vn grand circuit entre ces deux villes, on va d'ordinaire de l'une à *Namo ville.* l'autre par terre. Car aussi le chemin (auquel on compte douze lieues ou enuiron) est tres-beau, & tres-commode: estant tout paué de quarteaux, si bien qu'encore qu'il aye fort pleu, il n'y

*Propos
entre le
Pere &
le Man-
darin.*

*Canches-
fu ville.*

fait point de bouës : à cause que d'un costé & d'autre , il y a des fossés , pour receuoir l'eau , avec des belles & grandes faulxayes , qui le rendent fort plaissant. Quand donc le Pere fust arriué en ceste ville de Namo , il trouua que le Xeyé y estoit desia despuis quelques iours , & aussi tost il alla à son logis , pour luy faire sçauoir sa venue. Mais d'autant que c'estoit vn personnage de si grande auctorité , qu'il n'y auoit pas moyen de l'accoster si aisément , le Pere tascha de s'insinuer en la bonne grace de son Maistre d'hostel , & du Secretaire , leur monstrant quelques pièces , qu'il auoit portées , pour donner , comme il disoit , au Xeyé. C'estoit vn horloge de sable , vn verre triangulaire , & choses semblables , desquelles ils font grãd cas en la Chine , pour leur rareté. Le Secretaire fit sçauoir cecy à son maistre , lequel inuita le lendemain le Pere à prẽdre le repas avec soy , & puis le retint vne bonne piece de la nuit , l'interrogeant de diuerses choses. Or parmy les discours le Pere entrelasloit tousiours quelques propos de la foy Chrestienne , que le Xeyé escoutoit (selon qu'il faisoit paroistre) fort volontiers. En fin apres auoir traité de la santé de son fils , le Pere luy dit , qu'il desiroit s'arrester à Paquin , ou à tout le moins à Nanquin , qui sont les deux Cours , ou cités royales ; mais le Xeyé luy fist entendre , que cela ne se pouuoit faire , d'autant qu'on ne permettoit aux estrangers de s'arrester , principalement en ces deux villes : toutesfois qu'il se pourroit retirer à Nanchan , qui est vne des principales citez de la Chine en la mesme Prouince de Chianfi. Le Pere ne voulut pour lors le presser d'auantage sur cela , & ainsi il print congé de luy pour ce soir. Le lendemain le Xeyé le fit encor appeller , & s'entretint avec luy en diuers propos assés long temps , le Pere luy monstra lors quelques liures & instruments de Mathematique , ausquels le Xeyé print grand plaisir. Le temps de partir estant venu , le Xeyé s'alla embarquer avec ses gens dãs plusieurs vaisseaux , & le Pere le suyuit dans sa barque , iusques à vne autre ville nommée Canchesfu , ou estoit pour lors le Tutan de ceste Prouince là. On fit icy vne belle entrée au Xeyé : car le Tutan & tous les Mandarins sortirent de la ville , & luy allerent au deuant , accompagnés de trois mille soldats rangés en bataille , qui luy firent vn salué d'arquebuzades , tandis qu'il passoit. Le lendemain la ville luy fit vn magnifique bāquet , avec plusieurs sortes de ieux , & autres signes de resiouissance. Cependant le Pere se tenoit caché dans la barque ; car en

estant voulu sortir vne fois pour voir la ville, il y eut tant de gés,
 qui accoururent pour le voir, qu'on eut dit que c'estoit quelque
 monstre, ou beste sauuage, non iamais plus veuë: tellement qu'il
 fust contrainct de s'aller cacher dans son vaisseau; pour ne don-
 ner occasion au Xeyé d'estre marry de l'auoir mené. Deux iours
 apres ils partirent de là, suiuaus le fil, ou descendant de la riuere,
 & apres auoir fait vne lieue de chemin, ils arriuerent à vn pas-
 sage fort dangereux, qu'ils appellent Iapatan, c'est à dire dix-
 huit courans d'eau. Car autant y a-il de riuieres, qui se vôt ren-
 dre là: & de tous costez il y a des rochers; les vns cachez des-
 soubz l'eau, & les autres, qui se monstrent par dessus. Icy se per-
 dirent quelques barques du bagage du Xeyé: & vn peu plus bas
 le vaisseau du Pere donna à trauers ces rochers, ou il se froissa
 tout a fait. Neantmoins le Pere se sauua à la nage: combien que
 ce ne fust pas sans grand danger de sa vie. Mais le ieune homme
 Chinois qu'il menoit, se noya ou se perdit: de sorte que iamais
 plus on ne le veid; le courant de l'eau qui estoit fort rapide, l'a-
 yant emporté bien loing de là: dont le Pere fust fort marry. Il
 luy feit grande faute par les chemins: car il luy seruoit comme
 de pieds, & de mains. Le Xeyé sçachant l'infortune, qui estoit
 arriüée au Pere, l'enuoya consoler, & feit soigneusement cher-
 cher le ieune homme; mais on ne le sceust iamais trouuer. Deux
 iours apres ils arriuerent à Quianganfu ville tres-forte, & tres-
 riche: là ou beaucoup de gens de marque demeurēt. On l'estime
 l'une des principales de la Chine: & dict-on qu'elle seule paye
 au Roy autant de tribut, que toute vne Prouince entiere. Elle a
 plusieurs villes & villages soubz sa iurisdiction: & le traffic y est
 fort riche, à cause du grand concours des marchans qu'il y a.
 Là ils curent encore vne autre bourasque bien perilleuse, la
 nuit mesme qu'ils y aborderēt; de façon que la barque du Xeyé,
 & celle aussi du Pere seurent en grand danger de donner à fonds.
 A ceste cause le Xeyé resolut de faire le reste du chemin par ter-
 re, prenant à mauuais augure d'auoir mené le Pere, veu les infor-
 tunes, qui luy estoient arriuez en sa compagnie: pource il don-
 na charge à son Secretaire, de le faire conduire à la Cité de
 Nanquin, qui est la seconde ville de la Chine. Le Pere, ayant
 sceu la résolution du Xeyé, l'alla trouuer le lendemain matin,
 pour luy demander à tout le moins des lettres patentes, par le
 moyen desquelles il peust entrer librement dans Nanquin, puis

*Japatan
passage
fort dan-
gereux.*

*Le Pere
s'y cuida
noyer.*

*Quian-
ganfu
ville.*

qu'il ne pouuoit le suiure iusques à Paquin : mais le Xeyé s'en excusa hōnestement, disant qu'il n'auoit encore receu le seau de son office:ncantmoins il luy promist, qu'il feroit en sorte, que le Gouverneur de Quianganfu les luy donroit, & qu'il y pourroit aller seurement en compagnie de quelques siens seruiteurs qu'il y enuoyoit. Le Pere voyant qu'il ne pouuoit obtenir dauantage se contenta de cela. Et le Secretaire du Xeye luy apporta des patentes les plus amples, & les plus fauorables, qu'il eust eu encores, despuis qu'il estoit en la Chine. Car en icelles estoit contenu comme il auoit esté déclaré manant & habitant du Royaume par les Tutans mesmes, & autres Mandarins, selon que faisoient foy les lettres, qui luy auoyent esté baillées à Xauchéo, & en consequence de ce, il luy estoit permis d'entrer à la ville de Nanquin, & autres lieux du Royaume ou il voudroit. Auec ceste bonne despeche, le mesme iour que le Xeye se mist en chemin, pour continuer son voyage de Paquin par terre, le Pere s'embarque en compagnie de deux seruiteurs d'iceluy, sur vne belle riuere, qui le porta iusques à Nanquin:mais parce qu'en son voyage, quelques choses remarquables luy aduindrent, nous le raconterons icy en brief.

*Voyage
du P.*

*Ricci
vers Nā-
quin.*

Estant donc party de Quianganfu, il arriue à vne ville du ressort d'icelle : ou il trouua ce Mandarin, qui l'auoit mené de Xauquin à Xauchéo, lequel luy fist beaucoup de caresses: de là il vint aborder à la ville de Ningibaofu, là ou ceste riuere s'elargist de telle sorte, qu'elle se diuise en neuf bras, laissant au milieu quelques Isles fort plaisantes.

*Nanchā
ville ca-
pitale de
la Pro-
uince de
Chianfi.*

D'icy il s'en alla passer à la Cité de Nanchan, capitale de la Prouince de Chianfi, ou estant voulu sortir de sa barque, il se vid soudain enuironné d'une grande multitude de gens, qui s'assemblerent là pour le voir, comme vne chose nouuelle. Car les estrangers, bien qu'ils soyent habillez à la façon des Chinois, se donnent aisement à cognoistre par les lineaments du visage, mesmement des yeux, du nez, & de la barbe. Plusieurs demandoyent aux seruiteurs du Xeyé, qui estoit cest estranger, ausquels ils respondoyent, que c'estoit vn grand Lettré venu du Ponant, dont les autres estoient plus esmerueillez.

Le Pere voyant vn si grand concours de peuple, se retire dans son vaisseau : mais encore là tant de gens le venoyent

voir, qu'il n'estoit quasi iamais seul. Car ils prenoient vn singulier plaisir, non seulement à le voir, mais beaucoup plus à conférer avec luy de diuerses choses, qu'ils luy proposoyent. Estant sorty de Nanchan, il continue de voguer sur le mesme fleuve, lequel sans perdre rien de sa profondeur & largeur, se diuise derechef en deux bras, l'un desquels mene à la ville de Iaocheofu, ou se font les fines porcelaines, & l'autre conduit à la cité de Nanquin : & par cestuy-cy ils poursuuiurent leur navigation, iusqu'à ce qu'ils arriuerent à vn lac, duquel sortent plusieurs riuieres, les vnes qui se vont rendre tout droict à la mer ; & les autres qui prennent vn cours plus long. Ce Lac est tout enuironné de villes ou villages, & à main gauche l'on trouue vne grande cité appellée Nauquafu. Bien près du mesme Lac, l'on void vne tres-haute montaigne, le sommet de laquelle est tousjours nuageux & obscur, combien que le Ciel soit serain : & au plus haut d'iceluy les Chinois disent, qu'il y a trois cens soixante cinq temples d'Idoles : autant qu'il y a de iours en l'an, & vn grand nombre de Bonzes, lesquels viuent là retirez, menans vne vie fort austere.

Iaocheofu
su ville
ou se font
les porcelaines

Nauquafu
su ville.
Montaigne fort haute.

Au bout de ce Lac est vne tres-belle & forte Cité, bien que petite, dans laquelle entre vne grande riuiere, nommée Xantio, qui est si profonde, au dire des Chinois, qu'en plusieurs endroits, on n'y trouue point de fonds. Le plus estroit d'icelle contient demy lieuë de large. En ce lieu commence le ressort de la cité de Nanquin, que les originaires appellent autrement Nanchili ou Nanceli, de laquelle il nous faut dire encore quelque chose. Elle est à trente deux degrez d'elevation du Pole Septentrional, située sur le bord de la riuiere nommée Xantio : & apres la ville de Paquin ceste-cy est la plus grande, & la plus belle Cité de la Chine. Car aussi iadis le Roy y tenoit sa Cour, à raison de plusieurs grandes commoditez qu'il y a. Mais vne sur toutes, qui est d'y pouuoir fort aisement venir de tous les quartiers du Royaume, tant à cause qu'une bonne partie des riuieres d'iceluy vont aboutir là ; que pour estre quasi au milieu de la Chine, suiuant la coste de la mer. Car elle n'est qu'à dix lieuës d'icelle. Toutesfois comme les villes fizes du costé de Nort estoient quasi continuellement molestées des Tartares,

Xantio
riuere.

Nanquin
cité &
sa desferà
ption.

qui faisoient continuellement la guerre aux Chinois de ce costé là, les Roys changerent leur demeure à Paquin, à celle fin d'estre plus près des ennemis pour leur faire teste, quand ils voudroient entreprendre quelque chose. Mais ores que les Roys n'y fassent plus leur demeure, si est-ce qu'ils l'ont tousiours maintenüe au nom & tiltre de Cour Royale, & avec les mesmes droicts & priuileges, qu'elle auoit lors qu'ils y residoyent. Tellement qu'il y a vn conseil Royal, & les mesmes Magistrats, dignitez, & prerogatiues, qu'à la cité de Paquin. C'est pourquoy les Chinois appellent Paquin la Cour Septentrionale, & Nanquin l'Australe: Elle a (selon qu'escriit le P. Ricci qui a esté là) trois en-

*A trois
encein-
tes de
muraille
& leur
grâdeur.*

ceintes de muraille de brique, dont chascune est si large, que sur le plus haut bout d'icelle, deux chariots peuuent aller de front. La premiere enceinte, & celle qui est plus au dedans de la ville a six milles de circuit, qui font vne lieuë & demie selon nostre supputation. Elle a douze entrées, à chascune desquelles il y a quatre portes esloignées l'une de l'autre, d'un iect de pierre. Toutes ces portes sont couuertes de platines de fer fort espesses, & sur la muraille, qui ioinct l'une à l'autre porte, ils tiennent des piéces d'artillerie, & plusieurs soldats en garnison. Et en ces portes on faict payer les droicts de toutes les marchandises, qui en-

*Les Pa-
lais Ro-
yaux sôt
en la 1.
enceinte.*

trent dans la ville. Au dedans de ceste muraille sont les Palais Royaux, & tout autour d'iceux plusieurs iardins, estangs, & maisons de plaissance; ou il y a des beaux parcs, avec force venaison. Toute la ville est tres-bien compartie, & les ruës sont fort droictes & larges: les bastimens, bien qu'ils soyent bas, sont neantmoins fort beaux au dedans, & principalement les Palais Royaux. Dedans ceste enceinte logent aussi les Mandarins, les gens

*En la 2.
la garni-
son de
30. mille
soldats.*

lettrez, & les autres personnes de marque. La seconde a de circuit vingt milles d'Italie, ou cinq de nos lieuës: les murailles sont aussi de brique, autant larges & fortes, que celles de la premiere. Or entre ceste seconde muraille, & la premiere se tient la principale garnison de la ville, qui est de plus de cinquante mille soldats, selon la commune opinion des Chinois, & au rapport du mesme P. Ricci. La troisieme & derniere enceinte, a quarante milles de circuit, qui font dix bonnes lieuës: combien que ceste-cy est en plusieurs endroicts entrecoupée des riuieres, qui passent par le milieu. Entre ce dernier mur, & le second, demeurent les gens de mestier, & le commun peuple. A raison de

quoy

osent pas approcher, pour le grand respect, qu'ils portent à ces Princes.

Voila donc comme fut establie la maison, que les Peres de la Compagnie de Iesus ont à Nanchan. Tellement qu'ils auoient deux lieux de residence en la Chine l'an 1597. L'un à Xauchéo, qui est en la Prouince de Canton, quelques cent lieuës loing de Macao, ou residoient les Peres Lazare Catanio, & Nicolas Lombard, avec vn autre Religieux de la mesme Compagnie, qui n'estoit pas Prestre, & deux ieunes hommes naturels de la Chine, qui pretendoient entrer en leur Ordre. L'autre estoit à Nanchan, ville distante de Macao enuiron quatre cens lieuës, ou demouroient le P. Matthieu Ricci, Superieur de toute la Mission de la Chine, & le P. Iean Soërio, avec vn autre Religieux, qui n'estoit pas Prestre, & deux ieunes hommes Chinois, qui auoient estudyé au College de Macao, & desiroient estre receus en la mesme Compagnie. Ils taschoient sur tout de bien edifier les Chinois, par l'exemple de leur bonne vie; puis de leur donner quelque cognoissance de leur Createur: bien que ce fut avec beaucoup de reserve, de peur de ne bailler occasion aux Mandarins, de renuerfer en vn moment tout ce, qu'ils auoient basti en si long tēps, & avec tant de peyne. Ce qui estoit à craindre, si plusieurs tout à coup se fussent rendus Chrestiens. Neantmoins on en baptisoit tousiours quelques vns: lesquels, par la grace de Dieu, perse-
Perseuerance & constance des Chrestiens.
Les Peres quittent l'habitation des

pourroient, pour s'espandre en diuers quartiers du Royaume, & sur tout d'aller à la cité de Paquin. Mais cependant afin de donner quelque cognoissance de la loy diuine en plusieurs lieux, sans faire grand brui&ct, le P. Mathieu Ricci fit imprimer vn petit abbrege de la doctrine Chrestienne en langue Chinoise, tādīs qu'il en mettoit en ordre vn autre plus ample, qu'il auoit composé, l'accommodant aux mœurs, qualités, & necessités des gens du païs. Ce qu'ayant esté fait, il en distribua force exemplaires, avec beaucoup de frui&ct, & contentement de plusieurs. Entre autres il y eust vn Lettré, qui auoit esté examiné la mesme année, pour prédre le second degré, lequel ayant leu ce liuret, fut tellement esmeu, qu'il se mit bien tost en chemin, pour aller trouuer le Pere mesme, & sçauoir de luy les fondemens & raisons de ce, qui estoit contenu là dedans. Arriué qu'il fust à Nanchan, il s'en va au logis, ou demeueroit le Pere, & luy declare la cause de sa venue n'estre autre, que pour estre son disciple en la loy qu'il enseignoit. Le Pere luy respond, que tres-volontiers il l'instruiroit, mais qu'il falloit que ce fut à loisir: & partant qu'il estoit necessaire, qu'il se logeat en ville. A quoy l'autre aquiesça: & ayant prins logis, s'en venoit deux fois chasque iour ouyr les leçons du Catechisme; l'une le matin, l'autre le soir. Le Pere l'entretint de ceste sorte l'espace de trois mois, luy declarant petit à petit les mysteres principaux de nostre foy, pour mieux esprouuer sa constance, & voir si le desir, qu'il monstroït de se rendre Chrestien, estoit fondé sur le sable de curiosité, ou sur le roch de bōne volonté. Mais recognoissant en sa perseuerance, qu'il y marchoit de bon pied, il le baptisa dans la Chapelle: & le mesme iour plusieurs Mandarins allerent visiter le Neophyte, pour se conjoûir avec luy d'un si grand bien, qu'il auoit receu. Quelque temps apres il se retire à son païs fort ioyeux, emportant quant & soy quelques exemplaires du Catechisme, pour distribuer à ses parens & amis: afin qu'ils fussent aydés par ce moyen à recognoistre leur Createur.

*Le Pere Ricci
fait imprimer
vn Catechisme
à Nanchan.*

*Conuertit
& baptise vn
Lettré.*

Comme le feu s'estant pris au Palais du Roy de la Chine, en brüla vne partie: & d'un voyage que firent les Peres Matthieu Ricci, & Lazare Catanio vers Paquin; ou n'ayant peu s'arrester, ils s'en reuindrent à Nankin, & là ils furent receus pour habitans, d'une façon merueilleuse.

CHAPITRE XXXI.

*Deſſein
des Pe-
res..*



Ovs auons dit cy deſſus, comme les Peres auoient vn grand deſir de parler au Roy de la Chine, pour luy demander congé de s'arreſter en ſon Royaume, & d'y preſcher la foy de IESVS-CHRIST. Car ſans cela ils eſtoient en danger de perdre en vn moment tout le fruit, qu'ils auroient fait en pluſieurs années. A ces fins le P. Matthieu Ricci ſ'accolla de ce grand Mandarin appellé le Xeyé, ſoubs la faueur duquel il eſperoit pouoir arriuer à Paquin; mais l'autre le plaqua au milieu du chemin, comme nous auons veu. Toutesfois il ne perdit pas courage pour cela, ny le deſir d'eſſayer vne autre fois, s'il pourroit venir à bout de ſon deſſein.

*Comme
Dieu di-
ſpoſe les
choſes.*

Or il ſemble que noſtre Seigneur diſpoſoit les affaires de maniere, que le tout reüſſit à ſa plus grande gloire, & aboutir à la fin, qu'on pretendoit: combien que non ſans des grandes diſcultés & trauerſes: ainſi que l'on void és autres œuvres de Dieu, lequel fait mieux cognoiſtre, qu'il en eſt l'auteur; lors que ſurmontant tous les empeschemens & deſtourbiers, il arriue au but, qu'il s'eſt propoſé. Partant il eſt croyable qu'il voulut à ceſte fin addoucir & humilier le cœur du Roy par vn chaſtiment, qu'il luy enuoya au meſme temps, c'eſt à ſçauoir l'an 1597. au mois de May. C'eſt que le feu ſ'eſtant pris à ſes Palais, il en brüla vne partie; & l'on ne ſçait point, qu'il y euſt eſté mis par aucun, ny qu'il y euſt autre cauſe naturelle, ou accidentaire qui le cauſât: tellement que les Chinois eſtiment que ce feu vint du ciel. Tout

*Trois pu-
nitions
diuines
enuoyées
à trois
grands
Monar.*

ainſi qu'au meſme mois & en la meſme année il tomba en plein iour ſur les tentes, & pauillons, que le grand Mogor auoit fait tendre, pour ſoy & pour ſon fils ainſné, ſur vne terraiſſe (celebrant vne feſte à l'honneur du Soleil) & de là ſ'eſtant ietté ſur ſes Palais il les embräſa tous, & conſuma les theſors, qu'il y auoit, ainſi.

qu'a esté dict cy dessus. Mais l'année auparauint 1596. au mois de Septembre, il aduint au Iapon vn tremblement de terre si terrible, qu'il mist par terre tous les plus excellens & superbes edifices, que Taïcosama, lors Seigneur souuerain du Iapon, auoit fait bastir, pour monstrier sa grandeur & magnificence. Dieu voulant, ce semble, aduiser ces trois grands Monarques quasi en mesme temps, qu'ils n'auoyent pas icy de cité permanente, ny demeure stable & assurée: à celle fin qu'ils n'y attachassent pas leur cœur: & par mesme moyen leur faire cognoistre qu'il y a vn plus grand Seigneur qu'eux, qui commande au Ciel & en la terre, pouuant châtier & humilier les plus grands Princes du monde, quand bon luy semble.

Mais racontons comme passa l'embrasement des Palais du Roy de la Chine. Doncques l'an 1597. au mois de May, le feu se prist tellement au Palais Royal de Paquin, le Roy mesmes estant present, qu'il dura l'espace de deux iours entiers, sans qu'on le peust esteindre. Il est bien vray, qu'aucun de dehors n'y osa entrer pour ce faire. Car c'est vne loy ou coustume parmy les Chinois, qu'en tel cas, personne ne soit si hardy que de mettre le pied dedans le Palais Royal, sous peine de la vie. Ce qu'ils font de peur qu'en vn tel tumulte l'on ne tuë le Roy, ou qu'il n'arriue quelqu'autre inconuenient. Toutesfois il y auoit assez d'Eunuques dans le Palais pour l'esteindre, si Dieu n'eust ordonné vne telle punition. La perte fust tres-grande: car outre qu'une bonne partie des edifices fust reduite en cendres, il s'y perdist aussi grande quantité du thresor du Roy, avec force ioyaux, perles, pierres precieuses, & autres choses d'incalculable valeur. L'on dit encor que la mere du Roy y mourut, & que luy mesmes eust grande peur; Brief qu'il cogneust que Dieu luy enuoyoit cela, pour punition de ses pechez; tellement qu'il commanda au Prince son fils, qui deuoit luy succeder à la Couronne, encor ieune enfant, de se prosterner à terre, & adorer le Ciel, implorant son ayde, & sa misericorde: car les Chinois pour la pluspart croient que le Ciel est Dieu. Or le Roy fist ainsi prier le Prince (à ce que l'on disoit) d'autant qu'il se recognoissoit par trop meschant, pour impetrer quelque grace de la diuine Majesté. Peust estre que nostre Seigneur vouloit par ce moyen engendrer en luy la crainte de ses diuins iugemens, afin qu'il ne se monstrast pas difficile à permettre, qu'on preschast son S. Euangile,

*L'embrasement
du Palais
du Roy
de la
Chine.*

trouua bon tout cela: mais quand il entendist, que le P. vouloit aller avec luy à Paquin, il commence de luy apporter beaucoup de difficultez. La principale estoit qu'il se craignoit de n'estre pas bien receu à la Cour, si l'on sçauoit qu'il eust mené des estrangers quant & soy. Toutesfois moyennant vn bon present, que le P. Ricci luy fist, toutes ces difficultez furent applanies. Outre ce il luy donne vne bõne raison pour excuser son faict, si on luy en demandoit cõpte. C'est, qu'ayant sceu que le Roy desiroit, qu'on luy fist vn Kalédrier des Lunes (par lesquelles ils comptent leurs mois) les accõmodant au cours du Soleil, il auoit trouué cet estrange biẽ versé és Mathematiques, & nôméement en l'Astrologie, lequel promettoit de faire cela au contêtement de sa Majesté: & partât qu'il estimoit luy faire vn agreable seruiçe, le luy amenât à Paquin. Au reste il dit au P. Ricci, que s'il vouloit auoir accès au Roy, il estoit necessaire d'auoir quelque beau present pour luy donner: car telle estoit la coustume du païs. Le Pere luy monstra vn horloge à rouës, deux ou trois pourtraicts peints à l'huyle, & autres choses curieuses & nouuelles en la Chine, lesquelles il iugea propres & reuenables pour presenter au Roy.

Or iasoit que le Mandarin (cõm'il estoit homme de grãd pouuoir & auctorité) menast les Peres assurément & sans aucune difficulté à la ville de Paquin: toutesfois quand ils furēt là, il leur dict qu'il n'estoit pas expedient qu'ils sortissent en public, & se monstrassent: mais qu'ils se tinssent coys en leurs logis. Ce qu'il disoit à cause qu'il craignoit qu'on sceust qu'il les auoit menez: tellemēt que pour ne luy desplaire ils ne cõparoissoyent pas en public: mais traitoyēt leurs affaires, cõme en cachettes, par personnes interposées. Ils essayèrent par beaucoup de voyes, & mes-

*Estant
arriuez
là ny ad-
uancent
rien.*

mes par presens, d'auoir accez au Roy, pour luy offrir ce qu'ils auoyent apporté, & luy demãder le congé qu'ils desiroyēt auoir: mais il n'y eust aucũ, qui se voulust employer pour eux en cela, parce que c'estoit vn affaire d'estrangers, que les Chinois ne voyēt pas volontiers. Apres qu'ils eurent demeuré là quelques mois, sans auoir peu rien aduancer: & craignans qu'il n'arriuaist cependãt quelque nouuelleté és deux lieux de Residẽce qu'ils auoyēt en la Chine, ils resolurent de s'en retourner à Nanchan. Mais cõme ils furent arriuez à la Cité de Nanquin, le P. Ricci eust grãde enuie d'esprouuer vne autre fois s'il pourroit s'y arrester, & y establir vne maison pour ceux de la Cõpagnie cõme à Nanchan.

quoy on l'appelle les faux-bourgs de la ville. Et icy on trouue force iardins & champs ensemencés, jaçoit qu'outre cela il y ait vn grand nombre de peuple & de maisons. Mais retournons à nostre propos. Le Pere estant arriué à Nanquin avec les seruiteurs du Xeyé, ceux-cy prindrent incontinent congé de luy : & le laisserent tout seul dans sa barque, le prians de ne dire à personne, qu'il fust venu en compagnie du Xeyé, & qu'il ne s'arrestat pas beaucoup en ladicte ville ; de peur qu'à son occasion il n'y eut quelque trouble ou scandale, dont la faute vint à tomber sur leur maistre. Mais le Pere se voyant seul & delaisié de tout humain secours en vne si grande ville, & iugeant qu'il importoit peu au Xeyé qu'on sçeut, qu'il estoit venu en sa compagnie, & au contraire, que cela luy pourroit seruir de beaucoup, il ne voulut point suyure leur conseil : tellement qu'il disoit haut & clair à ceux, qui l'intergeoient, qu'il estoit venu avec le Xeyé : car avec ce on le voyoit d'un meilleur œil : & ne trouuoit on si estrange sa venuë. Il loua tout aussi tost vne maison hors de la seconde enceinte de muraille.

Le Pere Ricci arriue à Nanquin.

Loue vne maison, & y prend cognoissance.

Or comme il alloit vn iour par la ville, il va rencontrer vn ieune homme, qu'il auoit autrefois cogneu à Xauchéo, fils d'un Medecin, qui s'estoit tenu là. Cestuy-cy luy donna encores nouvelles d'un autre ieune homme, fils du Tutan de Canton, duquel aussi le Pere auoit esté grand amy qui le vint par apres trouuer. Et de ceste sorte il entra en cognoissance, non seulement avec ces deux ieunes hommes, mais aussi par leur moyen avec d'autres, qui leur estoient amis : nommément avec vn certain Lettré, qui estoit homme de marque, & de moyens : pareillement avec vn sien fils, aussi Lettré. Ceux-cy l'inviterent à prendre le repas chés eux quatre ou cinq fois : & à ceste occasion il leur tint quelques propos de la foy Chrestienne, esquels ils sembloient prendre grand goust. Or pensant faire beaucoup de fruit en ceste ville là, veu l'heureux succès de son entrée en icelle, le Diable remua tellement les affaires, qu'il le fit vider de là, plustost qu'il ne pensoit. Car le Pere ayant sçeu qu'un certain Mandarin, qu'il auoit cogneu d'autres fois à Xauchéo, exerçoit à Nanquin vne charge fort honorable, il estima qu'il seroit bon de l'aller visiter : afin de se preualoir de son autorité & faueur ; en cas qu'il en seroit de besoing. L'estant donc allé trouuer, le Mandarin le reçeut avec grande demonstration de bien-veillance ; au moins du com-

Il va voir un Mandarin qu'il a cogneu à Xauchéo.

*Le Man-
darin
s'altere
fort de
ce que le
Pere vou-
loit s'ar-
rester là.*

mencement, luy disant mesmes qu'il estoit bien aise de sa venuë; mais quand le Pere luy declara, qu'il vouloit s'arrester en icelle ville, l'autre se mist tellement en cholere, que le Pere ne le peust aucunement appaiser, bien qu'il luy dit, qu'il estoit venu là en la compagnie du Xeyé, & luy monstra ses patentés: adioustant beaucoup de raisons, pour luy faire trouuer bonne sa resolution. La cause, pour laquelle le Mandarin s'altera si fort (à ce que le Pere peut colliger de ses parolles) fust parce qu'il craignoit, que le Roy, ou ceux de son Conseil, ne vinsent à sçauoir qu'il auoit esté en sa maison, & creussent qu'il luy auoit presté faueur, pour s'arrester là contre les loix du Royaume. Brief pour obuier aux dangers, qui luy en pourroient arriuer, il commande soudain qu'on luy fait venir celuy qui logeoit le Pere. Ce pauvre homme fut incontinent mené deuant le Mandarin avec telles affres, qu'on peut penser: car on le menaçoit de le faire fouetter à bon escient, à cause qu'il auoit logé ce Prestre forain, sans congé d'aucun Mandarin: mais il n'eust que la peur. Car le Mandarin se contenta de le faire obliger par acte public, qu'il conduiroit le Pere tout à l'instant hors de la ville, & le meneroit en la Prouince de Chiansi, ou on luy auoit donné les patentés, qu'il portoit. Le Pere se trouua fort estonné, voyant que le Mandarin prenoit vne resolution si soudaine, & si contraire à son dessein. Mais comme il estoit l'un des principaux Mandarins de la ville, il n'osa repliquer vn seul mot: afin de ne le faire fâcher d'auantage, & ne mettre son hoste en plus grande peine. Il s'embarqua donc de rechef (bien que fort à regret) pour s'en retourner, d'ou il estoit venu; resolu d'esprouuer s'il pourroit trouuer meilleur accueil en la cité de Nanchan, par laquelle il auoit passé en venant, & ou on luy auoit fait tant de caresses. Il rencontra tout à propos vn seruiteur du Tutan de ceste Prouince là, qui alloit à la mesme ville. Lequel non seulement le mena volontiers avec soy: mais encore estant arriué à Nanchan, luy chercha & trouua vn logis, ou le Pere se retire, & s'insinuë peu à peu en la bonne grace des habitans, de telle sorte qu'il eust congé de s'y arrester, ainsi que nous allons maintenant dire.

*Le Pere
est ren-
uoyé en
la Pro-
vince de
Chiansi.*

*S'en va
à la cité
de Nan-
chan.*

De la cité de Nanchan; & comme le P. Matthieu Ricci ayant eu congé du Tutan d'y faire sa résidence, commence à y prescher l'Euangile: & du fruit qui se faisoit tant là, qu'à Xauchéo.

CHAPITRE XXX.



A ville de Nanchan est la capitale, ou metropolitaine de la Prouince de Chiansi: & tant pour cela, que pour autres raisons, que nous dirons bien tost; elle est fort grande, & bien peuplée, mesmement de Noblesse, & de gens Lettrés. Car vne bonne partie des habitans est des Seigneurs, & Princes, extraicts de la race Royale: d'autant que les Roys de la Chine ont accoustumé d'enuoyer tous leurs enfans, sauf celuy qui doit succeder à la couronne, en ceste ville de Nanchan. Là ou on les loge dans des Palais fort magnifiques, leur donnant pour entretenir leur estat vne bonne rente, comme il conuient à leur qualité. Et jasoit qu'on ne permette pas, qu'ils se meslent en façon quelconque du gouuernement de la ville, ny de la Prouince: toutesfois les Mandarins leur portent vn grand respect & honneur. Ils ont aussi plusieurs priuileges par dessus les autres. Or comme ces familles, & les descendans d'icelles, ont fort multiplié en ceste ville, ils sont en si grand nombre, qu'ils occupent la quatriesme ou cinquiesme partie d'icelle. Mais il y en a trois principales, les chefs desquelles s'appellent Roys. Aussi sont ils seruis & traités avec vne magnificence du tout Royale: menans vn grand train & suite de gens. Il y a encores en ceste ville beaucoup de Lettrés, tant de ceux, qui ont autrefois exercé l'office de Mandarin, comme d'autres, qui attendent qu'on les y employe. Car plusieurs d'iceux ayment mieux se loger icy parmy tant de Noblesse, que de se retirer en leur païs, ou en autre part. Et c'est la cause, pour laquelle les habitans de ceste ville sont plus courtois & honnestes que les autres. Or le P. Ricci y estant allé, pour la seconde fois, Dieu voulut, qu'il y rencontra mieux, qu'il n'auoit fait à Nanchin. L'hoste, qui le logea en sa maison, estoit de fort bonne humeur, & luy donnoit plusieurs bons aduis & conseils, qui luy seruirent de beaucoup, pour s'accommoder mieux au mœurs des habitans. Entre autres choses il luy feit sçauoir, qu'il y auoit

*Nanchan
ville fort
peuplée
de Noblesse,
& pour
quoy?*

*Le Pere
Ricci s'y
loge, & y
préd
cognois-
sance avec
vn Me-
decin.*

à Nanchan vn Medecin, qui estoit grand amy du Xeyé. Le Pere prenant de là occasion, alla visiter ce Medecin, duquel il fut accueilly fort humainement : & le lendemain il paya la visite au Pere, l'estant allé trouuer à son logis, & quelques iours apres le pria de vouloir prendre le repas chés soy, ou il luy feit vn banquet somptueux, en compagnie dedeux autres hommes de marque. Le Pere print occasion durant le repas, de leur discourir sur quelques poincts de nostre foy ; lesquels ils entendirent fort volontiers, & deslors conceurent vne grande opinion, tant de la loy qu'il enseignoit, que de son erudition & doctrine : faisans courir le bruiet par toute la ville, qu'un grand Lettré du Ponant y estoit arriué. Mais principalement le Medecin, qui sembloit estre comme l'heraut & trompette des louanges du Pere : lesquelles avec l'accés, qu'il auoit és maisons des Mandarins & autres Seigneurs de la ville, il publia de telle sorte, que lors que le Pere alloit visiter les Mandarins, on le receuoit avec vn grand honneur & respect. Brief la renommée de l'estranger, & de sa doctrine, s'espan-dit par la ville, de maniere qu'il y eut vn des principaux Mandarins, lequel s'en prenant garde, aduisa le Tutan de ce qui se passoit, le priant de vouloir ordonner, qu'information en fust faicte ; afin de sçauoir qui estoit cest estrange : d'ou, & commét il estoit venu là : & ce qu'il pretendoit y faire. Le Tutan estant aduisé de cecy, & sçachant que ce Medecin estoit amy du Pere, le mande venir à soy, & luy demande, qui estoit cest estrange, avec lequel il conuersoit. Le Medecin à son accoustumé luy en dit tant de bien, que le Tutan eust enuie de le cognoistre. Toutesfois pour

*On fait
informa-
tion sur
les actions
du Pere.* ne manquer à ce, qui estoit de son debuoir, il commanda à vn des quatre principaux Mandarins de la ville, qu'il eust à s'informer des actions & comportements de cest estrange : mais que ce fust avec toute douceur, & sans luy donner aucune fascherie. Le Medecin parla semblablement à ce Mandarin, en faueur du Pere, duquel il luy dit beaucoup de louanges : neantmoins le Mandarin ne faillist pas d'enuoyer querir le lendemain le Pere, luy faisant entendre, qu'il desiroit le voir, pour luy communiquer certaine commission, que le Tutan luy auoit baillée. Le Pere tout aussi tost s'en alla trouuer le Mandarin, qui luy feit vn accueil fort honorable & humain, puis luy demanda, d'ou & comment il estoit venu là. Le Pere luy respond, qu'il y estoit venu en compagnie du Xeyé, & qu'il auoit des lettres patentes, par

*Est exami-
né par
un Ma-
darin.*

lesquelles il luy estoit permis de faire sa demeure en ceste ville là. Mais que depuis qu'il estoit arriué, il ne s'estoit pas allé présenter aux Gouverneurs, à cause d'une maladie & indisposition, qui luy estoit survenuë. Le Mandarin monstre estre content de sa responce, & luy dict, qu'il en aduetteroit le Tutā au plustost, & le fauoriseroit en tout ce qu'il luy seroit possible. Le lendemain ce mesme Mandarin avec ses autres trois collegues accom-^{est vis-à-vis de la ville.} pagniez d'une grande suite de gens vindrent trouver le Pere en son logis pour le voir, & luy cōgratuler de sa bienvenue. A quoy luy seruis beaucoup, qu'on sceust qu'il estoit amy du Xeyé, & qu'il estoit venu avec luy: parce que le Xeyé estoit fort respecté en ce pays là. Son hôte & les voisins, qui se tenoyent à la mesme rue, voyans l'honneur, que les Mandarins luy faisoient, commencerent à l'estimer plus qu'au parauant: & le Tutan mesme ayant ouy le rapport, que luy en feist ce Mandarin, qui l'auoit interrogé, luy enuoya dire, qu'il seroit bien aise de le voir. Le Pere se transporta tout incontinent à la maison du Tutan: lequel voyant entrer le Pere se leua soudain de son siege, & se tint debout iusques à ce que le Pere fust auprès de soy. Le Pere s'estant approché se mist à genoux, comme font tous les autres: mais le Tutan le fist leuer aussi tost. Ils demurerent tous deux debout plus de demy heure, parlans de diuerses choses. Quelques fois le Pere luy tenoit propos de la foy Chrestienne, d'autres des Mathematiques, principalement de la façon de faire des horloges, ou quadrans solaires: car les Chinois sont fort curieux de sçauoir quelque chose de ces sciences. Le Pere luy monstra aussi vn verre triangulaire, qui luy estoit resté, à quoy le Tutan print vn singulier plaisir, ne se pouuant assez saouler de regarder la diuersité des couleurs, qui paroissoient à trauers ce verre. Le Pere voyant^{Le Tutan desire le voir, & luy fait grandes caresses.} qu'il s'estoit plu à cela le luy offrist: mais le Tutan ne l'osa accepter, de peur que ceux qui estoient présens, ne remarquassent, cōme il prenoit quelque chose d'un estranger. Il luy demāda s'il deuoit passer plus outre, ou bien s'arrêter là. A quoy le Pere fist responce, que durāt tout le temps, qu'il auoit demeuré en la Prouinee de Canton, il s'estoit trouué fort mal de sa santé, & deux de ses cōpagnons estoient morts en la ville de Xauchéon: que ç'auoit esté la cause; pour laquelle il s'estoit retiré de là, desirant faire sa demeure en ceste ville de Nanchan, qu'on luy auoit tant louée, pourueu que ce fust le bon plaisir de son Excellence.

*Luy don-
ne congé
de s'ar-
rester à
Nan-
chan.*

Le Tutan luy dict avec vn visage gracieux, qu'il y demeurast à la bonne heure, & qu'il luy donnoit permission d'y faire sa residence. Le Pere le remercia tres-humblement de la faueur qu'il luy faisoit: & comme il vouloit prendre congé, le Tutan luy dict, qu'il seroit bien aise d'auoir vn quadran Solaire faict de sa main. Le Pere luy promist de luy en apporter vn au plustost. Apres qu'il eust visité le Tutan, il iugea estre expedié de faire le mesme à l'édroit des principaux Mandarins, afin de les auoir plus fauorables. Il les alla donc tous visiter leur faisant entendre, comme le Tutan luy auoit donné congé de faire sa residence dans la ville: de quoy tous se monstroyent estre fort aises. Côme l'on sceust que le Pere debuoit s'arrester là, & qu'il auoit congé du Tutan pour ce faire, plusieurs autres commencerent à le visiter, tant des lettrez, que de la noblesse. De façon que la maison ou il estoit logé, n'estoit pas assez capable pour receuoir tât de gens. Entre autres il y auoit quelques vns de ces Seigneurs, que nous auons dict estre de la race des Roys, lesquels ne se contentoient pas de le visiter; ains l'appelloient souuent pour prendre le repas chez eux. Ce que le Pere ne leur osoit refuser, desirant gagner leur bonne grace, afin que quand il seroit temps de leur annoncer la foy de nostre Seigneur, comme il pretendoit faire, ils l'escoutassent plus volontiers. Or estant vn iour en vn de ces banquets, comme il fust tombé en propos de la memoire locale ou artificielle, dont il auoit cognoissance, il dict à ceux, qui estoient presens, qu'ils escriuissent les lettres qu'ils voudroyent, sans garder aucun ordre; car les ayant veuës vne seule fois, il s'asseuroit de les leur dire toutes par cœur, l'vne apres l'autre, selon l'ordre qu'elles estoient escrites. Cela leur sembloit de prime face incroyable, car ils n'auoyent iamais veu, ny ouy telle chose: mais il n'estoit pas difficile au Pere de ce faire, parce qu'il auoit estudié cest art, & s'en seruoit ordinairement. Ayant donc faict apporter du papier, & de l'ancre, chascun d'eux escriuiit les lettres qu'il luy pleust, & les luy ayant môstrées vne fois, il les leur dict par cœur toutes de rang, sans faillir en vne seule.

*Gaigne
vn grād
credit
par ce
moyen.*

Dont ils furent grandement esmerueillez. Car l'ignorance est cause de l'admiration, dict le Philosophe. Mais ce qui les feist encore plus esbahir, fust quād il les leur tourna dire au rebours, commenceant dès la derniere iusques à la premiere. Les Gentilshommes, qui auoyent esté presens au faict, le publicerent par

toute la ville, si que plusieurs Lettrez, voire des Mandarins, & autres personnes d'honneur, commencèrent à venir à son logis, pour apprendre cet art. Il les accueilloit tous fort honorablement, & leur respôdoit en termes les plus honnestes, & courtois qu'il sçauoit; leur promettant qu'aussi tost, que son logis seroit accommodé, il leur enseigneroit non seulement cela, mais encor d'autres choses plus importantes, qu'il desiroit leur communiquer. Or entre les Lettrez de la ville, il y en auoit vn de grande *S'accoste d'un Lettre, qui estoit la fort estimé.* autorité, qui faisoit profession d'enseigner les autres, sans vouloir accepter aucun office de Mandarin. Il estoit aagé de plus de soixante ans; & disoit-on qu'il auoit composé quelques trente liures pleins de grande erudition: lesquels il vouloit faire imprimer. Avec ce il estoit tenu pour vn homme fort vertueux. Le Pere estant informé de tout cecy, l'alla voir vn iour, pour entrer en sa cognoissance, & par mesme moyen en celle de ses disciples. Ceste visite fust si agreable à ce Lettre, qu'il promist au Pere de faire pour luy tout ce qu'il pourroit, & de s'employer aussi soigneusement pour ses affaires, comme s'ils estoient siens propres. Brief tant luy que ses disciples monstroyent luy porter vne singuliere affection: & de faict és choses qui se presentoyent, ils luy donnoyent des bons aduis, avec vne entiere & sincere amitié, s'estimans heureux quand ils pouuoient l'accoster, pour apprendre quelque chose de luy. Car les Chinois, & notamment ceux de ceste ville, ne tiennent pas à mespris d'estre enseignez de quelqu'autre, & ne sont pas arrogans ny trop aheurtrez à leur propre opinion. Brief ils traictoyent le Pere, avec autant d'honneur & de respect, comme s'ils eussent esté plusieurs années ses disciples. Au reste ce n'estoyent pas seulement les *Entre en amitié avec vn des Princes du sang.* Mandarins & Lettrez, qui desiroient apprendre quelque chose du Pere: mais aussi les Seigneurs & Gentilshommes extraicts de la race des Roys. Il en y auoit vn entre autres des trois maisons principales, qu'ils nomment Roys, lequel desiroit fort le cognoistre & parler avec luy: mais d'autant qu'à raison de sa grande noblesse & auctorité, il ne pouuoit bonnement, selon les respects humains, l'aller trouuer en son logis, n'osant d'autre part le mander venir chez soy, pour l'honneur qu'il luy portoit, il estoit fort marry d'estre priué de sa conuersation, qu'il desiroit tant. Le Pere ayant esté aduertty de cela par le Medecin, duquel a esté parlé, s'en va le trouuer à son Palais: ou il fust receu de ce Prince avec

Or en la faiso que les Peres vindrēt à Nanquin, vn des plus grāds Mandarins de la ville, auoit fait bastir vne maison, en laquelle il debuoit loger, à raison de son office: mais apres qu'elle fut acheuée, Dieu voulut que ces esprits solastres, qu'on appelle Lutins, s'en emparassent. De façon que le Mandarin n'en iouist guere: car les Lutins appañoissoient là dedans en diuerses figures, fort effroyables, & faisoient mille autres insolences, pour molester & inquieter ceux, qui y logeoient. Ce qu'ils faisoient de nuict principalement: car aussi sont ce esprits de tenebres. Cecy dura si long temps, & avec vn si grand ennuy de ceux, qui habitoient en ce logis, que tous furent contraincts d'en sortir: si qu'il demeura vuyde, n'y ayant personne qui s'y voulut tenir. Il estoit fort bien basti, & en vne des plus belles assietes de la ville: neantmoins il ne seruoit de rien. Et encore qu'on le voulut vendre à vil prix, si ne rrouuoit-on personne, qui le voulut acheter. Le P. Matthieu Ricci cherchoit en ce temps là quelque maison dans la ville, pour se loger, & comme l'on sçeust cela, quelques vns, comme pour gosserie luy vōt dire, s'il vouloit acheter vne maison pleine de Diables. Le Pere respond, que si elle luy aggreoit, qu'il ne lairroir pas pour cela de l'acheter; parce qu'il adoroit & seruoit vn Dieu, que les Demons craignoient si fort, qu'ils trembloient de frayer, & se mettoient en fuytte, en oyant seulement prononcer son nom. De façon qu'appuyé sur l'ayde & secours de ce grand Dieu, il n'auoit aucune peur d'eux: ains qu'ils auoient plus de crainte de luy, à cause qu'il estoit seruiteur d'vn tel Seigneur. Ils allerent donc de ce pas voir la maison, laquelle contenta fort le Pere, & comme ils la bailloient à bon marché, à cause de ceste rare, ils furent bien tost d'accord. Le Mandarin, qui l'auoit faicte bastir, en fut si aise, qu'il bailla non seulement le logis, mais aussi des lettres patentes aux Peres, pour la pouuoir posseder eux, & leurs successeurs, à perpetuité. Ce qu'ils n'auoient encore iamais obtenu d'aucun autre Mandarin. Ils prindrent donc au plustost possession d'icelle: mais auant de s'y changer, ils la benirent selon la forme que l'Eglise obserue en tel cas. Depuis ils n'y ont veu n'y ouy chose du monde, qui les ait inquietez. Les Chinois attendoient l'yssuē de la chose, desirans sçauoir si ces esprits solastres tabuttoient en ce logis, comm'au parauant: mais entendans que tout y estoit en repos, sans qu'il y eust la moindre fumée d'aucun fantosme, ils estoient fort esbahis, & disoient: Que le

*Ilz y a-
cheptent
vne mai-
son, on
les Lu-
tins ta-
buttoient.*

*L'ayant
benie ils
sont chas-
sés, &
s'y logēt.*

Dieu des Chrestiens debuoit estre grand: puis que voulant loger en ceste maison là, il y auoit fait entrer les Demons, pour empescher, qu'aucun autre n'y logeast, que ses seruiteurs, à l'arriuée desquels il leur auoit fait quitter la place. Et de ceste sorte les Peres commencerent d'auoir vne maison à Nanquin, qui est la seconde cité de la Chine: Dieu les y logeant, comme par miracle, par dessus toute esperance humaine. Le bruiet de cecy courut incontinent par toute la ville; de façon qu'un chacun desiroit voir & cognoistre ces Prestres estrangers: desquels aussi on disoit, qu'ils auoient apporté force beaux liures de leur pais, & plusieurs autres raretés, qui n'auoient esté iamais plus veuës en la Chine: brief qu'ils estoient gens doctes & de bonne vie. A raison de quoy plusieurs des Mandarins, mesmes des principaux, laissans à part toute honte, & autres respects humains, alloient les visiter à leur logis, avec grand apparat & suytte de gens, selon qu'ils ont accoustumé de marcher. Ce qui estoit cause que les personnes de plus basse condition les respectoient fort, & n'osoient leur faire du desplaisir. Tous en fin sembloient auoir grande opinion d'eux, & de la loy qu'ils preschoient. Ce que, peut estre, aydera beaucoup à la conuersion de ceste ville à la foy Chrestienne, si Dieu fait la grace aux Peres d'y demeurer long temps, & qu'il donne efficace à leur predication.

*l'estat
du Chri-
stianis-
me en la
chine
l'an 1599*

En tel estat se retrouuoient les affaires du Christianisme en la Chine l'an 1599. iusques ou nous auons conduit, avec l'ayde de Dieu, ceste histoire. Au supplément il se dira comme depuis le P. Matthieu Ricci desirant essayer encor vn coup, s'il pourroit auoir accès au Roy, s'en alla derechef accompagné du P. Iacques Pantoja, & Sebastien Fernandés, à la cité de Paquin, ou ils arriuerent sur le commencement de l'an 1602. & apres maintes difficultés, eurent moyen de faire vn present au Roy, qui luy fut tres-agreable. A raison de quoy on leur enuoyoit chascun iour leur nourriture du Palais royal, en vne maison qu'ils auoient louée, ou ils preschoient publiquement la foy de IESVS-CHRIST, & desia au mois de Septembre de la mesme année ils auoient gagné à icelle, vn des plus grâds Mandarins de la Cour, & vn beau-frere du Roy, qui estoit marié avec vne sœur d'iceluy, & quelques autres Lettrés ou gës de marque. Et bien que le Roy n'eust pas encore donné congé exprés aux Peres, ny de faire arrest au Royaume, ny d'y prescher l'Euangile: toutesfois ils esperoient

*ce qu'on
en a en-
tendu de-
puis.*

probablement l'obtenir, luy ayant à ces fins présenté vne requête, & plusieurs mesmes des Mandarins leur disoient qu'ils auroient, ce qu'ils pretendoient: veu le grand plaisir que sa Majesté auoit pris au present, qu'ils luy auoient fait: principalement à vn horloge à rouës assés grand, pour lequel il faisoit bastir vne tour de bois, & à vn manucordium, ou espinette: laquelle pour apprendre à sonner aux Eunuques du Roy, & à gouverner l'horloge, le P. Jacques Patoja alloit chasque iour, vn mois d'urât, au Palais.

L'on a aussi escrit de Goa sur la fin de l'an 1607. qu'on auoit receu nouuelles de ce pais là, comm'ils estoient desia naturalisés par Ediët du Roy, & declarés regnicoles, avec puissance de bastir, achepter, posseder, & vendre des maisons, tout de mesme, que s'ils estoient originaires de la Chine; & que de fait ils en auoient achepté vne fort commode pour leurs vsages. Combien qu'avec ce, il ne leur manque presque iamais quelque borsaque, & mesmes l'année auparauant 1606. il y eut vn d'iceux, qui fut innocentmēt meurtry à coups de foïet (comm'ils le baillent) & avec ^{Vn de la} autres cruels tourmens, par quelques Mandarins de Canton, qui ^{Compagnie y} creurent trop de leger certains faux bruiës, qu'on feist courir, ^{est meur-} que ceux de ladiëte Compagnie leuoient à Macao vne grosse armée de Iaponois, & autres estrangers, pour aller conquerir la Chine: mais en fin on trouua que ce n'estoient que bourdes, bien qu'apres la mort de l'innocent, comm'il sera deduit plus ample-ment en la suite de ceste histoire.

Il reste donc supplier la diuine bonté, que tout ainsi qu'elle s'est daignée ouurir la porte de ce grand & opulent estat, auparavant si serrée, aux predicateurs de sa sainte loy, il luy plaise encor ouurir le cœur du Roy, & de ses subiects, pour receuoir la semence de sa diuine parolle, avec la disposition qu'il conuient; donnant aussi les forces, les moyens, & le courage à ceux, qu'il a destinez à vne si glorieuse conqueste, d'y bien trauailler, & luy gaigner tant d'ames, qui perissent és tenebres de l'infidelité: à celle fin qu'on voye vn iour ce Royaume fleurir autant en pieté & religion, qu'il est fleurissant en biens de ce monde: & que tous vnis en mesme foy adorions & seruions sa diuine Majesté, à laquelle soit renduë toute gloire & honneur à iamais.

FIN DV QUATRIESME LIVRE.

Loüé soit Dieu, & la Vierge sacrée.

Tttt 2

TABLE DES CHOSES PLUS REMARQUABLES contenues en ceste seconde partie.

- A.**
A Bana, port de mer. 296.
 Abdulfasil, grand Chappelain du Roy de Mogor. 449.
 Abstinence grande du P. Franç. Lopez. 226.
 Abuna c'est le Patriarche des Abyssins. 172. 198. par qui esleu & confirmé. 172.
 Abyssins, Ethiopiens Orientaux. 169. sont paresseux & grossiers. 172. leur breuvage. 170. n'ont point de tēpestes n'y d'orages: 171. leur monnoye: là mesme. Professent la foy Chrestienne, & de qui ils l'ont reçeu: là mesme. L'ont meslangée d'erreurs & superstitions: là mesme. Leurs erreurs. 172. ont des magnifiques Eglises, qu'ils honnorēt grādemēt: là mesme. Leurs Prestres. 171. 172. obseruent estroitement le ieune de Carefme. 172. leur Roy: voyez Prestre-jan.
 Abyssins convertis: à la foy Catholique par le P. André d'Oniedo. 214. sont exposés aux Lyons sans estre endommagés: là mesme.
 L'Accēt & le ton seul distingue plusieurs mots Chinois. 552.
 Accueil d'amis venans de loing fait avec pleurs au Brasīl. 339. 350.
 Accueil fait par le Roy de Mogor aux Peres de la Compagnie de Iesus. 470. fait par le mesme à vn autre Roy qui se venoit rendre son tributaire. 471.
 Aecue signifie Empereur en la langue des Abyssins, qui appellent ainsi leur Roy. 169. Voyez Prestre-jan.
 Achebar. Voyez Echebar.
 Edouard d'Acoſta Gouverneur pour le Roy de Portugal au Brasīl. 273. ce qu'y aduint de son temps. 274. 275.
 Simon d'Acoſta Nouice de la Compagnie de Iesus martyrizé. 290. 294.
 Le Roy d'Adel & Zeilan. Voyez Zeilan.
 Aden, ville. 173. 170.
 L'Adultere griefuement puny en la Chine. 528.
 Adamas frere de Claude Roy des Abyssins luy succede. 203. fait tuer vn personnage de marque, & en bannit vn autre, pour s'estre rendus Catholiques. 204. fait prendre prisonniers l'Eueſque de Hierapolis, & les Iesuites de la suite: là mesme. Est vaincu en bataille par son nepueu, fils de Claude: là mesme.
 Afflictions & calamitez du prochain peuuent estre demandées à Dieu pour son salut. 398. 399.
 Affrons desquels on ne fait cas en la Chine. 562.
 Agag, peuple vivant de larcin. 11..
 Agelymba païs, dont fait mention Ptolomée, quel est maintenant selon aucuns. 11..
 Agnus-Dei poignardé par les Huguenots. 291.
 Agra, ville capitale d'un Royaume appelé de mesme nom. 488. fut vn temps la demeure du Roy de Mogor. 434.
 L'aiguille marine regarde tout droit le Nort en certain lieu. 104. 105.
 Alfonso Albuquerque, surnomé l: Grād, reçoit gracieusement l'Ambassadeur d'Ethiopie. 175. son entreprise sur la ville d'Ornuiz. 367. & 368. les exploits qu'il fit, auant qu'y arriuer. 368. somme le Roy Zeſadin de se rendre tributaire au Roy de Portugal: là mesme. Gaigne vne bataille navalle contre ledit Roy, qui se rend apres tributai-

- re. 369. laisse la conqueste d'Ormuz, & pourquoy. 370. y retourne & s'en empare derechef. 371. y bastit vne forteresse. 372. trespasse au port de Goa: là mesme.
- Alchimie, ou pierre philosophale, cherchée avec grand estude par les Chinois. 334.
- Alcoran que signifie en Arabesque. 407.
- Alcoran, roy de Mahomet, & pourquoy ainsi appellée. 407. 458. est confutée en trois disputes deuant le grand Mogor. 442. la contradiction qu'il y a. 447.
- Alcorans sont aussi des tours au Mahometisme, & pour quels vsages. 458. sont ruinez en Mogor, par le cominadement du Roy. 458. mesmement à Lahor sa ville capitale. 474.
- Alcoran ou Coran temple de Mahomet en Ormuz. 373. pourquoy ainsi appelé. 407. estoit fort celebre. 418. le Pere Gaspar Barzè y plante des Croix, & l'oste aux Sarraïns: là mesme.
- Alebechio, Pirate Turc. 157. chef de l'armée Turquesque, contre laquelle le Vice-roy des Indes enuoya vne flotte. 160. quitte son fort de Mombaza & s'enfuit. 165. est prins des Portugais, 166. est mené à Goa. 168.
- Alexandre, Roy des Abyssins, & sa mort. 174. Nau luy succede: là mesme.
- Le P. F. Pierre d'Alfàre avec trois autres Religieux de S. François va à la Chine. 610. y entret sans estre apperceuz, & sont appelez pardeuant vn Mandarin. 611. les demandes qu'on leur fit, avec leurs responces falsifiées par le trucheman. 612. ont congé d'entrer en la ville de Canton. 613. demandent l'aumosne, chose nouuelle en la Chine. 614. sont enuoyez au Vice-roy. 615. on les enferme en vn logis, & ils cognoissent la ruse du trucheman. 617. se retirent les vus à Macao, ou le P. Alfonso, fils aîné du Roy de Congo, est baptisé. 31. presche la foy à ses vaisseaux: là mesme. S'oppose aux desseins des ennemis de la foy. 35. est pour cela calomnié auprès du Roy son pere, & tombe en sa disgrâce: là mesme. Est relegué, & reduit à grande misère. 36. son innocéce est cogneue du Roy, qui le remet en ses estats: là mesme. Se montre plus seruent que iamais à dilater la foy. 37. est déclaré Roy apres la mort de son pere, & assiégé par son frere en la ville capitale du Royaume. 38. gagne miraculeusement la victoire. 39. regne apres paisiblement, & avec grande pieté 50. ans. 41. reçoit l'Ambassadeur d'Emmanuel Roy de Portugal, & les gens d'Eglise qu'il luy enuoyoit, avec quelques presens fort gracieusement & deuotement. 42. reçoit vne autre Ambassade dudit Roy. 43. enuoye son fils Henry, & son frere en Portugal: là mesme. Fait commandement à ses successeurs de porter les armoiries qu'Emmanuel luy enuoya. 47. enuoye vne Ambassade à nostre S. Pere, pour luy prester obeïssance, & luy offrir son Royaume. 48. son trespas, & succession de son fils Pierre. 50.
- Alfonse Roy de Portugal I. du nom, & vne merueilleuse vision qu'il eut. 46.
- Alliance des Portugais avec Inéne Roy d'Angola. 81. est desirée du Roy de Monomotapa. 112. est faicte avec le Roy d'Ethiople. 178.
- Les Alliez du Roy de la Chine n'ont aucune prerogatiue ou auctorité pour cela. 541.
- Le P. Antoine d'Almeida va à Xauquin. 651. est mené en la Prouince de Chi-quion. 652. y est fort caressé. 656. s'en retourne à Xauquin. 657.
- Alphabet incogneu des Chinois, qui se

seruent de figures hieroglyphiques au lieu de lettres. 519. 551.
 Alphonse d'Aluarade, Prouincial des Augustins aux Philippines, enuoye deux Peres de son Ordre en la Chine. 601. comment ils y furent receus. 602.
 Aluare premier du nom, Roy de Congo, succede au Roy Henry mort en guerre. 57. appaise les tumultes excitez au Royaume : là mesme. Pense quitter la foy Chrestienne, induit à ce par vn sien parent. 58. est cõfirmé en icelle, voyât ce blasphemateur horriblement puny de Dieu. 59. vit voluptueusement. 59. 60. est chassé de sa ville royale par les Giachas. 60. 61. se retire en l'Isle des Cheuaux. 61. diuinement puny d'une griesue maladie se conuertit à Dieu, & reçoit secours du Roy de Portugal. 62. 63. se marie. 63. fait declarer son legitime heritier le fils aisné qu'il auoit d'une esclau. 64. Enuoye vn Ambassadeur vers Héry Roy de Portugal, pour recouurer des Prestres. 65. en enuoye vn autre au Roy Philippe 2. estant Roy de Portugal, & luy offre les mines d'or & d'argent de son Royaume. 66. 67. sa mort. 68.
 Aluare II. fils aisné d'Aluare I. Roy de Congo & d'une esclau, est declaré legitime heritier & successeur de la couronne. 63. succede à son pere. 69. appelle à foy vn Pere Iesuite, la venue duquel ne luy est moins agreable, que profitable. 69. 70. son frere vient contre luy avec vne grosse armée. 70. il baille ses thesors au P. Iesuite pour les garder, & s'il est occis en bataille les employer en œuvres pies. 71. les preparatifs qu'il fait pour la guerre, & l'harangue à ses vassaux : là mesme. Efficace de son harangue. 73. belle resolution d'iceluy. 72. sa vaillance monstrée en la bataille contre son frere. 73. tue son frere en duel, & gaigne la vi-

ctoire. 74. va remercier Dieu, & fait bastir vne Eglise au lieu, ou son frere fut tué, pour y des pierres pour la bastir sur ses espauls : là mesme. Edict fait par luy en faueur des Peres Iesuistes. 75.

Emmanuel Aluarez Iesuite martyrisé, & les belles paroles qu'il dist à ses Freres de Religio qui estoient presés. 289. 264

François Aluarez Prestre accompagne Roderic de Luna en Ethiopie. 178. mène l'Ambassadeur d'Ethiopie au S. Pere. 179.

Gaspar Aluarez Iesuite martyrisé. 295.

Le P. Pierre Aluarez Iesuite fait naufrage. 126. meurt de faim, & de misere. 150.

Ferrant Aluaro Iesuite est massacré des Huguenots pour la foy. 306.

Iean Aluarus Iesuite martyrisé par les Huguenots. 303.

Le Soldan Ama Roy Mahometain, reçoit en sa ville d'Eimam deux Peres Iesuistes, qu'on luy amena de Dofar, captifs. 234. ne les traite pas si rudement, comme font ses seruiteurs : là mesme. Est contrainct de les bailler à vn Baxa Turc, qui les luy demanda. 235.

Amadaba, ville de l'Industan. 468.

Aman, ou Hyamã, peuple d'Arabie. 421. voyés Ammonites.

Amanadab, ville de l'Empire du Mogor. 460.

Amazones fêmes belliqueuses que quelques vns disent estre en Monomotapa. 108. elles brulent le tetin droit pour mieux tirer de l'arc : là mesme. Cõbattent contre les Giachas : là mesme. Le Roy Monomotapa les tient à sa solde. 108. 156.

Ambassade enuoyée par le Roy de Portugal à celuy de Congo. 251. est bien receuë. 26. autre Ambassade du Roy de Portugal Emmanuel I. enuoyée à Alphonse I. Roy de Congo. 42. autre

- dudit Roy de Portugal, vers le mesme Roy de Congo. 43.
- Ambassade enuoyée par le Roy de Portugal au Prestre-jan. 173. autre enuoyée par Philippe I. Roy d'Espagne & de Portugal vers le Roy de Congo. 65.
- Ambassade du Roy de Congo Alonse I. vers celuy de Portugal. 43. autre du mesme Roy Alonse vers N. S. Pere. 48. comment elle fut reçeuë. 49.
- Ambassade du Roy de Congo Aluare I. vers Henry Roy de Portugal. 65. autre du mesme Roy Aluare vers Philippe I. lestant Roy de Portugal. 66. 67.
- Ambassade enuoyée par Inéne Roy d'Angola vers Jean III. Roy de Portugal. 82.
- Ambassadeur d'Ethiopie reçu gracieusement par Albuquerque. 175. mené au S. Pere. 179.
- Ambassadeur du Roy de Congo baptisé en Portugal. 25.
- Ambassadeurs des Princes estrangers où & comment reçeus en la Chine. 538.
- le Roy ne se laisse veoir d'iceux. 539. comment ils traictent des affaires avec luy. 543.
- Ambassadeurs qui ne sont enuoyés par quelque grand Monarque, comment reçeus en la Chine. 602.
- Ambition folle du Roy de Mogor, desirant estre estimé Dieu, ou Prophete, ou Saint. 474. 476.
- Ambize angulo, pore d'eau. 4. a comme deux mains d'homme: là mesme.
- Ambonde, nom ancien de la courée d'Angola. 76.
- Ambonds, peuples habitans d'icelle. 76.
- L'Ambre-gris né viét de la semence des Baleines. 6. le país de Soffala en a force. 107.
- Ambrizze fleuve. 4.
- Ame d'un Brasilié emportée par les Anges. 342. le transport des âmes selon la doctrine de Pythagoras creu en la Chine. 577.
- L'Amerique par qui descouuerte. 248.
- Amis qui viennent de loing reçeus courtoisement en pleurant par les Brasiliens. 339. 350.
- Ammonites, peuple d'Arabie, appelé maintenant Hyaman, ou Aman. 421. ont quatre villes que Mahomet infecta les premieres: là mesme. Desirent estre instruits en la foy, & enuoyent deux Ambassadeurs vers le P. Barzé à cest effect: là mesme.
- Ampaza port, & ville ruinée, & pourquoy. 159. le Prince d'Ampaza assiste au iugement ou est condamné à mort le Roy de Lamo. 167. la paix est ratifiée entre luy & les Portugais. 168.
- An des Chinois, & quād il comēce. 528.
- Ananazas, fruit. 110.
- Ananazes plante du Brasil & son fruit. 250.
- Le P. Ioseph d'Anchieta Iesuiste Viscaïn arriue au Brasil, & depuis y est Prouincial. 273.
- Les Anciens de Canton presentent vne requeste au grand Visiteur, contre les Iesuistes de Xauquin. 659. ce qui s'en suit de ceste requeste. 660. Accusations faulx desdits Anciens contre les mesmes Iesuistes. 665. les font chasser de Xauquin. 666.
- Le P. Jacques d'Andrada Iesuiste, martyrisé. 290. encourage les autres, auant sa mort, au martyre. 289.
- Fernand Perez d'Andrada, Capitaine enuoyé à la Chine establit le commerce des Portugais avec les Chinois. 590.
- Simon d'Andrada gaste en la Chine ce que son frere Fernand y auoit faict. 591. peu s'en faut qu'il n'y soit tué avec tous les siens. 592.
- Angariens sont appellez de quelques vns les Portugais. 121.
- Anges apparus. 413. Empoient l'ame

- d'un Brasiliën, bon Chrestien. 342.
 inepte opinion des Sarrazins touchant
 les Anges, refutée par le P. Gaspar Bar-
 zé. 411.
- Angola, Royaume jadis des appartenan-
 ces de Congo. 3. son commencement.
 6. pourquoy ainsi nommé, sa situation,
 & ses bornes. 76. son nom ancien : là
 même. Est vne partie de la Guinée
 basse. 21. est fort peuplé. 77. riche en
 minieres d'argët. 76. on y croit ce que
 le Soba dict, sans qu'on s'enquiere au-
 trement de la verité. 80. les Iesuites y
 font grand fruct. 91. 92. ils y sont fort
 cherys, & y ont deux lieux de Residé-
 ce. 100. les Idoles y sont abatuës, &
 des Croix erigées par vn P. Iesuite.
 89. il y a vingt mille Chrestiens & d'a-
 uantage. 99. les Portugais y trafiquent
 en esclaves. 78.
- Le Roy d'Angola faict aller à la guerre
 tous ses vassaux, qui peuuent porter les
 armes. 78. demande la paix aux Portu-
 gais, & d'estre instruit en la foy. 103.
 Cabaça est sa ville royale. 83.
- Angola, vn des Sobas, depuis surnommé
 Inéne, se rend tributaires, les autres So-
 bas. 75. voyez Inéne.
- Quilonge Angola. Voyez Quilonge.
- Dambi Angola. Voyez Dambi.
- Angolains jadis appelez Ambonds. 76.
 quatre sortes & conditions de gës en-
 tre les Angolains. 79. leurs loix & cou-
 stumes. 80. tiennent plusieurs femmes.
 77. quelques vns d'eux mangent la
 chair humaine. 103. leur langage. 76.
 leur noblesse. 79. leurs esclaves, la me-
 me. Iniuste seruitude de plusieurs d'i-
 ceux. 80. leur façon de combattre. 77.
 leurs instrumens pour donner le signal
 de la bataille, la même. Cent cinquā-
 te Portugais, & peu d'Ethiopiens leurs
 confederez, mettent en route douze
 cens mille d'iceux. 93. deux cens Por-
 tugais & dix mille originaires desout
- vne armée de six cens mil Angolains.
 96.
- Angolains cōuertis par vn P. Iesuite. 89.
 deuotion des Chrestiens Angolains.
 99.
- Angoscia, fleuve & Royaume. 109.
- Annales de la Chine. 641. 642.
- Pierre Antoine grand Seigneur Cōgian,
 Ambassadeur du Roy Aluare I. vers le
 Roy d'Espagne, se noye en son voya-
 ge. 67.
- Anthropophages. 7. 59. 103. 275.
- Anzicains, ou. Anziques, peuples barba-
 res, qui se mangent les vns les autres,
 & repaissent leurs maistres de leur pro-
 pre chair. 7. se reuolent contre le Roy
 de Congo. 57.
- Apiapetangas Brasiliëns, ennemis de ceux
 de Iaguabara. 348. sont desfaicts par
 Piraguasu. 349.
- Apostat de la foy enterré dans l'Eglise.
 58. desenterré par les Diables. 59.
- Apothicaire de la Chine vistré souuent
 par les Mandarins. 528.
- Apparitions du Sauueur, de N. Dame, &
 des Anges. 413.
- Le Pere Rodolfe Aquauia enuoyé avec
 quelques autres de la Compagnie de
 Iesvs au Roy de Mogor. 440. l'ac-
 cueil qu'il leur fit. 441. pour parler du
 même Pere avec ledit Roy. 443. au-
 tre pour parler des mêmes. 444. de-
 meure seul aupres du Roy, les compa-
 gnons s'en retournans à Goa. 454. les
 Mullas le veulent tuer, & le Roy luy
 veut bailler des gardes, qu'il refuse.
 455. son austerité de vie, la même. Ses
 oraisons assidueës. 456. les grandes con-
 solations qu'il reçoit de Dieu, la me-
 me. Retourne à Goa. 457. les thresors
 qu'il apporta de Mogor, la même.
- Panse Aquitine fils puiné du Roy de
 Congo, ne veut quitter le Paganisme.
 31. abhorre la loy Chrestienne, & pour-
 quoy. 32. tire plusieurs même des
 grands

- grands à sa cordello. 39. calomnie Alfonso son frere aupres du Roy. 35. se veut faire Roy apres la mort de son pere, & assiege son frere déclaré Roy. 38. 39. est miraculeusement desfaict avec sa grosse armée par son frere, n'ayant que trête & six hommes d'armes avec soy. 39. est pris és pieges, tendus par les veneurs: à mesme. Sa mort miserable. 40.
- Aquelunda Lac duquel sort en partie la riuere Barbela. 11. & Onzon. 12.
- Arabes, larrons. 366. mangent les saute-reaux ou grillons. 233.
- Arachosia, Royaume maintenant appelé Cabul. 430.
- Michel Aragonois Iesuite martyrizé. 299.
- Arbre qui a donné le nom au païs du Brasil. 250. 251.
- Arbre cheuelu. 5.
- Arbre portant du linge. 5.
- Arbre dont le bois represente les ondes de l'eau. 479.
- L'Arc royal, par qui porté en Ethiopie. 90.
- On dresse vn Arc triomphal au premier Gradué de la Chine. 557.
- Archeueschez que S. Thomas a institué en l'Inde. 583.
- Arcoco ou Arquico, port de mer. 196. seul de la mer rouge resté au Roy des Abyssins. 170.
- L'Argent moins prisé que des coquilles en Congo. 5.
- Plus estimé que l'or en la Chine, & pourquoy. 508.
- Argent courant par les ruës comme l'eau. 478.
- L'Argent non monnoyé, mais seulement en plaques a cours en la Chine, & pourquoy. 535.
- Arguin, forteresse des Portugais, & ce que les Huguenots y ont fait. 303.
- Armée fort grosse desfaicte par trente & six hômes d'armes, assistés du secours diuin. 39. 40. 41. 45. autre grosse armée mise en route par vn petit nombre de soldats. 93. autre. 96.
- Armée du Roy de Mogor allant contre le Prince de Chabul. 450.
- Armée enuoyée par le Vice-roy des Indes contre les Turcs, suyue de deux Peres Iesuites, & ce qu'ils y font. 157. 161.
- Armes permises aux seuls gens de guerre en la Chine. 561.
- Armes dont vsent les Chinois. 562.
- Armeure & accoustrement des Capitaines angolains. 77.
- Armoiries des Roys de Portugal. 46.
- Des Roys de la Chine. 563.
- D'Alfonse Roy de Congo. 45. 46. 47.
- Du Roy de Monomotapa. 109.
- Armusia ancienne ville de Carmanie. 363.
- Arraisonnement fort gentil d'un Brasilien, avec le P. Prouincial des Iesuites. 358.
- Artillerie, inuention des Chinois. 520.
- L'Asne est tousiours asne, quoy qu'il face, pour paroistre cheual: Dicton d'Allebechio. 166.
- Le P. Iean d'Aspilcuëta est enuoyé au Brasil. 159. le fruct qu'il y fait. 264. sa mort. 274.
- Astres adorez de plusieurs Chinois. 575.
- Atar, ou Cogear, tuteur de Zeisadin Roy d'Ormuz. 367. sa mort. 370.
- Athées en effect, & Idolatres en apparence, sont la plus part des Chinois. 574. quel est le Peccadillo des Athées. 448.
- Atheïsme, pire que l'Idolatrie. 586.
- L'Auarice empesche de grands biens. 241. 242. combatuë en Ormuz. 386.
- Amandement de ce vice. 387.
- Auarice d'aucuns Chrestiens. 420. punie de Dieu rigoureusement. 420. & 421.
- Auchéo, ville de la Chine. 602.

Aueuglement d'un luxurieux. 277.
 Aueugles, forclos de la couronne d'Ormuz. 367. trente Princes Ormuziens de race royale aueuglez, & pourquoy. 372. enuoyez à Goa: là mesme.

Augures, prins du vol des oyseaux, suyuis par les Angolains. 78.

Deux PP. Augustins enuoyez en la Chine 601. comment ils y furent receus. 602.

Les Augustins ont porté les premiers la lumiere de la foy aux Philippines. 595.
 Ont conuertie à icelle plus de cent mil habitans: là mesme.

Aumosne faicte par le Roy de Mogor aux pauures Chrestiens de Goa. 459.

L'Aumosne n'est demandée par aucun Chinois. 614.

L'Austerité exterieure n'est point marque certaine de Saincteté. 423. 424.

Austruches. 9.

Sainct Aymar ville du Brasil desertée à l'occasion des Aymures. 327.

Aymures ou Gaymures, peuples du Brasil fort cruels & barbares 326. vont à la chasse des hommes comme des bestes. 326. 327. leur demeure. 327. ont esté expulsiez de la coste de la mer par les Toupinambas & Tupinachins: là mesme. Sont vaincus par les habitans des Ilhéas. 328.

Aynan Isle & golfe ou les Chinois amassent grande quantité de perles. 508.

Aytao nom de dignité en la Chine, & son office. 621. 630.

Le P. Ignace d'Azebedo Iesuite, enuoyé pour Visiteur au Brasil. 278. retourne à Rome, & est renuoyé au Brasil en tiltre de Prouincial. 279. amasse 69. subiects, qu'il amene avec soy. 280. s'embarque avec 44. d'iceux en vn nauire. 281. y dresse l'ordre qu'on garde aux Colleges. 281. 282. Arriue à l'Isle de Madere. 283. prend la route des Canaries avec 40. de ses compagnons.

284. arriue à vn port de l'Isle de la Palme appellé Terza cohorte. 285. recommande à Dieu en la S. Messe les affaires d'importance: là mesme. Allant au port de la Palme rencontre vne flotte de Caluinistes. 286. Exhorte ses compagnons à mourir constamment pour la foy. 287. son martyre. 288. Belle protestation de sa foy auant que mourir. 288.

B.

BAburxa Roy de Cabul cōqueste vne partie de l'Indostan sur les Parthes. 431. son fils perd ce qu'il a conquis: là mesme.

Babylone de Surie. Voyez Bagdad.

Badaxa Royaume, le Roy duquel est vassal du grand Mogor. 498. les Iesuites ont enseigné trois de ses enfans. 498.

Iean Baëza Iesuite martyr. 295.

Bagdad, ou Bagadad, ville qu'aucuns estiment estre l'anciëne Babylone de Surie. 366.

Baharen, Isle près de laquelle on pèche les plus fines perles du monde. 402.

Bajazet, Empereur des Turcs, comment traité de Tamberlan. 430.

Baixos de l'India, escueils dangereux. 106. 127. naufrage notable aduenu en iceux. 127.

Baleines en grand nombre qui s'entrebattent furieusement. 6. L'Ambregris ne vient de la semence des Baleines: là mesme.

Bancs de la luisue. 106. de las Prayas, ou des Plages. 128.

Bancons, sorte de nauires Chinoises. 564.

Banquets magnifiques des Chinois: 529. comment ils se gouernent en iceux. 531. 532. il y a chair & poisson. 517.

Banza ville, appellée maintenant la ville de S. Sauueur, capitale de Congo. 11.

Baptême du Roy de Congo. 30. de son fils aîné. 31. de son oncle ou beau pere, & du puîné d'iceluy. 26. de son

Ambassadeur en Portugal. 25. du maistre de camp de Panse Aquitime. 40. du Soba de Banzan. 90. d'un autre Soba, & de tous les domestiques & amis. 92. du fils puîné du Roy d'Inambané. 111. du Roy d'Inambané & de toute sa famille. 113. du Roy de Monomotapa & de 300. Gentils-hommes de sa Cour. 119. de deux Dames Persanes en Ormuz. 412. de la Roynie d'Ormuz. 429. d'un Prelat des logues & de ses subjects. 423. 424. 425. de deux Ambassadeurs des Ammonites. 422. d'un Brachmane chef de tous les autres à Goa. 378. d'un grâd Lettré Chinois. 650. & de quelques autres. 674. 691. du pere du Lanciao de Xauquin. 656.

Baptême de 217. personnes. 91. autre de 400. là mesme. autre de mille : là mesme. De 38. Industans à Lahor. 490. d'une ieune fille de 16. ans, qui se monstra fort constante en la foy. 491. 492. d'une venerable vesue Brasiliene. 351. de plusieurs autres Brasiliens. 271. 335. 352. 358.

Baptême conféré aux Brasiliens qui deuoient estre mangez par leurs ennemis. 267. le Diable empesche cela, persuadant aux Barbâres, que la chair des baptisés n'estoit pas si sauoureuse : là mesme. On les baptise neânmols sans qu'on s'en apperçoie : là mesme.

Baptême donné à trois ieunes hommes, trouuez par cas fortuit aux abois de la mort. 102.

Miracles du baptême. 323. 657. 92.

Vne fille morte apparoit à sa mere, brulant du feu d'enfer, pour n'auoir voulu recevoir le baptême, & cause sa conversion. 325.

Barbela, riuere. 11.

Barque merueilleusement equipée. 543.

Barques grandes faictes d'un seul tronc d'arbre pour la guerre. 4.

Barques qui seruent de boutiques aux artisans. 513. seul heritage & possession de plusieurs Chinois : là mesme.

Barques des Mandarins de la Chine, & leur beauté. 514. celles ou on porte le tribut au Roy. 515. autres pour le seruice de sa maison : là mesme.

François Barret, Capitaine general de l'armée nauale, enuoyée par le Roy de Portugal contre celuy de Monomotapa. 125. meurt empoisonné par les Sarrazins : là mesme. auoit esté deuant Gouverneur des Indes. 196.

Le P. Gaspar Barzé Iesuite, son extraction & ses estudes. 374. Va aux Indes avec trois autres Iesuites : là mesme. Sa charité & patience. 375. le fruiet qu'il fit dâs le nauire pour le salut des ames. 376. ce qu'il fit au Mozambique & à Goa. 377. loge à l'hospital. 377. 379. 406. convertit le principal Brachmane de Goa. 378. son voyage d'Ormuz, & le fruiet qu'il fit en iceluy : là mesme. Comment il y fut reçu par le Clergé & le Gouverneur. 379. ses penitences, oraisons, & actes d'humilité. 379. 380. le fruiet de son Catechisme & de ses sermons. 280. 381. & autres pag. suivantes. Grande efficace de ses sermons. 387. corrige de grands abus touchant les mariages. 381. 382. traueille grandement à ouyr les Confessions. 383. apparoit resplandissant & soufflait. 391. 392. faict des miracles. 394. 395. acquiert vn grand credit, & assemble des compagnons qui enflamment la ville d'Ormuz en deuotion. 395. 396. 397. cōuertit des Schismatiques & Heretiques. 402. Entend seul les confessions de deux mille soldats. 404. tasche de conuertir les Iuifs d'Ormuz, & cōuainc deux de leurs Rabbins en dispute. 404. 405. les Sarrazins en font grâd estat, & l'appellent le grand Caçiz, & le grand Baptiste, & pourquoy. 406.

- cōuainc en dispute vn Philofophe Sarrazin, & luy faict confesser la verité de la foy Chrestienne. 408. 410. 411. conuertit à la foy sa femme & sa fille. 412. & la femme de l'Ambassadeur du Roy de Perse. 413. auoit gagné à la foy le Roy d'Ormuz, mais il en est destourné. 414. 415. ce que le Pere fit pour le remettre. 416. hardie entreprised'iceluy. 417. plante des Croix dans l'alcoran d'Ormuz, & le ferme à chaux & sable. 418. baptise les Ambassadeurs des Ammonites. 422. est aymé des Iogues, conuertit leur Prelat & le baptise. 423. 424. 425. est appelé à Goa, ou il est faict Recteur du College, & Vice-Prouincial de la Compagnie en l'Inde. 426. 427. ce qu'il y fit, & son trespas. 428.
 Bassora, ville, & sa situation. 366. c'est là ou s'assemblent les marchands reuenans d'Ormuz: là mesme.
 Batechina, signifie terre des Chinois. 503.
 Batta, Prouince du Royaume de Congo, & sa situation. 111. c'est aussi la ville capitale d'icelle: là mesme. C'est Agezim-ba de Ptolomée selon aucuns. là mesme.
 La Baye de tous les SS. port & cité au Brasil, appelée autrement la cité du Sauueur. 260. les Iesuites. y ont vn College. 307.
 Baylu George prins par les Turcs qui le vouloient empaler, est deliuré miraculeusement. 222. 223.
 Baylur, port appartenant au Roy de Dâcil. 247.
 Bel Gian, signifie en l'âge abyssin, souverain Seigneur. 107.
 Bemba, Prouince. 7. riche en coquilles, & de grand trafic. 8. la ville capitale d'icelle est Pansa. 7. les hommes de ce pais vont merueilleusement viste. 8.
 Bengala, Royaume enuahi par Echebar
- Roy de Mogor. 431. tumultes excitez en iceluy. 450. appeaisez. 451.
 Bengebi, riuere. 6.
 Bengo, riuere. 5. est vne branche du fleuve Danda. 5.
 Les Religieux de S. Benoist font au Brasil, en la Prouince des Paraybas. 308.
 Beste d'estrange façon, adorée jadis des Congians. 16.
 Beurre de Palme. 13.
 Bezoar, place d'Ormuz. 387. pierre contre le venin: là mesme.
 La S. Bible honorée par le Roy de Mogor. 441. 453.
 Blasphémateurs horriblement punis de Dieu. 59. 382. 383. remarquable conuersion d'un blasphemateur. 396.
 Bœufs grandement prizez en Monomotapa. 117. le Roy en donne cent au P. Sylueira le iour qu'il fust baptisé, qui les fist despecer & distribuer aux pauvres. 119.
 Bois de la sacrée croix de IESVS-CHRIST enuoyé par le Prestre-jan au Roy de Portugal qui le reçoit à genoux. 176.
 Lois-sec Seigneur des Petigares bastit vne Eglise auant qu'estre Chretien. 357.
 Boloches peuples. 433.
 Bonnet quarré des Seigneurs Congians. 19. quel le portent les Dames Congianes. 19.
 Bonnet enuoyé au Roy d'Ormuz par le Sophy de Perse, & quel signe c'est. 371.
 Bonnet des Chinois. Voyez Chapeau.
 Bonzes, ou Hoxions, Sacrificateurs des Chinois. 574. sont tenus au rang de la lie du peuple. 562. 574. ne portent point du tout des cheveux, & pourcequoy. 527.
 Vn Bonze Chinois est conuertý à la foy aux Philippines 610. & vn autre à Macao. 620. cestuy cy est souëté pour la confession de la foy, & banny

- du Royaume. 621.
- Vn Bonze chaise les Tartares de la Chine. 563. s'en fait Roy, & institue la police qu'on y garde maintenant. 563. de luy sont sortis tous les Roys qui ont regné depuis. ibid.
- Riuere de *las botteras roxas*. 3.
- Bouchée de pain vendue plus de dix escus. 61. 62.
- Bouquet d'argent, prix d'un grand faict d'armes en la Chine. 60.
- Bouteille qu'une sorte de serpent venimeux a sur la queue, & à quoy sert. 9.
- Brachmane solennellemēt baptizé. 378.
- Bramas peuples en l'Inde. 7.
- Brancaris, riuere. 10.
- Brasil, arbre. 250. 251.
- Brasil, region, & sa description. 248. pourquoy ainsi appellée. 250. 257. est au commencement nommée la Prouince de sainte Croix, & pourquoi. 257. sa temperature. 249. sa fertilité. 250. quand & par qui descouuerte. 257. Les Capitaines ou villes que les Portugais y ont. 258. traffic qu'on y fait en sucre: ibid. la 1. Eglise que les Iesuites y ont bastie. 260. Colleges qu'ils y ont, & autres demeures. 307. 308. ils y instruisent les petis enfans utilement. 270. y sont fort aymez & pourquoy. 311. 312. le profit qu'ils y ont fait à l'endroict des Portugais & des Negres. 313.
- Mœurs des Brasiiliens. 252. 253. ils n'auoyent point de Religion. 252. ce qu'ils croyoient de l'éter & des morts. 252. 253. estoient sans foy, sans loy, sans Roy, & sans lettres. ibid. leurs loiges & leurs liets. 253. vont tous nuds, & mangent la chair de leurs ennemis. 254. coustume barbare qu'ils obseruent à l'accouchement de leurs femmes. 254. sont laids de visage & pourquoy. 257. extremement vindicatifs. 259. les Iesuites leur enseignent à cultuer
- la terre, & autres menageries, outre la foy, & les bonnes mœurs. 312.
- Brasiiliens conuertis, & leur pieté. 236. 246. 325. 329. Baptismes solennels de plusieurs d'iceux. 352. empeschement de la conuersion de quelques autres. 263. 311. superstition diabolique introduite parmy eux. 319.
- Braua, port & Royaume. 156. ville tenue par les Sarrafins. 156. 158.
- Brauaghul, fleuve, & sa source. 104.
- Brebis fort secondes. 9.
- Breuage fait de millet. 170.
- Brief que le Pape enuoya au Patriarche d'Ethiopie André d'Ouiedo. 207. autre de mesme teneur enuoyé à l'Euesque de Nice, Melchior Camero. 224.
- Roch Britto, Gouverneur de la coste de Melinde, linné es mains des Turcs. 157.
- Dominique Briz, interprete de l'Ambassadeur du Roy de Mogor enuoyé à Goa. 440.
- François Brochade maistre des ports & passages pour le Roy de Portugal en Ethiopie. 134. sa charité & liberalité enuers les naufragans. 135. 140. 141. 152.
- Brodequins des Seigneurs Congians. 19.
- Vn seul Buffle laboure la terre à la Chine, & comment est conduit. 616.
- Bulian, Isle. 601.
- François Bullamater parent du Roy de Congo, Aliare l'aitche de l'induire à quitter la foy Chrestienne. 58. meurt miserablement. ibid. les Diables emportent son corps. 59.
- Burtua Royaume. 105.

C

- Abaça, ville Royale d'Angola. 83.
- Cabo Falso, ou Cap faux. 104. pourquoy ainsi nommé. ibid.
- Pierre Aluarez Cabral, Portugais, decouure le Brasil. 256.
- George Cabral Gouverneur des Indes encourage le Roy d'Ormuz à se faire

- Chrestien. 416. *Portugais l'appellent Rso dolec.* *ibid.*
 Antoine Cabral Ambassadeur du Vice-roy de l'Inde, vers le Roy de Mogor. 164.
 438. *Canards sauvages en grand nombre.*
 Le P. François Cabral Prouincial des Iesuites en l'Inde. 648. son voyage de Xauquin. 649. y donne le premier baptême, qui fust de *notre* temps conféré en la Chine. 650.
 Cabul, Royaume iadis appelé Arachosia. 430. Voyez Baburxa. --
 Cassila. Voyez Carauane.
 Caffria, ainsi est nommée vne contrée d'Affrique. 110. les Portugais y ont deux forteresses, l'une à Soffala. 107. l'autre à Sena 141.
 Les Caffres habitans d'icelle sont impitoyables, & grands larrons. 133. mettent à nud les Naufragans. 134. 139.
 Cajusia, poires du Brasil. -- 253.
 Calajaté, ville du Royaume d'Ormuz accepte la paix des Portugais. 368.
 Marc Caldeira Iesuite, martyr. 295.
 Calendrier, ou l'an Chinois respond au nostre, fait par les Peres Iesuites. 670.
 Calendrier des Lunes; respondant au cours du Soleil, désiré par le Roy de la Chine. 695.
 Calicut, Royaume iadis conquis par les Chinois & depuis quitté & pourquoy. 668.
 Cambalu, ou Xambalu, ville capitale du Catay, & sa grandeur. 494.
 Cambambes, montaignes ou il y a des minieres d'argent. 86. ce que les Portugais ont fait pour les conquerir. 87. 88. ce qu'un Iesuite y a fait pour le salut des ames. *ibid.*
 Cambaya ou Guzarate Royaume. 464. conquis par le Roy de Mogor. 431.
 Cambaya, ou Cambayetta, cité capitale du Royaume de Cambaya. 460. 464. ce que que les Iesuites y ont fait. *ibid.*
 Le ieusne des Cambayans. 467.
 Camissa, fleuve & sa source. 104. les Por-
- tugais l'appellent *Rso dolec.* *ibid.*
 Cáp des Imbies, & l'ordre d'iceluy. 164.
 Canards sauvages en grand nombre. 479.
 Canards qui recognoissent leur giste au son du tabourin. 518. comment on les nourrit en la Chine. *ibid.*
 Canellé appelée bois de la Chine & pourquoy. 503. pourquoy Cinnamonum. *ibid.*
 Jacques Cane Cheualier Portugais. 21. descouure le Zaire. *ibid.* enuoye quelques vns des siens au Roy de Congo. 22. emmene des Congains en Portugal, & les ramene après en Congo. 22. 23. induit le Roy de Congo à se faire Chrestien. 23. Retourne en Portugal avec vn sien Ambassadeur. 25.
 Cangigú, Prouince. 501.
 Canne d'or, seruant d'estuy aux lettres du Roy d'Ethiopie enuoyées à celuy de Portugal. 176. cannes ou rouseaux dont on fustige en la Chine. 547.
 Cannes ou rouseaux portans le succe. 250. en y a beaucoup au Brasil. *ibid.* & iadis à l'Isle de S. Thomas. 50.
 Canoës, barques des Brasiliens. 249.
 Canton, Prouince, & ville capitale d'icelle. 510. les Iesuites ont eu vn logis en la ville. 621. 622. 623. les anciens de Canton leur ont esté fort contraires. Voyez Anciens.
 Cap des Aiguilles. 104. de S. Catherine 3. des courantes. 106. de bonne esperance. 104. cap faux. *ibid.* de Guardafu. 156. de haute terre. 499. Ledo. 6. Liapo. 500. de Mocandon. 421. de Orajo. 306. du Patton. 4. de Rosalgare. 421.
 Jean Capdeuille coursaire Huguenot tué douze Iesuites allans au Brasil, pour la foy. 297. meurt d'une mort violente. 305.
 Capitainies ou villes des Portugais au Brasil. 258. 262. 324. 327. 328. 337. 342. 343. 345. les demeures que les

Iesuites y ont, & ce qu'ils y ont fait.
ibid.

Carauane ou Cassila troupe de Marchands, allans à Ormuz, quand & ou s'assemble. 365. la façon de marcher des Carauanes de Cambaya. 468.

Caraques des Venetiens butinées par les Huguenots. 297.

Le P. Gonzale Cardoso va en Ethiopie avec l'Euesque de Hierapolis. 223. Ses gestes & traux. 224. predict sa mort. ibid. est tué par les voleurs. ibid.

Carefme fort estroitement obserué par les Abyssins 172.

Cariges, peuples du Brasil. 275. sont les plus dociles & mieux policez de tous. 337.

Jean Sosa & Pierre Gorrea Iesuites y font vn grand fruit, & y sont martyrisez. 277. Plusieurs de ceste nation desirent estre Chrestiens, & entreprennent des longs & dangereux voyages à ceste fin. 275. 339. 340. 341. plusieurs sont baptisez par vn Iesuite. 341.

Le P. Melchior Carnero Iesuite, creé Euesque de Nice. 187. reçoit ses provisions de Rome. 195. il succede au Patriarchat d'Ethiopie, apres la mort du P. André d'Ouiedo. 229. est retenu à Goa, & la vie qu'il y menoit ibid. court vn grand danger de sa vie pour la foy. 230. est enuoyé au Japon par le Pape, & auant qu'y arriuer meurt à la Chine. ibid.

Laques Caruaille Iesuite, martyr. 306.

Cas lamentable aduenü au fils d'un sous-pilote. 137.

La Casse fistulaire abonde en Congo. 19.

Le P. Benoist de Castre Iesuite, prins par des Coursaïres Huguenots. 287. son martyre, & belle profession de foy auant iceluy. 289.

Le P. Lazare Catanio Iesuite, entre en la Chine, & reside à Xauchéo. 675.

689. Son voyage de Nanchan & de Paquin. 694. 695. Sa demeure à Nanchan. 697.

Catay ou Xetay Royaume. 494. le chemin pour y aller. 497. Aucuns pensent que ce soit le Royaume de la Chine. 498. vn Iesuite y est enuoyé. 498.

Les habitans de Catay sont pour la plus part Chrestiens. 495. honorent les images. 496. ont des Religieux & des Prestres qui gardent continence perpetuelle. ibid. on ne parle point à leur Roy que par escript. 494.

Catechisme enseigné avec grand fruit à Ormuz. 380. 381.

Catechisme du P. Roger tourné en langue Chinoise. 641. 644. imprimé à la Chine. 645.

Autre du P. Ricci en mesme lague. 691.

Catifa ville & forteresse des Turcs, prise & saccagée par les Portugais. 402. 404.

Caximir Royaume, & sa description. 479. conquis par le grand Mogor. 480. grande famine en iceluy. 480.

Caximir, ville capitale du Royaume de Caximir. 479.

Antoine Cayade Portugais, demeurant en Monomotapa, est enuoyé par le Roy vers le P. Sylueira, pour l'amener à la Cour. 116. sert à tous deux de trucheman. 117. le Pere luy descouvre sa mort. 121.

Caymans, sont des Crocodilles. 4.

Cayobig, vn des principaux Cariges enleué par les Portugais. 337. est restitué. 339.

Le grand Caire, jadis Memphis. 173.

Caziques, Ministres de la secte de Mahomet. 412. 414. sont bannis du Royaume d'Ormuz. 415. sont des incisions sur leur chair, & pourquoy. 417. sont aussi appelez Mullas en Mogor. 439. sont les Docteurs du Roy de Mogor.

461. les Cedres abondent en Congo. 19.
- Ceinture des Mandarins. 548. 549.
- Cephala. Voyez Ophir & Soffala.
- Cercueil des Chinois. 581.
- Cerdone, & son heresie refutée. 10.
- Ceremonies dont vsoient les Congians au culte des Idoles. 17.
- Cerfs sauvages prins par les priuez & comment. 436.
- Ceylan. Voyez Chingalas & Gallas.
- Chabul Royaume, le Prince duquel entre és terres de son frere, le Roy de Mogor, avec grosse puissance. 540. en est chassé. 541.
- Chair humaine mangée de certains peuples limitrophes des Congians & Angolans. 103. vendue publiquement à la boucherie, en certaines côtrées d'Angola 80. & celle des ennemis par les Imbies. 163. & par les Brasiliens. 254.
- Chair de chien, fort estimée en Angola. 76.
- Chair de pourceau, la meilleure de toutes au goût des Chinois. 506. 578. bien qu'il y a des peuples en la Chine qui n'en mangent point du tout. 583.
- Chair de certains serpens est tenuë pour aussi delicate, que cellë des poules, par les Congians. 9.
- Chair & poisson és banquets des Chinois. 517.
- Chaires à bras seruent en la Chine au lieu de montures pour voyager. 652.
- Chameaux apprins à danser. 435. combat de Chameaux agreable au Roy de Mogor. 435.
- Chapa, que signifie en Chinois. 625.
- Chappelet du Roy de Mogor, est tout de pierres precieuses. 477.
- Chappeau des Chinois est de diuerse façon selon les estats. 526. de quelle forme est celuy des Mandarins. 549.
- Chaquata, Prouince & ses confins. 430.
- Caracteres incogneus que quelques soiciers du Brasil receuoient du diable. 320.
- Charan, espece de gomme dont les Chinois vernissent les barques. 514. 523. 525. on en blanchit aussi les maisons. 521. il faict reluire les parois à guise de papier bruny. 523. le peut mesler avec toutes couleurs, & les rend toutes luisantes. ibid.
- Chariot d'or, & autre d'argent. 472.
- Chariots à voiles menez par le champs en la Chine. 524.
- La Charité a grand pouuoir pour la conuersion des ames. 23.
- Charité merueilleuse d'un frere enuers l'autre. 144. du P. André d'Ouiedo. 211. 212. du P. Emmanuel Fernandez. 225. du P. François Lopez. 226. 227. de François Brochade. 135. 140. 141. 152.
- Chasse d'hommes. 327. de Cerfs prins par d'autres Cerfs. 436. de Lyôs. 481. 482. de Pantheres qui sont apprins à chasser comme les chiens. 445. d'ele premiers qui prennent les conils. 506. les façons de chasser du grãd Mogor. 435.
- Chaud estrange qu'il fait en la coste des Caffres. 114.
- Le trespas du P. Emmanuel de Chaues. 343.
- Chaul, ville. 477.
- Chayen, c'est en la Chine le grand Visiteur de la Prouince. 631. 666. 672.
- Chemins publics comment tenus en la Chine. 524. 652. les mesures d'iceux. 501.
- Chenilles tuées par l'eau beniste. 228.
- Cherloneffe d'or, l'Ophir dont la S. Escriture faict mention. 108.
- Cheual richement harnaché donné au grand Mogor. 472.
- Cheuaux de bois en Congo. 54.
- Cheuaux de riuere, autrement Hippopotames 4. ou cheuaux marins. 90.

Cheueux d'un arbre merueilleux. 5.
 Cheures fort secondes en Congo. 9.
 Chia herbe, & breuuege faict d'icelle,
 dont on se sert ordinairement en la
 Chine. 505. 529.
 Chianfi, Prouince de la Chine. 653. ville,
 & la grandeur. 653. 654.
 Chinché, port de mer en la Chine. 627.
 Vn Chien vendu deux cens vingt escus.
 76.
 Chijs, les Chinois. 503.
 Chine Royaume, appelé des naturels
 Toame ou Tame. 503. & Mangi de
 M. Paul Venetien. 563. c'est vn pais
 fort plantureux, & pourquoy. 504. il y
 a bon marché de viures. 506. personne
 n'y mendie. 614. l'air y est fort sain.
 512. les bornes. 499. la longueur &
 largeur. 501. 502. la muraille tres-re-
 nommée. 500. 524. 525. pourquoy
 elle a esté faicte. 563. 564. le grand
 nombre de villes & villages qu'il y a.
 511. cinq sortes de villes murées. 510.
 511. comment les villes y sont basties,
 & la disposition des rues. 521. 522.
 comment les portes des villes y sont
 gardées. 561. comment basties les
 maisons particulieres. 522. 523. le mi-
 lieu de la sale est le lieu plus honora-
 ble. 529. la noblesse qu'il y a. 541.
 556. les honneurs & dignitez ne s'y
 donnent qu'au plus sçauans. 566. com-
 ment les prisons y sont policées. 550.
 comment les procès ciuils s'y decidēt.
 551. qui les iuge. 546. 551. l'oyfueté
 en est bannie. 587. l'adultere & l'vsure
 y sont punis. 528. l'entrée du Royau-
 me est deffenduë aux estrangers par
 les loix. 568. mais quelques marchâds
 y entrēt sous tiltre d'Ambassadeurs.
 570. les larrons y sont condamnez à
 mort. 672. les voleurs & pyrates y
 sont frequens, & pourquoy. 564. 573.
 quels magistrats y commandent. 558.
 623. 630. 643. s'il y a des Vniuersitez.

553. il s'y trouue vn grand nombre de
 gens lettez. 558. tout le Royaume
 est gouuerné par eux. 567. il y a des
 liures imprimez en grande quantité.
 557. tous les artisans & laboureurs
 presque, sçauent lire & escrire. 559.
 les armes n'y sont permises qu'aux
 seuls gens de guerre. 561. on y faict
 des sacrifices aux trespassez. 515. les
 inuenteurs des arts y sont adorez. 575.
 On y adore aussi les diables peints
 d'estrange façon. 575. 577. en quelle
 estime y sont les Idoles & faux Dieux,
 & les ceremonies ridicules qu'il leur
 font. 578. si l'Apostre S. Thomas y a
 presché. 582. 583. quelles marques il y
 a du Christianisme, & s'il y a encore
 de Chrestiens. 583. 584. il y a 13. Pro-
 uinces, & deux Cours Royales, qui
 sont en tout 15. Prouinces. 150. Les
 loix y sont exactement obseruées.
 587. la police qu'il y a par qui dres-
 sée. 563.

Les naturels de la Chine, que les Indiens
 appellent Chijs, & nous Chinois, se-
 nomment eux mesmes Toangins ou
 Tangins. 503. ils sont aussi appelez
 Tabiencos. ibid. ce sont les Sines de
 Ptolomée. 502. leur disposition natu-
 relle. 525. leur habit. 526. leurs che-
 ueux & escoffiōs. 526. 527. leurs fem-
 mes & concubines. 533. quel de leurs
 enfans succede. ibid. vendent leurs en-
 fans & filles. 534. sont grand estat de
 l'honneur deu au pere & à la mere, &
 les mettent au rang des Dieux. 575.
 580. ce qu'ils font à la mort de leur
 pere & merc. 580. 581. leurs serui-
 teurs & esclaués. 534. la façon qu'ils
 gardent en s'entresaluant. 504. 529.
 leurs lettres. 519. 551. leurs liures. 557.
 leur estude. 588. ce qu'ils obseruent,
 s'entr'euoyât des presens. 531. en leurs
 visites. 529. 530. és banquets. 517.
 531. 532. comment ils ieusent. 588.

la façon de consulter les affaires d'importance qu'ils ont. 558. ce qu'il y a de bon en leur gouvernement. 565. bonne coustume pour empêcher que rien ne soit desrobé aux estrangers. 626. ils sont peu courageux en guerre, & la cause. 571. quels pays ils avoient conquestez, & pourquoy ils les ont quittez. 568. 569. leurs armes, & à qui permises. 561. 562. ils ont chassé les Iaponois du Royaume de Corai. 569. desfaict la flotte de Mello Portugais. 592. couppe broche aux guerres. tant civiles qu'estrangeres. 567. 568. ne se soucient que les pays, qui leur sont tributaires, les recognoissent. 569. se peuuent passer du trafic & commerce des estrangers. 509. leur an. 528. leurs Annales. 641. 642. leur monnoye. 507. 535. 636. leur industrie es eaux. 507. 512. en la pesche. 516. 517. à faire esclorre, & nourrir de la volaille. 517. 518. en l'imprimerie. 518. 519. en l'artillerie, & es autres arts mechaniques. 520. à entretenir bien les chemins. 524. 652. l'opinion qu'ils ont d'eux-mesmes. 572. font leur profit de toutes choses. 521. preferent l'argent à l'or, & pourquoy. 508. plusieurs d'iceux n'ont que leur barque, & ce qui est dedans. 513. ils ne font pas grand compte de certains affrons. 562. tous celebrent leur iour natal. 529. 532. sont pour la plupart Athées en effect, & idolatres en apparence. 574. fort adonnez au sort. 579. Ont recours aux deuins. 579. 580. l'opinion qu'ils ont de l'enfer, & du commencement du monde. 577. leurs Idoles. 575. le ciel & les astres sont adorez de plusieurs d'iceux. 575. 693. ont grand nombre de Bonzes, ou Prestres qu'ils mesprisent du tout. 562. 574. 578. leur cercueil & conuoy. 581. du lieu de leur sepulture. 582. ils taschent de prolonger leur vie par artifice. 533. ont un sommaire de six commandemens. 589. moyen qu'on estimoit propre pour leur conuersion. 609. empêcheimens de leur conuersion. 533. 585. conuersion de plusieurs d'iceux. 585. 650. 656. 658. perseuerance & constance des conuertis. 689.

Le Roy de la Chine est Seigneur absolu tant des biens, que de la vie, & de la mort de tous ses subiects. 565. sa puissance est bridée par les loix. ibid. ses armoiries. 563. la couleur de sa liurée. 539. ses femmes. 540. ses enfans, & quel d'iceux succede à la couronne. 540. 541. 560. ses alliez n'ont aucun prerogative. 541. son seruice est d'Eunuques. ibid. son conseil. 545. son ancienne habitation. 563. il l'a changée à Paquin, & la cause. 537. 680. son Palais. 538. 539. il est veu de peu de gés. 539. 543. comment les Ambassadeurs traictent avec luy. 538. 539. 543. 602. c'est le plus riche Prince du monde. 535. 536. le tribut qu'il exige. 511. 536. son reuenue. 536. 537. son esparagne. 550. l'obeyssance que ses subiects luy rendent. 585. celuy qui regne à present. Voyez Vanlie. Celuy qui a regné le premier. Voyez Vitey.

Quelques Roys de la Chine ont esté fort vertueux. 535.

Chingalas sont appelez les habitans de Ceylan, & pourquoy. 503.

Chiquion Prouince de la Chine. 651.

Chiquion ville. 654. sa description. 655. les PP. Roger & Almeida y sont sort caresséz, & y baptisent quelques personnes de marque. 656.

Chumpin, grand Admiral de toutes les armées navales de la Chine. 627. la forteresse, ou il demeure ordinairement. 627. 628. il void de bon œil les Iesuites. 628. 640.

le Ciel adoré de plusieurs Chinois. 575.

693. Quelle est sa partie droicte ou gauche. 362.
 Circuncion en vſage avec le baptisme parmy les Abyſſins. 171.
 Citadelle des Portugais au Mozâbique. 110. à Ormus. 365.
 Ciuette & quelle chose c'est. 9. 508.
 Claude Roy des Abyſſins, fils & ſucceſſeur de Dauid, quittant l'obeiſſance du S. ſiege de Rome, perd vne partie de son Royaume. 179. demande ſecours au Vice-roy de l'Inde contre le Roy de Zeilan. 180. ioint ſes forces avec celles des Portugais. 183. eſt remis en ſon eſtat, & la teſte du Roy de Zeilan luy eſt enuoyée. 184. rend graces à Dieu de ce benefice. *ibid.* le Roy de Portugal luy eſcrit. 195. ſa reſponce. 197. reſuſe de preſter obeiſſance au Pape. 199. eſt tué en bataille. 203.
 Les Clefs ſymbole de pouuoir abſolu. 190. qu'elles ſont celles du Royaume des cieux. 189.
 Cloches, es nauires Chinoiſes. 626. courges ſervant de cloches. 320.
 Clochettes portées à la ceinture, par les ſoldats Angolains. 77.
 Clochettes à la robe du Tutan en la Chine. 639.
 Coanza, riuiere. 5. ſa ſource. 6. diuiſe les terres du Roy de Congo, d'avec celles d'Angola. 81. ce qu'un Ieſuite a fait ſur la riuée d'icelle. 91.
 Coduren, eſpecé de monnoye en la Chine. 507.
 Cochinchine, Royaume. 568.
 Coëſſure des femmes Congianes. 19. 20.
 Edouard Coëſſo eſt deliuré d'un grand danger, avec pluſieurs autres, par l'ayde de noſtre Daine. 592.
 Cola, fruit tres-proſitable. 113.
 Trois Colleges de la Compagnie de Ieſus, fondez au Braſil par Sebaſtien Roy de Portugal. 307.
 Combat de Baleines. 6. de Chamcaux, Moutons, Coqs, Buſſies. 435. de Pourceaux. 474.
 Commandemens de Dieu grandement priez en la Chine. 645. les Chinois ont vn ſommaire de ſix commandemens. 589.
 Communion ſoubs les deux eſpeces chés les Abyſſins. 172.
 Complainte qu'un Petigare fit aux Ieſuites. 356.
 Conchiſu, quel magiſtrat en la Chine. 623. 630. 643. 660.
 Le Conchiſu de Canton reçoit humainement les Ieſuites. 631.
 Le Conchiſu de Xauquin fauoriſe les Ieſuites, & leur donne bon courage en leur perſecution. 662. 663.
 Concubinaire puny de Dieu ſort horriblement. 382. 383.
 Confefſeur recherché, à l'article de la mort, par ceux qui l'auoyent meſpriſé durant la ſanté. 400. mais en vain d'un d'iceux, qui meurt ſans confeſſion, par punition diuine. 401.
 Le Confefſeur ne doit eſtre reietté ny fuy. 390. 391. 392.
 Confeſſion ſacramentale faite à haute voix par ceux qui ſont en naufrage. 130.
 Confeſſion auriculaire, viſitée des Abyſſins. 172.
 Confeſſion empêchée du diable par l'honte. 393.
 Miracle de la Confeſſion. 401.
 Le Confus, docteur ancien, & ſort eſtimé des Chinois. 553. ſa vertu & doctrine. 557. les Mandarins luy font des ſacrifices annuels. *ibid.*
 Les Congians ſont Ethiopiens occidentaux. 169. leur teint & poil. 21. leur veſtement. 19. ancienne Religion. 16. 17. Police. 17. dançe, & muſique. 18. N'ot point d'eſcriture. 17. 18. remedes d'ot ils viuent cōtre les maladies. 18. aucuns d'iceux mangent la chair humaine. 103.

- Congo, Royaume & sa situation. 3. ses bornes. 6. est en la Guinée basse. 21. est diuisé en six Prouinces. 7. fut le premier descouuert des Portugais, & le premier qui reçeut la foy. 2. 10. rempart. 8. sa ville principale. 10. ce qu'y court au lieu de monnoye 11. temperature du païs. 15. grains qu'il porte. 12. l'Hyuer & Esté. 15. la façon de bastir les maisons. 14. les premiers Iesuites qui y ont esté enuoyés. 54. ce qu'ils y ont fait. 55. decadence de la Religion Chrestienne en iceluy, à faute de Prestres. 64. grands tumultes apres la mort du Roy Iaqués. 56. sont appeizez par Aluare I. 57.
- Congo, ville de la Prouince de Demba, jadis appelée Banza, ou le Roy de Congo faict sa demeure. 11. les Portugais l'appellent la ville de S. Sauueur. ibid. le Pere Vaz Iesuite faict bastir trois Eglises aux faux-bourgs d'icelle. 55.
- Le Roy de Congo est Seigneur propriétaire de tous les biens de ses subiects. 17. sa magnificence és repas, & en tout son train. 20. l'habit ancien. 19. l'habit nouveau. 20. sa mitre. 29. les thesors sont des coquilles de mer. 5. il enuoye des Ambassadeurs au Roy de Portugal avec des presens. 24. 25. les presens que le Roy de Portugal luy enuoye, & comment il les reçoit. 29. agenouille deuant la banniere de la Croix, & faict bastir vne Eglise sous le tiltre de Sainte Croix. 29. est baptizé avec la Royne sa femme. 30. allant en guerre contre les Mundequets rebelles, faict marcher la Croix deuant, & obtient la victoire. 31. est degousté des choses diuines. 33. les femmes sont cause de son malheur. 34. trois Roys de Congo tuez quasi en mesme temps. 56.
- Congregation de Lettrez en la Chine, vaquants à la contemplation & reformation d'eux mesmes. 589.
- Conils prins avec des espreuiers. 306.
- Conquestes des Chinois qu'ils ont quitées pour s'entretenir en paix. 568.
- 569.
- Conseil royal de la Chine. 545.
- Constantin, premier Roy Chrestien d'Innambané. 113.
- Contéplations des Iogues d'Ormuz. 423.
- d'aucuns Lettrez de la Chine. 589.
- Continence des Prestres Abyssins auant dire Messe. 172.
- Conuent de S. François à Macao. 618. de S. Dominique au Mozambic. 111.
- Conuerfions miraculeuses, ou autrement remarquables, d'un Hnguenot. 292.
- d'un Brasilien & d'une Brasiliéne. 325.
- de plusieurs Brasiliens. 329.
- d'un Ecclesiastique mal viuant. 384. 385.
- d'un vieux soldat. 385.
- d'un grand pecheur. 394.
- d'un iouéur & blasphemateur. 396.
- de quelques Sobas d'Angola condamnés à mort. 102. 103.
- d'un Alemand qui s'estoit faict Turc. 402.
- de la femme de l'Ambassadeur de Perse à Ormuz. 413. 414.
- d'autres personnes de marque. 698.
- conuersion admirable d'un pecheur, obtenué par oraïsons & pœnitences. 391. 392. Voyez Baptême.
- Conuoy des Chinois à l'enterrement de leur pere ou mere. 581.
- Copaïbas, plantes d'ou sort vne liqueur tres-souëue & vtile pour guarir les playes. 250.
- Coquilles de mer monnoye de Cogo. 5. s'amassent en l'Isle de Loanda. 8. 81.
- Coraï, Royaume. 500. jadis du domaine des Chinois. 569. ils en ont chassé les Iaponois, & l'ont apres quitté. ibid.
- Montaignes de Coraï blanc. 127.
- Coran. Voyez Alcoran.
- Cormorans, ou Corbeaux pescherets, seruans aux pescheurs de la Chine. 516.
- Cornets à succer le sang des malades. 18.
- Cornets d'yuoire des Angolains pour

animer les soldats au combat.	77.	Cuixone, ville.	655.
Coronans, peuples.	433.	Curia Muria, port.	232.
Antoine Correa Iesuite martyr.	295.	Curiaté, ville du Royaume d'Ormuz, de-	—
Louys Correa Iesuite martyr.	294.	struicte par les Portugais.	368.
Pierre Correa Gentil-homme Portugais	—	Cymbales des Angolains.	77.
entre en la Compagnie de Iesvs au	—	D.	—
Brazil. 272. 273. s'en va prescher la foy	—	Daman, ville.	441.
aux Canges qui le martyризent. 276.	—	Dambea, ville. 224. c'est la capitale	—
277.	—	de l'Empire du Preste-jan.	247.
Coffes de Catay.	495.	Dambi Angola, fils d'Angola Inéne, suc-	—
Pierre Couillan, Ambassadeur du Roy de	—	cesseur de son pere à la couronne, re-	—
Portugal, vers le Preste-jan. 173. com-	—	tient par force l'Ambassadeur de Por-	—
me il eist receu & retenu.	174.	tugal, & quelques Peres Iesuistes. 83.	—
François Aluaro Couillo Iesuite martyr.	—	meurt, & Quilonge luy succede.	84.
293. 294.	—	Damcali, Royaume.	247.
Courges seruant de Cloches.	320.	Danda, fleuve. 4. Bengo en est vne bran-	—
Coueuertures de liêt faictes de fucilles de	—	che.	5.
Palme.	13.	Dance des Congians. 18. de chameaux.	—
Crocodiles fort grands.	4.	435.	—
Croix veuë en l'air sur le pais d'Angola.	—	Danger euidet miraculeusemēt eschap-	—
94.	—	pe. 218. grands dangers & incommo-	—
Croix plantée au Brazil. 257. au sommet	—	ditez endurées par vn Iesuite.	335.
d'un monastere des logues.	425.	Darchini, mot Persique, & sa significa-	—
Croix de pierre trouuée en la Chine par	—	tion.	53.
les Portugais.	584.	Dauid, Roy des Abyssins, fils & succes-	—
Croix portées en processio par les Abyss-	—	seur de Nau. 175. les lettres & presens	—
ins.	172.	qu'il enuoye au Roy de Portugal. 176.	—
Croix plantées dans le Cotan d'Ormuz.	—	il recognoist le Pape pour chef de l'E-	—
418.	—	glise Vniuerselle. 178. sa mort, & suc-	—
Bois de la vraye Croix enuoyé par le	—	cession de son fils Claude.	179.
Preste-jan au Roy de Portugal. 176.	—	Day, ville.	247.
bois de la mesme Croix brulé par les	—	Decan, Royaume. 467. le grand Mogor	—
Huguenots.	290.	y enuoye son second fils pour le con-	—
L'estendart de la Croix faict gaigner des	—	quester. 465. il y est deslair avec son	—
victoires insignes. 31. 274. met en	—	armée.	477-478.
fuite les Sarrazins. 418. autre miracle	—	Degrez qu'on confere aux Lettrez de la	—
de la Croix.	101.	Chine, respondans aux nostres de Ba-	—
L'Eglise de Sainte Croix basilie en Con-	—	chelier, Licentié, & Docteur.	554.
go 29. est faicte cathedrale.	52.	Delec, ville.	245.
Crucifix mal traicté par les Huguenots.	—	Alexis Delgade Iesuite martyr.	294.
291.	—	Deli, cité de l'Industan.	434.
Crystal moins prisé que le fer. 10. mō-	—	Deluge vniuersel cogneu des Brasiliens.	—
tagnes de crystal.	7. 10.	252. & des Chinois.	534.
Curama, fleuve. 105. sa source.	106.	Denins fort consultez en la Chine.	579.
Cubazoa, lste.	67.	580.	—

Deuotion des foldats Portugais, caufe d'une belle victoire. 88. est excitée par le bon exemple, & destruite par le mauuais. 397.

Le Diable fait par tout du finge. 423. 579. les Diables emportent le corps d'un Apollat. 59. visions espouuentables d'iceux. 393. chassées par les parolles de l'Euangile. 395. sont adorez en la Chine en formes horribles. 575. 577. sont chassés d'une maison par les prieres de l'Eglise. 697.

Emmanuel Diaz Iesuite, fait naufrage allant aux Indes. 126. en eschappe avec un Pere, & ce qu'ils endurerēt. Voyez Pierre Martinez.

Le P. Jacques Diaz Iesuite enuoyé en Congo avec trois autres, & ce qu'ils y firent. 54. leur retour en Portugal. 55.

Jacques Diaz est enuoyé du Gouverneur des Indes au Roy d'Ethiopie, & à qu'elle fin. 196. court un grand danger de sa vie retournant à Goa. 199.

Paul Diaz Nouuain Ambassadeur du Roy de Portugal à celui d'Angola, est retenu prisonnier. 83. sa deliurance. 84. fait la guerre à l'Angolain, & conquiesse sur luy force pais. 85. va vers les montagnes de Cambambes, pour se saisir des mines d'argent qu'il y a. 87. est assiégué des Angolains, & receuant du secours les chasse. 88. prend possession des minieres. 93. son trespas, & ce qu'il ordonna en son testament. 100.

Le P. Pierre Diaz & sa nauigation vers le Brasil. 296. 297. est martyrizé par les Huguenots. 299.

Un Dieu Createur de l'vniuers creu de plusieurs Chinois. 576.

Dignitez Ecclesiastiques que les Iesuites refusent. 187.

Nicolas Diny Iesuite martyr. 295.

Dispute du P. Rodriguez avec le Prestre Jan. 197. du P. Barzé avec deux Rabbins. 405. du mesme avec un Philoso-

phe Persan. 408. 410. 411. du P. Aquauina avec les Docteurs du grand Mogor. 442. 443. 451.

Diu ville, & port de mer. 231.

Les gens Doctes font honorer à Ormuz. 366. on donne aux plus doctes les dignitez en la Chine. 566.

Docteurs de la Chine comment creés. 555. sont mis au rang des Loyrias, & aussi tost promoteus aux dignitez. 556. on plante des mayes deuant leur porte, & sur icelle un écriteau est mis. ibid.

Dofar ville, & port de mer. 232.

Les Religieux de S. Dominique enuoyez en Cogo, & ce qu'ils y ont fait. 25. 26. ils ont un Couuent au Mozambique. 111. & un autre à Sena en Monomotapa. 126. & à Ormuz, que les Iesuites leur ont laissé. 429. deux d'iceux font naufrage allant aux Indes. 126.

Drap fait de feuilles de palme. 13. 14.

Duel de deux chefs d'armée. 74. E.

E Au bonne à boire quand il y a pleine mer, mais salée & amere au descendant. 5.

L'usage de l'eau beniste ancien en la Chine. 646. les Iesuites en refusent aux Bonzes, qui leur en demandoient. 656. miracles d'icelle. 228. 323. 328. 329. 345.

De l'eau comme de matiere le monde a esté fait, selon les Chinois. 577.

Echebar ou Achebar Roy de Mogor, & son extraction. 429. est sixiesme nepueu de Tamberlan. 430. est fils & successeur d'Emmaupaxda Roy de Mogor. 431. conquiesse plusieurs autres pais. ibid. sa demeure, son vestement & ses qualitez. 434. ses exercices recreatifs, & sa chasse. 435. comment il donne audience. 436. sa clemence & iustice. 437. ses tiltres. 431. 440. on a veu en sa Cour vingt puissans Roys. 431. plusieurs autres luy sont tributaires. 432.

- comm'il reçoit les nouueaux tributaires. 471. quel langage on parle en sa Cour. 437. comment on le lalüé. 436. les bornes de son Empyre. 432. ses grandes richesses. ~~ibid.~~ sa puissance en guerre. 433. 450. mède venir à soy vn Prestre Chretien, qui estoit en ses terres. 438. est ~~en doute~~ de sa loy. 439. enuoye querir à Goa des Iesuistes, pour estre instruit en la foy de nostre Seigneur, & la lettre qu'il leur escriit. 440. on luy en enuoye trois, & comm'il les reçeut. 441. môltre auoir grande opinion des choses de nostre roy. 441. 442. 446. 447. pourquoy il ne l'embralte. 448. 453. donne congé à tous les subiects de la suyre. 449. se refroidit en l'affection qu'il portoit à nostre foy, & la cause. 450. se tasche de ce que les Iesuistes s'en veulent retourner. 452. retient le P. Aquauia encor trois ans. 454. fait ruynier les Alcorans de Mahomer, & cōuertir les mosquées en escuries. 458. enuoye pour la 2. fois querir des Iesuistes à Goa, avec des lettres & passeport. 459. 460. 461. trois Peres y vont, mais voyâs qu'il ne se resoult pas, s'en retournent. 462. demande pour la 3. fois des Iesuistes, & trois autres luy sōt enuoyez. 463. Pacueil & l'honneur qu'il leur fait. 470. 471. il est perplex & incertain en la religion. 474 476. permet aux Iesuistes de bastir vne Eglise à Lahor sa ville capitale. 475. Donne congé de prescher la foy à Cambaya. 476. adore & prie le Soleil. 474. 477. 485. se fait adorer comme vn Dieu, & veut forger vne nouuelle religion. 477. Dieu le punit. 478. se retire de Lahor (ou ses Palais furent cōsumez du feu du ciel) au Royaume de Caximir. 479. les Iesuistes sont transez à sa Cour, & il les fauorise. 486. Va faire la guerre au Roy de Decan qui luy auoit tué son 2. fils. 488. le P. Hierosme Xanier, l'ayant acompagné, luy parle de sa conuersion, & ce qu'il luy respond. 489. meurt en son infidelité. 493. Edifice merueilleux pour la sepulture parmy les barbares. 469. l'Eglise n'est qu'vne seule, & ne peut auoir plusieurs chefs. 190. le pouuoir qu'ont en icelle les successeurs de S. Pierre. ~~ibid.~~ quel benefice c'est d'estre en l'Eglise Catholique. 192. il le faut rapporter, és doubts & controuerses, au dire d'icelle. 194. Eglise premiere bastie en Congo. 29. 30. le Roy Aluare II. en fait bastir vne, luy mesme portant de la pierre sur ses espauls. 74. Eglise premiere bastie au Basil par les Iesuistes. 260. Eglises magnifiques és pais des Abyssins, & le respect qu'ils leur portent. 171. 172. Elnan ville d'Affrique ou deux Peres Iesuistes sont menez captifs. 234. Elana ville. Voyez Toro. Elephans en grand nombre en Congo. 8. en Monomotapa. 108. Elephans duiets au combat, comme ils sont armez, & ou on les met. 433. 434. d'autres appris à dācer. 435. vn se sert de sa trompe comme d'vn baston. 481. Elisabeth Royne, mere de Claude Roy des Abyssins, enuoye demāder secours pour son fils aux Portugais. 180. se rend au camp d'iceux. 181. Emmanuel Roy de Portugal enuoyé des gens d'Eglise, & force presens à celuy de Congo 42. outre d'autres presens plus riches, luy communique ses armoiries. 45. reçoit deuotement du bois de la sacrée croix, dont le Roy d'Ethiopie luy fit present. 176. luy enuoye vn Ambassadeur avec des lettres, & presens, & fait alliance avec luy. 177. 178. enuoye aux Indes vne flotte avec

- Pierre Alvarez Cabral, qui descouvre le Brasil. 256.
 Emmaupaxda Roy de Mogor perd le pays conquesté par son Pere Baburxa. 431. le recouvre avec l'ayde du Persan. ibid.
 Encofes sont les grands Seigneurs de Monomotapa. 123. 124.
 Enfancement miraculeux par l'ayde de la vierge Marie. 336.
 Enfans enserrez avant que sçavoir parler, pour voir quel langage ils parleroient. 485.
 Enfans mangez tous vifs. 326. vendus par leurs pere & mere, en Angola. 79. & en la Chine, à fort vil prix. 534. instruction des petits enfans fort vile, tant à eux qu'à leurs parens, & autres. 270. 380.
 Les enfans aînez des concubines, si la femme legitime n'en a point, succedét aux peres en la Chine, mesmes à la Couronne. 533. 540. 560. enfans du Roy de la Chine qui ne doiuent succeder comint traictez. 540. 541.
 Petit enfant innocent martyr. 487.
 L'opinion qu'ont les Chinois de l'Enfer, 577.
 Enfanda arbre merueilleux. 5.
 Enseigne seruant de Capitaine. 183.
 Equiuoque plaîsant. 552.
 Ermines en la Chine. 508.
 Matthieu Escandel Hongre fait des miracles en la Chine, & conuertit plusieurs à la foy. 585. y est martyrisé. ibid.
 Escossions des Chinois. 526.
 Escorce d'arbre seruant à faire d'accoustrements. 5.
 Escriture des Chinois. 552. 553. les Cōgiens n'ont point d'escriture. 17. 18.
 Quels liures de l'escriture sainte admettent les Mahometains. 447.
 Gregoire Escruain Iesuite martyr. 290. 294.
 Les cinq escussions des armoiries de Portugal que signifient. 46.
 L'esmail se fait en la Chine. 52.
 Les Espagnols des Philippines desirēt l'alliance avec le Roy de la Chine. 600. quelques vns d'iceux y vont, & à quelle occasion. 602. comment on les receut. 602. 603. 604. ce qu'ils y virent. 604. la resolution qu'ils eurent. 605. s'en retournent avec force presens. 606. 607.
 Bourg du S. Esprit en Loanda. 81.
 Ville du S. Esprit au Brasil, & sa situation. 345. les Iesuites y ont vne Residēce. 308. 344. miracles aduenus près de là. ibid.
 Esquis accommodé industrieusement par des naufragans. 132. merueilleux voyage d'un autre. 200.
 l'Esté de Congo. 15.
 l'Estude des Chinois. 588.
 Esuertoir porté quasi de tous en la Chine. 641.
 Deux Ethiopies, & deux sortes d'Ethiopiens Orientaux & Occidentaux. 169. ceux-là sont appelez Abyssins. Voyez Abyssins. Le Roy de Portugal Iean 3. pretend les reünir à l'Eglise, & à cet effect demande au Pape des Iesuites. 185. 186. plusieurs d'iceux y sont enuoyez, & ce qu'ils y firent & endurent pour la foy. 202. 203. &c. Roys d'Ethiopie. Voyez Prestre-jan.
 Ethiopiens noirs & la cause. 105. 106.
 l'Euesque de Congo est celuy de l'Isle S. Thomas. 51. ceux qui l'ont esté, & ce qu'ils y ont fait. 51. 52. 53. 57.
 Miracle de l'Eucharistie. 323.
 l'Eunuque de la Roynie de Candace premier Docteur des Abyssins en la foy. 171.
 d'Eunuques est tout le service domestique du Roy de la Chine, & comment on les choisit. 541. 542. leurs occupations & exercices. ibid. leur demeure.

539.
l'Europe est appellée des Chinois le
Royaume de Trincico, c'est à dire des
Cieux. 662.
Les Europeans sont appelez Rumes en
Orient, & pourquoy. 495. n'y voyent
que d'un œil, au dire des Chinois. 572.
Examen de ceux qui veulent estre gra-
duiez en la Chine. 554.
Examen de conscience recommandé es
liures des Chinois. 588.
Exploit de guerre fort signalé contre
les Turcs. 157. &c.
- F.
Faim estrange. 139. 140. plusieurs nau-
fragans meurent de faim, ou de mi-
sere, & entr'autres. 4. Iesuites, allant
aux Indes. 150. trois autres Peres Ie-
suites, ayant fait naufrage, meurent
de faim en vne isle deserte. 200. 201.
d'autres pour ne mourir de faim sont
contraincts de manger les rats, lezar-
des, & serpens. 314. 316.
Famine grâde au Royaume de Caximir.
480. en l'Isle des cheuaux. 61.
Faquen ville de la Chine. 652.
Farancaba homme de marque parmy les
Cariges. 337. 338. reçoit les Iesuites
fort humainement pleurant de ioye.
339. il leur baille vn sien nepueu pour
l'instruire en la foy. ibid.
Fatefur, ou Pateful cité. 434.
Felicité des Chinois en quoy gist. 533.
534.
Femmes sont les armes du Diable. 34. a-
cheptées par ceux qui les veulent es-
pouler en la Chine. 533. en Angola.
79. la pluralité de femmes est vn grad
empeschement pour la conuersiõ des
Indiells. 448. 453. 533. 586.
Les femmes Brasiliennes accouchées, se
leuent aussi tost du liêt, & les marys
prennent leur place. 254.
Les femmes de la Chine sont recluses
comme des Nonnains. 528. 540. leur
- habit. 527. ont les pieds fort petits &
la cause. 527. comme elles sont portées
par ville. 528.
Femmes qui gardent vne ville d'estre
prise. 333.
le Fer est plus prisé que le crystal, & que
l'yuoire en Congo. 10.
Fernambuco. Voyez Pernambuco.
Alonse Fernand Iesuite martyr. 304.
Iacques Fernad Iesuite, ietté dans la nier
par les Huguenots, se sauue. 303. 304.
Pierre Fernand, Nouice de la Com-
pagnie pris par les Huguenots, & tour-
menté d'iceux, montre vne grâde pa-
tience, modestie, & enuie d'endurer
pour N.S. 301. 302. est martyrisé. 303.
P. André Fernandez, & ce qu'il a enduré
à Inambané. 113. 114.
Le P. Antoine Fernandez, accompagne
l'Euesque de Hierapolis en Ethiopie.
223. est Superieur apres la mort des
autres Iesuites, qui estoient là. 224.
ses vertus & son trespas. ibid.
Le P. Emmanuel Fernâdez va en Ethio-
pie. 223. son zele & sa charité. 225. a le
don de Prophetie, & entre autres cho-
ses prédit quand il mourroit. ibid. est
visité de N. Dame auant sa mort. ibid.
Iean Fernandez de Braga Iesuite mar-
tyr. 294.
Fernandine ville. 597.
Ferueur notable de trois conuertis. 396.
Feste du nouuel an en la Chine. 528.
529. combien dure. 532.
Feste celebrée à l'honneur du Soleil, le
iour de Pâques par le grand Mogor,
& punition d'iceluy. 478.
Festin. Voyez banquet. Les grands Sei-
gneurs & Mandarins de la Chine,
quand ils sont vn bâquet à quelqu'un,
ne s'y trouuent pas d'ordinaire. 603.
606. sinon par grande faueur. 607.
Feu nouveau preuue de fidelité au Prin-
ce. 109.
Feu porté deuant le Roy des Imbies, &

- pourquoy. 164.
 Figues d'Inde. 110.
 Fleuve seiché par les prieres du Patriarche d'Ethiopie. 216.
 Pierre Fonsca, ou Fontaura Iesuite martyr. 289. 294.
 Le fouët comment est donné en la Chine. 547.
 La foy Chrestienne cause prosperité temporelle. 89. est meslangée de beaucoup d'erreurs parmy les Abyssins. 171.
 Les François auoyent vn fort au Brasil, mais ils l'ont quitué. 332. veulent surprendre la ville du fleuve Ianuier, mais ils n'y font rien. 332. François ou François sont appelez en. Orient tous les Latins, & pourquoy. 419.
 Riuiere de S. François au Brasil, pourquoy ainsi nommée. 258.
 Les Religieux de S. François sont allez les premiers au Brasil, pour y prescher la foy, & ce qui leur arriua. 258. il en y a encore en quelques contrées. 308. Quelques vns d'iceux entrēt en la Chine. Voyez Alfare.
 Frayeurs d'vn pecheur. 385. 386.
 Fulgēce Freire, Iesuite pris par les Turcs, & mis en galere. 206. ce qu'il y fit, & comm'il fust racheté. ibid.
 Fremona bourg d'Ethiopie deliuré des ennemis par les prieres du Patriarche. 213.
 Feuilles de palme, qui seruent à faire des accoustremens, & vne infinité d'autres choses. 13. 14.
 Funerailles de la fille d'vn Roy Mahometain. 234.
 Fureur diabolique d'vn phrenetique. 401.
 G.
 G. Alles en Ethiopie quelles gēs sont. 205.
 Christofte de Gamma Portugais est enuoyé au secours du Roy d'Ethiopie. 180. gaigne deux belles victoires. 181. est pris, fouetté, & bassoué. 182. est decapité par le Roy mesme de Zeilan, & sa teste enuoyée au Turc. 183. la mort vengée. 184.
 Ganabara riuiere du Brasil, appelée des François Geneure, & des Portugais lancire. 331. 332. les François en ont esté chaillez. 353.
 Gangas, forciers ou deuins d'Angola. 97. quelle opinion on a d'eux. 98. vn promet de donner de la pluie, & ayant inuoué les demons à cet effect, vn coup de tonnerre luy emporte la teste. 99.
 Ganges riuiere fameuse, & quels fleuves se rendent dans icelle. 432.
 Gasteaux ou souasses Chinoises. 532.
 Isle de S. George. 109.
 Le P. Abraham de Georgijs Iesuite est enuoyé en Ethiopie. 239. prend l'habit d'Armenien. 240. arriue au port de Mazua, ou il est recogneu, & s'adnouë pour Chrestien. 241. est massacré pour ne vouloir renier sa foy. 242. lumieres veuës au tour de son tombeau 40. iours durant, & trois grands oiseaux voltiger à l'entour. 243. songe qu'il eut presageant sa mort. ibid.
 Geos peuples barbares. 500. guerroyent les Chinois & les Laos. 501.
 Gerun. Voyez Ormuz.
 Giachas, peuples barbares, antropophages, & viuans de larcin. 11. 59. n'ont point de demeure certaine. 59. 60. rauagent le Royaume de Cōgō. 60. faccagent la ville royale. 61. sont chassés du Royaume par les Portugais. 63. les Amazones combattēt cōtre eux. 108. sont stipédiaires du Monemugen. 156.
 Le Roy de Giloa est confederé des Portugais. 109. permet au P. Sylueira de prescher la foy en ses terres. 115.
 Gio, titre d'honneur, & sa signification. 445.

- Antoine Glioua Espagnol, 4. Euesque de Congo. 65. Guinée haute & basse. 21.
 Gaipar Goés Iesuite martyr. 299. Iean Guttenberg inuenteur de l'Imprimerie en Europe. 519.
 Benoist Goés, ou de Gois Iesuite, enuoyé vers le grand Mogor. 464. & en Catay. 498. Guzarate. Voyés Cambaya. H.
 La Gomere Isle des Canaries, saccagée par les Huguenots. 297. **H**A, voix d'un animal appelé Paresse. 251.
 Sebastien Gomes Iesuite, baptisé plusieurs Cariges. 341. Haly, faux Prophete des Persans. 371. interprete la loy de Mahomet d'autre façon que les Turcs. 431.
 Le P. Gonfale Iesuite allant aux Indes fait naufrage, & meurt de faim en vne Isle deserte. 200. Hamed inastrife le Roy d'Ormuz. 371. est tué des Portugais. 372.
 André Gonzales Iesuite martyr. 295. Helene ayeule de Dauid Roy des Abyssins, gouuerne le Royaume pendant la minorité de son petit fils. 175. enuoye des Ambassadeurs au Roy de Portugal, pour faire alliance avec luy. ibid.
 Le P. André Gonzales allant aux Indes fait naufrage. 126 en eschappe, & ce qu'il endura depuis. 143. 145. &c. sa mort. 150. Gonzale Hériquez Iesuite martyr. 294.
 Gouea Capitaine Portugais enuoyé en Congo par le Roy de Portugal, pour secourir Aluare L. contre les Giachas. 62. 63. les chasse & remet le Roy en la possession de son Royaume. 64. Henry fils d'Alfonse I. Roy de Congo, enuoyé en Portugal par son pere. 43. est instruit en la foy & aux bones lettres. ibidem. est enuoyé à Rome avec l'Ambassadeur de son pere. 48. est créé Euesque de Congo, & meurt en y allant. 52.
 Le P. Christofle de Gouea Visiteur des Iesuites au Brasil, & ce qu'il fit pour empêcher la descente des Anglois au port de la Baye. 315. Henry frere de Jacques Roy de Congo luy succede à la couronne. 57. meurt en la guerre contre les Anzicains. ibid.
 Le P. Gouea est retenu prisonnier par le Roy d'Angola, & meurt de tristesse. 84. Antoine Hernádez Iesuite martyr. 293. 295.
 Gouvernement des Chinois en quoy louable. 565. les inconueniens qui en procedent. 570. Dominique Hernandez Iesuite martyr. 293. 294.
 Gradamar Capitaine Turc tué. 181. Histoires Chinoises. 534.
 Graduez de la Chine, leurs priuileges, & charges. 555. 556. Hommes fort puissans en Congo. 8. seruent en lieu de montures. ibid.
 Grauelle. Voyez vin de palme. Hommes-poissons. 6.
 Leon Grimon Sous-diacre Grec. 458. Les Horloges à roués fort admirez des Chinois. 665. 667. les Iesuites en donnent vn au Viceroy de Canton. 638. & vn autre au Roy qui se pleust fort à ce present. 699.
 Le P. Gualdanez vs en Ethiopie. 223. les vertus. 224. 225. est tué par les Turcs. ibid. l'Hospital logis ordinaire du P. Barzé. 377. 379. 406.
 Guardasu cap. 156. Huguenots sacrileges punis de Dieu Yyyy 2
 Guarifons miraculeuses. 92. 222. 325.

330. 331. conuersion miraculeuse d'un d'iceux. 292. tuent de sang froid plusieurs Iesuites. 293. 303.
- Huyle de Palme, & à quoy sert. 13. 18.
- Huyle de Iugioline ou sisame. 305.
- Hyaman. Voyez Ammonites.
- Hydromel, breuage des Abyssins. 170.
- Hyuer de Congo. 15.
- I.
- S. I. Jacques reclamé en guerre avec miracle. 39. 46. 97.
- Isle de S. Jacques 109.
- Jacques nepueu de Pierre Roy de Congo luy succede, ou selon d'autres à François. 52. tumultes excitez apres sa mort. 56.
- Jaguabara homme de marque entre les Brasiliens. 347. pretend mener à l'Eglise tous ceux de son village. 348. est empesché de ce faire par ses ennemis, & blessé d'iceux. ibid. meurt de maladie apres auoir esté baptisé. 349. sa femme apres la mort d'iceluy, se vient tenir à un bourg des Chrestiens avec toute sa famille. 350. reçoit le baptême deuotement, & peu apres meurt saintement. 351.
- Janeiro riuere. Voyez Ganabara.
- Janeiro, ville du fleuue Ianuier, & sa situation. 331. les Iesuites y ont un College, & ce qu'ils y ont fait. 307. 332. les femmes empeschent qu'elle ne soit prise des Huguenots. 333. providence diuine à la sauuer. 334.
- Kocheofu ville en la Chine, ou se font les porcellaines. 679.
- Kapatan passage fort d'angereux, ou s'assemblent dixhuit riuieres. 577.
- Isles du Japon, ont appartenu iadis aux Chinois, qui les ont depuis quittées. 568.
- Les Japonois pillent les costes de la Chine, & cent d'iceux mettent en fuite mille Chinois. 572.
- Jardins sur l'eau. 513.
- Idoles brullées en la Prouince de Sogno. 27.
- Idoles des Chinois. 575. en ont grand nombre. 671. qu'ell' estime ils en font. 578.
- S. Iean Baptiste obtient vne belle victoire aux Portugais. 88.
- S. Iean, ieune homme Iesuiste de volonte, est tué pour la foy avec 39. d'iceux. 294. 295.
- Iean I. Roy de Congo, & sa mort. 38.
- Iean II. Roy de Portugal. 21.
- Iean III. Roy de Portugal entouye des Iesuites en Angola. 83. & d'autres en Congo. 54. pretend reunir l'Ethiopie à l'Eglise. 185.
- I E S U S - C H R I S T inuoqué en bataille donne la victoire. 39. 45. est adoré en vne Prouince de la Chine. 585. & en Catay. 495.
- Les Iesuites changent d'habit quand il est besoing pour la gloire de Dieu. 575. 689. 690. refusent les grands presens des Roys. 111. 441. font l'office de Curiez, ou il n'en y a point. 316. 319. 332. endurent de grands traux & incommoditez pour le salut des ames. 309. 310. 314. 329. s'exposent à des grands dangers. 126. 200. 218. 229. sont persecutez. 486. 664. & 673. sont martyrisés. 123. 288. 289. 293. 300. &c.
- Ieusne des Abyssins. 172. des Cambayés. 467. des Chinois. 588. des Sarrazins. 241.
- Le B. P. Ignace de Loyola s'offre d'aller en Ethiopie. 187. ne luy estant permis il escrit vne belle lettre au Roy. 188. le grand Mogor desire que sa vie soit publiée en ses terres. 484.
- Les Ilhéas ville du Brasil. 259. sa situation. 324. les Iesuites y ont vne Residence, & y font grand fruit. ibid.
- les Images de nostre Seigneur, & de nostre Dame, & autres, honorées des Chrestiens du Catay. 496. & du grand

- Mogor. 442. 446. 447. 458. 472. 473.
 L'Image de nostre Dame adorée par le
 Roy de Monomotapa. 118. portée en
 guerre par les Portugais en Angola.
 100. monstrée aux soldats auant la ba-
 taille pour les animer. 161. garantie
 miraculeusement des mains des bar-
 bares. 92. 96. la 1. qui fust tirée sur cel-
 le qui a esté faicte par S. Luc. 279.
 L'Image de nostre Dame ancienne en la
 Chine. 584. 604. des Apostres. 584.
 604.
 L'Image de S. Antoine bafouée par les
 Huguenots, dont ils furent punis. 330.
 l'honneur que les Chrestiens luy fei-
 rent. 331.
 L'Imagination de boire, cause que six
 personnes fort alterées se noient. 138.
 Imbies peuples barbares. 160. sont an-
 tropophages, & vendent la chair hu-
 maine. 163. leur hanap est le test hu-
 main. *ibid.* leur camp comme rengé.
 164. leurs armes & leurs mœurs. 163.
 font la guerre aux Mombaziens. 162.
 tuent & deuorent le Roy de Mom-
 baza avec les principaux des siés. 166.
 Le Roy des Imbies honoré cōme Dieu.
 163. sa superbe & outrecuydance. *ibid.*
 fait porter le feu deuant soy. 164.
 Immortalité de l'ame crenē des Brasi-
 liens. 252.
 L'imprimerie fort ancienne en la Chine.
 518. l'inventeur d'icelle en Europe.
 519. façon d'imprimer de la Chine,
 moins industrieuse que la nostre. *ibid.*
 Inambané Royaume. 111. les Iesuites
 baptisent le Roy & toute sa famille.
 113. ce qu'ils y firent de plus, & en-
 diurent. 113. 114.
 Indostā est l'*India citerior*. 429. Baburza
 Roy de Chabul en conquēte vne
 partie sur les Parthes. 431. son petit
 fils Echebar en gaigne dauantage.
 Voyez Echebar.
 Indus riuere appellée Schind. 432.
 Ingratitude & desloyauté notable d'un
 Espagnol. 276. d'un des principaux of-
 ficiers du grand Mogor. 437.
 Inéné, c'est à dire grand surnom du Roy
 Angola, qu'il eut apres auoir subiugué
 les autres Sobas ses voisins. 76. les
 Portugais l'aydent. 82. s'est soubstrait
 de l'obeyssance du Roy de Congo,
 duquel il estoit subiect. 78. demande
 des Prestres Chrestiens & pourquoy.
 82. enuoye des Ambassadeurs au Roy
 de Portugal. *ibid.*
 Inhamior Royaume dont le Roy est vas-
 sal de celui de Monomotapa. 116. de-
 sire receuoir le baptesme, mais on le
 luy differe & pourquoy. *ibid.*
 Jogues d'Ormuz, & qu'elle vie ils me-
 noient. 422. quelles vertus ils prisoient
 plus. 422. 423. vacquoient à la con-
 templation des perfections diuines.
 423. auoyent quelque cognoissance
 de la S. Trinité. *ibid.* le P. Barzē les cō-
 uertit à la foy avec leur Prelat, qui e-
 stoit tenu pour un Sainct. 424. 425. le
 Prelat s'en va en Portugal, & meurt
 voulant aller à Rome. 426.
 Jogue de Cambaya fort superbe. 468.
 Joueur & blasphemateur conuert. 396.
 Jour natal celebré d'un chascun en la
 Chine. 529. 532.
 Isa, c'est à dire Iesus, & Marie adorez
 en la Chine. 585.
 Isaites ou Iesaites sont les Chrestiens
 au Catay. 495. Voyez Catay.
 Ismael Sophi Roy de Perse, & ce qu'il
 enuoya au Roy d'Ormuz. 371.
 Isondes. Voyez Sondes.
 Itacamara ville au Brasil. 259.
 Iuge Portugais en Congo. 18.
 Iuge des procès en la Chine. 546. 551. le
 Iuge-maje ou President s'appelle
 Conchifu. 630. 643. 660. comment
 ils donnent audience. 660. 612.
 Les Iuifs fort opiniastrés. 405. les vsures
 empeschent leur conuersion. 406.

Juncos espece de nauires Chinoises. 564.
Iustice comment administrée au Royaume de Mogor. 437.

L

L Ac en l'Ethiopie Occidentale qui a 100. lieues de long, source du Nil & du Zaïre, &c. 30.
Lahor Royaume. 434. Lahor ville capitale d'iceluy, ou reside le Roy de Mogor. 434. 460. 462. les Iesuites y ont vne Eglise & maison. 475. plusieurs y sont baptisez. 487. 490.
Lamo port de mer, ville & Royaume. 156. le Roy de Lamo. Voyez Panabaxira.
Lancitao, nom de dignité en la Chine. 643. quel rang tient celuy qui l'a. 645.
Langage ou ne se prononcent. F. L. R. 252.
Deux sortes de langage en la Chine, le populaire qui est diuers, & le Mandarin qui n'est qu'un, mais fort difficile, & pourquoy. 552. le Mandarin est entendu presque de tous, bien que plusieurs ne le sçachent parler. 587.
Langue Portugaise apprise du grand Mogor. 439. il l'a fait enseigner par les Iesuites à vn de ses enfans. 445. & à ceux des grands Seigneurs de sa Cour. 453.
Langoustes rauagent les chāps des Abyssins. 171.
Laos, peuples. 501.
Les larrons sont condamnez à mort à la Chine. 672.
L'Isle de S. Laurent, autrement Madagascar. 106. 127.
Léchias, prunes de la Chine tres-rares. 505.
Ledo cap. 6.
Lelunda riuere. 4. 12. est bordée de cedres. 19.
Lemba riuere. 4.
Lepreux guaris avec l'eau beniste. 328. 329.

Les Illes des Lequios quittées des Chinois. 568.
Lethargie qu'elle maladie c'est. 470.
Lettres de David Roy d'Ethiopie à Emmanuel du Roy de Portugal. 176. du B. P. Ignace de Loyola à Claude Roy d'Ethiopie. 188. du Roy de Mogor aux Iesuites de Goa. 440. 461. d'un Mandarin au Roy de la Chine. 560. du Conchifu de Xauquin à l'Aïtao de Canton. 663.
Lettres ou figures Chinoises. 519. 551.
Lettres de la Chine en grand nombre. 558.
un grand Lettré Chinois se resout à estre Chrestien. 644. presche la foy estant catechumene avec grande ferueur. 646. est baptisé solennellement. 650.
Liampo cap. 500.
Liberalité & pieté des Roys de Portugal. 25. 42. 43. 62. 185. 307.
Licondo arbre, & sa grosseur. 4.
Emmanuel de Lima, Gouverneur de la Citadelle d'Ormuz, & sa pieté. 379.
mene en Portugal le Prelat des Iogues conuert. 426.
Rodrigue de Lima Ambassadeur du Roy de Portugal vers le Prestre-jā. 177. 178.
Limahon, Corsaire fameux en la Chine. 545. va pour conquerir les Philippines sur les Espagnols. 596. donne l'asaut à la ville de Manille, mais est repoussé. 597. se fortifie sur la riuere du fleuve Pangasinan. 598. les Espagnols le vont assieger là. 598. 599. il s'enfuit, & se sauue. 608. meurt de tristesse. 609.
Lingots d'or, monnoye des Abyssins. 171.
Litanies de nostre Dame & des Saints, dictes avec un murailleux fruit. 132. 213.
La liure de la Chine, & de combien d'onces. 506.
Liurées des soldats Chinois. 626.
Liures faits d'escorce d'arbre. 320.
Liures imprimez en la Chine en grand

- nombre, & par qui. 557.
 Loanda Isle. 5. la fertilité & richesses. 81.
 les coquilles qui seruent de monnoye
 en Congo, s'y amassent. 81. les sardines
 y abondent. 81. les Iesuites y ont
 vne Residence, & ont conuertý tous
 les habitans à la foy. 81. 100. ils ont à
 leur Eglise vne Confrainie de N. Dame
 fort deuote. 100.
 Loangas peuples, jadis Bramas. 7.
 Locu principal Brachmane de Goa, con-
 uerty à la foy. 377. son baptême so-
 lennel. 378.
 P. Nicolas Lombard Iesuite, escrit de la
 Chine. 558.
 Le P. Alphonse Lopez Iesuite, meurt de
 faim en vne Isle deserte. 200.
 Aluare Lopez Ambassadeur du Roy de
 Portugal, vers celuy de Cogo 43. 44.
 Edoüard Lopez Portugais, est enuoyé
 par le Roy de Congo en Ambassade
 vers le Roy d'Espagne. 66. sa nauiga-
 tion lógue & perilleuse. 67. va prester
 l'obeyssance au Pape au nom du Roy
 de Congo. ibid. l'ýssüé de son Ambas-
 sade. 68.
 Le P. François Lopez Iesuite va en Ethio-
 pie. 223. est banny pour la foy, & en-
 dure beaucoup. 214. 215. son abstiné-
 ce, sa pauvreté, & charité enuers les
 pauvres. 226. 227. marques de sa sain-
 cteté. 227. 228. Dieu prolonge sa vie
 de deux ans, & pourquoy. 228. predit
 la venue de son successeur. 229. tref-
 passe le dernier de tous les compagnons
 du Patriarche. 226.
 Michel Lopez Legaspi, cõqueste les Phi-
 lippines au Roy d'Espagne. 598.
 Sebastien Lopez Iesuite, ietté dans la
 mer par les Haguenots, se sauue. 303.
 304.
 Simon Lopez Iesuite martyr. 295.
 Lorange, riuere. 149.
 Loytias sont cõme les Gentils-hommes
 de la Chine. 556. on monte à ceste di-
 gnité par les lettres. 512. & pour auoir
 fait quelque notable seruice au Roy.
 607.
 Montagnes de la Lune. 16. 104. la vie que
 mement ceux qui habitent au pied d'i-
 celles. 104.
 Nouvelle Lune & superstition qu'ont les
 Chinois en icelle. 607.
 Les Lunettes sont fort prisées en la Chi-
 ne 636.
 Les Isles de Luffon estoient jadis aux
 Chinois. 568. sont maintenant au Roy
 d'Espagne, & pourquoy appellées
 Philippines. 569. 596.
 Lucins chassez d'une maison par la bene-
 diction d'icelle. 697.
 Luyola, riuere. 86.
 Lyon de mer. 105.
 Lyonesse à qui on a tué ses petits fort fu-
 rieuse. 482.
 Lyons qui ne font point de dommage
 aux Catholiques qui leur estoient ex-
 potés pour la foy. 214.
 Chasse de Lyons. 481. 482.
 M.
 Maëao ville, que les Portugais ont
 bastý à vn port de la Chine.
 594. c'est le passage ordinaire des Por-
 tugais allans ou venans du Japon. 618.
 il y a vn Mandarin Chinois qui y gou-
 uerne au nom du Roy de la Chine.
 648. les Religieux de S. François y ont
 vn Conuent. 618. & les Iesuites vne
 maison. 619. trois d'iceux y sont en-
 uoyez, & ce qu'ils y ont fait. 620. les
 Portugais de Macao iurent obeyssan-
 ce au Roy Philippe 2. succedant à la
 Couronne de Portugal. 635.
 Henry Macedo Ambassadeur en Perse,
 & ce qu'il y feit. 419.
 Madagascar. Voyez S. Laurent Isle.
 Madere Isle. 283.
 Masuté riuere. 114. 109.
 Magadoxo port ville & Royaume 156.
 François Magallanes Iesuite martyr. 295.

- Magnice fleuve & sa source. 104. 106.
 Mahomet quels peuples infecta les pre-
 miers. 421. le Roy d'Ormuz fait des-
 fence de l'inuoker publiquement en
 ceste Isle. 418. la loy fort abbatuë au
 Royaume du grand Mogor. 474.
 Maisons ou loges des Brasiliens commet
 basties. 253. celles des Chinois. 527.
 523. & des Congians. 14.
 Le Maître de camp d'Aquitime pris, de-
 mande le baptême auant qu'estre exé-
 cuté à mort, & raconte vne vision
 merueilleuse. 40. la vie luy est donnée
 avec condition. 41.
 Maleinba Royaume. 76.
 Mammelus quelles gens sont au Brasil.
 317. inuentent vne secte damnable.
 320.
 Mandarins est les Magistrats de la Chi-
 ne, & en y a de deux sortes. 544. leurs
 marques. 548. leur habit. 549. leurs
 barques. 514. l'arroy avec lequel ils
 marchent. 549. leur grand pouuoir est
 cause de beaucoup de maux. 570. 572.
 573. ne peuuent prendre aucun pres-
 ent sans le congé du Roy. 604. les
 moindres sont souuëtz & chastiez
 par les plus grands. 548. sont fort re-
 doutez de la populace, & pourquoy.
 547. on leur porte grand respect. 548.
 Les Mandarins lettrez, en quoy differēt
 des Mandarins de guerre. 544. les prin-
 cipaux de tous sont 6. ou 8. ibid. le
 grand nombre des autres. 546. quels
 sont les principaux de chaque Pro-
 uince 546. n'exercent iamais cet estat
 en leur pays. 544. ne l'ont que pour 3.
 ans. ibid. y sont esleuez par les lettres.
 551.
 Les Mandarins de guerre ne sont pas tāt
 estimez que les autres, mais leur estat
 est perpetuel & successif. 544. ce ne
 sont que des Capitaines. ibid. tiennent
 garnison en diuers lieux. 562. commēt
 on leur donne cet estat lors qu'il yac-
 que. 562. ils commandent es flottes,
 & vont à la chasse des pyrates. 573.
 Mandiocas, racines. 253.
 Mangas de velludo, oiseaux. 195.
 Mant en Congian signifie Seigneur. 7.
 Manille ville des Philippines assaillie par
 Limahon. 595. secouruë inopinément,
 & deffenduë vaillamment. 597.
 Manudes espee de monnoye. 466.
 Maraigñō, riuiera des Amazones, & Orel-
 lana est la mesme. 249.
 Margageas peuple du Brasil confederé
 des Portugais. 333.
 Margarite Isle ou on pefche les perles.
 64.
 Mariages des Chinois. 533.
 La Vierge M A R I E adorée en vne Pro-
 uince de la Chine. 585. son image.
 Voyez Image. Apparitions d'icelle.
 118. 119. 226. 413. Miracles. 97. 101.
 336. 345. 483. 592. deuotion des Por-
 tugais d'Angola enuers icelle. 100. Pu-
 nition de Dieu sur vn Huguenot, qui
 se mocquoit de l'honneur qu'on luy
 faisoit, mais retirée par sa conuersion,
 & prie. 292.
 Martes Zebellines en la Chine. 508. 526.
 Jean de S. Martin Iesuite martyr. 295.
 Le P. Pierre Martinez Iesuite, fait nau-
 frage allāt aux Indes, avec autres cinq,
 desquels il estoit Superieur. 126. 143.
 cōment ils eschapperent de l'eau. 143.
 145. sont destrouffez & despoillez
 par les Caffres. 146. sont faits captifs,
 & endurent beaucoup. 147. 148. sont
 rachetez par vn Xequé. 149. quatre
 de ses compagnons meurent en che-
 min, & il reste seul en vie avec vn au-
 tre. 151. son voyage au Mozambique.
 152. 153. ce qu'il feit là, attendant le
 temps de nāuiger. 154. arriue en fin à
 Goa. ibid. fut fait dix ans apres Euef-
 que du Iapon. 127.
 Mascaté haure. 232. c'est l'asyle des gens
 perdus. 378.
 Mascā

- Mascaté ville prise & pillée par les Portugais. 368.
- Mafagan ville en Angola bastie par les Portugais. 86. les Iesuites y ont vne Residence. 100.
- Matanan Royaume. 6. 103. la situation & ses bornes. 104. y a force crystal. 76. ses Prouinces. 104.
- Instrumens de Mathematique fort excellens en la Chine. 563.
- S. Matthieu Apostre apresché la foy aux Abyssins. 171.
- Matthieu Ambassadeur du Roy d'Ethiopie vers celui de Portugal. 175. comment il fust receu à Goa. *ibid.* l'accueil que luy feit le Roy de Portugal. 176. son retour en Ethiopie. 177.
- S. Maurice inuoqué garantit vn enfant de la mort. 246. vne sienne relique fait miracles. 345. 346.
- Jean de Mayorga Iesuite martyr. 294.
- Mazes espee de monoye Chinoise. 536.
- Mazua Isle. 196. 225. la situation. 240. est tenué par les Turcs. 170.
- Melilec fils de Salomon, & de la Roynce de Saba. 170. de luy se disent extraicts les Roys des Abyssins. *ibid.*
- Melinde haure, ville, & Royaume. 155. le Roy est ancien amy & confederé des Portugais. 156. 160.
- Melique Roy de Decan. Voyez Decan.
- Edouard de Mello pour se sauuer du naufrage avec quelques autres, fait racoultre vne barque, dont il est Capitaine. 142. 143.
- Martin Alphonse de Mello mene vne flotte en la Chine, qui est desfaite par les Chinois. 592. il se sauue, mais plusieurs de ses compagnons furent pris, & iusticiez. 593.
- L'art de la memoire locale acquiert vn grand credit au P. Mathieu Ricci en la Chine. 686. 687.
- Aluare Médez Iesuite martyr. 290. 294.
- Alexis de Meneses Archeuesque de Goa, & ce qu'il feit pour l'Ethiopie. 244.
- Le P. F. Jean Gonzales de Mendoza, de l'ordre de S. Augustin est designé pour Ambassadeur du Roy d'Espagne à celui de la Chine, mais son Ambassade est empeschée. 609. c'est l'auteur du liure de l'histoire de la Chine. 609. 498.
- Miracles de la saincte Messe. 394. 395. reuelations de Dieu receues en icelle. 213. 285.
- Messe seiche chantée sur mer. 282.
- Mesures des chemins en la Chine. 501.
- Minguames Cazique Sarrafin aucteur de la mort du P. Sylueira. 120. euade la peine deuë à son forfait. 124.
- Minieres d'argent en Angola. 82.
- Miracles du nom de Iesvs. 39. 45. de nostre Dame. Voyez vierge Marie. De l'Eucharistie. 323. du S. Euangile. 395. de S. Jacques. 39. 46. 97. de S. Maurice. 246. 345. 346. de S. Antoine de Padoue. 330. du baptême. 323. 657. de la croix. 31. 101. de l'eau beniste. 228. 323. 328. 329. 345. des Litanies. 213. de la S. Messe. 294. 295.
- Miramoniens quelle sorte de gens. 344.
- Mirindes Prouinces d'Angola. 76.
- Mittre du Roy de Congo est de feuilles de palme. 29.
- Mocumba fort en Angola des Portugais. 87. 93. appellé du nom de S. Jean & pourquoy. 88.
- Modin ville en la Chine. 652.
- Mogores peuples de l'Industan. 429. 433. le Roy de Mogor. Voyez Echebar.
- Mombaza Isle, ville, & Royaume. 155. les Portugais pillent & ruinent la ville. 165. les Indies entrent dans l'Isle, & mangent le Roy avec d'autres. 166.
- Monajan forteresse du Roy d'Ormus en Perse prise. 399. les Portugais l'assiégent & sont repoussez. 400. est renduë. 401.
- Le Monde se gouerne par opinion. 5.

- Mondra ville rafée, & pourquoy. 168.
 Monemuge, Empire & fa fuation. 156.
 Monfia Ifle. 156.
 Monomotapa Royaume, & fes limites.
 107. abonde en or, & en elephans.
 108. le P. Gonzale Sylueira y eft en-
 uoyé. 114. 116. y eft martyrifé. 123.
 les Portugais y trafiquent fort. 107.
 Le Roy de Monomotapa eft fort puis-
 fant & riche. 108. les armoiries, & leur
 fignification. 109. defire l'alliance des
 Portugais. 112. reçoit fort humaine-
 ment le P. Sylueira Iefuite, & s'efton-
 ne de ce qu'il ne veut prendre des
 prefens. 117. adore l'image de noltre
 Dame, qui s'apparoift à luy en fonge,
 & luy parle, mais il ne la peut enten-
 dre. 118. 119. il eft baptifé avec fa me-
 re. 119. delibere de faire mourir le P.
 Sylueira. 121. le fait tuer. 123 il s'en
 repent, & chafte ceux qui le luy a-
 uoyent confeillé. 124. les Portugais
 luy font la guerre. 125.
 Monomotapa ville capitale dudit Royau-
 me. 117.
 Mofengesses riuere, ou fufbietté le corps
 du P. Sylueira. 123.
 Le P. Antoine Monferrat Iefuite, eft en-
 uoyé au Roy de Mogor. 440. enfeigne
 la langue Portugaife aux fils du Roy,
 & d'autres Princes. 453. s'en retourne
 à Goa. 454. eft enuoyé avec le P. Pier-
 re Paës en Echiopie. 237. font attaqués
 d'une groffe tempefte. 232. font faicés
 captifs des Turcs, & endurent beau-
 coup. 233. 234. font diuinement con-
 duits en une prifon, ou il y auoyent
 31. Chreftiens captifs, aufquels ils pro-
 fiterent beaucoup. 235. 236. penfent
 eftre affranchis, mais ils font referrez.
 236. 237. font mis à la cadene. 238.
 font en fin racheprez, & retournent à
 Goa. ibidi.
 Monstre de foldats quand se fait en la
 hine. 606..
- Montaigne fort haute en la Chine. 679.
 autre de difficile accez, au fommec de
 laquelle y a vne belle plaine, & vn lieu
 imprenable. 180.
 le Soldan Morad 2. fils du grand Mogor
 conduit vne armée contre le Roy de
 Decan. 465. eft vifité des Iefuites à
 Cambaya, aufquels il fait force caref-
 fes, & leur donne vne bonne aumofne.
 465. 466. enuoye à fon pere vn pre-
 fent fort riche. 472. eft tué en ceste
 guerre. 477. 478.
 Preparatiõ à la Mort des naufragas. 130.
 ce que les Brasieliens croyét des morts.
 253. cinq morts refuscitez par vn
 Hongre en la Chine. 585.
 Mosquées des Mahometains. 373. ils o-
 ftent leurs fouliers entrant en icelles.
 446. le Roy de Mogor les conuertit
 en efcueries. 458.
 Moynes de S. Antoine en Echiopie. 172.
 Mozâbique, iadis *Prasum promontorium*,
 maintenant Ifle. 109. les fruiets qu'elle
 porte. 110. les Portugais l'ont gagnée
 fur le Roy de Quiloa, & y ont vne ci-
 radelle. ibidi. leur feni beaucoup. 111.
 Mulas font appelez en Mogor les Mini-
 stres de Mahomet. 439. font confun-
 dus en difpute par les Iefuites. 442.
 443. 451. veulent tuer le P. Aquauina.
 455. 456. Voyez Caziques.
 Mundequiers peuples se reuolent contre
 le Roy de Congo. 30. font vaincus par
 le Roy, faifant marcher la croix deuât.
 31.
 Muraille tres-longue, & fort epaiffe en la
 Chine. 500. 524. 525. pourquoy faicte.
 563. 564.
 Musc de la Chine fort excellent, & com-
 ment il se faict. 508.
 Musique Angelique ouye miraculeufe-
 ment. 138.
 la Musique, selon le dire d'aucuns, a esté
 enfeignée aux hommes, par l'animal
 appellé Pareffe. 656.

Muffau, c'est Moyle, & Mussautes sont
les Iuits en Catay. 495.

N.

N Anchan cité de la Chine, capitale de
la Prouince de Chianfi. 678. est
des principales du Royaume. 676. les
Princes du sang, qui ne succèdent à la
couronne, y demeurent. 683. les Iesui-
stes y ont vne maison, & comment ils
s'y logerent. 683. 684. & c.

Nangôa monastere de Bonzes. 669. 670.
sa grandeur, & magnificence. 671. on y
veut loger les Iesuites, mais ils le re-
fusent. ibid.

Nanquin golfe, Prouince, & cité. 500. 510.
c'est la plus belle & grande ville de la
Chine apres Paquin. 677. 679. a les
mesmes preiogatiues que Paquin.
680. s'appelle Cour Royale. 506. e-
stoit iadis l'habitation des Roys. 563.
sa description & grandeur. 679. 680.
le P. Ricci Iesuite, s'y voulant arrester
en est empesché. 681. 682. y retourne
derchef, & s'y loge par miracle. 696.
697.

Nau Roy des Abyssins successeur d'Ale-
xandre, retiét par force l'Ambassadeur
de Portugal. 174. apres la mort David
son fils luy succede. 175.

Nauarrois propres & heureux à la con-
uersion des Infidelles. 264.

Naufrage d'un nauire, & circonstances,
qui le rendent effroyable. 127. 129.
les naufragans se preparent à la mort.
130. Quelques vns eschappent : mais
encourent de grands dangers & cala-
mitéz. 132. 133. 134. & c. plusieurs
meurent de faim, & de misere. 147.
148. 150. 151. Quelques vns arriuent
au Mozambique. 153. 154.

Necessité mere de l'industrie. 132.

Negis signifie Roy en langage des A-
byssins. 169.

Nil fleuve & sa source. 15. 16. 30. la cause
de son inondation. 15. est appelé bon

genie des anciens, & pourquoy. ibid.

P. Emmanuel Nobrega avec 5. autres Ie-
suites, desquels il estoit Supérieur, fu-
rent les premiers enuoyez au Brasil.
259. 260. ce qu'ils y firent & endure-
rent au commencement. 260. 261. 262.
le P. Nobrega conuainquit vn Sor-
cier, & le gaigna à la foy. 269.

Terre de Noel desirée pour les tempe-
stes. 105.

Nordin Gouverneur d'Ormuz fait mou-
rir le Roy, & subroge en sa place un
frere d'iceluy. 370.

Pierre Nugnes Iesuite martyr. 295.

Le P. Nugnes Barret est creé Patriarche
d'Ethiopie. 187. Arriue à Goa, mais on
ne trouue pas expedient qu'il alle en
Ethiopie, & pourquoy. 201. son humi-
lité. 204. son decez. 205.

O.

O Beyssance des Chinois à leur Prin-
ce. 585.

Obstination au peché punie de Dieu.
383. 384. 390. 391. 400.

Offrande ridicule que les Chinois font à
leurs Idoles. 578.

Ogegha arbre, & a quoy il sert. 14.

Omôcon Capitaine Chinois va aux Phi-
lippines. 600. mene à la Chine 4. Espa-
gnols Ambassadeurs du Gouverneur.
601.

Onzo riuiere & sa source. 4. 12.

L'Ophir de l'escriure quel país c'est. 107.
108.

L'Oraison a de merueilleux effects. 94.
213. 216. 221. 345. 391. 392.

Oratoire profané, & punition diuine du
profanateur. 101.

Orfazan ville saccagée. 368.

Ormuz Isle, autrement Gerun, & sa situa-
tion. 362. sterilité & seicheresse d'ice-
le. 363. chaud extreme qu'il y fait.
ibid. est fort subiecte aux terre-trem-
bles. 382.

Ormuz Royaume, & ce qu'il comprend. 362. 363. la puissance des Roys d'iceluy. 367. ils ont esté tributaires du Roy de Perse, & le sont à present des Portugais. 365. 367. voyez Albuquerque.

Ormuz ville capitale du Royaume, & sa situation. 362. 363. 364. d'ou elle préd son nom. ibid. la beauté d'icelle. 364. c'est l'estape du leuant. 364. &c. les mœurs des habitans. 366. les Portugais y ont vne citadelle. 365. il s'y trouue gens quasi de tout païs, & de toute Religion. 372. l'exercice d'icelle leur est permis. 373. les mœurs des Chrestiens y estoient fort corrompus. ibid. ce que le Pere Barzé y a fait. Voyez Barzé.

Orphelins & orphelines enuoyés de Portugal pour peupler le Brasil. 381.

Le P. André d'Ouiedo Iesuiste est fait Euesque de Hierapolis. 187. arriue à Goa. 201. est enuoyé en Ethiopie avec quelques autres Peres. 202. 223. tâche de reduire le Roy, mais en vain. 202. compose vn liure contre les erreurs des Abyssins. 203. est fait prisonnier avec les autres Peres, & puis deliuré non sans grand danger de la vie. 204. succede au Patriarchat, apres le trépas du P. Jean Nugnes. 205. est contraint par necessité de labourer la terre. 206. le Pape luy escrit qu'il allat au Japon, mais il ne peut sortir de là. 207. gaigne à la foy Catholique plusieurs Abyssins. 214. est persecuté pour ceste cause, & enuoyé en exil, ou il endure beaucoup. 215. vn fleuve est seiché par ses prieres. 216. le Roy le vouloit tuer l'espée luy tombe de la main. 217. est derechef enuoyé en exil. ibid. est deliuré miraculeusement des mains des Turcs. 218. vn soldat qui luy auoit rauy sa mule, estant puny de Dieu, la luy restitue. 219. meurt saintement

en Ethiopie. 209. 221. ses vertus. 209. 210. 211. &c. informations faictes de sa vie & de ses gestes. 210. les miracles. 213. & és autres pages luyuantes iusques à 223. est tenu pour Saint. 211. 220. 221. les Abyssins iurent sur son tombeau, luy font des offrandes, & le recommandent à ses prieres. 221. apparoit à vn Abyssin que les Turcs vouloient empaler, & le deliure de leurs mains. 222. 223. la poussiere de son tombeau fait force guerisons miraculeuses. 222.

P.

EMmanuel Pacheco Iesuiste martyr. 295.

Le P. Pierre Paës est enuoyé en Ethiopie. Voyez Monserrat.

Pain des Brasiliens de quoy fait. 253.

André Païs Iesuiste martyr. 304.

Paître en Chinois, c'est le cartel de visite, des presens, & d'inuitemens. 530. 531.

Palais du Roy de la Chine. 538. sa description. 539. partie d'iceluy est bruslée. 693.

Palais du grand Mogor bruslé. 478.

Palmes de diuerses sortes en Congo. 13.

les fueilles d'aucunes seruét à faire des accoustremens, & beaucoup d'autres choses. 13. 14. 19. 29. on tire d'aucunes l'huile, le beurre, & le vin. 13. commet on en tire le vin. 80.

Panabaxira Roy de Lamio trahit vn Gouverneur Portugais. & le liure aux Turcs. 157. est pris prisonnier par les Portugais, & mis à la cadene. 167. est condamné à perdre la teste, & executé. ibid.

Pangaya, sorte de vaisseau. 151.

Pangasinan, riuiera. 598.

Pango, ville & Prouince de Congo. 11.

Panga ville, rempar de Congo. 7. 8. 10.

Pantheres duietes à la chasse. 435.

Le P. Jacques Pantoja va à Paquin, & ce qu'il y fait. 698. 699. a escrit vne lettre

- des choses de la Chine. 499.
- N. S. Pere le Pape a plein pouuoir sur toute l'Eglise. 190. Alphonse I. Roy de Congo luy enuoye vne Ambassade pour luy prestre obeysance. 48. 49. autre d'Aluare I. 67. 68. autre de Dauid Roy des Abyssins, & comme elle fut receüe. 179. son fils, & successeur Claude, quittât l'obeyssance du Pape, perd vne partie de son Royaume, & est tué en guerre. 179. 203.
- Paquin ville capitale de la Chine, ou le Roy se tient. 499. 506. 510. sa grandeur. 537. pourquoy le Roy s'y est changé. 680. les Iesuites y vont, & y sont bien venus du Roy. 598. 599.
- Paradis de Mahomet brutal. 411. 443.
- Paralitique guary miraculeusement. 345.
- Paraguay riuere, sa largeur & son desbordement. 249. c'est la riuere de la plata, ou vn bras d'icelle. 475.
- Parayba Prouince du Brasil. 308. sa situation. 352. les habitans estoient jadis confederes des François. 353. les Portugais les subiuguent. 354. grand nombre d'iceux conuertis à la foy par les Iesuites. 355.
- Paratininga ville des Portugais au Brasil, & sa situation. 342. les Iesuites y ont vne Residence. ibid. est assiegée des barbares, mais est deliurée. 343.
- Paresse animal, & ses proprietes. 251.
- Les Parthes sont appellés Patanes en l'Inde. 430. 431. les guerres qu'ils ont eu contre les successeurs de Tamberlan. ibid. sont chassés de l'Indostan, & confinez aux Isles de Bengala par le Roy de Mogor. 431. se reuolent contre luy. 450.
- Le P. Paschal Iesuite meurt de faim en vne Isle deserte. 200.
- Paré port, ville & Royaume. 156.
- S. Paul ville de Loanda, ou les Portugais resident & les Iesuites. 81.
- François Paul Iesuite martyr. 299.
- Paureté & chasteté, vertus fort prisées des Iogues d'Ormuz, & pourquoy. 422. 423.
- Alphonse Payua enuoyé ez Indes par le Roy de Portugal. 173. sa mort. 174.
- Pelerinage de la Meque defendu aux femmes non mariées, & que font celles, qui ne le sont pas, pour y aller. 469.
- Pellicans de Pemba. 9. à quoy seruent leurs peaux. 10.
- Pemba Prouince de Congo, & sa situation. 11. 12.
- Pemba Isle. 156.
- Le Roy de Penda chassé de son Royaume. 160. y est remis par les Portugais. 165.
- Penitences & l'efficace d'icelles, pour im-
petrer de Dieu ce qu'on veut. 379.
380. 401. 416.
- François Perez Iesuite martyr. 295.
- Jacques Perez Iesuite martyr. 295.
- Thomas Perez Ambassadeur du Roy de Portugal à celui de la Chine. 590. est tenu pour espion, & meurt en prison de misere. 592.
- Perles peschées prez l'Isle Margarite. 67. au golfe d'Aynan. 508. les plus fines prez l'Isle Baharen. 402.
- Pernambuco ville du Brasil, & sa situation. 351. est de grand trafic. 352. les Iesuites y ont vn College. 307. ce qu'ils y font. 351. 352.
- Pesche vtile & plaisante avec des cour-
beaux qu'on fait en la Chine. 516. 517.
- Perigares peuples du Brasil. 355. desirant estre Chrestiens. 356. sont fort enclins à la pieté. 357. baptesme solennel de 64. d'iceux. 358. complainte de quelques vns d'iceux aux Iesuites. 356. 358.
- Petina herbe ou Petun, & la force d'icelle. 320.
- Philippe 2. Roy d'Espagne l'estant de Portugal, enuoye vne Amba-
le au Roy de Cogo. 65. pretend en enuoyer

T A B L E.

- vn'autre à celuy de la Chine, ce qui est
empesché. 609. Ambassade que luy
enuoya Aluare I. Roy de Congo. 66.
67.
- Philippines Isles. Voyez Lufon.
- Pierre fils d'Alfonse I. Roy de Cogo luy
succede. 50. son decez. 52.
- Pierre philosopale. Voyez Alchimie.
- Pierres enclaisées au visage des Bra-
siliens. 257.
- Le Pere Emmanuel Pignero Iesuite en-
uoyé vers le grand Mogor. 464. bastit
à Lahor vne Eglise & maison. 479.
482. y baptise 38. personnes. 490.
- Piraguaçu Brasilien homme de marque,
desfait les Apiapetangas, qui le vou-
loient empeschier d'aller à vn bourg de
Chrestiens, pour s'en rendre. 349.
- Pleurs signes de resiouissance entre les
Brasiliens. 339.
- Porcellaines 508. villes ou on les fait.
654. 679.
- Port assuré par qui, & comment ainsi
appellé. 257. 328. c'est vne ville des
Portugais au Brasil. 327. sa situation.
328. les Iesuites y ont vne Residence.
ibid. dangers & trauaux qu'ils y endu-
rent. 329.
- Portes des villes comment gardées en
la Chine. 561.
- Les Portugais reclamēt S. Iacques és ba-
tailles. 97. petit nombre d'iceux a des-
fait de grosses armées. 93. 96. exploite
de guerre fort signalé qu'ils ont fait
cōtre les Turcs. 157. 165. ce qu'ils ont
fait en Congo, Angola, à la Chine.
Voyez en ces mots. 566.
- Postes de la Chine. 566.
- Poules qui ont la chair & les os noirs.
110.
- Effect admirable de la predestination.
162.
- Presages de malheur. 127. de bon-heur.
142.
- Preste-jan est appellé en Europe le Roy
d'Ethiopie, & la cause. 169. 170. ses
subiects l'appellent Acegue, ou Negus,
ou Bel-Giau. Voyez ces mots. Bornes
de son Empire. 170. il descend du Roy
Salomon, à son dire. 171. 172. ses til-
tres. 188. sa demeure ordinaire est ez
tentes ou pavillons, qui sont rangez en
forme de ville, & tousiours de mesme.
171. fait alliance avec le Roy de Por-
tugal. 177. 178.
- Les Prestres de Catay ne se mariēt point.
496. les Abyssins gardent continence
quelques iours auant que dire Messe.
172. ceux de la Chine. Voyez Bonzes.
- Prisons de la Chine bien policées. 550.
- Procès bien tost vuidez en Congo. 17.
les ciuils comment decidez en la Chi-
ne. 551.
- Processions pour auoir de la pluye, &
l'effect. 345. 346. pour obtenir quel-
que chose de Dieu avec efficace. 401.
416.
- Prodiges veus en l'air. 94. 161.
- Effects de la diuine Prouidence. 9. 134.
135. 136. 142. 143. 151.
- Q
- Valimane fleuee. 109. 114.
- Quarâte, nombre mystereux. 294.
- Queeles & inimitiés assoupies. 388. 389.
- Quianganfu ville de la Chine. 677. le P.
Ricci y reçoit de belles patentes. 678.
- Quiloa Isle, ville & Royaume, jadis Ra-
pi. 155. mœurs des habitans. ibid.
- Quilonge Roy d'Angola, petit fils & suc-
cesseur à la couronne de Dambi. 84.
ayant contracté alliance avec les Por-
tugais, en fait tuer plusieurs par grande
meschancerie. 85. les autres luy font la
guerre, & conquestent sur luy force
païs. ibid.
- Quinsai, quelle ville c'est. 537.
- Quifunge, riuere. 151.
- R.
- Deux Rabbins conuaincus en dispu-
te par le P. Barzé, & pourquoy ils

ne se conuertissent. 405.
 Racine de la Chine. 506.
 Ramadan ieusne des Sarrafins. 241.
 Raris montagne du Brasil. 316. les habitants veulent se rendre Chrestiens, & les Iesuites y vont. 316. 317. 318. en conuertissent plusieurs. 319.
 Rebat Royaume. 479. 497.
 La Religion ne doit estre mise en rîque pour conseruer l'estat, autrement on pert bien souuēt & l'un & l'autre. 419.
 Reliques des Saints indignement traitées par les Huguenots. 305. d'autres miraculeusement garanties de leurs mains. 329. celles de S. George fort profitables aux Ilheans. 328. Miracles de celles de S. Maurice. 345. 346. la teste d'un Martyr reçeuë à Ormuz avec grand honneur. 404.
 Remords de consciēce guaris par la confession. 385. 386.
 Renoncement genereux des biens de ce monde. 396.
 Restitutions notables. 387. 388.
 Resolution courageuse de certains marchands à restituer. 388.
 Rets ou reposent les Brasiliens. 253.
 Reuenue du Roy de la Chine. 536. 537.
 Le Rheubarbe vient de la Chine. 560.
 Blaise Ribere Iesuite martyr. 289.
 Le P. Mathieu Ricci Iesuite entre en la Chine. 639. demeure à la ville de Xauquin quelque temps. 651. en est chassé avec quelques autres Iesuites. 668. s'en va à la ville de Xauchéo, & y bastit vne maison. 670. 671. pretend aller à Paquin en compagnie du Xeyé. 675. il cuyde se noyer par deux fois. 677 son voyage de Paquin estant empêché, il s'en va à Nanquin. 678. tâche de s'y arrester. 681. il en est mis hors, & s'en va à Nanchan. 682. y prend cognoissance avec vn Medecin, qui le met en credit. 683. 684. on fait informations de luy. ibid. est visité des Gou-

uerneurs, & caressé du Tutan, qui luy donne cōgé de s'y arrester. 685. 686. il y gaigne vn grand credit avec l'art de la memoire locale. 686. 687. vn Prince du sang veut estre son disciple, mais il ne l'accepte pas, & pourquoy. 688. fait imprimer vn Catechisme en Chinois. 691. conuertit & baptise vn Lettré. ibid. va à Paquin, & n'y ayant rien fait s'en retourne à Nanquin. 695. y achete vne maison molestée des Lutins, & obtient congé de s'y arrester. 696. 697. va derechef à Paquin avec autres deux Iesuites, & ce qu'ils y ont fait. 698. y sont naturalisez par Edict du Roy. 699.
 Riuieres de l'Indostan. 432.
 Emmanuel Rodriguez Iesuite martyr. 294.
 Le P. Gonzale Rodriguez est enuoyé en Ethiopie. 196. dispute avec le Roy pour le réunir à l'Eglise. 197. compose vn liure contre les erreurs des Abyssins. 198. l'Abuna ne veut point confesser à luy, & pourquoy. ibid. s'en retourne à Goa, & court vn grand hazard. 199.
 Le P. Michel Roger Iesuite est enuoyé à la Chine. 619. le premier de tous obtient congé d'auoir vn logis à Canton. 621. est fort fauorisé du Gouverneur. 622. 623. gaigne la bonne grace du Viceroy par vne humble responce, & obtient de luy de grands priuileges. 633. 634. le Vice-roy le mande venir à Xauquin. 636. le Pere va le trouuer, & luy fait present d'un horloge à rouës. 638. obtient congé d'auoir vne maison à Xauquin, & est déclaré marchand & habitant de la Chine. 639. est visité du Tutan, & des autres Mandarins de la ville. 640. est renuoyé de Xauquin, & pourquoy. 641. y est rappellé. 642. compose vn Catechisme en Chinois, & le fait imprimer. 645.

son voyage de Chiquion. 651. 652.
&c. ce qu'il y feit. 656. son retour à
Xauquin. 657. s'en vient en Europe,
& pourquoy. 657. 658.

S.

Sacrifices faictz aux trespassez en la
Chine. 515.

La Saincteté ne se doit mesurer à l'aune
de l'austerité exterieure. 423. 424.

Salés tres-riches, qu'on dict estre au pa-
lais du Roy de la Chine. 538. sont fa-
bles. 539.

Montagnes de Salpêtre. 711.

Jean de Salsedo secourt à propos la ville
de Manille. 597. est créé maistre de
Camp, & enuoyé contre Limahon.
598. faict brulser ses nauires & l'assie-
ge. 599.

Comment s'entre-saluent les Chinois.
504. comment on saluë le Roy de
Mogor. 436. comment les principaux
Maudarins de la Chine. 628. 667.

Sanchan Isle ou mourut le B. P. Xauier.
594.

Le P. Alphonse Sanchez Iesuite, va des
Philippines à la Chine. 623. ce qui luy
arrina avec le Supi. 625. & avec le
Chumpin. 628. 629. Rencontre le P.
Roger à Canton. 631. obrient congé
des Mandarins, bien qu'avec peine,
d'aller à Macao. 634. l'affaire qui l'y
porta comment expédié. 634. 635. son
secôd voyage à la Chine, & l'occasion
d'iceluy. 647. s'en retourne en Europe.
658.

Hernand Sanchez Iesuite martyr. 295.

Jean Sanchez eschappe seul de 40. Ie-
suites, qui alloient au Brasil, tous les
autres estant martyriséz. 293.

Le P. Edoüard de Sandé entre en la Chi-
ne, & va à Xauquin. 651. meurt à Xau-
chéo. 675.

S. Sauueur ville en Congo. Voyez Banza.
autre au Brasil. Voyez Baye.

Schind. Voyez Indus.

Sciéco, fils aîné & successeur d'Echebar
Roy de Mogor. 435.

Sebastien Roy de Portugal enuoye se-
cours au Roy de Congo contre les
Giachas. 62. 63. fait rechercher les mi-
nes de Congo. 64. enuoye vne armée
contre le Roy de Monomotapa. 125.
a fondé trois Colleges de la Compa-
gnie au Brasil. 307.

Seète diabolique introduite parmy les
Brasiliens. 319. 320. les fables qu'ils
croyoient, & les meschancetez qu'ils
cointettoient. 321. plusieurs sont re-
duits par les Iesuites. 322.

Fleuve du sel en la Chine. 630.

Sena ville ou gros bourg en Monomota-
pa. 115. les Portugais y ont vne forte-
resse & vn magazin. 141.

Senga ou Sunga riuere. 6.

Sentinelle ez flottes Chinoises comme se
fait. 626.

Seraf espede de monnoye. 369.

Serpens d'enorme grandeur, dont la chair
est bonne à manger, & leur ruse pour
prendre la proye. 9.

Serpent fort venimeux, qui a sur la queue
comme vne sonnette, & à quoy elle
sert. 9.

Sine sont les Chinois, & le nom de leur
ville capitale jadis. 502. 503.

Sinsay marchand Chinois mene Omoni-
con à Manille. 600. & deux Augustins
en la Chine. 601. les reconduit aux phi-
lippines. 607. 608.

Sistor ou Meçon grand fleuve. 501.

Sobas sont les Seigneurs de vassaux en
Angola. 76. les iniustices qu'ils comiet-
tent contre leurs subiects. 80.

Le Soba de Bazan se rend Chrestien, &
est baptisé. 89. 90. & quelques autres
Sobas. Voyez baptême & conuersiôs.

Socotora Isle. 368.

Soffala país riche en or, yuoire, & ambre-
gris. 109. si c'est Ophir. ibid. les Portu-
gais y ont vne forteresse. 107.

Sogno

Sogno Prouince de Congo, & sa situation. 10. le Gouverneur d'icelle est conuertý à la foy, & baptisé. 26. fait brusler les Idoles. 27. entend la Messe avec grande reuerence. 27. 28.

Soleil adoré, & prié par le grand Mogor. 474. 477. le mesme celebre sa feste, & en est puny de Dieu. 478.

Montaignes du Soleil, pourquoy ainsi nommées. 7.

Sonde ou Sunde, Prouince de Congo, & sa situation. 10. l'aîné du Roy en est d'ordinaire le Gouverneur. ibid.

Sondes ou Ifondes habitants de Sonde, auxquels Alphonse fils de Iean I. Roy de Congo presche la foy. 31.

Songes presagiés les choses à venir. 220. 243.

Sorciers d'Angola. Voyez Gangas. Vn d'iceux qui se disoit Dieu de la pluye, exposé à icelle avec risée. 89.

Jacques Sore, Caluiniste François, & Corsaire fameux, prend & butine deux Caragues de Venise. 297. prend le nauire S. Jacques, & fait meurtir 40. Iesuites. 292. sa fin miserable. 291.

Sort des Chinois, & façon ridicule de le ietter. 597.

Iean Sosa Iesuite est enuoyé aux Cariges. 276. est martyrisé d'iceux. 277.

Le P. Diego Soueral Iesuite enuoyé en Cogo, y instruit force ieunesse. 54. 55.

Emmanuel Sousa Coutigne, Viceroy des Indes. 157. enuoye son frere contre les Turcs, qui fait vn bel exploit de guerre. 158.

Thomas Sousa premier Gouverneur du Brasil pour le Roy de Portugal. 259. y mene les premiers Iesuites, & ce qui y fut fait de sçs téps. 260. 261. &c.

Soyes de la Chine. 509.

Stratageme de guerre fort plaisant. 333.

Antoine Suarez Iesuite martyr. 295.

Lopes Suarez Gouverneur des Indes, enuoye vne flotte & vn Ambassadeur

du Roy de Portugal, pour faire alliance avec celui de la Chine. 590.

Sucres, & comment il se fait. 250. il en y a grande abondance au Brasil. 258. à la Chine. 506. ez Isles de Monfia, Pemba, & Zanzibar. 156. & en celle de S. Thomas jadis. 50.

Sundo. Voyez Sondo.

Supi s'appelle l'Admiral d'une flotte Chinoise. 625.

Superbe d'un Ganga punie de Dieu. 99. d'un logue, des hommes. 468.

Surraté, haure. 441.

Melchior de Sylua Prestre seculier, est enuoyé en Ethiopie, & pourquoy. 210.

245. corrige les abus qui s'estoient glissez parmy les Catholiques. 246.

Le P. Gonzale Sylueira Iesuite, fils du Conte de Sortella, est enuoyé au Mozambic. 112. conuertit à la foy, & baptize le Roy de Inambané, avec toute sa famille. 113. allant à Monomotapa appaise vne grande tempeste par ses prieres. 114. visite le Roy de Giloa, qui luy permet de prescher en ses terres. 115. va à Sena, & le profite qu'il y fait. 116. son arriuée à Monomotapa, & l'accueil que le Roy luy fait. 117. baptize le Roy, sa mere, & 300. Gentilshommes. 119. fait distribuer aux pauures 100. bœufs, que le Roy luy donna, & se nourrit fort pauurement. ibid. les Sarrazins persuadent au Roy de le faire mourir. 120. il sçait cela par inspiration diuine, & se prepare à la mort. 121. 122. les esclancemens de son ame. 123. comme il est estranglé, & son corps ietté en la riuiere. ibid.

T.

Tables ou mangent les Chinois. 503. Taicosama Roy du Japon, & sa superbe punie de Dieu. 693.

Taiso fils d'un des principaux Mandarins de la Chine, & disciple du P. Ricci, public par tout ses louanges. 690.

- Tamerlan ou Tamberlan Roy des Tartares. 429. prend Bajazet Empereur des Turcs, & ce qu'il luy feit. 430. ses successeurs, & leurs auantures. *ibid.* le grand Mogor vient de sa race. 429.
- Tamou, Isle. 590.
- Tanquen, ville de la Chine. 630.
- Tanfuse, ville & haure. 602.
- Tapuyas, peuples du Brasil. 347.
- Tartares appelez Taquis des Chinois. 500. & Seres de Ptolomée. 502. se rendent maistres de la Chine. 563. en sont chassez par vn Bonze. *ibid.*
- S. Thomas Apostre a institué 8. Archeueschez en l'Inde. 583. s'il a presché à la Chine. 582. 583.
- Isle de S. Thomas, son estenduë & sa fertilité. 50. est peuplée des Portugais, & y a vn Euesque qui l'est aussi de Congo. 51.
- Thyin, bois excellent & rare. 108.
- Toro ou Terunxa, succede à son frere Zeïfadin Roy d'Ormuz. 370. est tenu en subiection par Hamed. 371. est deliuré & fait alliance avec les Portugais. 371. 372.
- Toro ville, jadis Elana, ou les Hebreux passerent la mer rouge. 175.
- Toroa Royaume, & ses antiquitez. 107. est au Roy de Monomotapa. 108.
- Toupinambaux peuples du Brasil, confederez des François. 333. ont chassé les Aymures de la coste. 327.
- Traistres couuerts plus dangereux qu'enemis descouuerts. 73.
- Transport des ames Pythagoricien creu des Sarrafins. 406. des Chinois. 577.
- Tribut que le Roy de la Chine leue. 511. 536.
- Trincico. Voyez Europe.
- La Tres-saincte Trinité cogneuë aucunement de quelques Iogues. 423. comment representée en la Chine. 584. 604. cōment par les Brachmanes. *ibid.*
- Tritons, hom mes-poissons. 6.
- Tuberons poissons fort dangereux. 91.
- Tujapaluco Seigneur Brasilien, conuert y à la foy avec 300. de ses vassaux. 346.
- Tupinaquins peuples du Brasil cruels. 275. sont confederez des Portugais, & ennemis iurez des Toupinambaux. 333. ont chassé du riuage de la mer les Aymures. 327.
- Tutan est appellé en la Chine le Viceroy d'une Prouince. 546. 632. son vestement, & le rang qu'il tient. 639. chasque Mandarin de la Prouince le visite de deux mois l'un. 650.
- Tygare ville d'Ethiopie. 245.
- Tygres farouches contre les Negres, & doux aux hommes blancs. 8.
- Tygres du Brasil, & leur nature. 252.
- V.
- Alfonse Vaëna Iesuite martyr. 294.
- Le P. Alexandre Valignan Prouincial ou Visiteur de la Compagnie de Iesvs en l'Inde plus de 25. ans, escrit des merueilles de la Chine. 498. 499. enuoye trois Peres à Macao, pour essayer s'ils pourroient auoir entrée en la Chine. 619.
- Vanlie 12. regnoit en la Chine l'an 1602. 559. vouloit innouer les vz de la Chine, mais les Mandarins s'y opposerent. 560. ils luy ont remonstré ses fautes. 659.
- Le P. George Vaz est enuoyé en Congo avec 3. autres Iesuites, dōt il estoit Superieur. 54. ce qu'il y fit avec ses compagnons. 54. 55. s'en retournent en Portugal. 55.
- Louys de Vazcōcel, Admiral d'une flotte, qui alloit au Brasil, & destiné Gouverneur dudit pais. 282. eust vne nauigation fort defaistreuse. 296. rencontre la flotte de Capdeuille Coursaire Huguenot, & se deffend vaillamment. 297. est tué en combattant. 298.
- Le Verre est fort prisé en la Chine. 527. 685.

La Vertu est de foy aymable. 271.

Victoire de foy mesme, combien grande & noble. 427.

Victoires miraculeuses. 31. 39. 88. 94. 274. 328.

Vie prolongée de Dieu au P. François Lopez, à la priere des Catholiques. 228.

Villes sur l'eau. 513.

Villes qui changent de place chaque mois. 514.

Villes de la Chine commēt basties. 521. il en y a de 5. sortes. 510. 511.

Vin de palme bon contre la gravelle. 13.

Ville de S. Vincent au Brasil. 259. sa situation. 337. les Iesuites y ont vne Residence, & ce qu'ils y ont fait. 262. 308. 337.

Visions merueilleuses. 41. 46. 118. 119. 215. 223. 270. 391. 392. 393. 395. 425.

Visiteur de la Chine, & son office. 550. il peut seul donner sentence de mort. 550. 571. comment il donne audience. 606. Voyez Chayen.

Vitey I. Roy de la Chine, inuenteur de l'artillerie, par l'ayde du Diable. 520.

Vœu fait à nostre Dame par les naufragans, & le dâger eut. 132. 133. 134. en vne grande tempeste, avec heureux succès. 199. vœu accompli. 153. 199.

Volaille en quantité incroyable à la Chine. 518. comment les Chinois la font esclorre, & la nourrissent sans frais. 517. 518.

Voyage d'Ormuz fort celebre, & comment on le fait. 365.

Commodité de voyager en la Chine. 653.

Vpis sont en la Chine les executeurs de Iustice. 547. 548. leurs marques. 612. ce qu'ils font quand quelque estranger vient parler à certains Mandarins. 628.

L'Vsure punie en la Chine. 528.

Vsures enormes à Ormuz. 386.

Xantio riuere de la Chine. 679.
Xatamas, c'est le Roy de Perse. 413. 414.

Xauchéo, ville de la Prouince de Canton. 558. les Iesuites y sont enuoyez par le Tutan. 670. sont logez pres de la ville. 671. leur maisō est volée. 672. les larrons taschèt de les en faire chasser. 673. le fruièt qu'ils y ont fait. 674.

Le P. Hierosime Xavier, nepueu du B. François Xavier, est enuoyé au grand Mogor. 463. ce qu'il fit à Cambaya. 464. &c. le reste de son voyage. 467. &c. l'accueil que luy fit le Roy. 470. l'affection qu'il luy monstroir. 480. le Pere luy parle de sa conuersion, & ce que luy respondit le Roy. 489.

Xauquin, cité de Canton, ou demeure le Tutan. 510. 632. les Iesuites y sont logez. 638. en sont congediez, & la cause. 641. on les y rappelle. 642. le Lancitao leur fait bastir vne Eglise & vne maison. 643. 644. comencent à y prescher la foy. 645. vn grand Lettre y est baptisé, avec vn autre citoyen. 650. les Anciens de Canton taschent de faire chasser les Iesuites de Xauquin. 659. Dieu empesche qu'ils ne viennent à bout de leur dessein pour ce coup. 661. &c. intentent le mesme pour la seconde fois par deuers vn nouueau Tutan. 664. 665. le Tutan condamne les Peres à sortir de Xauquin. 666. les va visiter avec le grand Chayen. 667. fait executer la sentence qu'il auoit donnée contre eux. 668. les enuoye à Xauchéo. 669. ils y auoient desja prés de cent Chrestiens. 658. 665. ils les instruisent de ce qu'ils deuoient faire, & s'en vont. 670.

Xauti, c'est le nom que les Chinois donnent au Createur & souverain Seigneur de toutes choses. 576.

Xequé signifie Capitaine parmi les Caf-

- fres. 144.
 Xeyé, vn grand Mandarin de la Chine, allât en Cour passe par Xauchéo. 674.
 le P. Ricci se presente pour l'accompagner, & pourquoy. 675. luy dit qu'il desiroit s'arrester à la Cour, ce que l'autre n'approuue. 676. se cuydent noyer tous deux. 677. le Xeyé congedie le Pete, & pourquoy. 678.
 Xuchéo ville en la Chine, ou il y a d'anciens Chrestiens. 585.
 Y.
Yeux verts admirez des Chinois. 525.
 Yeux grands tenus pour laids en la Chine. 526.
 Yuoire à vil prix en Congo. 8. 10.
 Z.
ZAbucalca arbres, & leur fruct. 250.
 Zacuté Ambassadeur du Roy de Congo, enuoyé à celuy de Portugal. 24. est baptisé en Portugal avec quelques Pages du Roy. 25.
 Iean de Zafra Iesuite martyr. 295.
 Zagazabus Abylfin est enuoyé du Prestre-jan en Ambassade vers le Roy de Portugal, & vers le Pape. 178. est fort amiablement reçu du Pape à Boloigne. 179.
 Zaire fleuve fort impetueux. 3. son origine & les cataractes d'où il descend. 3. 10. 30. il y a force Isles au milieu. 3.
 Jacques Cane le descouure. 21.
 Zanzibar Isle. 156.
 Le P. Vincent Zappata fait naufrage allant aux Indes. 126. eschappe de l'eau, mais il endure beaucoup sur terre. 143. 145. &c. meurt de faim & de misere. 150.
 Zebé, Lac. 6.
 Zebé, forteresse des Turcs. 182.
 Zebre animal, & sa figure. 8. 9. la queue d'iceluy est portée sur l'espaule droite par le Roy de Congo. 29.
 Zeisadin 2. Roy d'Ormuz, ieune & pupille. 367. est sommé de se rendre tributaire au Roy de Portugal, & sa response. 369. est contraint en fin de s'en rendre. ibid. meurt de poison, & son frere Toro luy succede. 370.
 Le Roy de Zeilan & d'Adel tributaire du Turc, fait la guerre à Claude Roy des Abyssins. 179. est blessé en bataille, & mis en fuite avec son armée par les Portugais. 181. est assiégé d'iceux. 182. ayât reçu secours du Turc, poursuit les assiegeans, en tue plusieurs, & prend le Capitaine Christofle de Gamma. 182. l'ayant fait souetter & bastonner luy rallie la teste. 183. les Portugais se rallièrent avec le Roy Claude l'assailent si viuement, qu'ils mettent ses gens en route, & le tuent. 184. sa teste apportée au Roy Claude. ibid.
 Zerigon animal, & ses qualitez. 151.
 Zoëns, peuple du Brasil, confederer des François. 333.
 Estienne Zurayre Iesuite martyr. 295. eut reuelation de son martyre long temps deuant. ibid.

FIN DE LA TABLE.

Fauts principales suruenues en l'impression.

Page 7 ligne 4. lises crystal. p. 11. 7. & d'un autre appelé Aqueluna, puis le pert. p. 16. l. 3. trouue. p. 51. l. 15. accutilly. p. 73. l. 6. la haine p. 90. l. 3. ou p. 104. l. 1. originaires p. 114. l. 2. souffrir. l. 39. riuere. p. 116. l. 12. Empire p. 178. l. 39. Paul p. 185. l. 17. Ethiopie, & en tous les autres lieux ou est le mesme mot. p. 216. l. 21. oraison. p. 219. l. 15. sachos ou il estoit, & comme, &c. p. 230. l. 10. de li. p. 244. l. 21. il estoit. p. 274. l. 1. Paratimanga. l. 22. mines p. 228. l. 22. tacheoient. l. 35. vocation. 194. l. 30. Prouincial. p. 365. l. 30. escorte. p. 501. l. 10. Chinois. p. 503. l. 21. *extrêmeurs*. p. 505. l. 10. Septentrionaux. p. 507. l. 16. canaux. p. 541. l. 5. cartes. p. 558. l. 24. ce qu'en rapporte. p. 571. l. 12. ou ent. p. 577. l. 26. qui y vont, en sortent. p. 592. l. 23. Conseil. p. 610. l. 1. Bonze. p. 685. l. 5. auerteroit p. 697. l. 15. trouuoit-on.

Acheué d'imprimer le 23. Iuin 1610.





LEGATORIA DEL RHE

